

# YYAMAJAM CHICHAM APAJUINU

El Nuevo Testamento  
de nuestro Señor Jesucristo  
en el idioma  
aguaruna



**La Liga Bíblica**

*Las Sagradas Escrituras para Todos*

El Nuevo Testamento  
de nuestro Señor Jesucristo  
en el idioma  
aguaruan

Primera edición, 1973  
Segunda edición, 1984  
Tercera edición, 1991  
Cuarta edición revisada, 2005  
Quinta edición, 2008

Publicado por  
© La Liga Bíblica 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

## CONTENIDO

Prólogo	5
Yamajam chicham Mateo agagbau (Evangelio de San Mateo)	7
Yamajam chicham Marcos agagbau (Evangelio de San Marcos)	70
Yamajam chicham Lucas agagbau (Evangelio de San Lucas)	106
Yamajam chicham Juan agagbau (Evangelio de San Juan)	169
Jisus ishiakbau aidau takasbau (Los Hechos de los Apóstoles)	215
Romanmaya aidau awetimu (Epístola a los Romanos)	270
Corintonmaya aidau nagkamchaku awetimu (Epístola 1 a los Corintios)	300
Corintonmaya aidau awentsaik awetimu (Epístola 2 a los Corintios)	324
Galacianmaya aidau awetimu (Epístola a los Gálatas)	340
Efesonmaya aidau awetimu (Epístola a los Efesios)	349
Filiposnumia aidau awetimu (Epístola a los Filipenses)	358
Colosasnumia aidau awetimu (Epístola a los Colosenses)	364
Tesalonicanmaya aidau nagkamchaku awetimu (Epístola 1 a los Tesalonicenses)	370
Tesalonicanmaya aidau awentsaik awetimu (Epístola 2 a los Tesalonicenses)	375
timoteo nagkamchaku awetimu (Epístola 1 a Timoteo)	378
Timoteo awentsaik awetimu (Epístola 2 a Timoteo)	385
Titu awetimu (Epístola a Tito)	390

Filemón awetimu	
(Epístola a Filemón) . . . . .	393
Hebreo aents aidau awetimu	
(Epístola a los Hebreos) . . . . .	395
Santiago papí agagbau	
(Epístola de Santiago) . . . . .	414
Pedro nagkamchaku papí agagbau	
(Epístola 1 de San Pedro) . . . . .	421
Pedro awentsaik papí agagbau	
(Epístola 2 de San Pedro) . . . . .	429
Juan nagkamchaku papí agagbau	
(Epístola 1 de San Juan) . . . . .	434
Juan awentsaik papí agagbau	
(Epístola 2 de San Juan) . . . . .	441
Juan kampakumá papí agagbau	
(Epístola 3 de San Juan) . . . . .	442
Judas papí agagbau	
(Epístola de San Judas) . . . . .	444
Iwainakbau	
(Apocalipsis) . . . . .	447

## PRÓLOGO

Este Nuevo Testamento de las Sagradas Escrituras se publica con el fin de ponerlo al alcance de los hablantes del idioma aguaruna. El grupo aguaruna está formado por unas veintiocho mil personas que habitan en la selva peruana, a orillas de los ríos Chiriaco, Cenepa, Nieva, Potro, Mayo, Santiago y Alto Marañón, y de muchos de su afluentes.



# YAMAJAM CHICHAM MATEO AGAGBAU

---

## Jisukristu muunji aajakú aidau

(Lc. 3.23-38)

- 1** <sup>1</sup> Ju ainawai Jisukristu muunji aajakajua nuna daaji agatkamua duka. Nigka David, Abraham aina nu wegantu aajakuí.
- <sup>2</sup> Abragka uchijiyai Isaac, Isaaka uchijiyai Jacob, Jacopa uchijiyai Judá nuigtú yachi aidaushkam.
- <sup>3</sup> Judá Tamarai akiauwai Faresan, Zarajai. Faresa uchijiyai Esrom, Esroma uchijiyai Aram.
- <sup>4</sup> Arama uchijiyai Aminadab, Aminadapa uchijiyai Naasón, Naasogka uchijiyai Salmón.
- <sup>5</sup> Salmón Rahapa juki akiauwai Boozan, Booz Rutan juki akiauwai Obetan, Obeta uchijiyai Isaí.
- <sup>6</sup> Isaí uchijiyai apu David, tuja David Uriasa nuwe aajakua nuna jukí Salomogkan akiauwai.
- <sup>7</sup> Salomogka uchijiyai Roboam, Roboama uchijiyai Abías, Abiasan uchijiyai Asa.
- <sup>8</sup> Asa uchijiyai Josafat, Josafata uchijiyai Joram, Jorama uchijiyai Uzías.
- <sup>9</sup> Uziasa uchijiyai Jotam, Jotama uchijiyai Acaz, Acaza uchijiyai Ezequías.
- <sup>10</sup> Ezequiasa uchijiyai Manasés,

Manasesa uchijiyai Amón, Amogka uchijiyai Josías.

- <sup>11</sup> Josiasa uchijiyai Jeconías nuigtú yachi aidaushkam, ditak akiinawajui Babilonianmaya aidau Israel aentsun achig yajuaku aina nunú tsawan jegatsaig.
- <sup>12</sup> Tuja Babilonia yajuakam batsamsag Jeconías akiauwai Salatielan, Salatiela uchijiyai Zorobabel.
- <sup>13</sup> Zorobabela uchijiyai Abiud, Abiuta uchijiyai Eliaquim, Eliaquima uchijiyai Azor.
- <sup>14</sup> Azora uchijiyai Sadoc, Sadoca uchijiyai Aquim, Aquima uchijiyai Eliud.
- <sup>15</sup> Eliuta uchijiyai Eleazar, Eleazara uchijiyai Matán, Matagka uchijiyai Jacob.
- <sup>16</sup> Jacopa uchijiyai José, María aishi aajakua nunú; tuja Maríayai akiinawai Jisus, Apajuí awemamu taku Kristu tujakbauwa nu.
- <sup>17</sup> Imaan aajakajua nunú Abragkai nagkamsa dekapá Davitai ejemak awai catorce aents, tuja Davitai nagkamsa dekapaja Babilonianmaya aidau Israel aentsun achijá yajuakajua nui ejemash catorce aents awai, aantsag Kristu akiinawai imanú ejemashkam catorce aents awai.

## Jisukristu akiinamu

(Lc. 2.1-7)

- <sup>18</sup> Jisukristu akiinatnai tibauk aatus aajakuí. José anagbauwai Marían

Jisukristu dukují atinun, tujash Maríak eke nematsuk pujayatak Wakaní Pegkejin ejapjukui. <sup>19</sup>Nunikatman José dekaa, nigka aishmag pegkeg asa: Wakenmataik tikichish dekeinatsaig idaisatjai, tiuwai. <sup>20</sup>Aatus José anentaimas kanittaman, Apajuí aentsji nayaimpinmaya kajanum wantintuk: “José David wegantu uchijiyah, utujimtsuk Maríak jukita, ame anagmama duka. Ni ejapjuka nunak Wakaní Pegkeji egkemtukam ejapjuka”, tiuwai. <sup>21</sup>“Nunú uchi akiinkui adaikata Jisus, ni aentsú tudaujin tsagkujug uwemtikatin asamtai.”

<sup>22</sup>Ju aatus ejapjukua duka, duwick Apajuí etsegtin tibauwa nu uminbaunum nunikui, duka tawai:

<sup>23</sup>“Ejapjuktinai makichik muntsujut aentsú takashtai, nunik uchigmaktinai uchi aishmagkun, nunú adaikatnaitjume Emanuel”, (nunak: “Apajuik jutijiai awai” taku tawai).

<sup>24</sup>Nu aatsa tima José shintaag, nayaimpinmaya aents tibaunak imatiksag umiak Maríanak niina jeen jukiuwai. <sup>25</sup>Tujash dutika jukish Josek Maríajaig tsanigchawai, eke uchi iwaiya nu akiintsagkik, nuní pujai uchi akiinamtai adaikauwai Jisus.

#### Yacha aidau kaunkag Jisusan emematiagbau

**2** <sup>1</sup>Herodes Judea nugka apuji wajas pujai, nunú nugkanmag yaakat Belegnum Jisus akiinawai. Nunik akiinamtai yaakat Jerusalegnum tikich nugkanmaya etsá minitaijin batsamin

aidau kaunkajui. Nunú aents aidauk yacha yaya aidaun dekapawag diisag dekau aajakajui. <sup>2</sup>Iman aidau Jerusalén jegawag iniimaidau:

—¿Tuwí pujawa judfo aidaun apuji atin uchi yamá akiina dusha? Ii nugken etsá jintain pujusá yaya wainkamji, Apu akiintai wantinkatnai timawa nunú. Nunika wainkaja minaji ni ememattasa, —tuidau.

<sup>3</sup>Nu tibaun aents aidau etsejiagtai, apu Herodes antuk puyatkau, tuja aantsag ashí aents Jerusalegnumia aidaushkam nuna antukag puyatkaju, nunikag:

—iWajukutskaih! —tusag kuashat pachis chichaidau.

<sup>4</sup>Nuna aatus apu Herodesak antuk, kuashat anentaimu. Nuniak sacerdoté apuji aidaun, chicham umiktin agagbaun pachis etsejin aidaujai untsukú, nunik:

—¿Tuwí Apu Kristush akiinatnaita? —tiuwai.

<sup>5</sup>Tutai dita ainak:

—Duka yaakat Belén, Judea nugkanum awa nui akiinatnai, juna aatus Apajuí etsegtujakú aidau agaju ainawai:

<sup>6</sup>‘Belén, Judea nugkanum awa juuwai yaakat imá piipichik, tujash nui akiinatnai makichik Apu, tikich apu aidaun nagkaesau Israel<sup>a</sup> aentsu Apuji atina nu’ tawai, —tuidau.

<sup>7</sup>Nuna dekaa apu Herodes untsukú nunú yacha kaunkajua nuna, tikich aidauk dekeinatsaig:

**a 2.6** “Israel” dekas yama nagkamchaku naamkamujig Jacob aajakuí, hebreo chichamnumag “tsanumin” taku tawai, niina uchijig doce ajujukuí. Untsu “Israel” tawa nunak Apajuí adaikauwai, nunak nayaimpinmaya aentsjai maaniku taku tawai. Niina daajig jimag aajakuí Israel, Jacob, nunin asamtai Apajuí chichame apachnum “Israela uchijí aidau” takug nuna uchijí doce aajakajua nuna tawai, “israelita” takushkam Israela uchijí aidaunum akiinkag yujakajua nuna ashí taku “judfo” tuuta, Hebreo tuuta awagmawai.



—¿Yaya wainkagmesh wajupá dukapea yujagme? —tusa chichastatus.

<sup>8</sup>Dutika shiig aujus dekajua Belén ishimak:

—Wetajum, nunikjum shiig dekaatajum tuwig pujawa uchi Apu atinush, nunika wainkajum waketkujum minash ujakatajum, wisha wenu uchin ememattajai, —tiuwai.

<sup>9</sup>Tusá aaja apu akatjam wegaju, nunikmag wainkaju yayan, ditá nugkeen batsamsá wainkamun. Nunik yaya eketbaun nemajuk we wenakua, jegá uchi pujamunum nuna mamikis yaya eketunum jegawajui. <sup>10</sup>Nu jegan mamikis yaya eketun wainkag shiig anejasaju. <sup>11</sup>Nunikag jegawag jegá waikmá uchin dukujijai pujuttaman wainkaju. Dutika uchin tikishmatug emematuidau. Nuninak ditá kajunjin ujakag uchin anentag waji wakejumain aidaun susaju: Oron, ekematai incienso pegkeja kugkuinun, kugkuin mirranashkam. <sup>12</sup>Juna dutikawag kintamag kajiittaman Apajui aentsji nayaimpinmaya: “Herodes pujamunum wakettsuk yajá tikich jintanum wakitkitajum”, tusa ujakú. Tima nunisag yajá tikich jintanum waketjau.

#### **José Maríajai Egipto tupikakbau**

<sup>13</sup>Nunú aents yayan wainak kaunkaju waketjamtai, Josenashkam nayaimpinmaya aents kajanum wantintuk: “José nantaktá, nunikam nuwem uchijai jukim Egipto nugkanum waamak wetá. Apu Herodes suntajin ishiaktatui uchin kajegtí tusa. Awi pujamin tsawan uminkamtai, wakitkita tusan ujaktajame”, tiu. <sup>14</sup>Tima Joeschkam nantakí nunú kashik uchin dukujijai juki Egipto weuwai. <sup>15</sup>Nunik nuanú pujusuí, Herodes jakamtai wakitkitatus. Tuja nuna dita Egipto wegajua duka, Apajui etsegtin aajakajua

nunú agagbaunum: “Mina uchig Egipto nugkanum pujaun unsuktatjai”, tawa nunú imanisag uminkauwai.

#### **Herodes suntaji aidaun uchin kajegtí tusa ishiakbau**

<sup>16</sup>Nunú aents atushtanmaya yayan wainak kaunkau aidau, yajá waketjamun Herodes dekaa: Tsanujajeapi, tusa senchi kajekú. Nunik ni suntaji aidaun: Ashí uchi Belegnumia, nuigtú Belén tikiju batsataidaushkam, jimag mijan ajamu nagkamsajum yamá akiinau aidaujai kajegtajum, tusa ishiaku. Nunak Herodesak yayan wainak kaunkau aidaun inias, wajupa tsawantak aayi uchi akiinash nuna shiig dekau asa tiuwai. <sup>17</sup>Juna Herodes dutika uchin kajegkua duka, Apajui etsegtin Jeremías agagbaunum:

<sup>18</sup>“Antukmajai Ramanum senchi buutuidaun,

nunak Raquel niina uchijí aidaunum buutak anentaish ichichtumain wajashmae,

uchijí aidauk jinawaju asamtai”, tawa nunú imanisag uminkauwai.

#### **José Maríajai Nazaret wakitkimu**

<sup>19</sup>Nunik dukap tsawan asa Herodes jakamtai, Apajui aentsji nayaimpinmaya José Egipto pujuttaman kajanum wantintuk: <sup>20</sup>“José nantaktá, nunikam uchi dukujijai jukim Israel nugkanum wakitkita. Yamaik uchin maatatus wakejibia duka jakae”, tiu. <sup>21</sup>Nunú tima Joeschkam nuween uchijai juki Israel nugkanum wakitkiuwai. <sup>22</sup>Nunik niina nugkeen jegakmá José dekau, Herodesa uchijí Arquelao, apají jakamtai ni apu wajas inamak pujau tabaun, nunik ajankauwai Judeanum wetan. Nunittaman kajanum ujakú: “Judeanum wetsuk Galilea nugkanum wetá”, tusa. <sup>23</sup>Tima yajá tikich jintanum

we, ni nugkeen yaakat Nazaret pujustatus jegau. Nunú aatus nagkaemakiuwa duka, Apajuí etsegtin Isaías chichaak: “Kristuk Nazaretnumia” tutai atinai, tiuwa nunú imanisag uminkauwai.

**Juan Yamijatin uwegshunum  
chichagkagtukbau**

(Mr. 1.2-8; Lc. 3.1-20; Jn. 1.19-28)

**3**<sup>1</sup>Jisus eke Nazaret pujai, Juan Yamijatin chichagkagtú wekagu Judea nugka uwejush wegakunum.  
<sup>2</sup>Nunik chichagkagtak: “Tudau takatak idaikujum Apajuí nemagkatajum, ni aentsnum inamjatnuk tsawantak ashí jegae”, tau. <sup>3</sup>Juan chichagkagtamuk yaunchuk Apajuí etsegtin Isaías agak:

“Makichik aents eemak taa uwegshunum wekagas senchi jiiiká chichagkagtak:  
‘Apu wekaesatnun jintan shiig iwajug esegak tutupit dakuegajama numamtuk, atumi anentaimish shiig iwajajum umiktajum Apu minitin asamtai’, titinai” tiuwa nunú imanisag uminkauwai.

<sup>4</sup>Juagkak camello uje najanamun nugkujakuí, akachumtaijish duwap aajakuí, manchin<sup>b</sup> dapá yumijijai yuujakuí. <sup>5</sup>Juan aatus uwegshunum chichagkagtak wekagai Jerusalegnumia aents aidau, ashí Judea nugkanum batsamin aidaushkam, namak Jordán uwet batsataidaushkam ni chichagkagtamun antukagtatus kautkajui. <sup>6</sup>Nunú chicham etsegbaun antukag ditashkam ashí tudau takataiji

aidau: “Apawah tsagkugtugta”, tusa etsegtumaidau. Nunikmatai nunú aents aidau Juagshakam Jordagnum yamiau.

<sup>7</sup>Aatus yamijatak pujai saduceo<sup>c</sup> aidau, fariseo<sup>d</sup> aidaushkam kautkajui, Juan yamigmagti tusag. Nunú imanik kaunkagmatai wainak, Juan chichajak: “iAtumek iwanchi uchijí asajum aents tsanú yujagme! ¿Wagka yamimagtasagmesh wakegagme? ¿Atumek ayatak yamimamuikis Apajuí suwimak sukagtumaina duka uwemtumainaitai tajumek? <sup>8</sup>Dekas tudau takatan idaisaush wajuku amainaita, nunú iwainmamkatajum pegkeg aina nu takaakjum. <sup>9</sup>Atumek: Jutiik Abraham wegantu asaja yupichuch uweemain ainaji, tumamigpa. Dekas tajime: Apajuik jujú kaya aina junakeshkam Abragka uchijí emamainai. <sup>10</sup>Ashí ajak nejechu aidauk, jachai ajaka tsupija apetiama numamtuk, aents tudaunak taká batsatun Apajuí suwimak susatnuk uminas awai. <sup>11</sup>Wika ayatak yumí yamijatjai tudaujin idayinak etsegtumainakui, tujash mina ukujui dekas minittawai mina nagkaetasu. Nunú yamigmagtatjume Wakaní Pegkejiya nujai, nuigtushkam nigki jiiyai suwimkan sukagtustinuk. Wika niina sapatjinakesh ukuitmaitsujai, nigka mina nagkaetasu senchigtin asamtai. <sup>12</sup>Nigki ashí aents aina nuwiyen akanjattawai, aents trigon ajakbau aidau juuká ijumag, awagti wampujin utsaak nejeen trigo ijumtainum yajumama numamtuk, Apajuí umigkau aidauunak jii ajumaish

**b 3.4** “Manchi” Diistá Mr. 1.6. **c 3.7** *Saduceo* aajakajua duka, Moisés chicham umiktajum tibau aajakua nunak betek umijakaju ainawai, nuninayatak nayaimpinmaya aentsuk atsawai tuja iwanchish atsawai nuigtushkam jakau aidaush nantagchatin ainawai tuujakajui.

**d 3.7** *Fariseo* aajakajua duka, Moisés chicham umiktajum tibau aajakua nunak betek umijakaju ainawai, nuninayatak ditá muunji aajakajua nunú takajakajua nuna imá senchi puyatjus umijakú ainawai.

kajinkashtina nui suwimkan suwak, niina umigkau aidaunak ni pujutaijin yajuaktinai”, tiuwai.

**Jisus yamimagbau**

(Mr. 1.9-11; Lc. 3.21-22)

<sup>13</sup>Tikich tsawantai Jisus Galileanmaya jiinki namak Jordagnum weuwai, Juan yamijjati tusa. <sup>14</sup>Nunik jegaamtai Juan yamimainchau dekapeak:

—Wiitag jamah amina yamijjata tumainnuk, čnuniaig ame minai yamimagtasam minam? —tiu

<sup>15</sup>Tama:

—Ehé, amina yamijjati tusan minitjame, mina awetiu ashí pegkejan dutikati timawa nuna imatiksianuk umikta tau asan.

Tutai Juagshakam yamijú. <sup>16</sup>Dutika yamijam Jisus yuminmaya jiinki nayaim ujanmatai, Wakaní Pegkeji<sup>e</sup> pauma nunin akaiki niini jeggattaman wainkauwai. <sup>17</sup>Nunú nuniaig antuekau nayaimpinmaya chicham: “Juuwai dekas mina Uchig anetaijuk, niini shiig aneajai”, tabau.

**Iwanch Jisusan pegkegchau takamtiksata tibau**

(Mr. 1.12-13; Lc. 4.1-13)

**4** <sup>1</sup>Jisus Jordán yamimagmatai Wakaní Pegkeji egkentujui, dutika juki uwegshunum emauwai, iwanch<sup>f</sup> Jisusan dekapsata tau asamtai. <sup>2</sup>Nunú uwegshunum pujusuí cuarenta tsawai, cuarenta kashi. Imaan tsawantai yujumkan ijagmak pujau asa, Jisuschakam yapajuauwai. <sup>3</sup>Nunitai iwanch chichajak:

—Ame dekas Apajuí Uchijiyaitkumek, ju kaya aina jujú pag emakam yuwakia, —tau.

<sup>4</sup>Tusá tama Jisus ayaak:

—Apajuí chichame agagbauwa nui: ‘Aentsuk imá yujumkajaigkik pujumait sui, Apajuí chichamega nujaishkam pujumainai’ tawai, —tiuwai.

<sup>5</sup>Nuna aatus Jisus timatai nui inagkeaki emauwai yaakat Jerusalegnum. Dutika jega Apajuí ememattai jeganamunum yakí nagkatkamunum iwaká awajus, <sup>6</sup>chichajak:

—Ame dekas Apajuí Uchijiyaitkumek tsekem iyaata, agagbau awai:

‘Apajuí ni aentsji nayaimpinmaya aidaun ishitkatnai ni Uchijí aidaun kuitamkatnunak’ tibauwai.

Tau asamtai, ame tsekem iyautai sh Apajuí ishiakbau igkumpak achigmaktinme, iyaakum kaya aina au tukumkaim, —tiuwai.

<sup>7</sup>Tama Jisus ayaak:

—Dushakam agagbau awai: ‘Amina Apujum Apajuiya nu pegkegchaunum dekapsatasamek wakeyipa’, tawai —tiuwai.

<sup>8</sup>Tusa timatai nuigtú iwanch Jisusan muja tsakajunum iwakuí. Dutika juú inaktamuik ashí nugkanum yaakat aina nuna, nuigtú ashí pegkeg aidaunashkam iwaintukui. <sup>9</sup>Dutika ashí inaktus:

—Ashí junak amina amastajame, tikishmatujam emematjita, —tau.

<sup>10</sup>Tama Jisus ayaak:

—iWetá iwanchih!<sup>g</sup> agagbau awai: ‘Imá amina Apujum Apajuiya duke emematta, nuniakum imá nigki umigkata’ tawai, —tiu.

e 3.16 “Apajuí Wakaní” tawa nunak “Wakaní Pegkejin” tau asamtai, “Apajuí Wakaní” takuish “Wakaní Pegkeji” taji. f 4.1 “Iwanch” tawa nunak tuinayatak griego chichamnum “Diablo” tai, hebreo chichamnum “Satanás” tawai. “Diablo” tawa duka “Apajuí nemajin aidau tsanumjin” taku tawai. Tuja “Satanás” tawa nunashkam “Apajuí Shiwaji” taku tawai. Nunin asamtai “Satanás” takuish tuja “Diablo” takuishkam iina chichamenig “iwanch” taji.

g 4.10 Diistá versículo 1.

<sup>11</sup>Tusá timatai iwanchik ukukiuwai. Dutikamtai nayaimpinmaya aents kautuawajui kuitamkagtatus.

**Jisus Galileanum ni takatji nagkamamu**

(*Mr. 1.14-15; Lc. 4.14-15*)

<sup>12</sup>Tikich tsawantai Judeanmaya apu, Juangkan aents achiká egketainum egkeau, nunikmatai Jisus nuna antuk Galilea nugkanum wakitkiuwai.

<sup>13</sup>Tujash nigka Nazaretak pujutsuk nagkaemakí, yaakat Capernaum Galilea kuchajin uwetus awa nui weuwai. Nunú nugkanum yaunchuk muun Zabulón, Neftalí aajakajua nuna uchijí wegantu aidau batsatu. <sup>14</sup>Nuna Jisus nunikua nunak, yaunchuk Apajuí etsegtin Isaías agajua nunú imanisag uminkauwai. Nunú agagbaunmag:

<sup>15</sup>“Zabulogkan nugke kuchá yantamen awa nui batsatutijum antuktajum, nunisjumek Neftalí nugke etsá akaetainmanini Jordán uwet awa nui batsatutigmeshkam antuktajum, antsagmek atum Galileanum judiuchu aidaujui pachimdaeja batsatutigmeshkam antuktajum.

<sup>16</sup>Nunú nugka nui batsamin aidautijum pegkegchau takaakjum suwea numamtinum batsatutijum, uwemat pachisa etsegbau antukjum tsauptin waintayama numamtuk wajaktinaitjume”, tawai.

<sup>17</sup>Jisus Capernaum jegaa, chíchagkagtutan nagkabau. Nuniak: “Tudau takatak idaikujum Apajuí nemagkatajum, ni aentsnum inamjatnuk tsawantak ashí jegae”, tiuwai.

**Jisus ni jintintaiji atinun cuatro namaká main aidaun yajuakbau**

(*Mr. 1.16-20; Lc. 5.1-11*)

<sup>18</sup>Tikich tsawantai Jisus Galilea kuchajin wekaekamá Simón, Pedro

daagtina nuna, ni yachi Andresjai namakan main asag retan ajuntuinak yujattaman wainkau. <sup>19</sup>Nunik wainak Jisus chichajak:

—Wegajai wi jintintuatjime, namak maatasajum yujagjum anmantuk, Apajuí chichame etsekgujum aents aidau minai ikautjin atajum tusan, —tau.

<sup>20</sup>Tusá tamawaik, ditá retjinak ukuinak nijai wegajui.

<sup>21</sup>Nunik Jisus ditajai ijunag machik kuwaesag wekamá, Zebedeo ni uchijí Jacobo, Juan aatus botenum chimpimas retjin apijuinak chimpimatman wainak, nunashkam:

—Wegajai mina jintintaig atajum, —tiuwai.

<sup>22</sup>Tama ditashkam:

—Ayú, —tusa apajinak ashí tikich takataiji aidaujui botenum ukuinak, Jisusjai wegajui.

**Jisus kuashat aents jintintuamu**

(*Lc. 6.17-19*)

<sup>23</sup>Nunik Jisus ashí Galilea nugkanum wekagas, jega ijuntai aidaunum wayaa jintinkagtau yamajam chichaman Apajuí nuní inapawai tusa, nuniak ashí aents jau aidaunashkam etsagau. <sup>24</sup>Nunú dutika Jisus etsaegkagtamun pachis kuashat etsejuk dapampajaju, dutikamun ashí aents Sirianmayashkam antukaju, nunikag kuashat jaun, iwanch egkemtuamun imaanjaun, jata iyashin ipimpin achikam pimpijú wekaemainchaun, ashí tikich jatai jau aidaunashkam ikautkaju, dutikam Jisuschakam etsagaakui.

<sup>25</sup>Jisus imatika aents jau aidau etsagamun antuinak, kuashat aents Galileanmaya, Decapolisnumia, Jerusalegnumia, Judeanmaya nuigtú Jordagkan amain batsataidaushkam shimutuidau, Jisus yamajam chicham etsegbau antukagtatus.

**Jisus shiig aneasjum  
pujustajum tibau**

(Lc. 6.20-26)

**5** <sup>1</sup>Imatika tuwajam Jisus wainak wakau nainnum, nunik nui ekeemsamtai ni jintinbau aidau kautuawaju. <sup>2</sup>Nunikmatai Jisus nagkama jintintak tau:

<sup>3</sup>“Atum iik nagkamik iina senchijinig pegkeg pujuta duka jumaitsuapi tautigmek, shiig aneasjum pujustajum, atumiin Apajuí inamjatin asamtai.

<sup>4</sup>“Atum wake besemag pujakjum, buutú pujautigmek, shiig aneasjum pujustajum, Apajuí ichichmamtan amasagtin asamtai.

<sup>5</sup>“Atum kakagchauch aidautigmek, shiig aneasjum pujustajum, atumnak Apajuí ashí ni anagtamauwa nunak amastin asamtai.

<sup>6</sup>“Atum Apajuinu pegkeg takastasa wakegakjum yapajaku, kitamaku waitmaina imanikjum waitiautigmek, shiig aneasjum pujustajum, atumnak Apajuí yaimpaktatjume nu wakegajum nuna takastí tusa.

<sup>7</sup>“Atum tikich waitiaush wait anentin aidautigmek, shiig aneasjum pujustajum, nunú dutikautigminak Apajuí atumnashkam wait anenjamjattagme.

<sup>8</sup>“Atum tsagkugnagjum pegkeg wajasú aidautigmek, shiig aneasjum pujustajum, atumek Apajuí wainkatin asajum.

<sup>9</sup>“Atum tikich aidaujaish pegkegchau awagdaitash dakitin aidautigmek, shiig aneasjum pujustajum, atumnak Apajuí mina uchijui tujabiagtin asamtai.

<sup>10</sup>“Atum Apajuinu pegkeg takaagmin tikich nuna dakituinak waitkam

pujautigmek, shiig aneasjum pujustajum, atumiin Apajuí inamjatin asamtai.

<sup>11</sup>“Atum mina dekaskeapi tusajum nemagtuidautigmin pegkegchau chichagtamainak, niimjutpas yujainak, atum chichakchamunash wainak tsanumjutpajag shiig pujuschamin awajtamainakuish, shiig aneasjum pujustajum. <sup>12</sup>Dakujustajum nuniakjum shiig aneetajum, atumek nayaimpinmaya wájí shiig pegkeg umikbau jukitin asajum, yaunchuk Apajuí etsegtin aidaunashkam atumin waitkagmaina aikasag waitkasu ainawai.

**Weega numamtin tsaaptina  
numamtin ainagme Jisus tibau**

(Mr. 9.50; Lc. 14.34-35)

<sup>13</sup>“Atumek ju nugka juwig tuke weega numamtin ainagme. Tujash nunú wee,<sup>h</sup> jea jeatuji megkaekamtaish, ¿itugsaya ataktush jea jeatush emamainaita? Ayatak agaa ajapmaina numamtuk, atumshakam Apajuinu pegkeja nunú takatsuk pegkegchau aidau takaakjumek ayatak bakumattagme, nuniakjum Apajuí suwimkega nunú jukittagme.

<sup>14</sup>“Atumek ju nugka juwi batsatina nuna tsaaptinjiyaitjume. Yaakat nainnum auk uumkag amaitsui.

<sup>15</sup>Lamparashkam ekemakaik dukuká idaichatiame, dutiktuk yakí ekentayame jegan tsaaptin emamtai, aents aidaush diisá yujastinne tusa.

<sup>16</sup>Atumshakam numamtuk, ashí pegkeg aidauk takaakjum iwainaktajum, tikich aents aidaush wainainak ditashkam Apajuí nayaimpinum pujuuwa nuna ememattinme tusajum.

---

**h 5.13** “Wee jea jeatuji megkaekamtaish” tawa junak Palestinanmaya week nigkish jea jeatujig megkayin ainawai tawai Thomson.

**Chicham umiktin agagbauwa nunú pachisa Jisus jintinkagtuamu**

<sup>17</sup>“Wika jujú nugka juwig Moisés chicham umiktinun agajua nuna esakagtasauk taachuitjai, tuja Apajuí etsegtin aidau agajajua nunakeshkam idaisatajum titasankesh taachuitjai. Wika Moisés, tikich Apajuí etsegtin aidau mina pachitus agaju aina nuna umiktasan tauwaitjai. <sup>18</sup>Nuna tajim nunak dekas tajime: Nugka, nayaim aina nunú megkagainsaigkik chicham umiktinun Moisés agajua duka, makichkish yapajinashtinai, ashí betek imanisag uminkatnai. <sup>19</sup>Tuja jujú chicham umiktin aina juwiyau imanchau diinak, tikichnash dutiksag jintintuk, Apajuí eme anentsá inam achaghtinai. Untsu nunú chicham umiktajum tibauwa nuna betek umiak tikichnashkam dutiksag jintintuau aidauk, Apajuí eme anentsá inam aghtinai.

<sup>20</sup>“Tujash atum fariseo aidau, chicham umiktinun jintinkaghtin aidaujau Apajuin umijuina nuna nagkaesau umigchakjumek, Apajuí inamak achatin ainagme.

<sup>21</sup>“Moisés chicham umiktin agagbauwa nuanuig: ‘Magkagtuawaipa, ame tikich maakmek suwimak suwam atatme’ tawai. <sup>22</sup>Tujash dekas wi tajime: Makichik aentskesh ni yachin tuke aneas kajejauk, suwimak suwam amainai. Nunisag yachin anentainkachu chichajú wegagushkam, apu chichaman epegkin aidau dekaajam amainai, tuja yachin kajejak tikima pegkegchaun chichajushkam jii ajumaish kajinkashtina nui pujus waittsatnai.

<sup>23</sup>“Ame tikich aentsjai kajegdaikamu ajutjamaig, Apajuí anentag susata tibaugmea nu jukim jega Apajuí ememattainum wetsuk, <sup>24</sup>dekatkauk

amijai kajegdaikamua nunuwá wejim: Yamaik tsagkugdajiami, tusam epegtuniata. Nunikam agkan wajasam Apajuí ememattasam wegakmesh ni anentag susata tibaush jukim wetá.

**Shiwajumjaish shiig chichasá epegkeata Jisus tibau**

(Lc. 12.57-59)

<sup>25</sup>“Makichik aentskesh: Pegkegchau takagtusume tusa apunum chichaman egketjamamtai, nijai apu chichama epegnunum wegakmek, jintaag shiig chichasam epegtuniata, nunikchaminig apu chichaman epegnunum jegaa amin dekahtama, ni jujamki achijatin aidaunum sujupakmatai, achijatin jujamki aents katsek aidau achiká chimpitainum egkepawai. <sup>26</sup>Junak dekas tajime: Amina apu achigmak egkepamtaig kakajus jiiinmaitsume, ayatak amina kuichkijum ashí akikmakam, shiig ashimkam jiiinmainaitme.

**Jisus tsanijinawaigpa tibau**

<sup>27</sup>“Moisés chicham umiktinun agajua nuanuig: ‘Tsanijinawaigpa’ tawai.

<sup>28</sup>Tujash wi dekas tajime: Aents nuwan dutikachainjash tusa wakegas diyaushkam, anentainig tsanijimui.

<sup>29</sup>“Nuniau asamtai amina jiiim pegkegchau anentaimtuja diitnum niimtijamkuig, jiiim untsugmia nu ukuinkam ajapmainaitam numamtuk wajaktá tudau takat idaikum, dekas pegkejai tudau idaisau asá Apajuí inamtaijin makichik jiiyaik niimsá waimaina numamtuk wajaumuk, nu dutikachmek ashí amina iyashmijai jii ajumaish kajinchaunum pujusam tuke waitú pujumain asamtai. <sup>30</sup>Tuja uwegmishkam pegkegchau takamtijamkuig, uwejum untsugmia nu tsupikam ajapmaina numamtuk tudau

takat idaisatajum, dekas pegkejai tudau idaisau asá, pujut tuke atina nui makichik uwegtin waimaina numamtuk wajamuk, nunú dutikachaminig ashí iyashim jii ajumaish kajinchaunum pujus waitmain asamtai.

**Jisus nuwak idaimaitsui tibau**  
(Mt. 19.9; Mr. 10.11-12; Lc. 16.18)

<sup>31</sup>“Junashkam Jisus jintinkagtak tiuwai: Nuwa idaitan pachis Moisés agajua duka: ‘Aishmag nuwen idaikug papiin agag, yamaik idaijai, tusa nuadu idaimainai’, tawai. <sup>32</sup>Tujash wi tajime: Aishmag nuwen ekagmakchau aig idaikug, aentsjai tsanijinata tusa awemak itugmaina numamtuk awagmawai. Nuwa idaisamujai nuwenushkam aantsag mai ekagmawai.

**Atum dutikatin pachisjumek**  
**Apajuik adaikaigpajum Jisus tibau**

<sup>33</sup>“Nuigtushkam Moisés aents aidau yaunchuk agatjamunum tawa nu dekagme, duka: ‘Ame Apajuí pachisam dutikatjai tibauk umitskek idaisaipa’, tawai. <sup>34</sup>Tujash wi tajime: Apajuí daajiya nu adaikajum, Apajuish dekas waitui wi taja nunú umiktinak, tusagmek tiigpajum. Tuja nayaimpia aushkam Apajuí pujutai asamtai, au pachisjumshakam tigpajum. <sup>35</sup>Jujú nugka jushakam pachisjumek tiigpajum, Apajuí najamsa eketbau asamtai; Jerusalegshakam pachisam wainkam chichakaigpa, jujú yaaktanmag Apu ju nugkanmaya aina nuna nagkaesau pujusá inamjatin asamtai. <sup>36</sup>Atumi pujutjum pachisjumesh tiigpajum, atumek intashim puju atí takugmesh, tuja bukusea atí takugmeshkam dutikmainchau asajum. <sup>37</sup>Dekas nunú

wainkam tu wekaetsuk, ayatak tutupnik ame dutikmainaitkumek ‘ehé’ titá, tuja ame dutikmainchawaitkumshakam ‘atsá’ titá, aaja tutsuk wainka tu wekaebauk pegkegchau asamtai.

**Jisus pegkegchaunmag**  
**ikdaikaigpajum tibau**  
(Lc. 6.29-30)

<sup>38</sup>“Atumek Moisés yaunchuk agagbauwa duka dekagme, nuanuig: ‘Aents jiimin emestugmakuig, ameshkam dutiksamek emestugta, tuja daimin akagtamkuishkam, ameshkam dutiksamek niina nai akagkata’, tawai. <sup>39</sup>Tujash wi tajime: Duka dutikmaitsui. Amina pegkegchau takagtamkuishkam iikatasam wakeyipa. Makichik aentskesh yapim untsugmia atú awatamkuishkam, atumesh iikajum awattsuk, juinia yapijuish awatita tusajum ayampatuatajum. <sup>40</sup>Makichik aentskesh nugkutaigmin atanjamkitatus utugchatan aputugmakuig, awantak pataká nugkutaigmesh’ susata. <sup>41</sup>Aents kijinun amaak: ‘Jujú jukim makichik kilómetro kuwagtukta’, tujamkuishkam jimag kilometronum ejentuntajum. <sup>42</sup>Atsumamun segapainakuishkam sujittsuk susatajum, tuja atumiin wajiigmin tsagkatjukta tujamkuishkam, atsá tusa sujittsuk tsagkatkatajum.

**Shiwajum aidau**  
**aneetajum Jisus tibau**  
(Lc. 6.27-36)

<sup>43</sup>“Dushakam yaunchuk agagbau chichaak: ‘Amejai ijutkamu aneakum, shiwajum aidauk ausaigpajum’ timawa duka shiig dekagme. <sup>44</sup>Tujash wi tajime: Atumi shiwajum aidaush aneetajum, nuniakjum atumin pegkegchaun

---

i 5.40 “Awantak pataká nugkutai” tawa nunak, judío aidauk tsetsektin ejamakta tabaunum awantak pataká nugkujakú asagmatai tiuwai.

chichagtamaidaush pegkegnum chichagkatajum. Dutiksagmek kajegtamaidaush pegkegnum yaigtajum, waitkagmainakuish, dita pachisjum Apajuí aujtustajum, ni esegati tusajum. <sup>45</sup>Nunú aajam dutikakmek, ii Apají nayaimpinum puja nuna uchijí atatme. Apajuik ashí aents pegkeg, pegkegchau aina nudaujai etsanak etsanmitkawai, aikasag yuminashkam pegkejan takaidau, pegkegchau takaidaujai yutumtikui. <sup>46</sup>Tujash atum aents anempaina nujaig aneniakjumesch éwají imana juwagme? Aents pegkegchau aidaushkam ni aneeniamujaig aneeninawai. Nunitsuk atumin kajegtamaidaushkam atumek aneemainaitjume. <sup>47</sup>Tuja atum imá atumin pataim aidaujaig shiig anendaisa chichasá pujakjumesch éwají imana iwainame? Nunak Apajuin umigchau aidau nunin ainawai. <sup>48</sup>Dekas atumek pegkegchau atsugbau atajum, iina Apají nayaimpinum pujú pegkegchau atsugna ibau.

**Aents atsumau yayamunak tikichik dekamainchau ainawai**

**6** <sup>1</sup>“Atum pegkeg takaajum nunú aentsnum iwainmankata tabaunum dutikawaigpa, kuitamamkatajum. Atum ayatak aentsnumak iwainmankatasa nuniagtaik, iina Apají Apajuí nayaimpinum pujuwa duka wájí shiig pegkeja nunak amaschagtinai.

<sup>2</sup>“Nuniau asamtai atum aents atsumau yayakjumek, tikich aidaush wi dutika takaamun dekaatnume tusagmek jega ijuntainmagkesh, jinta nagkaematainmagkesh etsejú yujaigpajum; nunak aentsú tsanú aidau aents eme anenjús diigsatnume tusag nuní yujau ainawai. Dekas tajime: Nuna nunidauk aents eme anentam aidau asag Apajuí akiamak achagtinai. <sup>3</sup>Jujú

aatus asamtai, atum aents atsumak waitiau yayakjumesch, wi aajan yaimjai tusagmek ame shiig chichataigmikesh ujakaigpajum. <sup>4</sup>Dekas pachitsuk idaisatajum etsejú yujatsuk, nunak ii Apají Apajuí nu ii takaamunak wainui, nuaduí atak nayaimpinum akigmak wájí shiig pegkeg aidaun sujamsatnai.

**Apajuí aujut Jisus jintinkagtuamu**  
(Lc. 11.2-4)

<sup>5</sup>“Atum Apajuí aukjugmeshkam, aentsú tsanú aidau, aents waitkatnume tusag jega ijuntainum tuwakbaunum wajaidiag, nuninachkush jintá ashí aents wainainamunum wajantag, senchi chichaká Apajuin aujú yujau aina nunikaigpajum. Dekas tajime, nuna nunidauk aents eme anentam aidau asag, Apajuí akiamak achagtinai. <sup>6</sup>Tujash atum Apajuí aukjugmek, ame kanutaigmin wayaam waiti epenim pujusam, tikichish dekaainachbaunum amina Apa Apajuí nu ausata. Aaja tikich dekachbaunum segamash, Apajuik ashí wainainamunum wájí shiig pegkeja nuna amastinai.

<sup>7</sup>“Atum Apajuí aukjugmesh chicham imanchauk awá awagkijum segaigpajum, Apajuin dekaskenum nemagchau aidau imatjamas imá shiig antugtukainta tusag nunak imatin ainawai. <sup>8</sup>Atumesh nujai betekak aigpajum, Apajuik dekawai atum atsumamunak eke segatsjuminig. <sup>9</sup>Nuniau asamtai atum Apajuí aukjugmek aatsajum titajum:

‘Apawah, amek nayaimpinum pujuwaitme.

Pegkegmaitam ibau asamin, ashí tikich aidaush imá aminak emematjabiagtinme.

<sup>10</sup> Amek jutiishkam inajatjata.

Amina aentsjum nayaimpinmaya ame wakegamun umigtamin aina



dutiksag nugkanmayashkam  
umigtukti tusam.

<sup>11</sup> Dutiksamek ii yuwatnushkam kashí  
kashinig sukagtita.

<sup>12</sup> Ii tudaujishkam tsagkugkagtugta,  
juitii tikich pegkegchau  
takagtamaidaush tsagkugnaitag  
aikasmek.

<sup>13</sup> Iwanch pegkegchaun takamtiksati  
tusamek idaikagtutsuk, ayatak  
yajitkam agkanmitkagtuata',  
tiuwai.

<sup>14</sup>“Atumin tikich pegkegchau  
takagtamsau tsagkujakjumek,  
atumshakam iina Apají Apajuí  
nayaimpinum puja dusha tsagkujam  
atatjume. <sup>15</sup>Untsu tikich pegkegchaun  
takagtamsau tsagkugchataik,  
Apajuishkam atumi tudaugminash  
tsagkugtamjashtatui.

**Ijagmá pujusá Apajuí ajut Jísus  
jintinkagtuamu**

<sup>16</sup>“Atum yujumak ijagmaka pujusjum  
Apajuí aujkgumesh, aentsú tsanú aidau:  
Wi ijagmá Apajuí aujbaunash tikich  
aidaush waitkatnume, tusag wake besekag  
ayatak anentaimas yujau aina atumek  
nunikaigpajum. Dekas tajime: Nuna  
nunidauk aentsnum iwainmamá yujaidau  
asag, Apajuí wájí shiig pegkeg suwamak  
achagtinai. <sup>17</sup>Nuaduí ame yujumak  
ijagmaka pujusam Apajuí aujkumek wake  
besekam wekaetsuk, yapim nijaim, shiig  
temashmajam, shiig dakunkut wekaesata,  
<sup>18</sup>tikich aents aidaush ame yujumak  
ijagmaka wekaesá Apajuí aujbaugmin  
dekagmawainum. Ame ijagmaka  
wekaebaunak Apajuí waipau asa, ame  
atsumamu segamashkam nigki amastatui.

**Nayaimpinum wiyakchameaut  
(Lc. 12.33-34)**

<sup>19</sup>“Jujú nugka juwi wajiin kabau  
emesmain, nuniachkush

kawanchjumain, kasashkam wayaa  
kasamain aina juninum  
wiyakchameatasagmek wakeyigpajum.  
<sup>20</sup>Dekas nayaimpinum kabaush wajiin  
emeskamtai megkaemainchau,  
nuniachkush kawanchjumainchau,  
kasashkam wayaa kasamainchauwa nui  
wiyakchameatajum. <sup>21</sup>Nunú  
wiyakchameatin ajutjamaina nuanuig  
anentaimsajum pujustajum.

**Lámpara pachisa augmattsamu  
(Lc. 11.33-36)**

<sup>22</sup>“Atumi jiimek lámpara ekemakam  
tsaaptin emaama numamtuk atumi  
iyashminak awagmawai. Jiim pegkeg  
asamtai shiig wainmamainaitam  
imatiksam, ashí pegkeg aina duke  
anentaimtaik, anentaiminish tsaaptin  
ajutjamainai. <sup>23</sup>Untsu jiim  
pegkegchawaitkui  
wainmamainchauwaitam nunisjumek  
ayatak pegkegchawk anentaimkugmek  
suwenum pujagme. Aminí tsaaptin awa  
nu suwe wetaik, nuní nagkaemas  
pujutjum pegkegchau wemainai.

**Inakak jimá apugtinuk  
amait sui Jísus tibau  
(Lc. 16.13)**

<sup>24</sup>“Inakak jimag apugtinuk amait sui.  
Tikich apujin imá senchi aneak, tikichin  
dakitmainai. Nuniachkush makichik  
apujin wakejus umijak, tikichnak  
dakitau asa umigmait sui. Numamtuk  
atumshakam Apajuí umigkata tu,  
wiyakchameatasana anentaimtu  
wajamait sugme.

**Apajuí ni uchijí aidaunak  
kuitamui Jísus tibau  
(Lc. 12.22-31)**

<sup>25</sup>“Junashkam tajime, atumek:  
¿Wajina yuwanuk, wajina uwagnuk,  
wajina nugkugnuke pujustaja? tusagmek

uyumá pujuigpajum. Yutái nagkaesauwa duka dekas atumi pujutjümia nuuwai, tuja jaanchin nagkaesauwa duka, atumi iyashmia nuuwai. <sup>26</sup>Atumesh pishak agkajunum nanamaina nunú anentainsajum diistajum. Ditak ajakmakagkesh juwinatsui, jeganakesh jegamkag yutaijinak ijumainatsui, nuniaunak Apajuí suwawai dita yuwatnunak, dutikam nuna yusag batsatainawai. Tujash atumetjume dekas pishak nagkaesau aidautigmek, iman ainagminish ¿wagkag Apajuish atum atsumamunash amaschagtinme? <sup>27</sup>¿Atumesh wajupatigmea, tikich esajam aina ibau wisha atajai tusajum senchi anentaimtú pujakjumes esaumainaitjume? <sup>28</sup>“¿Wagka jaanchish imá puyatjagme? Atumesh yagkug yagkujuina nunú anentainsajum diistajum. Yagkug aidauk takainatsui, ujnash kutamainatsui. <sup>29</sup>Salomón nugkutaí pegkejan tikich aents aidau waitus najanamun sumak nugkujá, tikichin nagkaesau iwagmamajakua nuna nagkaesau pegkeg iwajamun yagkujuinawai, Apajuí yagkugmitkamu asag. <sup>30</sup>Yagkug ikamia aidau yamaikik pegkejan yagkujuk, ajuma duwi etsa sukuam kagagtin aidaunakesh, Apajuí imatikas iwaja ibaush, ¿wagka atumesh minash nigkiap imatikas iwagtumainaita tatsugme, Apajuyai imatikas kajinas anentaimchau aidauwa? <sup>31</sup>Nuadú atumek: ‘¿Wajinak yuwatja, wajinak uwagatja, wajinak nugkugtaja?’ tusajum uyumá pujuigpajum. <sup>32</sup>Nunak aents Apajuí nemagchau aidau, nunin aidaun uyumas anentaimtuinak waitú yujau ainawai, tujash atum atsumamunak atumin Apa nayaimpinmayaya nu shiig dekagtamui. <sup>33</sup>Nuadú dekatkauk Apajuí pegkegnum

inapa nunuwá umigkatajum. Nuniakjume ashí nunú aina dushakam aan kuashat jukitnaitjume. <sup>34</sup>Atumek tikich tsawantin atinuk, wajuk pujustajaki tusajum emtikajum puyatjú pujuigpajum, imá makichik tsawan tsawamunmayag puyatjusjum anentaimtitajum, Apajuí atum utugchatnum jegataish yaimpaktin asagmatai.

**Tikichi pujutji pachisjume  
augmatigpa tibau**  
(Lc. 6.37-42)

**7** <sup>1</sup>“Tikichi pujutjig augmatú yujaigpajum, atumnash Apajuí aikasag tujaminum. <sup>2</sup>Tuja atum tikich aidau pegkegchaujish augmatú yujataik, Apajuí atumnash nunú aents tajum dutiksag tujamatjume. Atum tikich itujagme dutiksag Apajuí atumnash dutijamattagme. <sup>3</sup>¿Wagka yatsum imanchau takaish, atum imá pegkegchau takayatkugmesh, auk pegkegchau takaawai tusagmesh augmatú yujagme? <sup>4</sup>¿Itugsamek ame imá pegkegchau takaayatkumesh, yatsum imanchau takau diigsamesh nunikaipa titagme? Nunú nuniakjume amina jiimin tsetse muun egketukesh wainkam jiikí ajaptsuk, yatsumi jiin tsetse piipich egketu wainkam: Jasta jiigkitjame, tumaina numamtuk wajajume. <sup>5</sup>iAentsú tsanú aidauwah! Dekas dekatkauk ame imá pegkegchau takaam nunuwá idaisata, nunikam yatsum imanchau takaidaushkam, idaisata titajum.

<sup>6</sup>“Tuja Apajuí chichame pegkegma nu ujamaitak antutan dakituinakuig, waitkatsuk idaisatajum, ditak yawá kajen aidau yutai pegkeg suwamaitak iiki esajatta tuwama numamtuk wajaidau asagmatai. Tuja makichik waji pegkeg akik aidauk kuchí batsamtainig

ukubaitsugme, kuchi dajag emesjainum tusam. Numamtuk wajainawai aents pegkegchau aidauk chicham pegkeg antutan dakituinak.

**Segatajum, egaktajum,  
untsuktajum Jisus tibau**  
(Lc. 11.9-13; 6.31)

<sup>7</sup>“Apajuishkam segatajum, imatjamak amastatjume; egatash egaktajum, egakjumek, igkugtatjume; untsuktajum, imatjamak waitin ujatjamtatjume. <sup>8</sup>Ashí aents sumauk suwam auwai, egauk igkuinai ni egamujinak, waitinum wajas untsumushkam waiti ujatam auwai. <sup>9</sup>¿Atumesh uchijum yujumkan segapaig, kaya sumainkaitjum? <sup>10</sup>¿Dutikachkugmesh uchijum namakan segapaig, dapi sumainkaitjum? <sup>11</sup>Atum pegkegchau ainayatkugmesh, uchigmik pegkeg suu ainagme. Atumkesh nuniagminish, Apajú nayaimpinum puja dusha ¿wagka atum pegkeg sumamunash amaschagti?

<sup>12</sup>“‘Atum tikich aidau shiig awajuktinme tusajum wakejin ainajum, nunisjumek tikichish shiig awajkatajum.’ Aatus Moisés chicham umiktinun agajua nuwish tawai, tuja aantsag Apajú etsegtin aidau agaju aina nuwishkam tawai.

**Jinta menakun pachis Jisus  
jintinkagtuamu**  
(Lc. 13.24)

<sup>13</sup>“Waiti menakua nuní wayatajum. Kuashat aents aidau jinta untsujin, waiti wegkajam megkaetanum ekagta nuní imá weenawai. <sup>14</sup>Tuja machikiuchi aents jinta tsejgkuch, waiti menaku pujut nagkanchaunum ekagta nuní waidauk.

**Numik neje diigsajum  
dekamainaitjume Jisus tibau**  
(Lc. 6.43-46)

<sup>15</sup>“Atum aidautigmek kuitamamkatajum: ‘Apajú chichame

etsejin ainaji’ tusag, waitan jintinkagtuina nu tsanugmajainum. Ditak aents kasa ishamain ainayatak, aentsun shiig kumpamá ajuma duwi kasajama numamtuk wajainawai. <sup>16</sup>Nuaduí atumek aents aidauk wainmainaitjume ditá takatji diigsajum. Untukjak munchiinak nejetsame, aantsag uvashkam jagkinmayag juushtayame. Numamtuk aents pegkejak pegkegnak takaawai, tuja aents pegkegchaushkam pegkegchaunak takaawai. <sup>17</sup>Numamtuk ajakshakam pegkejan nejenuk nunisag pegkegnak nejegame. Tuja ajak pegkegchaun nejenchakam nunisag pegkegchaunak nejegame. <sup>18</sup>Nuniau asantai ajak pegkejan nejena duka, pegkegchaunak nejemait sui, aantsag pegkegchaun nejenchakam, pegkegnak nejemait sui. <sup>19</sup>Ashí numi pegkegchau nejen aidauk tsupija apea ajaptayame. <sup>20</sup>Nuaduí atumek aents aidauk wainmainaitjume ditá takatji diigsajum.

**Nayaimpinmag ashí  
wayachagtinai Jisus tibau**  
(Lc. 13.25-27)

<sup>21</sup>“Ashí aents mina dekaskenun umigtuinachiatak: ‘Apujuh, Apujuh’, tujutuina duka Apajú inamak achagtinai. Mina Apag nayaimpinum puja nunú wakegamun umiina nuuwai Apajú inam agtinuk. <sup>22</sup>Tuja wi tsawan jegaaku nayaimpinmayan minitai, kuashat aents: ‘iApujuh, Apujuh! Iishkam kuashat takasuitji amina chichamjum etsegku, nuniaku ame daagmin wakan pegkegchau aidau aentsun egkemtuaush jiijá utsantujakuitji, tuja aents dutikmainchau aidaush kuashat takasuitji’, tujutiagtinai. <sup>23</sup>Tusag imatjutuina kuish wi chichagkun: ‘iTuwiyants ainajum!

wainchauwaitjime. iPegkegchau takau aidauwah, wetajum!' titinaitjai.

**Jega jegabaun pachis Jisus  
augmattsamu**

(Mr. 1.22; Lc. 6.47-49)

<sup>24</sup>Aents mina chichamjun antugtukag, wi tabaun imatiksag umigtuidauk, aents jega jegamtan dekau nugkan initak tai kayanum dekanmitkak ajia jegamama numamtainai. <sup>25</sup>Nunú imatika jegamkamunak yumi yutug dujajakush, dase senchi umpuakush yumputsame, kayanum dekanmitkaka ajia shiig jegamkamu asamtai. <sup>26</sup>Untsu mina chichamjun antuinayatak umigtachuk, aents jega jegamtan dekachu kaamatkanum tauk ajigká jegama numamtuke. <sup>27</sup>Nunú nuninum jegamkamunak yumi yutug dujajua piyujak, dase senchi umpuak yumpuag ajapama numamtainai.”

<sup>28</sup>Juna aatus Jisus jintinkagtua ashimkamtai, aents aidauk puyatjusag antugkajui, <sup>29</sup>wagki aents chichame antugtai aidaun, chicham umiktinun jintinkagtin aidaunash nagkaesau nigka jintinkagtua asamtai.

**Aents jata lepra achikbaun  
Jisus etsagagbau**

(Mr. 1.40-45; Lc. 5.12-16)

**8** <sup>1</sup>Nuna ashí jintinkagtua ashimak, ni jintintaiji aidaujui nainnumia akaiki wetai, kuashat aents saetus ashinaidau. <sup>2</sup>Nunia aents jata lepra tutai achikam jaak pujau, Jisusan wainak nugká tikishmag pujus segaak:

—Apuh, wakegakmek etsaentumainaitme, —tau.

<sup>3</sup>Tama Jisuschakam uwejen antiak:

—Wakegajai, yamaik tsagagta, —tiuwai. Tamawaik leprak

megkaekauwai. <sup>4</sup>Nunikmatai Jisus chichajak:

—Wetá, tujash makichik aentskesh ujakaipa, tutupit sacerdote pujamunum jegaata, nuniakum Apajuinu atin jukim, Moisés tibauwa dutiksamak ejegata, ditashkam waipakag dekaskeap tsagaje tujamtinme, —tiu.

**Jisus Capernaumnumia capitani  
inaken etsagagbau**

(Lc. 7.1-10; Jn. 4.43-54)

<sup>5</sup>Nuna tusa ukuak nui jiinki, Jisus Capernaum jegattaman capitán tajuntun:

<sup>6</sup>—Apujuh, mina inakeg senchi jamae chichigká, nantamaichame, ashí iyashí aidaun najaimak senchi waitmae, nuniak pegajinig tepeme, —tiuwai.

<sup>7</sup>Tama Jisuschakam:

—Ayú, wi tajuan etsagagtajai, —tiuwai.

<sup>8</sup>Tusa tutai capitán' chichaak:

—Apuh, wika amea ibaunak, mina jegajuig wayaata tumain dekapeatsjai, nuigtushkam judiuchu asan. Nuniau asamtai ayatak juajuig pujusmekesh inakjuk tsagagti tujutta, tusa ame tamak tsagagtatui. <sup>9</sup>Tuja wi apu umigbau ajutui, aantsag suntag mina umigtuidau ajutuinaawai, nunú aidaun wi: 'Jiinajum shiyaktajum', tamak jiinag shimumainai, tuja: 'Waketjatajum', tamashkam waketug kaunmainai, nunisag mina inakeg aidaushkam: 'Ju dutikata', tamak betek umigtuinawai. Aantsag ame juwi pujusmek: 'Tsagagti', tamak tsagagtatuapita tajai, —tau.

<sup>10</sup>Nuna aatus tutai Jisus anentai jegagchau, nunik nui aents minidaun:

—Dekas tajime, Israel aina juwiyagkesh imatikas minai kajinas anentaimunak wainchaujai. <sup>11</sup>Nunin

asamtai tajime: Ashí nugkanmaya aents aidau kaunkag, Apajuí inamtaijin Abraham, Isaac, Jacob aina nujai pekaamsag yuwawagtin ainawai.

<sup>12</sup>Nuniai Israel aidau Apajuí inamtain waimain ainayatak, minai kajinas anentaimainachu asag, Apajuí inamtainig wayashtin ainawai, ayatak waitut ajumaish nagkankashtin suwea nui utsagkam Apajuiyai kanakag batsamas senchi waituinak nain takegtuinak buutú batsamiagtinai, —tau.

<sup>13</sup>Nuna tusa Jisus capitandin chichajak: —Jeemin wakitkita, ame dekas etsaentujattawapi tiu asamin ame inakjumshakam tsagaje, —tiuwai.

**Jisus Pedro tsatsají etsagagbau**  
(*Mr. 1.29-31; Lc. 4.38-39*)

<sup>14</sup>Nuna tusa ukuak Jisus Pedro jeen weuwai, nui jegakmá Pedro tsatsají senchi tsuweak pegajin tepettaman wainkau.

<sup>15</sup>Nunik Jisus uwegnum antigkui, dutikam tsuweamunak bichatug pegkeg wajas nantakí yujumkan inajuk, Jisusan ashí ni ijunja yujainamujijai ayugkauwai.

**Kuashat aents etsagagbau**  
(*Mr. 1.32-34; Lc. 4.40-41*)

<sup>16</sup>Nunú tsawantaik kintamai, kashi ikautkaju kuashat aents wakan pegkegchau egkemtuamu aidau. Imatika ikautkam Jisuschakam ayatak chichamenig wakan pegkegchau aidau nak jiijá ishiakui. Tuja jau aidounashkam ashí etsagakui. <sup>17</sup>Nuna Jisus dutikauwa duka yaunchuk Apajuin etsegtin Isaías juna agajua nunú uminkauwai: “Ni emegkaktinai ashí ii najaimatai aidau nak, dutikak ashí jau aidounashkam etsagagtinai”, tawai.

**Jisus jintintaiji agtatus  
wakejukaju aidau**  
(*Lc. 9.57-62*)

<sup>18</sup>Jisus kuashat aents tuwajuinam wainak, ni jintintaiji aidau: —Umintsatajum amain wegagmi, —tiuwai. <sup>19</sup>Tusá tiajam eke uminainai, chicham umiktinun jintinkagtin jegaantun Jisusan:

—Jintinkagtinuh, wisha ame tuwig wekaetam nuniakminish tuke aminak nemagkiní wajatin atajai tusan wakegajai, —tau.

<sup>20</sup>Tutai Jisus chichajak:

—Kujancham aidau kanutaijig ajuinawai, aantsag pishak aidau shkam pasugkeg ajuinawai, tujash wi Apajuí Uchijiyaitkun Aentsmaga Akiinaunuk jeenchau, tepesá ayamainkesh atsugtaig wainkan wekaejai, —tiu.

<sup>21</sup>Nuna tutai makichik niina jintintaiji aina nuwiya:

—Apuh, dekatkauk mina jegajuí wenu, apag jakamtai ukusan ukuakun nemagkatjame, —tau.

<sup>22</sup>Tutai Jisus chichajak:

—Amek nemagtukta, idaisata aents wakanin jakaujai betekak batsata nu, apa jakamtaish ukustin atinme, —tiuwai.

**Jisus dase imijkamu**  
(*Mr. 4.35-40; Lc. 8.22-25*)

<sup>23</sup>Nuna tusa ukuak Jisus ni jintintaiji aidaujai botenum chimpimjajui kuchá<sup>k</sup> amain katigkagtatus. <sup>24</sup>Nunik weenai Jisusak kanag egkemsau. Nunika ai nagkamnuwai dase dasentut, nunik dasentai botenum yumik senchi yajanu. Imaniak ishamain wajatai, <sup>25</sup>niina jintintaiji aidau jegantag ishintainak:

---

**k 8.23** Apach chichamnum “mar” tawa nunak tayatak “lago” tuuta awagbau asamtai, iina chichamenig “kucha” taji.

—iApuh, uwemtikagtugta jakektatji!  
—tuidau.

<sup>26</sup>Tama:

—¿Wagka imanikjumes hshamagme,  
aents imanis Apajuiyai kajinas  
anentaimchau aidauwah?

Tusa nantakí dase imanik  
dasentatman imijiaku, dutikam  
kuchashkam miyasuch yaunchuk  
aajakbaw nunisag we patamsauwai.

<sup>27</sup>Nunikmatai nui aents chimpijaidauk  
puyatjukag ditak pempeentunikiag:

—¿Jusha waji aents asamtaiya dasesh,  
kuchash ni chichamenash antujuinawa?  
—tudayinau.

**Gadarammaya aents wakan  
pegkegchau chimpintuamu  
Jisus jiijamu**

(Mr. 5.1-20; Lc. 8.26-39)

<sup>28</sup>Nunik dase megkaekamtai we  
weenakua, kuchá amain Gadarammaya  
batsamtai nugkeen anumkajui. Nunik  
jinkamá jimag aents ukumatainum pujuidau  
ditan wainak adjikagtatus minituidaun  
wainkajui. Duka aentsuk wakan pegkegchau  
chimpintugbau asag senchigtin kajen aidau.  
Iman asamtai makichik aentskesh nunú  
jintanmag wechatai aajakuí. <sup>29</sup>Nuniau asag  
Jisus anumak minittaman wainak, senchi  
untsumkag:

—iJisusah, Apajuí Uchijiyah! ¿tsawan  
jegatsaigkik suwimak sukagtustasam  
juwish minam? —tuidau.

<sup>30</sup>Nunikag kuchishkam ikaa yuwak  
batsatu asamtai: <sup>31</sup>—Ju aentsnumia  
jijiatkumek idaikagtusta au kuchi ijunaina  
awi utsanawagmi, —tusag segaidau.

<sup>32</sup>Tusá tama Jisuschakam:

—Ayú wetajum, —tiuwai.

Tima wakan pegkegchau aidauk  
aentsnak ukuinak kuchinum  
utsanawajui. Dutikam kuchishkam  
pisajag betsag tajaekunum utsankamá  
kuchanum iyagkag jinawajui.

<sup>33</sup>Nunikagmatai kuchí kuitamin  
aidaushkam pisajag yaakat jegawajui.  
Nunikag: “Kuchi nuní jiname, tuja aents  
wakan pegkegchau egkemtuamu  
aidaushkam nunikagmae”, tusag  
etsejuidau. <sup>34</sup>Nunú kuchi jinae tusa  
etsegbaun antukag, ashí yaaktanmaya  
aidauk Jisusan wainkagtatus wejajui.  
Nunik jegajui: Wait aneasam ju ii  
nugkega juwig pujutsuk yajá weta, tiajui.

**Jisus aents wekaechau etsagagbau**

(Mr. 2.1-12; Lc. 5.17-26)

**9** <sup>1</sup>Tusá tima Jisuschakam botenum  
egkemag ataktú niina yaaktajin  
katigkuí. <sup>2</sup>Nunik katig pujai, aents  
wekaechau ayatak tepenun pegaknum  
pataidiag etejaiju. Dutika itantagmatai  
Jisus niini kajinas anentaimaidaun  
wainu asa, wekaechaun chichajak:

—Uchijuh, amina tudaujum aidauk  
tsagkugnaje, —tau.

<sup>3</sup>Nuna tutai chicham umiktinun  
jintinkagtin aidauk ditak tudayinau:  
“Juka Apajuin pegkegchaun chichajak  
tu wekaewai” tuidau. <sup>4</sup>Tu  
anentaimaidaun Jisus dekau asa:

—¿Wagka pegkegchaush  
anentaimjume? <sup>5</sup>¿Tuwaita imá yupichuch  
tumainush, tudaujum aidauk tsagkugnaje  
taja dukaih, atsa nantakim wetá  
tumainaitag dukaih? <sup>6</sup>Tujash wi Apajuí  
Uchijiyaitkun Aentsmaga Akiinau asan, ju  
nugka juwish tudau aidanash  
tsagkugkagtumainaitag nu dekaatajum,  
—tusa wekaechaun chichajak:

—Nantakim ainká tepetaijum jukim  
jeemin wakitkita, —tiuwai.

<sup>7</sup>Tama nantakug jeen wakitkiuwai.

<sup>8</sup>Nu jau tsagagmatai tikich aidaushkam  
wainkag puyatjukajui. Nunikag Apajuin  
emematuidau:

—Dekas nigka senchigtinapita, iman  
asampap jujú aentsnash niina  
senchijinig etsagaje, —tuidau asag.

**Jisus Mateon mina  
jintingtaig atá tibaw**

(Mr. 2.13-17; Lc. 5.27-32)

<sup>9</sup>Nuna dutika Jisus wekamá Mateon<sup>l</sup>  
wainkauwai, kuichik apunu atinun  
akikmagtai yajumak ekeematman, nunik:  
—Mateo, wegajai mina jintingtaig  
aminun.

Tama niishkam: —Ayú, —tusa wajakug  
Jisusjai weuwai. <sup>10</sup>Nunik nunú tsawantaik,  
Jisus niina jintintajji aidaui Mateo jeen  
jegaawag mesanum jegantag  
pekamsagmatai, tikich apú kuichikiji  
atinun yajumin kuashat kaunawajushkam  
ditajai pekamsajui. <sup>11</sup>Nunik yujumkan  
yuwagtai, fariseo aidau Jisusa jintintajji  
aidaun chichajuinak:

—¿Wagka atumi jintinjamnush apú  
kuichikiji atinun yajumin nuigtú aents  
pegkegchaw aina ibaujaish ijuntujash  
yuwawa? —tuidau.

<sup>12</sup>Nu tabaun Jisus antuk ayaak:

—Aents jamamtuchu aidauk  
ampijatnunik atsumtsame, aents jau  
aidau ampijatnunik atsumame. <sup>13</sup>Dekas  
imá pegkeg wetajum, nunikjum Apajuí  
chichamega nui: ‘Aents wait anentin  
atajum tusan wakegajai, anentag kuntin  
itaajum tsagkugnagtasa maa apeajum  
nunak dakitajai’, tawa dusha wajina  
takua tawa nu shiig aujsa dekaatajum.  
Wika aents tudaugtuchu aidaunak  
minitchauwaitjai, wika aents tudaugtin  
aidau tudaujin idayinak mina  
nemagtuktinme tusan tauwaitjai.

**Ijagmaka pujusá Apajuí  
aujut iniimsamu**

(Mr. 2.18-20; Lc. 5.33-35)

<sup>14</sup>Nuna aatus Jisus tutai, Juagká  
jintintajji aidau jegantaju Jisusan,  
nunik iniidau:

—¿Wagka jutiik, fariseo aidauijag  
kuashtá yujumak ijagmaw agmag  
nuniajinish, amina jintintajum aidaush  
ijagmainatsua? —tuidau.

<sup>15</sup>Tama Jisus ayaak:

—¿Nuwena nunú aents ipaamu aidaush  
wake besemag pekaamainkai nu, nuwenu  
ditajai pujaigkish? Anmamtuk mina  
jintingtaig aidaush wi ditajai pujaigkik,  
yujumkanak ijagmamain ainatsui. Tujash  
tsawan jegattawai nuwena nunú juwam  
atata nu, nunikmatai ipaamu aidaush wake  
besemag dekapenak yujumkanak  
ijagmakagtatui, —tiuwai.

**Jisus jintinkagtak, yamajam  
jintinkagtamua duka yaunchuk  
jintinkagtutai aina nujaig  
pachiimaitsui tibaw**

(Mr. 2.21-22; Lc. 5.36-39)

<sup>16</sup>Tusa junashkam tiuwai:

“Makichik aentskesh jaanch yamagman  
tsupikag jaanch mamujunmag adujtuchu  
ainawai, yamajam asa jaanch mamujun  
nuní nagkaemas ichiimain asamtai.

<sup>17</sup>Antsag vino yajatai duwap apagbau  
ajutnumag uva yumiji yamá ijugbaunak  
yajachu ainawai, dutikamak vino kajjak  
pushutak ipatmain asamtai, nunik vinok  
ukagag, duwapshakam ichiinak  
ajapnamainai. Tujash duwap  
yamagmanmag nunimaitsui, vino  
yamajam asa pushututaish ayatak egkenag  
wetai nunisag pegkejak amainai.”

**Jairo nawanji, tikich nuwa  
jaujai etsagagbau**

(Mr. 5.21-43; Lc. 8.40-56)

<sup>18</sup>Aatus Jisus chichagkagtak pujai,  
tajiuwai makichik judío aidau apuji,  
nunik Jisusan tikishmatug chichajak:

—Mina nawantug yamá jakaun  
ukukjai, tujash apuh ame minim

uwegmin antinjukta, dutikamak nawanjuk aneantatui, —tau.

<sup>19</sup>Tama Jisuschakam ni jintintaiji aidaujai wegajui. <sup>20</sup>Nunik wegamunum nuwa doce mijadai numpán senchi puwak jaa pujú, Jisusan wainak ukunum juwatki adijkauwai. Nunik Jisus jaanch pataká nugkuagbaujin<sup>m</sup> antigkui, <sup>21</sup>nigka: “Jisusa jaanchjinakesh, antignuk dekas pegkejav wetatja”, tu anentaimu asa. <sup>22</sup>Dutika antigkam Jisuschakam ayampá diikmá nuwan wainkau, nunik:

—Nawantah, ame kajintsá anentaimam duwi tsagaju asam shiig aneasta, —tiuwai.

Tima nunú tsawanta nuaduik nuwashkam tsagag pegkeg wajasuí. <sup>23</sup>Nuna dutika ukukí jegauwai apú nawanji jajukbauwa nuna jeen. Nunikmá wainkau nunú nuwauch jakaun ukusagtatus ditá nunitaiji asamtai, pigkuí aidaun umpuinak pampantú batsataidaun.

<sup>24</sup>Nuniagtatman Jisus chichajak:

—Atumek jinjatajum, nuwauchik jakache ayatak kanaje, —tiu.

Tutai dushikidau. <sup>25</sup>Tusa aentsun ishiak idayak wayaa, nuwauchin uwegnum achiká inantam, nuwauchishkam nantakiuwai. <sup>26</sup>Nu Jisus dutikamun ashí yaaktanum etsejug dapampajajui.

#### **Jisus jimag aents wainmachu etsagagbau**

<sup>27</sup>Nuna dutika Jisus jiinki wetatman, jimag aents wainmachu pataetukag, senchi untsumkag:

—iDavid wegantu uchijiyah, jutiish wait anenkagtugta! —wajaidau.

<sup>28</sup>Nunikag Jisus jegá wayamtai, wainmachu aidaushkam utsantuawaju. Nunikagmatai Jisus ditan iniak:

—¿Atumesh minash niimtijumainapi tujutjumek? —tau. Tama ditashkam:

—Ehé Apujuh, —tuidau.

<sup>29</sup>Tiagtai Jisus ditá jiin antintak:

—Atum kajintsá anentaimjum nunisag uminkati, —tiuwai.

<sup>30</sup>Tamawaik niimiajui. Nunikmatai Jisus ditan chichajak:

—Makichik aentskesh ujakaigpa, —tiu.

<sup>31</sup>Tibau ainayatak jiinjag weenak, ashí aents nuwiya aidaunak ujá ujakua wegajui.

#### **Aents chichachun Jisus etsagagbau**

<sup>32</sup>Nunú wainmachu etsagagbau jinki weenaig, aents wakan pegkegchau egkentuamu asa chichachun, Jisusan itajuawajui. <sup>33</sup>Dutikawagmatai wakan pegkegchaun jigkiuwai, dutikam aents chichachushkam shiig chichakuí. Nunikmatai aents aidauk senchi puyatjukag:

—iIsrael aents aidautik makichkish aika etsagamuk wainchataiyai! —tuidau.

<sup>34</sup>Tujash fariseo aidauk:

—Juka wakan pegkegchau aidau apujiya nuna senchijin wakan pegkegchaunak jiyaawai, —tuidau.

#### **Jisus wekaesá chichagkagtukbau**

<sup>35</sup>Nui juwaki Jisus yaakat aidaunum, nuigtú yaakat yaijuch aidaunmashkam, makí makichik jega ijuntai jegamkamunum, yamajam chichaman Apajuí nuní inapawai tusa jintí jintinkagtakua wegau. Nuniak etsagau ashí jatai jau aidaun, najaibau aidaunashkam. <sup>36</sup>Imatika Jisus etsagautai, tikich aents aidaushkam kuashat minituidau minash etsaentugti tusag. Aents aidau imaniagtai Jisus wait



anenmain diyau, uwig kuitamain atsubgau wajukmaina numamtuk wajaidau asagmatai. <sup>37</sup>Nuniak Jisus ni jintintaiji aidaun:

—Dekas tajime: Shiig kuashat aents aidau Apajuí minaish inamjati tusa atsumainawai, tujash ujumchikiuchi yamajam chichama juna etsejuidauk, <sup>38</sup>nuaduí Apajuí segatajum tikich ni chichame etsegmain aidaun ishiakti tusajum, —tiuwai.

**Jisus chicham etsegtugkatajum tusa ishiaktinji doce etegjamu aidau**  
(*Mr. 3.13-19; Lc. 6.12-16*)

**10** <sup>1</sup>Jisus niina jintintaiji doce aina nuna untsuká ijumag, aents wakan pegkegchau egkemtuamu aidau, jau aidau, najaibau aidaushkam etsagagtajum tusa senchimtika ishiakui.

<sup>2</sup>Jisus ni chichame etsegtugkatajum tusa ishiaktinji doce aajakajuk ju ainawai: Simón tikich daaji Pedro, Andrés Simogka yachi, tikich Jacobo, yachi Juagjai mai Zebedeo uchijig; <sup>3</sup>Felipe, Bartolomé, Tomás, Mateo apú kuichkiji atinun ijumjukakua nu, Jacobo Alfeo uchijí, Lebeo Tadeo tuuta awagmatai, <sup>4</sup>Simón niina nugken agkanmitkatatus kuashat aents aidaujai chichajakua nu, Judas Iscariote Jisusan sujukua nunú.

**Jisus ni jintintaiji aidaun chichagkagtuktinme tusa ishiakbau**  
(*Mr. 6.7-13; Lc. 9.1-6*)

<sup>5</sup>Jisus niina jintintaiji doce aina nuna ishimak tiuwai: “Judiuchu aidau batsatbaunmag wepajum, Samarianmaya aents aidau yaaktajinish wayawaigpajum. <sup>6</sup>Nunitsuk dekas Israel aents aidau uwig megkaejauwa numamtin aidau batsata nui wetajum. <sup>7</sup>Nunikjum chichagkagtuktajum, Apajuí ju nugkanum inamjatnuk ashí jegae

tusajum. <sup>8</sup>Nuniakjum etsagagtajum aents leprayai jau aidau, tikich jatai jaidaushkam aikasjumek etsagakjum, jakau aidaushkam inantajum, dutikakjum wakan pegkegchau egkemtuamush jiiijum etsagaitajum. Nunú dutikakjumesh atumek akigkatajum tiigpajum; atumnak wi mina senchijun amajime, dutikamu asajum wainkajum etsagaitajum.

<sup>9</sup>“Wegakjumesh kuichkikesh, orokesh, cobrekesh, <sup>10</sup>wají egkesá jutaigkesh, ushujutaigkesh, sapatkesh, nugkutaish yachiagmek jukigpajum. Wagki aents taká duka yuwatnujig suwam auwai.

<sup>11</sup>“Tuja yaaktanum jegaakjumesh nuniachkugmesh aents yaaktan ukukí batsatbaunum jegakjumshakam, egaktajum yaita aents kajintsá diimainush, nunikjum nuwig pujusjum wegakjum ukuktajum. <sup>12</sup>Tuja jegá wayakjumesh shiig augmamsajum wayatajum. <sup>13</sup>Nuniakjum: Apajuí atumnash yaimpakti titajum. Tajumin dita shiig aneas jujabiagtaik, Apajuí ditanash yaigtatui. Tuja dita atumin dakitjabiagtaik, Apajuishkam ditanak yaigchagtatui.

<sup>14</sup>“Untsu atumin makichik aentskesh jeen awaintamtan dakitjamainak, chicham etsegbau antutnash dakituinakuig, nunú jegak ukuakjum, nuniachkugmesh yaakat jiinkugmekesh daweminia tsetse pegatjam akaketkam ukuktajum. <sup>15</sup>Dekas tajime: Suwimak sukagtamú tsawan jegatna duwik, nunú yaaktanmaya aents nunina nunak, Apajuí duwik yaakat Sodomannaya Gomorranmaya aidaun suwimkan susauwa nuní nagkaemas suwimkan jukiagtinaí.

**Waitiamu atin Jisus emtika etsegkamú**

<sup>16</sup>“Wi atumnak uwig ikamyawa batsatbaunum ishimaina numamtuk

aents pegkegchau batsatbaunum ishimjime. Nuaduí atumek shiig kuitamamkajum shiig anentaimesajum yujastajum. Nuniaú asajum tikichish pegkegchau awajkaigpajum. <sup>17</sup>Nuniakjum nu aents aina nujaig kuitamamkatajum, atumnak achigmakag jega ijuntainum apu chichaman dekaawagtatus ijunjamunum ejetamawagtinai. Dutijamawagmatai jega ditá ijuntaiji aidaunum awaintamawag suwimjamawagtinai. <sup>18</sup>Dutijamainak tikich apu aidaunmash ejetamawag nui jujamkiag, dekas apu nugkanum inamin aidaunmash ejetamawagtinai mina nemagtuidau asagmin. Dutijamawagmatai ditá emtin mina pachittsajum chichaakjum, judiuchu aidau emtinish etsegtugkatín ainagme. <sup>19</sup>Tuja atumin ejetamawagmataish, wajuk chichaktajaki tusagmek uyumaktin aigpajum. Nuna tujamainakui chichaktinnak Apajuí tujamtinai. <sup>20</sup>Duka atumek Wakaní Pegkeji ichachtabauwa nu chichaktatjume. <sup>21</sup>“Nunú nuniamunum ditá yachiuchijinash maatnume tusag sujiagtinai, aantsag uchigtin aidaushkam uchijinak sujiagtinai, nunisag uchi aidaush apajin maatnume tusag inamiagtinai. <sup>22</sup>Atum mina nemagtin aidautigminak ashí aents aidau kajegtabiagtinai, tujash ni mina nemagtukbautak pujusá nagkanbaunum jegaa nu uwemjatnai. <sup>23</sup>Tuja makichik yaaktanum pujagmin aintamainakuish, tikich yaaktanum tupikaktajum. Dekas tajime: Israelnumia yaakat aina nu mina chichameg pachisjum ashí etsegtugminig, wi Aentsmagan Akiinauwaitag nunak taatnaitjai.

<sup>24</sup>“Jintinbauwa duka jintinkagtinun nagkaesauk amaitsui, tuja inakak apujin nagkaesachui. <sup>25</sup>Jintinbauwa duka jintinkagtina nuninuk amainai. Aantsag inaka dushakam apujijai betek amainai. Mina Beelzebú<sup>n</sup> senchijin takaawai tusag augmatjuina nunisag, atumnaku pegké tujamtin ainawai.

#### **Dekas ishamaina nu**

(Lc. 12.27)

<sup>26</sup>“Nuna tujamainakuish, makichik aentskesh ishambatin aigpajum, wagki ashí uukbau aidaush wantinkagtinai, aantsag ashí dekaachbau aidaushkam dekaamu agtinai. <sup>27</sup>Nuaduí atumek tikichish antachbaunum wi imá atumnak jintinbau antukujum nunú, ashí aents antuinamunum etsejatajum dekaatnume. <sup>28</sup>Mantamainakuish ishambkaigpajum, wakanminak maumainchau ainawai. Dekas Apajuí ishambkatajum, iyashmijái, wakanmijái suwimkan sujamak jii ajumaish kajinchaunum egkepamaina nunú.

<sup>29</sup>“¿Atumek makichik kuichik iman akikchaush juwakjum jimag pishak sujuchuk agmaujum? Nunú aina duka, Apajuí jakati tachamak makichkish jamaitsui. <sup>30</sup>Apajuik atumi intashim wajupa awa nunash shiig dekawai, <sup>31</sup>nunin asamtai atumek ishambkaigpajum. Atumek pishak aina nuna nagkaesau ainagme.

#### **Ishamtsuk Kristu nemagnaitjai**

**tumamainai**

(Lc. 12.8-9)

<sup>32</sup>“Nuniaú asamtai atum tikich ujaakjum: Wika Kristu nemagnaitjai, tiu aidautigminak, wishakam dutiksanuk mina Apag nayaimpinum puja

nunashkam: Ditak mina nemagtin ainawai titinaitjai. <sup>33</sup>Atum mina nemagtin ainayatkujum tikich aidau emtin: Wika Kristunak nemagchauwaitjai, tujutiu aidautigminak, wishakam aikasnuk mina Apag nayaimpinum puja nunashkam: Ditak minak nemagtuchu ainawai, titinaitjime.

<sup>34</sup>“Atumek minak: Shiig agkan anentaimas batsamsatnume tusas ju nugka juwig tauwaitai, tusagmek anentaimjuttisaipajum. Wika atum shiig agkan anentaimas batsamsatnume tusanuk taachuitjai, wika atum mina nemagtuidau asagmin, tikich mina dakitjuidau utugchatan aputugmasag kajegtamá batsamtin asamtai tauwaitjai. <sup>35</sup>Aatus nuniamunum uchi apajin pempeentuki kajegtinaí, nuwashkam ni dukujin kajegtinaí, nuwa nemakushkam tsatsajin shiwagmatnai. <sup>36</sup>Aatus shiwagmagamu asamtai atumi pataim aidaujaig pempeentunikjum shiwagmagatnaitjume.

<sup>37</sup>“Aantsag mina anenmaina nuní nagkaemas apajin, nuniachkush dukujin imá senchi aneauk, midau amain ainatsui, nunisag mina anenmaina nuní nagkaemas uchijin, nuniachkush nawanjin imá senchi aneashkam midauk amaitsui. <sup>38</sup>Mina nemagtuk waittan dakitaushkam midau amain ainatsui. <sup>39</sup>Tuja ju nugka juwi pujutan imá senchi wakegauk, megkaekatin ainawai, untsu mina nemagtau asa pujutjin uyumatsuk jauk, uwemjatin ainawai.

<sup>40</sup>“Atumin jujamaina duka mina jujuinawai, tuja mina jujuina dushakam mina awetiuwa nuna juwinawai.

<sup>41</sup>Apajuí etsegtin minaun niina jeen juwaushkam, nu Apajuí etsegtin waji shiig pegkejan jukitna dutiksag niishkam jukitnai. Aantsag aents

pegkejan takau minaun juwaushkam, nu aents pegkeg juwamunak waji shiig pegkejan jukitnai. <sup>42</sup>Makichik aentskesh mina nemagtin imanchauch aina juna, yumin shikisá suwauk, dekaskenum niishkam waji shiig pegkeg suwam atinai.”

**Juan Yamijatin ni jintintaiji aidaun chicham dekaatajum tusa ishiakbau**  
(Lc. 7.18-23)

**11** <sup>1</sup>Jisus ni jintintaiji doce aina nuna ashí jintintua inagnak, nuwiya jiinki yaakat ayamunum chichagkagtuktatus weuwai. <sup>2</sup>Nuwi Jisus chichagkagtak wekaebaun Juagshakam aents achiká egketainum egkemas antuku. Nunik ni jintintaiji aidaun jimajan awemauwai, <sup>3</sup>Jisusan: —¿Amekaitam Apajuí uwemtikagtinun awematnaitjai tibuwa nunú? ¿Amechuitkuminig tikichnak dakastatag? tusajum iniastajum, —tusa.

<sup>4</sup>Nunú tusá iniam Jisus ditan ayaak: “Wetajum, nunikjum atum ashí wainkamú, antukbauwa nu Juan ujaktajum: <sup>5</sup>Wainmachush wainmainawai, shutushkam wekagainawai, lepragtin aidaush tsagainawai, empekush antuinawai, jakaush nantainawai, tuja ujunauch aidaunash yamajam chichaman jintinmae tusajum. <sup>6</sup>Nuaduí wi takaamujua nuna wainainak dekaskeapi tujutuidauk, shiig aneasagtinaí timae tusam ujaktá”, tiu.

**Juan pachisa Jisus etsegkamu**  
(Lc. 7.24-35)

<sup>7</sup>Nunik waketjamtai, Juagkan pachis aents nui batsatun iniak: “¿Waji wainkatasagmae uwegshunmash wegabiugme? ¿Tagkanan dase umpuau wainkatasagmek wegabiujum?

<sup>8</sup>Nuniachkugmesh ¿Waji

wainkatasagmae wegabiugme? ¿Aents shiig iwajamun nugkujá pujau wainkatasagmek wegabiujum? Atumek dekagme nugkutai iman iwajamun nugkujá iwagmamaidauk apú jeen pujuinawai. <sup>9</sup>Tujash ¿wají wainkatasagmae wegabiugme? ¿Apajuí etsegtinuk wainkatasajum wegabiujum? Dekas tajime: Duka Apajuí etsegtin aajakajua nuna nagkaesauwai. <sup>10</sup>Apajuí etsegtin niina pachis agajua duka: ‘Wi mina chichamjun etsegnun amina emtimin awemajai, ni jintanak umigtamkattawai’, tawai.

<sup>11</sup>“Dekas tajime: Ju nugka juwi akiinaidauk Juan Yamijatna nuna nagkaesauk atsawai, tujash Apajuí inamtainig aents dekas imanchauchia nuuwai Juangkan nagkaesauk.

<sup>12</sup>“Juan Yamijatn Apajuí inamjatnun pachis jintinkagtutai kajejujakú aina nunisag, yamaishkam chichamnak shiig dakituinawai. Nunidau asag tikich aidau Apajuí inamtaijin wayawainum tusag dakituinawai. <sup>13</sup>Ashí Apajuí etsegtin agajaju aina nunú chicham umiktin aina dushakam Juan tauwa imanuiya atin etsegtin. <sup>14</sup>Niiyai Elías taatnui tibau aajakua duka, nunin asamtai atumek antugkatajum. <sup>15</sup>Dita antutaiji ajamuk antuktinme”, tiuwai.

#### **Juangkan dekaskeapi tichaju aidau**

*(Lc. 7.31-35)*

<sup>16</sup>“Nuigtush atumnash ¿wajina pachisan takunua antumtikmainaitjime? <sup>17</sup>Atumek uchi aidau kuashat aents ayamunum pekaamsag wasugkamainak: ‘Wi nantsematnume tusan flauta tutaya nuna umpuakuish nantsemashmaugme, wake besemjan kantamtaí buuttinme tamash buutchamugme’ tusa pempeentuniki untsuniyajama numamtuk wajagme.

<sup>18</sup>Juan Yamijatna nunú yutai aidaunash

yuwachu, vinunash umachu asamtai chichagkujum: Wakan pegkegchau egkentuamu asa aniawai, tajume. <sup>19</sup>Tuja wi Apajuí Uchijiyaitkun Aentsmagan Akiinaun yutainash yuwakun, umutain umakuish: Ju aentsua juka ayatak wekagas yu wekaewai, umutnash umú wekaewai, nuniau asa apú kuichkiji atinun yajumin, nuigtú tudaugtin aina nuna kumpajiyai, tujutjume. Tujash Apajuí umijuidau wajuk pujuinawa nuna wainainak, Apajuí yachajiyai nunak dekamain ainawai.”

#### **Aents pegkegchau idaitan dakitin aidau**

*(Lc. 10.13-16)*

<sup>20</sup>Nuna ti idayak, nunú yaaktanun kuashat iwainataish dekaskeapi tusag tudaujin idayinak Apajuin nemagkachaju asagmatai, najamnun chichajak:

<sup>21</sup>“iCorazignumia aidaunak, aikasnuk Betsaidanmayanash wait anentuinajai!, ditak mina chichamjun dekaskeapi tujutchaju asagmatai. Yaakat Sidognum, Tironmash aents batsataina duka, wi atumin wainchatain iwaintajim imatika ditash iwaintam wainkujag, dita wake besemag pujaku iwainmamtain jaanchin nugkujag, buukenish yukuun batsakag, ditá tudaujin wake besemag batsatbaunash, Apajuin iwaintumain aajakajui. <sup>22</sup>Nuaduí Apajuí suwimak sukagtamu tsawan jegatna duwik, yaakat Tironmaya aents aidau, Sidognumia aidaujai suwimkan jukiagtin aina nuní nagkaemasjum atumek suwimkak jukiagtin ainagme. <sup>23</sup>Yaakat Capernaum batsamin aidauwah, atum anentaimagmek: Jutiik jainakuish nayaimpinum juwam agtinaitji, tajume. Tujash dutikamak agchatnaitjume, atumek tikich aents pegkegchau aidau jinawaju waitú batsata nui batsamsatnaitjume. Yaakat Sodomunum batsamajakajua dusha, atum wainchatai iwaintajim imatika iwainamun wainainakug, tudau takatan idaisag yamaya juwish

batsaamain ainawai. <sup>24</sup>Tujash atumek Apajuí aents suwimak suwamu jegatna nunú tsawantinig, Sodomanmaya aents aidau nagkaesajum suwimkak jukiagtinaítjume”, tiuwai.

**Jisus ni Apají emematbau**  
(Lc. 10.21-24)

<sup>25</sup>Nuna tusa idayak Jisus ni Apají Apajuin emematak: “Apawah, amek ashí nayaimpinum batsamin aidau, nungkaya aidaunashkam Apuji asamin emematjame. Iman asam aents yacha aidauk iwaintutsuk, aents imanchauch aidau etegjamujum tikima uchi itugmaina imatiksam iwaintukum nuaduí. <sup>26</sup>Dekaske Apawah, amek aajam wakegame.”

<sup>27</sup>Nuna ti idayak ni jintintaiji aidau pempeentuki: “Mina Apag ashí nugkanmayag ame diistá tusa idaitugsauwai, nunin aig wi Apajuí Uchijiyaitag nunak makichkish dekajuinatsui, imá mina Apajuk shiig dekajui, aikasag mina Apagnash wainainatsui imá wiki shiig wainjai, tuja wi iwaintamu aidau Apagnak wainmain ainawai. <sup>28</sup>Atum tudaujum idaisatasajum kakanmamkujum, takaaku pimpitia imanikjum pimpikjum pujautigmek minai minitajum, wi ayamtijatjime. <sup>29</sup>Atum wi jintinjim jujú unuimagium imatiksagmek umiakjumek, dekattagme wi kakagchau, utugchatnash emamkesan depetnaitag nunú, nuniakum wakanmish ayamtiksatagme. <sup>30</sup>Tuja wi atum chicham umiktinun amajim juka, utugchatak asawai yupichuch umimainaitjume.”

**Jisusa jintintaiji aidau tsawan  
ayamtai aig trigo jukí yuwawagbau**  
(Mr. 2.23-28; Lc. 6.1-5)

**12** <sup>1</sup>Tsawan ayamtai tsawaju ai, Jisus jintintaijin saasá aja trigo ajakbaunum utujá wegau, jinta nunú nagkaemaku asamtai. Nuniamunum Jisusa jintintaiji aidau yapajuinak trigon

kupik jukiag nejen yuwi yuwinakua ashinaidau. <sup>2</sup>Nuniagtatman fariseo aidau wainkag:

—¿Wagka amina jintintaijum aidaush tsawan ayamtai tsawagmataig takantsashti tibauwa nunin aish aikainawa? —tuidau.

<sup>3</sup>Tusa tiagtai Jisus ayaak:

—¿Atumek agagbauk ausachuk ainajum, David tsawan ayamtai tsawaju aig nijjai yujaamujai yapajuinak, <sup>4</sup>jega Apajuí ememattainum wayaa, pag imá sacerdotek yuwati tibau aajakua nuna juki yuwak, aents nijjai yujaunash ayugkauwa duka? <sup>5</sup>¿Nuigtush atumek ausachuk ainajum Moisés agagbauwa nuanuí: Sacerdote jega Apajuí ememattainum takau aidauk, tsawan ayamtai tsawaju aigkish ayamainatsui; tujash duka pegkegchawk wegatsui tawa duka? <sup>6</sup>Nuniau asamtai tajime, juajuí pujawai makichik aents atum umigmain jega Apajuí ememattaya nuna nagkaesau. <sup>7</sup>Apajuí duwik tibau agagbauwa nuanuí tawai: ‘Apajuí tsagkugtugti tusajum kuntin maajum apeajum nunak dakitajai, dekas tikich aidaunash wait anenjatnume tusan wakegajai’ tawa nunú shiig dekakjumek, tikich aidaush pegkegchaun takaachukek wainkagmek augmatmaitagme. <sup>8</sup>Wi Apajuí Uchijiyaitkun Aentsmagan Akiinau asan, tsawan ayamtai tsawagmataish wajukmainaita nunak wiktijai tumainnuk, —tiuwai.

**Tsawan ayamtai tsawaju aig aents  
uwejé chuwijun Jisus etsagagbau**  
(Mr. 3.1-6; Lc. 6.6-11)

<sup>9</sup>Jisus nuna tusa ukukmatai nui juwakiag fariseo aidaujai ijunjag jega ditá ijuntaijin wayawaju. <sup>10</sup>Nunú jeganum pujau aents uwejen chuwijú. Nuniau asamtai fariseo aidaushkam

Jisusan kajejuidau asag, wajintig timatai etsegtuka bakumí tusag:

—¿Tsawan ayamtai tsawaja aish jaush etsagaumainkaih? —tusa iniasaju.

<sup>11</sup>Tutai Jisus:

—¿Atum aidautigmesh tsawan ayamtai tsawaja aig, uwigjum waanum egkemá jinkitakamá waitú pujakuish itugmainaitjupa, wejum jimainchaukaitjum? <sup>12</sup>Tujash aentsui dekas uwijá nagkaesauk, nuaduí tsawan ayamtai tsawaju aigkishkam pegkeg aina duka dutikmainai, —tiu.

<sup>13</sup>Tusa aents uwejé chuwiun:

—Uwejum dakuekta, —tiuwai.

Tamawaik uwejen dakuek, tikich kuntujijai betek pegkeg wajasuí. <sup>14</sup>Jisus nuna dutikamtai fariseo aidau agaa jinjag, Jisusan maatasag chichaman umiidau.

**Apajuí etsegtin Jisus  
pachisa etsechkamu**

<sup>15</sup>Tusa chichainamun Jisus dekaa ijunjamunum pujau jinki wetai, kuashat aents aidau saetukajui, imatikam Jisuschakam jau aidau etsagau.

<sup>16</sup>Dutikakush tikich aidauk nunú etsaentugmae tusagmek ujakaigpa, tau.

<sup>17</sup>Junak tiuwai yaunchuk Apajuin etsegtin Isafas agagbauwa nuna umiau asa. Nunú Apajuí tibauk tawai:

<sup>18</sup>“Jujuwai dekas mina chichamjun etsegtugkatnun mina aneetaijun wi etegkauwaitag duka, nuniau asamtai niini shiig anentaibau ajutui.

Niina susatnaitjai mina wakanjun, dutikam ni etsegkatnai chicham pegkeja nuna ashí aents aidauunum.

<sup>19</sup>Nigka wainak chicham aidauinak jiyanituk wekaechatnai, jintá wajantagkesh antuguktajum tusag chichagkagtuk wekaechatnai.

<sup>20</sup>Niig aents tudaugtinnash tsagkugsukek idaisashtinai, ayatak tsagkujug pegkemtiktinai, aikasag aents niina imatikas anentaimituinachunash nigki dekaskeapi tumamtiktinai.

Aatus ashí pegkegchau aidauinak ni pegkejan takaak depetkatnai, ashí aents aidau Apuji atinai.

<sup>21</sup>Aents judiuchu aidauhakam nuna wainainak dekas niimpap iinash uwemtijamjattawa tiagtinai.”

**Iwanch Beelzebú daagtinu senchijin  
Jisusak wakan pegkegchaunak  
jiyaawai tibau**

(Mr. 3.20-27; Lc. 11.14-23; 12.10)

<sup>22</sup>Wajumak aents aidau aents wakan pegkegchau egkemtugbau, wainmachu, chichatnash chichachun Jisusan itajuawajui, dutikawagmatai niishkam etsagajui. Dutika etsagajam wainmachushkam wainmaku, nuniak chichatnash chichau. <sup>23</sup>Nuna etsagagmatai aents aidau wainkag puyatkaju, nunikag: “¿Juchaukaih Apajuí makichik Apu Uwemtikagtinun David wegantun awematnaitjai tibauwa nu?” tuidau.

<sup>24</sup>Tiagtai fariseo aidau antukag: “Ju aentsuk wakan pegkegchau aidau apuji Beelzebú daagtina nuna senchijin wakan pegkegchau aidauinak jiyaawai”, tuidau.

<sup>25</sup>Nunú aatsa anentaibaujin Jisus dekau asa: “Makichik nugkanmag batsatiatak pempeentuniki maani batsatkujag megkaemai ainawai. Tuja makichik yaaktanum batsatu pempeentunisag maani batsatkushkam megkaemai ainawai. Aantsag makichik jeganum ijunag batsatiatak pempeentuniki maani batsatkush ditak megkaemai ainawai. <sup>26</sup>Nunisagke iwanchakam, ni senchijin mina sujus

aents wakan pegkegchau egkemtuamu aidaun jijjati tujutkug, nigki ditanbaujaig shiwagmaemainai, nuniak niina senchijinash megkaemain ainawai. <sup>27</sup>Atumek minak: Beelzebú senchijin wakan pegkegchau aentsun egkemtuaunak jiyaawai, tujutjume. Mina iwanch ni senchijin sujaish atumi jintintaijum aidaunash, ¿ya senchinash suwawa wakan pegkegchau aidaun jiiiktinme tusash? Ditak Apajuí senchijin jiyaawai tujutkugmek, atum wainka dewakjum tu yujagme. <sup>28</sup>Wishakam Wakaní Pegkejijai wakan pegkegchau aidaun aentsun egkemtuaun jiyaag nunak, yamaik atumiin Apajuí inamu asamtai jutikajai.

<sup>29</sup>“Aents senchigtina nuna jeen wayaa wajijjin yajutkata takug, nuna aentsun jigkajá nuaduí yajutmainai ashí wajijjinak.

<sup>30</sup>“Aents wi takaag nujai shiig aneas juwainachuk mina shiwagmatuinawai, nunisag aents Apajuí chichamen etsegbaunash yainchagtaik kuashat aents uweemainun megkagainawai.

#### **Wakaní Pegkeji pachisa Jisus tibau**

*(Mr. 3.28-30)*

<sup>31</sup>“Dekas tajime: Apajuik ashí aentsun tudaujinak tsagkugmainai, niina pachis pegkegchau chichagkau aidaunashkam, tujash Wakaní Pegkejiya nuna pachis pegkegchau chichagkau aidaun tsagkugnagchagtinaí. <sup>32</sup>Makichik aentskesh wi Apajuí Uchijiyaitkun Aentsmagan Akiinauwaitag junakesh pegkegchau chichagtuku ainakjash tsagkugnainainawai. Tujash Wakaní Pegkejin pegkegchau chichagkau aidaun, yamaya juwish ajumaish tuke tsagkujam achagtinaí.

<sup>33</sup>“Ajak pegkejak nejeakush pegkegnak nejeawai, tuja ajak pegkegchauwa dushakam

pegkegchaunak nejeawai. Nuaduí numi aidaun ni nejenig dekanui. <sup>34</sup>Iwanchi uchijí aidaunwah! ¿Itugsagma pegkejash chichamainaitjume ibau pegkegchau aidaunigmesh? Aentsuk ni wajukuna anentaimua, nunak chichaak iwainawai. <sup>35</sup>Aents pegkejak pegkegnumag anentaimu asa, chichaakush pegkegnak chichauwai. Nunisag aents pegkegchau anentaimushkam pegkegchaunak chichawai. <sup>36</sup>Nunin asamtai Apajuí suwimak sukagtamu tsawan jegataik, makí makichkiti ii pegkegchau chichakbaujinak imatiksag iwaintugmaktinaí. <sup>37</sup>Pegkeg chichajakutinak suwimkanak amaschatnai, untsu aents pegkegchau chichajakú aidaun suwimkan susatnai.”

#### **Aents pegkegchau aidaun Jisusan, wainchatai iwainakia tibau**

*(Mr. 8.12; Lc. 11.29-32)*

<sup>38</sup>Juna aatus Jisus timatai wajumak fariseo, tikich chicham umiktinun jintinkagtin aidaunai:

—Jintinkagtinuh, ame makichik wainchatai iwainamu wainkatasa wakegaji, —tiajui.

<sup>39</sup>Nuna tiagtai Jisus chichaak:

—Jujú aents pegkegchau aidaun Apajuí chichamenash umigchau aina nu, dekas Apajuí Uchijimpashit tusag dekapjustatus wainchatai iwainakta tujutuinaawai. Tujash dita tuina nunak iwaintukchattajai, ayatak Apajuí etsegtin Jonás wajukauwa nunisnuk ditanak iwaintuktatjai. <sup>40</sup>Jonasan nayantsanmaya namak muun kujajui, dutikam nuna ampujin kampatum tsawan kampatum kashi pujusuí. Wishakam antsanuk Apajuí Uchijiyaitkun Aentsmagan ju nugka juwi Akiinauwaitag nunak, mantuawag ukugsagmatai nugká initken kampatum tsawan nuigtú kampatum kashia imaan tepesan nantaktinaitjai. <sup>41</sup>Ninivenmaya aents

aidauk, Jonás Apajú chichame ujakam, dekaskeapi tusag tudaujin idayinak Apajuin nemagkajui, tujash atumek, wi Apajú Uchijin dekas Jonasa nagkaesaun juwi pujusá chichagmash antukjum, tudau takat idaikujum Apajú nemajuinachu asagmin, atak suwimak atina duwik, dita atumnak bakugmagtinai. <sup>42</sup>Aantsag nuwa Sabá nugkanmaya aentsun apuji surnumia Salomogkan tajiuwai, Apajú yachantikamun antujuk dekaajuatatus, nunú atumnak bakugmagtinai atak suwimak atina duwik, wi Salomogkan nagkaesaun imatika chichagmash antukchau asagmin.

<sup>43</sup>“Wakan pegkegchau jiiikí ajapamak wegawai aents atsamunum ni pujumainun egaak; nunik wekagas egá egakua ni pujumainun wainkachag: <sup>44</sup>“Dekas wakitkitjai wi pujujakbaunum’, tusa wakitki tajua diikmá, nunú aentsuk jega japimká shiig iwajamu ukumkimua nunik atatman wainak, <sup>45</sup>wakitki siete wakan niina nagkaesau pegkegchau aidaun yajuak egkemtaiwai. Dutikam aentsuk duwik pegkegchau aajakbaunak, nuní nagkaemas shiig pegkegchau wegawai. Atumshakam jujú aents imatika wakan chimpimtuamu wajukea numamtuk wajaktatjume.”

**Jisusa dukují ni yachi  
aidaujai kautuamu**

(*Mr. 3.31-35; Lc. 8.19-21*)

<sup>46</sup>Jisus aatus jintinkagtak pujai niina yachi aidau, dukujijai Jisusan ausatatus kautuawag agaag ijunaidau. <sup>47</sup>Nuní ijunaí tikich aents aidau Jisusan:

—Amina duku, yatsum aidaujai aujsatjai tusa kaunawag agaa ijunui, —tusag ujaidau.

<sup>48</sup>Tusá ujaam Jisus chichaak:

—¿Yaita mina dukug, mina yatsug aidau?

<sup>49</sup>Nuna takug ni jintinbau aidaun inakmas:

—Jujú ainawai mina yatsug, mina dukug aidauk, —tiuwai.

<sup>50</sup>Nuigtush juna tusa idayak:

—Ashí aents Apajú chichamen antukag umijuidaushkam mina yatsug, mina ubag, mina dukug ainawai, —tau.

**Ajakan ajakbaun pachis Jisus  
augmattsamu**

(*Mr. 4.1-9; Lc. 8.4-8*)

**13** <sup>1</sup>Nunú tsawantaik Jisus jegá pujau jinki kuchanum jegaa uwetus ekeemsamtai, <sup>2</sup>aents aidaushkam tuwagkaju. Imanikagmatai Jisuschakam botenum egkemá nanamas, aents aidauk kaamatak ijuntsamtai jintintu. <sup>3</sup>Dutikak ajakan ajakbaun pachis augmata:

“Ajakan ajakbau, ajakan ajakmatatus weuwai. <sup>4</sup>Nunik jegantá ajajin jigkai nagkimam jintá kakekaunak pishak kaketuk amukuí. <sup>5</sup>Tikich jigkai kayagnunum nugka imanik atsamunum kakekauwai, nu nunikuk wamkes tsapaidiajui, <sup>6</sup>nunikatman etsa jinak kagkapé initak akaejachu asamtai apeká ijinauwai. <sup>7</sup>Tuja tikich jigkai kakekajui jagki ayaunum, nunik dushakam tsapaittaman jagki yutuauwai. Dutikamu asa jinauwai. <sup>8</sup>Tujash tikich jigkai nugka dekas pegkegnum kakekauwai, nunikajuk makí makichik ajak aidau cien, tikich sesenta, tikichakam treinta aatus nejekajui”, tiuwai. <sup>9</sup>Juna ashí jintinkagtua ashimak: “Dita antutajui ajamuk antuktinme”, tiuwai.

**Jisusa jintintajui aidau iniimsamu**

(*Mr. 4.10-12; Lc. 8.9-10*)

<sup>10</sup>Nuna aatus jintinkagtua ashimkamtai ni jintintajui aidau jegaantag:

—Apuh, ¿wagka augmatbau pachismesh shiig antukchamnush jintinkagtuaume? —tusa iniidau.

<sup>11</sup>Tama Jisus ditan ayaak: “Atumnak



Apajuí ni aentsnum inamjatnuji  
dekajakchamun wi pachisan etsejag  
junash dekamtijamatatus  
wakejutpagme; tujash tikich aidauk  
dekamain ainatsui nunap taku tawa  
tusajag. <sup>12</sup>Nuniau asantai ni mina  
chichamjun dekaskeapi tusa shiig  
puyatjus antaunak aan nagkaemasan  
jintintuattajai, tuja ni mina chichamjun  
puyatjus antachuk machik antamujish  
kajimitkam atinai. <sup>13</sup>Nuaduí ditanak  
ayatak augmatbaun pachisan jintinjai,  
wagki ditak wi waji pegkeg takaamun  
wainainakushkam wainmachu  
wajukmaina nuninak, antuinakush  
nunap tawa tusag dekainatsui wainak  
antuinawai. Nuaduí ayatak, junak taku  
tawai tutsuk jintinkagtajai. <sup>14</sup>Juka ditai  
uminui yaunchuk Apajuí etsegtin Isafas  
timawa nu, duka aatus tiuwai:

‘Chicham etsegbaun kuashat  
antiagtinaí tujash dekaachagtinaí,  
kuashat pegkeg takaamunashkam  
wainiagtinaí nuninakjunash  
dekaskeapi tichagtinaí.

<sup>15</sup> Juka aentsuk anentainish  
dekaskeapi tichamin utugchatan  
anentaimaidau asag,  
antuinakushkam wainak  
antuinawai.

Jiinchakam epetkamua numamtin  
ainawai.

Nuninchau ainakug mina  
chichamjun antukag pujutjin  
yapajinakuig, wi ditanak  
uwemtikmainaitjai.’

<sup>16</sup>“Tujash atumek shiig aneastajum,  
waintash wainu, antutash antajum  
nuaduí. <sup>17</sup>Dekas tajime: Kuashat Apajuí  
etsegtujakajua duka, nuigtú kuashat  
aents pegkejan takajakú aina dushakam  
yamai atum wainjum juna wainkagtatus  
wakegajakú ainawai. Tujash wainkachu  
ainawai, antutnash yamai atum antajum  
juna antukagtatus wakegajakú ainawai,

nuninakush ditak antukchajui ju  
chichamnak.

**Ajakan ajakbau timag nunak, juna  
takan timajai tusa Jisus etsegkamu**  
(*Mr. 4.13-20; Lc. 8.11-15*)

<sup>18</sup>“Wi ajakan ajakbaun augmattsan  
timajim nunú shiig antuktajum. <sup>19</sup>Jintá  
jigkai kakekaun pishak amukú, timag  
nunak: Apajuí inama nunú pachisa  
chicham etsegbaun antakush dekaskeapi  
tachau asantai, iwanch chicham  
antukbaujin kajimitka nuna takun  
timajai. <sup>20</sup>Ajakan jigkayí kayagnunum  
kakekaju aidau, timag nunak: Aents  
Apajuí chichame etsegbaun yamaikik  
shiig aneas antuku ainayatak, <sup>21</sup>waitiak,  
utugchatan igkuak pachitsuk idayidauk,  
ajakan kagkapé inital akaejachu asa,  
etsa sukuam waamak jinuwama  
numamtuk wajaina nuna takun timajai.  
<sup>22</sup>Jigkai jagki ayaunum iyaaju, timag  
nunashkam: Aents Apajuí chichamen  
antuinayatak, ju nugkaya waji aina  
nunak imá senchi uyumainak,  
wiyakchameatasag imá senchi  
wakejuina nuna takun timajai. Ashí ju  
nugkanmaya waji aina nunú, chicham  
pegkeg antukbaunak imanchau emawai.  
<sup>23</sup>Untsu jigkai nugka pegkegnum  
kakekajuk, jinutsuk ashí imanish shiig  
tsapaidiaju asag nejetnash imanik  
nejeawajui, timag nunak: Aents Apajuí  
chichamen shiig antukag, dekaskeapi  
tusag, emamkesag utugchat ajuinamash  
depetuk pujuina nuna takun timajai.  
Nunú aents aidauk makichik ajak, cien,  
sesenta, treinta nejeawajua numamtin  
ainawai.”

**Trigo ajakbaunum dupa  
pegkegchau tsapakun Jisus pachis  
jintinkagtuamu**

<sup>24</sup>Junashkam Jisus jintinkagtak  
augmatus: “Apajuí aentsnum inama

duka aents niina ajajin ajak pegkejan ajakmakua nujai betekmamtainai.

<sup>25</sup>Dutika ajakmak idayinak kajiak batsatai, ditá shiwaji wayaa dupa pegkegchau aidaun ajatuk ukuak weuwai. <sup>26</sup>Dutikamu trigoshkam tsapakag nejenai, dupa pegkegchau ajaamushkam paan wantinkajui. <sup>27</sup>Nunik dupa pegkegchau tsapakun wainkag, takau aidau wegajui apujin ujjaktatus. Nunik jegajagi: ‘Apuh, ame ajak pegkeg ajakbauwaitkush, žutugsaya dupa pegkegchaush tsapaidiaje?’ <sup>28</sup>Tiagtai: ‘Aunak shiwag aikae’, tama inak aidau: ‘žTujash amesh wajinpa dupa pegkegchau aidauk uwegtatjik?’ <sup>29</sup>Tiagtai: ‘Atsa dekas idaisatajum, dupa tegakmajum trigoshkam tegainijum. <sup>30</sup>Nunimain asamtai aantsag trigojai betekak tsakagtí, nunik trigo tsamak uminkamtai ishiaktajai tikich takau aidaun, dutikam dita dupa pegkegchau aidaunak etegkeg uwegag ijumag jigkaktinme apeatnun, tuja dutika trigonak juukag nunú ijumtainum ijumjatnume’, ” tiuwai.

**Mostaza jigkayí pachisa  
jintinkagtuamu**  
(*Mr. 4.30-34; Lc. 13.18-19*)

<sup>31</sup>Junashkam Jisus tikich augmatbaun pachis jintinkagtak: “Apajuí aentsnum inama duka, aents mostaza jigkayin niina ajajin ajauwa numamtainai. <sup>32</sup>Mostaza jigkayiya duka tikich jigkai aina nuní piipichi, nuninchitak ajaam tsapaig muuntan tsakaawai, nunik tikich ajak aidau nagkaesau kadaukdaugkin wegawai. Iman wematai nuaduý yakiya pishak aidaushkam nuna kanawen pasugmak petsaama numamtuk, Apajuishkam aents wajumkea nui inabaujin nagkama kuashat emawai”, tiuwai.

**Levadura pachisa jintinkagtuamu**  
(*Lc. 13.20-21*)

<sup>33</sup>Junashkam Jisus augmatbaun pachis jintinkagtak: “Apajuí aentsnum inama duka nuwa pagkan najanatatus kuashat harinan juki namuká, nuwi levadura piipich ajuntuamuitak ashí jegajug kajiak wampushmitkama numamtainai”, tiuwai.

<sup>34</sup>Jisusak aents aidaun jintinkug tuke augmatbaun pachis jintintujakuí. Augmatbaun pachis tutsukek jintinkagtujakchawai. <sup>35</sup>Nunú Jisus aatsa jintinkagtuamua duka, yaunchuk Apajuí etsegtin aidau againak:

“Apajuí nugkan najanaigkish dekaachbaun jintinkagtakug, tuke augmatbaun pachis jintinkagtitnai”, tibauwa nu uminkauwai.

**Ajak ajakmakbaunum dupa  
pegkegchau tsapainu pachisa nuní  
awai tusa Jisus jintinkagtuamu**

<sup>36</sup>Nuna Jisus aatus jintinkagtua aents aidaun ukukí jegá wayamtai, ni jintintai aidaushkam jegajuawag:

—Jintinkagtinuh, ame augmatkum dupa pegkegchau ajak ajakmamunum tsapakuí timaum dusha, žwají takumea timaume? nunú shiig ujajatkata iish dekami, —tuidau.

<sup>37</sup>Tama Jisuschakam ditan ujaak: “Jigkai pegkejan ajakbau timag nunak, wi Aentsmagan Akiinauwaitag nuna wiki tumamkun timajai. <sup>38</sup>Untsu ajan pachisan timag nunak, ashí nugkanmaya aents aidaun takun timajai. Ajakan jigkayí pegkeg timag nunashkam Apajuí uchijí aidaun takun timajai; untsu dupa pegkegchau timag nunak iwanchdau aina nuna takun timajai. <sup>39</sup>Shiwag dupa pegkegchaun ajau timag nunak, iwanchin takun

timajai. Ajak juwaamu timag dushakam atak dekas nugka nagkanbaunum aents pegkeg, pegkegchaujai etegnagtina nuna takun timajai. Untsu ajakan juwidau timag nunak, nayaimpinmaya aents aina nuna takun timajai. <sup>40</sup>Nugka nagkantina duwik aents pegkegchau aidauk, dupa tegajá apetiama numamtuk awajam agtinai. <sup>41</sup>Wi Aentsmagan Akiinawaitag nuna, mina aentsug nayaimpinmaya aidaun ishiaktinaitjai, pegkegchau takau aidaun, tikichin pegkegchaun takamtikin aina nujai Apajuí emtin akanjati tusan. <sup>42</sup>Dutika etegkeg pegkegchau takau aidaunak jii tuke kajinchauwa nui chimpiauwagtinaí, dutikam nui batsamsag senchi waitiak nain takegtuinak buutu batsamtin ainawai. <sup>43</sup>Tujash Apajuí wakegamujinak takagsaju aidauk, Apajuí inamtaijin wakag tuke etsajai betek etsantiagtinaí. Wi taja nuna, dita antutaiji ajamak antuktinme.

**Oro uukbau pachisa  
jintinkagtuamu**

<sup>44</sup>“Apajuí aentsnum inama duka oro kajunnum aimkamu nugkanum yutua uukbauwa nujai betekmamtinaí. Aents nunú uukbaun wainak nuwig yutua ukuak, shiig aneas wakitki ashí niina wájí ajamunak sujuk sumakua numamntinaí.

**Kaya perla dekas akik pachisa  
jintinkagtuamu**

<sup>45</sup>“Apajuí aentsnum inama duka, aents wájí sujin nayantsanmaya tsuntsu kayají perla tutai, dekas pegkeg iwajamu akiktanash akikan wainkatatus egá wekaetukmá, <sup>46</sup>wainak ukuak, jeen jegaa ashí niina wajiji aidaunak sujug ashimak, nu iman akikan sumakua nujai betekmamtinaí.

**Red augmattsa tibau**

<sup>47</sup>“Aantsag Apajuí aentsnum inama duka, aents retan ajuntin aidau nayants ajuntuk, ashí tikich namak wainchatai aidaujai ijumag yajuma nujai betekmamtinaí. <sup>48</sup>Namak retnum ashí chimpimkamtai japí japinakua kukag ajuidiag, nui ijuntujag namak yutai aidaun yajumainak, namak wainchatai yutash yuchatai aidaunak ayatak utsauwajame. <sup>49</sup>Numamtuk tsawan nugka nagkanbau jegataik, Apajuí nayaimpinmaya aents aidaun ishiaktinaí, aents pegkeg pegkegchau aidaujai etejatnume tusa.

<sup>50</sup>Dutikawajam etegkeg pegkegchau aidaunak jii tuke kajinchau awa nui utsawagtinaí. Dutikam nui batsamsag senchi waituinak nain takegtuinak buutu batsamtin ainawai” tiuwai.

<sup>51</sup>Nuna pachis ashí jintintua inagnak: —¿Atumesh wi juna taja dusha shiijak antukujum?

Tusa iniinam dita aimainak:

—Ehé Apujuh, shiig antukji, —tiaju.

<sup>52</sup>Tiagtai ni chichajak:

—Moisés chicham umiktajum tibauwa nuna jintinkagtin aidau, mina nemagtukag wi Apajuí aentsnum inamjatnun inabaujin etsejag juna shiig unuimaidauk, aents jeentin yaunchuk wájí ukukbaujin, tikich yamá ikaunmakbaujai ijumjamun jiyama numamtuk wajainawai, —ti.

**Jisus Nazaret pujusbau  
(Mr. 6.1-6; Lc. 4.16-30)**

<sup>53</sup>Jisus nu augmatbaun ashimak aents aidaunak ukuak, <sup>54</sup>niina nugkeen Nazaret weuwai. Nunik nui jegaa jega ijuntainum wayaa chicham pegkeg, ditash dekaachbaun jintinkagtau.

Imanitai aents aidau puyatjuk diinak:

—¿Jusha tuwí imanikash unuimajuita imatika wainchatain iwaina nunash?

<sup>55</sup>¿Jujú carpintero uchijiya duchaukaih, dukujish Maríayajama? ¿Yachi aidaushkam Jacobo, José, Simón, Judas ainajama? <sup>56</sup>Ni umayí aidaushkam jutiijai ijutkau batsata aniaish, ¿wajuka imatikash dekawa? —tuidau.

<sup>57</sup>Tusa pampantuinam Jisus chichaak:

—Apajuin etsegtin ni nugken pujus etsegtaik, eme anentsag antugchau ainawai, tujash tikih nugkanum wekagas etsegtaik shiig aneas antujin ainawai, —tiuwai.

<sup>58</sup>Nuna tusa, nuanuig kuashat wainchatai aidau iwainajag takaschauwai, dekaskeapi tuinachbau asa.

#### Juan Yamijatin maamu

(Mr. 6.14-29; Lc. 9.7-9)

**14** <sup>1</sup>Nunú tsawantai Herodes Galileanmaya apua nu Jisus pachisa chichainamun antuku, <sup>2</sup>nunik ni inake aidau chichajak: “Duka Juan Yamijatin maamua nu nantakiu asa senchigtin wajas imaniawai”, tau.

<sup>3</sup>Nunak Herodes Juagkan achiká aents achiká chimpitainum egkeau asa tiuwai. Nunak Herodesak ni yachi Felipe nuwen Herodiasan nuwatuk pujau asa dutikauwai. <sup>4</sup>Wagki Juan chichajak: “Herodesah, amek amina yatsumi nuweg nuwatkamek pujumaitsume”, tibau asa,

<sup>5</sup>Herodes kajejuk maatatus wakejayatak, aents aidau Juagkak dekas Apajuinun etsegtawai tuidau asagmatai, ditá ishamak idaisauwai. <sup>6</sup>Dutika Herodes ni akiinamu tsawagmatai ipaamu aidaushkam tuwakuí, imanikbaunum Herodiasa nawanji ejapeen wajanantá nantsemak Herodesan shiig awajkauwai. <sup>7</sup>Nunik:

—Ashí ame wakegamu segatbaunak utujitsuk amastajame, —tusa anagkauwai. <sup>8</sup>Tima nuwauchishkam

dukujin jegantú, nunikmatai ni dukují akatjau, dutikam Herodesan jegantun:

—Jujú platunum Juan Yamijatnun buuké sujustá, —tusa segauwai.

<sup>9</sup>Nunú tama Herodes wake besequí, nuniyatak ditajai pekajuidaush antuinamunum: “Dekas amastatjame”, tiu asa yapajimainchau dekapjauwai. Nunik:

<sup>10</sup>—Wejum aents achiká chimpitainum Juan egketa nuna buuké tsupika susatajum, —tiuwai. <sup>11</sup>Timatai Juagkan buuken platunum egkejag itaantajui, dutika nuwauchin susajui. Ni juki dukujin susauwai.

<sup>12</sup>Dutikawagmatai Juagkan jintintaiji aidau kautuk iyashin jukiag ukusag ukuinak, Jisusan wejag ujakajui.

#### Jisus cinco mil aents ayugkamu

(Mr. 6.30-44; Lc. 9.10-17; Jn. 6.1-15)

<sup>13</sup>Jisus Herodes tabaun dekaa, botenum egkemag nugka agkantunum nigki pujustatus weuwai. Nunittaman aents aidaushkam dekaawag, yaaktan ukuinak kukag shiyakajui. <sup>14</sup>Jisus botenmaya jinkamá shiig kuashat aents tuwaká ijunun wainkau, dutika wait anenjajui, nunik jau ikaunmamunash etsagaaku.

<sup>15</sup>Nuniamunum etsa akagu asamtai, Jisusa jintintaiji aidau jegaantag:

—Juwig jutiik aents atsamunum batsatji, etsash akaewai, aentsuk ishiakta, yaaktanum jegattak aents batsata nui wegag dita yuwatnun sumaktinme, —tuidau.

<sup>16</sup>Tutai Jisus ayaak:

—Ditak wemain aiatsui, atum dita yuwatnuk susatajum, —tiuwai.

<sup>17</sup>Tama dita aiinak:

—Imaanik atsugtamui ayatak cinco pag, nuigtú jimagchik namak ajutjamui.

<sup>18</sup>Tiagtai Jisus:

—Nunú mina sujustajum, —tusa segauwai. <sup>19</sup>Nuna tí: Aents aidau

yajuakjum chijichi aina nui batsamsatajum titajum, tusa cinco pagkan, nuigtú jimagchik namaka nuna juki, nayaimpinum pagkai see tusa, pagkan puujá ni jintintaiji aidaun tinabiu. Dutikam dita aents aidaun tinabiajui. <sup>20</sup>Dutikawajam ashí shiig yuwawag ejemakajui, nunikagmatai ampinkaunak yajuakag doce chagkinnum aimjajui. <sup>21</sup>Nui yuwawajuk cinco mil aishmag tumain aajakuí, nuwash uchi aidaush dekapatsuk.

**Jisus yumí awanken  
wekaesá webau**  
(*Mr. 6.45-52; Jn. 6.16-21*)

<sup>22</sup>Nuna yuwawag nagkanaig niina jintintaiji aidaunak:  
—Atumek botenum chimpimjajum emka kuchá amain katigtajum, —tusa ishimak, Jisusak aents aidaun aujus ishiaktatus juwakui. <sup>23</sup>Aents aidaun ashí aujus ukuak, Jisus mujanum wakauwai kanakí Apajin ausatatus. Nunik kiyagmataishkam nigki pujau. <sup>24</sup>Atushat nugkan ukukí boteschkam kuchanum ejapean wegai, dase igku umpuamu asa yumi tajeamunum pachiinak botek ukaetatak wajau. <sup>25</sup>Imaniai kashikmas tsawau taig, Jisus yumí awanken wekagas minau. <sup>26</sup>Nunik wekagas minittaman niina jintintaiji aidaun wainkag senchi ishamkag untsumainak:

—iPasun minawai! —tjau.

<sup>27</sup>Imatiagtai Jisus chichaak:

—iWitjai ishamjukaigpajum!  
—tiuwai.

<sup>28</sup>Tutai Pedro ayaak:

—Apuh, dekas ametkumek, minash yumí awanken wekaesá juwi tantata tujutia, —tau.

<sup>29</sup>Tutai Jisus:

—Takumek minitá, —tiuwai.

Tama Pedroschkam botenmaya jiinki, namaká najama yumí awanken wekagas

Jisus wajamunum jegantatus wegau.

<sup>30</sup>Nunik dase senchi dasentai ishamkau, nunikmá yuminum akagak:

—iApuh achigkata! —tau.

<sup>31</sup>Nuna taig Jisus uwegnum achiká chichajak:

—¿Wagka minaig kajintsá anentaimtsukesh utujimsamesh anentaimtugme? —tiuwai.

<sup>32</sup>Jisus Pedrojai botenum

egkemjagmatai daseg mijakui.

<sup>33</sup>Nunikmatai ni jintintaiji aidaun nui botenum chimpijuk Jisusan jegaantag tikishmatug:

—iAmeK dekas Apajuin Uchijiyaitme!  
—tusa emematuidau.

**Jisus Genesaretnumia  
jau aidaun etsagakbau**  
(*Mr. 6.53-56*)

<sup>34</sup>Imaa imaaninakua katigkag Genesaret nugkanum jegawajui. <sup>35</sup>Nunikmatai Jisusa wainkag ashí nu nugkanmag etsejajui, dutikawagmatai ashí jau aidaun ni pujamunum ikautkaju. <sup>36</sup>Dutikawajam:

—Idaikagtusta ame pataká nugkuajam nuna nagkattsamujigkesh antigkagmi, —tusag segaidau. Tuja ashí aents niina jaanchjin antigkuk pegkeg waigkaju ainawai.

**Aentsun pegkegchau ebaun  
Jisus pachis etsegkamu**  
(*Mr. 7.1-23*)

**15** <sup>1</sup>Jerusalegnumia fariseo aidaun, chicham umiktinun jintinkagtin aidaujui kaunkaju Jisusan jegantajui, nunikag:

<sup>2</sup>—¿Wagka amina jintintaijum aidaush iina muunji umiktajum tibauwa nuna umitskesh ikigmatskesh yuwinawa? —tuidau.

<sup>3</sup>Tagtai Jisus ayaak:

—¿Wagka atumesh atumi muunjum chicham umiktajum timawa nu

umiakjumes, Apajuí chicham umiktajum timawa nu umitskesh idaijume? <sup>4</sup>Apajuí chichaak: ‘Atumin apa, dukujai eme anentsam diitajum, dutikakjum yaigtajum; ni apajin, dukujinakesh pegkegchaun chichajuk tsagkugtsuk maatajum’ tiuwai. <sup>5</sup>Tujash atumek: Ni apajin, dukujinakesh: ‘Ashí midau ajuta junak Apajuin anentag anaguamjai, nuniku asan yaimaitsugme’ tusa <sup>6</sup>tauk, ni apajinak dukujinakesh yaimaitsui tajume. Nunú aaja tau asajum, Apajuí chichame umiktajum tujamawa duka imanचाuch emajum, atumi muunjumi chichamega duke wejuinagme. <sup>7</sup>iAentsú tsanú aidauwah! Apajuí etsegtin Isafas atumin pachipasag shiig tiuwai:

<sup>8</sup> ‘Ju aents aina juka minak dekas ditá anentain eme anenjuinak adaituinatsui, ayatak wenin adaituinawai.

<sup>9</sup> Nuniau asag minak umigtuinatsui, aents umiktajum tibuwa nuna jintinkagtuinak Apajuinu jintinkagtaji’ tuinawai, —tiuwai.

<sup>10</sup> Juna ti aents aidau untsuká chichaak:

—Antuktajum, nuniakjum shiig dekaatajum. <sup>11</sup>Wenunum wayá duka aentsnak pegkegchauk ematsui. Untsu aentsun weninia jiina nunú aentsnak pegkegchau emawai.

<sup>12</sup>Timatai ni jintintaiji aidau Jisusan jegaantag:

—¿Amesh wainkamkum fariseo aidau ame tame nuna antukag kajekagma dusha? —tuidau.

<sup>13</sup>Tama Jisus:

—Ditak mina Apag nayaimpinum puja nudauchu asag, ajak tegai ajaptayama numamtuk awajam agtinai.

<sup>14</sup>Idaisatajum, ditak wainmainatsui, nuninaitak tikich wainmachu aidau jintan inaktustatus wakejumaina

numamtuk wajainawai. Wainmachua nunú tikich wainmachun jintan inaktustatus wegakug, waanum mai nuwig iyaumainai.

<sup>15</sup>Tutai Pedro Jisusan:

—Shiig ujjatkata nunú augmatbau pachisam tame dusha wají takumea tame, —tiu.

<sup>16</sup>Tutai Jisus:

—¿Atumesh nunú dekamainchauk dekaejum? <sup>17</sup>¿Dekatsjumek ashí wenunum wayauk ampugnum nagkaemaki, atsumamunum wegam letrinanum ajapna duka? <sup>18</sup>Tujash wenunum jiina duka anentainmaya jiiinui. Nuniau asa aentsnash pegkegchau emawai. <sup>19</sup>Anentainmaya jiiinui pegkegchau anentaimta dushakam, magkagtuta nu, tsanijinat, kasamat, tikich dekaskechu aig tsanumjut, pegkegchau chichagkagtut, <sup>20</sup>ju aina juuwai aentsun pegkegchau emauk, tujash ikigmagjum yuwatajum timawa nunú, ikigmatsuk yuwamuk aentsnak pegkegchauk ematsui.

**Tikich nugkanmaya nuwa  
Jisusan dekaskeapi tibau  
(Mr. 7.24-30)**

<sup>21</sup>Jisusjai nuwiya jiiinag Tiro nugkanum, Sidón nugkanmashkam wegajui. <sup>22</sup>Nui jegai Canaagnumia nuwa Jisusan untsukmaikia minis:

—iApu David wegantu uchijiyah! iWait anenjujia minash! iMina nawanjun wakan pegkegchau egkemtug, senchi waitkagta nu!, —tau.

<sup>23</sup>Tamash Jisusak machikish aikchauwai. Nunitai ni jintintaiji aidau jegaantag:

—Iina ukujin minis untsú untsumkawa minajama, wakitkita tita, —tuidau.

<sup>24</sup>Tama Jisus:

—Apajuik minak Israel aents megkaejau aina nuwig awetiuwai.

<sup>25</sup>Nuna taig nuwashkam amainag tikishmatug pujus:

—Apuh yainkata, —tau.

<sup>26</sup>Tutai Jisus ayaak:

—Uchi pagkan yuwau atankí yawá suwamuk pegkegchawai, —tau.

<sup>27</sup>Tutai nuwa ayaak:

—Duka apu dekaske. Tujash yawashkam mesa wapken pujusá tsaisá akakeamun yuwamajama, —tau.

<sup>28</sup>Tutai Jisus ayaak:

—Nawantah, shiig senchi minaij kajintsá anentaimam duwi, ame wakejam duka imanisag uminkattawai, —tiu.

Nuna taig wamkes nunú nuwan nawanjishkam pegkeg wajasuf.

#### **Jisus kuashat aents jaidau etsagakbau**

<sup>29</sup>Jisus nuwiya juwaki Galilea kuchajin jegauwai; nunik nainnum waka nui ekeemsauwai. <sup>30</sup>Nunikmatai kuashat aents aidau tuwagkaju; nuninak shutú, uwejé chuwijú, wainmachu, chichachu aidau, nuigtú kuashat jau aidauashkam ni eketbaunum ikautuidau. Nunikmatai Jisuschakam etsagaakui. <sup>31</sup>Dutikawajam aents chichachu aidau chichaidau, uwejé tsujinkau aidau pegkeg wegajui, shutú aidauashkam wekagaidau, wainmachu aidauashkam wainmaidau. Nunidaun aents aidauk puyatjukag ijunas dii ijuntuaidau. Nunikag: “Israel aentsun Apajuiji dekas imá senchigtinai”, tusag emematuidau.

#### **Jisus cuatro mil aents ayugkamu (Mr. 8.1-9)**

<sup>32</sup>Nunikagmatai Jisus ni jintintaiji aidau untsuká ijumag:

—Jujú aents aina juna wait anentuinajai. Kampatum tsawan wijai batsatainawai, tujash yumainji

atsujinawai. Yujumkan ayugtsukek ditá jeenig ishimaitsujai, jeen jegatakamag pimpikiag jaka iyaantainum tau asan.

<sup>33</sup>Tutai niina jintintaiji aidau:

—Tujash çtuwiyag yutaish jumainaita imajú kuashat aents ayugmainush aents atsamunum pujag juniautish? —tuidau.

<sup>34</sup>Tiagtai Jisus niina jintintaiji aidau:

—¿Wajupa pagka ajutjamainawa? —tusa iniau.

Tama dita ujainak:

—Siete pag, nuigtú wajumchik namak ajutjamui, —taju.

<sup>35</sup>Tiagmatai:

—Aents aidau akanjajum shiig nugká batsagtajum, —tusa idayak <sup>36</sup>pagkan namakjai juki wajan Apajin see ti, nuna puug ni jintintaiji aidau tinabiu, dutikamtaí dita aents aidau tinamkajui. <sup>37</sup>Dutikawajam ashí shiig yuwawag shiig ejemakaju, nuigtushkam ampínjau aidau siete chagkinnu aimjajui. <sup>38</sup>Nui yuwawajuk cuatro mil aents aajakuí, nuwash, uchi aidauash dekapatsuk imá aishmag muun aidauk dekapam. <sup>39</sup>Juna dutika Jisus aents aidau aujus ukuak, botenum egkemag Magdala nugkanum weuwai.

#### **Fariseo saduceo aidaujai, wainchatai iwainakta tusa**

#### **Jisusan segamú**

(Mr. 8.11-13; Lc. 12.54-56)

**16** <sup>1</sup>Fariseo aidau, saduceo aidaujai Jisusan Apajuí Uchijimpashit tusag dekapagtatus jegajuawag:

—Nayaimpinmaya wainchatai iwainkagtukia, —tusag segaidau.

<sup>2</sup>Tama ni ayaak: “Atumek agkutai nayaim kapantu wajasmatai: ‘Pegkeg tsawan atatuí, nayaim kapantu wajasé’ tinu ainagme, <sup>3</sup>untsu kashikmasjum: ‘Yamai tsawan pegkegchau atatuí, ikiyamag suwe wajasé’, tajume.

iTsanumin aidauwah! Nayaimpi niimé diisjum tsawan wajuku atatua nunú dekawaitkugmesh, ¿wagka wi wainchatain iwainakan takaag jusha, Apajuí tibauwa nunap jutikawa tusagmesh dekamainchaush dekapeagme? <sup>4</sup>Jujú aents pegkegchau aidau Apajuí chichamenash umigchau aina nu, dekas Apajuí Uchijimpashit tusag dekapjustatus wainchatai iwainakta tujutuinaawai. Tujash dita tuina nunak iwaintukchattajai, ayatak Jonás wajukauwa nunisnuk ditanak iwaintuktatjai”, tusa ukuak weuwai.

**Fariseo jintinkagtuina duka,  
levaduraya numamtainai tibau**  
(Mr. 8.14-21)

<sup>5</sup>Jisusa jintintajji aidauk kuchá amain weenak pagkan kajimatki jutsuk katigkajui. <sup>6</sup>Nunikagmatai Jisus:  
—Nijah, fariseo aidau, nuigtú saduceo levaduraji aina nujai kuitamamkatajum, —tau.  
<sup>7</sup>Tutai niina jintintajji aidauk pempeentunikiag:  
—Junak ii pag takukchag duwi tujamji, <sup>8</sup>tusa tabaun Jisus antuk:  
—¿Aents imanis kajinas anentaimchau aidauwah, wagka pag pachisjumesh atumek pempeentunikjumesh jiyaniagme? <sup>9</sup>¿Eke dekamainchau dekapeajum aneetash aneaktugmek, wi cinco pagkai cinco mil aents ayugkam nuigtú ampinkamtaish, wajupa chagkina aimjabiugme duka? <sup>10</sup>¿Nuiqtush aneaktugmek, wi siete pagkai cuatro mil aents ayugkam ampinkamtaish, wajupa chagkina aimjabiugme duka?  
<sup>11</sup>¿Wagka antumainchaush dekapeagme? Wika ditá levaduraji pag pachimtaiya nuna takun tichamjime:

‘Kuitamamkatajum fariseo, saduceo levadurajiyá nujai’, timajim nunak.

<sup>12</sup>Nuna Jisus timatai dekawajui levadura pag najanatasa pachimtaiya nuna tatsuapita; fariseo, saduceo jintinkagtutajji aidau nap tawa tusag.

**Pedro, Jisusan amek  
Kristuitme tibau**  
(Mr. 8.27-30; Lc. 9.18-22)

<sup>13</sup>Jisus yaakat Cesarea, Filipino tutaya nuanuñ jegaatatus wesa, ni jintintajji aidau:

—¿Aents aidau wi Aentsmagan Akiinauwaitag nunash yaayai tujutuinaawai? —tusa iniidau.

<sup>14</sup>Tutai dita aiinak:

—Wajumak aents aidau: ‘Juan Yamijatín maamua nunuwai’, tujamainawai, tikich chichaidau: ‘Auk Eliasai’, tujamainai, tikich tuidau: ‘Jeremiastukaitai, nuniachkush: Apajuí etsegtn aajakú aina dutsukaitai’ tujamainawai, —tuidau.

<sup>15</sup>Tiagtai ditan pempentusag:

—¿Tujash atumesh minash yaayai tujutjume?

<sup>16</sup>Tutai Simón Pedro tutaya nu ayaak:

—Amek Kristuitme, Apajuí tuke pujuwa nuna Uchijiyaitme, —tiu.

<sup>17</sup>Tutai Jisus ayaak:

—Simón, Jonasa uchijiyah amek shiig aneasta, aents tibaukesh tatsume, aminak mina Apag nayaimpinum puja nunú dekamtijamae. <sup>18</sup>Wishakam amina tajame, yamaik amek Pedro<sup>o</sup> atatme. Jujú kaya muunta juwi ekenin kaya ekenjá jegamtaya numamtuk mina aentsug aidau nak awajkattajai, nunak jatakesh depetmainchau atinai. <sup>19</sup>Tuja amina idaitustajame Apajuí juwi inabaujiya nu yawí waiti ujamaina numamtuk awajkatin atá tusan.



Dutikamu asam ame ju nugka juwi chicham etsegbaun dekaskeapi tachauk nayaimpinmag tsagkugnagchatnai. Untsu ame chicham etsegbaun dekaskeapi tusa umiauk aantsag nayaimpinmashkam tsagkugnagtinai, —tiuwai.

<sup>20</sup>Nuna tusa ni jintintaiji aidaun, mina pachittsagmek, juka Kristu uwemtikagtin awemamu taatnai tibauwa nuuwai tusagmek makichik aentskesh ujakaigpajum, tiu.

**Jisus ni maam atinji etsegkamu**  
(*Mr. 8.31-33; Lc. 9.22*)

<sup>21</sup>Nuna tusa akatek:

—Jerusalén wegagmi, awi jegaa ai minak apu aidau, sacerdote apuji aidaushkam, ashí chicham umiktinun jintinkagtin aidaujui senchi waitkagsag mantuawagtatui. Nuna dutijuawagmataish, wika kauptum tsawanta juwi nantaktatjai, —tau.

<sup>22</sup>Tutai Pedro akanak juki kakaakan chichajak:

—Apujuh, ame waitmainaitam duka nagkaetukchati tumamia. Apajuishkam aminak dutikam atí tusag tsagkamjamaitusajamah, —tau.

<sup>23</sup>Nu tama Pedron ayampatua chichajak:

—iWetá iwanchih, minai tantá wajatsuk! Amek dekatsme Apajuí dutikatjai tabaujiya duka, nuaduí nuna umikai tusam tujutme, aentsú anentaimtaig anentaimam duwi, —tiuwai.

**Jisus mina nemagtukta tautigmek atum wakegamuk idaikujum nemagtuktajum tibau**  
(*Mr. 8.34-38; Lc. 9.23-27*)

<sup>24</sup>Nuna ti Jisus ni jintintaiji aidaun: —Mina nemagtuktasajum wakegautigmek atum wakegamuk

idaikujum nemagtuktajum, nuniakjum senchi waitiakjumes atsanjatajum.

<sup>25</sup>Ashí aents ju nugka juwi pujutan imá senchi wakegak, mina nemagtuk waittan dakitauk uwemjashin ainawai. Untsu ashí aents mina nemagtuk pujus nunisag jaa nu uwemjatin ainawai.

<sup>26</sup>Aents ju nugka juwiya wají aidaun, ashí niinu emakush jaakug niina wakaninak tuké uwemtikmaitisui. Aentsuk ni wakaní uwemtijatasa akikmatmainjig atsawai. <sup>27</sup>Apajuí Uchijiyaitak Aentsmaga Akiinauwa nunú, ni Apají imanjiya nujai imanisag ni aentsji nayaimpinmaya aidaujui nugkanum taak, makí makichik aentsnak dita takasbaujiya dutiksag akiktinai. <sup>28</sup>Atum juwi ijunjum juwiyatijum wajumak aidautijum eke jatsuk, Apajuí Uchijiyaitak Aentsmaga Akiinauwa nu inabauji wainkatnutigmesh ajume, —tiuwai.

**Jisus yapajinamu**  
(*Mr. 9.1-13; Lc. 9.28-36*)

**17** <sup>1</sup>Seis tsawan asa Jisus, Pedron, Jacobon niina yachi Juangkan aatus juki muja yakí tsakajunum wegajui. <sup>2</sup>Nuwi ditash wainainaig Jisusa niimé yapajinauwai. Ni yapig etsajai betek wajasuí, niina jaanchjishkam shiig puju wajasuí. <sup>3</sup>Nuniaig Elías, Moisesjai Jisusan aujuinak ijuntatman wainkajui. <sup>4</sup>Nunik Pedro Jisusan chichajak:

—Apujuh, jutiish maigkis juwig batsatagtai, amesh wakegakminig kauptum aak umikagmi, makichik aminu, tikich Moisesdau, nuigtú Eliasdau, —tau.

<sup>5</sup>Nuna aatus Pedro chichai, yujagkim winchamtin ashí ditajai ijumag ijikuí. Nuniaig yujagminmaya chichaak: “Juwai dekas mina uchig anetaijuk, juwi shiig aneamug ajutui, nigki

antugkujum umigkatajum”, tabaun antukajui.

<sup>6</sup>Nu tabaun antukag, niina jintintaiji aidau senchi ishamkag tikishmajag tsunsumawaju. <sup>7</sup>Nunikagmatai Jisus ditan tajuntun antiak:

—Ishamkaigpajum wajaitajum, —tau.

<sup>8</sup>Tama diistakamá imá Jisusak wajattaman wainkajui.

<sup>9</sup>Nuna nunik Jisus mujanmaya minisá niina jintintaiji aidau:

—Atum wainkajum nu pachisjumek makichik aentskesh ujakaigpajum, wi Apajuí Uchijiyaitkun Aentsmaga Akiinauwaitag nuna mantuawagmatai nantatsaigkik, —tiu.

<sup>10</sup>Nuna timatai, ni jintintaiji aidau iniidau:

—¿Wagka chicham umiktinun jintinkagtin aidaush, dekatkauk Eliasá taatnai tuinawa?

<sup>11</sup>Tusa iniam Jisus ayaak:

—Elías niyá eemak taa tikich takastinun umiktinai tibauwa duka dekaske. <sup>12</sup>Tujash wi tajime: Eliasak taabi, nunikunak dekaachaju asag, dita pegkegchau takaamujinak dutiksag inagkeatkiagmayi. Nunisag Apajuí Uchijiyaitak Aentsmaga Akiinauwa dushakam dita waitkam atatuí, —tiuwai.

<sup>13</sup>Nuna tutai ni jintintaiji aidaushkam dekaawajui, Jisusak Juan Yamijatnunap pachis tawa tusag.

**Wakan pegkegchau uchin  
egkemtuumun Jisus etsagagbau**  
(Mr. 9.14-29; Lc. 9.37-43)

<sup>14</sup>Nunikag aents tuwakbaunun jegainai, makichik aents tajuntun niina tikishmatug chichajak:

<sup>15</sup>—Apuh, mina uchijush wait anenjutjata, senchi jaakug imaanata wajauwe, nuniau asa kuashtá jinumash patamnuwe nuniak namakash iyainuwe.

<sup>16</sup>Imaniau asamtai amina jintintaijum aidau itaantamjai etsaentujati tusan, tujash etsagagchagmae, —tau.

<sup>17</sup>Tusa tama Jisus ni jintintaijin chichajak:

—iAents pegkegchau minai kajinas anentaimchau aidauwah! ¿Wajupá dukapea atumjai ijunjanush pujumainaitja? ¿Wajupá dukapek dakastajime minak dekaskeapi tujuttinme tusanush? —Nuna ti idayak: —Juwi itantá, —tiuwai.

<sup>18</sup>Tima uchí juki itanmatai Jisus wakan pegkegchaun jiyaká jiikiuwai, dutikam nu tsawanta duwik uchishkam pegkeg wajasuí. <sup>19</sup>Jisus nuna dutikamtai niina jintintaiji aidau agkan niinak iniinak:

—¿Wagka jutiish jiiktakamaish tujinkamji? —tuidau.

<sup>20</sup>Tiagtai Jisus chichaak:

—Atum imaanisa Apajuyai kajintsá anentaimaumum atsugtamainawai. Dekas tajime: Kajintsá anentaimaumum mostaza jigkayiya nuninchikesh ajutjamainakuig, ju muja jujú chichagkujum: ‘Juig atsuk tikich yantamnum wetá’, tamak nunisag nagkaemamainai. Makichkish tujinmainuk atsugtamainaitjume.

<sup>21</sup>Tujash ju wakania juka, Apajuí aujku yujumak ijagmaka pujachkuik kakajus jiimaitsui.

**Jisus awentsag ni  
mantamnatnuji etsegkamu**  
(Mr. 9.30-32; Lc. 9.43-45)

<sup>22</sup>Jisus Galilea wesa ni jintintaiji aidau chichajak:

—Apajuí Uchijiyaitak Aentsmaga Akiinauwa nunak, tikich aents aidauum sujukag idaisagtatuí, <sup>23</sup>dutikawagmatai maawagtatuí. Tujash kampatum tsawanta juwi nantaktatuí, —tau.

Tutai ditashkam senchi wake besekajui.

**Jega Apajuí ememattainum kuichik  
akikmaktin tibau**

<sup>24</sup>Nui juwakiag Jisus ni jintintaiji aidaujai yaakat Capernaum jegawajui. Nui jegawagmatai, jega Apajuí ememattainum kuichik itaamun yajumin aidau Pedron jegaantag:

—¿Amina jintinjamnuk akikmakchattawak jega Apajuí ememattainum kuichik itaata tibuwa nunak? —tuidau.

<sup>25</sup>Tama ni ayaak:

—Ehé akikmaktatui, —tusa ukuak jegá wayaamtai,

Jisus niina iniak:

—¿Simogka amesh wajuk anentaimtame? ¿Ju nugka juwiya apu aidauash yaá aents aidaua kuichikinash jujuinawa? ¿Ditá uchijish akikmainawak atsa tikich aents aidauanak akikmakta tuina?

<sup>26</sup>Tutai Pedro:

—Ikaya aina nuna akikmakta tuinawai, —tau. Tutai:

—Dekaske ditá uchijig akikmainatsui; <sup>27</sup>tujash nunin aig dita shiig juwakchainum tau asá kuchanum weme agsea ajugtá, dutikam deatkau namak ajuittam nuna weni iwanjam diistá. Nui kuichik egkematui. Nunú kuichik jukim jega Apajuí ememattainum weme midau, aminujai akikmakta, —tiuwai.

**Yaki dekas imá wagaakush  
atinaita tiagbau**

(Mr. 9.33-37; Lc. 9.46-48)

**18** <sup>1</sup>Nunú tsawantinig ni jintintaiji aidau Jisusa jegaantag:

—¿Yaki Apajuí inamtainish imá wagaakush atinaita? —tusag iniidau.

<sup>2</sup>Tiagtai Jisus makichik uchin untsuká itan ditá ejapeen awajus, <sup>3</sup>chichaak:

—Dekas tajime: Atum pujutjum yapajiajum uchi aina jumamtin

wegachkugmek, Apajuí inamak amain ainatsjume. <sup>4</sup>Aents Apajuí inamu dekas wagaaku atinuk, aents pujutjin yapajiau, jujú uchi anentaimaina jumamtuk weena nu imanuk agtinai. <sup>5</sup>Makichik aentskesh mina nemagtuidau asag, ju uchia jumamtin aidau mina daajui juidauk, mina dutijuinawai.

**Tikichin pegkegchau emaidau tibau**  
(Mr. 9.42-48; Lc. 17.1-2)

<sup>6</sup>“Wajumak mina dekaskeapi tusag nemagtuidau ju uchi piipichia jumamtin aidau pegkegchau takamtikaidauk, dekas kaya muun dekeetai aina iman jukí kuntugnum detuais nayantsa kunajin ajugká ajapmain ainatai. <sup>7</sup>iWait anentuinajai aents aidauanak, pegkegchau takamtikagtin midagtin asagmatai! Duka tuké nuniktinai. Tujash wait anentajai ya pegkegchau aentsú takamtiktinaita nunak.

<sup>8</sup>“Tuja nuniktin asamtai amina uwejum, nuniachkush dawemkesh tudaun takamtijamkuig, tsupika atushat ajapmaina numamtuk wajaktá, tudau takata nunú idaikum. Dekas pegkejai tudau takat idaisau asá, pujut tuke atina nui uwegtuchu, nuniachkuish shutusá waimaina numamtuk wajamuk, mai uwegtin mai nawentin asá, jii ajumaish kajinchauwa nui ajapeam amaina nu. <sup>9</sup>Amina jiiim tudaun takamtijamkuish, makichik jime ukuinkam atushat ajapmaina numamtuk wajaktá, tudau takata nunú idaikum. Dekas pegkejai tudau takat idaisau asam pujut tuke atina nui makichik jiiyaik niimsá waimainaitam numamtuk wajamuk, jimag jiiintin asam jii ajumaish kajinchauum ajapam waitiaku pujumainaitam nu.

**Uwig megkaekau pachis Jisus  
augmattsamu**  
(Lc. 15.3-7)

<sup>10</sup>“Mina nemagtuidau ju uchia jumamtin aina nu, wainkajum

imanchau anentaimtipajum, Apajuí aentsji nayaimpinum batsatina duka ditanash kuitamaidau asamtai. <sup>11</sup>Wi Apajuí Uchijiyaitkun Aentsmagan Akiinauwaitag nunak, aents wakanin megkaejau aidaun uwemtikatasan tauwaitjai.

<sup>12</sup>“¿Wajuk anentaimjume? aents cien uwig ajamu makichik megkaetukam, noventa y nueve uwija nunak batsaak ¿megkaekauwa nuna egaak muja aidaunum wemainchaukaih? <sup>13</sup>Dekas tajime: Nunikmá igkugkag nuna imá shiig anenmainai, noventa y nueve batsata nuna nagkagas. <sup>14</sup>Nunisag iina Apají nayaimpinum puja dushakam, wakejutpatsui jujú piipich aina juwiya makichkish megkaekatnume tusag.

**Apajuí nemajin aidautish wajuk  
tsagkugdaimainaita**

(Lc. 17.3)

<sup>15</sup>“Amina yatsum pegkegchaun takagtamkuish, imá nigki akankim ausata, dutikakum ni pegkegchau takasbauji pachittsam ujaktá. Ame tama antugtamkuig, duka pegkegchau takaamuji idaitanum ame yatsum yaigkume. <sup>16</sup>Untsu amina antugtamchakuig, makichik aentskesh dutikachkumesh jimagkesh ipaam ditajai ausatajum, ni pegkegchau takasbauji pachittsajum. <sup>17</sup>Ditanash antugchakuig, ashí aents Jisusa nemajin aidau ujaktá. Nunashkam antugchakuig, aents Apajuí anentaimtuchu aina nujai idaisatajum. <sup>18</sup>Dekas tajime: Atum ju nugka juwi aaja yayashmak nayaimpinmashkam tsagkugnagchatnai. Untsu atum ju nugka juwi tsagkujamuk, nayaimpinmashkam aantsag tsagkugnagtinai. <sup>19</sup>Junashkam tajime: Atum jimagtigmekesh atuekajum atum anentaimtamujum Apajuí segamak, mina Apag nayaimpinum puja

dushakam amastatjume. <sup>20</sup>Jimagchikish nuniachkush kumpatumchikish mina pachitus ijunainakuig, wishakam nuwig ditajajig ijutkau pujuttajai.”

**Tikichjai tsagkugdayat**

<sup>21</sup>Nuna tutai Pedro Jisusan jegantun iniak:

—Apuh, amina nemagtamin mina yatsug mina ubag aina nu pegkegchau takagtakuish, ¿wajupá tsagkugmainaitja? ¿Sieteya imania tsagkugmainkaitag?

<sup>22</sup>Tama Jisus chichaak:

—Duke tsagkujata tusanuk tatsujame, tuke tsagkugsamké ata tajame, —tiuwai.

<sup>23</sup>“Apajuí aentsnum inama duka, apu niina inake diwibau asa akigkata tusa segauwa nujai betekmamtainai. <sup>24</sup>Dutika nagkamak, aents diez mil kuichkin diwimkagtaun juki awayawajui. <sup>25</sup>Tuja nunú akikmamainji atsuju asamtai apu chichaak: ‘Dekas juka, niina nuwe, uchijí nuigtú ashí wajiji aina nujai sujuktajum, dutikam nuní diwik uminkati’, tiuwai. <sup>26</sup>Tusa tama aents diwimkagtaushkam, apun tikishmatug: ‘Wait aneam machik dakagsata, wi amina diwimjam nunak ashí imatiksianuk akiktatjame’, tusa segauwai.

<sup>27</sup>Tama apushkam wait anentug, diwibaunak akigkata tutsuk agkan idaisauwai. <sup>28</sup>Dutikam nunú inak jiinki wekamá, niina aents cien kuichkin diwimun igkugku, nunik suwenum achik emetua awajus: ‘Waamak ame mina diwimjam nunú akigkata’, tusa segau.

<sup>29</sup>Imatikam diwimkagtaushkam tikishmatug pujus: ‘Wait aneam machik dakagsata, wi ashí amina diwimjam nunak imatiksianuk akiktatjame’, tusa segauwai.

<sup>30</sup>Imatjamaitak wait anentsuk achiká juki, aents achiká egketainum egkea ukukiuwai, juwi pujus diwijin akikmakti tusa.

<sup>31</sup>Dutikamun tikich apú inake aidaushkam

wainkag wake besemag diisaju, nunikag apujin jegajag ashí dita wainkamunak imatiksag ujakajui. <sup>32</sup>Dutikam apushkam aentsun ishitkam juki itantagmatai chichajak: ‘Inak pegkegchawuwa, wika ame segatkuminig wait anenjan ashí ame mina diwimjamugminak akigkaipa tusan idaitusmajame. <sup>33</sup>Wi dutika idaitusbau asam, ameshkam dutiksamek amina diwimjamush wait anenjam idaitumain wajakume.’ <sup>34</sup>Tusa apu kajeká achijatin aidaun: ‘Jusha achikjum jukijum egkea ukutajum, niishkam awi pujus ashí mina diwimja nunak akikmakti’, tusa inamjauwai.’ <sup>35</sup>Jisus nuna pachis chichá chichakua inagnak:

—Mina Apag nayaimpinum puja dushakam nunisag atum yatsum tsagkugchataik dutijamawagtinai, —tiuwai.

#### Jisus nuwak idaimaitsui tibau

(Mr. 10.1-12; Lc. 16.18)

**19** <sup>1</sup>Jisus jintinkagtamujin ashimak Galilea pujamunak ukuak, Judea nugkanum jegaa Jordagka amain katigkú. <sup>2</sup>Nunikmatai kuashat aents aidau pataetukaju, dutikam jau aidaunashkam nui kuashat etsagakui.

<sup>3</sup>Nunia fariseo aidaushkam Jisusan pegkegchaunum dekapsatasag jegaantag iniinak:

—¿Nuwennush wainkash nuwennash idaimainkaih? —tuidau.

<sup>4</sup>Tama ni ayaak:

—¿Atumek ausachukaitjum Apajuí yama nagkamchakug aishmagkun nuwajai najanauwai, <sup>5</sup>dutika chichajak: ‘Aishmag nuwenkug apajin, dukujin ukuak niina nuwejaig pujumainai, nunia asa nuwejai makichik iyash wegawai’ tiuwa duka? <sup>6</sup>Nunin asag nuwenawajuk jimaja nuninchauwai, makichik iyashia nunin wegawai. Aatus Apajuí tibau asantai, aents nuwenawaju aina nunak, makichik

aentskesh idaimitkamainchau ainawai, —tiuwai.

<sup>7</sup>Tutai dita iniinak:

—¿Wagka tujash Moisesash papí idaidaiku najantain umiká nuwanak idaimainai tiuwaita?

<sup>8</sup>Tiagtai Jisus ayaak:

—Nunak atum chicham umitnumash katsujam asagmin, Moisesak nuwemik idaimainaitjume tujabiuwai, tujash nagkamting Apajuik nunak tichauwai. <sup>9</sup>Wi dekass tajime: Aishmag nuwe ekagmachunak idayas, tikich nuwajai nuwenkug ekagmawai, nunisag nuwa idaisamujai nuwennushkam ekagmawai, —tiuwai.

<sup>10</sup>Nuna Jisus aatus timatai ni jintintaiji aidau:

—Dekas nu aatsayaitkuig, nuwentash nuwenmaitsujama, —tuidau.

<sup>11</sup>Tusa tiagtai ni ayaak:

—Junak ashí aentsuk betekak nunin amain ainatsui, Apajuí nunikti tibau nunimain ainawai. <sup>12</sup>Aents nuwenmainchau akiinaush ainawai. Tikitchakam tikich aents kagamtikamu asag nuwenmainchaush ainawai. Untsu tikich aents: ‘Wika Apajuí takatjin takagkun nuwentsuk wekaesatjai’, tauk nuwenmaitsui. Dita nuna antumainuk antuktinme, —tiuwai.

#### Jisus uchi ikautkamu

(Mr. 10.13-16; Lc. 18.15-17)

<sup>13</sup>Jisus juna tusa ashimkamtai uchi aidaun ikautkajui achiká Apajuin ajtusti tusag. Imatikiagtai ni jintintaiji aidau nuna jiyaidau. <sup>14</sup>Tiagtai Jisus chichaak:

—iTutsuk idaisatajum, uchi aidauk minai kauntatnume, utugkajum awagkigpajum! Jujú uchi anentaimaina jumamtin aidaunum Apajuik inamjata tawai.

<sup>15</sup>Nuna tusa ti, shiig anentus uchin maki makichik achik ukukmatai tikichnum wegajui.

**Datsauch wiyakuch****Jisusan iniasbau***(Mr. 10.17-27; Lc. 18.18-27)*

<sup>16</sup>Makichik aents Jisusan tajuntun chichajak:

—Jintinkagtin pegkejah, ¿wají pegkegna takamainaitja pujut nagkanchaun jukitananush?

<sup>17</sup>Tutai Jisus ayaak:

—¿Wagka Pegkejá tujutme?

Makichkish pegkejak atsawai, pegkeja duka makichkiuchi, imá Apajuiya duke. Ame tuke pujutnum wayatasam wakegakmek, Apajuí chichame umiktina nu imatiksamek umiktá.

<sup>18</sup>Tama ni iniak:

—¿Tu ainawa dusha?

Tutai Jisus ayaak:

—Magkagtuawaipa, tsanijinawaipa, kasamkaipa, wainkamek tsanumkagtuajaipa, <sup>19</sup>amina apa dukujaime anentsam diiyaakum yaigtá, tuja amijai ijutkamushkam amek anenmamsam aneeta, —tiu.

<sup>20</sup>Tama datsauch chichaak:

—Wika nunak datsauch asanuk ashí umikuitjai. ¿Wajina nuigtush umimainaitja? —tau.

<sup>21</sup>Tutai Jisus ayaak:

—Ame pegkeg atasam wakegakmek, weme ashí amina ajutjamaina duka sujukam, ujunauch aina nu susata. Nu dutikawamin nayaimpinum wajigmik ajutjamtinai. Nu dutika ukuakum mina nemagtukta, —tiuwai.

<sup>22</sup>Nu aaja tama wake beseká weuwai, shiig wiyakuch asa.

<sup>23</sup>Nunikmatai Jisus ni jintintaiji aidaun chichajak:

—Dekas tajime: Wiyakuch aidauk kakajus Apajuí minash inatjati tusag idaimamainchau ainawai.

<sup>24</sup>Awentsanuk tajime: Camellok aujá jijnish waigkag nagkaemamainai, tujash

wiyakuch aidauk Apajuí minai inamjati tusag kakajus idaimamainchau ainawai.

<sup>25</sup>Nu tabaun ni jintintaiji aidau antukag senchi puyatkaju nunikag:

—¿Yaki tujash uwemjaush amainaita? —tudayinau.

<sup>26</sup>Tiagtai Jisus ditan diis chichajak:

—Aents diismak juka utugchatai, tujash Apajuik ashí dutikmainai, —tiuwai.

**Mina nemagtuidauk ditanu  
ukukbaujin nagkaesau  
jukiagtinai tibau**

*(Mr. 10.28-31; Lc. 18.28-30)*

<sup>27</sup>Tutai Pedro ayaak:

—Jutii ashí iina ajutjamaidauk ukuinaku ame nemagkamiajim nuutish, ¿wajig ajutjamtinaita?

<sup>28</sup>Tutai Jisus ayaak:

—Dekas tajime: Ashí najankamu ataktú yamagmitkamu jegatna nunú tsawantin, wi Apajuí Uchijiyaitkun Aentsmaga Akinauwaitag nuna mina senchigjai inamkun ekeemsamtaí, atum mina nemagtuku aidautigmeshkam doce ekeemtai awa nui ekeemsajum, Israelan uchijí aidau doce aajakaju aina nunú wegantu inagtin ainagme. <sup>29</sup>Ashí aents mina nemagtuinak jee aidaun, yachi aidaun, umayí aidaun, apajin, dukujin, nuwen, uchijí aidaun, nugke aidaun ukukiaju aidauk, dita ukukbaujin nagkaesau cieгка imaania jukiagtin ainawai, nuigtushkam pujut tuke atina nui pujusagtin ainawai. <sup>30</sup>Tujash kuashat aents dekatkai atatus wakegaina nu ukunum juwakagtinai. Untsu iman atan anentaimtumachu aina nu dekatkai agtinai.

**Aents ajanum takastajum tusa  
ishiakbau pachisa jintinkagtuamu**

**20** <sup>1</sup>“Apajuí inama duka, aents uva ajagtin asa, kashikmas aents takastin aidaun egaak jinkiuwa nujai betekmamtinai. <sup>2</sup>Nunik ni ajajin

takamain aidaun igkug: ‘Makichik tsawan takagtustajum akiktajime’, tusa ajají uva ajakbaunum awemauwai. <sup>3</sup>Nuna ishiak etsa dukap takuni ai, yaakat wekaekamá tikich aents aidaushkam takatsuk wainak batsatun wainkau, <sup>4</sup>nunik: ‘Atumesh wetajum mina ajajuí uva ajakbauwa nui takaakjum, nuniakjumin betek atum takattajum dutiksanuk akiktajime’, tama ditashkam wegajui. <sup>5</sup>Dutika ishiak, ataktú jinkiuwai etsa tajiaja ai, nunik takamainun yajuak ishiakui. Ataktushkam dukap etsa tegau ai nunisag we, tikich aents takamainun yajuak nunashkam ishiakui. <sup>6</sup>Dutika ataktú etsa shiig akagai yaaktanum weuwai, nunikmá aents wainak takatsuk batsamatman wainak: ‘¿Wagka atumesh takatskesh etsash akapagme?’ tusa iniau. <sup>7</sup>Tusa iniinam: ‘Inak makichik aentskesh, nu takagtusta tusagkesh egapainatsui.’ Tiagtai: ‘Atumshakam dekas mina ajajuí takastajum, nuniakjumin atum takastatjum dutiksanuk akiktajime’, tusa ishiaku. <sup>8</sup>Nunik kiyagmatai, ni inake takatá diinun chichajak: ‘Weme ashí takau aidau untukam ijumjam, takat nagkantanak wajai wayau aidaunum nagkamsam, akia akiakuam yama nagkamchak wayaunum inagnakta’, tiuwai. <sup>9</sup>Tusa tima takau aidaun untuká kaunkamtai, inagnak wayau aidaun makichik tsawan takasbauwa dutiksag akikaju. <sup>10</sup>Dutikamtai yama nagkamchak wayau aidauk, jutiik aan dukapeap jukittaji tusag anentaimaidau, tujash ditanashkam makichik tsawan takasbaunak dutiksag akikajui. <sup>11</sup>Dutikawajam, kashikmas nagkamas takasú aidauk ajagtinun senchi

kajegkajui. <sup>12</sup>Nunikag: ‘Jujú inagnamunum kaunawag makichik hora<sup>p</sup> takasagma nuninush, ¿wagka jutii dekas kashikmasa nagkamsa tuke takai takainakua etsa akapag jujai betekash akikume?’ tuidau. <sup>13</sup>Imatjuinam ajagtin ayaak: ‘Kumpag aidauh, wika tunatukesh akiatsjime. ¿Wi yama nagkamchakun makichik tsawan takagtustajum dutikawagmin akiktajime, tama ayú tichamkujum?’ <sup>14</sup>Juuwai atum takasbaugmin jumainaitjum duka. Pai, ju jukijum wetajum. Juna atumin amaag jutiksanuk inagnamunum takasaju aidaunashkam susatasan wakegajai. <sup>15</sup>¿Wi mina kuichkig asamtai, wi wakegamun akikmamainchaukaitag? Wi pegkeg asan wait anenkagtakun ashí betekak akikmakui, kajeakjum tu yujagme’, tiuwai.

<sup>16</sup>“Anmamtuk aents dekatkau atatus wakegaina nu ukunum juwakagtinai; untu iman atan anentaimtumachu aina nu dekatkau agtinai. Kuashat aents untukbau ainawai, tujash wajumchikeuchi etejamu aidauk.”

**Kompatuma juna Jisus ni mantamnatnujin etseggamu**  
(*Mr. 10.32-34; Lc. 18.31-34*)

<sup>17</sup>Jisus niina jintintaiji doce aina nuna Jerusalén wegamunum jintaa ditanak chichajak:

<sup>18</sup>—Yamai Jerusalén jegattag duwi, wi Apajuí Uchijiyaitkun Aentsmaga Akiinawaitag nunak achigkag sacerdote apuji, nuigtú chicham umiktinun jintinkagtin aidaunum ejetiagtatui maatnume tusag.

<sup>19</sup>Dutijuawagmatai dita jujukiag judiuchu aidaunum sujutkagtatui,

pegkegchaun chichajuinak, dushí dushikinakua, asuttan asut awa awajtuinakua, achijag maatnume tusag, tujash dutijuawagmataish kampakatum tsawanta juwi ataktú nantaktatjai, —tiu.

**Zebedeo nuwe uchijinun pachis**

**Jisusan segamú**

(*Mr. 10.35-45*)

<sup>20</sup>Jisus nuna tusa wetatman Zebedeo nuwe, uchijí aidaujai jegantun tikishmatjau segatatus. <sup>21</sup>Dutikam Jisus ayaak:

—¿Wají atsumame? —tau.

Tama:

—Ame Apu wajasam inamjatnaitam duwi mina uchig jimaja ju, makichik amina untsugmia nuní eketjakum, tikichia au menagmia nuní eketjustin atá tajame, —tau.

<sup>22</sup>Tutai Jisus ayaak:

—Amek mina segatam duka dekatsme.

Tusa nuwan idayak, nuna uchijin pempentusag:

—¿Atumesh mina waitkajus mantuawagtata dusha imanijumkek waitmainaitjum? —tuinam dita chichainak:

—Ehé, iishkam duka waitmainaitji, —tuidau.

<sup>23</sup>Tiagtai Jisus ditan chichajak:

—Dekas tajime: Wi waittsan jakattag imanijumkek waittsatin ainagme; tujash mina untsujuí, tikich mina menajú ekeemsatin atajum tusanuk tumaitsujime. Nunak mina Apag ya aidau ekeemsatnujinak umigkauwaita nuna ekentsagtinai, —tiuwai.

<sup>24</sup>Nunú tabaun diez aina nu antukag, jimaja nuna yachijaí senchi kajegkajui.

<sup>25</sup>Nuniagtai Jisus ditan untsuká:

—Atumek shiig dekgagme, tikich nugka aina nuna apuji aidau judiuchu

aina duka, aentsnak ditanua nunin emak inainawai. Untsu nunú apu aina nuna aentsji aidau, aents aina nuna dita wakegamun inau ainawai. <sup>26</sup>Tujash atumek aajagmek dutikdaimain ainatsjume. Nunitsuk atum ainajum anuiyatijum eme anentai atasajum wakegautigmek, tikich aina nu takajin amainaitjume. <sup>27</sup>Atum ainajum anuiya eme anentai atatus wakegawk, ashí tikich aidau takajin amainai. <sup>28</sup>Wi dekas Apajuí Uchijiyaitkun Aentsmagan Akiinawaitag nunak, atum aidautijum mina takagtustinme tusanuk taachuitjai. Wi dekas atumin takagkun mantamnan kuashat aents aidau pujutin uwemtijata tusan taamjai.

**Jisus jimag aents**

**wainmachu etsagagbau**

(*Mr. 10.46-52; Lc. 18.35-43*)

<sup>29</sup>Jericonmaya jiinki wegagtai, aents aidau shiig kuashat Jisusan saetukajui. <sup>30</sup>Nuniamunum jimag aents wainmachu jintá yantamchijin eketu, Jisus nagkaemawai tuinamun antukag senchi untsumkag:

—iApu David wegantu uchijiyah, jutiish wait anenkagtugta! —wajaidau.

<sup>31</sup>Imatiagtai nui aents ijunaidau jiyaidau, itatkatnume tusag. Tujash ditak nuní senchi untsumkag:

—iApu David wegantu uchijiyah, jutiish wait anenkagtugta! —wajaidau.

<sup>32</sup>Imatjam Jisus nui wajan untsuk ikaunman iniak:

—¿Utugtukti tusagmea wakegagme? —tau.

<sup>33</sup>Tusá iniam dita aiinak:

—Apuh, iik wainmaktasa wakegaji, —tuidau.

<sup>34</sup>Tiagtai Jisuschakam wait anentug ditá jiin antinkaju, dutikamuik wainmakag, ditashkam Jisusan nemagkaju.



**Jisus Jerusalén apu wajasá wayamu**

(Mr. 11.1-11; Lc. 19.28-40;

Jn. 12.12-19)

**21** <sup>1</sup>Jisus ni jintintaiji aidaujai yaakat Betfagé tutainum jegawaju Olivosan mujají najatamunum, Jerusalén tikiju awa nui, nunik ni jintintaijin jimajan awemauwai, <sup>2</sup>dutikak:

—Wetajum au yaakat jegattak aents batsata awi, awi jegakmajum wainkattagme makichik burra<sup>q</sup> jigkam uchijijai wajau. Nunú atia jukim itagtuatajum. <sup>3</sup>Nu juwagmin, makichik aentskesh: ¿Wagka aikagme? tujamkujaish: ‘Apu atsubau asamtai juwajai, ajum awagtugmaktatui’, tusa ukuktajum, —tiu.

<sup>4</sup>Jujú junikua duka Apajú etsegtin agak:

<sup>5</sup>“Yaakat Siognum batsamin aidauwah,  
‘diistajum atumin apujum imanchauch wajasá burro tsakatnum entsamas minitjamui’, ” timawa nunú uminkauwai.

<sup>6</sup>Tijam ni jintintaiji aidaushkam wegag Jisus tibaunak imatiksag umikaju.

<sup>7</sup>Dutikawag burran uchijijai jukiag itaantaju, dutikawag awantak nugkuagbaujin jukiag mai tuntupen aitkagmatai Jisus ekeebiu. <sup>8</sup>Nunikmatai kuashat aents asag, Jisus wegamunmanini dita awantak nugkuagbaujin aitug emaidau, tikich aents aidau dukan tsupig jintanmag aitug emaidauush aidau.

<sup>9</sup>Imatikainak aents eemak weedau, ukunum minidaushkam senchi unsumkag:

—iApu David wegantunum akiinau, Apajú awemam mina jujú

emematiagmi, jujuwai iina agkanmitkagmatnuk!  
iNayaimpinmayanash nigki agkanmitkattawai! —wajaidau.

<sup>10</sup>Jisus Jerusalegnum wayamtai ashí aents aidauk pampaidau, nuninak:  
—¿Jusha ya aentsuita? —tuidau.

<sup>11</sup>Tiagtai:  
—Juka Jisusai, Apajú etsegtin Galileanmaya, Nazaret pujuwe nuuwai, —tuidau.

**Jega Apajú ememattainum aents batsatun Jisus jiiḡbau**

(Mr. 11.15-19; Lc. 19.45-48;

Jn. 2.13-22)

<sup>12</sup>Jisus jega Apajú ememattainum wayaa, nui sujak batsatun sumau aidaujai ashí agaa jiijú, dutikak aents kuichki yapajiin aidau mesajinashkam shitaki akaketuk, paumá sujín aidau ekeemtaiji aidaunash dutiksag akaketkau, <sup>13</sup>dukika chichaak:

—Apajú chichame agagbauwa nui: ‘Mina jegajuk Apajú aujku ijuntaiyai tama atinai’ tawa nuniaig atum kasá batsamtai emaugme, —tiu.

<sup>14</sup>Nuna tusa ishiak wajai wainmachu, shutú aidaujai jega Apajú ememattainum utsanawagmatai Jisuschakam etsagakui. <sup>15</sup>Tujash sacerdote apuji aidau, chicham umiktinun jintinkagtín aidaujai Jisus etsaegkagtamun wainkag, nuigtú uchi aidau jega Apajú ememattainum batsamas unsumainak: “iApu David wegantunum akiinauwa nunú uwemtikagtugtatus yamai mina jujú emematiagmi!”, awajuinamun antukag kajekag, <sup>16</sup>Jisusan chichajuinak:  
—¿Antamek jujú imataina dusha? Tama Jisus ayaak:

**q 21.2** “Burra” tawa nunak versión Dios Habla Hoy (DHH) tawai, nuwiya jukimui antumain atí tusa. Tuja tikich versión Reina-Valeranmag (RV) nunak tayatak “asna” tawai.

—Ehé, antajai. ¿Atumek ausachukaitjum: ‘Uchi tsakat aidau, muntsuaku aidaujai emematjutpainak kantamjutupawagtatui’ tawa duka?

<sup>17</sup>Nuna tusa ukuak yaakat Betanianum we nui kanajui.

**Numi higuera tutai nejenchau**  
**Jisus yumigja maamu**  
(*Mr. 11.12-14; 20-26*)

<sup>18</sup>Nunik tsawaag kashikmas yaaktanum waketak Jisus yapajau.

<sup>19</sup>Nunikmá higuera jintá yantamchijin wajattaman wainak jegantau, tujash nejeg atsau ayatak dukak wajas atai, chichajak:

—iAmek ajumaish tuke nejekchatnaitme! —tamawaik kukajá wajasú. <sup>20</sup>Nunikmatai niina jintintaiji aidauk puyatkg Jisusan iniinak:

—¿Wajukaya higueraash tabauwaikish kukajé? —tuidau.

<sup>21</sup>Tiagtai Jisus ayaak:

—Dekas tajime: Atum Apajuiyai kajintsá anentaimsajum utujimtach utujimtsuk nuniktatuapi takugmek, imá ju higueraaya juke jutikmaitsugme, ju muja awa jushakam: iJuwi atsuk nayantsanum wajaata! tamak nunimainai. <sup>22</sup>Tuja atum Apajú aukujum dekas sujustatuapita tusa segakjumek jukittagme, —tiuwai.

**Sacerdote apuji aidau**  
**Jisusan iniasagbau**  
(*Mr. 11.27-33; Lc. 20.1-8*)

<sup>23</sup>Nuna tusa ukuak Jisus jega Apajú ememattainum wayaa jintinkagtak wajai, sacerdote apuji tikich apu aidaujai tajuntag iniinak:

—¿Aminash ya jintinkagtuata tusash awetamae? ¿Yana chichamenia jusha juniame? —tuidau.

<sup>24</sup>Tama Jisus ayaak:

—Wishakam iniaatajime, atum nu aigkagminig ujaktajime yana

chichamenia jutikaja nuna. <sup>25</sup>¿Ya awemauwaita Juagnash yamijatjati tusash, Apajuik awemauwait atsa aents aidauk awemauwait? —tau.

Tama ditak pempeentunikiag chichainak: “Juagnak Apajú awemauwai tajinish, ‘¿Tujash wagka dekaskeapi tichau ainagme tujamtata jama?’ <sup>26</sup>Tuja aents aidau awemauwai tita takuishkam, aents aina nu ishamaji, Juagkak Apajú etsegtinai tuidau asagmatai.” <sup>27</sup>Nuna tusag utujimag Jisusan chichajuinak:

—Dekatsji, —tuidau.

Tiagtai ni ayaak:

—Wisha tichattajime yana chichamenia jutikaja nunak, —tiu.

**Aents jimag uchigtin pachisa tibau**

<sup>28</sup>Jisus ditan iniak:

—¿Jusha atumesh wajuk anentaimtagme? Aents uchijí jimag ajujakuí, nunin makichich uchijiya nuna chichajak: ‘Uchuchih, uva ajakbauwa nui weme takastá’, tiuwai. <sup>29</sup>Tama nu uchi chichaak: ‘Wika apawah wemaitsujai’ tiu ayatak awake anentaimag weuwai. <sup>30</sup>Tuja tikich uchijiya nunashkam dutiksag tiuwai. Tama nu ayaak: ‘Ayú apawah, wetajai’, tusa tiu ayatak wechauwai. <sup>31</sup>Ju jimag uchi pachisa taji nuanuish, ¿tuuwa apají wakegamunash umigkauwaita? Tuinam dita aimainak:

—Dekatkauwa nuuwai, —tiaju.

Tiagtai Jisus ditan chichajak:

—Dekas tajime: Aents apú kuichkiji atinun yajumin aidau, nuigtá nuwa akiká takatai aina dushakam pujutjin yapajiwag, Apajú inatjati tusag atumin nagkaetamsau imaninawai. <sup>32</sup>Atumek Juan dekaskea nuna jintinjamainaigkish dekaskeapi tichaugme; tujash apú kuichkiji atinun yajumin aidau, nuwa akiká takatai aina

dushakam dekaskeapi tusag tudaujinak idaisaje. Atumek nunidau wainiatkugmesh, pujutjum yapajajum dekaskeapi tichaugme.

**Takau pegkegchau aidaun pachis  
Jisus augmattsamu**

(Mr. 12.1-12; Lc. 20.9-18)

<sup>33</sup>“Antuktajum ju augmatbaushkam: Aents ajajin uva ajakuí, dutika tanishig, uva yumiji ijugtinnash umik, wajasá diistinnash torre tutain yakí jiikuí. Dutika wajumak aentsun: ‘Atum ju takastajum, dutikakjum minash sujustajum’, tusa susa ukuak, nigka tikich nugkanum atushat weuwai. <sup>34</sup>Dutikau asa uva tsamat uminkau asamtai niina inake aidaun ishiakui, aents nui takaak batsata nui jegawagmatai, uva neje susam jukiag itagtuatnume tusa. <sup>35</sup>Dutikam inak jegawagmatai ajanum takaina nunú, achikag makichik ayatak suwimawajui, tikichnak maawajui, tikichnashkam aikasag kayai tukuí tukuinakua maawajui. <sup>36</sup>Dutikawagmatai ataktushkam nuní kuashat ni inake aidaun ishitkauwai. Dutikamtai nunashkam dutiksajag maawajui.

<sup>37</sup>“Dutikawagmatai inagnamun niina uchuchijin: ‘Mina uchignak ajantusampap diimain ainawa’, tusa awemauwai. <sup>38</sup>Tujash ajanum takaina nu uchi minittaman wainkag ditak pempeentunikiag: ‘Auwai ju aja juna jukitnuk, dekas maa ajapami, dutikaku juka iinu emami’, tuidau. <sup>39</sup>Tusag achiká jukiag ajá ukumtikiag maawajui.

<sup>40</sup>“Atumesh wajuk aentaimejume, dekas ajagtina nunú minakush, ¿itugmainaita ajanum takaina nunash?”

<sup>41</sup>Tutai dita aiinak:

—Aents pegkegchau aina nunak wait anentsuk kajeg utsauminai, dutika tikich takau aidaun idaitumainai ajak

uminkamtai juwiinakush, midau amaina nunak dutiksag sujin atinme tusa.

<sup>42</sup>Tiagtai Jisus ditan iniak:

—¿Atumek ausachukaitjum Apajuí chichame agagbauwa nui:

‘Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé.

Nunak Apajuí dutikau asamtai jutii aentaig etetumaitsul’ tawa duka?

<sup>43</sup>“Nuaduí tajime: Apajuí atumin inapa nunak idayak tikich aentsun inagtinai, midau atin aidaunak dutiksag itagtuatnume tau asa. <sup>44</sup>Aents nu kaya nui iyauk tsainkatnai, untsu kaya aentsnum iyaakug aentsnak tuke yuku ematnai.”

<sup>45</sup>Nuna tusa augmattai antukag sacerdote apuji aidau, fariseo aidaujui: “Nunak jutiiin tujamji”, tuidau.

<sup>46</sup>Nuniau asag achikta tuidau; tujash aents aidaun ishamaidau: Jisusag Apajuí etsegtinai, tuidau asagmatai.

**Aents nuweenak jistamatnuijn  
pachis Jisus augmattsamu**

(Lc. 14.15-24)

**22** <sup>1</sup>Jisus ataktú tikich augmatbaun pachis augmatak tau: <sup>2</sup>“Apajuí jutii inapa duka apu ni uchijí nuwentai jistamjak yutain umikua nujai betekmamtainai. <sup>3</sup>Ishiakui ni inake aidaun aents ipaamu aidaun untsuktajum tusa, tujash ipak aidau nuwenbaunum minitnak dakitjajui. <sup>4</sup>Nu nunikagmatai ataktú tikich inake aidaun awemak: ‘Ujaktajum ipak aidaun dita yumainnak ashí umikjai, mina bakag aidaun, kuntin uduekbau aidaunashkam maatajum tijai. Ashí uminkae, ipak aidaushkam nuwenbaunum kaunkatnume, tusajum titajum.’ <sup>5</sup>Timatai timae tusa ujainamash ipaamu aidauk antugsuk

ukuinak, makichik ajajin wegai, tikich wajijin sujag wegajui, <sup>6</sup>nuniaí tikich aidauk, apú inake aidaun achikag suwi suwimainakua maawajui. <sup>7</sup>Dutikamun apu antuk kajeká suntaji aidaun ishitkauwai, dutikam wejiag aents magkagtuau aina nunak kajeká, ashí yaaktajinash apejuk ukugkajui. <sup>8</sup>Nuna dutikawagmatai tikich inake aidaun: ‘Nuwenbaunum yuwatnuk ashí uminkae, tujash wi duwik ipaamu aidauk taachagtatui. <sup>9</sup>Nunin asamtai, yaaktanun jinta dekas nagkaematai aina nui wejum, ashí aents atum wainbauk ipaatajum, nuwenbaunum kaunatnume’, tiuwai. <sup>10</sup>Tiajam inak aidaushkam shiyakag, ashí aents dita wainbaunak ipawajui, aents pegkeg, pegkegchau aidaujui. Imatikamu asa jeganmag shiig piyakajui.

<sup>11</sup>“Imanikmatai apushkam wayau, ipak aidaun diistatus. Nunikmá wainkau makichik aents nuwenbaunum wegaku nugkutainak nugkutsuk wayaa eketun, <sup>12</sup>nunik: ‘Kumpajuh, ¿wajuk amesh juwish wayaume jaanch nuwenbaunum nugkutai nugkutsukesh?’ Tama duka aentsuk aimtsuk eketu. <sup>13</sup>Nunittaman apu ni inake yujumkan mesanum pekaidaun chichajak: ‘Juka dawenum, ashí uwejjiai jigkagjum jukijum agaa suwea awi ajuitajum, nui pujus senchi waitiak, buutak daik takegtú pujutí’, tiuwai. <sup>14</sup>Kuashat aents untsukbau ainawai, tujash ujumchikiuchi etejamu aidauk.”

**Roma apujiya nuna kuichkiji  
pachisa Jisus iniasbau**  
(Mr. 12.13-17; Lc. 20.20-26)

<sup>15</sup>Nuna Jisus timatai fariseo aidaushkam jijnag ijunjaju, makichik aents Jisusan iniasti, tamash wajintig timatai tsanumjugmi tusag chichainak. <sup>16</sup>Nunikag nui chichaman umikag ditá

aentsji aidaun, Herodesan aentsji aidaujui ishiakajui. Dutikawajam ditashkam Jisusan jegajag:

—Jintinkagtinuh, jutiik dekainaji ame dekaskea duke chichau asam, Apajuí jinti dekaskea duke jintinkagtam duka. Amek aentsú niimé diigsam shiig awajkatasamkesh chichatsme. <sup>17</sup>Nuniaú asaamin tajame, ¿amesh wajuk anentaime, Roma apujiya nuna kuichkiji atinush sumainashit, atsa sumaitsuak? —tuidau.

<sup>18</sup>Tiagtai Jisusak dita pegkegchau anentaibaujinak shiig dekaju asa: —¿Tsanujatin aidauwah, wagka tsanujá dekapjustasagmesh wakejutagme? <sup>19</sup>Iwaintugkakjua kuichik wajukuwa apush suwagme, —tama makichik kuichkin ejentuntaju.

<sup>20</sup>Dutikam nuna wainak: —¿Yana niimé dakumkaya daajish agagbauwaita? —tusa iniidau.

<sup>21</sup>Tama dita ainak: —Anka Roma apuji dakumkamui. Tiagtai:

—Roma apujinua duka nigki susatajum, Apajuinua dushakam Apajuik susatajum, —tiuwai.

<sup>22</sup>Aaja tiajam anentai jegagchaju, nunikag waketuinak ukukijaju.

**Jakau nantagtin pachisa iniimsamu**  
(Mr. 12.18-27; Lc. 20.27-40)

<sup>23</sup>Nunú tsawantaik saduceo aidaushkam Jisusan wejiaju, ditak aents jakau aina duka nantagchatnai tinu asag Jisusan iniinak:

<sup>24</sup>—Jintinkagtinuh, Moisés chichaak: ‘Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai’, tiuwai. <sup>25</sup>Tuja nuniamunum, iina patayí siete yachigbau aayi. Nuanuiya nagkamchak iwai nuwenauwai, nunik dukap

pujutsuk uchinash akiitsuk jaak nuwanak yachin ukugkiuwai.

<sup>26</sup>Nunikmatai tikich yachi jukishkam uchinak akiitsuk jakauwai, tuja kampatuma nu jukish nunisag jakauwai, nuni nuninakua siete aajakajua duka ashí jinawajui. <sup>27</sup>Nu ashí jinawagmatai pujus nuwashkam jakauwai. <sup>28</sup>Siete aajakajua duka ashí nunak nuwatjaju aina duwish éyana nuweg atinaita atak jakau nantainamunmash? —tuidau.

<sup>29</sup>Tama Jísus ayaak:

—Atumek Apajuí chichamen tawa dusha dekachu, niina senchijiyá dushakam wainkachu ainajum nuaduí dewakugme. <sup>30</sup>Atak nantajagtin aina duwik makichkish nuwenachagtinai. Apajuí aentsji nayaimpinmaya aina nuninuk agtinai. <sup>31</sup>Tujash jakau nantajagtinun pachis Apajuí tibau ni chichamen agagbaunum:

<sup>32</sup>“¿Witjai Abraham, Isaac, Jacob aina nuna Apajuijinuk’ tawa duka ausachukaitjum? ¡Apajuik jakau aidau Apajuijinchui, iwaaku aina nuna Apajuijiyai!”

<sup>33</sup>Nuna aatus Jísus jintinkagtua ashimkamtai, aents aidauk anentai jegagchaju.

#### **Chicham dekas puyatjusa umiktin**

(Mr. 12.28-34)

<sup>34</sup>Jísus saduceo aidau itatmitkakbaun antukag, fariseo aidauhkam ijunjaju. <sup>35</sup>Nunikbaunum nuwiya makichik, chicham umiktajum tibauwa nuna jintinkagtin, wi Jísusan iníastajai wajintig, tusa jegantun:

<sup>36</sup>—Jintinkagtinuh échicham umiktin aina nuwiya dekas puyatjusa umimainush tuwaita? —tau.

<sup>37</sup>Tama Jísus ayaak:

—‘Amina Apujum Apajuiya nu imá senchi aneeta, nuniakum Apajuinu pegkeg aina duke dekaata, imá niinig

anentaimsam pujustá’ tawai. <sup>38</sup>Juuwai deatkau umimainuk, juuwai chicham umiktina nuwiyan nagkaesauk. <sup>39</sup>Untsu tikich jujai betekmantina duka: ‘Amijai ijutkau aidauhkam amek anenmamsam aneeta’, tawai. <sup>40</sup>Ju jimag chicham umiktajum timawa juuwai Moisés nuigtú Apajuí etsegтин aidau jintinkagtujakú aina duka, —tiuwai.

#### **Kristush yaá wegantukita tibau**

(Mr. 12.35-37; Lc. 20.41-44)

<sup>41</sup>Fariseo aidau ijunjamutak batsataig Jísus iniasu:

<sup>42</sup>—¿Atumesh wajuk anentaimjume, Kristush ya wegantuíta?

Tuinam dita ainak:

—Kristuk David wegantui, —tuidau.

<sup>43</sup>Tiagtai:

—Nuniaish éwajuk asamtaiya Davitash Wakaní Pegkeji chichamtikmash Kristunash Apú tawa?

<sup>44</sup>Tau asa:

‘Apu mina Apujun chichajak:

Ekeemsata mina untsujuí, nunikamin wi amina shiwajum aidauk aminí ikaunmakmatai duwi ame diisminum’, —tiuwai.

<sup>45</sup>—David, Kristun Apug tujakua nuniaish, éwajuk asaya David wegantush amainaita? —tau.

<sup>46</sup>Nuna tutai aimainchau dekapedau asag, makichik aentskesh iniaschajui. Nui nagkamsag ataktuk iniaschaju.

#### **Jísus fariseo aidau chicham umiktinun jintinkagtin aidaujai pegkegchajui pachisa tibau**

(Mr. 12.38-40; Lc. 11.37-54; 20.45-47)

**23** <sup>1</sup>Nunikagmatai Jísus aents aidau, niina jintintaiji aidaujai <sup>2</sup>chichajak: “Chicham umiktinun jintinkagtin aidauk, fariseo aidaujai Moisés chicham umiktinun jintinkagtujakua nuna

jintinkagtuinawai. <sup>3</sup>Nuniau asamtai, ashí dita dutikatajum tujamaina duka imatiksagmek umiktajum, tujash ju umimainai tuinayatak pegkegchau takaina duka atumek takasaigpajum. <sup>4</sup>Ditak chicham umiktin kakajus umimainchauwa ibaunak tikich aents aidaunak, jujú umiktajum awajuinawai, tujash ditakesh umiinatsui. Ditak, iik kijin jumainchauwaitku tikich ayanka, machikish yaitsuk idaimaina numamtuk wajainawai. <sup>5</sup>Dita takaina nunak, ashí tikich aents aidaush, minak eme anenjus diigtinme tusag aaninawai, nuninak nijayinish sentan wegkagman jukiag, chicham umiktajum tibau aidaun agak, kuntujinish dutiksag jigkamá yujainawai. Aantsag nugkuagbauji weniya nuwish sasamjuk detujag nugkujag yujainawai. <sup>6</sup>Jistatin yuwinamunmash, dekas apú ekeemtai shiig iwajamu aina imanun etegkawag ekeemsagtatus wakegainawai. Jega ijuntainum wainakush ekeemtai pegkegnum ekeemsagtatus wakegainawai. <sup>7</sup>Nunidau asag, aents kuashat ayamunum igkuntuinakush puyatjutus kumpamjuinak: ‘Jintinkagtinú’ tujuttinme tusag wakegainawai.

<sup>8</sup>“Tujash atumek: ‘Jintinkagtinú’ tujuttinme tusagmek wakeemaisugme, ashí atum aidautigmek yatsut asajum, ‘yatsujú’ tudaimain ainagme, imá makichki atumí jintinjamnuk. <sup>9</sup>Atum aidautigmek ju nugka juwiyag: ‘Apawá’ tumainuk atswai, imá makichik: Apawá tumainuk Apajuí nayaimpinum puja nunuwai. <sup>10</sup>‘Jintinkagtinú’ tama atasagmekesh wakejigpajum, Kristua auke: Jintinkagtinú tama amainuk. <sup>11</sup>Atum ainajum anuiya dekas iman atatus wakegauk tikichin umigmainai. <sup>12</sup>Ni nigki eme anenmamuk wainak juwaktinai; untsu aents eme

anenmamchauwa nunú dekas wagaakuk atinai.

<sup>13</sup>“iChicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek aents Apajuí nemagkata tuinaig shiig jintinchau asajum, waiti epetmaina numamtuk awagmajum duwi. Tujash atumkesh uwemainnum pujatsjume, nuniau asajum tikich aida uwejmjati tusagmesh idaitsugme. <sup>14</sup>iAtum chicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek nuwa wajú jee atankijum, aents aida: Pegkegnap takainawa, tujuttinme tusajum Apajuí au aujuinakuajum ukú yujau ainagme, nunin asajum imá senchi suwimak jukitin ainagme.

<sup>15</sup>“iChicham umiktinun jintinkagtin aidautigminak, fariseo aidautigmijai wait anentajime, tsanumin asagmin! Atumek aents aida atumi nunitaijum jintintuajum atumea nuninuk ematasajum, kukag yujasjum, nayantsanum wejigmesh egaa yujau ainagme, dutika unuinagjum atumi nagkaetamas jii ajumaish kajinkashtinum suwimkan juwak waitmain emá idayin ainagme.

<sup>16</sup>“iAtumek aents wainmachuitak jintan inakmastatus wajukmaina numamtuk wajau asagmin wait anentajime! ‘Jega Apajuí ememattaiya nuna adayas aents ni dutikatnuij umikatjai tauk wainkayai’ tajume; ‘tujash aents ni dutikatnuij pachis, jega Apajuí emematainum oro awa nuna adayas tauk dekas imatiksag umimainai’, tinu asagmin.

<sup>17</sup>iAnentainkachu, wainmachu aidauwah! ¿Dekas imanush tuwaita orokaih, nuniachkush jega Apajuí ememattai oron pegkeemtika duchaukaih? <sup>18</sup>Atumek: ‘Altaran adayas ni dutikatnuij umikatjai tauk, wainkayai’ tajume; ‘untsu Apajuí

anentag suwamu altarnum patatun adayas tauk, dekas imatiksag umimainai' tinu ainagme. <sup>19</sup>iAnentainkachu, wainmachu aidauwah! ¿Tuwiya dekas imanush, Apajuinu atin kuntin anentag itaamua dukaih, atsa altar nunú itaamun pegkeemtika duchaukaih? <sup>20</sup>Aents ni dutikatnujin pachis altaran adayas tauk, ashí altarnum patatujai taku tawai. <sup>21</sup>Tuja juga Apajui ememattaiya nuna pachis taushkam imá jeganak takug tatsui, Apajui nui puja nujai taku tawai. <sup>22</sup>Aantsag aents nayaimpin pachis taushkam imá nayaimpinakek tutsuk, ashí Apajui pujamujiya nunash taku tawai.

<sup>23</sup>“iChicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek ajak menta, anís, r comino aatsajum puyatjusjum diezmó<sup>8</sup> wajagme. Ju dutikayatkujum chicham umiktina nuwiya pegkeg takata nuna, wait anenkagtutan, Apajui umigtan jintinkagta duka umiatsjume. Tujash ju aina jujú umiakjumes, nuigtú tikich umiktin aina dushakam umitskek idaimain ainatsjume. <sup>24</sup>iAtumek aents wainmachuitak jintan inakmastatus wajukmaina numamtuk wajagme tikich jintinkujum; atumek uwagtinjumin wiyunch egkemamtai kujajajig tusa jiikí ajapeyatukujum, dekas wenunmash camello waimainchauwa imanun kujamaina numamtuk wajagme!

<sup>25</sup>“iChicham umiktinun jintinkagtin aidautigminak, fariseo aidautigmijai wait anentajime, tsanumin asagmin! Atumek shikiká umutai, nuigtú plato aina nuna awanke nijamaina numamtuk wajagme. Tujash atumi anentaiminig kasamtaijum, pegkegchau takamtaijum aidau piyak ajutjamainawai. <sup>26</sup>iFariseo

wainmachu aidauwah! Dekatkauk shikiká umutai, nuigtú plato aina nuna initkega nuuwá dijagta, dutikam awankeshkam tsuwatchau atatui.

<sup>27</sup>“iChicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Aents ukusbau awanke pujuú ukatkamu asa pegkeg wajas au, ujaká diyaam kaujú niina ukunchi aidaujai tsumain wajas aama imanaitjume. <sup>28</sup>Atumshakam dekaskenmag nunisjume aents aidau emtinig pegkeja iman iwainmamjume; tujash initkagminig tsanumtaijum, pegkegchaujum aidau piyak ajutjamainawai.

<sup>29</sup>“iChicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek Apajui etsegtin aajakú aidau ukusbauji aina nunú iwagjume, dutikakjum aents pegkeg aidau kajegbauwa nunú dakumká najanajum shiig iwajajum ekenjume, <sup>30</sup>dutika chichaakjum: Ii muunji batsamajakua nunú tsawantini jutiish pujujukitkuik, Apajui etsegtin aajakú aidauk maawaigpajum tusais ayamjumain ajabiagtai, tajume. <sup>31</sup>Ju tau asajum, Apajui etsegtin aajakú aidau kajegkú aina nuninuk atumesh iwainmamjume. <sup>32</sup>iAtumin muunjum nagkamamua duka atumshakam dutiksagmek emajume!

<sup>33</sup>“iAtumek iwanchi uchijí asajum aents tsanú yujagjum ibautigmes! ¿wajuk uwemtugta tajume, Apajui suwimkan sujamak jii ajumaish kajinkashtina nui chimpipatta duwish?

<sup>34</sup>“Nunin asamtai wi awetittajime Apajui etsegtuktin aidau, aents yacha aidauwash,

---

r 23.23 *Antís* tawa duka Dios Habla Hoy (DHH) tawa nuwiya jukimui. Untsu Reina-Valera takug: Eneldo tawai. s 23.23 *“Diezmo”* tawa nunak, dieza nuwiya makichik Apajuinu atin akanbauwa nuna tawai.

jintinkagtuatin aidaunashkam. Tujash atum numú aina nuwiya achigjum maattagme, dutikakjum tikich aina duka jega atumi ijuntajum aina nui awayajum asutiattagme, dutikakjum yaaktanum wekaetusjum waitká yujagtin ainagme. <sup>35</sup>Aaja nuniau asagmin, aents pegkeg aidau ju nugka juwi kajegkú ainajum duwi, Abel maamua nui nagkamas, Apajuí etsegтин Zacarías Berequiasa uchijí, jega Apajuí ememattainum pujau, altara ejapeen mau ainajum duwi suwimkak suwam atatjume. <sup>36</sup>Dekas tajime: Nunú suwimkak ashí atum ainajum anutijum jukitnaitjume.

**Jisus Jerusalegnomia  
aents aidau egaagbau**  
(Lc. 13.34-35)

<sup>37</sup>“Jerusalegnomia aidauwah, atumek Apajuí etsegтин aidaush main ainagme, nuigtushkam Apajuí chichagkagtukti tusa awetugmagmataish, kayai tukuí tukuinakuajum main ainagme! iWika shiig kuashat wakeesan, atash uchuchiji aidaun nanapen awayag ijumag kuitamama numamtuk, atumnash ijumjan kuitamkata tamash atumek dakitjamugme! <sup>38</sup>Nuniku asagmin jujú atum batsatjum juka ukumkimu, aents pujugsachbau agkan agtatui. <sup>39</sup>Nunin asantai tajime: Yamai nagkamsagmek ataktuk waitkashtatjume, nuniautijum wi minakui: ‘iApajuí awemam mina ju emematiagmi!’ tujuttinaitjum duwi waitkatin ainagme.”

**Jega Apajuí ememattai tsayam  
atinai tusa Jisus etsegkamu**  
(Mr. 13.1-2; Lc. 21.5-6)

**24** <sup>1</sup>Jisus jega Apajuí ememattainmaya jiinki wetai, niina jintintaiji aidau amainagkag nu jegamkamun inaktuinak awaantaju.

<sup>2</sup>Dutikam Jisus chichaak:

—¿Ju ashí imag ekenjá jegamkamua ju wainjumek? Dekas tajime: Makichik

kayakesh ekenjamu aina nuwiyag juwakchatnai, ashí tsaikbau atinai, —tau.

**Nugka nagkantsaig wantinkagtin  
aidau pachisa etsegkamu**

(Mr. 13.3-23; Lc. 21.7-24; 17.22-24)

<sup>3</sup>Jisus Olivosa mujajin waka ekeemsantai, niina jintintaiji aidau jegaantag niinak iniinak:

—¿Nunash wajutik dutikawagtin ainawa? ame taattaku wajataish, tuja nugka nagkanbau jegattak wajataish wají wantiniagtinaita, nunú ujjatkata, —tuidau.

<sup>4</sup>Tiagtai Jisus ditan ayaak:

—Kuitamamkatajum, makichkish tsanugmajainum. <sup>5</sup>Wagki kuashat aents aidau mina daajun adaimasag midiagtinai nuninak: ‘Witjai Kristunuk’ tusa kuashat aentsun tsanuagtinai.

<sup>6</sup>Maaninawai tuinamu antitnaitjume, nuigtú maaniawagtasa pampandayamushkam, imaniakuish puyatkaigpajum. Duka aatus nagkaemaktinai tujash nu achatnai nagkanbauk. <sup>7</sup>Nugka muunnum batsamin aidaushkam mai imannumiajaig maadiagtinai, tuja nugka yaignum batsamin aidaushkam, tikich nuninum batsatujui maadiagtinai. Jata waamak aentsun nagkaematug ijinbaush atinai, yapagtash tepeatnai, ugtanash kuashat nugkanum ugtinai. <sup>8</sup>Tujash jujú aina juka waitut yamá nagkamnak imanitnai.

<sup>9</sup>“Ju nuniamunum atumnashkam achigmakag jujamkiag wai waitkagmainakua mantamawagtinai. Atum mina nemagtin aidautigminak ashí aents aidau kajegtabiagtinai. <sup>10</sup>Nu tsawantai kuashat aents minai dekaskeapi tusa anentaimaidaush idaisagtinai, nuninak kajegdayagtinai;



imanidau asag pempé pempeentunikiag achinidiagtinaí. <sup>11</sup>Kuashat aents Apajuí chichame etsegi tusa tsanumaidaush wantinjatnai, nuninak kuashat aentsun tsanuagtinaí. <sup>12</sup>Kuashat pegkegchau aítai, imaniau asamtai kuashat aents Apajuí aneamujinak mijakagtinaí. <sup>13</sup>Tujash ni mina nemagtukbaunak nunisag pujusá nagkanbaunum jegaa nu uwemjatnai, nunik ajumaish pujut nagkanchauwa nui pujustinaí. <sup>14</sup>Apajuí inamjatin yamajam chicham pachisa etsegbauwa juka, ashí nugkanum etsegkamu atinaí, ashí aents aidau dekaatnume tabau asamtai. Nunikmatai nagkanbauk atinaí.

<sup>15</sup>“Apajuí etsegtin Daniel aajakua nu, Apajuí dakitmainun shiig pegkegchau dutikawagtinun pachis agajui, (nuna aujuk dekaatnume): Jega Apajuí ememattai pegkegma nui aents utsanainak, dita apajimtaiji dakumkamun tikima pegkegchaun awayawagtinaí tawa nuna dutikaidau wainkugmek, <sup>16</sup>atum Judea batsatutigmek mujanum pisagtajum. <sup>17</sup>Tuja jega jegamká tuntupé paka inagnakbaunum waka pujaushkam akaikig wajijjinak jukiigka. <sup>18</sup>Aantsag ajanum takaak pujaushkam, pataká nungkugtinun jukitjai tusag waketyukigka; <sup>19</sup>iTujash nunú tsawantin nuwa ejamtin, nuigtú uchí amuntsuaku agtina nunak wait anentuinaí! <sup>20</sup>Apajuí ausatajum, atum pisamua nu tsetsek tepeamunum, nuniachkush tsawan ayamtai aigkish ajutjanimum. <sup>21</sup>Apajuí nugká najanauwa nui nagkamas yamaya juwish imanika waitchatain, atakea duwish imanika waittsashtin tikima senchi waitiamu atinaí. <sup>22</sup>Nu imanika waitiamun Apajuí imijtsuk idaitaik, makichik aentskesh uwemainchau ainawai, tujash Apajuí ni aentsji agtinun etegjauwa nuna wait

anentau asa, waitut ayatak wegaunak imijkatnai.

<sup>23</sup>“Tuja makichik aentskesh: ‘Juwi Kristu pujawai diistajum’, tachakush: ‘Awi pujume’, awajtamainakuish dekaskeapi tiigpajum. <sup>24</sup>Kuashat aents: ‘Kristuitjai’ tusag tsanumiagtinaí, aantsag: ‘Apajuí chichame etsejin ainaji’ tusag tsanumaidaush agtinaí. Nuninak aents dutikmainchau aidaun iwainainak tsanuagtinaí, dutikaidau asag Apajuí etegkamu aidaunash dita tsanuamunak tsanujagtinaí. <sup>25</sup>Junak yaunchkesh timajime. <sup>26</sup>Nu aaja tibau asajum: ‘Kristuk uwegshunum pujawai diistajum’ tujamainakuish wejumek diisaigpajum. Nuna tujamchakjash: ‘Diistajum ju jega tesamua juwi pujawai’ tujamainakuish dekaskeapi tiigpajum. <sup>27</sup>Wi Apajuí Uchijiyaitkun Aentsmaga Akiinawaitag nuna minaknuk, peem etsá minitia nuwiya peeti, etsá akaetaiya atú peemama numamtuk wajaktinaitjai. <sup>28</sup>Tuwi jakau tepettawa nuna chuwegkak tuwakagtinaí.

**Apajuí Uchijí Aentsmaga  
Akiinauwa nu minitnuji tibau**  
(*Mr. 13.24-37; Lc. 21.37*)

<sup>29</sup>“Nunú waitut nagkaemaig etsag suwe wajastinaí, nantushkam etsanjashtinaí, nayaimpinmaya yaya punjau aidaushkam nugkanum kakeyagtinaí, imanidau asagmatai nayaimpinmaya machikish umushmainchau aidaush buchitjatnai. <sup>30</sup>Nunú imaniai wi Apajuí Uchijiyaitkun Aentsmaga Akiinawaitag nuna, nayaimpinmayan ashí mina senchigjai tsawan wajasá minamujun waitkag, ashí aents nugkanmaya aidauk ishamjukag buutiagtinaí. <sup>31</sup>Wi mina aentsug nayaimpinmaya aidaun ishiaktinaitjai, ashí mina aentsug etejamu aidau nugka

nagkatkamunum batsatun, umputai trompetan senchi umpuntug ijumjatnume tusan.

<sup>32</sup>“Numi higueran pachisan augmattsan titatjim nu anentaimtustajum. Atumek: ‘Higuera duke betenkakuig wamkeap esat nagkamnattawa’, tusajum dekau ainagme. <sup>33</sup>Nunisjumek atumshakam, ashí wi tajim nunú imanisag uminag wegau wainkugmek, yamaik Apajuí Uchijí Aentsmaga Akiinawu nu taatnuk ashí jegaegapi titin atajum. <sup>34</sup>Dekas tajime: Wi Jerusalegkan pachisan ashí tajim duka yamai aents batsataina jusha ashí jinuinatsaig uminkatnai.

<sup>35</sup>Nayaimpik nugkajaig megkaejatnai, tujash mina chichamjuk umintsukek juwakchatnai.

<sup>36</sup>“Tujash wájí tsawantinig, wájí horatinig taatnaitja nunak makichkish dekainatsui, nayaimpinmaya aents aidaukesh dekainatsui, imá mina Apajuk dekawai.

<sup>37</sup>“Wi Apajuí Uchijiyaitkun Aentsmagan Akiinawaitag nuna minittakun wajataik, Noé pujai wajukeyakú aina numamtuk wajagtinaí. <sup>38</sup>Nunú tsawantaik eke nujag ashí nugkan amuatsaig batsamsag, yutai yuwinak, umutnash umuinak, nuwenainak, nawanjin suju wájí batsatai, Noé niina arcajin egkemaui.

<sup>39</sup>Nunikmataish pachitsuk tuke imaní batsatainaí, nujag ashí nugkan amuak ashí aentsnak tajak utsagkui. Numamtuk aents pachiakats pujuinaí, wi Apajuí Uchijiyaitkun Aentsmagan Akiinawaitag junak taatnaitjai. <sup>40</sup>Junashkam tajime: Jimag aents ikam wekaguk makichik juwaku, tikichik ukuam atinaí. <sup>41</sup>Jimag nuwa shaa dekeenak pujuidashkam makichik juwaku, tikichik ukuam atinaí.

<sup>42</sup>“Atumek aneaku pujustajum, wájí tsawantinig atumí Apugmish minitnaita duka dekachu asajum. <sup>43</sup>Ju

anentaimtusjum diistajum, aents jeentin kasa kasagkatasa utuam atinjin dekakug, kanutsuk iwá pujauk, jeenig utuam amaitsui. <sup>44</sup>Numamtuk atumshakam aneaku pujustajum. Wi Apajuí Uchijiyaitkun Aentsmagan Akiinawaitag nunak tsawan imatika anentaimtachbau ai minitnaitjai.

**Inak pegkegchau,  
pegkegai pachisa augmatbau  
(Lc. 12.41-48)**

<sup>45</sup>“¿Yaita inak apuji tibaunak imatiksag umin, shiig anentaimkau asamtai, apuji kajitus niina jeen batsatun yutain diyaku susati tibauiwa nuninush? <sup>46</sup>Nunú inak apuji inaja ukukbau ashí ni tibaunak betek umiká pujakug, apuji minitaish shiig aneemainai. <sup>47</sup>Dekas tajime: Nunú inak imanis umiaunak apujishkam: ‘Ashí mina ajutuina duka ame kuitamjutin atá’, tusa idaitumainai. <sup>48</sup>Untsu inak pegkegchau asa: ‘Mina apujuk waamak taashtatui’, tusa anentaimas <sup>49</sup>niina apuji inake aidaun senchi suwimak, nigka shiig yuwak, nuigtushkam nampen aidaujai umak wekagai, <sup>50</sup>apuji tsawan dekachmau ai pachiachmau takamá wainak, <sup>51</sup>senchi suwimkan susa, tikich aents wait aidaujai betek waittsati tusa idaimainai. Dutikam nui pujus senchi buutak daik takegtú pujumainai.

**Diez nuwa muntsujut aidaun  
pachis Jisus augmattsamu**

**25** <sup>1</sup>“Apajuí aentsnum inama duka, diez nuwa muntsujut lámpara jukiag nuweenun uyuntsagtatus wejiajua nujai betekmamtin atinaí. <sup>2</sup>Cinco nuwa aina nunú shiig anentaimsag umintsajui; nuninaí tikich nuwa cinco aina duka anentaimtugchajui nunak, <sup>3</sup>nunidau

asag lamparajin yajamainnak aceitenak jukichaju ainawai. <sup>4</sup>Untsu nuwa shiig anentaimas umintsaju aina duka, lamparajin juinakush botellanum aceiten aimak jukijai. <sup>5</sup>Nuwenatna nu tachatai, dakai dakainakua kaji pujajuinam ashí kajigkajui. <sup>6</sup>Nunik kajigkag batsatai aehaet ai antukajui: ‘iNuwenatta duka minawai, jijnajajum igkugtajum!’ tusa untsumjamun. <sup>7</sup>Tutai nunú nuwach aidaushkam lamparajin ekemaktasag umiidau. <sup>8</sup>Nuniamunum nuwa nuna anentaimtugchaju aidauk, pachiakats pujuidau asag, tikich nuwa shiig anentaimas uminkaju aina nuna: ‘Minash aceitijum machik yajatjuata, jutii lamparajig kajinainawai’, tuidau. <sup>9</sup>Tama dita aiinak: ‘Dekas aceite sujutainum wejum sumaktajum, akantunisa jukimak ajutá abuekashtatui’, tiaju. <sup>10</sup>Tiajam aceiten sumaktatus weenai, ukunum aents nuwenushkam tau, nunikmatai nuwa umintsag daká batsataidauk, nuwenku jistabaunum utsanawaju, nunikmatai waitin epediuwai. <sup>11</sup>Nuniku ai nuwa aceiten sumainak wegajushkam kaunkag: ‘iApu waiti ujatjikia! iApu waiti ujatjikia!’ wajaidau. <sup>12</sup>Imatjam ni ayaak: ‘Wika atumnak wainchaujime, atumesh yatsu ainajum’, ” tiuwai.

<sup>13</sup>Jisus nuna tusa:

—Nuaduí atumek aneaku batsamtajum. Wi Apajuí Uchijiyaitkun Aentsmagan Akiinaun taatnaitag duka tsawantak, nuigtú horash wajukeyag taatnaitja dushakam dekaatsjume, —tiuwai.

**Apu ni inake aidaun kuichik tinamí  
ukukbau pachisa augmatbau**  
(Lc. 19.11-27)

<sup>14</sup>“Apajuí aentsnum inama duka, aents wiyakuch tikich nugkanum wetatak pujus, ni inake aidaun untsuká

ikaunman kuichkin tinamkauwa nujai betekmamtainai. <sup>15</sup>Makichik inaken cinco mil kuichkin susauwai, tikichin dos mil, kampatuma juna mil susauwai. Junak makí makichik dita takamainjin diijus tinamkauwai. Dutika ukuak tikich nugkanum weuwai. <sup>16</sup>Inak cinco mil kuichkin jukiuk, wajiin sumag sujak nuigtushkam imatiksag cinco mil kuichkin ikaugkauwai. <sup>17</sup>Tuja dos mil kuichkin jukiushkam, niishkam dutiksag dos mil kuichkin ikaugkauwai. <sup>18</sup>Untsu inak mil kuichkin jukiuk, nugkan tai yutua idaisauwai ni apuji kuichkijinak.

<sup>19</sup>“Kuashat tsawan nagkaemakui ai, apushkam ni inake batsatbaunum wakítka tauwai. Nunik, wajupak kuichkinash ikaugkaje tusa dekajuawagtatus nagkamau, <sup>20</sup>nuniai dekatkau cinco mil kuichik susamua nu, nuigtú cinco mil juki ejentun chichajak: ‘Apuh, cinco mil kuichik sujusmayum nunak juwi itajuajame, nunú kuichkia nuna takamtiksan, nuigtú cinco mil kuichkin ikaugkamua nunashkam itajuajame’, tau. <sup>21</sup>Tama apuji chichajak: ‘Ayú, amek inak pegkeg, nuigtush chicham uminaitme. Machik susamuitkum imatikam ikaugkaume, yamaik aan kuashat amastajame. Mina jegajuí wayaata, nunikamin iijai dakujusmi.’ <sup>22</sup>Tusa inagnaig, tikich dos mil kuichkin jukiuwa nu jegantun chichajak: ‘Apuh, minak dos mil kuichik sujusmayume nunak juwi itajuajame, juna takamtiksan nuigtú dos mil kuichik ikaugkamua nunashkam itajuajame’, tau. <sup>23</sup>Tama apuji chichajak: ‘Ayú, amek inak pegkeg, nuigtush chicham uminaitme. Machik susamuitkum, imatikam ikaugkaume, yamaik aan kuashat amastajame. Mina jegajuí wayaata, nunikamin iijai dakujusmi’, tiu.

<sup>24</sup>“Nuniai tikich mil kuichkin jukiuwa dushakam jegantun chichajak: ‘Apuh, wika ame waitkagagtinaitam nuna

dekagjame. Amek ajak ame ajakmachbau aig juukam yajumnaitme aminuchu aig, <sup>25</sup>nunin asamin amina ishamakun kuichkigminak nugká tain yutuan idaisabaijai, dutikamun yamai juwi itajuajame, ju jukita', tau. <sup>26</sup>Tutai apuji ayaak: 'Amek inak pegkegchau, dakitme. Wi ajakmachiatkun juukan yajumin dekajiatkumesh, <sup>27</sup>¿wagka kuichik kawegti tusa egketainum takau aidau susachmayume? Dutikauwaitkuminig wi taakun midau kawegkun jumain awajkajai. <sup>28</sup>Aanú kuichik atankijum, diez mil kuichik aja nu susatajum, <sup>29</sup>wagki aents kuashat ajamuk nuní dukap suwam atinai, dutikamu asa nuní kuashat ajitnai; untsu piipich aja duka, nu piipich ajamua duke atantam atinai. <sup>30</sup>Ju inakak atsumnatsui, jukijum agaa suwea awi jiiktajum, nui pujusá buutak daik takegtú pujutnujija nuanuí', tiuwai.

**Atak nagkanbaunum aents pegkeg, pegkegchau aidaujai akanbau atin**

<sup>31</sup>'Wi Apajuí Uchijiyaitkun Aentsmagan Akiinawaitag nuna, mina senchigjai nayaimpinmaya aents aidaujai minaknuk, wi ekeemsa inamjatin tsawan wajas abaunum ekeemsaatnaitjai. <sup>32</sup>Nunikmatai mina emtijui, ashí aents nugkanum batsataidauk tuwakagtinai. Imanikagmatai aents uwijá kuitamin, uwigjin chiwujai akanama numamtuk makí makichik akanjatnaitjai, <sup>33</sup>midau aidau untsugnum ijumkun, aents pegkegchau aidauanuk menanum ijumjatnaitjai. <sup>34</sup>Dutikan wi Apu asan mina untsujuí ijumjamun chichagkun: 'Minitajum atum mina Apag pegkeemtikbau aidautigmek, nunikjum atum pujustinun Apajuí nugkash najannatsaig umikbauwa nui wayaatajum. <sup>35</sup>Atumek wi yapajakuish

ajamjusbaijume, kitabiajai nuniakuish umutaig sujusbaijume, jeenchau wekagaish, atumi jeemin awaintuabiugme. <sup>36</sup>Nugkumain atsugtakuish atum sujusbaijume; jaakun tepakuishkam taajum ijagtusbaijume; achigkagmatai egketaish waitkatasajum tajutbaijume', titinaitjai. <sup>37</sup>Nuna aatsa tai aents pegkejan takasú aidau: 'Apuh, ¿wajutiya ame yapajú wekaeminish ayujabaijame? ¿Wajutiya kitamá wekaeminish umutaish amasbaiji? <sup>38</sup>¿Wajutiya jeenchau wekaeminish iina jeenish awayabaijime, tuja nugkumain atsugtamkuish, wajutiya jaanchish amasbaiji? <sup>39</sup>¿Iish wajutiya ame achinká pujaminish tajuwabaijime? ¿Wajutiya ame jaakum tepaminish taawabaiji?' tujuttinaitjume. <sup>40</sup>Tujutkugmin wi ayaakun: 'Dekas tajime: Ju mina yatsug imanchauch ainaigkish wait anenjauwaitjum duka, mina dutijuau ainagme.'

<sup>41</sup>'Nuna ti menajin ijunun Apu chichajak: 'Pegkegchau aidauwah, juwi minai ijuntsuk, jii ajumaish kajinchau iwanch ni aentsjijai egkematina umigkamua nuanuí wetajum. <sup>42</sup>Atumek wi yapajakuish ajamjuschabiugme, kitamakuish umutaig sujuschabiugme; <sup>43</sup>jeenchau wekaekuishkam pujumainuk sujuschabiugme; nugkutai atsumakuish sujuschabiugme, jaakunsh tepebiajai, achinkanush pujubaijai, nuniakuish tajutuagmek ijagtuschabiugme', titinai. <sup>44</sup>Tusa tama dita: 'Apuh, ¿iish wajutiya ame yapagkim, kitaajam, jeenchau, jaanchjinchau wekaekuminish, nuigtú jaakum tepaminish, achinkam egketkuminish pachitskesh idaisabiagme?' tiagtinai. <sup>45</sup>Tiagtai Apu ayaak: 'Dekas tajime: Atum ju aents imanchauch aina jujú wait anenjachuitjum duka, mina dutijuau ainagme', titinai. <sup>46</sup>Aaja tima nunú

aents aidauk suwimak nagkankashtina nui wegagtinai; untsu aents pegkeg aidauk pujut tuke atina nui wayawagtinai”, tiuwai.

**Jisus maami tusa  
chicham umigkamu**

(Mr. 14.1-2; Lc. 22.1-6; Jn. 11.45-57)

**26**<sup>1</sup>Jisus juna chichá chichaakua ashimak ni jintintaiji aidaun chichajak:

<sup>2</sup>—Jimag tsawan asa Pascua<sup>t</sup> atata duka dekagme, nuanuí wi Apajú Uchijiyaitkun Aentsmaga Akiinawaitag nunak, achijá maatnume tusag sujutkagtatui, —tiuwai. <sup>3</sup>Tuja nunú tsawantinig sacerdote apuji aidau, chicham umiktinun jintinkagtin aidaushkam, tikich apu aidaujai sumo sacerdote Caifasa jeen agaajin ijunjajui. <sup>4</sup>Nunikag chichaman umikajui, Jisus tsanumjuja achiká maami tusag. <sup>5</sup>—Tujash jista aigkik dutikachagmi, aents aidaujai pampandayamu ai, —tuidau.

**Betanianmaya nuwa Jisusan  
kugkuinui nijakbau**  
(Mr. 14.3-9; Jn. 12.1-8)

<sup>6</sup>Jisus Betanianum Simón lepra achimaku etsagagbau aajakua nuna jeen pujai, <sup>7</sup>nuwa tajauwui kaya alabastro tutai botella najanamunum, kugkuin shiig akik wajaknun takusá, nunik Jisus mesanum eketun jegantun nu kugkuinai buuknum ukatjauwai. <sup>8</sup>Nunú dutikamun ni jintintaiji aidau wainkag kajekajui, nunikag:

—¿Wagka wainkash ibaunash ajapeawa? <sup>9</sup>Dekas aikatsuk shiig akik

sujuka ujunauch aidau sumainajama, —tuidau.

<sup>10</sup>Tiagtatman Jisus antuk ditan chichajak:

—¿Wagka jusha nuwash kajejagme? Mina jutija junak pegkejan aikae, <sup>11</sup>ujunauch aidauk tuke atumjai batsamiagtatui, tujash wika atumjaig pujushtatjai. <sup>12</sup>Ju nuwa mina iyashjuí kugkuinun ukatjuka junak, mina ukugsagmatai jutijuawagtinun jutijawai. <sup>13</sup>Dekas tajime: Yamajam chichama juna etsejuinak ashí nugkanum yujainakush, ju nuwa mina jutija junak tuke pachisag chichatin ainawai, —tiuwai.

**Judas Jisusa sujuktatus  
kuichik jukimu**

(Mr. 14.10-11; Lc. 22.3-6)

<sup>14</sup>Nuna timatai doce aina nuwiya, Judas Iscariote daagtin jiinki sacerdote apuji aidaujai chichastatus weuwai.

<sup>15</sup>Nunik:

—¿Wají sujumainaitjume, wi Jisusan atumin amaakuish? —tau.

Tutai dita aidau treinta kuichkin susaju. <sup>16</sup>Dutika akikbau asa, ni yupichu sujumainjin egatu.

**Pascuatin yuwatin umikbau**

(Mr. 14.12-25; Lc. 22.7-23; Jn. 13.18-30)

<sup>17</sup>Pag lewaduragtuchu<sup>u</sup> yutai nagkamak tsawaagmatai, ni jintintaiji aidau Jisusan jegaantag:

—¿Tuwí umikatatji Pascuatin yuwatnush? —tusa iniidau.

<sup>18</sup>Tama ni ayaak:

—Yaakat wetajum, nunikjum atum aents wainjum nunú jegajuajum:

---

t 26.2 “Pascua” tawa duka judío aidau uwig aishmag tsakatan maawag yuwinaku jistamtaiji aajakuf. Nunak Egipto nugkanum batsamas waitkam batsatun Apajú ayamjuk jijjá agkanmitkam asag, nuna anentaimtusag jistamainak dutikajakú ainawai. Diistá Éxodo 12.1-28. u 26.17 *Lewaduranak* paangkan inagkatatus harinan namukag ajuntin ainawai, wampushmitkati tusa.

‘Jintinkagtin chichaak: Mina tsawanjuk namputchí wajaschae, nuniau asamtai niina jeen mina jintintaig aidaujai Pascuan jistamatjai tujamae’ titajum, —tiu.

<sup>19</sup>Tiagam Jisusa jintintai aidauhkam ni tibaunak imatiksag, Pascuatin yuwatnunak umikajui.

**Jisus inagnaku Pascuatin yuwamu**

(Mr. 14.17-21; Lc. 22.14-18)

<sup>20</sup>Kiyagmatai Jisus ni jintintaiji doce aina nujai mesanum jegantá ekeemsau.

<sup>21</sup>Nui yuwamunum Jisus chichaak:  
—Dekas tajime: Atum ainajum juwiyag makichik minak sujtkattawai, —tau.

<sup>22</sup>Tutai shiig senchi wake besemag dekapjag, makí makichik iniinak:

—¿Apuh wichaukaitag? —wajaidau.

<sup>23</sup>Tiagtai Jisus ayaak:

—Wijai nu platonmag uchutua yuwa nu minak sujtkattawai. <sup>24</sup>Wi Apajuí Uchijiyaitkun Aentsmaga Akiinawaitag nunak, mina pachittsag agajajua nuna imatiksasuk umiktatjai, tujash iaents mina sujtkatta nuna wait anentajai! Duka dekas akiinmainchaunas akiinawabiataih, —tau.

<sup>25</sup>Tutai Judas ni sujktina nu chichaak:

—Jintinkagtinuh ¿wichaukaitag? —tau.

Tutai ni ayaak:

—Ame tame duka dekaske, —tiuwai.

**Jisus, mina anentaimjuttasajum  
yuwakjumek juní  
dutikatajum tibau**

(Mr. 14.22-25; Lc. 22.7-23;

I Cor. 11.23-26)

<sup>26</sup>Yuwinak pekagbaunum, Jisus pagkan juki Apajin see ti, puuká, ni jintintaiji aidau suwak:

—Ju jukijum yuwatajum, juka mina iyashjua numamtainai.

<sup>27</sup>Nuna ti, copanum vino yajaam ekeematman juki, Apajin see tusa jintintaiji aidau suwak:

—Ju copa<sup>v</sup> juwiya ashí atum aidautijum uwagtajum. <sup>28</sup>Juka mina numpag ukaejamunum kuashat aents tudaujin tsagkugnajag uwemkagtina nuna, mina Apag yamagman anagtamawajua nunú uminkatnun iwainawai. <sup>29</sup>Dekas tajime: Wika ju uva yumijiya junak yamai nagkamsanuk awenanuk uwagchattajai, atak tsawan uminkui mina Apajuí inamtain ataktú atumjai ijunkun uwagtainaitjai.

**Jisus Pedron uugtuktatme  
tusa ujakbau**

(Mr. 14.26-31; Lc. 22.31-34;

Jn. 13.36-38)

<sup>30</sup>Nuna timatai kantamtain kantamawag Olivosan mujajin wegajui.

<sup>31</sup>Nunikag nui jegantá Jisus chichaak:

—Jujú kashia juwik, ashí atum aidautigmek mina anentaimjuttak kajimatkittagme, agagbauwa nui: ‘Uwijá kuitamnun mantuawagtinaí, dutikawagmatai uwigji aidauk pampagkagtin ainawai’ tawa nunisag.

<sup>32</sup>Tujash mantuawagmataish ataktú nantakin, atumek wegatsjuminig wiyá emkan Galilea wetatjai —tiuwai.

<sup>33</sup>Tutai Pedro ayaak:

—Ashí tikich aidau

kajimatjamainakuish, wika aminak tuke kajimatkishtinaitjame, —tau.

<sup>34</sup>Tutai Jisus chichajak:

—Dekas tajame: Jujú kashia juwik, atash eke shinatsaig kempatuma imania: ‘Jisusnak wainchaujai’ tusam uugtuktatme, —tiuwai.

<sup>35</sup>Tamashkam Pedro ayaak:

—Amijai apaatuk mantuinaukuish, wika nunak tichattajai, —tau.

Nuna tutai ashí niina jintintaiji aidauk ditashkam dutiksag tajui.

**Jisus Getsemaní pujusá**

**Apajuí ausamu**

(*Mr. 14.32-42; Lc. 22.39-46*)

<sup>36</sup>Tiagmatai juwakiag Jisus ni jintintaiji aidaujai ajak ajakbau Getsemaní tutainum jegauwai. Nunik ditan chichajak:

—Juwi atumek ekemamatajum, nuniagmin wi awi wenu Apajuin ausatjai.

<sup>37</sup>Tusa wegag Pedron, nuigtú Zebedeo uchijin mai juki wesa, shiig senchi wake besemag dekapeau asa, wake besekú.

<sup>38</sup>Imaniak Jisus:

—Senchi wake besemag dekapeakun, ane anentaimkawan jamain dekapeajai, atumek juwi batsamsajum wijai betekak iwá batsamtajum, —tiu.

<sup>39</sup>Tusa ukuak machik kuwaesag tikishmag nugkan nijayin intaa pujus, Apajuin aujak: “Apawah, nunimainaitkuig tsagakmjukaipa wi waitmainaitag nuwig. Tujash wi wakegamu achati, ame wakegamu atí”, tiuwai.

<sup>40</sup>Nuna ti ni jintintaiji batsakbaunum wakitkiu, nunik kajigká batsatun wainak Pedron chichajak:

—¿Atumek wijai betekak makichik horakesh iwamainchauk dekapeajum?

<sup>41</sup>Shintaagjum pujusjum Apajuí ausatajum, iwanch pegkegchau takastinme tusa dekapjamsainum. Wakanik dekaskenmag pegkeja nuna wakegawai, tujash iyashik kakakchau ainawai.

<sup>42</sup>Tusa ukuak ataktú wakitki Apajin aujak:

—Apawah, wi waitmainaitag nunú nunikchati tujutmaichakmek, ame wakegamua duke dutikata, —tau.

<sup>43</sup>Nuna tusa ataktú tanta diikmá, ditak kaji senchi mainam kajigkag batsatun wainkauwai. <sup>44</sup>Nunik diisá ukuak kempatuma juwi wakitki Apajin aujak, ni tibaujinak dutiksag auju. <sup>45</sup>Nunik ni jintintaiji batsakbaun jegantun:

—Wi Apajuí Uchijiyaitkun

Aentsmagan Akiinauwaitag nuna, aents tudaugtin aidanum sujam atatag duka, yamaik horak jegae, kanakjum ayamjatajum. <sup>46</sup>Nantagtajum wegagmi, diistajum mina sujutkatin ashí taa mina nu, —tiuwai.

**Jisus achiká jukimu**

(*Mr. 14.43-52; Lc. 22.47-53;*

*Jn. 18.2-11*)

<sup>47</sup>Tusa Jisus eke chichaak wajai, Judas Iscariote doce aina nuwiya, kuashat aentsun espada aidan, numi aidanaske takaku aidaujai saasá tajuntuwai. Nunú aidauk sacerdoté aidau apuji, nuigtú apu aidau awemamu minidau. <sup>48</sup>Judas Jisusan sujuktina nu, nunú aents aidan chichajak: “Wi kugkuastatag nunú achiktajum, nunak Jisusan dutikattajai”, <sup>49</sup>tiu asa Jisusan adijak:

—iJintinkagtinuh pujamek! —takug kugkuasu. <sup>50</sup>Tutai Jisus ayaak:

—Kumpajuh, ¿wagka miname? —tusa taun kauntuntag Jisusa achikag emetjaju.

<sup>51</sup>Nuna dutikiagtai Jisusa jintintaiji aina nuwiya espadajin ukuini juwakug, dekas sumo sacerdoté inake kuwishin asankuawai. <sup>52</sup>Dutikamtaí Jisus chichajak:

—Espadajum jukim awajata, ashí aents espadayai maanidauk, espadajai maam agtinai. <sup>53</sup>¿Atumek dekatsjumek, wi mina Apajun segamak yamaya juwik doce mil nayaimpinmaya aents aidan ishijumaina duka? <sup>54</sup>Tujash wi

mantamnashtaish, ¿utusag Apajuí chichamen agagbauwa dusha uminkati? —tiuwai.

<sup>55</sup>Nuna tusa nu aents aidaun chichajak:

—¿Wagka kasa achiktasa utugtaya imanikjumesh espada, numi aidau takusjum achigkatasagmesh minitjagme? wi atumin jintinkun kashí kashinig juga Apajuí ememattainum pujuweg nuaduik jutikajum achigchau agmaugme. <sup>56</sup>Tujash ju jutijajum juga, Apajuí etsegtin chicham tibau agagbauwa nunú uminu asamtai jutijagme.

Nuna taig, ashí niina jintintai aidauk pisainak ukukiajui.

**Jisus apu aidau**

**batsatbaunum ejentamu**

(Mr. 14.53-65; Lc. 22.54-55, 63-71;

Jn. 18.12-14, 19-24)

<sup>57</sup>Jisusan achikag jukiaju aidauk, Caifás sumo sacerdoteya nuna jeen ejegawaju, chicham umiktinun jintinkagtin aidau tikich apu aidaujai ijunag batsatbaunum. <sup>58</sup>Tuja Pedroskam ikaag pataetus wejá wejakua, sumo sacerdoteya jeen agaajin jegantá, niishkam wayaa achijatin aidaujai ekeemsau, wajuk inagnakagtig tusa diistatus.

<sup>59</sup>Sacerdote apuji aidauk, apu chichaman inagdaun aidaujai egatuidau, Jisusan tsanumjujag maatnume tusa sujukagtatus. <sup>60</sup>Tujashkam ejechaju kuashat aents tsanumjuinakush, nuninai inagnamunum jimag aents tsanumjugtin taawaju, <sup>61</sup>nunikag:

—Ju aents chichaak: ‘Wika juga Apajuí ememattaiya junak tsaikan, kumpatumchik tsawantai ataktú jegamainaitjai timayi’, —tuidau.

<sup>62</sup>Tiagtai sumo sacerdoteya wajakí iniak:

—¿Wagka machikish aimtsume? ¿Nunash wajinbaugmina jusha imatjutpainawa? —tau.

<sup>63</sup>Tamashkam Jisusak chichaachu, nunitai sumo sacerdoteya chichajak:

—Apajuí tuke pujuwa nuna daajin tajame: Ame dekas Kristu, Apajuí Uchijiyaitkumek dekas ujjatkata, —tau.

<sup>64</sup>Nu tama Jisus ayaak:

—Ame tujutam duka dekaske, nuigtushkam tajame: Wi Apajuí Uchijiyaitkun Aentsmagan Akiinawaitag nunak, Apajuí ashí senchigtina nuna untsujin eketun tsawan uminkamta, yujagminum pachitkau minamu waitkatnaitjume, —tiuwai.

<sup>65</sup>Nuna tutai sumo sacerdoteya nugkuagbaujin japikí ichigká chichaak:

—iApajuin pegkegchaun chichagkae! ¿Nuigtush ya etsegtukti tusaya atsumaji? ¡Yamaik atumshakam Apajuí pegkegchau chichagka nu antukugme! <sup>66</sup>¿Wajuk diyagme atumesh? —tau.

Tutai dita aiinak:

—Dekaske, ayatak mantamnati, —tiajui.

<sup>67</sup>Tiagtai yapinum usukinak awatuidau, nuna dutikainai tikich aidau yapinum ijuinak:

<sup>68</sup>—Ame dekas Kristuitkumek dekakia: ¿Ya ijupime? —awajuidau.

**Pedro Jisusnak waintsamjai tusa uukbau**

(Mr. 14.66-72; Lc. 22.54-62;

Jn. 18.15-25)

<sup>69</sup>Juna imatikainai Pedro agaa ekeemtatman, apú inake nuwa jegantun chichajak:

—Amesh Jisus Galileanmayaya nujaimpap wekaemume, —tau.

<sup>70</sup>Tusa tama ashí aents antuinamunum:



—Wika dekatsjai ame tame nunak,  
—tiuwai.

<sup>71</sup>Nuna tusa ukuak waitinum  
wetatman, tikich nuwa wainak aents  
nui ijunun ujaak:

—Jushakam Jisus Nazaretnumiaya  
nujai wekaenuwejama, —tusa etsegtau.

<sup>72</sup>Tujash Pedrok ataktushkam uwaak  
Apajuin adayas:

—iWika au aentsnak wainchaujai!  
—tau.

<sup>73</sup>Machik asag aents nui batsatu  
Pedron jegaantag:

—Dekas ameshkam auna  
jintintaijiyaitme, chichamjuminchakam  
dekanme, —tuidau.

<sup>74</sup>Tama Jisusan pachis pegkegchaun  
chichajak, Apajuin adayas:

—iWika au aentsnak wainchaujai!  
—tau.

Taig atash shinukuí. <sup>75</sup>Nunitai  
Pedroshkam Jisus chichajak: “Atash eke  
shinatsaig kampatamá ugtuktinaitme”  
tibaawa nuna adeaju, nunik senchi  
wake besemag dekapeg kajegmamak  
jiinki buutiuiwai.

#### Jisus Pilatuwai ejegamu

(Mr. 15.1; Lc. 22.66-71; Jn. 18.28)

**27** <sup>1</sup>Tsawagmatai, ashí sacerdote  
apuji aidau chichaman inagnau  
aidaujai, Jisusak dekas mantamnati tusag  
shiig chichaman umigkajui. <sup>2</sup>Dutikawag  
jigkajá jukiag, Romanmaya apu Poncio  
Pilato pujamunum ejegawajui.

#### Judas Iscariote kajemjamu

(Tak. 1.18-19)

<sup>3</sup>Judas Jisusan sujukua nunú, Jisusan  
dekas maawagtatus imatikiagtai, awake  
anentaimag sacerdote apuji aidaun tikich  
apu aina nujai treinta kuichkin awagtak:

<sup>4</sup>—Wika tudau takasjai, aents  
pegkejam aig maatajum tusa sujuku  
asan, —tau.

Tama dita aiinak:

—¿Iish dusha utugkatjiki? Duka  
aminuajama, —tiaju.

<sup>5</sup>Tiagtai Judas kuichkin nagkimá, jega  
Apajuí ememattainum ukuak, we  
kajemjauwai.

<sup>6</sup>Dutikamtai sacerdote apuji aidau  
kuichkin jukiag:

—Ju kuichkia juka anentag Apajuinu  
atí tusa chimpitia nuwig egkemaitsui,  
aents mantamnati tusa akikmatkamu  
asantai, —tuidau.

<sup>7</sup>Tusag chichasag nunú kuichkia  
duwik, nugka ichinak najanku  
batsamtain sumakajui, aents tikich  
nugkanmaya jaidaun ukustinun.

<sup>8</sup>Yamaya juwikishkam duka nugka  
numpeagbau tutayai. <sup>9</sup>Nuna pachis  
Apajuí etsegtin Jeremías agak:

“Jukiaje treinta kuichkin Israel aents  
aidau imaan akik atí tibaun,  
<sup>10</sup>dutikawag sumakaje nugka ichinak  
najanku batsamtain, Apu  
dutikawagtinai tujutiwa dutiksajag”,  
tibaawa nu nuní uminkauwai.

#### Jisus Pilatuwai ejegamu

(Mr. 15.2-15; Lc. 23.2-25; Jn. 18.28-40)

<sup>11</sup>Jisusan jukiag ejega apú emtin  
awajsaju, dutikawagmatai Pilato:

—¿Amekaitam judfo aidau apujim?  
—tau.

Tama Jisus ayaak:

—Ame tujutam duka dekaske, —tau.

<sup>12</sup>Sacerdote apuji aidau, tikich apu  
aidaujai tsanumjuinamash, Jisusak  
aimkag chichakchauwai. <sup>13</sup>Nunitai  
Pilato chichajak:

—¿Amina kuashat imatjutpaina duka  
antatsmek?

<sup>14</sup>Tamashkam Jisusak makichik  
chichamnakesh aikchau. Nunitai apuk  
anentai jegagchau.

<sup>15</sup>Tuja apuk jistatinig aents achikbau  
aina nuwiyán makichik jiisagké au,

aents aidau nu jinkiti tusa mamikiamua nuna. <sup>16</sup>Nuniamunum Barrabás daagtinchakam shiig pegkegchau achikam egketu. <sup>17</sup>Aents aidau nui ijuntatman Pilato iniak:

—¿Yana jiiktí tusagmea wakegagme, Barrabasnak jiiktatag atsa, Jisus, Kristu daagtina nuna jiiktí tajumek? —tau.

<sup>18</sup>Nunak tuke aneas kajejuinak maatneme tusa sujukajun dekau asa, tiuwai.

<sup>19</sup>Nuna tusa Pilatok chicham epegkatasa ekeemtaijin eketai, niina nuwe aentsun awetak: “Amek aanú aents pegkegma duka niimjusaipa. Wi ishamainun kajamjamjai yamai, aanú imatikamunum”, tiu.

<sup>20</sup>Tujash sacerdote apuji aidau, tikich apu aidaujai, aents tuwaká ijunun: “Dekas Barrabás jinkiti, nunitai Jisus mantamnati titajum”, tusa akatjajui.

<sup>21</sup>Tiagtai Pilato ditan iniak:

—¿Ju aents jimaja juiyanash, yana dekas jiiktí tusagmea wakegagme? —tau.

Tutai dita aiinak:

—Barrabás jinkiti, —tuidau.

<sup>22</sup>Tiagtai Pilato ditan iniak:

—¿Tujash Jisus, Kristu daagtina junash utugkatjaki? —tau.

Tutai ashí pampanjag:

—iAnka achinjati! —wajaidau.

<sup>23</sup>Tiagtai apu ayaak:

—¿Tujash jusha wají pegkegchauna takase? —tau.

Tutaishkam nuní senchi untsunkag:

—iAnka achinjati! —wajaidau.

<sup>24</sup>Tusag machikish itattsuk nuní senchi pampaidiagtai, Pilatok:

—Yumi utugtitajum, —tima itaamtai, ditá eemtin ikigmaju, nuniak:

—Wika ju aentsnumag shiig agkantaitjai, juka atumdauwai, —tiu.

<sup>25</sup>Nunitai ashí aents pampanjag:

—Jutiiní, tuja ashí ii uchijí aidaunum ju aents mantamnamuk juwakti, —taju.

<sup>26</sup>Tiagtai Barrabasan jiikiu, dutikak Jisusnak asutia achigtinme tusa sujukui.

**Suntag aidau Jisusan waitkasagbau**

(Mr. 15.16-20; Jn. 19.1-3)

<sup>27</sup>Dutikamtai apú suntaji aidau Jisusan jukiag apú pujusá inamtaijin ejegawagmatai, ashí suntag ijuntuajaju ni wajamunum. <sup>28</sup>Nunikag jaanchin awitkag tikich jaanch yamakaitkaun anugjaju. <sup>29</sup>Dutiksag atsejutain jagkin najatuawag atsemittakag, numin untsujin achimtikag, niina emtin tikishmatjag dushikinak:

—iJuuwai judío Apujig! —awajuidau.

<sup>30</sup>Imatjuinak usukidau, dutikainak numi atakuamujin jujukiajag buuknum awatuidau. <sup>31</sup>Dutikainak dushí dushikinakua jaanch yamakaitkaun anugjamunak awituk, ni nugkutaijinak anugjag juki emajui achijag maawagtatus.

**Jisus achigbau**

(Mr. 15.21-32; Lc. 23.26-43;

Jn. 19.16-24)

<sup>32</sup>Jinkamag yaakat Cirenemaya Simón daagtinun wainkag, Jisus achigtin numi yapajia achiamun yanaktí tusag, susajui.

<sup>33</sup>Nunikag Gólgota tutainum jegantajui. (“Gólgota” tawa duka, “buuk sakajua nunin” taku tawai.) <sup>34</sup>Nui ejentag, Jisusan vino chujaua dupa yapaujai pachimjamun uwagti tusag susajui. Nu susam apas dekapes idaisauwai.

<sup>35</sup>Jisusan achijagmatai, suntag aidau jaanchjin jukiag: Yana kayajig jinkit, nu jaanchnak jukiti tusag, wasugkamaidau. Nuní uminkauwai Apajuí etsegтин chichaak:

“Mina jaanchjunak akandaikag jukiaje, kayají jintukbau aidau” timawa nunú. <sup>36</sup>Nunikag pekaamsag dii

batsamtuidau. <sup>37</sup>Tuja wajuk asamtaiya achijaje nuna pachisag chaiken: “Juuwai Jisus, judío aidau apuji”, tusa agatug anujtukajui.

<sup>38</sup>Dutiksag jimag magkagtinun Jisusjai achijag, tikichia nuna untsugnum awajainak, tikichia nunak menajinini awajawajui. <sup>39</sup>Aents aidau duke ayaumas nagkaemainak, buukenak pegajag pegkegchau chichajuinak:

<sup>40</sup>—Ame: Jega Apajuí ememattaiya nunak yumpuan kampakumchik tsawantaik ataktú jegamainaitjai, tinum nunú dekas Apajuí Uchijiyaitkumek, aaní nematsuk akaikim uwemjakia —awajuidau.

<sup>41</sup>Dutiksag sacerdote apuji, chicham umiktinun jintinkagtin aidau, Fariseo aidau, nuigtú tikich apu aidaujai ijunag dushikinak:

<sup>42</sup>—Tikichnak yajau uwemtikchauwe nuninaitak nigka uwemtsui. Dekas Israel aidaun apujiyaitkug, akaiki wajanmatai dekaskeapi tumainajama. <sup>43</sup>Apajuin kajinas anentaimtime, ni wakegakug yamai ayamjukti, wagki: Wika Apajuí Uchijiyaitjai tinuwe nuna dekas wainak tuchauwaitkug, —wajaidau.

<sup>44</sup>Nunisag magkagtin achijam Jisusjai detaidaushkam pegkegchau chichajuidau.

#### **Jisus jakamu**

(*Mr. 15.33-41; Lc. 23.44-49;*

*Jn. 19.28-30)*

<sup>45</sup>Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai.

<sup>46</sup>Imanik abaunum Jisus senchi untsamak: “Elí, Elí, ¿lama sabactani?” tiu. (Nunak: “Mina Apajuijuh, mina Apajuijuh, ¿wagka minash idaitusume?” taku tiuwai.)

<sup>47</sup>Aents nui ijunaidauk nuna antukag:

—Eliasan untsuawai, —tuidau.

<sup>48</sup>Tusa taig, ijuna nuwiya makichik tupikaki esponja juki vino chujuaunum ajugká tagkanai aapi Jisusan uwagti tusa iwagkau. <sup>49</sup>Dutiktai tikich aidau chichainak:

—Idaisakia, Elías uwemtijatatus minishtimpash, wainkami, —tuidau.

<sup>50</sup>Tujash Jisusak ataktú senchi untsamak, jakauwai.

<sup>51</sup>Nunikmatai jega Apajuí ememattainum jaanch ejaamuk, yakiin nagkamnas ichiinak jimaituk kanakuí. Nugkashkam senchi ugkauwai, imaniau asamtai kaya aidaushkam punjauwai.

<sup>52</sup>Imanikmatai ukumatai aidau ujanijai, tuja Apajuí nemajin jinawaju aidau kuashat nantajajui. <sup>53</sup>Ditak ukusbaunmaya jinjajui Jisusá nantakiu ai, nunikag Jerusalén utsanawajui, nunikon kuashat aents wainkajui.

<sup>54</sup>Tuja capitán, tikich niijai ijunas Jisusan diyak ijunaidauk, ugbau imanikmatai, nuigtú kuashat ishamain nagkaemajun wainkag, senchi ishamkag chichainak:

—Dekaskenum juka Apajuí Uchijiyai, —tuidau.

<sup>55</sup>Nui nuwa aidaushkam ikaa ijunas dii ijuntuidau, Jisusan Galileanum nagkamsag saetusag yaijakú aina nunú.

<sup>56</sup>Nuanuí María Magdalanmaya, tikich María Jacobo dukují Josenashkam dukujiya nu, nuigtú Zebedeo nuwe aatus wajaidau.

#### **Jisus ukusbau**

(*Mr. 15.42-47; Lc. 23.50-56;*

*Jn. 19.38-42)*

<sup>57</sup>Kintamai Arimateanmaya José daagtin wiyakuch, niishkam Jisusa jintintaiji asa tauwai. <sup>58</sup>Nunik Pilatun wejí, Jisusa iyashin segauwai. Tama Pilatushakam:

—Jisusa iyashí susatajum, —tiuwai.

<sup>59</sup>José Jisusa iyashin juki, sávana

yamagmai pempeag, <sup>60</sup>ni ukumasmig tusa kaya muun yamá tai umikbaunum egkea, kaya muuntan akagketuk waajin epeti ukuak weuwai. <sup>61</sup>Tuja María Magdalanmaya tikich María aatus, Jisus ukusbaunum jegantag eketaidau.

**Jisus ukusbaun kuitamkatnume  
tusa ishitkamu**

<sup>62</sup>Ayamtai tsawaju asamtai sacerdote apuji aidau, fariseo aidaujai Pilato jeen jegajuawag:

<sup>63</sup>—Apuh, adeaggi wait aaya nunú, iwaaku pujus chichaak: ‘Wika jakanush kumpatumchik tsawantak nantaktinaitjai’, tuuyi. <sup>64</sup>Nuniau asamtai, awemata aents ukusbauwa nuna kumpatum tsawantai kuitamkatin, dutikashmak niina jintintaiji aidau kashi kautuawag iyashin jukiag, aents aidau ujainak: ‘Jakabia duka nantakne’, tiagtatui. Nuna dita aatus tuinakug yama nagkamchaku waitjuamun nagkaesau waitjuawagtatui, —tuidau.

<sup>65</sup>Tusa tiagtai Pilato ayaak:

—Anuwai suntag kuitamain aidauk, atum wejum wajuk wakegagme dutiksagmek umiktajum, —tau.

<sup>66</sup>Timatai wegag Jisus ukusbau kaya aputukbaunak shiig asakug, nui suntag kuitamkatin aidanashkam batsatkiajui.

**Jisus nantakbau**

*(Mr. 16.1-8; Lc. 24.1-12; Jn. 20.1-10)*

**28** <sup>1</sup>Tsawan ayamtai nagkaemaki tumig tsawagmatai, María Magdalanmaya, tikich Maríajai Jisus ukusbaun diisagtasag wegaju. <sup>2</sup>Nuniamunum Apaju aentsji nayaimpinmaya akaetai senchi ugkauwai, nunik Jisus ukusbau kaya aputuka ukukbaunak ekek nui ni ekeemsauwai. <sup>3</sup>Nuna niimeg peemjai

betek, jaanchjish puju nieve<sup>w</sup> tutaya iman aajakuí. <sup>4</sup>Imanun wainkag Jisus ukusbaun suntag kuitamak batsatuk ishamkag jaka kakekajui. <sup>5</sup>Nunikaju ai, Apaju aentsji nayaimpinmaya nuwa aidau chichajak:

—Ishamkaigpajum, wika dekajai atum Jisusan achijag maawagma nunú egajum nunak. <sup>6</sup>Tujash juwig atsawai, nigka nantakne ni timaya nunsag. Juwi tantajum Apú ukusagma nunú diistajum. <sup>7</sup>Nunikjum waamak wejum: Jakama duka nantakne, tusajum niina jintintaiji aidau ujaktajum. Nigka ditak wenatsaig, niyá eemak Galilea wetatui, awi wainkagtatui. Juna atumin tita tajime, —tiuwai.

<sup>8</sup>Nu tima nuwa aidauhkam Jisus ukusbaunum jegantajuk ukuinak, ishamainayatak shiig aneasag nunú chichaman Jisusa jintintai aidau ujakagtatus tupikaidau. Nunikag eke Jisusa jintintaiji aidau ujaktagtus weenai, <sup>9</sup>Jisus wantintuk kumpamak: “iAtumkaitjum!” tau. Tama nuwa aidauhkam, Jisusan jegantag dawenum pagkukag emematuidau. <sup>10</sup>Dutikam ni chichajak:

—Ishamkaigpajum, wejum mina yatsug aidau ujaktajum Galilea minitnume, awi minak waitkagtatui, —tiuwai.

**Jisus nantakbaun etseggainum tusa  
suntag aidau kuichik akikbau**

<sup>11</sup>Nunikag nuwa aidauk weenai, ujumak suntag nuna kuitamaidau yaaktanum wegag, sacerdote apuji aidau dita wainkamunak ashí ujakaju. <sup>12</sup>Tusá ujakam wegag apu aidaujai ijunjag chichaman shiig umikaju. Nunikag kuashat kuichkin suntajan susaju. <sup>13</sup>Dutikainak:

—Atumek aajajum etsegkatajum:  
 ‘Jutii kajigká batsatjin ni jintintai aidau  
 kashi kautuawag Jisusa iyashinak  
 jukiagmae titajum.’<sup>14</sup>Tuja apu  
 dekaamtaishkam jutii tiagatji, dutikaku  
 atumek ayamjuktatjime, —tiaju.

<sup>15</sup>Tiajam ditashkam kuichkin jukiag,  
 dita titajum tusa akatjamunak imatiksag  
 tuidau. Jujú tibauiwa nunak  
 yamaikishkam judío aidauk dutiksag  
 tinu ainawai.

**Jisus ni jintintaiji aidau akatjamu**

*(Mr. 16.14-18; Lc. 24.36-49;*

*Jn. 20.19-23)*

<sup>16</sup>Tuja Jisusa jintintaiji once aina  
 duka Galilea wegajui, Jisus nunú  
 mujanum minitnume tibaunum.

<sup>17</sup>Nunikag Jisusan wainkag  
 emematuidau, tujash dita utujimushkam  
 asaju. <sup>18</sup>Nuniagtai Jisus ditan jegantun  
 chichajak:

—Minak, mina Apag: ‘Ashí  
 nayaimpinmaya aidau, ashí  
 nugkanmaya aidaush ame diistá’ tusa  
 idaitugsae, <sup>19</sup>nuniau asamtai wetajum  
 ashí nugkanum, nunikjum tikich  
 aidaush jintintuatajum, dutikakjum  
 mina Apajú daajin, mina pachittsajum,  
 Wakaní Pegkeji pachisjumshakam  
 yamigtajum, <sup>20</sup>dutikakjum ashí ju  
 umiktajum, atumin tiuwaitjim  
 dushakam jintintuatajum. Wika ashí  
 tsawantai, nugka nagkanbau atina  
 duwish atumjaig tuke pujutnaitjai.

Aatus atí.

# YAMAJAM CHICHAM MARCOS AGAGBAU

---

## **Juan Yamijatin uwegshunum chichagagtukbau**

*(Mt. 3.1-12; Lc. 3.1-20; Jn. 1.19-28)*

**1** <sup>1</sup>Jisukristu Apajuí uchijiya nu yamajam chicham etsegbauk juní nagkamnauwai. <sup>2</sup>Nuna pachis Apajuí etsegtin Isafas agak:

“Wi mina chichamjun etsegnun emtikan awemajai,  
ni jintanak umigtamkati tusan.

<sup>3</sup>Makichik aents eemak taa uwegshunum wekagas senchi jiiká chichaak:

‘Apu wekaesatnun jintan shiig iwajug, esegak tutupit dakuegajama numamtuk, atumi anentaimish shiig iwajajum umiktajum, Apu minitin asamtai’, titinai” tawa duka juuwai.

<sup>4</sup>Ju aatsa tibau asamtai Juagshakam uwegshunum aentsun yamiau, nuniak etseju, tudau takatan idayinak yamimag tsagkugnagtinme tusa. <sup>5</sup>Nuna antukag ashí yaakat Judea nugkanmaya aidauk, ashí Jerusalegnumia aidaushkam kautuidau. Nunikag ditá tudaujin etsegtumagtai Juagshakam Jordagnum yamiau.

<sup>6</sup>Juagkak camello uje najanamun nugkujakuí, akachumtaijish duwap aajakuí, manchin dapá yumijijai yuujakuí.

<sup>7</sup>Juan aents aidaun chichajak: “Mina ukujui minittawai dekas mina nagkaetasu senchigtin. Wika nuna sapatjinakesh pujugsanuk ukuitmaitsujai niya imanchau asan. <sup>8</sup>Wika ayatak yumiik yamijame,

tujash nigka Wakaní Pegkejiya duwi yamimagtatjume”, tau.

## **Jisus yamimagbau**

*(Mt. 3.13-17; Lc. 3.21-22)*

<sup>9</sup>Nunú tsawantai yaakat Nazaret Galilea nugkanum awa nuwiya Jisus jiinki, Juan pujamunum jegauwai, nunikmatai namak Jordagnum yamijuí. <sup>10</sup>Dutika yamijam jinkamá Jisus wainkauwai nayaim ujangtatman, nuniamunum Wakaní Pegkeji pauma nunin niina mamikis akagunashkam. <sup>11</sup>Nuniai nayaimpinmaya chicham antuekau: “Ametme dekas mina uchig aneetaigmek, duwi aminig shiig anejai” tabau.

## **Iwanch Jisusan pegkegchau takamtiksata tibau**

*(Mt. 4.1-11; Lc. 4.1-13)*

<sup>12</sup>Juna timatai Wakaní Pegkeji egkemtu uwegshunum emauwai. <sup>13</sup>Nui Jisus cuarenta tsawan pujuttaman iwanch tsanujá pegkegchau takamtiksata tiuwai, nuigtushkam kuntin kajen aidau batsatbaunum Jisusak pujau. Dutikamtai Apajuí aentsji nayaimpinmaya kautuawajui kuitamkagatus.

## **Jisus Galileanum ni takatji nagkamamu**

*(Mt. 4.12-17; Lc. 4.14-15)*

<sup>14</sup>Juagkan achikag egkeawaju ai, Jisus Galilea yamajam chicham Apajuí inabaujin pachis etse etsegekawa

weuwai. <sup>15</sup>Nuniak: “Apajuí aentsnum inamjatta duka tsawantak namput wajaschae. Tudaujum idaisatajum nuniakjum yamajam chichama ju dekaskeapi titajum”, tiuwai.

**Jisus ni jintintaiji atinun cuatro namaká main aidaun yajuakbau**  
(Mt. 4.18-22; Lc. 5.1-11)

<sup>16</sup>Jisus Galilea kuchají yantamen wekaekamá Simogkan, ni yachi Andresjai namakan main asag retan ajuntuinak yujattaman wainkau,

<sup>17</sup>nunik:

—Wegajai wi jintintuatjime, namak maatasajum yujagjum anmamtuk, Apajuí chichame etsegkujum aents aidaun minai ikautjin atajum tusan, —tau.

<sup>18</sup>Tusa tamawaik wamkes ditá retjinak ukuinak niijai wegajui.

<sup>19</sup>Nuwi nagkaemaki imachik kuwaesag wekamá, Zebedeo uchijí Jacobo ni yachi Juagjai, botejin chimpimas retjin apijuinak chimpimatman wainkauwai. <sup>20</sup>Dutika nunashkam:

—Wegajai, mina jintintaig atajum, —tiu. Tama ditashkam apají Zebedeonak, ditajai takau aidaunak botenum ukuinak Jisusjai wegajui.

**Aents wakan pegkegchau egkemtugbaun Jisus etsagagbau**  
(Lc. 4.31-37)

<sup>21</sup>Nunikag yaakat Capernaumnum jegawaju. Nunik tsawan ayamtai tsawagmatai Jisus jega ijuntainum wayaa jintinkagtau. <sup>22</sup>Nigka jintinkagtauuwai aents chichame antugtai aidaun nagkaesau, chicham umiktin aidaun jintinkagtin aidaujaishkam betekchaun. <sup>23</sup>Nuniamunum nunú jega ijuntaiya nui, makíchik aents wakan pegkegchau egkemtuumu eketu senchi untsamak:

<sup>24</sup>—iJisus Nazaretnumiyah! ¿Wagka amesh jutii pujamunmash miname, ijijatuatasamek minam? Wika dekagme amek dekas pegkegmaitme, Apajuinmaya midau asam, —tiuwai.

<sup>25</sup>Tama Jisus wakan pegkegchaun ayaak:

—iTakamtak itatkata, jinkim wegakum aanú aentsuk ukuktá! —tiu.

<sup>26</sup>Tusa tamawaik aentsun waugmitkak nugká ajiajui, dutika shiig senchi untsamak jinki wegak ukukiuwai.

<sup>27</sup>Nunikmatai wainkag puyatkaju.

Nunikag ditak pempeentunikiag:

—¿Jusha yaita? ¿Jintiamujish yamagmajama, wajuku asaya chichamesh senchigtinaita wakan pegkegchaunash chichamenig jiyá dusha? —tudayinau.

<sup>28</sup>Nunú nunikbaunak ashí Galileanmaya aidauk dekaawajui.

**Pedro tsatsají Jisus etsagagbau**  
(Mt. 8.14-15; Lc. 4.38-39)

<sup>29</sup>Nunik jega ijuntainmaya jinki Jacobo, Juan aatus, Simón Pedro, yachi Andresjai pujutain wegajui. <sup>30</sup>Simón Pedro tsatsajig tsuweak pegajin tepau, nuniau asantai Jisusan:

—Tsuweak tepawai, —tusag ujakaju.

<sup>31</sup>Tama Jisuschakam jegantun uwegnum achik inankiu, dutikamuik tsuweamunak megkaekau. Nunik nantakí yujumkan inajuk, Jisusan ajamsau niijai yujau aidaunashkam.

**Kuashat jau aidaun etsagakbau**  
(Mt. 8.16-17; Lc. 4.40-41)

<sup>32</sup>Etsa akaiki kiyaju ai, kuashat aents jau aidaun, wakan pegkegchau aidaun egkemtuumu aidaunashkam Jisusan ikautkaju. <sup>33</sup>Tuja aents aidaun nui batsatushkam ashí waitinmag tuwakaju. <sup>34</sup>Nunikagmatai Jisus kuashat aents tikich jatai jau aidaun etsagakui, wakan

pegkegchau aidaunashkam imatiksag aentsnumian jijjuí. Wakan pegkegchau aidauk Jisusnak shiig wainu, dutikamu asa chichaktí tusag idaichau.

**Jisus Galileanum  
chichagkagtukbau**

(Mt. 4.23-25; Lc. 4.42-44)

<sup>35</sup>Nunik tsawak eke suwe aig nantakí, yaaktan ukukí atushat aents atsamunum weu Apajin ausatatus. <sup>36</sup>Nunikmatai Simón ni kumpají aidaujai egaak wegajui; <sup>37</sup>nunik Jisusan wainkag;

—Ashí aents egapainawai, —tuidau.

<sup>38</sup>Tusa tama ni chichaak:

—Wemí yaakat tikiju anem aina nui, awishkam chichaman etsegkatjai, —tau.

<sup>39</sup>Nunik Jisusak ashí Galileanum makí makichik yaaktanum jega ijuntai aidaunum wayaa chichagkagtú wekagu, nuniak wakan pegkegchau aidaunashkam jijjí ishimu.

**Aents jata lepra achikbau  
Jisus etsagagbau**

(Mt. 8.1-4; Lc. 5.12-16)

<sup>40</sup>Imaní wekagai aents jata lepra tutai achikbau Jisusan jegantun tikishmatug pujujus:

—Wakegakmek etsaentumainaitme, —tau.

<sup>41</sup>Tama Jisuschakam wait anentug uwejen antiak:

—Wakegajai, yamaik tsagagta, —tiuwai.

<sup>42</sup>Tusa chichaká ashimaig leprak megkaekauwai, nunik ashí iyashinig pegkeg wajasuí. <sup>43</sup>Nunikmatai Jisus shiig akateg ukuak:

<sup>44</sup>—Makichik aentskesh ujakaipa, tutupit sacerdote pujamunum jegaata, nuniakum ame tsagaja pegkeg webaujum iwainmamkum, Moisés tibauwa dutiksamak jukim ejegata, ditash waipakag dekaskeap tsagaje tujabiagtinme, —tiuwai.

<sup>45</sup>Tusa tibauwaitak, wegak ni tsagagbaujin pachis ashí aents aidaun ujá ujakua weuwai. Nuna imatika etsejau asamtai, Jisusak wantinak yaaktanmash waimainchau wajasú asa, uwegshunum wekagu. Nuniaig kuashat aents aidau niina wainkagtatus minituidau.

**Jisus aents wekaechau etsagagbau**

(Mt. 9.1-8; Lc. 5.17-26)

**2**<sup>1</sup>Nuna dutika wajumchik tsawan pujus Jisus wakitki Capernaum jegauwai; nunikmatai ni pujamujin dekajuawaju. <sup>2</sup>Nunikag kuashat aents aidauk jeganmag pimuidiaju, waitinum nagkamnasag tikichish wayachmin awajsaju. Imanikagmatai niishkam Apajuí chichamen etseju. <sup>3</sup>Nuniai cuatro aents aidau, aents wekaechaun jukiag itawaju. <sup>4</sup>Dutikawag aents piyaku asamtai, Jisus wajamunum jegamainchau asag, Jisus wajamunum mamikis jegá tuntupen wakag chigkaidiag, wekaechauwa nuna tepetaijin aepsag akakiaju. <sup>5</sup>Dutikamtai Jisus niini kajinas anentaimaidaun wainu asa, wekaechaun chichajak: —Uchijuh, amina tudaujum aidauk tsagkugnaje, —tau.

<sup>6</sup>Nuna tutai chicham umiktinun jintinkagtin aidau nui pekajaidau ditak anentaimsag: <sup>7</sup>“¿Wagka jusha tuush chichawa? ¡Apajuin pegkegchau chichajak tu wekagajama! Imá Apajuikeajama tudau tsagkugkagtumainuk”, tuidau. <sup>8</sup>Dita aatus anentaimainamujinak Jisus dekau asa:

—¿Wagka aannush anentaimainagme? <sup>9</sup>¿Tuwaita imá yupichuch wekaechauwa ju tumainush, amina tudaujum aidauk tsagkugnaje taja dukaih, atsa nantakim tepetaijum jukim wetá tumainaitag dukaih?



<sup>10</sup>Tujash wi Apajuí Uchijiyaitkun Aentsmaga Akiinaw asan, ju nugka juwish tudau aidaunash tsagkugkagtumainaitag nu dekaatajum.

Tusa wekaechaun chichajak:

<sup>11</sup>—Amina tajame, nantakim ainká tepetaijum jukim jeemin wakitkita, —tiuwai.

<sup>12</sup>Tama nantakug ainká tepetaijin juki ashí wainainamunum jinkiu.

Nunikmatai puyatjukag Apajuin emematuinak:

—Juna jutikauk duwikish tuke wainkachuitji, —tuidau.

**Jisus Levin mina  
jintintaig atá tibaw**

(Mt. 9.9-13; Lc. 5.27-32)

<sup>13</sup>Nuna dutika ukuak ataktú weuwai kuchá tugkitken. Nuishkam aentsuk imatiksag tuwajuidau, dutikam niishkam jintinkagtau. <sup>14</sup>Nui nagkaemakmá Leví<sup>a</sup> Alfeo uchijin wainkauwai, kuichik apunu atinun akikmagtai yajumak ekeematman. Nunik:

—Wegajai, mina jintintaig aminum, —tiuwai.

Tama Levishkam wajakí Jisusjai weuwai.

<sup>15</sup>Nunik nunú tsawantaik Jisus Leví jeen jegaa mesanum jegantá ekeemsau. Nuwig apú kuichkiji atinun yajumin aidaushkam Jisusa jintintaiji aidaujui ijunag nunú mesanmag jegantag ekeemsajui, kuashat niina saetus yujaidau asag. <sup>16</sup>Nunittaman chicham umiktinun jintinkagtin aidaun, fariseo aidaujui, wainkag Jisusa jintintaiji aidaun chichajuinak:

—¿Wajuk asaya atumin jintinjamnush apú kuichkiji atinun yajumin nuigtú aents pegkegchau aina ibaujaish ijuntug

yuwakush, umutnash ijuntusash umawa? —tuidau.

<sup>17</sup>Nu tabaun Jisus antuk ayaak:

—Aents jamamtuchu aidaun ampijatnunak atsumtsame, aents jau aidaun ampijatnunak atsumame. Wika aents tudaugtuchu aidaunak minitchauwaitjai, wika aents tudaugtin aidaun minitiuwaitjai.

**Ijagmaka pujusá Apajuí  
aujut iniimsamu**

(Mt. 9.14-17; Lc. 5.33-39)

<sup>18</sup>Juagká jintintaiji aidaun, fariseo aidaushkam yujumkan ijagmakag Apajuin aujuinak batsataidaun, nuninai wajumak Jisusan jegantun iniinak:

—¿Wagka Juan Yamijatna nuna jintintaiji aidaun, fariseo aidaujui yujumkan ijagmainaish, ame jintintaijum aidaush ijagmainatsua? —tuidau.

<sup>19</sup>Tama Jisus ayaak:

—¿Nuwena nunú aents ipaamu aidaush, nu nuwenu ditajai pujaigkish yujumkan ijagmak pekamainkai? Nuwenu ditajai pujaigkik yujumkanak ijagmamait sui. <sup>20</sup>Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak yujumkanak ijagmakagtatui.

**Jisus jintinkagtak yamajam  
jintinkagtamua duka yaunchuk  
jintinkagtutai aina nujaig  
pachiimait sui tibaw**

(Mt. 9.16-17)

<sup>21</sup>Tusa ti junashkam tiuwai: “Makichik aentskesh jaanch yamagman tsupikag jaanch mamujunmag adujtuchu ainawai, yamajam asa jaanch mamujun nuní nagkaemas ichiimain

asamtai. <sup>22</sup>Tuja makichkish uva yumiji yamá ijugbaunak, vino yajatai duwap apagbau ajutnumag yajachu ainawai, dutikamak vino yamajam asa, kajiak pushutak ipati ukagag duwapjai ajapnamain asamtai. Duwi uva yumiji yamá ijugbauk duwap yamajam apagbaunum yajataiyai.”

**Jisusa jintintaiji aidau tsawan ayamtai aig trigo juki yuwawagbau**  
(Mt. 12.1-8; Lc. 6.1-5)

<sup>23</sup>Tsawan ayamtai tsawaju ai, Jisus ni jintintaiji aidaujai trigo ajakbaunum nagkaebau. Nuniamunum niina jintintaiji aidau trigon kupig juidau.

<sup>24</sup>Nuniagtai fariseo aidau wainkag:  
—Nijah čwagka amina jintintaijum aidaush, tsawan ayamtai tsawagmataig takantsashti tibauwa nunin aish aikainawa? —tuidau.

<sup>25</sup>Tusa tiagtai Jisus ayaak:  
—čAtumek agagbauk ausachuk ainajum, David niijai yujaamujai yapajuinak, <sup>26</sup>Abiatar sumo sacerdote wajas pujai, jega Apajuí ememattainum wayaa, pag imá sacerdotek yuwati tibauwa nuna juki yuwak aents niijai yujaunash ayugkauwa duka?

<sup>27</sup>Tsawan ayamtaiya duka aents pimpiak ayamjatnume tusa aikamui. Aentsuk tsawan ayamtai tsawautai nuna umigkatin atinme tichamui. <sup>28</sup>Nuniau asamtai, wika Apajuí Uchijiyaitkun Aentsmagan Akiinaw asan, tsawan ayamtai tsawagmataish wajukmainaita nunak wikitjai tumainnuk, —tiuwai.

**Tsawan ayamtai tsawaju aig aents uweje chuwijun Jisus etsyagagbau**  
(Mt. 12.9-14; Lc. 6.6-11)

**3** <sup>1</sup>Jisus ataktú jega ijuntainum wayau, nuanuí aents uwejen chuwijú pujau. <sup>2</sup>Nuniau asamtai tsawan ayamtaiya junin aish etsyagachatpash

etsyagagmataig etsegtuka bakumí tusag dii ijuntuidau. <sup>3</sup>Nuninaig Jisus aents uwejen chuwijun chichajak:

—Wajakim ejapeen wajantá,  
—tiuwai.

<sup>4</sup>Nuna ti, tikich aidaun chichajak:  
—čTsawan ayamtai aina nuwish pegkeja duka takamainait, atsa pegkegchauk dutikmainait, tsawan ayamtai tsawaje tusaik, aentsuk etsyagautsuk jakati tusa idaimainait? —tau.

Tamash ditak aimainachu. <sup>5</sup>Nuna ti kajeká diisú, aents aidau dekaskeapi tuinachu asagmatai. Nunik jaun chichajak:

—Uwejum dakuekta, —tiuwai.

Tama niishkam uwejen dakueku, nuniamuik uwejenig pegkeg wajasuí. <sup>6</sup>Jisus nuna dutikamtai fariseo aidau, Herodesan aentsji aidaujai agaa jijnjag, Jisusan maatasag chichaman umikajui.

**Kuashat jau aidau Jisus etsyagakbau**  
(Mt. 4.24-25; 12.15-51; Lc. 6.17-19)

<sup>7</sup>Tujash Jisusak ni jintintaiji aidaujai kuchanum wegajui, nuniai kuashat aents Galileanmaya aidau, Judeanmaya aidaushkam, <sup>8</sup>Jerusalegnumiashkam, Idumianmaya aidaush, Jordagka amain batsamin aidaushkam, nuigtú Tiro, Sidón aina nuwi tikiju batsamin aidaush minitajui, Jisus kuashat iwainaka takaamun antukaju asag wainkagtatus. <sup>9</sup>Imanidau asamtai Jisus ni jintintaiji aidau:

—Bote shiig umisjum inanastajum, aents kuashat kaunainak chanuntuawainum, —tiuwai. <sup>10</sup>Jisus kuashat jaun etsyagaku asamtai, aents jau aidauk niina antigkagtatus tuwajuidau.

<sup>11</sup>Tuja wakan pegkegchau aentsú egkentuju aidauk Jisusan wainkag, nuna aentsun tikishmitkajag, senchi jiiká:

—Amek Apajuí Uchijiyaitme,  
—tuidau.

<sup>12</sup>Tujash Jisusak senchi jiyau,  
dekajuawainum tau asa.

**Jisus chicham etsegtukatajum tusa  
ishiaktinji doce etegjamu aidau**  
(Mt. 10.1-4; Lc. 6.12-16)

<sup>13</sup>Nuna dutika Jisus niina nemajus  
yujaina nuna yajuak mujanum  
wakauwai. <sup>14</sup>Dutika nuanuiyan doce  
tuke niijai ijunja wekaesatin aidaun,  
nuigtushkam niina chichamen etsegkati  
tusa ishiaktinji aidaunash etegjauwai.  
<sup>15</sup>Dutikak jau aidau etsagagtinun,  
nuigtú wakan pegkegchau egkemtugbau  
aidau jiiktinnashkam senchijin  
susauwai. <sup>16</sup>Nunú aidauk ju ainawai:  
Simón, Jisus Pedro atatme timawa nu,  
<sup>17</sup>Jacobo ni yachi Juagjai, Zebedeo  
uchijí aidaun Jisus Boanerges adaikajua  
nu (nunak ipamta uchijí aidau tusa  
tawai). <sup>18</sup>Andrés, Felipe, Bartolomé,  
Mateo, Tomás, Jacobo Alfeo uchijí,  
tikich Simón niina nugken  
agkanmitkatatus kuashat aents aidaujai  
chichajakua nu. <sup>19</sup>Judas Iscariote  
Jisusan sujukua nunú. Dutika adaijam  
jegá kaunawajui.

**Iwanch Beelzebú daagtinun  
senchijin Jisusak wakan  
pegkegchaunak jiyawai tibau**  
(Mt. 12.22-30; Lc. 11.14-23; 12.10)

<sup>20</sup>Nunikmatai ataktushkam aents aidau  
tuwagkag yujumkash yumain  
awajuinachu. <sup>21</sup>Nuna antukag Jisusa  
patayí aidau jukitasag kautuawaju,  
anentainkachu wajas wekaetsuash tusag.

<sup>22</sup>Nuigtushkam chicham umiktinun  
jintinkagtin aidau Jerusalegnunia  
kaunawaju, Jisusan chichajuinak: “Juka  
Beelzebú, wakan pegkegchau aidau  
apujiya nuna senchijin wakan  
pegkegchaunak jiyawai”, tuidau.

<sup>23</sup>Tiagtai Jisus nuna antuk, ditan  
untsukag augmatbaun pachitus  
chichajak: “¿Wajukaya mai iwanchkesh  
jiinimainaita? <sup>24</sup>Makichik nugkanmag  
batsatiatak pempeentunikiag maaní  
batsatkujug megkaemain ainawai.  
<sup>25</sup>Tuja tikitchakam aents makichik  
jeganmag ijunag batsatiatak  
pempeentunikiag maaní batsatkushkam  
ditak megkaemain ainawai. <sup>26</sup>Aantsag  
iwanchia dushakam pempeentuniki  
jiniakug, niina senchijinak  
megkaemainai.

<sup>27</sup>“Aents senchigtina nuna jeen  
wayaag makichkish wajijjinak  
yajutmainchau ainawai nuna jigkatskek,  
untsu nuna jigkajá ashí wajijjinak  
yajutmain ainawai.

**Wakaní Pegkeji pachisa tibau**  
(Mt. 12.31-37)

<sup>28</sup>“Dekas tajime: Apajuik ashí aentsun  
tudaujinak tsagkugmainai, niina ashí  
pegkegchau pachis chichagkau  
aidaunashkam. <sup>29</sup>Tujash Wakaní  
Pegkejiya nuna pachis pegkegchaun  
chichagkau aidauk, atakea duwish tuke  
tsagkujam achagtinai, nuniau asag nuna  
tiajuk suwimak ajumaish tuke atina  
nuna jukiagtinai.”

<sup>30</sup>Nunak Jisusak Wakaní Pegkejiya  
nujai takaunak, iwanchin senchijiya  
nujai takaawai tabau asa tiuwai.

**Jisusa dukují ni yachi  
aidaujai kautuamu**  
(Mt. 12.46-50; Lc. 8.19-21)

<sup>31</sup>Nuna tusa inagnaku ai Jisusa yachi  
aidau dukujijai kautuawaju, nunikag  
agaag ijuntsag anuí ujatjuktajum tiajui.  
<sup>32</sup>Tuinam Jisusan tenteawag pekajuidau  
ujainak:

—Amina duku yatsum aidaujai  
kautjamak egapainawai, —tuidau.

<sup>33</sup>Tusá ujaam ni chichaak:

—¿Yaita mina dukug, mina yatsug aidaush?

<sup>34</sup>Nuna tusa nui pekajuidaun ayampatua:

—Jujú ainawai mina dukug, mina yatsug aidauk. <sup>35</sup>Ashí aents Apajuí wakejamun takaina nuuwai mina dukug, mina yatsug, mina ubag aidauk, —tiuwai.

**Ajakan ajakbau pachisa augmatbau**  
(Mt. 13.1-9; Lc. 8.4-8)

**4** <sup>1</sup>Nuwiya jiinki Jisus kuchanum jegamtai kuashat aents tuwagkajam, botenum egkemag ataktú jintinkagtau, aents aidauk kaamatak ijuntsamtai. <sup>2</sup>Nunik augmatbaun pachis kuashat jintinkagtak:

<sup>3</sup>“Ju shiig antuktajum: Ajakan ajakbau ajajin ajaka jigkayin nagkimak ukutatus weuwai, dutik ajakmau asa. <sup>4</sup>Nunik jegantá ajajin jigkai nagkimam jintá kakekaunak yakiya pishak kaketuk amukúf. <sup>5</sup>Tikich jigkai kayagnunum nugka imanik atsamunum kakekauwai, nunikuk wamkes tsapaidiajui, <sup>6</sup>nunikatman etsa jiinak, kagkapé initak akaejachu asamtai apeká ijinauwai. <sup>7</sup>Tuja tikich jigkai kakekajui jagki ayaunum, nunik tsapaittaman jagki yutuauwai, dutikamu asa ajakak nejeachui. <sup>8</sup>Tujash tikich jigkai nugka dekas pegkegnum kakekauwai, nunikajuk tsapaidiag muun wajas, makí makichik ajak aidauk treinta, tikich sesenta, tikich cien aatus nejekajui”, tau. <sup>9</sup>Nuna ti nuigtushkam: “Dita antutaiji ajamuk antuktinme”, tiuwai.

**Jisusa jintintaiji aidau iniimsamu**  
(Mt. 13.10-17; Lc. 8.9-10)

<sup>10</sup>Nuna jintinkagtua ashimkamtai, tikichik shimuinai ujumak juwakaju aidau ni jintintaiji aidaujai jegantag, augmatta jintinkagtuamun pachisag

iniidau. <sup>11</sup>Tama Jisus ditan chichajak: “Atumnak Apajuí ni aentsnum inamjatnuji dekadangchamun wi pachisan etsejag junash dekamtijamatatus wakejutpagme. Tujash tikich aidauk dekamain ainatsui, nuna takumpap tawa tusajag, nuaduú augmatbaun pachisan ditanak tajai. <sup>12</sup>Kuashat iwainajan takaamun wainainakush wainmachu wajukmaina nuninawai, antuinakushkam nunap tawa tusajag dekainatsui, nunidau asagmatai Apajuik ditá tudaujinak tsagkugmainchauwai.”

**Ajakan ajakbau timag nunak juna takun timajai tusa Jisus etseggamu**  
(Mt. 13.18-23; Lc. 8.11-15)

<sup>13</sup>Junashkam tiuwai: “¿Atumek jujú augmatta tabauk dekatsjumek? ¿Aniautigmesh wajuk dekattajume, wi tikichin augmattsan takuish? <sup>14</sup>Ajakan ajakbau timag nunak: Apajuí chichamen etsegnun takun timajai. <sup>15</sup>Jintá jigkai kakekaun pishak amukú timag nunak: Aents Apajuí chichamen etsegbaun antakush dekaskeapi tachau asamtai, iwanch chicham antukbaujin sakapitka nuna takun timajai. <sup>16</sup>Ajakan jigkayí kayagnunum kakekaju timag nunak: Aents Apajuí chichame etsegbaun yamaikik shiig aneas antukuitak <sup>17</sup>utugchatan igkuak waitiak, pachitsuk idayidauk; ajakan kagkapé initak akaejachu asa, etsa sukuam waamak jinuwama numamtuk wajaina nuna takun timajai. <sup>18</sup>Jigkai jagki ayaunum iyaa ju timag nunashkam: Aents Apajuí chichamen antuinayatak, <sup>19</sup>ju nugkaya wajiin imá senchi puyatjuinak, wiakchameatasag imá senchi aentaimituina nuna takun timajai. Ashí ju nugkanmaya wájí wakegamua nunú chicham pegkeg antukbaunak imanchau emawai. <sup>20</sup>Untsu jigkai nugka pegkegnum shiig tsapaidiaju asag nejetnash imanik nejeawajui timag nunak: Aents Apajuí

chichamen shiig dekaskeapi tusag, imá Apajuí wakejamunak takaina nuna takun timajai. Nunú aents aidauk, ajak treinta jigkain, sesenta, cien aatus nejekú aina numamtin ainawai.”

**Lámpara pachisa augmattsamu**  
(Lc. 8.16-18)

<sup>21</sup>Junashkam chichaak: “¿Lámpara ekemakaish, dukukaik dutikachkuish pegaká wakentinig aputayama? ¿Dutiktsuk yaki ekenchataigkama?”  
<sup>22</sup>Anmamtuk ashí uuksbau aidaush wantinkagtinaí, aantsag ashí dekachbau aidaushkam dekaamu agtinaí. <sup>23</sup>Dita antutaiji ajuinamuk antuktinme.”

<sup>24</sup>Junashkam tiuwai: “Atum antajum nunú shiig antukjum umitaik, Apajuishkam aan kuashat dekamtjamattawai. <sup>25</sup>Nuniaú asamtai ni mina chichamjun dekaskeapi tusa shiig puyatjus antaunak aan nagkaemasan jintintuattajai, tuja ni mina chichamjun puyatjus antachuk machik antamujish kajimitkam atinaí.”

**Jigkai tsapaamu pachisa**  
**jintinkagtuamu**

<sup>26</sup>Junashkam Jisus tiuwai: “Apajuí aentsnum inama duka, aents ajaka jigkayin ajauwa nujai betekmamtainai. <sup>27</sup>Nunik ajaa kanak tepaish tuja iwaa pujaishkam kashi tsawai aish jigkaik tsapaawai, nunik tsakawai ajauwa duka wajak tsakaawa nunak dekatsaig. <sup>28</sup>Nunak nugka nigki tsapapamu asa nuniawai, dekatkauk dupaya nunin tsapai tsakajá pasamjawai, nunik nejek ayatak jigkaik wegawai. <sup>29</sup>Nunik tsamakmatai hozan juki jiantawai juuktatus, tsawan juumain jegau asamtai.”

**Mostaza jigkayí pachisa**  
**jintinkagtuamu**  
(Mt. 13.31-32; Lc. 13.18-19)

<sup>30</sup>Junashkam Jisus tiuwai: “Apajuí aentsnum inama dusha ¿wajijai

apatkaya imá shiijash antumainaita? ¿Wají augmatbauwa yaijatmainaita Apajuik juní inamui tusa shiig dekamaina dusha? <sup>31</sup>Juka mostazan jigkayí nugká ajatiama numamtinke. Ashí nugkanmaya jigkai aina nuwiya imá piipichik mostazan jigkayiya nuuwai. <sup>32</sup>Nuninchitkushkam nugká ajaam tsakaakug kadaukdaugkin wegawai. Iman wajasmatai yakiya pishak aidaushkam nuna wakentí bikintunum pasugmainawai. Numamtuk Apajuishkam aents wajumkea nui inabaujin nagkama kuashat emawai.”  
<sup>33</sup>Kuashat augmatbaun pachis jumamtin aidaun jintinkagtujakuí dita yupichu antumainun. <sup>34</sup>Augmatbaun tutsukek jintinkagtujakchauwai, untsu niina jintintaiji aidaunak ashí nuna takun tajai tusa dekamtikajakuí.

**Jisus dase imijkamu**  
(Mt. 8. 23-27; Lc. 8.22-25)

<sup>35</sup>Nunú tsawantai kiyagbaunum niina jintintaiji aidaun chichajak:

—Amain wegagmi, —tiuwai.

<sup>36</sup>Tusa aents aidaunak akateg ukuinak Jisus botenum egketunak dutiksag jukiag wegajui. Nuniai tikich botenum minidaush aidau. <sup>37</sup>Nunik weenai dase shiig senchi kuchan umpuak tsukatmitkau, imaniau asa botenmag yumik yajanu. <sup>38</sup>Imatiktai Jisus bote ukujin atamjutain atamjuk kanak tepettaman ishintainak:

—iJintinkagtinuh! ¿Amek jutii jakektatag duka pachijattsumek? —tuidau.

<sup>39</sup>Tama nantakí dasen jiyak idayak, nayantsanashkam:

—iMijakta! —tiuwai.

Tamawaik kuchashkam mijak miyasuch yaunchuk aajakbauk nunisag we patamsauwai. <sup>40</sup>Nuna dutika niina jintintaiji aidaun chichajak:

—¿Wagka sapigmajume? ¿Wagka Apajuyiaish kajintsajum anentaimtsugme? —tau.

<sup>41</sup>Nuna dutikamtai senchi puyatkag sapigmakaju, nunikag ditak pempeentunikiag:

—¿Jusha ya asamtaiya dasesh, kuchash antujuinawa? —tadayinawa.

**Gadaranmaya aents wakan pegkegchau egkentuamu**  
(Mt. 8.26-39; Lc. 8.26-39)

**5** <sup>1</sup>Nunik Galilea kuchajin amain Gadaranmaya batsamtai nugkeen katigkaju. <sup>2</sup>Nuwi anumak botenmaya jinai, ukumatainmaya aents wakan pegkegchau egkemtugbau Jisusan tajuauwai. <sup>3</sup>Nunú aentsuk ukumatainum pujú, jiju ikagmawai jigkajaish emetuatakamá tujinkamu. <sup>4</sup>Jiju ikagmawai uwejen jigkajá, dawenum jigkajá awajkamash tsujiag utsau, imaniau asa emetmainchau wájá wekagu. <sup>5</sup>Nuniak kashi tsawaishkam mujanum, ukumatainmash wekagas untsumá wekagu, nuigtush kayá jukishkam ijobau. <sup>6</sup>Imaní wekagu asa, Jisusan atushat wainmawaik tupikatki jegantun tikishmatug pujujus, <sup>7</sup>senchi untsumak:

—iJisusah, Apajuí nayaimpinum pujuwa nuna uchijiyah! ¿Wagka amesh minaish miname? Apajuí pachisan segajame, iwait aneasam suwimkak sukagtusaipa!

<sup>8</sup>Nunak Jisus:

—Wakan pegkegchauwah, aents jinkim ukuktá, —tibau asa tiuwai.

<sup>9</sup>Tutai Jisus iniak:

—¿Amesh yaitpa? —tau.

Tama ni aiimak:

—Wika Untsujiyaitjai, wagki jutiik kuashat asaja, —tiuwai.

<sup>10</sup>Nuna ti Jisusan segainak: “Wait aneasam yajá tikich nugkanmag awekagtipa, jutii pujag juwig idaikagtusta”, tiajui. <sup>11</sup>Nuanuf mujanum jegantatak kuashat kuchi yutaijin

yuwinak ijunu asamtai, <sup>12</sup>wakan pegkegchau Jisusan segainak:

—Wait aneasam awi ishijatkata, au kuchi ijuna awi utsanawagmi, —tuidau.

<sup>13</sup>Tiagtai Jisuschakam:

—Wamkesjum wetajum, —tima wakan pegkegchau aidau aentsnak ukuinak, dos mil kuchi tumain ijununum utsanawajui. Dutikawajam kuchishkam pisajag betsag tajagak kuchanum najataunum utsanawag jinawajui.

<sup>14</sup>Nunikagmatai kuchí kuitamin aidaushkam pisajag yaaktanum jegawag etsejuinak, ajanum batsataidaunash dutiksag ujakaju. Dutikawajam, wagkag ankae tusag diisagtatus shimutkaju. <sup>15</sup>Nunik Jisus pujamunum jegakmag, wakan pegkegchau shiig kuashat chimpimtumam waitkam wekayin pegkeg wajas, jaanchin nugkujá Jisusai ayaumas eketun wainkag, senchi ishankajui. <sup>16</sup>Nuna wainkau aidau tikich aidaunashkam ujaidau, aents wakan pegkegchau chimpimtuamu tsagajun, kuchi jinaamun pachisashkam. <sup>17</sup>Nunikag Jisusan:

—Wait aneasam ju ii nugkega juwig pujutsuk yajá weta, —tusag segajui.

<sup>18</sup>Tusá tima Jisus wegak botenum egkemtai, wakan pegkegchau egkentuamu etsagagbaushkam:

—Wisha amijai wekaesatjai, —tusa segauwai. <sup>19</sup>Tujash Jisusak ayú tutsuk:

—Dekas jeemin wetá pataim batsatbaunum, nunikam shiig kuashat Apajuí amina wajuk wait anenjamjæ nunú pachisam ujaktá, —tiu.

<sup>20</sup>Tima wegak Decápolis jegaa, Jisus niina kuashat wait anenja nuna pachis etseju. Nunitai ashí puyatjukag diidau.

**Jairo nawanji tikich nuwa jaujai etsagagbau**  
(Mt. 9.18-26; Lc. 8.40-56)

<sup>21</sup>Jisus botenum egkemag kuchá amain katigmatai, kuashat aents aidau tuwagkaju; dutikam nigka nuwig kuchá

tugkitkenig juwakui. <sup>22</sup>Nui pujai jega ijuntaiya nuna apuji Jairo daagtin Jisusan wainak, jegantun tikishmatug pujus:

<sup>23</sup>—Mina jegajuí wemí, mina nawantug ashí mayai ashinak tepaun ukukjai. Wait aneasam ame minim uwegmin antinjukta, dutikam nawanjush tsagag pujugtusti, —tusa segau.

<sup>24</sup>Tama Jisus niijai wegau, nunitai kuashat aents saetuidau asag Jisusan chanuidau. <sup>25</sup>Nu imatikainamunum nuwa doce mijadai numpan puwak waitú pujú, <sup>26</sup>nuniak kuashat ampijatín aidaunum wekagas ampimak ashí ni ajamuchijinak ashimkush, tsagautsuk nuní nagkaemas waitú wekayin, <sup>27</sup>Jisus pachisa augmatuinamun antuk, aents tuwakbaunum eteenki ukujin pataetuk Jisus jaanch pataká nugkuagbaujin antinkauwai. <sup>28</sup>Nigka: “Imá Jisusa jaanchjinakesh antignek tsagagtatjapi”, tau asa. <sup>29</sup>Nunik antiamuik numpa puwamujinak megkaekauwai, nunisag ashí niina iyashinish pegkeg wegamun dekapjauwai. <sup>30</sup>Nunitai Jisus niina senchijí jiinun dekapmamag, aents minidaun ayampatua:

—¿Ya mina nugkutaijuish antinkae?

<sup>31</sup>Tutai niina jintintaiji aidau:

—Kuashat aents tuwakaju asag chanumpaina nu wainiatkumek, ¿ya antinkae tusamesh tame?

<sup>32</sup>Nu tamashkam Jisusak ashí diyau, yaki antinkame tusa wainkatatus.

<sup>33</sup>Nunitai nuwa Jisusa jaanchjin antig tsagajak, senchi puyatuk kujaukmaikia Jisusan jegantun, tikishmatug pujus dekaskenum ashí ni waitiamujinak ujakú. <sup>34</sup>Tusá ujaam:

—Nawantah, ame kajintsá anentaimam duwí tsagajume, shiig agkan anentaimsam wetá. Yamaik agkan wajasume, —tiuwai.

<sup>35</sup>Eke chichaak wajai, apu Jairo jeen batsatu kaunawag jegantun ujainak:

—Nawanjumek jakame ¿itugkatasamea jintinkagtinush waitkame? —tuídau.

<sup>36</sup>Nu tuinamun Jisus antuk, jega ijuntain apujiya nuna pempeentuki:

—Puyatkaipa, ayatak kajintsam anentaimsata, —tiuwai.

<sup>37</sup>Nuna tusa aents aidaunak, minigpajum tusa ukuak Pedron, Jacobon ni yachi Juagjai yajuak weuwai. <sup>38</sup>Nunik apú jeen jegakmá kuashat aents pampainak, buutuinak wake besemag batsatun wainkauwai.

<sup>39</sup>Nuniai Jisus wayaak:

—¿Wagka pampakjumesb buutush batsatjume? nuwauchik jakache kanag tepawai, —tiuwai.

<sup>40</sup>Tutai dushikidau. Tujash nigka nuna ti, ashí aents nui batsatunak jiijá, nuwauchi apají, dukují, nuigtú ni jintintaiji kampakum aidaujui utsanauwai nuwauch jaka tepamunum.

<sup>41</sup>Nunik uwegnum achik:

—¡Talita cumi! —tiuwai. (Nunak: “Nuwauchih, amina tajame nantaktá”, taku tiuwai.)

<sup>42</sup>Tusa tamawaik nuwauch doce mijan ajamu jakaushkam nantakí wekagu.

Nuna dutikantai aents aidauk puyatjuk díi ijuntuidau. <sup>43</sup>Nuniagtai Jisus:

—Tikichkesh ujakaigpajum —tusa idayak:

—Yutái susatajum yuwati, —tiuwai.

#### **Jisus Nazaret pujusbau**

(Mt. 13.53-58; Lc. 4.16-30)

**6** <sup>1</sup>Jisus nuwiya jinki ni nugken Nazaret wetai, niina jintintai aidaushkam niijai wegajui. <sup>2</sup>Nunik tsawan ayamtai tsawagmatai Jisus jega ijuntainum wayaa jintinkagtau. Nunitai antukag puyatjukag:

—¿Jusha tuwí imatikash unuimajuita? ¿Itusaya imatikash dekawa wainchatai

aidaunash iwainag taká junash? <sup>3</sup>¿Ju María uchijí carpinterowe duchaukaih? iJu Santiago, José, Judas, Simón aina nuna yachiyajama! —tuidau —iNuigtush umayí aidaush jutijai batsatajama! —tusag pampantuidau,

Jisusaig kajinas anentaimainachu asag. <sup>4</sup>Nuniagtai Jisus:

—Apajuí etsegtin niina nugken pujusá etsegtai, niina patayí aidaush, niina jeeniagkesh eme anentus antugchau ainawai, tujash tikich nugkanum wekagas etsegtai shiig aneas antujin ainawai, —tiuwai.

<sup>5</sup>Nuna tau asa nuwig dita wainkachbaujinak iwainajag takaschauwai, nuniayatak ujumchik jau aidaun uwejen buuknum achik etsagakui. <sup>6</sup>Ditak dekaskeapi tuinachu asamtai puyatjuk anentai jegagchauwai. Nunik tikiju yaakat ayaunum wekagas jintinkagtau.

**Jisus ni jintintaiji aidaun  
chichagkagtuktinme tusa ishiakbau**  
(Mt. 10.5-15; Lc. 9.1-6)

<sup>7</sup>Nunik ni jintintaiji doce aina nuna untsuk ijumag, jimá jimajan apatak ishimak, wakan pegkegchau aidau jiiimainnash senchijin susauwai.

<sup>8</sup>Dutika:

—Jintá wegaku atsumainuk ayatak ushujutaigmek jukitajum. Makichkish jukigpajum jintá wegaku atsumainuk, waji egkesá jutaigkesh, yuwatnukesh, kuichkikesh jukigpa. <sup>9</sup>Ayatak sapatik wegamaktajum, nuniakjumesch yachia nugkugtinuk jukigpajum, <sup>10</sup>—tusa, nuigtú ditan chichajak:

—Atum tu jeganma wayattagme, nunikjumek nuwig pujusjum wegakjum ukuktajum. <sup>11</sup>Untsu atum tu yaaktanma jegattagme nuniagmin nuwiya aents aidau ditá jeen jujamtan dakitjamainak, atum chicham etsegbaun antutnash

dakituinakuig, nunú yaaktak ukuakjum atumi dawemin nugka awa nu pegagjum akakekjum ukuktajum, dita suwimak jukitnuji iwaintakjum. Dekas tajime: Atak Apajuí aents suwimak suwamu atina nuaduí Sodoma, Gomorranmaya aents aidaujai suwimak susamua nuna nagkagas suwimkan jukiagtin ainawai, —tiuwai.

<sup>12</sup>Tima jintintaiji aidau shiyakag, aents aidau: Tudaujum idaikujum Apajuí nemagkatajum, tuidau.

<sup>13</sup>Nuninak wakan pegkegchau aentsun egkemtujú aidaunash jii jag ishimainak, jau aidaunashkam buuken aceitiyai nijak etsagaidau.

**Herodes Jisusan dekas yakita tusa  
deka juatatus wakejukbau**  
(Mt. 14.1-12; Lc. 9.7-9)

<sup>14</sup>Apu Herodes Jisus pachisa augmatuinamun antuku, Jisusa daajig ashí yantamnum wantinjau asamtai nuna antuk: “Duka Juan Yamijatin maamua nu nantakiu asa, senchigtin wajas imaniawai”, tau.

<sup>15</sup>Tutai tikich chichaidau: “Auk Eliasai” tuinai, tikich chichaidau: “Apajuí etsegtinai nuniachkush Apajuí etsegtin aajakú aina dutsukaitai”, tuidau.

<sup>16</sup>Nunú tuinamun Herodes antuk:

—Auk Juan wi buuké tsupigkatajum tima tsupijuk maawajamia nunú nantakne, —tiuwai.

<sup>17</sup>Nunak Herodesak nigki Juan achiktajum tima shimuktak, achikag jiju ikagmauwai jigkajag aents achiká egketainum egkeau aajakuí, ni yachi Felipe nuwen Herodiasan nuwatuk pujutai, <sup>18</sup>Juan chichajak: “Herodesah, amek yatsumi nuweg nuwatkamek pujumaitsume”, <sup>19</sup>tabaun Herodías antuk kajejuk maatatus wakegayatak dutikmainchau dekapeau. <sup>20</sup>Wagki



Herodesak ishamau, Juagkak aents pegkeg tudaunash takachun dekau asa. Iman asamtai ayatak kuitamu, nuniau asa tamash puyatayatak wakejus antau.

<sup>21</sup>Nuniamunum Herodes ni akiinamuji tsawagmatai jistamak, yutai umikbaun ni aentsji aidaujai nuigtú comandante, apu Galileanmaya aidaujai ijunag yuwinak pekagbaunum, <sup>22</sup>Herodiasa nawanji wayaa nantsebau, nuniak Herodesan nuigtú niijai mesanum pekajuidaunashkam shiig awajkauwai. Nunikmatai apu nuwan chichajak:

—Ame wakegamu segattá, tujutkuminig amastajai, —ti, nuigtú:  
<sup>23</sup>—Wi taja nunak dekas dutikattajai, wi inamag jukesh jimaituk segatkuminish dekas amamain asan tajame, —tiuwai.

<sup>24</sup>Tima jiinki dukujin jegajua:  
—¿Wajinak tujuta nunash segatja?  
—tau.

Tama dukují ayaak:  
—Juan Yamijatna nuna buuké segatá,  
—tau.

<sup>25</sup>Tima nuwauchishkam wamkes wakettsag apu pujamunum wayau, nunik:

—Yamaikiuch Juan Yamijatnun buuken, platunum egkejá sujustí tusan wakegajai, —tau.

<sup>26</sup>Tama Herodes shiig senchi wake besekú, nuniayatak ditajai pekajaidaush antuinamunum, dekas amastatjame tiu asa yapajimainchau dekapjau. <sup>27</sup>Nuniku asa apushkam makichik suntajan awemauwai, Juagká buuké tsupikam utitá, tusa. <sup>28</sup>Tima suntajishkam aents achiká egketainum jegá Juagká buuken tsupigkau, dutika platunum egkea itan nuwauchin susau, dutikam ni juki dukujin susauwai.

<sup>29</sup>Nu dutikamun Juagká jintintaiji dekawag kautuk, iyashin jukiag ukusajui.

**Cinco mil aentsun Jisus ayugkamu**  
(Mt. 14.13-21; Lc. 9.10-17; Jn. 6.1-15)

<sup>30</sup>Jisus chicham etsegtugkatajum tusa ishiakbau waketug kaunkag, Jisusan:

—Nuní takasmaji, aaja jintinkagtuamji, tusag —ujaidau.

<sup>31</sup>Tama ni ayaak:

—Wegagmi, agkan aents atsamunum nunika machik ayamsagmi, —tiuwai.

Nunak tikich waketiagtaish, tikich minii wajaidau asagmatai, yujumak yumainush agkan atsugbau asa, tiuwai.

<sup>32</sup>Nunik botenum chimpimjag ditak shiyakajui nugka agkantunum.

<sup>33</sup>Tujash nunik wetatman kuashat aents aidau wainkag, kukag juwakiag we weenakua, ditá Jisus anumkatnunum jegawaju. <sup>34</sup>Jisus botenmaya jinkamá shiig kuashat aents tuwaká ijunun wainkau, nunik wait anenmain diisuí, uwig kuitamainji atsugbau wajukmaina numamtuk wajaidau asagmatai. Dutikak shiig kuashat jintintu. <sup>35</sup>Nuniai etsashkam akagu asamtai, niina jintintaiji aidau:

—Juwig jutiik aents atsamunum batsatji, etsash akaewai. <sup>36</sup>Aentsuk ishiakta, yaaktanum jegattak aents batsata nui aja tikiju aina nui wegag dita yuwatnujin sumaktinme, dita yumainuk atsawai, —tuidau.

<sup>37</sup>Tiagtai ni ayaak:  
—Atum dita yuwatnuk susatajum,  
—tiuwai.

Tama dita aiinak:  
—¿Jutii shiyakaiyash doscientos tsawan takasá kuichik jumaina ibauwaiyash pag sumaka ayugkatag? —tuidau.

<sup>38</sup>Tiagtai ni ayaak:  
—¿Wajupa pag ajutjamainawa? wejum diistajum.

Tima wegag:  
—Cinco pag nuigtú jimagchik namak amae, —tuidau.

<sup>39</sup>Tusa ujakam:

—Aents aidau yajuakjum chijichi aina anuí shiig akanjajum batsagtajum, —tusa ishiakui.

<sup>40</sup>Tiajam ditashkam cien aentsun ijumag batsainai, tikich cincuenta ijumush aidau. <sup>41</sup>Dutikawagmatai cinco pagkan nuigtú jimagchik namaka nuna juki, nayaimpinum pagkai see tusa, pagkan puujá jintintaiji aidaun susaju, dita aentsun tinamkatnume tusa. Dutiksag namak jimaja nunashkam ashí tinamkau. <sup>42</sup>Dutikawajam ashí shiig yuwawag ejemakaju. <sup>43</sup>Nunikagmatai pag mamayakjai ampinkaunak yajuakag doce chagkinnum aimjaju. <sup>44</sup>Junak cinco mil aishmag aidau yuwawajui.

**Jisus yumí awanken  
wekaesá webau**

(Mt. 14.22-33; Jn. 6.16-21)

<sup>45</sup>Nuna yuwawag nagkanaig niina jintintaiji aidaunak:

—Atumek botenum chimpimjajum amain Betsaida katigtajum.

Tusa ishimak aents aidaun aujus ishiaktatus juwakui. <sup>46</sup>Nunik aentsun aujus ukuak mujanum wakauwai Apajin ausatatus. <sup>47</sup>Nuniai kiyaju, boteschkam kuchanum ejapean wegai nigki kukag juwaku. <sup>48</sup>Nunikmá wainkau dase igku umpuamu asa, wiya wiyantuinakua pimpikiag tsawampaidau. Nuniamunum niishkam yuminum wekagas ayaumas nagkaikaitatus ditan adjikau. <sup>49</sup>Nunik yumí awanken wekagas minittaman wainkag, dita anentaimsajag pasun minatsuash tusag senchi untsumaidau, <sup>50</sup>ashí wainaidau asag ishamainak. Imatiagtai Jisus chichaak:

—iWitjai ishamjukaigpajum!  
—tiuwai.

<sup>51</sup>Tusa botenum egkemjamtai daseschkam mijaku; nunikmatai senchi

puyatkag anentai jegagchaju. <sup>52</sup>Nunak Jisus namak puujá ikaugka ajamamunash shiig anentaimjag dekaachaju asag, utujimas anentaimaidau.

**Genesarenumia jau  
aidau Jisus etsagakbau**  
(Mt. 14.34-36)

<sup>53</sup>Nunia nuniakua kuchá amain katigkag Genesaret nugkanum kaamatak anumkaju. <sup>54</sup>Nunik jiinainaiag Jisusnak aents aidauk wainkaju.

<sup>55</sup>Nunikag ashí yaaktanmayan shimutkag jau aidaunak pegakjin pataidiag Jisus nui pujawai tabaun antuinakug nui emaidau. <sup>56</sup>Dutikaidau asag aents yaakat batsamin aidau, yaaktan ukukiag batsamin, ajajin batsamin aidaushkam, jaun yajuakag jintanum batsaidau, dutikam: Idaikagtusta ame pataká nugkuajam nuna nagkattsamujigkesh antigkagmi, tusag segaidau. Tuja ashí aents Jisusa jaanchjin antidaik tsagainau.

**Aentsun pegkegchau ema nunú  
pachisa Jisus etsegkamu**  
(Mt. 5.1-20)

**7** <sup>1</sup>Fariseo aidau, chicham umiktinun jintinkagtin Jerusalegunumia kaunawaju aidaujai, Jisusan jegaantajui. <sup>2</sup>Nunikag Jisusa jintintaiji aidau ikigmatsuk yutatman wainak, anmainchaun aaninawai tusag chichaman patatuidau. <sup>3</sup>Fariseo aidauk, ashí judío aidaushkam ditá muunji aidau: Ikigmatskek yuchatai atí, tibau asamtai, tuidau. <sup>4</sup>Ditak, yutai sujutainum wejum taakjumesh ikigmatskek yuwawaigpajum tibau aajakajui. Nuigtushkam kuashtai dita umijakbau aidauk; shikiká umutai, yajaa ekentai, yujumak inagku takatai jiju aidaushkam, nuigtú pegakshakam

tuke nijasjumké atajum tibau asamtai.

<sup>5</sup>Fariseo nuigtú chicham umiktinun jintinkagtin aidaujai Jisusan jegaantag:

—¿Wagka amina jintintajum aidaush, iina muunji umiktajum tusa tibauwa nuna umitskesh ikigmatskesh yuwinawa?

<sup>6</sup>Tama ni ayaak:

—Aentsú tsanú aidauwah, Apajuin etsegtin Isaías atumin pachis agak:

‘Ju aents aina juka, minak dekas ditá anentain eme anenjuinak adaituinatsui, ayatak wenin adaituinawai.

<sup>7</sup>Nuniau asag, mina pachittsag auna emematjai tujutuinawai;

jintinkagtuinakush, aents umiktajum tibauwa nuna jintinkagtuinak Apajuinu jintinkagtaji’, tuinawai.

<sup>8</sup>—Atumek dekas Apajuí chicham umiktajum tibaujiya duka umigtsuk, aents tibauwa nu umiajume. Umutai yajá ekentai, vaso nijakjum nuigtushkam tikich kuashat jumamtin aidau taká yujajume.

<sup>9</sup>Nuigtushkam Apajuí chicham umiktajum tujabauwa duka imanchauch emakjum, atum chicham najanamua nu umiagme.

<sup>10</sup>Nuniakjum Moisés chichaak: ‘Atumin apa dukujai eme anentsá diitajum, dutikakjum yaigtajum; untsu ni apajin, dukujinakesh pegkegchaun chichajuk tsagkugtsuk maatajum’, tibauwai.

<sup>11</sup>Tibau aig atum chichaakjum: ‘Aentsuk ni apajinak, ni dukujinakesh: Mina wají ajutaina juka corbagkai, nuniau asamtai yaimaitsujame tumainai’ tajume.

(Corbán tawa duka: “Apajuí anentag anagkuamu”, taku tawai) <sup>12</sup>Atumek nuna aatus tauk apajinak, dukujinakesh yaimaitsui, tajume. <sup>13</sup>Ju aatsa tau asajum, Apajuí chicham umiktajum timawa duka imanchauch emajum idaikujum, atumi muunjum umiktajum

tibauwa duke wejakkjum tikich jumamtuk aina dushakam takaagme, —tiuwai.

<sup>14</sup>Juna ti aents aidauun untsuká chichaak:

—Wi taja ju shiig antugtuktajum:

<sup>15</sup>Aentsú wenin agaaya wayaa duka makichkish aentsnak pegkegchau emamainuk atsawai; untsu anentainmaya jiina nuuwai aentsun pegkegchau emauk.

<sup>16</sup>Ni antutaiji ajamuk antuktinme, —tiuwai.

<sup>17</sup>Nuna tusa aents aidauun ukuak jegá wayamtai, niina jintintaiji aidau nu augmatbaun pachisag iniidau. <sup>18</sup>Tama ni ayaak:

—¿Atumesh tikich shiig antuinatsu antsagmekek antuinatsjum? Ashí agaaya wayaa duka aentsnak pegkegchauk emamaitsui, <sup>19</sup>anentainum waitsuk, ampugnumag egkemag letrinanum ajapnau asa.

Junak ashí yutaig pegkeg ainawai tusa tiuwai. Nuigtushkam:

<sup>20</sup>—Aentsú anentain jiina nu aentsnak pegkegchau emawai. <sup>21</sup>Duka aentsú anentainia jiiinui pegkegchau anentaimat, pegkegchau takastasa wakegamu, magkagtamushkam, <sup>22</sup>sanijinbau, kasabau aidau, sujimamu, pegkegchau ata, tsanubau, nuwajai shiig senchi takanistasa wakegat, tikichdau diigsá kajejut, yumigmamu, ememamushkam, anentainkas takamat aina dushakam. <sup>23</sup>Ju ashí pegkegchau aina duka anentainmaya jiiinui, nuniau asa aentsnak pegkegchau emawai, —tiuwai.

**Tikich nugkanmaya nuwa Jisusan  
dekaskeapi tibau  
(Mt. 15.21-28)**

<sup>24</sup>Nuwiya jiiinki Tiro nugkanum, Sidón nugkanmashkam weuwai. Nunik makichik

aentskesh dekajuawainum tau asa jeganum wayau, tujash uumainchau dekapjau. <sup>25</sup>Nuniaí nuwa nawanji wakan pegkegchau egkemtugbau antuku nui pujawai tabaun, nunik tajuntun tikishmatjau. <sup>26</sup>Duka nuwak griega Sirofenicianmaya aajakuí, nunú segau:

—Nawantug wakan pegkegchau egkemtugbauwa nu jigtugkita, —tusa. <sup>27</sup>Tujash Jisus ayaak:

—Jasta, dekatkauk Israela uchijí aidauwá yuwatnume, pag uchi yuwamu atankí yawá suwamuk pegkegchawai.

<sup>28</sup>Tama nuwa ayaak:

—Ehé dekaske Apuh, tujash yawashkam mesa wapken pujusá uchi yujumak akakeamun yuwame, —tau.

<sup>29</sup>Tama ní ayaak:

—Nunú tame duwik wetá. wakan pegkegchawak nawanjumnak jiinki ukukne, —tau.

<sup>30</sup>Tima nuwashkam wakitki jeen jegakmá, nawanji wakan pegkegchau egkemtuumanak agkan wajas pegaknum teppetaman wainkauwai.

#### Aents chichachun Jisus etsagagbau

<sup>31</sup>Jisus Tiro nugkanum pujau jinki Sidón nagkaemak, Galilea kuchajin jegauwai. <sup>32</sup>Nunikmatai aents empekú dewaun itaantaju, dutikawag:

—Uwegmin achigtukta, —tusag segaidau.

<sup>33</sup>Tiagtai Jisus aents nuninun akanak juki, ni tsjam uwejen kuwishin inujauwai; dutika usukin juki nuna inayin antinkauwai. <sup>34</sup>Dutika wajan nayaimpinum pagkai mayatak: “Éfata”, tau. (Nunak “ujanta” taku tiuwai.)

<sup>35</sup>Tusa tamawaik aents antuchun kuwishig ujaniuwai, inayishkam pegkeg wajasuí, nunikmatai shiig chichakú. <sup>36</sup>Dutika:

—Makichik aentskesh ujakaigpajum, —tiuwai. Tusa tibau ainayatak nuní senchi etsegtuidau. <sup>37</sup>Imatjiagtai shiig puyatjusag: “Ashí dekas pegkejan takaawai,

empekunash antumtikawai, chichachunash chichamtikawai”, tuidau.

#### Jisus cuatro mil aents ayugkamu (Mt. 15.32-39)

**8** <sup>1</sup>Nunú tsawantinig kuashat aents tuwakaju asag, yumainji atsujuuidau asagmatai, Jisus ni jintintaiji aidau untsuká ijumag:

<sup>2</sup>—Ju aents aidau wait aentuinajai, juwi wijai kampatum tsawantai yujumkanash yutsuk batsatina duwi, <sup>3</sup>wi yujumkan ayugsuk ishiakmak, jeen jegatakamá pimpikiag jaka iyaumain ainawai, dita atushtanmaya kaunkajush aina duwi, —tau.

<sup>4</sup>Tutai niina jintintaiji aidau aiinak:

—¿Tuwiya jutiish aents atsamunum pujag juniautish jusha ajamsagtatji?

<sup>5</sup>Tiagtai ditan iniak:

—¿Wajupa pagka ajutjamainawa? Tama:

—Siete pag ajutjamui, —tuidau.

<sup>6</sup>Tiagtai:

—Aents nugkanum batsagtajum —tusa ishiaku.

Dutika ashí umikagmatai pagkan juki, Apajuin see tusa puujá ni jintintaiji aidau tinabiu, dita aentsú susatnume tusa. Dutikam ditashkam aentsun tinamkaju.

<sup>7</sup>Namakshakam ujumchik au asamtai, dutiksag Apajin aujus nunashkam tinamkagtatajam tusa tinabiu.

<sup>8</sup>Dutikawajam yuwawag shiig ejemakaju. Nunikagmatai pag mamayakjai ampinkaun siete chagkinnun aimjajui.

<sup>9</sup>Nuna yuwawajua duka cuatro mil aents tumain aajakajui. Imanun ayujuk akatek ishiaku.

#### Fariseo aidau wainchatai iwainkagtukta tusa Jisus segamú (Mt. 16.1-4; Lc. 12.54-56)

<sup>10</sup>Dutika ukukí, ni jintintaiji aidaujai botenum chimpimag Dalmanuta nugkanum weuwai. <sup>11</sup>Nui jegamtai

fariseo aidau kautuawag, Jisusjai kuashat tudayinau. Nuninak dekak Apajuí uchijimpashit tusag dekapsatatus:

—Nayaimpinmaya wainchatai iwainkagtukia, —tuidau. <sup>12</sup>Tusá segainam Jisus senchi mayati wajan chichaak:

—¿Wagka atum wegantutigmesh wainchatai iwainkagtukia tusagmesh tuké tajume? Dekas tajime: Atumnak makichik iwainamunakesh iwaintukchattajime.

<sup>13</sup>Tusa ukuak botenum egkemag, ataktú amain katigkuí.

**Fariseo jintinkagtutaijig lewaduraya numamtainai tibau**

(Mt. 16.5-12)

<sup>14</sup>Nui weenak pagkan kajimatkiag jukichaju asag yumainjig atsujuidau, nuninayatak makichik pagkan takus weedau. <sup>15</sup>Nuniku asagmatai Jisus:

—Nijah, fariseo aidau, nuigtú Herodesa lewaduraji aina nujai kuitamamkatajum, —tau.

<sup>16</sup>Tutai ditak pempeentunikiag: “Junak ii pag takukchajag duwi tujamji”, tuidau.

<sup>17</sup>Nu tuinamun Jisus dekajua:

—¿Wagka pag pachisjumesch jiyaniagme? ¿Atumek dekamainchau dekapeau asagmek utujimsajum anentaimjum? <sup>18</sup>¿Atumek jime ajutjamainaigkik, wainmachu wajukmaina numamtuk wajakjum, antayatkugmesh antuchu wajukmaina numamtuk wajajum? ¿Nuniau asagmek aneaksujum? <sup>19</sup>Wi jimagchik paagkai cinco mil aents ayugkamash ¿wajupa chagkina aimkamiugme ampinjau aidaush?

Tama dita aiinak:

—Doce, —tíaju.

<sup>20</sup>Tiagtai:

—Wi siete pagkan jukin cuatro mil aents ayugkamash ¿wajupa chagkina aimkamiugme ampinkau aidaush?

Tama dita aiinak:

—Siete aimjamiagi, —tuidau.

<sup>21</sup>Tutai ni ayaak:

—¿Dutikau ayatkugmek dekamainchau dekapeajum?

**Betsaidanmaya aents wainmachun Jisus etsagagbau**

<sup>22</sup>Nuna ti Betsaida jegauwai. Nunikmatai wainmachun itajjiag, antinjukta tusa segaidau. <sup>23</sup>Tama Jisuschakam wainmachun egkesá juki, yaaktauchin ukumtiki jiin usuktua, uwejen nuna jiin patatiu, dutika: —¿Machikish wainmatsmek? —tusa iniasu.

<sup>24</sup>Tama niimak:

—Aents aidaunak tuke numia nuninun wainjai; tujash weedaun, —tau.

<sup>25</sup>Tutai Jisus wainmachu jiin ataktú uwejen patatiu, dutikam shiig esetug niimi pegkeg wajasú, nunik atushtanmayanash shiig paan wainkau. <sup>26</sup>Nunikmatai ni jeen awebau, dutikak: —Yaaktanmak wayawaipa, makichik aentskesh ujakaipa, —tiu.

**Pedro Jisusan amek Kristuitme tibau**

(Mt. 16.13-20; Lc. 9.18-22)

<sup>27</sup>Jisus nuna dutika niina jintintaiji aidaujui yaakat Cesarea, Filipino tutaya nuanuí yaakta ukukú batsamin aidaunum wegajui. Nunik jintá wesa ni jintintaiji aidaun iniak:

—¿Aents aidaush minash yaayai tujutuinau? —tau.

<sup>28</sup>Tutai dita aiinak:

—Wajumak aents aidau: ‘Juan Yamijatin maamua nuuwai’ tujamainai, tikich chichaidau: ‘Auk Eliasai’

tujamainai, tikich tuidau: ‘Apajuí etsegtin aajakajua dutsukaitai’ tujamainawai, —tuidau.

<sup>29</sup>Tiagtai ni ayaak:

—¿Tujash atumesh, minash yaayai tujutjume? —tau.

Tutai Pedro ayaak:

—Amek Kristuitme, —tiu.

<sup>30</sup>—Tujash mina pachittsagmek makichik aentskesh ujakaigpajum, —tiuwai.

**Jisus ni maam atinji etsegekamu**

(Mt. 16.21-23; Lc. 9.22)

<sup>31</sup>Nuna ti nagkama jintintak:

“Wi Apajuí Uchijiyaitkun Aentsmaga Akiinauwaitag nunak senchi waitkagsagtatui, apu aidau, sacerdote apuji aidaush, chicham umiktinun jintinkagtin aidaushkam dakitjuinak mantuawagtatui. Dutijuawagmataish kampatum tsawan asan nantaktatjai”, tusa etsegekauwai. <sup>32</sup>Nuna tusa paan etsetgai, Pedro akanak juki kakaakan chichajak:

—¿Wagka amesh annush anentaime? —tiuwai.

<sup>33</sup>Tama ni jintintaiji aidaun ayampattsag diyak Pedron jiyaak:

—iWetá iwanchih, minai tantá wajatsuk! Amek dekatsme Apajuí dutikatjai tabaujiya duka, aentsú anentaimitaig anentaimam duwi, —tiuwai.

**Jisus mina nemagtukta tautigmek atum wakegamuk idaikujum nemagtuktajum tibau**

(Mt. 16.24-28; Lc. 9.23-27)

<sup>34</sup>Nunik ni jintintaiji aidaun, nuigtú tikich aents aidaujai untsuk ijumag chichajak:

—Mina nemagtuktasajum wakegautigmek, atum wakegamuk idaikujum nemagtuktajum, nuniakjum

senchi waitiakjumesh atsanjatajum.

<sup>35</sup>Ashí aents ju nugka juwi pujutan imá senchi wakegak, mina nemagtuk waittan dakitauk uwemjashtin ainawai. Untsu ashí aents mina nemagtuk pujus, nuigtú yamajam chichaman etsejak pujus jaina nu uwemjagtin ainawai.

<sup>36</sup>Aents ju nugka juwiya waji aidaun, ashí niinu emakush jaakug niina wakaninak tuké uwentikmaitsui.

<sup>37</sup>Aentsuk ni wakaní uwentijatasa akikmatmainjig atsawai. <sup>38</sup>Atum mina pachittsa chichat datsamakjum,

chichamjushkam datsantakjum aents mina dekaskeapi tujutchau aidau, Apajuí chichame umijuinatsu dushakam ujakchau aidautigminak, wi Apajuí Uchijiyaitkun Aentsmagan Akiinauwaitag nuna, mina Apajuí tsaaptinijai tsawan wajasan nayaimpinmaya aents pegkejam aidaujai minaknushkam: Juka midauchu ainawai, titinaitjime.

**9<sup>1</sup> Nuigtushkam:**

—Dekas tajime: Atum juwi ijunjum juwiyatijum wajumak aidautijum eke jatsuk iwaaku pujusjumek, Apajuí inamtaiji senchijijai minau wainkatnutigmesh ajume, —tiuwai.

**Jisus yapajinamu**

(Mt. 17.1-13; Lc. 9.28-36)

<sup>2</sup>Seis tsawan asa Jisus, Pedron, Jacobon, nuigtú Juagkan juki ditanak akanki muja yakí tsakajunum wegajui.

Nui ditash wainainaig Jisusa niimé yapajinawai. <sup>3</sup>Niina jaanchjig winchamtin shiig puju niewe tutaiya iman wajasuí, ju nugka juwiya aents jaanchin senchi nijakush imatika puju emamainchau aajakuí. <sup>4</sup>Nuniaig Moisés, Eliasjai Jisusan aujuidaun wainakajui.

<sup>5</sup>Nunik Pedro Jisusan chichajak:

—Jintinkagtinuh, jutiish maigkis juwig batsatagai, kampatum aak

aakmagmi. Makichik aminu, tikich Moisesdau, nuigtú Eliasdau, —tau.

<sup>6</sup>Nunak ni tabaujinakesh dekachiatak senchi ishankamunum, tiuwai. <sup>7</sup>Nuna taig yujagkim ijikú. Nuniaig yujagminmaya chichaak: “Juwai dekas mina uchig anetaijuk, nigki antugkujum umigkatajum”, tabaun antukajui. <sup>8</sup>Nuna timatai diikmá imá Jisusnak wainkajui.

<sup>9</sup>Nunik mujanmaya minisá:

—Atum wainkajum nu pachisjumeck makichik aentskesh ujakaigpajum, wi Apajuí Uchijiyaitkun Aentsmaga Akiinauwaitag nuna mantuawagmatai nantatsaigkik, —tiu. <sup>10</sup>Tusa tiajam pachitsuk idaisajui. Nuninayatak, jakau ayatkun nantaktinaitjai, tawa nunash wajukatnunik tawa tusag iniinidau.

<sup>11</sup>Nuninak:

—¿Wagka chicham umiktinun jintinkagtin aidaush, dekatkauk Eliasá taatnai tuinawa?

<sup>12</sup>Tiagtai Jisus ayaak:

—Eliasak niyá eemak taatnai nunik tikich takastinun umiktinai tibauwa duka dekaske. Tujash ¿wajintu agagbauwaita Apajuí Uchijiyaitak Aentsmaga Akiinatnun pachisash, senchi waittsatnai nuigtush dakitjamu atinai tatsuak? <sup>13</sup>Tujash wi tajime: Eliasak taabi, nunikmataish dita pegkegchau takaamujinak dutiksag inagkeatkiagmayi. Agagbaunum niina pachis tawa dutiksajag, —tiu.

**Wakan pegkegchau uchin egkentuamun Jisus etsagabau**  
(Mt. 17.14-21; Lc. 9.37-43)

<sup>14</sup>Nunik ni jintintaiji aidau batsatbaunum jegakmá wainkaju kuashat aents tuwajuk aun, tuja chicham umiktinun jintinkagtinchakam ditajai tudayinaun. <sup>15</sup>Nunidau Jisusan wainkag puyatuk tupikatkiag jegaantag kumpamawajui. <sup>16</sup>Nunikmatai ditan iniak:

—¿Wají pachisjumea ditajaish tudajume? —tau.

<sup>17</sup>Tutai aents tuwakbaunmaya makichik ayaak:

—Jintinkagtinuh, mina uchijun wakan pegkegchau egkemtua chichachu etugtimun amina itajuagme. <sup>18</sup>Juka wakan egkemtamak kujaak, saun kaput apak, nain takegtak, ichichkam patamnuwe. Imatijutin asamtai amina jintintaijum aidaun, jiigtugkitajum timajai, tujash tujinkagmae, —tau.

<sup>19</sup>Tutai Jisus ayaak:

—iAents dekaskeapi tuchau aidauwah! ¿Wajupá dukapea atumjai ijunjanush pujumainaitja? ¿wajupá dukapek dakastajime minak dekaskeapi tujuttinme tusanush?— Nuna ti: —iItantá! —tiuwai.

<sup>20</sup>Timatai uchin ejentuntaju. Dutiktai wakan nunú uchin egkentaushkam Jisusan wainak uchinak waugmitkaku, dutikam nugká iyaag tanagak saunak kaput apakú. <sup>21</sup>Imatiktai Jisus uchi apajin iniak:

—¿Wajupa tsawantaiya junash imatiká pujugnaita? —tau.

Tama:

—Uchuch aig nagkamauwai. <sup>22</sup>Dutikau asa jinumash jiyata tinuwe, namakash ajug maata tinuwe. Ame machikiuchikesh dutikmainaitkumek wait anenkagtujam juiish yayajkata, —tau.

<sup>23</sup>Tutai Jisus ayaak:

—Dutikmainaitkumek tiipa; aents dekaskeapi tauk ashí dutikmainai, —tiu.

<sup>24</sup>Nuna taig uchi apajishkam senchi untsumak:

—iDekaskeapi tajai! iWi dekaskeapi tumain dekapeachkuish yainkata! —tiu.

<sup>25</sup>Jisus kuashat aents tuwagtai wainak, wakan pegkegchaun jiyaak:

—Wakan chichachu empekuwah, wi tajame: iJiinkim ukuktá, ataktuk waketjukmek egkentuawaipa! —tiu.

<sup>26</sup>Tama wakanchakam senchi untsamak uchin kujamtikak waamak jiinkiuwai, nunikmatai uchik jaka iyaantu. Nunitai kuashat aents chichainak:

—Uchik jakae, —tuidau.

<sup>27</sup>Tujash Jisus uwegnum achiká inankiu, dutikam wajantú.

<sup>28</sup>Nuna dutika Jisus jegá wayamtai, ni jintintaiji aidau agkan niinak iniinak:

—¿Wagka jutiish jiiltakamaish tujinkamji? —tuidau.

<sup>29</sup>Tiagtai ni ayaak:

—Ju wakanía juka makichkish kakajus jiimait sui, Apajuí aujku yujumak ijagmaka pujachkuik, —tiu.

**Jisus awentsag ni  
mantamnatnuji etseggamu**  
(Mt. 17.22-23; Lc. 9.43-45)

<sup>30</sup>Nuwiya jiinki Galilea wegamun makichik aentskesh dekawainum tusa Jisus dakitau, <sup>31</sup>niina jintintaiji aidau jintintuata tau asa. Nunik jintintak tau:

—Apajuí Uchijiyaítak Aentsmaga Akiinauwa nunak, tikich aents aidanum sujukag idaisagtatui, dutikawagmatai maawagtatui. Tujash jakaashkam kumpatum tsawanta juwi nantaktatui, —tau.

<sup>32</sup>Tutaish ditak nuna takumpap tawa tusag dekamain dekapenachu. Nuninakush ajantuidau asag iniaschajui.

**Yaki dekas imá wagaakush  
atinaita tiagbau**  
(Mt. 18.1-5; Lc. 9.46-48)

<sup>33</sup>Nunikag yaakat Capernaum jegawajui, nui jegá wayaa batsatbaunum Jisus ni jintintaiji aidau: ¿Jintaa minisjumesch wají chichamjimugme? tau. <sup>34</sup>Tujash ditak chichainachu, jintaa minisag ditak pempeentunikiag, yaki imá wagaakush atinaita tudayaju asag. <sup>35</sup>Nuniagtai

ekeemas, ni jintintaiji doce aina nuna untsuká ikaunman: Ni eme anentai atatus wakegauk, tikichi takajin nuigtú imanchauch amainai. <sup>36</sup>Nuna ti uchin ejapeen awajus midaaki juki chichaak: <sup>37</sup>Aents mina nemagtuidau ju uchía jumamtin aina juna, shiig anentus juwidauk minashkam mina Apagnashkam aikasag juwinawai.

**Jutiin shiwagmatjamtsu duka  
jutiinu asa aniwai**  
(Mt. 10.42; Lc. 9.49-50)

<sup>38</sup>Tutai Juan:

—Jintinkagtinuh, aents wainkamji amina daagmin wakan pegkegchaun jiyau, tujash jutijai minitan dakitakuí amek aikawaipa timaji, —tau.

<sup>39</sup>Tutai Jisus ayaak:

—Amek aikawaipa tusagmek tiigpajum. Makichik aentskesh mina daajui wainchatain iwainayatkug, pempeentugsagke pegkegchaunak chichagtumait sui. <sup>40</sup>Jutiin shiwagmatjamtsu duka, jutiinu asa nuniawai. <sup>41</sup>Tuja makichik aentskesh atum mina nemagtin asagmin, yumín uwagta tusa amasú aidauk, dita wají shiig pegkeg jukitnuijig ajiagtinaí.

**Tikichin pegkegchau emaidau tibau**  
(Mt. 18.6-9; Lc. 17.1-2)

<sup>42</sup>“Mina dekaskeapi tusag nemagtuidau ju uchi piipichia jumamtin aidau makichikikesh pegkegchaun takamtikaidauk, dekas kaya muun dekeetai aina iman jukí kungtugnum jigká detuais nayants ajugká ajapmain ainatai. <sup>43</sup>Amina uwejum tudaun takamtjamkuig, tsupika ajapmaina numamtuk wajaktá tudau takat idaikum. Dekas pegkejai tudau idaisau asá, pujut tuke atina nui makichik uwegtin waimaina numamtuk wajamuk, jimá uwegtin asá suwimak juwaku jii



ajumaish kajinchau, <sup>44</sup>akash jinuchu aina nui ajapeam amaina nu. <sup>45</sup>Amina dawem tudaun takamtijamkuig, tsupika ajapmaina numamtuk wajaktá tudau takat idaikum. Dekas pegkejai tudau idaisau asá, pujut tuke atina nui shutusá waimaina numamtuk wajamuk, jimá dawentin asá suwimak juwaku jii ajumaish kajinchau, <sup>46</sup>akash jinuchu aina nui ajapeam amaina nu. <sup>47</sup>Amina jiiim tudaun takamtijamkuish, ukuinkam ajapmaina numamtuk wajaktá tudau idaikum. Dekas pegkejai tudau idaisau asam, Apajuí inamtaijin makichik jiiyaik niimsá waimainaitam numamtuk wajamuk, jimá jiintin asam, <sup>48</sup>akash jinuchu, jiish ajumaish kajinkashtina nui ajapeam amainaitam nu.

<sup>49</sup>“Ashí nunú aidauk weegai kachikbau kakajus kautsama numamtuk, dita takasbaujjai jiiinum batsatkush tuke jakachagtin ainawai. <sup>50</sup>Week<sup>b</sup> dekas pegkejai, tujash jea jeatuji megkagak sakam wajasmataish, cítugsaya ataktush jea jeatush emamainaita? Dekas atumin weega anmamtinun Apajuí pujutan amasbau ajutjamainai. Nunikmatai tikich aidaujaish shiig anendaisajum agkan batsamainaitjume.”

#### Nuwak idaimaitsui Jisus tibau

(Mt. 19.1-12; Lc. 16.18)

**10** <sup>1</sup>Jisus Capernaumnumia jiinki Judea nugkanum jegaa, Jordagka amain katigkú. Nunikmatai aents aidau tuwagkajam ataktú ni jintinkagtutaijinak dutiksag jintinkagtau. <sup>2</sup>Nuniai fariseo aidau pegkegchaunum dekapsatasag jegaantag iniasaju, nuwennush nuwennash idaimainashit tusag. <sup>3</sup>Tuinam Jisus ayaak:

—¿Moisesash atumnash wajukatajum tujabijaita?

<sup>4</sup>Tama dita ainak:

—Moisesak papi idaidaiku najantai umikjum nuwemek idaimainaitjume, tujabiuwai.

<sup>5</sup>Tiagtai Jisus chichaak:

—Juna dutikatajum Moisés tujabijaua nunak atum chicham umitnumash katsujam asagmin tujabijai. <sup>6</sup>Tujash yama nagkamchakug Apajuik aishmagkun nuwajai najanauwai.

<sup>7</sup>Dutikamu asag aishmag nuwenkug apajin, dukujin ukuak niina nuwejaig pujumainai, <sup>8</sup>nunikag makichik iyash wemainai. Nunin asag jimaja nuninchauwai makichikia numamtainai.

<sup>9</sup>Nunin asantai Apajuí nuweamua nunak makichik aentskesh idaimitkamain ainatsui.

<sup>10</sup>Tusa ukukmatai Jisusa jintintaiji aidau jegá jegawag, nuna pachis iniidau. <sup>11</sup>Tusá iniam:

—Makichik aentskesh nuwen idayas tikich nuwajai nuwenkug, jeteken ekajeak nunimainai, <sup>12</sup>nunisag nuwashkam aishin idayas tikich aentsnum nemakug, aishin ekajeak nunimainai, —tiuwai.

#### Jisus uchi ikautkamu

(Mt. 19.13-15; Lc. 18.15-17)

<sup>13</sup>Juna ashí tusa inagnai, uchi aidaun Jisus uwejen antinjukti tusag ikautkajui. Imatikagtai ni jintintaiji aidau, uchin ikaunmaina nuna jiyaidau.

<sup>14</sup>Dutikiagtatman Jisus wainak kajek chichajak:

—Tutsuk idaisatajum, uchi aidau minai kauntatnume utugkajum awagkigpajum. Jujú uchi anentaimaina jumamtin aidaunum Apajuik inamjata tawai. <sup>15</sup>Dekas tajime: Aents aidau uchi

mina anentaimjutuina imanis  
anentaimjutuinachuk Apajuí inamak  
amain ainatsui.

<sup>16</sup>Jisus nuna tusa makí makichik  
uchin midaaki juki, uwejen achiak:  
—Apajuí yaimpaktinme, —tiuwai.

**Datsauch wiyakuch**  
**Jisusjai chichasbau**  
(Mt. 19.16-26; Lc. 18.18-27)

<sup>17</sup>Nuna dutika Jisus jinki jintá  
wetatman makichik aishmag tupi  
tupikakua amainag tikishmatug pujus  
iniak:

—Jintinkagtin pegkejah, ¿wajina  
dutikmainaitja pujut tuke atina nuna  
jukitasanush? —tau.

<sup>18</sup>Tama Jisus ayaak:

—¿Wagka pegkejá tujutme? Makichikish  
pegkejek atsawai, imá makichik Apajuiya  
duke pegkejek. <sup>19</sup>Amek dekame chicham  
umiktin agagbaunum: ‘Tsanijinawaipa,  
magkagtuawaipa, kasamkaipa, wainkamek  
tsanumkagtuajaipa, wainkam tsanumjam  
tikichdau jukipa, amina apa dukujai eme  
anentsam diyaakum yaigtá’, tusa tawa  
nunú.

<sup>20</sup>Tama ni ayaak:

—Jintinkagtinuh, wika nunak uchuch  
nagkamsanuk ashí umikuitjai, —tiuwai.

<sup>21</sup>Tutai Jisus wait anenmain diis  
chichajak:

—Makichik umimain ajutjame: Wetá  
nunikam ashí amina ajutjamaina duka  
sujukam ujunauch aina nu susata. Nu  
dutikawamin nayaimpinum wajigmik  
ajutjamtinai. Nu dutika ukuakum  
waitiakmesh atsanjam nemagtukta,  
—tiuwai.

<sup>22</sup>Nu tama antuk, nunimainchau  
dekapeg wake beseká weuwai, shiig  
wiyakuch asa.

<sup>23</sup>Nunikmatai Jisus nui ijunun  
ayampá ashí diis ni jintintaiji aidaun  
chichajak:

—Wiyakuch aidauk Apajuí minai  
inamjati tusag kakajus idaimamainchau  
ainawai.

<sup>24</sup>Nuna tutai jintintaiji aidauk  
puyatkag ijuntsaju. Nunikagmatai Jisus  
ataktú chichaak:

—Uchig aidauh, aents aidau niina  
wajijin imá senchi puyatjuidauk,  
kakajus Apajuí inamak amain ainatsui.

<sup>25</sup>Camellok aujá jijnish waigká  
nagkaemamainai. Tujash wiyakuch  
aidauk Apajuí minai inamjati tusag  
kakajus idaimamainchau ainawai.

<sup>26</sup>Nuna tutai antukag nuní nagkaemas  
puyatkag:

—¿Yaki tujash uwemjaush amainaita?  
—tusag ditak iniinidau.

<sup>27</sup>Tiagtai Jisus ditan diis chichajak:

—Aents diismak juka utugchatai  
machikish dutikmaitisui, tujash  
Apajuiyaig annuchui, nigka ashí  
dutikmainchaunash dutikmainai.

**Mina nemagtuidauk ditanu**  
**ukukbaujin nagkaesau**  
**jukiagtinai tibau**

(Mt. 19.27-30; Lc. 18.28-30)

<sup>28</sup>Tutai Pedro ayaak:

—Jutii aidautik ashí iina  
ajutjamaidauk ukuinaku  
nemagkamiajime.

<sup>29</sup>Tutai Jisus ayaak:

—Dekas tajime: Ashí aents mina  
nemagtuinak yamajam chichama  
nunakesh etsejak, jeen, yachin, umayin,  
apajin, dukujin, nuwen, uchijí aidaun,  
nugke aidaunash ukukiu aidauk, <sup>30</sup>yamaik  
ju nugka juwig pujusag, ciegka imania  
jukiagtinai: Jee aidau, yachi aidau, umayí  
aidau, dukují aidau, uchijí aidau, nuigtú  
nugke aidaujai ukukbauwa nuna nagkagas.  
Waittsajash atak atina duwi pujut tuke  
atina nui pujusagtin ainawai. <sup>31</sup>Tujash  
kuashat aents dekatkau atatus wakegaina  
nu ukunum juwakagtinai. Untsu iman atan

anentaimtumachu aina nu dekatkauk agtinai.

**Kampatuma juna Jisus ni mantamnatnuji etsegkamu**  
(Mt. 20.17-19; Lc. 18.31-34)

<sup>32</sup>Jerusalén jegawagtatus weedau. Nuniamunum Jisus eemak wegai ni jintintaiji aidauk ishamainak puyatkiag weedau. Nuniagtai ataktú niina jintintaiji doce aina nuna yajuak akankiag, wajak dutikawagtata nuna pachis ujaidau. <sup>33</sup>“Yamai Jerusalén jegattag duwi, wi Apajuí Uchijiyaitkun Aentsmagan Akiinawaitag nunak achigkag sacerdote apuji, chicham umiktinun jintinkagtin aidaunum ejetuawagtatui. Dutijuawagmatai dita jujukiag judiuchu aidaunum dita maatnume tusag sujutkagtatui. <sup>34</sup>Dutijuawagmatai pegkegchaun chichagtuinak dushí dushiktuinakuag, asututan asutu, usuktutnash usuktu awa awajtuinakua mantuawagtatui, tujash dutijuawagmataish kempatum tsawanta juwi ataktú nantaktatjai”, tau.

**Juan Jacobojai Jisusan segagbau**  
(Mt. 20.20-28)

<sup>35</sup>Nuna timatai, Zebedeo uchijí aidau Jacobo Juagjai, Jisusan jegaantag:  
—Jintinkagtinuh, ii segattajam nunak dutiksag umigkagtukti tusa wakegaji, —tuidau.

<sup>36</sup>Tusa tiagtai Jisus ayaak:  
—¿Wajina dutijuati tusagmea wakegagme? —tau.

<sup>37</sup>Tutai dita chichainak:  
—Wakegaji amina inamtaigmin, jutii jimajaitag nunuti makichik amina untsugmin ekenkum, tikich menagmin ekejattsatin atá tusaja.

<sup>38</sup>Tiagtai Jisus ayaak:  
—Atumek mina segatjum duka dekatsjume. ¿Atumesh mina waitkajus

mantuawagtata dusha imanisjumkek waitmainaitjum?

<sup>39</sup>Tuinam dita chichainak:  
—Ehé, iishkam duka waitmainaitji, —tuidau.

Tiagtai Jisus ditan chichajak:  
—Dekas tajime: Wi waittsan jakattag imanisjumek waittsatin ainagme, <sup>40</sup>tujash mina untsujuí, tikich mina menajú ekeemsatin atajum tusanuk tumaitsumjume. Nunak mina Apag ya aidau ekeemsatnujinak umigkauwaita nuna ekentsagtinai.

<sup>41</sup>Nunú tabaun diez aina nu antukag, Juangkan Jacobojai senchi kajekajui.

<sup>42</sup>Nuniagtai Jisus ditan untsuká:  
—Atumek shiig degagme, tikich nugka aina nuna apuji aidau judiuchu aina duka, aentsnak ditanua nunin emak inainawai. Untsu nunú apu aina nuna aentsji aidau, aents aina nuna dita wakegamun inau ainawai. <sup>43</sup>Tujash atumek aajagmek dutikdaimain ainatsjume. Nunitsuk atum ainajum anuiyatijum eme anentai atasajum wakegautigmek tikich aina nu takajin amainaitjume. <sup>44</sup>Atum ainajum anuiya eme anentai atatus wakegawk, ashí tikich aidaun inake amainai. <sup>45</sup>Wagki wi dekas Apajuí Uchijiyaitkun Aentsmagan Akiinawaitag nunak, atum aidautijum mina takagtustinme tusanuk taachuitjai, wi dekas atumin takagkun mantamnan kuashat aents aidau pujutin uwemtijata tusan taamjai, —tiuwai.

**Bartimeo wainmachun Jisus etsagagbau**

(Mt. 20.29-34; Lc. 18.35-43)

<sup>46</sup>Nuna tusa Jericó jegawajui. Nuwiya jiinki Jisus niina jintintaiji aidaujai, nuigtú shiig kuashat aents ashinai, aents wainmachu Bartimeo daagtin Timeo uchijí jintá yantam ekeemas, aents nagkaemagtai kuichik sujustajum tusa

sumá eketu. <sup>47</sup>“Jisus Nazaretnumia nagkaemawai”, tabaun antuk, untsumtan nagkamau. Nuniak:

—iJisusah David wegantu uchijiyah minash wait anenjugta! —wajau.

<sup>48</sup>Imattai kuashat aents aidau jiyaidau itatkati tusag. Tusá jiyamash nigka nuní senchi untsumak:

—iDavid wegantu uchijiyah, minash wait anenjugta! —wajau.

<sup>49</sup>Imattai Jisuschakam nui wajan:

—Untsuktajum juwi tantati, —tiu.

Timatai wainmachun untsuinak:

—Yamaik untsugmawai kajintsam tantata, —tuidau.

<sup>50</sup>Tama niishkam pataká

nugkuagbaunak awik nugká aepeak, tseke wajakí Jisus wajamunum jegantuí.

<sup>51</sup>Nunikmatai Jisus iniak:

—¿Minash utugtukti tusamea wakegame? —tau.

Tama wainmachu ayaak:

—Jintinkagtinuh wika wainmaktasan wakegajai, —tiu.

<sup>52</sup>Tutai Jisus:

—Yamaik wetá, amek kajintásá anentaimam duwi tsagajume, —tiu.

Tusá tamawaik wainmakui, nunik Jisus wetai niishkam Jisusjai weuwai.

**Jisus Jerusalén apu wajasá wayamu**

(Mt. 21.1-11; Lc. 19.28-40;

Jn. 12.12-19)

**11** <sup>1</sup>Jisus ni jintintaiji aidaujai Olivosan mujajin jegawaju,

yaakat Betfagé, nuigtú Betania

Jerusalegnum tikiju awa nui, nunik ni jintintaijin jimajan awemak:

<sup>2</sup>—Au yaakat jegattak aents batsata awi wetajum, awi jegakmajum burro makichik aentskesh entsamchatai tsakatuch wajau wainkattagme, nu atia jukim itagtuatajum. <sup>3</sup>Nunú juwagmin makichik aentskesh, ¿wagka aikagme? tujamkujaish, Apu atsumawai, ajum

awagtugmaktatui tusa ukuktajum, —tiuwai.

<sup>4</sup>Tiajam wejiag diikmá, waitainum agaa jinta tuniasunum jigkam wajattaman wainkag atidau.

<sup>5</sup>Dutikiagtai nui aents ijunaidau:

—¿Utugkatagsagmea burrush atiagme? —tuidau.

<sup>6</sup>Tiagtai ditashkam, Jisus titá tibaunak, dutiksag ujak ukukiajui.

<sup>7</sup>Dutikawag burron jukiag Jisusan itaantaju, dutikawag burro tuntupen awantak nugkuagbauji jukiag aitkajui, dutikawagmatai Jisus ekeemiu. <sup>8</sup>Nunik wetai kuashat aents asag, dita awantak nugkuagbaujin jintanmag aitug emaidau, dutikainai tikich aidauk

dukan tsupijag jintanum ainag emaidau. <sup>9</sup>Dutikiagtai aents dekas eemak ashinu, ukunum minidaujai senchi untsumkag:

—iApajuí awemamu iina agkanmitkagmatin miná jujú

emematiagmi! <sup>10</sup>iIina apachji apu David inamajakua nunisag inamjatatus miná

jujú emematiagmi, nigki nayaimpinmayanash agkanmitkattawai!

—wajaidau.

<sup>11</sup>Nunik Jisus Jerusalén jegaa, jega Apajuí ememattainum wayauwai. Nunik

nui ashí wají agtatmanak diis ukuak etsa akagu asamtai, niina jintintaiji

aidauk ashí yajuak Betania weuwai.

**Numi higuera tutai nejenchaun**

**Jisus yumigja maamu**

(Mt. 21.18-22)

<sup>12</sup>Betania kanag jiinkiang wegamunum Jisus yapajau, <sup>13</sup>nunikmá higuera shiig

dukejuk wajattaman ikaag wainak wejiu neje atsuash tusa diistatus. Nunikmá nejetí jegachu asamtai neje atsutai,

<sup>14</sup>Jisus higuera chichajak:

—iAme nejeamunak makichik aentskesh tuke yuwachagtin ainawai! —titatman

niina jintintaiji aidau antugkajui.

**Jega Apajuí ememattainum aents  
batsatun Jisus jiigbau**

(Mt. 21.12-17; Lc. 19.45-48;  
Jn. 2.13-22)

<sup>15</sup>Jerusalén jegawag jega Apajuí ememattainum Jisus wayaa, nui sujak batsatun sumau aidaujai agaa jiijú, dutikak aents kuichki yapajiin aidau mesajinashkam shitatki akaketuk, paumá sujin aidau ekeemtaiji aidaunash dutiksag ashí akaketkau. <sup>16</sup>Jega Apajuí ememattaiya nui makichik aentskesh takusá wayawainum tusa shiig dakitau.

<sup>17</sup>Nunik jintinkagtak:

—Apajuí chichame agagbaunum:

“Mina jegajuk ashí tikich nugkanmaya aidau Apajuí aujuinaku ijuntaiyai tama atinai” tawa nuniaig atum kasá aidau batsamtai emaugme, —tiu.

<sup>18</sup>Nuna timatai sacerdote apuji, chicham umiktinun jintinkagtin aidaujai antukag, wajuk maawajik tuidau. Tuinayatak ni jintinkagtamun ashí aents aidau puyatjus antujuidau asagmatai nuna ishamaidau. <sup>19</sup>Nuninai Jisusak kiitai niina jintintaiji aidaun yajuak, nunú yaaktanak ukuak yajá weuwai.

**Higuera kukajú wainkamu**

(Mt. 21.20-22)

<sup>20</sup>Nui kanajag kashikmag nagkaemakmag, higuera ashí kagkapejai kukag wajattaman wainkajui. <sup>21</sup>Nunik Pedro adeag Jisusan chichajak:

—Jintinkagtinuh, diisia ame higuera yumigjam ukukmaum nu kukajá wajana, —tau.

<sup>22</sup>Tutai Jisus ayaak:

—Imá Apajuíyaig kajintsá anentaimsatajum. <sup>23</sup>Dekas tajime: Makichkitigmekesh utujimsa anentaimtsuk, dekaskeap nuniktatua tusajum ju muja chichagkujum: ‘iJuwi atsuk nayantsanum wajaata!’ tamak

nunisag nunimainai. <sup>24</sup>Nuaduí tajime: Atum Apajuí segattajum duka dekas sujustatuapi tusajum segatajum, nuniakjumek jukittagme. <sup>25</sup>Atum Apajuí aujukmek, tikichjai kajegdaikamu ajutjamkuig tsagkujatajum, atumnashkam Apajuí nayaimpinum puja dushakam aikasag tsagkugtamjatnume atum pegkegchau chichakbaugminash. <sup>26</sup>Atum nu tsagkugchataik, atumin Apa nayaimpinum puja dushakam, atumin tudaugminash tsagkugtamjashtatjume.

**Sacerdote apuji Jisusan iniasbau**

(Mt. 21.23-27; Lc. 20.1-8)

<sup>27</sup>Juna timatai wakitkiag Jerusalén kaunawajui. Nunik jega Apajuí ememattainum Jisus wekaetatman sacerdote apuji, chicham umiktinun jintinkagtin aidau nuigtú tikich apu aidaujai jegaantang, <sup>28</sup>iniinak:

—¿Aminash ya jintinkagtuata tusash awetamae? ¿Yana chichamenia jusha juniame? —tuidau.

<sup>29</sup>Tuinam Jisus ayaak:

—Wishakam iniastajime, atum nu aigkagmin ujaktajime ya jutikata tujutmataiya jutikaja junash. <sup>30</sup>¿Ya awemauwaita Juagnash yamijatjati tusash, Apajuik awemauwait, atsa aents aidauk awemauwait? nunú aigkatajum.

<sup>31</sup>Tama utujimkag, ditak pempeentunikiag chichainak: “Juagnak Apajuí awemauwai tajinish, ‘¿Tujash wagka dekaskeapi tichau ainagme’ tujamtata jama? <sup>32</sup>¿Aents awemauwai titajash?” Tuinayatak ashí aents aidauk Juagkak dekaskenum Apajuí etsegtinai tuidau asagmatai ishamaidau.

<sup>33</sup>Nuninak Jisusan chichajuinak:

—Dekatsji, —tuidau.

Tiagtai Jisus ayaak:

—Ayú, wisha tichattajime yana chichamenia jutikaja nunak, —tiu.

**Inak pegkegchau aidau pachisa  
augmattsamu**

(Mt. 21.23-46; Lc. 20.9-18)

**12** <sup>1</sup>Jisus ataktú augmatbaun pachis aents aidau jintintak, tau: “Aents niina ajajin uva aajakuí, dutika tanishig, uva yumiji ijugtinnash umik, wajasá diistinnash torre tutain yakí jiiuí. Dutika wajumak aentsun atum ju takastajum dutikakjum minash sujstajum tusa susa ukuak, nigka tikich nugkanum atushat weuwai. <sup>2</sup>Nunik uva juut jegamtai, makichik inaken awemauwai, aents ajanum takaina nui jegamtai, uva neje susam, juki itagtuati tusa. <sup>3</sup>Dutikam jegamtai ajanum takaina nunú achikag suwi suwimainakua, wainak awagkiuwai. <sup>4</sup>Dutikawagmatai tikich inaken awemauwai, dutikam jegattaman, nunashkam kayai tukuí tukuinakua upu upujukiag, pegkegchau chicha chichajuinakuag awagkiajui.

<sup>5</sup>“Nuna dutikawagmatai ataktushkam tikichin awemauwai, dutikam jegattaman maawajui. Dutikamtai nuni kuashat ishiakui. Dutikawajam jegattaman, tikich aidauak suwimawag ayatak awa awatuinakua awakenak, tikichnak maawajui.

<sup>6</sup>“Dutikawagmatai inagnamun niina uchijí makichkiuch aneetaiji ajamun, takaak batsatbaunum awemauwai: ‘Mina uchignak ajantusampap diimain ainawa’ tusa. <sup>7</sup>Tujash ajanum takaina nu ditak pempeentunikiag: ‘Auwai ju aja juna jukitnuk, dekas maa ajapeaku, juka iinu emami’, tuidau. <sup>8</sup>Tusag achiká maawag ajá ukumtikiag ajapawajui.

<sup>9</sup>“¿Nunash ajagtina dusha itugmainaita? Dekas ajagtina nu tajakug nunú ajanum takaina nunak kajeg utsaak, tikich aents aidau susa idaimainai.

<sup>10</sup>“Atumek ausachukaitjum Apajuí chichame agagbauwa nui:

‘Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé,

<sup>11</sup> nunak Apajuí dutikau asamtai, juti anentaig ejetumaitsui’ tawa duka”, tiuwai.

<sup>12</sup>Tutai: “Nuna augmatus tawa nunak, iina tujamak tawai” tusag achikta tuidau, tujash aents tuwakajua nuna ishamaidau asag ukuinak wegajui.

**Apú kuichkiji pachisa  
Jisus iniasbau**

(Mt. 22.15-22; Lc. 20.20-26)

<sup>13</sup>Nunik ukukiag fariseo aentsji aidau, Herodesan aentsji aidaujai pachiachmau Jisus iniastajum, tamash wajintig timatai duwi tsanumjujagmi tusag ishiakaju. <sup>14</sup>Dutikawajam ditashkam Jisusan jegaantag:

—Jintinkagtinuh, jutiik shiig dekainaji, amek dekaskea duke etsegme, tikich aentsun niimé diigsam shiig awajkatasamkesh chichatsme, imá Apajuí jintiya duke pachisam jintinkagtau asamin, amin iniajame: ¿Roma apuji kuichkiji atinush sumainashit, atsa sumainchaukaih? —tusa iniidau.

<sup>15</sup>Tama Jisus dita tsanubaujin dekaju asa:

—¿Wagka minash tsanujatasagmesh wakejutagme? ¡Makichik kuichik itagtuakjua diistajai! —tiuwai.

<sup>16</sup>Tutai ejentuntam diisá:

—¿Yana niimé dakumkaya daajish agagbauwaita? —tau.

Tama dita aiinak:

—Anka Roma apuji dakumkamui, —tiaju.

<sup>17</sup>Tiagtai Jisus ayaak:

—Roma apujinua duka nigki susatajum, Apajuinua dushakam imá Apajuik susatajum, —tiuwai.

Nuna timatai anentai jegagchajui.

**Jakau nantagtin pachisa iniimsamu**

(Mt. 22.23-33; Lc. 20.27-40)

<sup>18</sup>Nuniku ai saduceo aidaushkam Jisusan tajuntajui, ditak aents jakauk nantakchagtin ainawai tinu asag Jisusan iniinak:

<sup>19</sup>—Jintinkagtinuh, Moisés papí agag ukugtamkiuwa nui: ‘Aents nuwan juki uchi akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai’ tawai. <sup>20</sup>Nuniamunum siete yachigbau aajakuí. Nuanuiya nagkamchak iwai nuwenauwai, tujash uchin akiitsuk jakauwai. <sup>21</sup>Nunikmatai tikich yachi jukiuwai. Nunik niishkam uchinak akiitsuk jakauwai. Kampatuma nu jukishkam nunisag jakauwai. <sup>22</sup>Nuni nuninakua siete aajakajua duka uchinak akiitsuk ashí jinawajui. Nunikagmatai duwi pujus nuwashkam jakauwai. <sup>23</sup>Siete aajakajua duka ashí nunak nuwatkaaju aina duwish çyana nuweg atinaita atak nantainamunmash? —tuidau.

<sup>24</sup>Nuna tiagtai Jisus ayaak:

—Atumek Apajuí chichamen tawa dusha dekachu, niina senchijiya dushakam wainkachu ainajum nuaduí dewakugme.

<sup>25</sup>Jakau aidau nantajagtin aina duwik makichkish nuwenachagtinai. Apajuí aentsji nayaimpinum batsata nuninuk agtinai.

<sup>26</sup>Tujash jakau nantajagtinun pachis, Apajuí numi zarza tutai kegamunum chichakbau Moisés agagbauwa nui: ‘¿Witjai Abraham, Isaac, Jacob aina nuna Apajuuinuk’ tawa duka ausachukaitjum? <sup>27</sup>iApajuik jakau aidau Apajuujinchui, iwaaku aina nuna Apajuujiyai! Nunin aig atumek shiig kuashat dewagme, —tiuwai.

**Chicham dekas puyatjusa umiktin**

(Mt. 22.34-40)

<sup>28</sup>Saduceo aidau tiagtai Jisus shiig aikmatai, chicham umiktinun jintinkagtin antuku asa, jegantun iniak:

—Chicham umiktin aina nuwiyash ¿tuwaita dekas puyatjusa umimaina dusha? —tau.

<sup>29</sup>Tutai Jisus ayaak:

—Chicham umiktajum tibau aina nuwiya dekas puyatjusa umimainuk juuwai: ‘Israel aidauwah, Apu iina Apajuuiya duka imá makichkiuchi.

<sup>30</sup>Amina Apujum Apajuuiya nu imá senchi aneeta, nuniakum imá niinig anentaimsam pujustá, Apajuinu pegkeg aina duke dekaata, ashí Apajuí wakega duke takastá’, tawa juuwai dekas puyatjusa umimainuk.

<sup>31</sup>Untsu tikich jujai betekmamtina duka: ‘Amijai ijutkamushkam amek anenmamsam aneeta’ tawai. Tikich chicham umiktin juna nagkaesauk atsawai.

<sup>32</sup>Ju aatsa tima chicham umiktinun jintinkagtinchakam:

—Jintinkagtinuh duka dekas tame, imá makichik Apajuik awai, tikichik atsawai.

<sup>33</sup>Shiig pegkejai Apajuí senchi aneamua duka, Apajuinu pegkeg aina nu dekamushkam, niinig anentaimsa pujuta dushakam, ashí ii takaamua duka imá niinuk atí tusa takaamushkam. Apajuí senchi anea duka aatus nunimainai. Nuigtú, amijai ijutkau aidaushkam amek anenmamsam aneeta tibauwa dushakam pegkejai, nunú aatsa nuniamu Apajuuinak shiig awagmawai, tudau tsagkugnagtasa kuntin maa apeamua nuna nagkagas, —tiuwai.

<sup>34</sup>Tusa shiig anentaimas timatai, Jisus chichajak:

—Apajuí inatjati tusam idaimamtak namput wajatsme, —tiuwai.

Nuna timatai makichik aentskesh iniimainchau dekapajau.

**Kristush yaá wegantukita tibau**

(Mt. 22.41-46; Lc. 20.41-44)

<sup>35</sup>Jisus juga Apajuí ememattainum jintinkagtak:

—¿Wajuk asamtaiya chicham umiktinun jintinkagtin aidaush, Kristuk

David wegantu atinai tuinawa? <sup>36</sup>David Wakani Pegkeji chichamtikam:

‘Apu mina Apujun chichajak:  
Mina untsujú ekeemsata,  
nunikamin wi amina shiwajum  
aidaunak aminí ikaunmakmatai  
duwi ame diisminum’, tiuwai.

<sup>37</sup>David mina Apug tawa nuniaish:  
¿Wajuk asaya David wegantush  
amainaita? —tau.

Tutai nui aents tuwakú aidauk shiig  
aneasag antujuidau.

**Jisus chicham umiktinun  
jintinkagtin aidau pegkegchauji  
pachisa tibau**

(Mt. 23.1-36; Lc. 11.37-54; 20.45-47)

<sup>38</sup>Nui Jisus jintinkagtak: “Atumek  
kuitamamkatajum chicham umiktinun  
jintinkagtin aidau, nugkutai esagman  
nugkujá yujatan wakegaina nunin  
aigpajum, ditak aents kuashat  
ayamunum igkuntuinakush eme anenjus  
kumpamjitnume tusa wakegainawai.

<sup>39</sup>Nunisag jega ijuntainum  
utsanainakush, dekas apú ekeemtai  
shiig iwajamu aina imannum  
ekeemsatatus wakegainawai. Aantsag  
jistatin yuwamunmash dekas ekeemtai  
shiig iwajamunum ekeemsatatus  
wakegainawai. <sup>40</sup>Nuwa waje aidau  
jeenash atankiag, aents aidau  
pegkegnap takainawa tujuttinme tusag,  
Apajuin au ajuinakua ukú yujau aina  
nunin aigpajum. Nunú aidau imá senchi  
suwimkan jukiagtin ainawai.”

**Nuwa waje ujunauch Apajuinu  
anentag kuichik egkeamu**

(Lc. 21.1-4)

<sup>41</sup>Jisus kuichik Apajuinu atin  
egketainum adijis ekeemas, kuashat  
aents aidau kuichkin chimpiinai,  
wiyakuch aidaushkam kuichkin kuashat  
chimpiagtai diyak eketu. <sup>42</sup>Nunia nuwa

waje wayaa niishkam jimagchik kuichik  
cobre najanam, akiktanash imanis  
akikchaun egkeauwai. <sup>43</sup>Nuwa nuna  
egkeamtai Jisus wainak ashí ni  
jintintaiji untsuká ikaunmak chichajak:

—Au nuwa waje ujunauchitak ashí  
aents kuichkin egkeena auna nagkagas  
egkeae. <sup>44</sup>Tikich egkeena auk kuichik  
ampinun egkeenawai, tujash jujú nuwa  
waje ujunauchitak ashí niinu auchinak  
egkeae, ni sumasa yumainjinakesh  
ampis ukutsuk, —tiuwai.

**Jega Apajú ememattai tsayam  
atinai tusa Jisus etsegkamu**

(Mt. 24.1-2; Lc. 21.5-6)

**13** <sup>1</sup>Jisus jega Apajú  
ememattainmaya jiinki  
wetatman niina jintintaiji aina nuwiya  
makichik:

—Jintinkagtinuh iamesh diisia kayash  
yajau ekenjá iwaja jegamkamujah!  
—tau.

<sup>2</sup>Tutai Jisus ayaak:

—Ju ibau ekenjá jegamkamu aidau  
wainam juka, makichik kayakesh  
ekenjamu aina nuwiyag juwakchatnai,  
ashí tsaikbau atinai, imanisagkek  
asastinai, makichik kaya tsaikchamukesh  
tikich kayanum ekeemi juwakukesh  
atsustinai, ashí tsainkatnai, —tiuwai.

**Nugka nagkantsaig wantinkagtin  
aidau pachisa etsegkamu**

(Mt. 24.3-28; Lc. 21.7-24; 17.22-24)

<sup>3</sup>Jisus Olivosan mujajin waka, jega  
Apajú emematku ijuntaijai niinis awa  
nui ekeemsau. Nunikmatai Pedro,  
Santiago, Juan, Andrés aatus jegantun  
niinak iniidau:

<sup>4</sup>—¿Nunash wajutiya dutikawagtin  
ainawa? Ashí nunú aidau uminkatin  
tsawan jegattak wajataish, ¿wají  
wantidiagtinaita? nunú ujjatkata,  
—tuidau.



<sup>5</sup>Tiagtai Jisus ditan ayaak: “Kuitamamkatajum makichkish tsanugmajainum. <sup>6</sup>Wagki kuashat aents aidau mina daajun adaimasag miniagtinai nuninak, ‘Witjai Kristunuk’ tusag kuashat aentsun tsanuagtinai.

<sup>7</sup>“Maaninawai tuinamu antitnaitjume, nuigtú maaniawagtasa pampandayamushkam, imaniakuish puyatkatin aigpajum. Duka aatus nagkaemaktinai, tujash nu achatnai nagkanbauk. <sup>8</sup>Nugka yaignum batsamin aidau tikich nuninum batsatujai maadiagtinai, tuja nuninai nugka muunnum batsamin aidaushkam mai imanumiajaig maadiagtinai. Ashí tikich nugkanmash ugtinai, yapagtach tepatnai, kuashat pampandayamush atinai. Jujú aina juka waitut yamá nagkamnak imanitnai.

<sup>9</sup>“Tujash atumek kuitamamkatajum, atumnak achigmakag apu chicham dekaatasa ijuntainum ejetamawagtinai, dutijamawagmatai jega ditá ijuntaiji aidaunum awaintamawag asutamawagtinai. Dutijamainak tikich apu aidaunmash ejetamawag, nui jujamkiag dekas apu nugkanum inamin aidaunmash ejetamawagtinai, mina nemagtin asagmin mina pachitus titinme tusag. Dutijamawagmatai ditá emtinish mina pachittsajum ujaktinaitjume. <sup>10</sup>Dekas nugka nagkanbau jegatsaig yamajam chichama duka, ashí tikich nugka aidaunmash etsegekamu atinai. <sup>11</sup>Tujash apunum ejetamawagtatus atumin jujamainakuish, wajintuk titaja tusagmek anentaimtusapajum. Atumek Apajuí tujamtata nunú chichaktinaitjume. Duka atum chichakchattagme, Wakaní Pegkejiya nu chichamtijamkatnai. <sup>12</sup>Nunú nuniamunum ditá yachiuchijinash maatnume tusag sujiagtinai, aantsag

uchigtin aidaushkam uchijinak sujitnai, uchi aidaushkam apají shiwagmawag maitin ainawai. <sup>13</sup>Atum mina nemagtin aidautigminak ashí aents aidau kajegtabiagtinai, tujash ni mina nemagtukbaunak nunisag pujusá nagkanbaunum jegá nu uwemjatnai.

<sup>14</sup>“Apajuí etsegtin Daniel aajakua nu, Apajuí dakitmainun shiig pegkegchau dutikawagtinun pachis agajui (nuna aujuk dekaatnume): Jega Apajuí ememattai pegkegma nui aents utsanainak, dita apajimatasa dakumkamun awayawagtinai tawa nuna dutikaidau wainkugmek; atum Judea batsatutigmek mujanum pisagtajum.

<sup>15</sup>Tuja jega jegamká tuntupé paka inagnakbaunum waka pujaushkam akaiki jegá wayaag wajijinak jutsuk wemainai. <sup>16</sup>Aantsag ajanum takaak pujaushkam, pataká nugkugtinun jukitjai tusag waketjumaitsui. <sup>17</sup>Nunú tsawantin nuwa ejamtin, nuigtú uchi amuntsuaku agtina nunak wait anentuinajai. <sup>18</sup>Apajuí ausatajum, atum pisamua nu tsetsek tepeamunum ajutjaminum.

<sup>19</sup>“Apajuí nugká najanauwa nui nagkamas yamaya juwish imanika waitchatain, atakea duwish imanika waittsashtin tikima senchi waitiamu atinai. <sup>20</sup>Apajuí nu waitut imadiaun imijtsuk idaitaik, makichik aentskesh uwemainchau ainawai. Tujash Apajuí niinu agtinun etegjauwa nuna wait anentau asa, waitut ayatak wegaunak imijkatnai.

<sup>21</sup>“Tuja makichik aentskesh: ‘Juwi Kristu pujawai diistajum’, tachakush: ‘Awi pujume’, awajtamainakuish dekaskeapi tiigpajum. <sup>22</sup>Kuashat aents ‘Kristuitjai’ tusa tsanumiagtinai, aantsag ‘Apajuí chichame etsejin ainaji’ tusag tsanumaidaush agtinai. Nuninak aents dutikmainchau aidaun iwainainak

aentsun tsanuagtainai, dutikaidau asag Apajuí etegkamu aidaunash dita tsanuamunak tsanujagtinai. <sup>23</sup>Nuaduí atumek kuitamamkatajum, ashí juna pachisnuk yaunchuk emtikan tibaijime.

**Apajuí Uchijí Aentsmaga  
Akiinauwa nu minitnuji tibau**  
(Mt. 24.29-44; Lc. 21.25-28)

<sup>24</sup>“Nunú tsawan waitut nagkaemaig etsag suwe wajastinai, nantushkam etsanjashtinai. <sup>25</sup>Nayaimpinmaya yaya punjau aidaushkam nugkanum kakeyagtinai. Imanidau asagmatai nayaimpinmaya machikish umuchmainchau aidaush buchtjatnai. <sup>26</sup>Nunú imaniai wi Apajuí Uchijiyaitkun Aentsmagan Akiinauwaitag nuna, yujagminum pachitkau ashí mina senchigjai tsawan wajasá minamun waitkagtinai. <sup>27</sup>Wi mina aentsug nayaimpinmaya aidaun ishiaktinaitjai, mina aentsug etejamu aidau ashí nugka nagkatkamunum batsatun ijumjatnume tusan.

<sup>28</sup>“Numi higuera pachisan augmattsan titatjim nu anentaimtustajum. Atumek higuera duke betenkakuig wamkeap esat nagkamnattawa tusajum dekau ainagme. <sup>29</sup>Nunisjumek atumshakam ashí wi tajim nunú imanisag uminag wegau wainkugmek, yamaik Apajuí Uchijí Aentsmaga Akiinauwa nu taatnuk ashí jegaegapi, titin atajum. <sup>30</sup>Dekas tajime: Wi Jerusalegkan pachisan ashí tajim duka, yamai aents batsataina jusha ashí jinuinatsaig uminkatnai. <sup>31</sup>Nayaimpik nugkajaig megkaejatnai, tujash mina chichamjuk umintsukek juwakchatnai.

<sup>32</sup>“Tuja waji tsawantinig, waji horatinig taatnaitja nunak makichkish dekainatsui, nayaimpinmaya aents aidaukesh dekainatsui, tuja wikish

dekatsjai, imá mina Apajuk dekawai.

<sup>33</sup>Nuaduí atumek aneaku batsamsajum Apajuí aujú pujutajum, nu uminkatnuk tsawantak dekachu asajum. <sup>34</sup>Juka aents atushat tikich nugkanum wegak, niina inake aidaun, jega kuitamjuktatajum tusa makí makichik inake aina nuna takatan tinamak, waitin kuitamkatnunashkam aneaku pujusam kuitamkata tusa ukuak weuwa nujai betekmantinai. <sup>35</sup>Aneaku pujutajum, jeennush wajutik taat, kintamkumpash minit, nuniachkush ae aetash, atash shinaimpash, atsa kashikmasampash taat duka shiig dekachu asajum. <sup>36</sup>Pachiachmau minak kajigká batsatjumin waipamaina numamtuk awajtamkainum. <sup>37</sup>Juna tajim junak imá atumnakek tatsujime ashí aentsun tajai: iNiimkau aneaku batsamsatajum!”

**Jisus maami tusa  
chicham umigkamu**

(Mt. 26.1-5; Lc. 22.1-6; Jn. 11.45-57)

**14** <sup>1</sup>Pascua pag lewadurajai pachimsuk yutaiya nunú jegatin jimag tsawan ai, sacerdote apuji aidau chicham umiktinun jintinkagtin aidaujai Jisusan egaidau, wajak unupiajaik achiká maawag tusag. <sup>2</sup>Tujash jista aigkik dutikachagmi, aents aidaujai pampandayamu ai, tuidau.

**Betanianmaya nuwa Jisusa  
buuken kugkuinui ukatjamu**

(Mt. 26.6-13; Jn. 12.1-8)

<sup>3</sup>Yaakat Betanianum Simón lepra achikbau etsagagbau aajakua nuna jeen, Jisus mesanum jegan ekeematman, kaya alabastro tutai botella najanamunum kugkuin nardo ayatak duke najanamu akik wajaknun takusá nuwa jegantau. Dutika nuna ujak Jisusa buuken ashí ukatjauwai. <sup>4</sup>Dutikatman wainkag nui ijunu kajekag:

—¿Wagka ibau kugkuinnash aikash ajapeawa? <sup>5</sup>Aikatsuk trescientos tsawan inagkeasa takasá kuichik jumaina imaan akik sujuka, nunú kuichkik ujunauch aidau yaimainajama, —tusag nuwan ashishmatuidau. <sup>6</sup>Tiagtai Jisus chichajak:

—Idaisatajum ¿wagka nuwauchish kajejagme? Nigka junak pegkejan jutijawai. <sup>7</sup>Ujunauch aidauk tuke atumjai batsamiagtatui, nuniakuí atum wakegakjumek yaimainaitjume, untsu wika atumjaig pujushtatjai. <sup>8</sup>Juka nuwak mina mantuawag ukujuinak, iyashjun kugkuinai ukatjukag ukugsagtina nuaduí jutijawai. <sup>9</sup>Dekas tajime: Yamajam chichama juna ashí nugkanum yujasag etsejuinakush, ju nuwa mina jutija junak tuke pachisag chichatin ainawai.

#### **Judas Iscariote Jisus sujukbau**

(Mt. 26.14-16; Lc. 22.3-6)

<sup>10</sup>Nuna timatai niina jintintaiji doce aina nuwiya Judas Iscariote, jiinki weuwai sacerdote apuji aidaujai Jisus sujuktinun chichaman umiktatus.

<sup>11</sup>Nunik sacerdote batsatun jegajá, dutik achimainaitjume tuinam shiig aneenak kuichkin akiktajame tusag anagkuawajui. Tiagmatai Judaschakam, wajuk yupichu sujukajak tusa egatu.

#### **Pascuatin yuwatin umikbau**

(Mt. 26.17-19; Lc. 22.7-13)

<sup>12</sup>Pag levaduragtuchu yutai nagkamak tsawagbaunum, Pascuatin yuwatin uwig aishmag tsakat aidau mautai asamtai, Jisusa jintintaiji aidau:

—¿Tuwig umiktaji Pascuatin yuwatnush?

<sup>13</sup>Tiagtai jimagchik niina jintintaijin awemak:

—Yaakat wetajum, nunikjum aishmag yumin aimak waketu wainkattajum

nunú pataetuktajum, <sup>14</sup>nunikjum jeen wayaakuí: ‘Jintinkagtin chichagtamak: Agkantash awash wi mina jintintaig aidaujai Pascuatin yumainush’ tujamae titajum —tiu. <sup>15</sup>—Nu tajumin ni inaktugmastatui yakí tesamu muun shiig umikbaun, nuanuú ashí jutii yuwatnuk umiktajum, —tiu.

<sup>16</sup>Tusa tiajam Jisusa jintintaiji aidaushkam wegag yaakat jegakmag, ni tibaunak imatiksag wainkag, Pascuatin yuwatnunak nui umikajui.

#### **Jisus inagnaku Pascuatin yuwamu**

(Mt. 26.20-25; Lc. 22.21-23; Jn. 13.18-30)

<sup>17</sup>Kiyagmatai Jisus niina jintintaiji doce aina nujai jeganum utsanawaju.

<sup>18</sup>Nunik mesanum pekaamsag yuwinamunum Jisus chichaak:

—Dekas tajime: Atum ainajum juwiyag makichik wijai jimajuk yuwa nu minak sujuktattawai, —tau.

<sup>19</sup>Tutai ditak wake besekag pekaamsaju, nunikag makí makichik iniinak:

—¿Wikaitag? —tutai, tikitchakam: —¿wikaitag? —wajaidau.

<sup>20</sup>Tutai Jisus ayaak:

—Doce ainajum juwiya wijai nu platonmag uchutua yuwa nuuwai, —tau.

<sup>21</sup>Tusa:

—Wi Apajuí Uchijiyaitkun Aentsmagan Akiinawaitag nunak, mina pachittsag agajajua nuna imatiksanan umiktatjai, tujash aents mina sujuktatta nunak wait anentajai. Duka dekas akiinmainchaunas akiinawabiataih, —tau.

#### **Jisus mina anentaimjuttasajum yuwakjumek juní dutikatajum tibus**

(Mt. 26.26-29; Lc. 22.14-20;

1 Cor. 11.23-26)

<sup>22</sup>Yuwinak pekagbaunum, Jisus pagkan juki Apajin see ti puuká, ni jintintaiji aidaun suwak:

—Ju kukijum yuwatajum, juka mina iyashjua numamtainai.

<sup>23</sup>Nuna ti idayak, copanum vino yajaam ekeematman juki Apajin see ti ditan susaju, dutikam ashí betek uwakajui. <sup>24</sup>Dutika ashí uwakagmatai chichajak:

—Juka mina Apag, mina numpag ukaejamunum kuashat aents uwemkagtinun yamagman anagkagtuauwa nunú uminkatnun iwainawai. <sup>25</sup>Dekas tajime: Wika ju uvan yumijiya junak awenanuk uwagchatnaitjai, atak tsawan uminkui Apajuí inamtaijin atumjai ijuntinaitag duwi vino yamagman uwagtinaitjai, —tiuwai.

**Jisus Pedron uugtuktatme tusa ujakbau**

(Mt. 26.30-35; Lc. 22.31-34; Jn. 13.36-38)

<sup>26</sup>Nuna timatai kantamtain kantamawag, Olivosan mujajin wegajui.

<sup>27</sup>Nunikag nui Jisus chichaak:

—Jujú kashia juwik, ashí atum aidautigmek mina anentaimjuttak kajimatkittagme, agagbauwa nui: ‘Uwijá kuitamnun mantuawagtinai, dutikawagmatai uwigji aidauk pampagkagtin ainawai’ tawa nunisag. <sup>28</sup>Tujash mantuawagmataish ataktú nantakin atumek wegatsjuminig wiyá emkan Galilea wetatjai, —tiuwai.

<sup>29</sup>Nuna tutai Pedro ayaak:

—Ashí tikich aidau kajimatjamainakuish, wika nunikchattajai, —tau.

<sup>30</sup>Tutai Jisus chichajak:

—Amek yamai kashia juwik atash eke jimajá shinatsaig, Jisusnak waintsamjai tusam kampakumá uugtuktatme, —tau.

<sup>31</sup>Tamashkam Pedrok:

—Amijai apaatuk mantuainakuish wika nunak tichattajai, —tau.

Nuna tutai, ashí niina jintintaiji aidauk ditashkam dutiksag tajui.

**Jisus Getsemaní pujusá Apajuí ausamu**

(Mt. 26.36-46; Lc. 22.39-46)

<sup>32</sup>Tiagmatai juwakiag ajak ajakbau Getsemaní tutainum jegawajui. Nunik ni jintintaiji aidaun:

—Juwi ekeemsatajum, wi awi wenu Apajuin ausatjai.

<sup>33</sup>Tusa wegak Pedron, Jacobon, Juan aatus yajuak ditajai wesa, shiig senchi wake besemag dekapeau asa wake besekú, <sup>34</sup>nuniak:

—Senchi wake besemag dekapeakun ane anentaimkawan jamain dekapeajai, atumek juwi pujusjum iwá batsamtajum.

<sup>35</sup>Tusa ukuak machik kuwaesag nugká tikishmag pujus Apajuí aujak: “Apawah, nunimainaitkuig wi waitmainaitag duka nagkaetukchati”, tau. <sup>36</sup>Nunik: “Mina Apajuh, amek ashí dutikmainaitme, wi waitmainaitag duka datumtujata, tujash wi wakejamuk achati ame dekas wakejamua nu atí”, tiuwai.

<sup>37</sup>Nuna ti wakitki ni jintintaiji batsakbaun jegantun diikmá, kajig batsatun wainak Pedron chichajak:

—Simón, ¿kanamek? ¿makichik horakesh iwá pujumainchau dekapeam? <sup>38</sup>Shintaagjum pujusjum Apajuí ausatajum, iwanch pegkegchau takastinme tusa dekapjamsainum, wakanik dekasenmag pegkeja nuna wakegawai, tujash iyashik kakakchau ainawai.

<sup>39</sup>Tusa ataktú weeshkam ni Apají ausamujinak dutiksag ausauwai. <sup>40</sup>Nuna tusa ataktú tanta diikmá kajigká batsatun wainak ishintau, dutikamash ditak kaji senchi mainamu asag, Jisus augmash aimainchau dekapjajui.

<sup>41</sup>Kampakuma juwi waketjuki taak:

—Wi Apajuí Uchijiyaitkun  
Aentsmagan Akiinauwaitag nuna aents  
tudaugtin aidaunum sujam atag duka  
horak jegae, maake yamaik kanagtajum.  
42Nantagtajum wegagmi, mina  
sujutkatta duka ashí taa minawai,  
—tiuwai.

**Jisus achiká jukimú**

(Mt. 26.47-56; Lc. 22.47-53;  
Jn. 18.2-11)

43Tusa Jisus eke chichaak wajai,  
Judas doce aina nuwiya kuashat  
aentsun espada aidaun, numi  
aidaunaske takaku aidaujui saasá  
tajuntajui. Nunú aidauk sacerdote apuji  
aidau, chicham umiktinun jintinkagtin  
aidaushkam, nuigtú apu awemamu  
aidaujui minidau. 44Judas Jisusan  
sujuktina nunú: “Wi kugkuastatag  
nunuwai Jisusak, shiig achikjum  
emettajum jukitajum”, 45tiu asa Jisusan  
adajak:

—iJintinkagtinú! —takug kugkuasui.

46Dutiktai achikag shiig emetjaju.

47Nuna dutikiagtai makichik nui ijuna  
nuwiya espadajin ukuini juwakug,  
dekas sumo sacerdote inake kuwishin  
asankauwai. 48Tuja Jisus nu aents  
aidaun chichajak:

—¿Wagka kasa achiktasa utugtaya  
imanikjumesh espada, numi aidau  
takusjum achigkatasagmesh  
minitjagme? 49Wi atumin jintinkun  
kashí kashinig jega Apajuí  
ememattainum pujuweg nuaduik  
jutijuajum achigchau agmaugme.  
Tujash aatus chicham agagbauwa nu  
uminui, —tiuwai.

50Nuna taig ashí niina jintintaiji  
aidauk pisainak ukukiajui. 51Nuninaig  
makichik datsauch sabanan pempemag  
pataetuku, nunittaman achikajui,  
52dutikam jaanchnak awik ukuak wisú  
tupikakiuwai.

**Jisus apu aidau  
batsatbaunum ejegamu**

(Mt. 26.57-68; Lc. 22.53, 54-71;  
Jn. 18.12-14, 19-24)

53Jisusan jukiag dekas sumo sacerdote  
pujamunum ejegawajui;  
dutikawagmatai ashí sacerdote apuji  
aidau, tikich apu aidaushkam, chicham  
umiktinun jintinkagtin aidaujui  
ijunjajui. 54Tuja Pedroskam ikaag  
pataetus wejá wejakua, sumo sacerdote  
jeen agaajin jegaa, achijatin aidaujui  
jiin anamak eketu.

55Sacerdote apuji aidau, ashí  
chichaman inagdau aidaushkam  
egatuidau, Jisusan bakuag maatnume  
tusa sujukagtatus, imatikainakush  
ejetuinau. 56Kuashat aents aidau  
wainak tsanumjuidau, tujash dita  
tuinamuk betek jegaachu. 57Nuniagtai  
wajumak aents wajaidiag tsanumjuinak:

58—Jutii ni tabauk antugkabiaji: Wi ju  
jega Apajuí ememattai uwejái  
takasbauwa nunak, yumpuan  
kampatumchik tsawantai tikichin  
jegamkattajai uwejai takaschamun  
timayi, —tuidau.

59Nuna aatus tuinakushkam  
makichkish bakumainchaun tuidau.

60Nuniai dekas sumo sacerdote  
ejapeen eketu wajatki Jisusan iniak:

—¿Wagka machikish aimtsume?  
¿Nunash wajinbaugmina jusha  
imatjutpainawa? —tau.

61Tamashkam Jisusak machikish  
aimkagkesh chichaachu, nunitai sumo  
sacerdote awentsag iniak:

—¿Amekaitam Kristu, Apajuí  
Pegkegma nuna Uchijim?

62Tutai Jisus ayaak:

—Witjai, wi Apajuí Uchijiyaitkun  
Aentsmagan Akiinauwaitag nuna,  
Apajuí ashí senchigtina nuna untsujin  
eketun tsawan uminkamtaí yujagminum

pachitkau minamu waitkatnaitjume,  
—tiuwai.

<sup>63</sup>Tutai sumo sacerdote nugkutaijin  
japikí ichigká chichaak:

—¿Nuigtush ya etsegtukti tusaya  
atsumaji? <sup>64</sup>Apajuí pegkegchau  
chichagka nu antukugme, ¿wajinjupa  
atumesh?

Tutai ashí aents aidauk:

—iAyatak mantamnatí! —tuidau.

<sup>65</sup>Tiagmatai Jisusan usukidaush ainai,  
yapiin ejatkg ijuinak:

—Dekakia, ¿ya awatamni?

—awajuidau.

Jega Apajuí ememattain  
kuitamnushkam Jisusnak yapinum  
awatuidau.

**Pedro Jisusnak waintsamjai  
tusa uukbau**

(Mt. 26.69-75; Lc. 22.56-62;

Jn. 18.15-18, 25-29)

<sup>66</sup>Pedro apu agaajin nugká pujaun,  
sumo sacerdote inake nuwa aina  
nuwiya makichik tajuntau, <sup>67</sup>nunikmá  
Pedro jiin anamak ekeematman wainak  
dii wajatu, nunik:

—Amesh Jisus Nazaretnumiaya  
nujaimpap wekaemume, —tau.

<sup>68</sup>Tama Pedro ayaak:

—Wika wainchaujai, ame tujutam  
nunak dekatsjai, —tiuwai.

Tusa ukuak wayamunmanini  
jinkiuwai, nuniai atash shinukuí.

<sup>69</sup>Duke nuwauch ataktú wainak, nui  
tikich aidau batsatun:

—Jujú aujai wekaenuwejama, —tau.

<sup>70</sup>Tamashkam Pedrok ataktush aikasag:

—Jisusnak wainchaujai, —tau. Nuniai  
machik asag nuwi batsatu ataktú  
Pedron chichajuinak:

—Amek dekas auna jintintaiyaitme  
Galileanmaya asam, chichaakmesh dita  
chichau agma nunismek chichame,  
—tuidau.

<sup>71</sup>Imatjuinam Jisusan pachis  
pegkegchaun chichajak, Apajuí adayas:  
—iAtum tajum nunak wika  
wainchaujai! —tau.

<sup>72</sup>Nuna taig atash awentsag shinukuí,  
nunitai Pedroshkam Jisus chichajak:  
“Atash jimajá shinatsaig, kumpatumá  
waintsamjai tusam uugtuktinaitme”  
tibauwa nuna anentaimtus, buutiuwai.

**Jisus Pilatuwai ejegamu**

(Mt. 27.1-2, 11-14; Lc. 23.1-5;

Jn. 18.28-38)

**15** <sup>1</sup>Kashikmasag sacerdote apuji  
aidau, tikich dekas apu aidau,  
nuigtú chicham umiktinun jintinkagtin  
aidau, nuigtú chichama inagnau  
aidaujai ijunjag chichasag, Jisusan  
jigkajag jukiag Pilato pujamunum  
ejegawaju. <sup>2</sup>Dutikawagmatai Pilato  
iniak:

—¿Amekaitam judío aidau apujim?

Tama ni ayaak:

—Ame tujutam duka dekaske, —tau.

<sup>3</sup>Tujash sacerdote apuji aidauk shiig  
senchi tsanumjuidau. <sup>4</sup>Imatiagtai Pilato  
ataktú iniak:

—¿Amek nuna imatjutpainakuish  
machikish aimtsumek? diisia wajupa  
imatjupainatsua, —tau.

<sup>5</sup>Tujash Jisusak nu tamashkam aimchau,  
nunitai Pilato anentai jegagchau.

<sup>6</sup>Jistatinig aents achikbau aidau nu  
jinkiti tusag makichik mamikiawagmatai,  
tuke jiisagké aidau. <sup>7</sup>Nuanuí Barrabás  
daagtinchakam, Roma apuji dakituinaku  
pampandayamunum ni kumpajijai aentsun  
mau asamtai achikam egketu.

<sup>8</sup>Nuniamunum kuashat aents kaunkag  
makichik aents tuke akupdauwe, dutiksaik  
akupnakti tusag Pilaton segaidau. <sup>9</sup>Tama  
Pilato ditan chichajak:

—¿Wakegagmek dekas atumi  
apugmia nuna akupkati tusagmesh?  
—tau.

<sup>10</sup>Nunak sacerdote apuji aidau tuke aneas kajejuinak, maatnume tusa sujukajun dekau asa tiuwai. <sup>11</sup>Tujash sacerdote apuji aidauk aents tuwakú aina nuna:

—Dekas Barrabás jinkiti, —tusa akatjajui.

<sup>12</sup>Tiagtai Pilato ataktú chichajak:

—¿Atum iina apuji tajum nunash utugkati tutujume? —tau.

<sup>13</sup>Tutai ataktú senchi untsumkag:

—iAchigtajum! —tjajui.

<sup>14</sup>Tiagtai Pilato ayaak:

—¿Tujash jusha wají pegkegchauna takase?

Tutaishkam nuní senchi untsumkag:

—iAchigtá! —awajuidau.

<sup>15</sup>Imatiagtai Pilatushkam aents aidaujai shiig juwakta tau asa, Barrabasan jiyaaak Jisusnak asutiatajum tima asutiawagmatai sujukui achigtajum tusa.

#### **Suntag aidau Jisusan waitkasagbau**

(Mt. 27.27-31; Jn. 19.1-3)

<sup>16</sup>Dutikantai suntag aidau apú pujusá inamtajinian jukiag agaa jiikiagmatai, ashí suntag aidau ijuntujaju. <sup>17</sup>Dutikawag jaanch yamakaitkaun anugjag, atsejutain jagkí najatuawag atsemitkakag, <sup>18</sup>eme anentsá kumpamji tusag:

—iJuwai judfo aidau Apujig!  
—awajuidau.

<sup>19</sup>Imatjuinak tagkanai buuknum awatuidau, usuktanash usukidau, nuninak emematji tusag tikishmatuidau. <sup>20</sup>Dutikainak dushí dushikinakua jaanch yamakaitkaunak awituk jujuinak ni nugkutajjinak anugjag juki emajui, achijag maawagtatus.

#### **Jisus achigbau**

(Mt. 27.32-44; Lc. 23.26-43;  
Jn. 19.17-27)

<sup>21</sup>Yaakat Cirenemaya Simón daagtin Alejandro, Rufo apajija numú, ajajinia minittaman wainkag: Jisus achigtin numi yapajia achiamun yanaktí, tusag susajui.

<sup>22</sup>Dutika jukiag Gólgota tutainum ejentajui, (“Gólgota” tawa duka “buuk sakajua nunin” taku tawai.) <sup>23</sup>Nui ejentag, vino mirrajai pachimjamun uwagti tusa susajui. Tujash nigka uwagchawai.

<sup>24</sup>Dutika Jisusa achijagmatai, suntag aidau jaanchji aidau jujukiag, yana kayajig jiinkit nu jaanchnak jukiti tusag wasugkamaidau. <sup>25</sup>Jisusnak etsa dukap takunai achijaju ainawai.

<sup>26</sup>Dutikainak wajuk asamtaiya achijaje nuna pachisag: “Judfo aidau apuji” tusa agag adujtukajui. <sup>27</sup>Nuigtushkam jimag magkagtinun Jisusjai achijag, tikichia nuna untsugnum awajainak, tikichia nunak menajinini awajawajui. <sup>28</sup>Aatus uminkauwai agagbaunum chichaak:

“Pegkegchau takau aidaujai betek dutikam atinai”, tawa nunú.

<sup>29</sup>Aents aidau duke ayaumas nagkaemainak buuken pegajag pegkegchau chichajuinak:

—iWaj!, ame jega Apajui ememattaiya nunak yumpuan kempatumchik tsawantaik ataktú jegamainaitjai tinun jama, <sup>30</sup>aaní nematsuk akaikim uwemjakia, —awajuidau.

<sup>31</sup>Dutiksag sacerdote apuji aidauhakam, chicham umiktinun jintinkagtin aidaujai dushikinak:

—Tikichnak yajau uwemtikchauwe, nuninaitak nigka uwemtsui. <sup>32</sup>iKristuh, Israela Apujiyah! achijam detam nu akaikikia, nuniakmin wainká iish dekaskeapi tiagmi, —tuidau.

Nuwi Jisusjai achijam detaidauhakam aiksag pegkegchaun chichajuidau.

#### **Jisus jakamu**

(Mt. 27.45-56; Lc. 23.44-49;  
Jn. 19.28-30)

<sup>33</sup>Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai.

<sup>34</sup>Imanik abaunum Jisus senchi untsamak: “Eloi, Eloi, ¿lama

sabactani?” tiu. (Nunak: “Mina Apajuijuh, mina Apajuijuh, ¿wagka minash idaitusume?”) taku tiuwai.

<sup>35</sup>Aents nui ijunaidauk nuna antukag:  
—Antukjua, Eliasa untsuana,  
—tuidau.

<sup>36</sup>Nuniaig nuwiya makichik tupikaki vino chujuau pujaunum esponja ajugká juki, tagkanum etea Jisus uwagti tusa sutai:

—Idaisakia, Elías juna uwemtijatatus minishtimpash nuniau wainkagmi,  
—tuidau.

<sup>37</sup>Tujash Jisusak senchi untsamak jakauwai. <sup>38</sup>Nunikmatai jega Apajuí ememattainum jaanch ejaamuk, yakiin nagkamnas ichiinak jimaituk kanakuí. <sup>39</sup>Tuja capitán Jisus achigbaun diyaak wajau, Jisus senchi untsumká jaamun wainak chichaak:

—Ju aentsua juka dekaskenmag Apajuí Uchijiyai, —tau.

<sup>40</sup>Nuigtushkam kampakumak nuwa aidau ikaag ijunas diidau. Nuanuí María Magdalanmaya tikich María Jacobo José aina nuna dukují, Salomé aatus ijunu. <sup>41</sup>Nunú aidau Jisus Galileanum pujusá chichaman etsegtai, yujasag yaijakaju ainawai. Nuigtushkam kuashat nuwa aidau Jisusjai Jerusalén kaunawajua dushakam ijunaidau.

#### Jisus ukusbau

(Mt. 27.57-61; Lc. 23.50-56;  
Jn. 19.38-42)

<sup>42</sup>Tsawan ayamtaig etsa akaikimtai nagkamnatin asamtai, ashí takatan umikagtatus takainai etsashkam akagu. <sup>43</sup>Nuniai José Arimateanmaya apu dekask chichaman inagdau aina nuwiya eme anentsá diitaiya nu taú, niishkam Apajuí inatjati tusa wakejin asa ajantsuk Pilatun utua: Jisusa iyashin segauwai. <sup>44</sup>Nu tusa segam jakaek tusa anentai jegachu; nunik capitandin untsuká itan:

—¿Dekask Jisus jakamka? —tusa iniau. <sup>45</sup>Tama jakame tusa ujakam, Pilatushkam Josen:

—Jisusa iyashig jukita, —tiuwai.

<sup>46</sup>Tima Joseshkam jaanch puju dekask pegkeg najanamun sumak Jisusa iyashin numinum achigbaun kuwakí juki pempeaju. Dutika kaya tai umikbaunum egkea, kaya muuntan akagketuk waajin epeti ukukiuwai. <sup>47</sup>Nui ukuamun María Magdalanmaya, nuigtú María Josen dukujiya nujai wainkajui.

#### Jisus nantakbau

(Mt. 28.1-10; Lc. 24.1-12; Jn. 20.1-10)

**16** <sup>1</sup>Tsawan ayamtai nagkaemakmatai María Magdalanmaya, tikich María Jacobo dukují, nuigtú Salomé aatus, pegkeg kugkuinun sumakaju, Jisus ukusbaunum wegag Jisusa iyashin ukatkgatatus. <sup>2</sup>Nunikag tumig tsawaju asamtai, kashikmasag Jisus ukusbaunum wegaju, etsa yamá jiinai. <sup>3</sup>Nunik weenak pempentunisag:  
—¿Yaki eketjamkati waitainum kaya aputuamuwe nunash? —tudayinau. <sup>4</sup>Tujash jegantag diikmá, kaya shiig muun aputukbauk ekemak atatman wainkajui. <sup>5</sup>Nunik utuawag diikmag untsugnumanini aents datsauch jaanch puju esagman nugkuaju ekeematman wainkag ishamkaju. <sup>6</sup>Nuniagtai nunú chichajak:

—Ishamkaigpajum, atumek Jisus Nazaretnumian achijag maawagma nu egagme. Duka nantakne, juwig atsawai, anuí ukusagma nunú diistajum. <sup>7</sup>Tujash wejum niina jintintaiji aidau, nuigtú Pedroshkam ujaktajum. Nigka Galilea eemak wetatui, awi wainkagtatui ni tiuwa nunisag, —tiuwai.

<sup>8</sup>Nu tima nuwa aidaushkam Jisus ukusmaunum jegantajuk ukuinak tupikakajua, shiig senchi ishamkag



kujaidau asag makichik aentsnakesh  
ujakchajui.

**María Magdalanmaya Jisus  
wantintukbau**  
(*Jn. 20.11-18*)

<sup>9</sup>Jisus tumigtin kashikmas nantakí  
dekatkauk María Magdalanmaya  
wantintukui, ni siete wakan pegkegchau  
aidau chimpimtuamun jiijamu aajakua  
nuna. <sup>10</sup>Dutikam we Jisusjai yujakú  
aidau, wake besemag dekapenak buutú  
batsatun jegajua ujak:

<sup>11</sup>—Jisusak iwaakuwe, wi wainkamjai  
tusa ujamash, —ditak dekaskeapi  
tuinachu.

**Jisus ni jintintaiji jimag  
wantintukbau**  
(*Lc. 24.13-35*)

<sup>12</sup>Nuigtushkam ni jintintaiji jimag,  
ajanum wetainum jintá wetatman tikich  
niimtina nunin wajas wantintuku.

<sup>13</sup>Dutika wantintukam ditashkam tikich  
batsatun jegajiag ujakaju. Tuinamash  
ditanash dekaskeapi tichaju.

**Jisus chicham etsegkatakajum tusa  
ishiaktinji etegjamu aidau  
akatjamu**  
(*Mt. 28.16-20; Lc. 24.36-49;  
Jn. 20.19-23*)

<sup>14</sup>Nuniai niina jintintaiji once aina  
nunú mesanum pekajun wantintuku,  
nunik Jisus kakakan chichajak:

—¿Wagka dekaskeapi tatsugme?  
—tiu, wainkaju ujamash dekaskeapi  
tichaju asagmatai.

<sup>15</sup>Nuna ti chichajak: “Ashí  
nugkanum wetajum, nunikjum  
yamajam chichama ju ashí aents  
aidaunum etsegkatajum. <sup>16</sup>Nuna  
antuk dekaskeapi tusa nemagtukag  
yamiimaidauk uwemjagtinai, untsu  
dekaskeapi tuinachuk suwimkan  
jukiagtinai. <sup>17</sup>Mina dekaskeapi  
tujutuina duke wainchatai aidaunash  
iwainagtinai: Nuninak mina daajui  
wakan pegkegchau aentsun  
egkemtujunash jiiainak, yamajam  
chicham chichashtainash  
chichagtinai; <sup>18</sup>dapi esaimash, jatai  
egketuamun umuinakush jakashtin  
ainawai. Jau aidaunash ditá uwejen  
achikag etsagaidiagtinai.”

**Jisus nayaimpinum wakitkimu**  
(*Lc. 24.50-53; Tak. 1.6-11*)

<sup>19</sup>Apu Jisus juna taka takawa  
ashimak, nuaduí nayaim wegak  
takuniuwai. Nunik waka Apajuí  
untsujin ekeemsauwai.

<sup>20</sup>Nunikmatai Jisusa jintintaiji  
aidaushkam jiiinjajui, ashí  
yantamnum chichaman  
etsegkagtatus. Nuniagtai Apu Jisus  
chicham etsegbaunash aents aidaush  
dekaskeapi titinme tusa, wainchatai  
aidau iwainamunmash yaigkuí.

Aatus atí.

## YAMAJAM CHICHAM LUCAS AGAGBAU

---

### Nagkabau

**1** <sup>1</sup>Kuashat aents agajaje jutiiní wají augmatbau dekaskenum nagkaemakiuwa nuna pachisag. <sup>2</sup>Dita Jisusan dekas wainkau aidau, chichaman etsejuina nu jutiinashkam dutiksag jintinjamawaju asamtai, <sup>3</sup>wishakam aikasnuk, wajuk nagkamdauwaita nuna ashí iniimsan shiig dekaan agatjame, aneetaiju Teofiloh, <sup>4</sup>amina dekaskea nuna jintinjamawajua nu shiig dekau aminum tau asan.

### Juan Yamijatin akiinatnuji etsekkamu

<sup>5</sup>Herodes Judea apuji wajas pujamunum, nu tsawantinig pujujakuí sacerdote Zacarías, Abías wegantu. Niina nuweg Elisabet aajakuí Aarón wegantu. <sup>6</sup>Ditak Apajuí emtinish pegkegchauji atsugbau aajakajui, numidau asag Apajuí chicham umiktajum tibaunashkam imatiksag betek umiidau. <sup>7</sup>Tujash uchijig atsujuuidau, Elisabet kaga asamtai, nuigtushkam ditak muuntuch wajasaju asag.

<sup>8</sup>Nuniamunum Zacariasjai ijunag Apajuí takajin aidau takastin tsawan jegamtai, jega Apajuí emematku ijuntainum takaak batsatbaunum, <sup>9</sup>tuke dutikin asag: ¿Yaki jega Apajuí ememattai dekatkau tesamu Pegkejam

tutaya nui wayaash, kugkuin incienseo tutainash apeati? tabaunum Zacariasan antigkui. <sup>10</sup>Nunik Zacarias incienseo apetai, ashí aents aidauk agaa ijunas Apajuin aujú ijunaidau. <sup>11</sup>Nuniai Apajuí aentsji nayaimpinmaya Zacariasan wantintuk, altar incienseo apetainum ayaumas untsugnumanini wajantau. <sup>12</sup>Nunittaman wainak Zacariasak puyatuk senchi ishamak dii wajau. <sup>13</sup>Nunitai:

—Zacariasah ishamkaipa, ame Apajuí aujam nunak Apajuik antugtamae. Nuniau asamtai nuwem Elisabet aishmagkun uchigmakmatai, Juan adaikattame. <sup>14</sup>Nunikmatai shiig aneamas dakujustatme. Tuja kuashat aents aidaushkam shiig aneediagtatui nu uchi akiinamunum. <sup>15</sup>Duka Apajuí wakegamun takajin atinai. Uwagchatnai vinunash, umutai kajiau aidaunashkam. Dukují wakeen nagkamsag Wakaní Pegkejig tuke ajitnai. <sup>16</sup>Ni etsegbaunum kuashat Israelan uchijí wegantu aidauk, pegkegchau takatan idayinak, ditá Apujuiya nuna umijiagtatui. <sup>17</sup>Niiyá eemak taa etsekkattawai Apu minitnun, Apajuí etsegtin Elías, Wakaní Pegkeji senchijí ajujakua nunisag. Dutikak muun aidaush uchijijai chichaman iwajag pujustinme, aents intimkiu aidaushkam chichaman betek umiktinme, apu minitaish shiig anentus jukita tuidau asag.

<sup>18</sup>Tusá tama Zacarías ayaak:

—Wi, mina nuwajaí muumpakig juninnush ÷itugsanuk dekaskeap tawa duka uminkattawa titaja? —tau.

<sup>19</sup>Tutai:

—Wika Gabrielaitjai dekas Apajuí inakegaitjai, ni awetime chicham pegkeja nuna ujaktí tusa. <sup>20</sup>Tujash dekaskeap tujutua tatsum duwi, yamai nagkamsamek chichatsuk pujusam, tsawan wi tajam nu ejetatme, —tau.

<sup>21</sup>Nuniai aents aidauk: “¿Zacariasash wagkag jega Apajuí ememattainum wayaash imanikash megkaekae?” tusag daká batsatu. <sup>22</sup>Nuninai jiinki augmamaichau dekapeak ayatak iwiimau, nunitai aents aidauk: “Jega Apajuí ememattainum wayaa awiyap wantintuke”, tuidau.

<sup>23</sup>Nunik Zacariasak takaamujinak ashí umik ukuak, ni jeen wakitkiu. <sup>24</sup>Nuna nunik dukap tsawan pujatsaig nuwe Elisabet ejapjuku, nunik wantintsuk jeenig pujus cinco nantun inageakeiu.

<sup>25</sup>Nigka nunak: “Apajuí wait anenjak jutijuae, yamaik tikich aidaush uchigmachui tusag dushijin agma nunak tujutchagtatui”, tau asa nunikui.

#### **Jisus akiinatín etsegekamu**

<sup>26</sup>Elisabet ejapjuk seis nantu pujai, Apajuí Gabrielan yaakat Nazaret tutai, Galilea nugkanum awa nui awemauwai, <sup>27</sup>nuanuí makichik nuwa María daagtin aentsú takashtai, apu David aajakua nunú wegantu José anagmamu pujau asantai. <sup>28</sup>Nunik Gabriel María pujamunum wayaa:

—María pujamek, aminak ashí nuwa aina nuwiyán Apajuí wakejus etegtamjae. Dutijabau asa Apajuik amijai awai, —tau.

<sup>29</sup>Tujash nigka nuna wainak puyatkau, wagkag tuush kumpamjawa tusa. <sup>30</sup>Nunitai Apajuí aentsji nayaimpinmaya chichajak:

—María ishankaipa, aminak Apajuí etegtamjau asa shiig anenjamui.

<sup>31</sup>Dutikamu asam, ejapjukam aishmag uchigmakam adaikattame JISUS.

<sup>32</sup>Duka eme anentai atalui, nuniau asa ‘Apajuí Uchijí’ tama atinai. Apu Apajuiya nu, niina muunji apu David inamajakua iman emattawai.

<sup>33</sup>Dutikamu asa, Israela uchijí wegantu aidaunum tuke inamjatnai, ni inabaujig ajumaish nagkankashtinai, —tau.

<sup>34</sup>Tutai María ayaak:

—¿Dusha wajuk nunimainaita wi aishinchauwaitagjama? —tau. <sup>35</sup>Tutai nayaimpinmaya aents chichaak:

—Wakaní Pegkeji, Apajuí senchijiya nujai aminak tajutjamamtai ejapjuktatme. Nuaduí uchi akiinatta duka, pegkejam ‘Apajuí Uchijí’ tama atinai. <sup>36</sup>Tuja ame pataim Elisabetchakam muumpatnum uchin ejapjuka, nunik seis nantu wegawai, kagai tinu agma nunú. <sup>37</sup>Apajuí tujinmainuk makichkish atsawai, —tau.

<sup>38</sup>Tutai:

—Dekas wika Apajuí inakegaitjai, ame mina tujutam duka nunisag uminkati, —tiu.

Timatai nayaimpinmaya aentschakam wegak ukukiu.

#### **María Elisabet ijagsamu**

<sup>39</sup>Nunú tsawan wegamunum, María waujus jiinki weuwai, Judea nugka mujajin yaakat aunum. <sup>40</sup>Nuwi jegaa, Zacarias jeen wayaa Elisabetan kumpamak, <sup>41</sup>María chichatai, Elisabetan wakeenia uchi kakaaju, nuniaig Wakaní Pegkeji egkemtuj, <sup>42</sup>dutikam senchi jiiká chichaak:

—Ashí nuwa aina nuwiyán amina Apajuí etegtamjae, antsag amina uchigmishkam pegkegmai. <sup>43</sup>Wi imanchawaitag nunin aish, ÷wagka mina Apujú dukujimesh waitkatasamesh

miname? <sup>44</sup>Ame jegaa wayaam mina kumpamjakum chichaam nuna antaig, uchi kakaaje shiig aneak. <sup>45</sup>Shiig aneestatme amek, dekaskeap Apu tawa duka uminkattawa tiu asam.

<sup>46</sup>Tutai Mariashkam:

“Wika Apajuinak dekaskenum mina anentaimtagjai emematjai, tikima senchigtina ibau asamtai.

<sup>47</sup>Shiig aneamu ajutui Apajuí mina uwemtijin asa,

<sup>48</sup>wi imanchauch aigkish niina inake asamtai mina etegtua duwi.

Yamai nagkamsag ashí aents mina pachitus chichainakug:

Mariak Apajuí etegkamu asa shiig aneas pujusuí, tusag tuké tujutiagtin ainawai.

<sup>49</sup>Apajuí dekas ashí senchigtina nunú minai uminkatnun tujuti duka shiig tumaitsui, niina daajig pegkegmai;

<sup>50</sup>Apajuik aents aidau niina umijuidaunak tuke wait anentsagké atinai.

<sup>51</sup>Nigka tikima senchigtina ibau asa junak jutikae; dutikak, emebau aidaunash imanchau emakui.

<sup>52</sup>Apu inamin aidaunashkam jilki ajapeak, aents imanchau aidaun apu emakui.

<sup>53</sup>Aikasag nujantai waituidaunashkam ashí pegkeg aidaunak susauwai, dutikak wiyakuch aidaunak wainak idaisauwai.

<sup>54</sup>Ni inake Israel wegantun ayamjuke, dita wait anentanak kajimatkiye,

<sup>55</sup>jutii muunji Abraham aajakua nuna aatus anagkuauwai, nuigtú ni wegantu akiinak wegagtina nuwish tuke atina nuna.”

<sup>56</sup>María nuna ti, Elisabetan jeenig kauptum nantu tumain pujusuí, nunik wakitkiuwai niina jeen.

#### Juan Yamijatin akiinamu

<sup>57</sup>Elisabet tsawanji uminkamtai aishmagkun uchigmakui. <sup>58</sup>Nunikmatai nui ijutkau batsataidau, niina patayí aidaujui Apajuí wait anenjam uchigmakbaun antukaju asag shiig aneasajui. <sup>59</sup>Uchi akiina ocho tsawan wetai, judío aidauk uchi aishmag akiinaunak tuke pakaji<sup>a</sup> ajapjin asag, jukiajui nuna dutikawagtatus. Nuninak: “Uchik Zacarías atí, apají daajiya nunisag”, tuidau. <sup>60</sup>Tujash uchí dukují chichaak:

—Atsá, uchik Juan atalui, —tau.

<sup>61</sup>Tutai: —Ame pataim aina nuwiyag tu daagtinuk atsajama, —tuidau.

<sup>62</sup>Tutai uchí apajin iwiyas iniidau, ya atí tawakí tusag. <sup>63</sup>Nuniagtai, taapna sujústá tusa inakmatai susam: “Uchí daajig Juagkai” tusa agaju. Dutikamtai ashí anentai jegagchaju. <sup>64</sup>Nuna dutikamuik ataktú chichakú. Nunik Apajuin emematiu. <sup>65</sup>Nunitai nui ijutkau batsamin aidauk puyatjukaju. Ashí Judea mujajin batsamin aidaushkam nunak ashí dekaawaju. <sup>66</sup>Ashí aents nuna antuidauk: “¿Ju uchish wajukuk atinaita?” tusag anentaimaidau, Apajuí niina senchijin yayamun dekaidau asag.

#### Zacarías Apajuí emematbau

<sup>67</sup>Zacarías Wakaní Pegkeji egkemtujam chichaak:

<sup>68</sup>“Emematiagmi Apu, Israelan Apajujiya nu, ni aentsjin uwemtijatatus tau asamtai.

---

**a 1.59** “Pakaji ajapjin asag” tawa nunak, judío aidauk uchi aishmag akiinamtaig, Apajuí dutikata tibau asag uchí katiuchiji chuchuken tsupigkag ajapjukú asamtai tawai. Diistá Génesis. 17.10-12; Levítico 12.3.

- 69 Dekas senchigtin Uwemtikagtinun awetugmaji, ni inake David aajakua nu wegantun.
- 70 Yaunchuk nagkamas Apajuí etsegtin pegkejam aajakaju etsegkajua dutiksag,
- 71 iina shiwaji aidaun, nuigtú ashí tikich aents kajegtamin aina nunash depetuk uwemtijamjatna nuna.
- 72 Iina muunji aajakajua nuna pegkejan anagkuak:  
‘Tuké aminak wait anenjatnaitjame’, tiuwa nunak kajimattsuk betek umiké.
- 73 Iina apajin Abrugkan dekas umiktatjai tiuwa duka juuwai:
- 74 ‘Wi ditá shiwajinash depetukan agkan ematnaitjai, dutikam ishambkagtutsuk minak umigtuinak,
- 75 pegkediag batsamas, wi wakegamunak ashí tsawantai takastinne’, ” tiuwai.
- 76 Nuna ti uchijijnashkam:  
“Amek Apajuí etsegtinai tama atatme; amek Apu takastina nu emtikam umigkattame.
- 77 Ni aentsji aidau uwemjatnuji, tudauji tsagkugnagtingchakam pachisam ujaktatme.
- 78 Nunak Apajuí shiig wait anenjamu asa nayaimpinmayan Uwemtikagtinun awetugmae, etsa minak tsawantan tsaaptin emama numamtuk wajaktinun.
- 79 Tudau takainak, suwenum batsamas wajukmaina numamtuk wajainak, jaak megkaemainnum batsatunash tsaaptinun iwaintuktatui. Dutikak junta agkan pujutnum ekagtina nui wetinme tusa dekamtijamattawai”, tiuwai.

80 Uchishkam tsakaak nuní senchi jintiag anentaimu, nuniak uwegshunum pujusuí, Israelnum chicham etsegkatin tsawan jegatai Apajuí awemam wantinkatatus.

### Jisus akiinamu

(Mt. 1.18-25)

**2** <sup>1</sup>Nu tsawantin Roma apuji Augusto daagtin, ashí aents aidau daaji agatnakti tusa inamjau. <sup>2</sup>Junak dutikchatain Cirenio, Siria apuji we pujai dutikauwai. <sup>3</sup>Tibau asamtai aents aidauk makí makichik ditá yaaktajin agatmamjatatus shimuidau.

<sup>4</sup>Tuja Joseshkam Galileanum yaakat Nazaret awa nuwiya juwaki Judea nugkanum jegau, yaakat Belén apu David akiinamu aajakua nui, nigka David wegantu asa. <sup>5</sup>Nui agatmamjatatus wegak, ni nuwenamig tusa anagmamuji María ejamtinun ayasá weuwai. <sup>6</sup>Nunikag nui jegaa pujuinai tsawan ni uchigmaktinji jegajiu. <sup>7</sup>Nunikmatai iwaijin aishmagkun uchigmaku, dutika uchi pempetaiyai pempeag tagku ayugtainum egkeauwai, ijagka kajiitainig dita ayamainuk agkantak atsusú asamtai.

### Uwijá kuitamin aidaun nayaimpinmaya aents aidau wantintukbau

<sup>8</sup>Nunú kashia duwik, uwijá kuitamin aidaushkam nu nugkanmag uwigjin kashi kuitamainak batsatu. <sup>9</sup>Nuniai Apajuí aentsji nayaimpinmaya wantintuku, dutikak Apajuí tsaaptinjiya nu tsawan awasau dita batsatbaunum, dutikam shiig senchi ishambkajui. <sup>10</sup>Nuniagtai nayaimpinmaya aents chichaak: “Ishamkaigpajum, wika atumin yamajam chichaman ujaktasan minitjime, nuna antuinak ashí aents

aidauk shiig aneasagtata nuna. <sup>11</sup>Yamai kashia juwi, apu David akiinauwa nunú yaaktanmag uwemtikagtin Apu Kristu akiinae. <sup>12</sup>Tagku ayugtainum uchi pempeajam egketu wainkajum, juwapita titajum.”

<sup>13</sup>Nuna taig kuashat aents nayaimpinmaya aidau wantinjau, nunikag Apajuin emematuinak kantamainak:

<sup>14</sup>“Nayaimpinmash Apajuiya duke emematiagmi, nugkanmayanash ashí niina umijuidaunak shiig agkan anentaimesa pujutan susatta duwi”, wajaidau.

<sup>15</sup>Apajuí aentsji nayaimpinmaya aidau tusa ditan ujak, nayaim waketjamtai, uwijan kuitamin aidau pepentunisajag:

—Belén uchi akiinae tusa Apajuí tujama nunú wegaja wainkagmita, —tuidau.

<sup>16</sup>Tusag waujus wegag jegakmag, Marían Josejai, nuigtú uchi tagku ayugtainum egkematman wainkaju.

<sup>17</sup>Nunik wainkag uchin pachis nayaimpinmaya aents tibaun etsejuidau.

<sup>18</sup>Tusag uwijá kuitamin aidau etsejiagtai, ashí aents aidauk puyatus antuidau. <sup>19</sup>Maríashkam nu etsejuinamun antuk, sakapamainchau anentaimu. <sup>20</sup>Nunikag uwijá kuitamin aidau waketuinak, Apajuin emematuinak see tuidau, ashí nayaimpinmaya aents tibaunak imatiksag wainkaju asag.

**Jesus jega Apajuí  
ememattainum ejegamu**

<sup>21</sup>Ocho tsawan jegamtai, uchin pakaji ajapjuinak adaikaju JISUS. María eke ejapjumainchau aig, nu adaikattame

tusa nayaimpinmaya aents tibaunak dutiksag.

<sup>22</sup>Moisés chicham umiktinun agajua nuí, uchigmaku aidauk cuarenta tsawan jegatai pegkeetnume tibaauwa nuna ejeyag, Jerusalén weenak uchin jukiaju Apajuí emtin iwainakagtatus, <sup>23</sup>Apajuí chicham umiktajum tibaunum: “Ashí uchi aishmag iwai akiinuk Apajuinu atí”, tibaau asamtai. <sup>24</sup>Weenak Apajuinu atinun jukiaju chicham umiktajum tibaunum: Jimag tórtola,<sup>b</sup> nu atsakuig jimag paum tsakat itaatajum tibaauwa dutiksag.

<sup>25</sup>Nunú tsawantinig Jerusalén pujujakuí Simeón daagtin, aents pegkeg, Apajuí senchi aneen, Israelan Apajuí agkanmitkamun wainkatatus daká pujujin, Wakaní Pegkejishkam ajamu.

<sup>26</sup>Nuniau asa dekamtikau aajakuí: Apajuí awemamu waintsukek jakashtinaitme, tusa. <sup>27</sup>José Maríajai Jisusan jukiag jega Apajuí ememattainum jegawaju, chicham umiktinun dutikatajum tawa nuna betek umikagtatus. Nuniai Simeogshakam, Wakaní Pegkeji anentaimitkjam jegau. <sup>28</sup>Nunik uchin midaaki juki Apajuin emematu, nuniak:

<sup>29</sup>“Apuh, yamaik ame chicham tujutbauwa duka uminkau asamtai, shiig anentaimesan jaaknush jakatjai.

<sup>30</sup>Uwemtikagtina nunak yamaik mina jiijuí wainkajai,

<sup>31</sup>ashí aents aidaushkam ame awemamun wainkagtata nuna.

<sup>32</sup>Juka tsaaptina nuninai, ashí aents judiuchu aidaunashkam uwemtikatin asa, tuja amina aentsjum Israel aents aina nunash eme anentai ematnai”, tau.

---

**b 2.24** *Tórtola* tawa duka pauma numamtin tagkumtai aajakuí.

<sup>33</sup>Uchí pachis tutai, Josek Maríajai anentai jegachaju. <sup>34</sup>Nuna ti ditanashkam:

—Atumnash Apajuí yaimpaktinme,  
—tusa idayak, Marían chichajak:  
—Nijah, jujú uchía junak Israel aents aina nuwiyag dakitiagtinai, nuniai kuashat nemajuídaush agtinai nuninak uwemjagtinai. <sup>35</sup>Nuniagtai Apajuí ashí aents anentaibaujin paan iwainatta duka, (aminak nagkí ijumaina imatijamak anentaiminig waitkagmastinai), —tau.

<sup>36</sup>Nuanuig nuwa Apajuí etsegtin Ana daagtin, Fanuela nawanji Aser wegantu shiig muuntuch wajasá pujau. Nigka shiig tsakatuch aishina siete mijan pujusuí, <sup>37</sup>nuniau wajemea ochenta y cuatro mijan wegau, nuigtushkam juga Apajuí ememattainmag tuke tsawai kashishkam, yujumkan ijagmá pujus Apajuin ajujú pujú. <sup>38</sup>Nunin asa Simeón tusa ashimkamtai, Anashkam jegantá, Apajuin see taku emematak Jisusan pachis:

—Ashí aents Jerusalén agkanmagati tusa dakaina nunak ju uchi dutikatnai, —tau.

<sup>39</sup>Apajuí chicham umiktajum tibauwa nunak imatiksag umikag, ditá yaaktajin Nazaret waketjaju Galilea nugkanum awa nui.

<sup>40</sup>Nunik batsatbaunum Jisuschakam tsakaak iyashinish senchi wegau, nuniak nuní senchi jintiag anentaimu, Apajuí wakega nunashkam shiig dekau, tuja Apajuishkam niiní shiig aneau.

**Jisus tsakat asa juga Apajuí  
ememattainum webau**

<sup>41</sup>Makí makichik mijantin José Maríajai, Jerusalén tuke wesagké aidau Pascua jegatai. <sup>42</sup>Nunin asagmatai Jisuschakam doce mijan ajamu weu, ditajai Jerusalén jista inagkeautaiya nuna betek dutikatatus.

<sup>43</sup>Nuwi jegawag batsamas, Pascua ashimnakmatai waketjaju, nuninai Jisusak Jerusalén juwaku, niina dukujish Joseshkam dekatsaig. <sup>44</sup>Dita anentaimsajag tikich aidaujais ijunag wegatai tusag, makichik tsawan kuwaekaju, nuniau ashí ditá waintai, nuigtú ditá patayí aidaunmash egakú. <sup>45</sup>Tujash wainkachag Jerusalén waketjaju egainak.

<sup>46</sup>Nunikag kumpatum tsawanta juwi wainkaju, juga Apajuí ememattainum chicham umiktinun jintinkagtin aidaujais ejapena ekeemas, chichaagtai antak niishkam iniimak eketun. <sup>47</sup>Ashí aents ni chichaamun antujuidauk, yachajin diijus puyatkg diidau, dita iniamash shiig aimu asamtai. <sup>48</sup>Nunittaman apají dukujijai wainak puyatjuk, dukují chichajak:

—Uchuchih ¿wagka tikima aan wekaenaitme? Nijah, wi apajai shiig senchi puyatjukan egakun wekaetusjamna, —tau.

<sup>49</sup>Tama ni ayaak:

—¿Wagka minash egatjume? ¿Atumek dekatsjumek mina Apag wakegamun takaakun pujumainaitag duka? —tau.

<sup>50</sup>Tujash ditak, wagkag tawa tusag dekgamainchau dekapedau.

<sup>51</sup>Nunikag Jisusan jukiag Nazaret waketjajui, Jisus nui pujusá ashí dita tabaunak betek umiau. Tujash niina dukujig ashí Jisus nunikbaunak tuke kajimattsuk anentaimtú pujau. <sup>52</sup>Tuja Jisuschakam nuní senchi tsakau, dekatjinishkam nunisag, tuja Apajuishkam, aents aidaushkam shiig anentuidau.

**Juan Yamijatin uwegshunum  
chichagkagtukbau**

(Mt. 3.1-12; Mr. 1.1-8; Jn. 1.19-28)

**3** <sup>1</sup>Roma apuji Tiberio quince mijadai ashí nugkanum inamu. Tuja Poncio Pilato inamu Judeanum, nuniai Herodes

inamu Galileanum, untsu niina yachi Felipe inamu Iturea, nuigtú Traconitenum, untsu Lisania Abilinianum inamu. <sup>2</sup>Nuniamunum Anás, Caifás aatus sumo sacerdote aajakajui. Nunú batsatai Zacariasa uchijí Juan uwegshunum pujuttaman Apajuí ujakuí chichagkagtukti tusa. <sup>3</sup>Tima namak Jordagnum tikiju batsataidaunum ashí wekagas chichagkagtau, tudau takatan idayinak yamimag tsagkugnagtinme tusa. <sup>4</sup>Nunak Isaías Apajuí etsegtin agagbauwa nui, ju tibauwa nu tau asamtai nunikui:

“Makichik aents eemak taa uwegshunum wekagas senchi jiiká chichagkagtak:

Apu wekaesatnun jintan shiig iwajug, esegak tutupit dakueg,

<sup>5</sup> ashí jinta japagau aidaunash nugkan aintug, nainnashkam yumpuag pakamak betekmak, jinta tunin aidaunash tutupit esegak, tutitag aidaunashkam shiig iwajug umiyajama numamtuk, atumi anentaimish shiig iwajajum umiktajum, Apu minitin asamtai.

<sup>6</sup> Apajuí aents aidau uwemtikatnun awematta nunak ashí aents wainkagtinaí”, tawai.

<sup>7</sup>Kuashat aents aidau Juan yamijati tusag minituidau, nuniagtai chichajak: “iAtumek iwanchi uchijí asajum aents tsanú yujagme! ¿Wagka yamimagtasagmesh wakegagme? ¿Atumek ayatak yamimamuikis Apajuí suwimak sukagtumaina duka uwemtumainaitai tajumek? <sup>8</sup>Dekas tudau takatan idaisaush wajuku amainaita nunú iwainmamtajum. Atumkek: Jutiik Abraham wegantu asaja yupichuch uweemain ainaji, tumamigpa. Dekas tajime: Apajuik jujú kaya aina junakeshkam Abragka uchijí

emamainai. <sup>9</sup>Ashí ajak nejechu aidauk, jachai ajaka tsupija apetiama numamtuk, aents tudaunak taká batsatun, Apajuí suwimak susatnuk uminas awai.”

<sup>10</sup>Tutai aents aidau iniinak:

—¿Tujash wajukmainaitji? —tuidau.

<sup>11</sup>Tiagtai ni ayaak:

—Jimag nugkumainji ajamuk atsugbaun susati, yumainji ajamushkam dutiksag dutikati, —tau.

<sup>12</sup>Apú kuichkiji atinun yajumin aidaushkam yamimagtasag kaunawag iniinak:

—¿Jintinkagtinuh, jutiish wajukmainaitji? —tuidau.

<sup>13</sup>Tiagtai:

—Apunu kuichik atinun akikmainakuu juwajum nunú, nuní inagkeasjum aents aidau akikmakta tigpajum, —tau.

<sup>14</sup>Tutai Suntag aidaushkam dutiksag:

—¿Jutiish wajukmainaitji? —tuidau.

Tiagtai:

—Atumek aents uwakajum atanjum duka dutikawagpa, tikitchakam wainkagmek tsanumjuajgajum, atumí apujum akigmaina nujaig shiig aneasjum juwaktajum, —tau.

<sup>15</sup>Tuja ashí aents aidauk, Apajuí awematnaitjai tibauwa nuna daká batsataidau asag: ¿Juagchauwashit Kristu? tusag anentaimtuidau. <sup>16</sup>Tu anentaibiagtai aents aidau Juan chichajak: “Wika ayatak yumí yamijatjai, tujash mina nagkaetasu senchigtin minittawai, wika niya imanchau asan niina sapatjinakesh atitmaitsujai. Nunú yamimagtatjume Wakaní Pegkejiya nujai, nuigtushkam nigki jiiyai suwimkan sukagtustinuk.

<sup>17</sup>Nigki ashí aents aina nuwiyan akanjattawai, aents trigon ajakbau aidau juuká ijumag, awagti wampujin utsaak nejeen trigo ijumtainum yajumama numamtuk, Apajuí



umigchaunak jii ajumaish kajinkashtina  
nui suwimkan suwak, niina umigkau  
aidaunak ni pujutajin yajuaktinai.”

<sup>18</sup>Juna aatus tusa nuigtush aents  
aidaun jintintu yamajam chicham  
pekeja nuna: “Dekas Kristu Apajuí  
Uchijiya duka tajutjamae”, tusa. <sup>19</sup>Tusa  
jintinkagtú wekagu asa Herodes  
Galileanmaya apua nuna igkua:  
“Yatsum Felipe nuwe Herodías jujukium  
auk pegkegchauwai, tikitchakam  
pegkegchau takame”, tusa jiyakú.  
<sup>20</sup>Tusá Juan tima, Herodes senchi  
kajeká nuní nagkaemas pegkegchaun  
takaak, Juangkan achiká aents achiká  
chimpitanum egkeauwai.

**Jisus yamimagbau**

(Mt. 3.13-17; Mr. 1.9-11)

<sup>21</sup>Juan ashí aentsun yamiak pujai,  
Jisuschakam yamimajui, nunik Apajuí  
aujai nayaim ujaniuwai. <sup>22</sup>Nunikmatai  
Wakaní Pegkeji pauma nunin wajas  
paan wainainamunum niini akagu,  
nuniaí nayaimpinmaya chicham  
antuekau:

—Ametme mina uchig aneetaigmek,  
aminí shiig aneajai, —tabau.

**Jisukristu muunji aajakú aidau**

(Mt. 1.1-17)

<sup>23</sup>Jisusak treinta mijanji ajamu  
tumain ni takaamujinak nagkabauwai.

Jisusnak José uchijiyai tuidau,  
Josek Elí uchijí aajakuí, <sup>24</sup>Elik  
Matata uchijí,  
Matat Leví uchijí, Levik Melqui  
uchijí,  
Melquik Jana uchijí, Jana José uchijí,  
<sup>25</sup>José Matatiasa uchijí, Matatías  
Amosa uchijí,  
Amós Nahuma uchijí, Nahum Eslí  
uchijí,  
Eslí Nagai uchijí, <sup>26</sup>Nagai Maata  
uchijí,

Maat Matatiasa uchijí, Matatías  
Semei uchijí,  
Semei José uchijí, José Judá uchijí,  
<sup>27</sup>Judá Joana uchijí, Joana Resa  
uchijí,  
Resa Zorobabela uchijí, Zorobabel  
Salatiela uchijí,  
Salatiel Neri uchijí, <sup>28</sup>Neri Melqui  
uchijí,  
Melqui Adi uchijí, Adi Cosama  
uchijí,  
Cosam Elmodama uchijí, Elmodam  
Era uchijí,  
<sup>29</sup>Er Josué uchijí, Josué Eliezera  
uchijí,  
Eliezer Jorima uchijí, Jorim Matata  
uchijí,  
Matat Leví uchijí, <sup>30</sup>Leví Simeogka  
uchijí,  
Simeón Judá uchijí, Judá José  
uchijí,  
José Jonagka uchijí, Jonán  
Eliaquima uchijí,  
<sup>31</sup>Eliaquim Melea uchijí, Melea  
Mainagka uchijí,  
Mainán Matata uchijí, Matat  
Natagka uchijí,  
Natán Davita uchijí, <sup>32</sup>David Isaí  
uchijí,  
Isaí Obeta uchijí, Obed Booza  
uchijí,  
Booz Salmogka uchijí, Salmón  
Naasogka uchijí,  
<sup>33</sup>Naasón Aminadapa uchijí,  
Aminadab Arama uchijí,  
Aram Esroma uchijí; Esrom Faresa  
uchijí,  
Fares Judá uchijí, <sup>34</sup>Judá Jacopa  
uchijí,  
Jacob Isaaka uchijí, Isaac Abragka  
uchijí,  
Abraham Taré uchijí, Taré Nacora  
uchijí;  
<sup>35</sup>Nacor Serugka uchijí, Serug Ragau  
uchijí,

Ragau Pelegka uchijí, Peleg Hebera  
 uchijí,  
 Heber Sala uchijí, <sup>36</sup>Sala Cainagka  
 uchijí,  
 Cainán Arfaxata uchijí, Arfaxad  
 Sema uchijí,  
 Sem Noé uchijí, Noé Lameka uchijí,  
<sup>37</sup>Lamec Matusalegka uchijí,  
 Matusalén Enoca uchijí,  
 Enoc Jareta uchijí, Jaret  
 Mahalaleela uchijí,  
 Mahalaleel Cainagka uchijí,  
<sup>38</sup>Cainán Enosa uchijí,  
 Enós Seta uchijí, Set Adagka uchijí,  
 Adagak Apajuí najanamu.

**Iwanch Jisusan pegkegchau  
 takamtiksata tibau**

(Mt. 4.1-11; Mr. 1.12-13)

**4** <sup>1</sup>Jisus Wakaní Pegkeji egkemtujam  
 Jordagnumia jiinki wakettai,  
 Wakaní Pegkeji uwegshunum emauwai.

<sup>2</sup>Dutikam nui cuarenta tsawantai Jisus  
 pujaan iwanch dekapsauwai. Imaan  
 tsawan yutsuk inagkeau asa  
 yapajuaui. <sup>3</sup>Nunitai iwanch  
 chichajak:

—Dekas ame Apajuí Uchijiyaitkumek,  
 ju kaya nu pag emam yuwakia, —tau.

<sup>4</sup>Tutai Jisus ayaak:

—Agagbau awai: ‘Aentsuk imá  
 yujunkajaigkik pujumait sui, Apajuí  
 chichamega nujaiskam pujumainai’,  
 —tiuwai.

<sup>5</sup>Timatai iwanch nui inagkeaki  
 Jisusan muja tsakajunum iwakuí.  
 Dutika juú inaktamuik ashí nugkanum  
 yaakat aina nuna, nuigtú ashí pegkeg  
 aidaunashkam iwaintukui. <sup>6</sup>Dutika  
 chichajak:

—Ashí ju imaja junak amina  
 amastajame. Juka minai idaisamui, nuaduí  
 wi wakegamun sumainaitjai. <sup>7</sup>Ame mina  
 tikishmajam emematjakminig, ashí  
 aminuk atí tusan idaitustajame, —tau.

<sup>8</sup>Tama Jisus ayaak:

—iWetá iwanchih! agagbau awai:  
 ‘Ame Apujum Apajuiya duke emematta,  
 nuniakum imá nigki umigkata’, tawai  
 —tiu.

<sup>9</sup>Timatai nui inagkeaki yaakat  
 Jerusalén ejegau, dutika jega Apajuí  
 ememattainum yakí iwaká:

—Ame dekás Apajuí Uchijiyaitkumek  
 juwi wajasmek tsekem iyaata, <sup>10</sup>wagki  
 agagbau awai:

‘Apajuí ni aentsji nayaimpinmaya  
 aidaun awetugmattawai  
 kuitamjamkatnun,

<sup>11</sup> dutikamu asag uwegmin  
 achigmakagtatui iyaakum kaya  
 tukumkaim tusa’, —tau.

<sup>12</sup>Tutai Jisus ayaak:

—Agagbau awai: ‘Amina Apujum  
 Apajuiya nu pegkegchaunum  
 dekapsatasamek wakeyipá’, tawai  
 —tiuwai.

<sup>13</sup>Timatai iwanchik pegkegchau  
 takamtiksataatus anentaimtusbaunak  
 ashí dekapes ukukuiwai, tikich  
 tsawantinish dekapsatjai tusa.

**Jisus Galileanum ni takaamuji  
 nagkamamu**

(Mt. 4.12-7; Mr. 1.14-15)

<sup>14</sup>Nunik Jisusak Wakaní Pegkeji  
 senchimtikam Galilea wakitkiuwai,  
 nunikmatai ashí nugkanum nui  
 batsataidauk niina pachisag kuashat  
 chichaidau. <sup>15</sup>Nui jegaa, jega  
 ijuntainum wayaa jintinkagtutai ashí  
 aents aidauk emematuidau.

**Jisus Nazaret pujusbau**

(Mt. 13.53-58; Mr. 6.1-6)

<sup>16</sup>Jisus Nazaret ni pujusá  
 tsakagbaunum wakitki jegaa, tsawan  
 ayamtai tsawagmatai jega ijuntainum  
 wayau tuke nunin asa. Nunik wajainiu  
 Apajuí chichamen ausatatus, <sup>17</sup>nunitai

papiin Apajuí etsegtin Isaiás agagbaun susaju. Dutikam dakuek diikmá ju agagbauwa juna wainak, auju:

<sup>18</sup> “Wakaní Pegkejig minai awai nuniau asamtai mina etegtuae, ujunauch aidaun pegkeg chicham aidaun ujaktí tusa.

Apajuí minak awetine, achikbau aidaush agkanmagawagtatui tusam ujaktá tusa.

Wainmachu aidaushkam wainmitkakta dutikakum waitkatai aidaush ayamjukta,

<sup>19</sup> tuja yamaik Apajuí aentsun wait anentawai tusam etseggkata” tibauwa nuna.

<sup>20</sup> Nuna aujus inagnak pempeag nui takaun susa ekeemsau. Nunikmatai ashí aents nui utsanawajuk, dii pekajaidau.

<sup>21</sup> Nuniagtai:

—Wi augbau antukujum juka yamai uminkae, —tiuwai.

<sup>22</sup> Ashí aents aidauk niina pachisag pegkejan etsegtuidau, ni wají pegkeg pachisa chichamunashkam puyatjusag diidau, nuninak:

—¿Jujú Josen uchijiya jama? —tuidau.

<sup>23</sup> Tiagtai ni chichaak:

—Dekaskenum jujú chicham: ‘Ampijatnuh, amek ampimata’ tibauwa ju tujuttatjume. ‘Nuigtushkam kuashat wají Capernaum ame dutikamu antinuweg nu, yamai amina nugkemia juwish dutikata’ tujuttatjume, —tau.

<sup>24</sup> Nuna ti nuigtú:

—Dekas tajime: Apajuí etsegtinuk ni nugkenig wakejusa antugmak achauwai.

<sup>25</sup> Junak dekas tajai: Apajuí etsegtin Elías pujujukua nunú tsawantinig, Israel nugkanum batsamajakajui kuashat nuwa waje aidaun, nuniamunum ashí Israel nugkanum nujantai waitiamu tepeauwai, kampakum mijan jimaituk yumi yutachu asamtai. <sup>26</sup> Tujash Apajuik

atumní waje batsatun Elías yaigtí tusa awematsuk, Sareptanmaya nuwa waje judiuchu, yaakat Sidón tikiju awa nui pujaunum Eliasnak awemauwai.

<sup>27</sup> Nuigtushkam kuashat aents jata lepra tutain achimaku Israel aijkauí, Apajuí etsegtin Eliseo pujujukua nunú tsawantin, tujash makichkish nunú aidaunak etsagautsuk, judiuchu Naamán Siria nugkanmayaya nuna etsagajui, —tiuwai.

<sup>28</sup> Tusa tutai jega ijuntainum utsaanawajuk senchi kajekaju.

<sup>29</sup> Nunikag wajatjag Jisusan achiká jukiag yaaktan ukumtikiag mujanum iwakaju, betsag tajaekaunum ajuami tusag. <sup>30</sup> Dutikam dita miniamunmag eteenki, eteenki waketak ukukiuwai.

**Aents wakan pegkegchau  
egkemtuamun Jisus etsagagbau  
(Mr. 1.21-28)**

<sup>31</sup> Nunik Jisusak yaakat Capernaum Galilea nugkanum awa nui weuwai. Nui pujus tsawan ayamtai tsawautai jintinkagtau. <sup>32</sup> Nunitai puyatjusag antujuidau ni jintiamunak, nigka aents chichame antugtai aidaun nagkaesau jintinkagtau asamtai.

<sup>33</sup> Nuniamunum aents wakan pegkegchau egkemtuamu jega ijuntainum wayaa eketu, shiig senchi untsumak:

<sup>34</sup> —iJisus Nazarenumiayah ukujatkita! ¿Wagka amesh jutii pujamunmash miname, ijijatuatasamek minam? Wika ame yaitpa nunak dekgagne, Apajuinu pegkegma nuuwaitme, —tiuwai.

<sup>35</sup> Tutai Jisus jiyagak:

—iItatkata, takamtak jiinkim wegakum aanú aentsuk ukuktá!

Tama wakan pegkegchaushkam aentsun nugká ajiaju tikich aidaun emtin, nunik jiinkiu, dutikashkam aentsnak

machikish pegkegchauk emachui.

<sup>36</sup>Nunikmatai wainkag ashí aents aidauk anentai jegagchaju, nunikag: —¿Jusha wajuku asaya chichamesh senchigtinaita, wakan pegkegchau aidaunash chichamenig jiyaa jusha? —tuidau.

<sup>37</sup>Jisus dutikamua nunak ashí nugka tikiju aidaunum batsatuk antujajui.

**Jisus Pedro tsatsají etsagagbau**  
(Mt. 8.14-15; Mr. 1.29-31)

<sup>38</sup>Jega ijuntainmaya Jisus jiinki Simón Pedro jeen jegauwai. Nunikmá wainkau Simón Pedro tsatsají senchi tsuweak tepettaman, nunitai:

—Wait aneasam etsagagta, —tusag segajui. <sup>39</sup>Tiagtai Simón Pedro tsatsajin jegantun tsuntsumtua: “iTsuwemuwah ukuktá!”, tiu. Tamawaik pegkeg wajasuí, nunik yutain inajuk Jisusan, nuigtú nijai yujau aidaunashkam ajamsau.

**Kuashat jau aidau etsagagbau**  
(Mt. 8.16-17; Mr. 1.32-34)

<sup>40</sup>Agkuantai kuashat aents jaidaun Jisusan ikautkajui, dutikawagmatai niishkam makí makichik achiká etsagakui. <sup>41</sup>Tuja wakan pegkegchau aidau kuashat aentsun egkemtujuk senchi untsamak jiinainak:

—Amek Apajuí Uchijiyaitme —tuidau, Kristuk Apajuí awemamua nuna dekaidau asag, tujash Jisusak chichaktí tusag idaichau.

**Jisus jega ijuntai aidaunum chichagkagtukbau**  
(Mr. 1.35-38)

<sup>42</sup>Nunik tsawau tsawaig yaaktanmaya jiinki, nugka agkantu aents atsamunum

weuwai. Nunikmatai aents aidauk egai egainakua ni pujamunum jegawag: —iUkujatkipa! —tusag segaidau.

<sup>43</sup>Tuinam:

—Wika tikich yaakat aina nuwish yamajam chicham Apajuí aentsnum wajuk inamua nunak etsegkattajai, nuna nunikti tusa awemamuitjai, —tiuwai.

<sup>44</sup>Tau asa, Galileanum<sup>c</sup> jega ijuntai aidaunmash wayaa jintinkagtau.

**Kuashat namak achikbau**  
(Mt. 4.18-22; Mr. 1.16-20)

**5** <sup>1</sup>Tikich tsawantai Jisus kucha Genesaretnum uwet wekagai, kuashat aents Apajuí chichamen antukagtatus tuwakag chanuidau. <sup>2</sup>Imaniagtai niimkamá, jimag bote anugkam tepettaman wainkau, namaká main aidaushkam botenmaya jinjag redjin nijainak batsamtuidaun. <sup>3</sup>Nunik Simogka botejin egkemag: Machik ejapeen inanmanta, tusa nui ekeemas aents tuwakun jintintu. <sup>4</sup>Nunik ashimak, Simogkan chichajak:

—Wiyankam ejapeen emam redjum ajugkam namak maata, —tiuwai.

<sup>5</sup>Tama Simón ayaak:

—Jintinkagtinuh, kashi tuke ajú ajunkawa tsawampakuish makichkish maachmaji, tujash ame chichamjumin ajugtajai, —tusa <sup>6</sup>ajugkú. Dutikkamá shiig kuashat namakan achikú, imatikamu asa rednak ichiau. <sup>7</sup>Nunitai ditá kumpají tikich botenmayan iwiyaaidau, taawag yaimpaktinme tusag. Dutikam kautuwaju, nunikag namaknak botenmag mai aimkaju, dutikam botek tepeattak wajau.

<sup>8</sup>Imanitai Simón Pedro, Jisusan tikishmatug pujujus:

**c 4.44** Tikich papí agagbaunmag “Judea” tuinai, tikich agagbauwa nui “Galilea” tawa nuwiya jukimui, nunin asa mai pegkejai.

—Apuh, ukugkita minak, wika shiig tudauwaitjai, —tiu.

<sup>9</sup>Namakan imatika kajegkaju asag, ditajai yujaidauk puyatkajui, <sup>10</sup>Simogjai ijunja namak mautaiji aidau Jacobo, Juan Zebedeo uchiji aina dushakam. Nunitai Jisus chichajak: —Simogkah ishankaipa, namak maatasajum yujagjum anmamtuk, Apajuí chichame etsegkujum aents aidau minai ikautjin atajum tusan wi jintintuatjime, —tiu.

<sup>11</sup>Nunikag bote aidauanak anugkag, ashí ukuinak Jisusjai wegajui.

**Jisus aents jata lepra  
achikbau etsagagbau**  
(Mt. 8.2-4; Mr. 1.40-45)

<sup>12</sup>Tikich tsawantai Jisus makichik yaaktanum pujai, aents lepragtin tajauuwai, nunik Jisusan wainak tikishmag tsunsumá, nijayin nugká antig pujusá:

—Apuh, wakegakmek etsaentumainaitme, —tau.

<sup>13</sup>Tama Jisuschakam uwejen antiak:

—Wakegajai, yamaik tsagagta, —tiuwai.

Tusa tamawaik leprak megkaekauwai.

<sup>14</sup>Dutika Jisus:

—Makichik aentskesh ujakaipa, tutupit sacerdote pujamunum jegaata, nuniakum ame tsagaja pegkeg webaujum iwainmamkum, Moisés tibauwa dutiksamek ejegata ditashkam: Dekaskeap tsagaje, tujabiagti, —tiu.

<sup>15</sup>Tujash ni dutikamua duka senchi naatu, nuniau asantai tuwajuidau ni chichamen antugkagtatus, nuigtú dita jaamujinash etsaentugtinme tusag.

<sup>16</sup>Tujash nigka kanaká nugka agkantunum wegau, nunik Apajuin auju.

**Jisus aents wekaechau etsagagbau**  
(Mt. 9.1-8; Mr. 2.1-12)

<sup>17</sup>Makichik tsawantai Jisus jintinkagtutai fariseo aidau, chicham

umiktinun jintinkagtin aidaujai wayawag antuinak pekajaidau, Galilea nugkanmaya, Judea nugkanmaya, nuigtú yaakat Jerusalén batsamin aidau kaunkajushkam, nunik wainaidau Jisus Apajuí senchijin aents jau etsagamun. <sup>18</sup>Nuniamunum wajumak aents aidau, aents wekaechaun ainká tepetaijin pataidiag itawag: Wajuk jegá wayaik Jisus wajamunum ejentag, tuidau. <sup>19</sup>Tujash kuashat aents tuwakú asa waimainchau asantai, jegá tuntunpen wakag chigkaidiag, wekaechauwa nuna ainká tepetaijijai nenawag akakiaju, dutikawag Jisusa emtin aepsaju. <sup>20</sup>Nunú aents aidau niiní kajinas anentaimaidaun wainu asa:

—Aishmagkuh, amina tudaujum aidauk tsagkugnaje, —tau.

<sup>21</sup>Nuna tutai chicham umiktinun jintinkagtin aidau, fariseo aidaujai ditak anentaimsag: “¿Niish ya asaya Apajuinash pegkegchaunash chichajua? Imá Apajuikeajama tudaun tsagkugkagtumainuk”, tuidau.

<sup>22</sup>Tu anentaimaidaun Jisus dekau asa:

—¿Wagka annush anentaimjume?

<sup>23</sup>¿Tuwaita imá yupichuch tumainush, tudaujum aidauk tsagkugnaje taja dukaih, atsa nantakim wetá tumainaitag dukaih? <sup>24</sup>Tujash wi Apajuí Uchijiyaitkun Aentsmaga Akiinau asan, ju nugka juwish tudau aidauunash tsagkugkagtumainaitag nu dekaatajum.

Tusa wekaechaun chichajak:

—Amina tajame, nantakim ainká tepetaijum jukim jeemin wakitkita, —tiuwai.

<sup>25</sup>Tusa tamawaik ditash ijunaig, nantakí ni ainká tepamujin juki Apajuin emematki jeen wakitkiuwai.

<sup>26</sup>Dutikamtai ashí aents aidauk puyatkag Apajuin emematuinak:

—iYamai dekas wainkaji Apajuí senchijiya duka! —tuidau.

**Jisus Levin mina  
jintintaig atá tibau**  
(Mt. 9. 9-13; Mr. 2.13-17)

<sup>27</sup>Nuna dutika ukuak jiinkiu, nunik wekamá Levin<sup>d</sup> wainkauwai, kuichik apunu atinun akikmagtai yajumak ekeematman, nunik:

—Mina jintintaig atá, wemí, —tiuwai.

<sup>28</sup>Tama ni takataijinak ashí ukuak Jisusjai weuwai.

<sup>29</sup>Nunik nunú tsawantaik Jisusan eme anentus ajamsatatus niina jeen yutain shiig umikú, dutikamunum Leví kumpají, apú kuichkiji atinun yajumin aidaushkam, nuigtú tikich aidaujai mesanum pekajaidau. <sup>30</sup>Nuniagtai chícham umiktinun jintinkagtin aidau fariseo aidaujai, Jisusa jintintaiji aidau ashishmatuidau, nuninak:

—¿Wagka atumesh apú kuichkiji atinun yajumin, nuigtú aents pegkegchau aina ibaujai ijunajum yuwakjumesh, umutash ditajais umajume? —tuidau.

<sup>31</sup>Tiagtai Jisus ayaak:

—Aents jamamtuchu aidauk ampijatnunak atsumtsame, aents jau aidau ampijatnunak atsumame. <sup>32</sup>Wika aents tudaugtuchu aidauk minitchauwaitjai, wika aents tudaugtin aidau tudaujin idayinak mina nemagtuktinme tusan tauwaitjai, tiuwai.

**Ijagmaka pujusá Apajui  
aujut iniimsamu**  
(Mt. 9.14-17; Mr. 2.18-22)

<sup>33</sup>Jisus tutai dita aiinak:

—¿Wagka Juan Yamijatna nuna jintintai aidauk, fariseo aidaujai yujumkan ijagmainaish, amina jintintaijum aidauk yuwinak, umutnash umu wajaash yujainawa? —tuidau.

<sup>34</sup>Tutai ni ayaak:

—¿Nuwena nunú aents ipaamu aidaush, nu nuwenu ditajai pujaigkish, yujumkan ijagmak pekamainkaih? <sup>35</sup>Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak yujumkanak ijagmakagtatui, —tiuwai.

**Jisus jintinkagtak yamajam  
jintinkagtamua duka yaunchuk  
jintinkagtutai aina nujaig  
pachiimait sui tibau**  
(Mt. 9.16-17; Mr. 2.21-22)

<sup>36</sup>Tusa junashkam augmatus:

—Makichkish nugkutai yamagman tsupikag nugkutai mamujunmag adujtuchu ainawai, dutikamak nugkutai yamagmaitak besemain asamtai, tuja yamajam tsupikbau mamujunum adujtamashkam shiig juwamaitsui. <sup>37</sup>Tuja makichkish uva yumiji yamá ijugbaunak, vino yajatai duwap apagbau ajutnumag yajachu ainawai, dutikamak uva yumiji yamá ijugbau kajiak, duwap apagbau ipatmainai, nunik vinuk ukagag duwap apagbaujai ajapnamainai. <sup>38</sup>Duwi uva yumiji yamá ijugbauk duwap yamajam apagbaunum yajataiyai, dutikamu asa vino kajiak pushutakushkam ayatak egkenag wetai nunisag pegkejak amainai. <sup>39</sup>Tuja umutai yaunchuk najanamun umin aidauk, yamagmanak wakegainatsui, ditak: ‘Yaunchuk najanamua nu imá pegkejai’ tuidau asag, —tiuwai.

**Jisusa jintintaiji aidau tsawan  
ayamtai aig trigo jukí yuwawagbau**  
(Mt. 12.1-8; Mr. 2.23-28)

**6** <sup>1</sup>Tsawan ayamtai tsawaju ai, Jisus ajak ajakbaunum nagkaebau. Nuniamunum ni jintintaiji aidau trigo nejeen kupik jukiag uwejen pakajag

yuwidau. <sup>2</sup>Nuniagtai fariseo aidau ditan chichajuinak:

—¿Wagka atumesh tsawan ayamtai tsawagmataig takantsashti tibauwa nunin aish aikagme? —tuidau.

<sup>3</sup>Tiagtai Jisus ditan ayaak:

—¿Atumek agagbauk ausachuk ainajum, David niijai yujaamujai yapajuinak, <sup>4</sup>jega Apajuí ememattainum wayaa, pag imá sacerdotek yuwati tibauwa nuna juki, niina kumpají aidaujai yuwawajua duka? —tau.

<sup>5</sup>Nuna ti, nuigtú chichaak:

—Wi Apajuí Uchijiyaitkun Aentsmagan Akiinau asan, tsawan ayamtai tsawagmataish wajukmainaita nunak wiktijai tumainnuk, —tiuwai.

**Tsawan ayamtai tsawaju aig aents uweje chuwijun Jisus etsagagbau**  
(Mt. 12. 9-14; Mr. 3.1-6)

<sup>6</sup>Atakeshkam tsawan ayamtai tsawagmatai, Jisus jega ijuntainum wayaa jintinkagtau. Nuniamunum aents uweje untsujiya nu chuwijú nui pujau.

<sup>7</sup>Nunitai chicham umiktinun jintinkagtin aidau, fariseo aidaujai Jisusan diidau, tsawan ayamtai aig etsagaun wainkag tsanumjugasag. <sup>8</sup>Tujash nigka dita anentaibaujinak dekau asa, aents uweje chuwijun chichajak:

—Wajakim ejapeen wajantá.

Tama niishkam wajakí ejapeen wajantú. <sup>9</sup>Nunikmatai Jisus chichaak:

—Iniaštajime: ¿Tsawan ayamtai aish pegkeja duká takamainait, atsa pegkegchauk dutikmainait? ¿Tsawan ayamtai tsawaje tusaik, aentsuk etsagautsuk jakati tusa idaimainait? —tau.

<sup>10</sup>Nuna ti ashí aents nui ijunun diisá, nuna aentsun chichajak:

—Uwejum dakuekta, —tiuwai.

Tama dakueku, nunik uwejenig pegkeg wajasú. <sup>11</sup>Dutikamtai senchi

kajekag: Jisusash itugmainkita tusag ditá ditak chichaidau.

**Jisus chicham etsegtugkatajum tusa ishiaktinji doce etegjamu aidau**  
(Mt. 10.1-4; Mr. 3.13-9)

<sup>12</sup>Tikich tsawantai Jisus Apajuin ausatatus mujanum weu, nunik nui kashi pujus Apajuí au aukawa tsawampajui. <sup>13</sup>Nunik tsawaag ni jintintaiji aina nuwiyau doce etegkeg ijumjauwai, nunú aina nunak: “Mina chichameg etsegtujin atajum”, tiuwai. <sup>14</sup>Duka jujú ainawai: Simón, Pedro atí tibauwa nu, Andrés Simogka yachi, nuigtú Jacobo, Juan, Felipe, Bartolomé, <sup>15</sup>Mateo, Tomás, Jacobo Alfeo uchijí, nuigtú Simón niina nugken agkanmitkatatus kuashat aents aidaujai chichaajakua nu. <sup>16</sup>Judas Jacobo yachi, tikich Judas Iscariote Jisusan unupiang sujukua nu aatus.

**Jisus kuashat aents jintintuamu**  
(Mt. 4.23-25)

<sup>17</sup>Nunik ditajai ijunag akaiki, pakanum wajantú ni jintintaiji aidaujai. Nunikmatai kuashat aents tuwagkaju ashí Judeanmaya, Jerusalegnumia, Tiro nayants awa nuwiya, Sidognumia aidau, ni jintinkagtamujin antukagtatus, nuigtushkam dita jaamujinash etsaentugti tusag, <sup>18</sup>nuniagtai wakan pegkegchau egkemtugbau aidaunash etsagakui. <sup>19</sup>Ashí aents aidauk Jisusan antigtatus kakanmamaidau, niiniya senchi jiiinak ashí aents jau aidaunak etsagau asamtai.

**Shiig aneasjum pujustajum tibau**  
(Mt. 5.1-12)

<sup>20</sup>Jisus ni jintintaiji aidaun diisá chichajak: “Atum iik nagkamik iina senchijinig pegkeg pujuta duka jumaitsuapi tautigmek shiig aneasjum

pujustajum, Apajuí atumiin inamjatin asamtai”, tau.

<sup>21</sup>“Atum yamai Apajuinu pegkeg takastasa wakegakjum, yapajaku waitmaina imanikjum waitiautigmek shiig aneasjum pujustajum, atumnak Apajuí kuashat amastin asamtai. Atum yamai wake besemag batsatkujum buutú pujautigmesh shiig aneasjum pujustajum, atumek shiig aneakjum dushigtin asajum.

<sup>22</sup>“Wi Apajuí Uchijiyaitkun Aentsmagan Akiinauwaitag nunú nemagtuidau asagmin, aents aidau kajegtamainak yajá pujusta tusa jiiipainak, pegkegchau chichagtamainak, daagmin adaisajash pegkegchau tujamainakuish shiig aneastin atajum. <sup>23</sup>Nuna imatjutpainakuish shiig aneasjum dakujustajum, atum nayaimpinum jukitna duka wají shiig pegkeg kuashat ajutjamaidau asamtai. Atumi muunjum aajakajua dushakam, yaunchuk Apajuí etsegtin batsamajakajua nunashkam aatus waitkasaju ainawai.

### **Shiig aneas pujuschagtinai tibau**

*(Mt. 23.13-36)*

<sup>24</sup>“i Tujash atum wiyakuch aidautigminak wait anentajime! Atumek shiig aneasjum pujajume ashí ajutjamaidau asamtai, tujash atak waittsatin ainagme.

<sup>25</sup>“i Atum atumkas yuwá batsatutigminak wait anentajime! Atak yapajakjum waittsatin asagmin.

“i Atum yamai uyumat aneakas ayatak dushit batsamtautigminak wait anentajime! Atumek waitiakjum buuttin asagmin.

<sup>26</sup>“i Atum ashí aents pegkegnum chichajam aidautigminak wait anentajime! atumi muunjum aajakajua dusha imatikas chichajujakajui waitá etsejin aidaun.

### **Shiwajum aidau aneetajum tibau**

*(Mt. 5.38-48; 7.1-2, 12)*

<sup>27</sup>“Atum mina chichameg antugtautigmin tajime: Atumi shiwajum aidaush aneetajum, kajegtamaidaushkam pegkegnum yaigtajum; <sup>28</sup>pegkegchau chichagtamaidaush pegkegnum chichagkatajum, wainak tsanumjutpainakuish Apajuí aultustajum. <sup>29</sup>Yapinum awatamkujaish, juinia yapijuish awatita tusajum ayampatuatajum; pataká awantak nugkuagbaugmin jujutjamkujaish, tikitchakam susata. <sup>30</sup>Atsumamun segapainakuig sujittsuk susata; tuja atumin wajiigmin segapatsuk jujutjamkuishkam, awagtugkita tutsuk idaisatajum. <sup>31</sup>Atum tikich aidau shiig awajuktinme tusajum wakejin ainajum nunisjumek tikichish shiig awajkatajum.

<sup>32</sup>“Atumin anempa duke atumshakam aneakjumesh, ¿wají imana juwagme? Aents tudaugtin aidaushkam dita aneniamujaig aneninawai. <sup>33</sup>Atumin pegkegnum yaimpaina duke yayakjumesh ¿wají imana juwagme? Aents tudaugtin aidaush dita yainiamujaig yainin ainawai. <sup>34</sup>Atumí kumpajum kuichkin waamak awagtugmamaina duke tsagkatkugmesh ¿wají imana juwagme? Aents tudaugtin aidaushkam kumpajin tsagkatkag awagtugkitpash tusag dakainawai. <sup>35</sup>Atumí shiwajum aidaush aneetajum, nuniakjum pegkegnum yaimkatajum, tuja tsagkatkagtukmesh betekash awagtugkit tusagmek anentaimtú pujuigpa. Atum jukitnuk nayaimpinum kuashat wají shiig pegkeg aidau ajutjamiagtinai, aaja dutikakjum Apajuí uchijí atinaitjume. Nigka aents pegkegchau, niina see tuchau aidaunash wait anentin asamtai, <sup>36</sup>wait anenkagtin



atajum, atumin Apa nayaimpinum  
pujuwa nu wait anenkagtina ibau  
asamtaí.

**Tikichi pujutji pachisjumek  
augmatigpa tibau**

(Mt. 7.1-6)

<sup>37</sup>“Tikichi pujutjig augmatú  
yujaigpajum, Apajuí atumnash aikasag  
tujaminum. Tikich suwimak  
susatasagmesh chicham umijú  
yujaigpajum, Apajuí atumnash tikich  
itujajum dutiksag dutijamawainum.  
Dekas tsagkujatajum, Apajuí atumnash  
tsagkugtamtatnume. <sup>38</sup>Tikich  
atsumaushkam susatajum, atum tikich  
wajuk suwajume, dutiksag Apajuishkam  
atum atsumamunak amastatjume.

**Tikich augmatigpa tibau**

(Mt. 7.3-6, 15-23; 12.34-35)

<sup>39</sup>“Jisus junashkam augmatak tau:  
¿Wainmachush tikich wainmachunash  
jintanash inaktumainkaih? ¿Mai  
waanum iyaumainchaukaih?  
<sup>40</sup>Jintinbauwa duka jintinkagtinun  
nagkaesauk dekatsui. Untsu papí  
augbaujin ashimak, jintinkagtinjai betek  
wemainai.

<sup>41</sup>“¿Wagka yatsum imanchau takaish,  
atum imá pegkegchau takaayatkugmesh,  
auk pegkegchaun takaawai tusagmesh  
augmatú yujagme? Nu nuniakjumek  
aents niina jiin tsetse muun egketun  
waintsuk, tikichi jiin tsetse piipich  
egketun wainmaina numamtuk  
wajagme. <sup>42</sup>¿Itugsagmek atum imá  
pegkegchau takaajum nu  
wainmamchautigmesh: Yatsujuh,  
pegkegchau takaam duka idaisata  
titagme? ¡Aentsú tsanú aidauwah!  
Dekas dekatkauk ame imá pegkegchau  
takaam nuuwá idaisam, duwi yatsum  
imanchau takaidaushkam, idaisata  
titajum.

**Numik niina nejenig dekamainai  
wají numiita duka**

<sup>43</sup>“Ajak pegkeja duka pegkegchaunak  
nejemaitisui, ajak pegkegchaushkam  
pegkegnak nejemaitisui. <sup>44</sup>Ashí ajak aina  
duka niina nejeen dekanui, untukjak  
munchiinak nejetsame, aantsag  
uvashkam jagkinmayag juushtayame.  
<sup>45</sup>Aents pegkejak pegkegnumag  
anentaimu asa, chichaakush pegkegnak  
chichauwai. Nunisag aents  
pegkegchaushkam pegkegchaunak  
anentaimu asa, pegkegchaunak  
chichawai. Aentsuk ni wajukuna  
anentaimua, nunak chichaak iwainawai.

**Jega jegabaun pachis Jisus  
augmattsamu**

(Mt. 7.24-29)

<sup>46</sup>“¿Wagka mina chichameg  
umigtachiatkugmesh: ‘Apujuh, Apujuh’  
tujutjume? <sup>47</sup>Ashí aents mina  
nemagtuidau, mina chichamjun  
antugtukag imatiksag umigtuidaush  
wajukuíta nuna titajai. <sup>48</sup>Duka aents  
jegá jegamkatatus inítak tai, kaya  
muunnum dekanmitkak ajia shiig  
jegamkamun, namak piyujak senchi  
tukuakush, makichkish umuchkachua  
numamtinai. <sup>49</sup>Tujash mina chichamjun  
antayatak umigtachuk, aents jegá  
jegamak, nugka suugnum kaya  
atsamunum inítak ajitsuk jegamkamun,  
namak dujajua piyujak senchi tukú  
tegak ajapama numamtinai.”

**Capernaumnumia capitani  
inake etsagagbau**

(Mt. 8.5-13; Jn. 4.43-54)

**7** <sup>1</sup>Jisus jintinkagtamujin ashimak  
Capernaum weuwai. <sup>2</sup>Nui capitani  
inake dekas aneetaiji jakattak tepau.  
<sup>3</sup>Nuniau asamtaí capitán Jisus pachisa  
chichaamun antuk, judío apuji aidau

wajumak awetiuwai: Wait aneas taa mina inakeg jaa juna etsaentujati, tusa. <sup>4</sup>Tima Jisusan jegajiag ujakaju, nuninak:

—Au capitanik dekas wait aneasam yaimainaitme. <sup>5</sup>Nigka judfo aidautinash anejatnuwe, nuniau asa jega ijuntainash jegamjupakmayi.

<sup>6</sup>Tiagtai Jisuschakam ditajai weu. Nunikag jegá tikiju wajasá weenai, capitán<sup>e</sup> niina kumpaji aidaun awetiu, dutikak: “Apu kajegtukaigka, wika niya ibaunak mina jegajuig awaimaitsujai, <sup>7</sup>nuniau asan wi niina egamainnash egakchamjai, ayatak tsagagti tujutti tamak mina inakjush tsagagtatui. <sup>8</sup>Wi apu umigbau ajutui, aantsag suntag mina umigtuidau ajutuinauwai, nunú aidaun wi: Jiinjajum shiyaktajum, tamak jiinag shimumainai, tuja: Waketjatajum, tamashkam waketug kaunmainai, nunisag mina inakeg aidaushkam: Ju dutikata, tamak betek umigtuinawai. Aantsag Jisus anuí pujusag, tsagagti tamak mina inakjush tsagaumainai tujamae”, tuidau. <sup>9</sup>Tuinam Jisus antuk anentai jegagchau, nunik nui aents minidaun ayampattsag: —Israel aina nuigkish imatikas minai kajinas anentaimunak wainchaujai, —tau. <sup>10</sup>Nunú awemamu waketug jegá kaunkamá inak jaa tepau ukukbauk, tsagag pegkeg pujaun wainkaju.

**Nuwa wájé uchijí jakau  
Jisus inankimu**

<sup>11</sup>Nuna nunik Jisus yaakta Naín tutainum wegau. Nunitai ni jintintai aidaun nuigtú kuashat aents aidaun saetukaju. <sup>12</sup>Nunik yaakta waitijin tikiju wajas wegai, nuwa wájé uchijí makichkiuch ajamu jakamtai ukustatus

emaidau, nunitai nuwan uyunainak kuashat aents weedau. <sup>13</sup>Nunittaman Jisus wainak wait anenjau, nunik nuwan chichajak:

—Buutipa, —tiu.

<sup>14</sup>Tusa ukuak jakau egkea yanasá wegamun antigku. Dutikamtai yanasá weedaush wajantaju, nunikmatai chichajak:

—Datsauchih nantaktá, —tiu.

<sup>15</sup>Tusá tamawaik jakaushkam nantakí chichau, nunikmatai dukujin susauwai.

<sup>16</sup>Dutikamtai ashí aents aidauk ishankag Apajuin emematuinak:

—Apajuí etsegtin dekas senchigtin jutiinish ajutjamji, Apajuí ni aentsji aidautin yaimpaktatus awetugmaji, —tuidau.

<sup>17</sup>Nu dutikamuk ashí Judeanmag antuejau, nui tikiju aneem batsatu aidaunmashkam.

**Juan Yamijatn ni jintintaiji aidaun  
chicham dekaatajum tusa ishiakbau  
(Mt. 11.2-6)**

<sup>18</sup>Jisus dutikamun Juagká jintintaiji aidau antukag, Juagnashkam ujakaju. Dutika ujaam ni jintintaijin jimajan untsuká, <sup>19</sup>Jisus pujamunum awebau iniastinme:

“¿Amekaitam Apajuí uwemtikagtinun awematnaitjai tibauwa nunú? ¿Amechuitkuminig tikichnak dakastatag?” tusa. <sup>20</sup>Tusá awemajam Jisusan kautuawag:

—Juan Yamijatna nu amina iniasti tusa awetamaji, nuniak: ¿Amekaitam Apajuí uwemtikagtinun awematnaitjai tibauwa nunú, amechuitkuminig tikichik dakastatag? timae, —tuidau.

<sup>21</sup>Nuna tuinaig aents jau aidaun, tikich jatai waituidaunash, wakan pegkegchau egkemtuamu aidaun, nuigtú wainmachu aidaunashkam etsagaku. <sup>22</sup>Dutika Jisus ditan ayaak:

—Wetajum, nunikjum atum wainkaujum ju, nuigtú antukujum dushakam Juan ujaktajum: Wainmachush wainmainawai, shutushkam wekagainawai, lepragtin aidaush tsagainawai, empekush antuinawai, jakaush nantainawai, tuja ujunauch aidaunash yamajam chichaman jintinmae tusajum. <sup>23</sup>Nuaduí wi takaamujua nuna wainainak dekaskeapi tujutuidauk, shiig aneasagtinaí timae tusam ujaktá, —tiu.

**Juan pachisa Jisus etsegkamu**

(Mt. 11.7-15)

<sup>24</sup>Juan awemamu aidau waketjamtai, Jisus Juangkan pachis aents aidaun iniak: “¿Wají wainkatasagmea uwegshunmash wegabiugme? ¿Tagkanaan dase umpuau wainkatasagmek wegabiujum? <sup>25</sup>Nuniachkugmesh ¿wají wainkatasagmea wegabiugme? ¿Aents shiig iwajamun nugkujá pujau wainkatasagmek wegabiujum? Atumek dekagme, nugkutai iman iwajamun nugkujá iwagmamaidauk apú jeen pujuinawai. <sup>26</sup>Tujash ¿wají wainkatasagmea wegabiugme? ¿Apajuí etsegtinuk wainkatasajum wegabiujum? Dekas tajime: Duka Apajuí etsegtin aajakajua nuna nagkaesauwai. <sup>27</sup>Apajuí etsegtin niina pachis agajua duka juuwai:

‘Wi mina chichamjun etsegnun amina emtimin awemajai, ni jintanak umigtamkattawai’, tawai.

<sup>28</sup>Dekas tajime: Ju nugka juwi akiinaidauk Juan Yamijatna nuna nagkaesauk atsawai, tujash Apajuí inamtainig aents dekas imanchauchia nuuwai Juangkan nagkaesauk.

<sup>29</sup>“Nunú tabaun antukag ashí aents aidau, nuigtú apunu atinun kuichki yajumin aidaushkam, Apajuí

nuniktajum tibaun umiinak yamimakajui Juan yamijatbaunum. <sup>30</sup>Tujash fariseo aidauk, chicham umiktinun jintinkagtin aidauijak dakitjaju Apajuí umiktajum tibauwa nu umitnak, nunidau asag Juan yamijatbaunash pachikchajui.”

**Juangkan dekaskeapi tichaju aidau**

(Mt. 11.16-19)

<sup>31</sup>Nuniagtai Jisus chichajak: “¿Wajina pachisan takunua antumtikmainaitjime?

<sup>32</sup>Atumek uchi aidau kuashat aents ayamunum pekaamsag wasugkamainak: Wi nantsematnume tusan flauta tutaya nuna umpuakuish nantsemachmaugme, wake besemjan kantamtai buuttinme tamash, buutchamugme tusa pempeentuniki untsuniyama numamtuk wajagme. <sup>33</sup>Juan Yamijatna nunú yutai aidaunash yuwachu, vinunash umachu asamtai chichagkujum: Wakan pegkegchau egkemtuamu asa aniawai, tajume. <sup>34</sup>Tuja wi Apajuí Uchijiyaitkun Aentsmagan Akiinaun yutainash yuwakun, umutain umaish: Ju aentsua juka ayatak wekagas yu wekaewai, umutnash umú wekaewai, nuniau asa apú kuichkiji atinun yajumin tudaugtin aina nuna kumpajiyai, tujutjume.

<sup>35</sup>Tujash Apajuí umijuidau wajuk pujuinawa nuna wainainak, Apajuí yachajiya nunak dekamain ainawai.”

**Makichik fariseo Simón daagtin**

**Jisusan ipaamu**

<sup>36</sup>Makichik Fariseo Jisusan mina jegajuí yujumak yuwami tusa ipauwai. Tima nuna jeen wayaa mesanum jegan ekeemsauwai. <sup>37</sup>Nuniai nuwa nu yaaktanmaya pujutji pegkegchau ajamu, Jisus fariseo jeen yujumkan yuwatatus we tabaun dekaa, kaya alabastro tutai botella najanamunum kugkuin shiig pegkejan juki tajuntau. <sup>38</sup>Nunik Jisusa

naween ayaumas pujus buutak nawen negaikiajui, dutika intashinig ujugtau, nuniak nawen kugkuntak kugkuinui ukatkauwai. <sup>39</sup>Dutiktai fariseo Jisusan ipauwa nunú nigki aentaímas: “Jujú Apajú etsegtinaitkug dekamainapi ju nuwa pujutji pegkegchau niina antia nuna”, tau.

<sup>40</sup>Nunitai Jisus chichaak:

—Simón, iniastajame.

Tutai:

—Jintinkagtinú tujutta, —tau.

<sup>41</sup>Tutai Jisus ayaak:

—Aents kuichkin tsagkatkagtinun jimag aents diwimaidau, nuniamunum makichkia nu quinientos tsawantai takasá akikmamainun kuichkin diwimai, tikichia nu cincuenta tsawan takasá akikmamainun diwimu. <sup>42</sup>Nunidaun akikmamainji atsujiagtai mai tsagkujauwai. Yamai tujutta: ¿Ju jimaja juwiyash tu imá senchish aneemainaita? —tau.

<sup>43</sup>Tama Simón ayaak:

—Diwijí imá muun ajamu tsagkujamua nu imá senchi nunak aneemainai tajai. Tutai: Duka dekas tame, —tiu.

<sup>44</sup>Tusa nuwan diis Simogkan chichajak:

—¿Ju nuwa wainmek? Wi jeemin wayamtaish daweg nijamainkesh yumik sujuschamume; tujash jújú dawejun negaikiajui ni intashinig ujugtjuae.

<sup>45</sup>Kumpamjakmekesh minak kugkuntsachmaume; tujash ju nuwa juka wayamag duwi nagkamas dawegnak kugkunjú pujawai. <sup>46</sup>Buukeajuish asaitaikish nijatkashmaume; tujash jújú kugkuinui dawejun nijatjuje. <sup>47</sup>Nunin asamtai tajame; ni tudauji shiig kuashta duka ashí tsagkugnaje, dutikamu asa imá senchi anentui, tujash aents tudauji ujumak ajamu tsagkujamuk ujumak anentui.

<sup>48</sup>Nuna ti nuwan chichajak:

—Tudaujum aidauk tsagkugnaje, —tiu.

<sup>49</sup>Tuja mesanum niijai pekajaidauk ditak pempentunisag chichainak:

—¿Jusha ya asaya tudaunash tsagkugkagtawa? —tudayinau.

<sup>50</sup>Tuinaig nigka nuwan chichajak:

—Ame kajintsá anentaibaunum uwemjaume, shiig aneasam wetá, —tiuwai.

### Nuwa aidau Jisusan yaigbau

**8** <sup>1</sup>Nuna nunik Jisusak kuashat yaakat aidanum, nuigtú yaakta ukukiag aents batsataidaunmash wekagas, yamajam chichaman Apajú nuní inapaji tusa chichagkagtau, nunitai chicham etsegtkata tusa ishiaktinji doce etegjamu aidau uyunaidau. <sup>2</sup>Nunisag nuwa wakan pegkegchau aidau egkentuamu, nuigtú jau aidau etsagagbau aidashkam uyunaidau. Nuanú pachtikau María Magdalanmaya, siete wakan pegkegchau egkentuamu jijjamua nunú, <sup>3</sup>tikich Juana, Chuza Herodesa kuichkijin kuitamnun nuwe, nuigtú Susana, tikich nuwa aidaujai kuichkin ijumag sumakag. Jisusan ni etegjamuji aina nujai atsumiagtaish yaidau.

### Ajakan ajakbau pachisa Jisus augmattsamu

(Mt. 13.1-9; Mr. 4.1-9)

<sup>4</sup>Kuashat aents yaaktanmaya aidau Jisusan wainkatasag wegaju, nunikag shiig kuashat tuwakagmatai augmatak tau: <sup>5</sup>“Ajakan ajakbau ajajin ajaka jigkayin nagkimak ukutatatus weuwai, dutika ajakmau asa. Nunik ajajin jegaa nagkimkau, dutikam wajumak jigkai jintaa kakekauwai, nunikun aents najakag ukukbaun yakiya pishak kaketuk amukajui. <sup>6</sup>Tikich jigkai kayá

awanken nugka machik aunum kakekauwai, nunik tsapainiuwaitak jakauwai chupitnuchu asamtai. <sup>7</sup>Tikich jigkai kakekajui jagki ayaunum, dushakam tsapaidiajuitik jagki yutuam jinauwai. <sup>8</sup>Tuja tikich jigkai nugka dekas pegkegnum kakekauwai, nunikajuk tsapaidiag muun wajas makí makichik ajak aidau cien jigkain nejewawajui.”

Nuna ti inagnak senchi jiiká chichaak: “Dita antutaiji ajamuk antuktinme”, tiuwai.

<sup>9</sup>Nuna augmatus ashimkamtai niina jintintai aidau Jisusan:

—¿Apuh wájí takumea ajakan ajakbau pachismesh timaume? —tusag iniidau.

<sup>10</sup>Tama Jisus ayaak:

—Atumnak Apajuí ni aentsnum inamjatnuji dekajakchamun, Apajuí aentsnum inama nuna pachisan wi yamai etsejag nunash shiig dekamtijamatatus wakejutpagme. Tujash tikich aidaunak ayatak augmatbaun pachisan ujaajai, dutikamu asag ditak wainkujash wainmachu wajukmaina nuninawai, antakush antuchu wajukmaina nuninawai, —tiuwai.

**Ajakan ajakbau timag nunak juna takun timajai tusa Jisus etsegkamu**  
(Mt. 13.18-23; Mr. 4.13-20)

<sup>11</sup>“Wi ajakan ajakbaun augmattsan timag nunak juna takun timajai: Jigkaiya duka Apajuí chichamega nuuwai. <sup>12</sup>Jintá jigkai kakekaun pishak amukuí timag nunak, aents Apajuí chichamen antittaman iwanch juwatki, chicham ni anentain wayaun dekaskeapi tuinak, uwemjainum tusa yajuta nuna takun timajai. <sup>13</sup>Tikich jigkai kayá awanken nugka machik aunum kakekauwai timag duka, aents

chichaman antuk dekaskeapi tusa wakegas nemajuidau, utugchatnum jegaak idayina nuna takun timajai. <sup>14</sup>Tuja tikich jigkai jagki ayaunum iyaaju timag duka, aents Apajuí chichamen antuinayatak, ju nugkanum wiyakchameauta nuna uyumainak, nuigtú niina shiig awagma nunak puyatjuinak, Apajuí chichamen pachitsuk idayinawai, nunin aidauk ajak nejechua nunin aina nuna takun timajai. <sup>15</sup>Tujash jigkai nugka pegkegnum iyaaju timag nunak, aents Apajuí chichamen antukag dekaskeapi tusag nemagkag, wakejus chichaman umiina nuna takun timajai. Nunin asag ajak shiig senchi nejekajua nunin ainawai.

**Lámpara pachisa augmattsamu**  
(Mr. 4.21-25)

<sup>16</sup>“Makichik aentskesh lámpara ekemakajag dukukag idaichau ainawai, dutikachkush pegaká wakentinkish awayag apujchau ainawai. Dutiktuk ekemakajag yakí ekenin ainawai, wayatatus minidaush tsaaptinun wainkatnume tusag. <sup>17</sup>Numamtuk yamai uukbauwa nunik awa juka, atak paan wantinkatnai. Aantsag yamai dekamainchauwa dushakam atak shiig dekamun atinai.

<sup>18</sup>“Juna tajim jujú anentaimustajum, ‘ni imá kuashat ajá duka nuní dukap uwaetuka suwam atinai, untsu piipich ajá duka atantam atinai’.”

**Jisusa dukují ni yachi aidaujai kautuamu**  
(Mt. 12.46-50; Mr. 3.31-35)

<sup>19</sup>Tusa jintinkagtai ni dukují, yachi aidaujai tajuawajui. Tujash Jisus wajamunmag jegamainchau kuashat aents tuwakaju asamtai, agaa ijunaidau. <sup>20</sup>Nunitai niina ujainak:

—Amina duku yatsum aidaujai  
waipaktatus tajutjamawag agaa ijunui,  
—tuidau.

<sup>21</sup>Tama ni ayaak:

—Apajuí chichamen antukag umiina,  
nunú ainawai mina dukug, mina yatsug  
aidauk, —tiuwai.

**Jisus dase imijkamu**

(Mt. 8.23-27; Mr. 4.35-41)

<sup>22</sup>Tikich tsawantai Jisus ni jintintaiji  
aidaujai botenum chimpinjaju. Nunik:  
Kuchá amain katigkagmi, tusag weedau.

<sup>23</sup>Nunikag wegmunum nigka kanaju.  
Nuniku ai dase shiig senchi dasentak  
kuchan umpuau, dutikam yumik  
botenum yajanu, imaniau asa ishamain  
wajau. <sup>24</sup>Imanítai niina jegantag  
ishintainak:

—iJintinkagtinuh, Jintinkagtinuh iik  
jakekatjji! —tuidau.

Tama shintaag dasen jiyak idayak,  
nayants tsukatunashkam:

—iMijakta! —tiuwai.

Tusá tamawaik dase imaniauk mijak,  
namakash shiig miyaasu wajas  
patamsau. <sup>25</sup>Nunikmatai ni jintintaiji  
aidaun chichajak:

—¿Wagka Apajuiyai kajintsajum  
anentaimtsugme? —tau.

Tujash ditak ishamak puyatkag nuna  
wainak anentai jegagchaju, nunikag  
ditak pempeentunikiag:

—¿Jusha ya asamtaiya dasesh,  
yumish antujuinawa? —tudayinau.

**Gadaranmaya aents wakan  
pegkegchau egkemtuamu**

(Mt. 8.28-34; Mr. 5.1-20)

<sup>26</sup>Nunikag kuchá amain katigkag  
Gadaranmaya batsamtaí nugkeen  
Galilea igkuas awa nuwi anumkajui.

<sup>27</sup>Nunik Jisus jiinkimtai nunú  
yaaktanmaya aents, kuashat mijadai  
wakan pegkegchau egkemtujam pujú

tajuauwai, duka shiig wisú jegaash  
pujuchu, ayatak aents ukutainum  
wekayin. <sup>28</sup>Nunú Jisusan wainak senchi  
untsumak tikishmatug senchi untsumak:

—iJisusah, Apajuí nayaimpinum  
pujuwa nuna Uchijiyah, minash  
itugtuktasamea miname! iWait aneasam  
suwimkak sukagtusaipa! —tau.

<sup>29</sup>(Nunak Jisus: Wakan  
pegkegchauwahan aents jiinkim ukuktá  
tibaú asa tiuwai. Nu aentsuk kuashat  
tsawantai wakan pegkegchau  
egkemtuamu asa, jiju ikagmauwai  
uwegnumash, dawenum jigkagmashkam  
tsujiag utsag, wakan pegkegchau aents  
atsamunum emam nuwi pujú.) <sup>30</sup>Tutai  
Jisus iniak:

—¿Amesh yaitpa?

Tama ni aimak:

—Wika Untsujiyaitjai, —tau.

Nunak kuashat wakan pegkegchau  
aidau aentsun chimpimtua batsamtaú  
asag tiuwai. <sup>31</sup>Imaan asag: “Waa muun  
ishamain akaga nuwig  
chimpijatuawaipa”, tusag segaidau.

<sup>32</sup>Nuanuí kuashat kuchi mujanum  
yuwinak yujaidau asamtaí, nuwi  
wayatjai tusag segajui. Tiagtai  
Jisuschakam: Nuniktajum, tiuwai.

<sup>33</sup>Tima wakan pegkegchau aidauk  
aentsnak ukuinak kuchinum  
utsanawajui; dutikam kuchishkam  
pisajag betsag tajagak kuchanum  
najataunum iyagkak jinawajui.

<sup>34</sup>Nunikagmatai kuchí kuitamin  
aidauk pisajag yaaktanum jegawag  
etsejuinak, ajanum batsataidaunash  
dutiksag ujakajui. <sup>35</sup>Tusá ujakajam:  
Wagkak ankae diisagmi, tusag wejiajui.  
Nunik Jisus pujamunum jegakmag,  
aents wakan pegkegchau egkemtuamu  
aajakua duka pegkeg wajas, shiig  
anentaimas Jisusai ayaumas nugkutai  
nugkujá ekeemtatman wainkaju.  
Nunittaman wainkag senchi ishankaju.

<sup>36</sup>Nuniagtai wakan pegkegchau aidau jiiigbaun wainkaju aidau: “Nuní dutika etsagagmae”, tusag tikich aidaunashkam ujaidau. <sup>37</sup>Tiagtai ashí aents Gadaranmaya aidauk Jisusan:

—Juwig pujutsuk yajá weta, —tiaju senchi ishamaidau asag. Tama Jisuschakam ayú tusa botenum egkemtai, <sup>38</sup>aents wakan pegkegchau egkentuamu jijiamushkam:

—Wisha amijai wekaesatjai, —tusa Jisusan segau. Tama nuna chichajak:

<sup>39</sup>—Amek jeemin wakitkita, nunikam shiig kuashat Apajuí wajak amina wait anenjamjae nunú etsekgata, —tiuwai.

Tima we Jisus niina kuashat wait anenja nuna pachis ashí yaaktanum etsekgau.

**Jairo nawanji tikich nuwa  
jaujai etsagagbau**

(Mt. 9.18-26; Mr. 5.21-43)

<sup>40</sup>Jisus wakitki jegamtai kuashat aents tuwakajuk shiig aneas jukiaju, ashí aentsuk niina dakaidau asag. <sup>41</sup>Nuniamunum Jairo daagtin, jega ijuntaiya nuna apuji tajuntun Jisusan tikishmatug:

—Jintinkagtinuh, mina jegajuí wemí, <sup>42</sup>nunikam nawantug doce mijanji ajamu shiig makichkiuch pujugta nunú, jakattak tepaun ukukmag nu etsaentujata, —tau.

Tama wetai shiig kuashat aents weedau asag Jisusan chanuidau. <sup>43</sup>Imaniamunum nui nuwa pachitkau doce mijadai numpan senchi puwak jaa pujú, kuashat ampjatin aidaunum ampimak kuichkijin ashimkau. Tujash imaniakush tsagagchawai. <sup>44</sup>Nunú nuwa ukunum jegantun Jisus jaanch pataká nugkuagbauji wenin antigkui. Dutikamuik numpa puwamujin megkaekauwai.

<sup>45</sup>Dutikam Jisuschakam:

—¿Ya antinkae? —tau.

Tutai aents nui ijunuk:

—Achah yatsukait, —tuidau.

Tiagtai Pedro chichajak:

—Jintinkagtinuh, kuashat aents tuwakaju asag chanumpaina nuniaigkik, ¿ya antinkae tame? —tiu.

<sup>46</sup>Tutai:

—Dekas wika dekajai, aents mina antintuk mina senchijuí jaamujin tsagaja nunak, —tiuwai.

<sup>47</sup>Tutai nuwak, dekajuagapi tusa puyatuk kujaukmaikia Jisusan jegantun tikishmatug, ashí aents antuinamunum, wajak asaya antigke nuna pachis, nuigtú ni Jisus antiamuik tsagagbaujinashkam ujakú. <sup>48</sup>Tusá ujaam:

—Nawantah, ame kajintsá anentaimam duwi tsagajume, shiig agkan anentaimsam wetá, —tiuwai.

<sup>49</sup>Eke chichaak wajai, Jairo jega ijuntaiya nuna apuji jeenia aents tanta:

—Nawanjumek jakame, nuigtuk jintinkagtinuk waitkasaipa, —tau.

<sup>50</sup>Tabaun Jisus antuk:

—Puyatkaipa, ayatak kajintsam anentaimjata, nawanjumik aneantatui, —tau.

<sup>51</sup>Nunik jegá wayamunum tikich aidaunak awayachajui. Ayatak Pedro, Jacobo, Juan, nuwa jakau apají dukují aina duke utsanawajui. <sup>52</sup>Tuja ashí aents aidauk nuwauch jakaun pachis buutuidau. Nuniagtai chichajak:

—Buutigpajum, jakache ayatak kanaje, —tau.

<sup>53</sup>Tutai dushikidau, nuwauch jakau dekaidau asag. <sup>54</sup>Tujash nigka uwegnum achiak senchi chichaká: —iNuwauchih nantaktá! —tiu.

<sup>55</sup>Tusá tamawaik mayai egkemtujam nantakui. Nunikmatai:

—Yumain ayujatajum —tiu.

<sup>56</sup>Dutikamtai nuwauchi apajig dukujijai shiig senchi puyatkaju. Nuniagtai Jisus:

—Ju pachisjum makichik aentskesh ujakaigpajum, —tiuwai.

**Jisus ni jintintaiji aidaun  
chichagkagtuktinme tusa ishiakbau**  
(Mt. 10. 5-15; Mr. 6.7-13)

**9**<sup>1</sup>Jisus ni jintintaiji doce aina nuna ijumag wakan pegkegchau aidaun jiimainun, jau aidaun etsagaumainnash niina senchijin susauwai. <sup>2</sup>Dutikak: —Apajuí aentsnum inama nu pachisjum etsegkatajum, nuniakjum jau aidaun etsagatajum, —tusa ishimak <sup>3</sup>tiu: —Makichkish jukigpajum jintá wegaku atsumainuk. Ushujutaigkesh, wáj egkesá jutaigkesh, yuwatnukesh, kuichkikesh, nuigtú nugkutaigmesh yachiagmek jukigpajum. <sup>4</sup>Atum tu jeganma wayattagme, nunikjumek nuwig pujusjum wegakjum ukuktajum. <sup>5</sup>Tuja tuwí atumin awaintamtan dakitjabiagtatua, dutijamainakuig nunú yaaktak ukuakjum, daweminia tsetse pegatjajum akaketkatajum, dita sewimak jukitnuji iwaintakjum. <sup>6</sup>Tiajam ditashkam jijnjag yaakta ukukiag, aents aidaun batsatbaunum wegaju, nunikag yamajam chichama nuna etsejuinak, jau aidaunashkam etsagaidau.

**Herodes Jisusan dekas yakita tusa  
dekajuatatus wakejukbau**  
(Mt. 14.1-12; Mr. 6.14-29)

<sup>7</sup>Jisus ashí wáj dutikamujin Herodes Galileanmaya apua nu antuk, shiig senchi anentaimá pujau, aents aidaun chichainak: “Juan maamua nu nantakí wekaewai”, tuinai, <sup>8</sup>tikich chichainak: “Eliás wantinkae” tuinai, tikich tuidau: “Yaunchuk Apajuí etsegtin aajakajua nuwiya nantakne”, tuidau asagmatai. <sup>9</sup>Tiagtai Herodes chichaak: —Wi Juagnak inamja ai buuken tsupikagmayajama, tujash ¿jusha ya amainaita iman chichaman antujag dusha? Tusa wainkatatus wakegau.

**Jisus cinco mil aents ayugkamu**  
(Mt. 14.13-21; Mr. 6.30-44; Jn. 6.1-15)

<sup>10</sup>Jisus ishiakbau waketug kaunkag ashí dita dutikamujin ujakajui. Dutikam ditan ashí yajuak kanakiag nugka agkantu yaakat Betsaida tutainum awa nui wegajui. <sup>11</sup>Tujash aents aidaun dekaawag shimutkajui. Nunikag jegajuawajam Jisuschakam ditan shiig anentus jukiajui, dutika Apajuí aentsnum inama nuna pachis jintintak, jau aidaunashkam etsagau. <sup>12</sup>Nuniai etsashkam akagu asamtai, niina jintintaiji doce aina nunú jegaantag:

—Juwig jutiik aents atsamunum batsatji aentsuk ishiakta, yaaktanum jegattak aents batsata nui wegag, aja tikiju aina nui yumainjin sumak yuwinak kajigtinme, —tuidau.

<sup>13</sup>Tiagtai ni ayaak:

—Atum dita yuwatnuk susatajum, —tau.

Tuinam dita aiinak:

—Imaan aents ayugmainuk atsugtamji, ayatak cinco pag, nuigtú jimagchik namak awai, ashí ju aents ayugkata takuik jutii wemainchawa dita yuwatin sumagkatasa, —tuidau.

<sup>14</sup>Aishmag aidauk cinco mil aishmag tumain aajakajui. Tiagtai Jisus ni jintintaijin:

—Cincuenta, cincuenta aents akanajum batsagatajum, —tiu.

<sup>15</sup>Tima ditashkam Jisus tibaunak betek umikaju. <sup>16</sup>Dutikawagmatai cinco pagkan nuigtú jimag namaka nuna juki, nayaimpinum pagkai see tusa puug jintintaiji aidaun tinabiu, dita aentsun tinamkatnume tusa. <sup>17</sup>Dutikawajam ashí shiig yuwawag ejemakaju, nunikagmatai ampinkauak yajuakag doce chagkinnum aimjajui.



**Pedro Jisusan amek****Kristuitme tibau***(Mt. 16.13-20; Mr. 8.27-30)*

<sup>18</sup>Makichik tsawantai, Jisus kanaká Apajuí aujak pujamunum ni jintintaiji aidaush, nijai pujuidau asamtai iniak: —¿Aents aidaush minash yaayai tutujutinawa? —tau.

<sup>19</sup>Tama dita ainak:

—Wajumak aents aidau: ‘Juan Yamijatin maamu nuuwai’ tujamainawai, tikich chichaidau: ‘Auk Eliasai’ tujamainai, tikich tuidau: ‘Yaunchuk Apajuin etsegtujakú aina dutsu nantakitai’ tujamainawai, —tuidau.

<sup>20</sup>Tiagtai Jisus ayaak:

—¿Tujash atumesh minash yaayai tutujtjume? —tau.

Tutai Pedro ayaak:

—Amek Kristu Apajuí awemamuitme, —tiu.

<sup>21</sup>Timatai Jisus chichajak:

—Makichik aentskesh mina pachittsagmek ujakaigpajum —tusa idayak:

<sup>22</sup>—Wi Apajuí Uchijiyaitkun Aentsmaga Akiinawaitag nunak, shiig senchi waitkagsag judío aidau apuji, sacerdote apuji aidaush, chicham umiktinun jintinkagtin aidaujai dakitjuinak mantuawagtatui, dutijuawagmataish kampatumchik tsawan asan nantaktatjai, —tiuwai.

**Jisus mina nemagtukta tautigmek  
atum wakegamuk idaikujum  
nemagtuktajum tibau**

*(Mt. 16.24-28; Mr. 8.34-38)*

<sup>23</sup>Jisus nuna ti ashí aents aidau chichajak:

—Mina nemagtuktasajum wakegautigmek, atum wakegamuk idaikujum, kashí kashinig

waitiakjumesh atsanajum nemagtuktajum. <sup>24</sup>Ashí aents ju nugka juwi pujutan imá senchi wakegak, mina nemagtuk waittan dakitauk uwemjashtin ainawai. Untsu ashí aents mina nemagtuk nunisag jaa nu uwemjatin ainawai. <sup>25</sup>Aents ju nugka juwiya wájí aidau ashí niinu emakush, jaakug niina wakaninak tuké uwemtikmaitsui. <sup>26</sup>Atum mina pachittsa chichat datsamakjum, chichamjushkam datsanjau aidautigminak, wi Apajuí Uchijiyaitkun Aentsmaga Akiinawaitag nuna, mina Apajuí tsaaptinjijai tsawan wajasan, nayaimpinmaya aents pegkejam aidaujai ataktú ju nugka juwi minaknushkam: Juka midauchu ainawai, titinaitjime. <sup>27</sup>Tujash dekaskajime: Atum juwi ijunjum juwiyatijum eke jatsuk, Apajuí inamauiya nu wainkatnutigmesh ajume, —tiuwai.

**Jisus yapajinamu***(Mt. 17.1-13; Mr. 9.1-13)*

<sup>28</sup>Nuna ti ocho tsawan pujus Jisus Pedron, Juangkan, nuigtú Jacobon juki mujanum wakauwai, Apajuí ausatatus. <sup>29</sup>Nunik Apajuin aujak pujus niina niimenig yapajinawai, jaanchjish puju winchamtin wajasuf. <sup>30</sup>Nuniaig jimag aents Jisusan aujuidaun wainkajui, duka Moisés, Eliasjai aajakajui. <sup>31</sup>Nunikag tsaaptin winchamtin tenteamunum pujusag, Jisus Jerusalén waitkasa maam atinun pachis aujuidau. <sup>32</sup>Tuja Pedro ditajai ijunag yujaidaushkam, senchi kaji pujajuinam kajigkú shintaukmá, Jisus tsawan wajas Moisés, Elías aatus ijuntatman wainkajui. <sup>33</sup>Jimag aentsua nunú wegagmatai, Pedro Jisusan chichajak:

—Jintinkagtinuh, jutiish maigkis juwi batsatagtai. Kampatum aak umikagmi, makichik aminu, makichik Moisesdau, nuigtú Eliasdau, —tiuwai.

Tujash nunak shiig dekachiatak tiuwai. <sup>34</sup>Juna aatus Pedro chichai, yujagkim ditajai ijumag ijikuí, dutika yujagkim ijikam ishankajui. <sup>35</sup>Nuniaig yujagminmaya chichaak: “Juuwai dekasa mina Uchig anetaiujuk, nigki antugkujum umigkatajum”, tabaun antukajui.

<sup>36</sup>Nuna ti ashimaig diikmag, imá Jisusnak wainkajui. Nuna wainkajash makichkish tikich aidaunak ujakchajui.

**Wakan pegkegchau uchin  
egkemtuamun Jisus etsagagbau**  
*(Mt. 17.14-21; Mr. 9.14-29)*

<sup>37</sup>Nunik kashinia duwi mujanmaya akagag mininai, kuashat aents Jisusan igkugtatus minidau. <sup>38</sup>Nuniait tuwakbaumaya aents senchi jiiká chichaak:

—iJintinkagtinuh, wait aneasam mina uchig makichkiuchia ju etsaentujata, <sup>39</sup>junak wakan pegkegchau egkemtung senchi unsumtiknuwe, imatikam senchi kujainuwe, dutikak weninig saunak pushukasua emauwe! iKakajus idaichamu asa tunamag pujugtawai! <sup>40</sup>Imatikakui amina jintintaijum aidaun: Wait aneasjum wakan pegkegchau uchin waitkagta nu jigtugkitajum timajai, tujash tujinkagmae, —tau.

<sup>41</sup>Tusá tama, Jisus ni jintintaiji aidaun chichajak:

—iAents pegkegchau, minai kajinas anentaimchau aidauwah! ¿Wajupá dukapea atumjai ijunjanush pujumainaitja? ¿Wajupá dukapek dakastajime, minaig kajinas anentaimjatnume tusanush? —tiu.

Nuna ti idayak uchí apajin:

—Uchijum juwi itantá, —tiuwai.

<sup>42</sup>Tima uchijin juki Jisusai ejentattak emai, waugmitkak uchin nugká ajiajam senchi kujau. Imatiktai Jisus wakan pegkegchaun: “iJiinkim wegakum uchi ukuktá!”, tiuwai. Tama wakan pegkegchau uchin egkemtuaushkam jiinki ukukiuwai,

dutikam uchishkam pegkeg wajasmatai apajin susauwai. <sup>43</sup>Dutika etsagamun wainkag: Dekas Apajuin senchijiniap aikawa tusag, puyatjusag diidau.

**Jisus awentsag ni  
mantamnatnuji etsegkamu**  
*(Mt. 17.22-23; Mr. 9.30-32)*

Ashí aents aidauk Jisus uchi etsagagbau pachis puyatjusag augmatiagtai, niina jintintaiji aidaun chichajak:

<sup>44</sup>—Wi tajim nunú shiig antuktajum, nunikjum aneaku atajum, wagki Apajuí Uchijiyaitak Aentsmaga Akiinauwa nunak, tikich aents aidaunum sujukag idaisagtatui, —tau.

<sup>45</sup>Tutaish ditak nuna takumpap tawa tusajag dekamainchau dekapedau, eke Apajuí shiig dekamtikchamu asag. Nunidau asag iniaschajui ajaantuinak.

**Yaki dekasa imá wagakush  
atinaita tiagbau**  
*(Mt. 18.1-5; Mr. 9.33-37)*

<sup>46</sup>Nunikag ditak pempeentunikiag: “Yaki jutii ainag juwiyash imá wagakush atinaita” tusag tudayinau.

<sup>47</sup>Jisus tusá anentaimainamun dekaju asa, uchin juki niini ayaunas awajus, <sup>48</sup>chichaak:

—Aents mina nemagtuidau ju uchia jumamtin aina juna, shiig anentus juwidauk mina dutiujinawai. Tuja mina jujuidauk mina awetiuwa nuna juwinawai. Atum ainajum anuiya imanchauch anenmamaina nunú imá wagaaku atinai, —tiuwai.

**Jutiin shiwagmatjamtsu duka  
jutiinu asa aniwai**  
*(Mr. 9.38-41)*

<sup>49</sup>Tutai Juan ayaak:

—Jintinkagtinuh, wainkamji aents amina daagmin wakan pegkegchau

aidau egkentuamun jiyau. Dutikakui:  
Amek aikawaipa timajai, jutiijai  
ijunchau asamtai, —tau.

<sup>50</sup>Tutai Jisus:

—Duka tiigpajum, jutiin  
shiwagmatjamtsu duka jutiinu asa  
aniawai, —tiuwai.

**Samarianmaya dakituinam  
yajá webau**

<sup>51</sup>Jisus ashí jintinkagtamun ashimak,  
ni nayaimpinum wakitkitnuji tsawan  
jegau asamtai, puyatkas Jerusalén  
wegau. <sup>52</sup>Nuniak ni jintintaiji aidaun  
emtikak awemauwai. Dutikam  
ditashkam nugka Samarianum wegajui,  
nui aents batsatbaunum jegawag  
kanumainun egakagtatus. <sup>53</sup>Tujash  
Samarianmaya aidauk dita ikantanak  
dakitudau, Jerusalén weenak tuidau  
asamtai. <sup>54</sup>Dutikawajam Jacobo, Juagjai  
wakitkiag Jisusan jegaantag:

—Apuh iish duwik ¿Elías Apajuin  
segatí nayaimpinmaya jiin ajuntug  
jinauwa dutikmainchaukaih? —tuidau.

<sup>55</sup>Tiagtai Jisus kakaakan aiká:

—Atumek dekatsjume wajuk  
anentaimkugmea tajume duka. <sup>56</sup>Wi  
Aentsmagan Akiinauwaitag nunak aents  
aidaun ijinata tusanuk taachuitjai, ayatak  
uwentikatasan tauwaitjai. —Tusa idayak  
tikich aents aidau batsatbaunum wegajui.

**Jisusa jintintaiji agtatus  
wakejukaju aidau  
(Mt. 8.18-22)**

<sup>57</sup>Nuna yaaktan ukukiag  
ashinbaunum, makichik nuwiya Jisusan:

—Apuh, wisha ame tuwig wekaetam  
nuniakminish tuke aminak nemagkiní  
wajatin atajai tusan wakegajai, —tau.

<sup>58</sup>Tutai Jisus chichajak:

—Kujancham aidauk kanutaijig  
ajuinawai, aantsag pishak aidaushkam  
pasugkeg ajuinawai, tujash wi Apajuí  
Uchijiyaikun Aentsmaga Akiinaunuk  
jeenchau, tepesá ayamainkesh  
atsugtaig, wainkan wekaejai, —tiu.

<sup>59</sup>Nuna ti Jisus tikich aentsnashkam:  
—Nemagtukta, —tiuwai.

Tama:

—Apuh, idaitusta mina jegajuí wenu,  
apag jakamtai ukusan ukuakun  
nemagkatjame, —tau.

<sup>60</sup>Tutai Jisus chichajak:

—Auk idaisata, aents wakanin jakaujai  
betekak batsata nu, apa jakamtaish ukustin  
atinme, amek yamai nagkamsamek mina  
chichameg yamagma nu etsegkum, Apajuí  
aentsnum inama nu pachismesh etsejata,  
—tiu.

<sup>61</sup>Nuna timatai tikich aents chichaak:

—Dekas Apuh, wi amina jintintaijum  
ata tusan wakegajai, tujash idaitusta,  
dekatkauk mina pataag aidaun ashí  
akattsan ukuktajai, —tau.

<sup>62</sup>Tutai Jisus ayaak:

—Aents nugkan tsayaak, nugka tsaitaijiya  
nuna bakajin nena tsayaak wekaetayatak,  
ukujin ayampatua dii wajauk shiig tutupit  
emamaitsui. Numamtuk Apajuí chichamen  
etsegkatatus wakegayatak patayin  
ukukchamin dekapeauk, Apajuí chichamen  
etsegkati tusaik atsumaitsui, —tiuwai.

**Chichagkagtuktajum tusa  
setenta y dos ishiakbau**

**10** <sup>1</sup>Nuna ti idayas Jisus tikich  
aidaunashkam etegjauwai, setenta  
y dos<sup>f</sup> aentsun. Dutika: “Ashí yaaktanum  
wejum chichagkagtuktajum”, tusa ni wetin  
aidaunum jimá jimajan ishiakajui.

f 10.1 Yamajam chicham nagkamku griego chichamai agagbau aina nuwish jimajan tuinawai, tikich 70 tai tikich 72 tawai, nuniau asa apach chicham aina nuwish mai pegkejai. Duwi iina chichamega juwig 72 apusamui.

<sup>2</sup>Dutika chichajak: “Dekas tajime: Shiig kuashat aents aidau Apajuí minaish inamjati tusa atsumainawai, tujash ujumchikiuchi yamajam chichama juna etsejuidauk, nuaduí Apajuí segatajum tikich ni chichame etsegmain aidaun ishiakti tusajum. <sup>3</sup>Nunin asamtai wetajum, tujash kuitamankatajum, wi atumnak uwig ikamyawa batsatbaunum ishimaina numamtuk aents pegkegchau batsatbaunum ishimjime. <sup>4</sup>Wegakjumes kuichkik, wájí egkesá jutaigmekesh, sapatjumkesh jukigpajum. Jintá wesajum aents igkuakjumes chichaakjum megkaekaignajum, wamkesjum nagkaetajum. <sup>5</sup>Tuja atum yana jeenia wayattajume, nuniakjumek dekatkauk: ‘Apajuí atumnash shiig agkan anentaimsa pujutan amastinme’ titajum. <sup>6</sup>Tajumin aents nui puja nu shiig aneas jujabiagtaik, Apajuí ditanash yaigtatui. Untsu atumin shiig aneas jujamchagtaik, Apajuishkam ditanak yaigchagtatui. <sup>7</sup>Nunú jega nuwig pujusjum dita yutain amainamuk yuwakjum, umutain amainakuish uwagtajum. Wagki aents taká duka akiam auwai. Makí makichik jeganum kanagjum nagkaemá yujaigpajum. <sup>8</sup>Tikich yaaktanum jegagminchakam, jeentin ni jeen jujamki yutain ajamjamainakuig yuwatajum. <sup>9</sup>Nuniakjum nui jau akuish etsagaitajum, dutikakjum: ‘Apajuí aentsnum inamjatnuk tsawan namput wajaschae’, tusajum ujaktajum. <sup>10</sup>Tuja tikich yaaktanum jegagmin jujamtan dakitjamainakuig jiinkujum: <sup>11</sup>‘Atumi nugkem jutii sapatjin peemja juka, atuminig pegajá akakeka ukuaji, jutii chicham etsegbauk dakitjau asagmin. Tujash Apajuí aentsnum inamjatta duka namput wajaschae’, titajum. <sup>12</sup>Juna tajime: Suwimak sukagtamú tsawan

jegatna duwik, nunú yaaktanmaya aents nunina nunak, Apajuí duwik yaakat Sodomanyaya aidaun suwimkan susauwa nuní nagkaemas suwimkan jukiagtinaí.

**Aents pegkegchau  
idaitan dakitin aidau  
(Mt. 11.20-24)**

<sup>13</sup>“iCorazignumia aidaunak, aikasnuk Betsaidanmayanash wait anentuínajai!, ditak mina chichamjun dekaskeapi tujutchaju asagmatai. Yaakat Sidognum, Tironmash aents batsatana duka, wi atumin wainchatain iwaintajim imatika ditash iwaintam wainkujag, dita wake besemag pujaku iwainmamtain jaanchin nugkujag, buukenish yukuun batsakag, ditá tudaujin wake besemag batsatbaunash, Apajuin iwaintumain aajakajui. <sup>14</sup>Nuaduí Apajuí suwimak sukagtamú tsawan jegatna duwik, yaakat Tironmaya aents aidau, Sidognumia aidaújai suwimkan jukiagtin aina nuní nagkaemasjum atumek suwimkak jukiagtin ainagme. <sup>15</sup>Yaakat Capernaum batsamin aidauwah, atum anentaimsagmek: Jutiik jainakuish nayaimpinum juwam agtinaitji, tajume. Tujash dutikamak achatnaitjume, iatumek tikich aents pegkegchau aidau jinawaju waitú batsata nui batsamsatnaitjume! <sup>16</sup>“Atum chicham etsegbaun antugtamaina duka, mina antugtuínawai. Tuja atumin dakitjamaina nunak, mina dakitjak nuninawai. Untsu mina dakitjuínakug, mina awetiuwa nuna dakituínak nuninawai”, tusa ishiakui.

**Jisus ishiakbau kaunkamu**

<sup>17</sup>Nunú setenta y dos ishiakbau waketug kaunak, shiig aneasag Jisusan jegaantag:

—Apuh, wakan pegkegchau aidau aentsun egkemtuau aidaush amina daajum adaisa: Jinkita, tamak nunisag iinash antugtamak aents aidaunash jiinkiag ukuagmae, —tuidau.

<sup>18</sup>Tama ni ayaak:

—Dekaske wisha wainkabiajai, iwanch peem wajukeya imanik nayaimpinmaya iyaun. <sup>19</sup>Nuaduí atumi shiwajum iwanchia nuna senchijí ashí depetkatnun, mina senchijun amasmajime. Dutikamu asagmin, dapi esapainakuish, titigkesh ijupakuish wajukashtatjume. <sup>20</sup>Tujash wakan pegkegchau aidau antugtamakaja duwikik shiig anenigpa, dekas imá senchi shiig aneetajum, atumin daagmik nayaimpinum agagbauwa nuaduí.

**Jisus shiig aneasbau**  
(Mt. 11.25-30; 13.16-17)

<sup>21</sup>Nuna ti idayak Wakaní Pegkeji shiig anemtikam: “Apawah, amek ashí nayaimpinum batsamin aidau, nugkaya aidaushkam apuji asamin emematjame, iman asam aents yacha aidauk iwaintutsuk, aents imanचाuch aidau etegjamujum, tikima uchi itugmaina imatksam iwaintukum nuaduí. Dekaske Apawah, amek aajam wakegame”, tiu.

<sup>22</sup>Tusa idayak: “Mina Apag ashí nugkanmayag ame diistá tusa idaitugsauwai, nunin aig wi Apajuí Uchijiyaitag nunak makichkish dekajuinatsui, imá mina Apajuk shiig dekajui, aikasag mina Apagnash wainainatsui imá wiki shiig wainjai. Tuja wi iwaintamu aidau Apagnak wainmain ainawai.”

<sup>23</sup>Tikich aidaun juna ujak idayak, dekas ni jintintaiji ijuntatman ayampatua: “Atumek shiig aneestajum wi takaamush wainu asajum.

<sup>24</sup>Yaunchuk Apajuí etseggin aajakú aina duka, apu aidaush yamai atum wainjum

juna wainkatatus wakegajakú ainawai, tujash wainkachu ainawai. Antutnash yamai atum antajum juna antukagtatus wakegajakú ainawai, nuninakush ditak antukchajui ju chichamnak”, tiuwai.

**Dekas juuwai chicham umimainuk**  
(Mt. 22.34-40; Mr. 12.28-34)

<sup>25</sup>Tutai chicham umiktajum tibauwa nuna jintinkagtin wajakí, Jisusan dekapstatatus:

—Jintinkagtinuh, ¿wisha wajina dutikmainaitja pujut nagkanचाun jukitasanush? —tau.

<sup>26</sup>Tama Jisus ayaak:

—Chicham umiktinun Moisés agajua nunú aukumesh, ¿wajintu agagbauwa wainme?

<sup>27</sup>Tama ni ayaak:

—‘Amina Apujum Apajuiya nu imá senchi aneeta, nuniakum imá niinig anentaimesam pujustá, Apajuinu pegkeg aina duke dekaata, ashí Apajuí wakega duke takastá, nuniakum amijai ijutkamushkam amek anenmamsam aneeta’ tawai, —tiu.

<sup>28</sup>Timatai Jisuschakam:

—Dekas tame, ame tame nunú imatiksamek umiktá, nunú nuniemunum pujut nagkanचाun ajutjamtatui —tau.

<sup>29</sup>Tama nigka betek umiachu asa Jisusan iniak:

—¿Yaita wijai ijutkau aidaush? —tau.

**Samarianmayan pachisa**  
**Jisus augmattsamu**

<sup>30</sup>Tutai Jisuschakam augmatbaun nagkama ujaak:

—Jerusalemnumia aents imá nigki, yaakat Jericonum wekamá kasanum egkemkauwai. Nunikmatai kasa aidau achikag, senchi suwi suwimainakua, ipu ipujú ashí maawag, ni takakbaujinak ashí yajutuk wegak ukukiajai. <sup>31</sup>Dutikamu ai

sacerdote nunú jintanum nagkaemakmá wainak, ikaag diis ukukiuwai. <sup>32</sup>Tuja levita nagkaemakmá wainkashkam, ikaag wajas diis wegak ukukiuwai. <sup>33</sup>Nuniai aents Samarianmaya niishkam nu jintanmag nagkaemakmá wainak, wait anenmain diisuí. <sup>34</sup>Dutika jegaantun ampín vinujai juki, ipujamu aidaun ampíjua, jaanchi ijíjuk, nuaduí ni entsamtaíjin ekeni juki, jega íjagkan kajiitaijin ejega kuitamak, <sup>35</sup>kashinia duwi wegak, jeennun jimag tsawantai takasá kuichik jumainun akik ukuak: ‘Ame kuitamjuktaka, wi waketkun wajupa tujuttatme nunash akiktajame’, tusa nui aepeak weuwai. <sup>36</sup>Amesh wajintu anentaime kumpatum aents aajakua nuwiyash, ¿ya aajakuita dekas nigki anenmamas aents kasa suwimaam tepaun wait anenjaush?

<sup>37</sup>Tusa tama ni ayaak:

—Suwimaam tepaun wait anenjauwa nuuwai, —tiuwai.

Timatai Jisuschakam:

—Ameshkam wakítim, dutiksamek amíjai íjuktamushkam amek anenmamsam wait anenjata, —tiuwai.

### **Jisus Martan Mariájai íjagsatasa webau**

<sup>38</sup>Tusa ukuak Jisusak wega wegakua yaaktan ukukiag, aents batsatbaunum jegau. Nunikmatai nuwa Marta daagtin niina jeen juki awayauwai. <sup>39</sup>Nuna kai María daagtin pujau, Mariák Jisus chichatai ayaumas ekeemas antak eketu. <sup>40</sup>Tujash Martak kuashat takamain au asamtai, nuna uyumak wekaetau, nuniak Jisusan jegantun:

—Apuh, aanú mina kaig ayatak eketa nu, kaim yaigtá, tusam awetujia, niish yainkati, —tau.

<sup>41</sup>Tusa tama:

—Martah, shiig kuashat takamain uyumakam wekaeme, <sup>42</sup>dekas imá senchi puyatjumainuk makichkiuchi. Mariák

dekas pegkejan etegka mina chichamjun antugtak eketui, nunak makichkish emegkatmainchau ainawai, —tiu.

### **Jisus Apajuí aujut jintinkagtuamu (Mt. 6.9-15; 7.7-11)**

**11** <sup>1</sup>Tikich tsawantai Jisus Apajuin aujak pujuttaman wainkaju. Nunik ashimkamtai makichik ni jintintaiji jegantun:

—Apuh, Apajuish wajuk aujmainaita nunú jutiish jintinkagtuata, Juan ni jintintaijin jintintujakua dutiksamek, —tau.

<sup>2</sup>Tama ni ayaak:

—Atum Apajuí aujkgmek aatsajum titajum:

‘Apawah, amek nayaimpinum pujuwaitme.

Pegkegmaitam ibau asamin ashí tikich aidaush imá aminak emematjabiagtinme.

Amek jutiishkam inajatjata, amina aentsjum nayaimpinmaya ame wakegamun umigtamin aina dutiksag, nugkanmayashkam umigtuktinme tusam.

<sup>3</sup>Dutiksamek ii yuwatnushkam kashí kashinig sukagtita.

<sup>4</sup>Ii tudaujishkam tsagkugkagtugta, jutii tikich pegkegchau takagtamaidaush tsagkugnaitag aikasmek.

Iwanch pegkegchau takamtiksati tusamek idaikagtutsuk, ayatak yaijatkam agkanmitkagtuata’, —tiuwai.

### **Segatajum, egaktajum, untsuktajum Jisus tibau**

(Mt. 7.7-12)

<sup>5</sup>Aaja segatajum tusa jintintua idayak: —Atum ainajum anuiyatigmesh kumpajum dekas shiig anendaitajum

ajutjamu asamtai, niina jeen aehaet jegantam: ‘Kumpajuh, minash kampatum pag tsagkatjukta, <sup>6</sup>mina kumpag imauya tajutua nunú ajaamain atsugtau asamtai tajame’ tamin. <sup>7</sup>Ni aigmak: ‘Waitkagsaipa, waitinak epenin mina uchig aidaujai kanakun tepajai, nunin asan nantaknuk amamaitsujai’, ¿tujamainkaih? <sup>8</sup>Nunak tujamtsuk sujustá tusa segamu asa, nantamainchau ayatak amina kumpajum asa, nantakí ame atsumaku segamunak ashí amamainai. <sup>9</sup>Duwi wi tajime: Apajuishkam segatajum, imatjamak amastatjume; egatash egaktajum, egakjumek igkugtatjume; untsuktajum, imatjamak waitin ujatjamtatjume. <sup>10</sup>Ashí aents sumauk suwam auwai, egauk igkuinai ni egamujinak, waitinum wajas untsumushkam waiti ujatam auwai.

<sup>11</sup>“¿Atumesh uchijum yujumkan segapaig, kaya sumainkaitjum? ¿Dutikachkugmesh uchijum namakan segapaig, dapi sumainkaitjum? <sup>12</sup>¿Dutikachkugmesh uchijum nujintan segapaig, titig sumainkaitjum? <sup>13</sup>Atum pegkegchau ainayatkugmesh uchigmik pegkeg suu ainagme. Atumkesh nuniagminish Apajuí nayaimpinum puja dusha, ¿wagkag Wakani Pegkejinash atum segamash amaschagti?”, tiuwai.

**Wakan pegkegchau aidau apuji  
Beelzebú daagtinun senchijin  
Jisusak wakan pegkegchaunak  
jiyaawai tibau**

(Mt. 12.22-30; Mr. 3.20-27)

<sup>14</sup>Juna inagnak tikich tsawantai wakan pegkegchau aentsun egkemtua chichachu emamun, Jisus jiikí awetak chichamtikau. Dutikamun wainkag aents tuwak ijunuk puyatjukag diidau. <sup>15</sup>Nuninaig wajumak aents aidau chichainak: “Juka Beelzebú, wakan pegkegchau aidau apujiya nuna senchijin wakan pegkegchaunak jiyaawai”, tuidau.

<sup>16</sup>Nuna tusag tuinaig, tikich aidau Jisusan, dekas Apajuí Uchijimpashit, tusag dekapsagtatus: Nayaimpinmaya wainchatai iwainkagtukia, tuidau.

<sup>17</sup>Tama dita anentaimainamun dekau asa:

“Makichik nugkanmag batsatiatak pempeentuniki maani batsatkujag megkaemain ainawai, nunisag makichik jeganmak ijunag batsatiatak, pempeentuniki maani batsatkushkam, ditak megkaemain ainawai. <sup>18</sup>Aantsag iwanchakam niina senchijin mina sujus, aentsun wakan pegkegchau egkemtuau aidau jijjati tujutkug, ditak pempeentuniki shiwagmaemainai, nuniak ditá senchijinash megkaemain ainawai. Nunin aig minak, Beelzebú senchijin wakan pegkegchaunak jiyaawai tujutjume. <sup>19</sup>Beelzebú niina senchijin mina sujaish, atumi jintintaijum aidanash ¿ya senchijinash suwawa, wakan pegkegchau aidan jiiiktinme tusash? Jutii jintintaiji aidau Apajuí senchijiin jiyaawai tujutkugmek, atum wainka dewakjum tu yujagme.

<sup>20</sup>Wi Apajuí senchijiin wakan pegkegchau aidau aentsun egkemtaun jiyaag nunak, yamaik atumiin Apajuí inamu asamtai jutikajai.

<sup>21</sup>“Aents senchigtin niina jeen kuitamak waitinum akajun takus wajataig, niina wajijiji nui awa duka ashí betek amainai. <sup>22</sup>Tujash tikich aents niiya nuní senchi minitak, niina depetki akajun atanki jegá wayaa, ashí wajiiinak yajutuk kumpají aidan tinamainai.

<sup>23</sup>“Aents wi takaag nujai shiig aneas juwachuk mina shiwagmatui, nunisag Apajuí chichame etsegbaunash yainchagtaik, kuashat aents uweemainun megkagainawai.

<sup>24</sup>“Wakan pegkegchau aentsnum egketu jiiikmak, aents atsamu agkantunum ni pujumainun egaak wegawai. Nunik ni

pujumainjin wainkachag: ‘Dekas wakitkitjai wi pujujakbaunum’ tusa anentaimas, <sup>25</sup>tajua diikmá, nunú aentsuk juga japimká shiig iwajamuama imanun wainak ukuak, <sup>26</sup>tikich wakan niina nagkagas pegkegchau aidau, sieteya imaan yajuak waketjuki egkemtawai. Dutikam aentsuk duwik pegkegchau aajakbaunak, nuní nagkaemas shiig pegkegchau wegawai”, tiu.

#### **Dekas shiig aneasagtin aidau**

<sup>27</sup>Juna pachis Jisus eke chichaa wajai, aents tuwakbaunmaya nuwa senchi jiiká chichaak:

—iNuwa amina jujepag, muntsujin amuntstamauwa duka, shiig aneastinai! —tiuwai.

<sup>28</sup>Tutai Jisus chichajak:

—iDekas Apajú chichamen antukag umiidau, nuní nagkaemas shiig aneasagtinai! —tiuwai.

#### **Aents pegkegchau aidau wainchatai iwainakia tibau**

(Mt. 12.38-42; Mr. 8.12)

<sup>29</sup>Jisus aents aidau ayatak tuwajam, ditan chichajak: “Atumek aents pegkegchau, Apajuish umigchau asajum, dekas Apajú Uchijimpashit tusajum dekapjustasajum: Wainchatai iwainakia, tujutjume. Tujash atum tajum nunak dutikashatjai, ayatak Apajú etsegtn Jonás wajukauwa nujai betekak iwaintuktatjime. <sup>30</sup>Jonás namaknumia iwaaku jiinki, yaakat Nínive batsamin aidaunum Apajú chichamen etsegta, dekas Apajú awemamuapita tiu aina numamtuk, wi Apajú Uchijiyaitkun Aentsmagan Akiinauwaitag nunashkam, mantuawagmataish ataktú nantakmatai waitkag, dekas Apajú awemamuapita tujutiagtatui. <sup>31</sup>Nuwa Sabá nugkanmaya aentsun apuji surnumia Salomogkan tajiuiwai, Apajú yachantikamun antujuk dekajuatatus. Nunú atumnak bakugmagtinai, atak suwimak atina duwik, wi Salomogkan

nagkaesaun dekaun imatika chichagmash antukchaju asagmin. <sup>32</sup>Ninivenmaya aents aina nunú atumnak bakugmagtinai, atak suwimak atina duwik. Ditak Jonás Apajú chichame ujakam, dekaskeapi tusag tudaujin idayinak Apajuin nemagkajui. Tujash atumek, wi Apajú Uchijin dekas Jonasa nagkaesaun juwi pujusá chichagmash antukjum, tudau takat idaikujum Apajú nemajuinachu asagmin.

#### **Lámpara pachisa augmattsamu**

(Mt. 5.15; 6.22-23)

<sup>33</sup>“Makichik aentskesh lámpara ekemakajag dukukag idaichau ainawai, dutikachkush pegakan wakentinkish awaigkag aputsajame. Lámpara ekemakag yakí ekenin ainawai, tikich aidau wayaakush shiig wainak wekaesagtinme tusag. <sup>34</sup>Atumi jiimek lámpara ekemakam tsaaptin emaama numamtuk atumi iyashminak awagmawai. Jiim pegkeg asamtai shiig wainmamai-naitam imatiksam, ashí pegkeg aina duke anentaimtaik, anentaiminish tsaaptin ajutjamainai. Untsu jiim pegkegchauwaitkui wainmamainchauwaitam nunisjumek, ayatak pegkegchauk anentaimkugmek suwenum pujagme. <sup>35</sup>Kuitamkata, aminí tsaaptin awa nunú suwe wajatjamsai. <sup>36</sup>Ame ashí pegkegchau aidau idaisam pujakmek, jii kashi ekemakam tsaaptin emama numamtuk, atumi pujutjuminish wajagme.”

#### **Jisus fariseo aidaun chicham umiktinun jintinkagtin aidaujai pegkegchauji pachisa tibau**

(Mt. 23.1-36; Mr. 12.38-40; Lc. 20.45-47)

<sup>37</sup>Nunú chichaamun ashimak wajai fariseo jegantun:

—Mina jegajú yujumak yuwami, —tusa ipau.

Tima Jisuschakam fariseo jeen wayaa, mesanum jegantá ekeemsau.

<sup>38</sup>Nunikmatai wainak fariseok anentai



jegagchau, wagkag chicham umiktin tuke ikigmasjumké atajum tawa nuniaish, Jisusash ikigmasakesh yuwatasash ekeemsae tusa. <sup>39</sup>Nunitai Jisus chichajak:

—Atum fariseo aidautigmek, shikiká umutai, nuigtú plato aina nuna awanke nijamaina numamtuk wajagme. Tujash atumi anentaiminig kasamtajum, pegkegchau takataijum aidaushkam piyak ajutjamainawai. <sup>40</sup>iAnentainkachu aidauwah! ¿Apajuí iyashin najanauwa duke iina anentainash najanachukai? <sup>41</sup>Atum pegkeg ata takumek atumin ajutjamaina duka ujunauch aina nu susatajum, nuuwai dekas pegkeja duka.

<sup>42</sup>“iFariseo aidautigminak wait anentajime! Atumek ajak menta, ruda, nuigtú yutai inagku ajuntua ukugkutai aina nu puyatjusjum diezmó wajagme. Ju dutikayatkujum chicham umiktinnum pegkeg takatan jintinjama nu, nuigtú Apajuí aneetan jintinjama duka pachitsuk idaijume. Tujash ju aina ju umiakjumes, nuigtú tikich umiktin aina dushakam umitskek idaimain ainatsjume.

<sup>43</sup>“iFariseo aidautigminak wait anentajime! Atumek jega ijuntainum wayakjumes, dekas apú ekeemtai shiig iwajamu aidau etegkajum ekeemin ainagme, nuigtushkam aents kuashat ayamunum igkuntuinakush, shiig ajantujus kumpamjuatnume tusajum wakejin ainajum nuaduí.

<sup>44</sup>“iChicham umiktinun jintinkagtin aidautigminak, fariseo aidautigmijai wait anentajime, waitjuidau asagmin! Atumek aents ukusbau wainmainchau shiig epekbauwa nunin ainagme, nunin asantai aents nui awantak wekaekush dekachu ainawai initak aents ukusbauwa nunak. Atumesh numamtuk awankak iwainmamjume pegkeja iman,

tujash atumin anentaimin pegkegchau ajutjamaina nunak waitjamainachu asantai.”

<sup>45</sup>Jisus tabaun chicham umiktinun jintinkagtin antuk:

—Jintinkagtinuh, ame fariseo aidau pachisam tame duka jutiish tukagtakum tame, —tau.

<sup>46</sup>Tutai Jisus ayaak:

—iChicham umiktina nu yacha aidautigminash wait anentajime! chicham umiktajum tibauwa nu kakajus umimainchauwa ibauk, tikich aidauk ju umiktajum tajume, atumkesh umiachiatkujum, atum kijin jumainchauk tikich ayankajum, machikish yaitsuk emasjum chichagmainaitjum numamtuk wajau asagmin.

<sup>47</sup>“iAtumnak wait anentajime, atumí muunjum aidau, Apajuí etsegtin aajakajua nuna maawag ukusajua nu dakumká najanajum batsamtajum duwi!

<sup>48</sup>Jujú dutikakjum atumek iwainmamjume, atumí muunjum aajakajua nunú, Apajuí etsegtin aidau maawajua nunisjumek anentaibajum. Dekaskenmag dita maawag ukusajui, dutikamunum atumshakam nui ekenjum dakumká najanajum batsamtagme.

<sup>49</sup>“Nuaduí Apajuí ni yachajin atumin pachipas: ‘Wi chichamjun etsejin aidau ishittakatajai, chicham yamagman etsegtin aidanashkam, dutikamtaish dita maamunak mainak, tikich aidauak yaaktanum yujajus waitká yujajiagtin ainawai’, tiuwai. <sup>50</sup>Wagki atum wegantu aidau, Apajuí nugkan najanauwa duwi nagkamas, Apajuí etsegtin aajakajua nuna maawaju aina duwi, atumnak Apajuí suwimkan sujamsagtinaitjume. <sup>51</sup>Nunak Abel maamua nui nagkamas, Apajuí etsegtinun Zacariasan jega Apajuí ememattainum pujuttaman maawaju ainawai. Imaan aents

kajegbau aina nuaduú atumnak suwimkanak sujamsagtin ainawai.

<sup>52</sup>“iAtum chicham umiktin jintinkagtin aidautigminak wait anentajime! Atumek aents yawin takakiatak, tikich jegá wayata tutai waitin epetin aina numamtuk, aents Apajuú nemagkag uwemjata tuinaig, atum chicham umiktina duka dekyatukujum, wajina tawa nunú dekachu asajum shiig jintintsugme, nuniau asajum atumkesh uwemainnum pujatsjume.”

<sup>53</sup>Jisus juna chichá chichakua ashimak jiinkimtai, fariseo aidau, chicham umiktinun jintinkagtin aidaujai senchi kajejuidau asag wainainakug <sup>54</sup>kuashat iniidau, wajintuk chichakat timatai tsanumjuja maami tusag.

**Jisus ni jintintaiji aidaun nuni  
pujustin atajum tusa ujakbau**  
(Mt. 10.26-33; 12.32; Mt. 10.19-20)

**12** <sup>1</sup>Nunú imanik shiig kuashat aents tuwainak najanidau, imaniagtai Jisus dekatkauk ni jintintaiji aidaun: “Fariseo aidau levaduraji aina nujai kuitamamkatajum, ditak dekaskea imanun tuinak aents aidaunak tsanuinawai. <sup>2</sup>Tujash ashí uukbau aina duka wantinkagtinai, aantsag ashí dekaachbau aidaushkam dekaamu agtinai. <sup>3</sup>Nuniau asamtai atum tikichish antachbaunum chichasbaunash ashí antukagtinai, tuja atum kanutaigmin epeni pujusjum chichakbaunashkam ashí antukagtinai”, tiuwai.

<sup>4</sup>Nuna jintintaiji aidaun tusa idayak, tikich aents tuwakajun chichajak: “Kumpag aidauh, atumnashkam titajime: Mantamainakuish ishamkaigpajum, atumin iyashmin mainakush wakanminak maachagtinai. <sup>5</sup>Dekas ishamainaitjume atak jakagmin, Apajuú suwimkan sujamak jii ajumaisih

kajinchauwa nui egkepawagmatai waitmainaitjum nunú.

<sup>6</sup>“¿Atum shiig piipich kuichik juwakjum, cinco pishak sujuchuk agmaujum? Nunú aina duka, makichkish Apajuú kajimatki idaisamuk ainatsui. <sup>7</sup>Apajuik atumi intashim wajupa awa nunash shiig dekawai, nunin asamtai atumek ishamkaigpajum. Atumek pishak aina nuna nagkaesau ainagme.

**Ishamtsuk Kristu  
nemagnaitjai tumamainai**  
(Mt. 10.32-33; 12.32; 10.19-20)

<sup>8</sup>“Nuniau asamtai atum tikich ujaakjum wika Kristu nemagnaitjai tiu aidautigminak, wi Apajuú Uchijiyaitkun Aentsmagan Akiidau asan, Apajuú aentsji nayaimpinum batsata nunú antuinai, ditak dekaskenum mina nemagtin ainawai titinaitjai. <sup>9</sup>Atum mina nemagtin ainayatukujum, tikich aidau emtin: Wika Kristunak nemagchauwaitjai, tujuti u aidautigminak, wishakam aikasnuk Apajuú aentsji nayaimpinum batsata nunú antuinai, ditak minak nemagtuchu ainawai, titinaitjime.

<sup>10</sup>“Ashí aents aidau, wi Apajuú Uchijiyaitkun Aentsmagan Akiinawaitag junakesh pegkegchau chichagtuku ainakjash tsagkugnamain ainawai. Tujash Wakaní Pegkejin pegkegchau chichagkaju aidauk tsagkujam achagtinai.

<sup>11</sup>“Atum mina nemagtin aidautigminak achigmakag, jega ijuntainum apu chichaman epegkin aidau ijunjamunum etetamawagtinai. Dutijamchakjash tikich apu aidaunum etetamtatus jujamkiag etamainakuish: Wajintuk apunash titaja, tuja wajintuk aiktaja apu ininkuish, tusagmek uyumaktin aigpa. <sup>12</sup>Atumin apu aidau

inimpatai, Wakaní Pegkeji dekamtijamattawai apu aimainnak.”

### Tikich sujitin aigpajum

<sup>13</sup>Nunú tuwakbaunmaya makichik:

—Jintinkagtinuh, mina apag jaak yatsumjai wájí akaantunikjum jukitajum tujabauwa nunú, ame wait aneasam mina yatsug: Dutiksagmek akaantunikam jukitajum, tusam tujutta, —tiu.

<sup>14</sup>Tusa tama Jisus:

—¿Kumpajuh, ya minash atumin utugchatjumin epegtin atí tusash, nuniachkush ame aents wajiin sujitdayakuish akaantukam suu ata tusash adaitukmae? —tau.

<sup>15</sup>Nuna ti idayak:

—Nijah, atumek kuitamamkatajum, itugsag wájí shiig kuashat ajutia tusagmek anentaimtú pujuigpajum. Aentsuk wájí imá kuashat ajamu asa imá shiig dakunkut pujumait sui, —tiuwai.

<sup>16</sup>Nuna tusa idayak tikich

augmatbaun pachis: “Aajakuí aents wiyakuch, nuna ajajin shiig kuashat ajak juumain uminjauwai,

<sup>17</sup>imanikmatai nigki anentaimas:

‘¿Utugkatjaki juuká ijumainush jega atsgta jama?’ tau. <sup>18</sup>Nunikmá

anentaimag: ‘Dekas ajak juuká ijumtai yaig aina aunak tegagtajai, dutikan nuni muun aidaun jegamjatjai. Dutikan nuanú ashí ajakan juukan utuaktajai, mina wajiig aina nunashkam.

<sup>19</sup>Imatikan kuashat mijanai yumainun, wájí aidaunash ijumjan, nuadú jegá ayamkun pujusan shiig yuwakun, umutainash umakun shiig aneasan pujustajai’, tiuwai. <sup>20</sup>Tu anentaimá pujaun Apajuí chichajak:

‘iAnentainkachuh, amek yamai kashia juajuik jakattame! ¿Nunikaminish wajiijum imatikam ijumjaun ancha

yanau atatua?’ tiuwai. <sup>21</sup>Nu nunikua numamtuk wajaktinai aents ju nugka juwi wiyakchamea pujakush, Apajuí wakegamua nuna takaachkug”, tiuwai.

### Apajuí ni uchiji aidaunak

#### kuitamui tibau

(Mt. 6.25-34)

<sup>22</sup>Nuna tusa idayak ni jintintajii aidaun pempeentuki: “Atumnashkam jutiksanuk tajime. Atumek wajina yuwanuk pujustaja, wajinak nugkugtaja tusagmek puyatjú pujuigpajum. <sup>23</sup>Dekas pujuta nuuwai yutai nagkaesauwa duka, iyashmia nuuwai jaanchin nagkaesauwa duka. <sup>24</sup>Atumesh pishak anentaimsajum diistajum. Ditak ajakmakagkesh juuchu ainawai, jeganakesh jegamkag yutaijinak ijumainatsui. Nuniaunak Apajuí suwawai dita yuwatnunak. Tujash atumetjume dekas pishak nagkaesau aidautigmek. Iman ainagminish ¿wagkag Apajuish atum atumamunash amaschagtinme?

<sup>25</sup>¿Atumesh wajupatigmea, tikich esajam aina ibau wisha atajai tusajum anentaimtú pujakjumes esaumainaitjume? <sup>26</sup>Nunú pipichikesh dutikmainchauwaitkugmesh, ¿wagka tikich wájí aidaush imatikagmesh anentaimtgame?

<sup>27</sup>“Atumesh yagkug yagkujuina nunú anentaimsajum diistajum. Yagkug aidauk takainatsui, ujchnash kutamainatsui, nuninayatak Salomón nugkutai pegkejan tikich aents aidau waitus najanamun sumak nugkujá, tikichin nagkaesau iwagmamajakua nuna nagkaesau pegkeg iwajamun yagkujuinawai, Apajuí yagkugmitkamú asag. <sup>28</sup>Yagkug ikamia aidauk yamaikik pegkejan yagkujuk, ajuma duwi etsa sukuam kagagmatai, apea ajapeam atinnakesh Apajuí imatikas iwaja ibaush, ¿wagkag atumnash idaitamsati

Apajuiyai imatikas kajinas anentaimchau aidauwa? <sup>29</sup>Nuaduí atum yuwatin, uwagtin, anentaimtakjum wajak nunikajak tusagmek uyumá pujuigpajum. <sup>30</sup>Ashí ju aidau aents Apajuí nemagchau aidau imatin ainawai, tujash atum atsumajum nunak atumin Apa Apajuiya nu dekwai. <sup>31</sup>Nuaduí atumek, Apajuí pegkegnum inapa nunuwá umigkatatum. Nuniakjumek ashí nunú aina dushakam aan kuashat jukitnaitjume.

**Nayaimpinum wiyakchameaut**  
(Mt. 6.19-21)

<sup>32</sup>“Mina jintintaig uwig wajumchik kakakchauchia numamtin ajuminig, atumin Apa Apajuiya nu wakejutpagme, mina inamtaijui pujusagti tusa, nuaduí ishankaigpajum. <sup>33</sup>Atumin wajijum akuig sujukjum tikich atsumaidau yaigtatum. Atum dutiktaik, Apajuí nayaimpinum wiyakchameaut tuke atinun, kasash waimainchau, kabau wajiin emesmainchawa nuanuí ukugtamsattajume. <sup>34</sup>Nunú wiyakchameatin ajutjamaina nuanuig anentaimsajum pujustatum.

**Umintsajum aneaku  
pujustatum tibau**  
(Mt. 25.1-13; Mr. 13.34-36)

<sup>35</sup>“Ashí shiig umintsajum jii ekemakjum dakamsatajum. <sup>36</sup>Atumek inak aidau apuji nuwenbaunum wematai, jegaa juwakag pujusag wajupa asag taat, ni taa waitin ijuakuí wamkesan ujattajai tusa kanutsuk iwá pujú aina numamtuk wajatajum. <sup>37</sup>Nu inak aidauk shiig aneemain ainawai, iwaa batsatai apuji minau asamtai. Dekas tajime: Apushkam jegaa wayaa kamisjin yapajia, ni inataiji aidanashkam mesanum ejegan pekas, ni yutain tinamainai. <sup>38</sup>Apú inake aidau

aehaet wajasmataish, kajiitsuk batsamas tsawampainak, apuji minaun igkugku aidauk shiig aneemain ainawai. <sup>39</sup>Ju anentaimtusjum diistajum, aents jeentin kasa kasagkatasa utuam atinjin dekau asa, kanutsuk iwaa pujauk jeenig utuam amaitsui. <sup>40</sup>Numamtuk atumshakam aneaku pujustatum, wi Apajuin Uchijiyaitkun Aentsmagan Akiinawuwaitag nunak, tsawan imatiksa anentaimtachbau ai minitnaitjai”, tiuwai.

**Inak pegkeg inak pegkegchaujai  
pachisa augmatbau**

<sup>41</sup>Juna Jisus ashí tusa inagnakmatai, ni jintintaiji Pedro:

—Apu ame augmatbau pachisam tame dusha imá jutikek tukagtam, atsa éashí tikich aents aidauk antuktinme tusamek tame? —tau.

<sup>42</sup>Tutai Jisus ayaak: “¿Yaita inak niina apuji tabaunak imatiksag umin, nuigtú shiig anentaimkau asamtai kajitus: ‘Ame juwi pujusam, jujú aents mina jegajuí batsamas takaina ju yutain atsumainakuish susata’, tusa inag ukuak, apujig tikich nugkanum wegak ukumaina numamtuk awajkamush? <sup>43</sup>Nunú inak apuji inaja ukukbau ashí ni tibaunak betek umiká pujakug, apuji minitai shiig aneemainai. <sup>44</sup>Dekas tajime: Nunú inak imanis umiaunak apujishkam ashí mina ajutuina duka, ame kuitamjutin atá tusa idaitumainai. <sup>45</sup>Tujash nunú inak inaja ukukbauwa nu: ‘Mina apujuk waamak taashatui’, tusa anentaimas, tikich takau aidau senchi suwimak, nuwanaskam waitkak, nigka shiig yuwak, umutnash umak, nampetan nampe waja pujai, <sup>46</sup>nunú inaka nuna apuji tsawan dekachbau ai pachiachmau takamá wainak, shiig senchi suwimkan susa, tikich aents pegkegchau aidaujai betek waittsati tusa idaimainai.

<sup>47</sup>“Nunú inak apuji wakegamun shiig de kayatak, umitsuk takatnash takatsuk puja nunú imá senchi suwimkan jumainai. <sup>48</sup>Untsu tikich inak apuji wakegamun dekachu asa, pegkegchau takasak ujumak suwimkak suwam amainai. Untsu ya imá senchi susamuita dushakam imatiksaik segam amainai, ni umiktá tibaujinash betekash umikaja tusa diigsatatus, numamut Apajuish aents aidau takatin diigsagtinai.

**Jisusa nemajin nemagchau aidaujai  
tupandayagtinai tibau**

(Mt. 10.34-36)

<sup>49</sup>“Wika ju nugka juwig waitkajus mantuawagmatai, mina nemagtuidauk Wakaní Pegkeji jukitnume, nunitai tikich mina dakitjuidaunak Apajuí jiyai suwimkan susatnume tusan tauwaitjai. Nuniau asan, iwika wakegajai itugsag waamak nu uminkaja tusan! <sup>50</sup>Shiig senchi waitkam atinaitjai, tujash yamaik waitijai, wi dekas waittsatnaitag nunú ashindaekati tusan. <sup>51</sup>¿Atumek ju nugka juwig shiig agkan anentaimas batsamsati tusas tauwaitai tujutjumek? Nunikchauwaitjai. Wika atum mina nemagtuidau asagmin, tikich mina dakitjuidau utugchatan aputugmasag kajegtamá batsamtin asamtai tauwaitjai. <sup>52</sup>Yamaya juwi nagkamas, makichik jeganun cinco aents pujuidauk, kempatuma nu jimaja nuna kajegtinai. <sup>53</sup>Uchigtina dushakam uchijijai kajegdayagtinai, uchishkam apajin shiwagmatnai, nuwashkam nawanjijai shiwagmaetinai, dutikam nawanjishkam dukujin shiwagmagtinai, nuwa nemakushkam tsatsajin shiwagmatnai, tsatsajishkam uchiji nuwen shiwagmatnai”, tiuwai.

**Aents ni nunimainji pachisa tibau**  
(Mt. 16.1-4; Mr. 8.10-13; Mt. 5.25-26)

<sup>54</sup>Jintintaijin tusa idayak aents tuwaká ijunun pempeentuki: “Atum etsá

akaetaiya atú ikiyamkuig, yumi yutugtatui tibauk imanisag yutawai. <sup>55</sup>Dase tsumunmaya dasentuk nujinum wegakuishkam, esat tepeattawai tibauk imanisag esat tepeawai. <sup>56</sup>ITsanumin aidauwah! atum nugkanmayash diisjum, nuigtú nayaimpi niimé diisjumesh tsawan wajuku atatusa nunú dekauwaitkugmesh, ¿wagka wi wainchatain iwainaja takaag dusha, Apajuinumanap iwainawa tusagmesh shiig dekatsjume?

**Shiwajumjaish shiig chichasá  
epegkata tibau**

(Mt. 5.25-26)

<sup>57</sup>“¿Wagka atumek dekas pegkeja duke egatmamtsugme? <sup>58</sup>Makichik aentskesh, pegkegchau takagtusume tusa apunum chichaman egketjamamtai, nijai apu chichaman epegunum wegakmek, eke jegatsuk jintaag shiig chichasam epegtuniata. Nunikchaminig jegaa amin chichaman dekagtama, ni jujamki achijatin aidaunum sujupakmatai, achijatin jujamki aents katsek aidau achiká chimpitainum egkepawai. <sup>59</sup>Junak dekas tajime: Amina apu achigmak egkepamtaig kakajus jijnmaitsume, ayatak amina kuichkijum ashí akikmakam, shiig ashimkam jijnmainaitme”, tiuwai.

**Tudau takat idaichakjumek  
waittsatin ainagme tibau**

**13** <sup>1</sup>Nunú tsawantaik tikich aents aidau kauntuntaju Jisusan, nunikag: Galileanmaya aidau uwijan maawag apeenak Apajuin emematú ijuntatman, Pilato suntaji kautuk kuashat aentsun kajegkagmae tusag ujaidau.

<sup>2</sup>Tiagtai Jisus ditan chichajak: “¿Atum anentaimsagmek dita imá tudau asag aikam ainawai tajumek? <sup>3</sup>Tujash

nuniatsui. Atumshakam tudau takat idaikujum, pujutjum yapajiachkugmek antsagmek jakatnaitjume. <sup>4</sup>Wajasá niimtai torre tutai yakí jiikbau Siloé tutaya nu iyaak, dieciocho aentsun kajegkua dusha, Jerusalegnum batsamajakaju aina nuna nagkaesau tudau asajampap, suwimkan juwak jinauwaita ¿tajumek? <sup>5</sup>Tujash wi tajime: Atumshakam tudau takat idaikujum pujutjum yapajiachkugmek, dita jinawajua antsagmek jinatnaitjume.”

**Numi higuera nejenchau  
pachisa augmattsamu**

<sup>6</sup>Juna tusa idayak Jisus augmatbaun nagkama augmata: “Aents ajajin higuera ajauwai. Dutikau asa, nejeatsuash tusa diistatus wejiu, tujash nejeg makichkish atsuju. <sup>7</sup>Nunitai ni inake ajan kuitamak pujuttaman: ‘Jujú higuera ajakam ajapata. Kampatum mijadai tajuan diyajai nejeatsuash tusan, tujash nejeatsui. Juniayatak tikich ajak ajamainun nugká akijuag wajamaitsui’, tiuwai. <sup>8</sup>Ajakjintin tutai inak ayaak: ‘Apuh, dekas makichik mijan dakasmi nejeashtimpash, wi wajauti tentean pukujan, tikich nugka dekas pegkeg aina nuna yajutkan ijutjatjai; <sup>9</sup>dutikamash nejekchatpash, untsu tikich mijantinish nejeachkui ajakmi’, ” tiu.

**Tsawan ayamtai aig  
nuwa jau etsagagbau**

<sup>10</sup>Jisus tikich tsawan ayamtai tsawagmatai, jega ijuntainum aents ijunjagmatai jintinkagtak wayaa pujau. <sup>11</sup>Nuniamunum nuwi nuwa wakan pegkegchau egkemtuamu asa, dieciocho mijadai tuke machikish dakuenas wekaetsuk, ayatak punus wekagas waitú wekayin eketu. <sup>12</sup>Nunittaman Jisus wainak untsuká:

—iNuwauchih, yamaik wi etsagajame!

<sup>13</sup>Takug nuwan achikú. Dutikam nuwashkam shiig dakuenak tutupit wajasuí. Nunik Apajuin see taku emematu. <sup>14</sup>Dutika etsagagmatai, jega ijuntaiya nuna apujishkam senchi kajeká, aents ijunjaun chichajak:

—Seis tsawan takamainuk awai, nunú tsawan aina duwi kaunmainaitjume etsaentugti takugmek, tsawan ayamtai ai aan yujatsuk, —tau.

<sup>15</sup>Tutai Jisus ayaak:

—iTsanumin aidauwah! Atum aidautijum tsawan ayamtai aig baka atiajum, burrugmishkam jukijum namaká ejegajum yumi aminujum dusha ¿wagka atumesh tsawan ayamtai aish dutiknugme? <sup>16</sup>Jujú nuwa Abraham wegantu, iwanch egkemtuam, dieciocho mijadai tuke punus wekagas waitú wekagun wainkaunush ¿wagkanuk etsagagchatja, tsawan ayamtai aigkish?

<sup>17</sup>Jisus aaja tama niina kajejuidaushkam senchi datsajajui. Nuniai tikich aidauk shiig aneedau, Jisus etsaegkagtutai wainaidau asag.

**Mostaza jigkayí nuigtú levadura  
pachisa augmattsamu  
(Mt. 13.31-33; Mr. 4.30-32)**

<sup>18</sup>Nuniagtai Jisus: “¿Apajuí aentsnum inama nunash, wajijai betekmamtainai tusanua tumainaitjime?” tiuwai. <sup>19</sup>“Apajuí inapa duka, mostaza jigkayin aents ajajin ajaamu, tsapai jigkai piipichitak tsakajá muun wajamatai, yakiya pishak aidau nuna kanawen pasugmama numamtuk, Apajuishkam aents wajumkea nui inabaujin nagkama kuashat emawai”, tiuwai

<sup>20</sup>Tusa junashkam: “¿Wajina pachisnua Apajuik jumamtinun inamui tusanush ujamainaitjime? <sup>21</sup>Apajuí

aentsnum inama duka nuwa pagkan najanatatus kuashat harinan juki, nui levadura piipich ajuntuamu, ashí jegajug kajiak wampushmitkama numamtinai”, tiuwai.

**Jinta menaku pachisa  
jintinkagtuamu  
(Mt. 7.13-14; 21-22)**

<sup>22</sup>Jisus Jerusalén wegak, yaakat aidaunum wayaa nagkaemak, nuigtú yaakta ukukiag aents batsatunmash jinti jintinkagtakua wegau. <sup>23</sup>Nuniamunum makichik aents:

—Apuh ¿wajumchikek uwemkagtin aina? —tau.

<sup>24</sup>Tutai:

—Atumek kakanmamsajum dekas waiti menakua nui wayatajum. Kuashat wayatatus wakeyagtin ainawai, tujash ashí betekak wayachagtinai. <sup>25</sup>Wi jeennun waitin epenmataig atum agaa ijunutijum: ‘Apujuh, Apujuh waiti ujatjita’, tusajum utsugkugminish, wi chichagkun: ‘Wika atumnak wainchau ainajime, tuwiyants ainajum titinaitjime.’ <sup>26</sup>Tusá wi tama atum aigkujum: ‘Apuh, jutii amijai yujumak ijunja yuwaku, umutash amijai ijuntuja umin ayagjama, jintinkagtutash iina yaaktajin wekaesam jintinkagtin aayunjama, tujutiagtin ainagme.’ <sup>27</sup>Tusajum imatkugminchakam wi chichagkun: ‘Atumesh tuwiyants ainajum wainchauwaitjime, ashí wetajum juwi batsamsajum tu batsamsuk, pegkegchau takau aidauwah’, titin ainajime. <sup>28</sup>Aaja tai niimsatakamajum Apajuí inamtaijin Abraham, Isaac, Jacob, tikich Apajuin etsegtin aajakú aina nujai ijunu wainkajum, atumek agag batsamsajum, senchi buatkujum daik takegtitin ainagme. <sup>29</sup>Wagki ashí nugkanmaya aents aidau kaunkag, mesanum Apajuí

inamtain pekaamsagtinai. <sup>30</sup>Nuniagtai aents yamai eme anentujukchamu aina nu, dekas eme anentam agtinai, tuja aents yamai eme anentam aina juka wainak juwagtinai.

**Jisus Jerusalegnumia aents  
aidau egaagbau  
(Mt. 23.37-39)**

<sup>31</sup>Tusa Jisus chichai, nunú tsawantaik wajumchik fariseo aidau Jisusan kautuawag:

—Jisusa apu Herodes mantamatatus wakejutpame, yajá tikich nugkanum wetá, —tuidau. <sup>32</sup>Tusa ujaam Jisus ditan chichajak:

—Wetajum, nunikjum apu pegkegchau takatan imá shiig anentaimgug takauwa nu jegagjum ujaktajum: Wika yamai, kashinchakam wakan pegkegchau aentsú egkemtuaunak jiijan ishimatjajai, dutikakun jau aidaunash etsagaittajai, kempatuma juwi mina tsawantug umiintugkuu duwi nagkankattajai, timae tusajum. <sup>33</sup>Wika Jerusalén wegag junisnuk wetatjajai, yamai, kashin, duwi tsawaknushkam. Apajuí etsegtin aidauk tikich nugkanmag mauchu ainagme, nuaduí wishakam Jerusalegnumak waitkasa maam atatjajai.

<sup>34</sup>“iJerusalegnumia aidauwah atumek Apajuí etsegtin aidaush main ainagme, nuigtushkam Apajuí chichagkagtukti tusa awetugmamtaish, kayai tukuí tukuinakuajum main ainagme! iWika shiig wakeesan, atash uchuchiji aidaun nanapen awayag ijumag kuitamama numamtuk, atumnash ijumjan kuitamkata tamash, atumek dakitjamugme! <sup>35</sup>Nuniku asagmin jujú atum batsatjum juka ukumkimu, aents pujugsachbau agkan agtatui, nuniktin asamtai tajime: Yamai nagkamsagmek ataktuk waitkashatjime, nuniatijum

tsawan jegamtai wi minakui: ‘iApajuí awemam mina ju emematiagmi!’  
tujuttinaitjum duwi waitkatin ainagme.”

#### Aents iyashin iyag jau etsagagbau

**14**<sup>1</sup>Tsawan ayamtai ai, Jisus dekas fariseo aidaun apuji jeen yujumkan yuwatatus wegau. Nunitai tikich fariseo aidauk wajukatig tusa diidau. <sup>2</sup>Nunik waikmá Jisus wainkau aents iyashin iyag tepettaman. <sup>3</sup>Nunik Jisus chicham umiktinun jintinkagtin aidaun, fariseo aidaujai ijumag chichajak:

—¿Atumesh wajuk anentaimjume, tsawan ayamtai aish aents jaush etsagaumainkaih, atsa etsagaumainchaukaih? —tau.

<sup>4</sup>Tamash ditak aimkachaju, nunikagmatai Jisus kuntunum achiká inantak etsagaju, dutika:

—Yamaik tsagajume, amina jeemin wakitkita, —tusa awemak, <sup>5</sup>fariseo aidaun pempeentuki:

—¿Ya atum ainajum anuiyash niina burrují, nuniachkush bakajigkesh tsawan ayamtai aig waanum egkemá jinkishmin wajas egketu wainkush, yamaik tsawan ayamtaiyai, kashin jiiiktajai tusash idaimainaita?

<sup>6</sup>Tamashkam aimainchau dekapenak takamtak ijunu.

#### Nuwenbaunum ipaamu aidau pachisa augmattsamu

<sup>7</sup>Nuwenbaunum ipaamu aidau dekas ekeemtai pegkeg iwajamu aidaun etegkeg pekabiagtai, Jisus wainak tiuwai:

<sup>8</sup>—Atumek nuwenbaunum makichik aentskesh ipapawagmataish, dekas ekeemtai pegkeg iwajamu etegkagmek ekeemsatasa wakeyigpajum. <sup>9</sup>Atum imannum eketjumin tikich ipak atumin nagkaetamsau taamtai, atumin ipapau

tajuntugman: ‘Amek wajaktá jujú aents ekeemsati’, tusa tujamkui, datsá datsanjai wajakjum ukunum ekeemtai imanchaunum ekeemsajjum. <sup>10</sup>Makichik aentskesh ipapainakuishkam, amek yama wayamunmag ekeemtai imanchaunmagkesh ekeemsata. Nuniamin ni ipapau minak: ‘Kumpajuh, emkam au ekeemtai dekas pegkeg aina awi ekeemsata’, tusa aentsun emtin ekepasmatai, ameshkam shiig aneamam datsamkas ekeemsannum. <sup>11</sup>Aents dekas tikichin nagkaesau ata tusa wakegauk, eme anentam achatnai; untsu aents imanchau tikichin nagkaesau atanash anentaimtuchu, dekas eme anentam atinai.

<sup>12</sup>Nuna tusa idayak, aents niina ipauwa nuna chichajak:

—Ame, yujumak yuwami tusam ipaamakmek imá amina kumpagmik, amina yatsumik, amina pataim, tikich atumjai ijutkau dekas wiyakuch aidauk ipaawaipa. Ame nunú aents iman aidau ipaamak, niishkam iiktamak aminashkam dita jistamainakushkam ipapawagtatui, dutijamkui atumek yamaik ju nugka juwi akikbauwa nunin juwaktatjume. <sup>13</sup>Tujash dekas imá pegkeg, ame atak jistamkumek ipaata ujunauch, kuntujin tsujinkau, shutú, wainmachu aidashkam. <sup>14</sup>Ame nunú dutikakmek atak shiig aneamam pujuttame, ditak akigmakchagtin asamtai. Untsu Apajuí atumin akigmakagtinai, ashí aents ni pegkeemtikbau aidaun inanjatín tsawan jegatna duwi, —tiuwai.

#### Aents yujumak yuwawagmi tusa ipaamu kaunkachbau pachisa

augmattsamu  
(Mt. 22.1-14)

<sup>15</sup>Jisus aatus tutai, nunú mesanum ditajai pekaju makichik chichaak:



—Shijap aneastin ainawa Apajuin inamtain batsamsag yujumkan yuwidauk, —tiuwai.

<sup>16</sup>Tutai Jisus chichaak:

—Aents jistamatatus, yutain kuashat umikuí, dutika kuashat aents aidaun ipauwai. <sup>17</sup>Dutika yujumak yuta jegamtai, ni inaken awemauwai: ‘Ipaamu aidaun ujaktá: kaunkatnume yutaig ashí uminkae’, tusa. <sup>18</sup>Tusá ujainam ipaamu aidaun dakituidau asag, dekatkau ipaamua nu chichaak: ‘Wika yamá nugká sumakag juna diyakun wetatjai, wait aneas tsagkugtuhti’, tau. <sup>19</sup>Nuniaí tikich chichau: ‘Wishakam diez toro sumakjai. Nuna nugka tsaitain detuan dekapsata tajai, wait aneas tsagkugtuhti’, tau. <sup>20</sup>Tikitchakam aikasag: ‘Wisha yamá nuwenajai, nuniku asan minishatjai’, tau. <sup>21</sup>Tiagtai inakeshkam ukuak taa apujin ujakú. Tusá ujaam apushkam kajekú, nunik ni inaken chichajak: ‘Waamak weme yaaktanum jinta aidaunum, ujunauch aidaun, uwejen nawenkesh tsujinkau, shutú aidaun, wainmachu aidaushkam ipaajum ikaunmakta’, tusa awemauwai. <sup>22</sup>Tima inakshakam we, aents nunin aidaunak yajuak ikaunma apujin wejí: ‘Apuh, ame tujutmaum nunak imatiksasuk ikaunmakjai, tujash nuigtú ekeemainush awai’, tau. <sup>23</sup>Tama apu inaken chichajak: ‘Wetá nunikam yaakat pegmagbau agaajin, jintaagkesh aents wekagu wainkamek: Wegajai awi yujumak yuwami, tusa dakimakuish kakantsá jukim ikaunmata, ashí mina jegajuí ekeemtai agkan awa nu piyakti. <sup>24</sup>Wi yama nagkamchakun ipaamag duka makichkish taawajag yujumkanak yuwachagatui, tiuwai.’

**Mina nemagtuidau waitiakush  
katsuntug nemagtumain  
ainawai Jisus tibau  
(Mt. 10.37-38; 5.13)**

<sup>25</sup>Kuashat aents Jisusan saetusag ashinaidau, imaniagtai Jisus ayampatua chichajak: <sup>26</sup>“Makichik aentskesh ni

apajin, ni dukujin, ni nuween, ni uchijí aidaun, yachi aidaun, umayí aidaunakesh, mina anenmaina nuní nagkaemas aneak, mina jitintajuk amaitsui. Nuigtú nigkishkam ni wakejamun taká pujutatus wakegaguk, mina jintintajuk amaitsui. <sup>27</sup>Mina nemagtuk waittan dakitaushkam, mina jitintajuk amaitsui. <sup>28</sup>Atum ainajum anuiya, wajasá niimtai torre tutain yakí jiiiká jegamkatatus wakegaguk, ¿dekatkau ekeemas anentaimainchaukait, ibau jegamainush kuichkish ajutuash, wajupa kuichkinak ashimkainja tusa? <sup>29</sup>Aents nunak anentaimtutsuk ayatak nagkama, kuichkijin ashimak idaisamtaig, aents aidaun nuna wainkag dushikinak: <sup>30</sup>‘iNijah! Juna nunú aents jegamkatjai tusa yamaikik nagkamau ayatak, ashimkachmin dekapeak idaisabi’, tumain ainawai. <sup>31</sup>¿Tikitchakam, apu tikich nugkanmaya apujai maanitatatus wakegaguk, dekatkau niina suntajiná ijumag diez milkesh suntag ataig, mina shiwag veinte mil minitjuina aujaish itagdaikan maanimainashitag, tusa dekamainchaukaih? <sup>32</sup>Nunik maanimainchau dekapeakug, eke nagkamtsuk: Maanitik atsustí tusa epegtunimainai. <sup>33</sup>Numamtuk, atum ainajum anuiya ashí niinu aidaun idaitan dakitauk, mina jintintajuk amaitsui.

**Wee jea jeatuji pachisa  
Jisus augmattsamu  
(Mr. 9.50)**

<sup>34</sup>“Week dekas pegkejai, jea jeatuji ajamu asa. Tujash jea jeatuji megkagak sakam wajasmataig, makichik aentskesh wakejumaitsui. <sup>35</sup>Wee nunik besegmataig jukiag agaa ukajá ajapmain ainawai, nugkajai pachimja takamainnumkesh atumnachu, ajakan

wajautinkesh batsatmainchau asamtai. Antutaijum ajamutigmek wi tajim jujú shiig antuktajum”, tiuwai.

**Uwig emegkakbaun pachis  
Jisus augmattsamu  
(Mt. 18.10-14)**

**15** <sup>1</sup>Jisus chichagkagtutai antugkagtatus kuashat aents apú kuichkiji atinun yajumin aidau, tikich aents pegkegchau aidaujai ijuuntuidau. <sup>2</sup>Imatikigtai fariseo aidau, chicham umiktinun jintinkagtin aidaujai Jisusan pachisag:

—Auk aents katsek aidau kumpamak tuke ditajai ijuuntug yu wekaenuwe, —tusag wakenmag imatjuidau.

<sup>3</sup>Nu tama augmatbaun pachis augmatak: <sup>4</sup>“¿Atum ainajum anuyiyatigmesh, cien uwig ajutjamu makichik megkaetugmakmatai, noventa y nueve uwija duka uwegshunum batsaakjum, megkaekauwa nu egaa egakuajum igkumainchau ainajum?” <sup>5</sup>Dutika wainkagme shiig anentsajum midaakí ju ainagme. <sup>6</sup>Nunika jegá wakitki jegaajum atumi kumpajum aidaujai, nuigtú ijunja batsamtaijum aidaujai ijunjajum: ‘Mina kumpag aidauh, mina uwig megkaetugkaunak yamaik jukijai, nuniku asamtai atumjai ijuntsa shiig aneasagmi’, tumainchaukaitjum. <sup>7</sup>Numamtuk Apajui aentsji nayaimpinmaya aidaushkam shiig aneenawai, noventa y nueve uwemkau ainai, aents tudau takatan wekaetak megkaetanum pujú, Apajui nemajak pegkegchaun idayak pujutjin yapajiau asamtai”, tiuwai.

**Kuichik emegkakbaun pachis  
Jisus augmattsamu**

<sup>8</sup>Tikichnashkam tiuwai: “Nuwa diez tsawantai takasá kuichik jumaina ibau takakbaun, kashi makichik ajuag

emegkak, jii ekematuk kuitamas japimak ¿wainmainchaukaih? <sup>9</sup>Nunik wainak shiig aneas juwakug, ni pujamunum aents tikiju batsataidaun, ashí ni kumpají aidaunashkam untsuká ijumag: ‘Atumjai ijuntsa shiig aneasagmi, kuichkin makichik tsawantai takasá jumainun emegkakmayag nunak jukijai’, tumainai. <sup>10</sup>Aatus Apajui aentsji nayaimpinmaya aidaushkam shiig aneenawai, makichik aents niina tudaujin idayak Apajuin nemagtaik.”

**Uchi apajiin wakitkimu pachis  
Jisus augmattsamu**

<sup>11</sup>Junashkam Jisus tiuwai: “Makichik aents ajujukuí jimag uchijí. <sup>12</sup>Nuna uchijí ekeu apajiin: ‘Apawah, ashí waji midau amaina duka yamaik sujustá’, tusa segauwai. Tama apajishkam: ‘Ayú’ tusa mai uchijin ni wajijjinak etsegtuk: ‘Jujú aminuk atí’ tusa tinabiuiwai. <sup>13</sup>Dutikam machik tsawan apajijai pujus, uchi ekeuk ashí ni wajijjinak ijumag juki, apajinaku ukuak tikich nugkanum atushat weuwai. Nunik nui pujus wainak pujut pegkegchaunum wekagak, kuichkijinak wajijijai ashimkauwai. <sup>14</sup>Nunik ashimak pujai, nunú yaaktanum yapajut tepeauwai. Nunikmatai niishkam senchi yapajau, wajiyai sumak yuwati. <sup>15</sup>Nuniak we takatan iniimtai, nu yaaktanmaya aents kuchigtin asa: ‘Ame mina kuchig kuitamjutin atá’, tusa kuchi batsatbaunum awemau. <sup>16</sup>Dutikam niishkam kuchin ayujak pujus senchi yapajak, kuchi yuwinamun yumain dekapeau, tujash makichik aentskesh yutainak suwinachu. <sup>17</sup>Dutikam senchi yapajak ekeemas anentaimá ekeemkamá, adeaju apají inake aidau, nunik: Mina apajú inake aidau kuashat yutanak yuwinak, ampijajash wainak utsá batsatainampap, wi juwi pujusan

nujantai jaaja. <sup>18</sup>Dekas wisha mina apag pujamunum wakitkitjai, nunikan jegan: ‘Apawah, wika Apajuinash kuashat pegkegchaun takagsajai, imanik aminashkam pegkegchaun takagsajame. <sup>19</sup>Nuniku asan wika amina uchigmek amaitsuajai, minak ame inakem etita, dutijuawamin wishakam amina takagtamin aidaujai ijunjan takagsatjame titajai’, tiuwai nigki anentaimas. <sup>20</sup>Tusa jinki wega wegakua apaji pujamunum tikiju jegattak minittaman, apajishkam ikaag uchijin wainkauwai.

“Dutika uchijin wait anentug tupikatki igkug, kajut pagkuk kugkuas shiig anentus ni jeen jukiuwai.

<sup>21</sup>Dutikam uchi apajin chichajak: ‘Apawah, wika yamaik Apajuinash kuashat pegkegchau takagsajai, imanik aminashkam pegkegchaun takagsajame. Nuniku asan wika amina uchigmek amaitsuajai’, tiuwai. <sup>22</sup>Tusá uchijí tama, apaji ni inake aidaun untsuká: ‘Wamkesjum jaanch dekas pegkeg agma iman jiiikjum anugtujatajum, dutikajum tsajam uwejen anillo patakuakjum, sapatckakam wegagtuktajum.

<sup>23</sup>Dutikajum toro tsakat duwejam diisjum maajum, wamkesjum inagkajum umiktajum, yuwinaku jistamawagmi.

<sup>24</sup>Yamaik mina uchig tuke waipakchatnapitja, jajutkas megkaetgkamiatai tuwamag nunú iwaaku tajutí wantintugkae.’ Apuji timatai inak aidaushkam wamkesag ni tibaujinak imatiksag umikagmatai, jistaman nagkamauwai ni uchijí tajuam shiig aneak.

<sup>25</sup>“Nunia niina uchijí dekas emkaushkam ajanum takaak weu minikmá, antukui pampainamun.

<sup>26</sup>Nunik inake nui wekagun untsuká: ¿Wagka nunash imatuinawa? tusa iniau.

<sup>27</sup>Tama inakeshkam: ‘Amina apa yatsum

taamtai, uchig jatsuk iwaaku tajutmatai waipakjai tusa, toro tsakat dekas duwejam diisjum maatajum, dutikawagmin nuna uchin ayugkui jistamawagmi tijam, ditashkam imatiksag umikagmatai nuna yuwinak jistamainak imatuinawai’, tiuwai.

<sup>28</sup>Tusá ujakam senchi kajeká, jegaa waitnak dakitug agaag wajasuí.

Nunikmatai ni apaji jiiintuki: ‘Wegajai jegá wayaami’, tau. <sup>29</sup>Tama apajin ayaak: ‘Apawah, wajupa mijadaiya wi juwig pujusan yayatsjame inakjai betek, chichamjumnash intimjutsuk, wi imatikamaitkumesh minak makichik cabra tsakatchikesh sujuchume, niina kumpajijai jistamati tusamek.

<sup>30</sup>Nuninaitkum yamai amina uchijum, kuichkigmin nuwa akiká takatai aidaujai wekagak utsanjamak taamtai, toro tsakat dekas duwejam mantuum ayugkum jistamajame’, tiuwai.

<sup>31</sup>“Tusá uchijí tama: ‘Uchijuh, amek wijai ijunjam tuke pujuwaitme, ashí waji wáji midau aina duka aminu ainawai.

<sup>32</sup>Nuniaig juka amina yatsum jakautskaitai tuwamag nunú iwaaku pujau asa, imapam tajutjama wantintugmaku asamtai, shiig aneenuku jutikaji, nuaduf jújú jistabauk pegkegchauwai tumaitsuji’, ” tiuwai.

Apú wajiijin kuitamin pegkegchaun pachis Jisus augmattsamu

**16** <sup>1</sup>Junashkam Jisus jintintaiji aidaun tiuwai: “Aents wiyakuch ajujakuf inake, ashí niina wajiiji aidaun kuitamin. Nuna tikich aidaun etsegtukajui: ‘Wajiigminak wainak takagtamui’, tusag. <sup>2</sup>Tima nuna untsuká itan: ‘¿Wajuk asamtaiya nunash tujutuinawa? Yamaik amek minaig takaschattame, nuniktin asam mina kuichkijuk, ashí mina wajiig aina nujai papiinum agakam sujustá’, tusa

segauwai. <sup>3</sup>Tusá tama: ‘Apu mina ni takatjin jiija duwish éwisha wajuk takas nuk pujustaja? Wika nugka tautnumash kakaumaitsojai, wainkan pujusan kuichik sujstajum tusan sumá wekaetanash datsamajai’, tusa anentaimá eketu. <sup>4</sup>Nunik: ‘Untsu juna jutikatjai, apu ni takatjin jiiiguish, tikich aidau mina jegajui taam pujustá tujuttinme’, tusan. <sup>5</sup>Tusa ni apujin diwimaidaun untuská ikaunman, dekatkauwa nuna iniak: ‘Wajupa mina apujush diwime? tau. <sup>6</sup>Tama ni ayaak: ‘Wika aceite cien barrilnum<sup>8</sup> aimkamun awagtumainun diwimjai’, tau. Tutai: ‘Ju papí jukim ekeemsam wamkesam agagta: Ayatak cincuenta diwimjai, tusam’, tiuwai. <sup>7</sup>Nuna tusa idayak tikichin: ‘¿Amesh wajupa diwime?’ Tama ni ayaak: ‘Wika trigo cien sakunum aimjamu awaktumainun diwimjai’, tau. Tutai nunashkam: ‘Ameshkam ju papí jukim ekeemsam waamak agagta: Ayatak ochenta diwimjai, tusam’, tiu. <sup>8</sup>Nunú inak pegkegchau imatika emtika anentaimag umikmatai, apuji wainak anentai jegagchauwai. Nuna tusa Jisus, Apajui nemagchau aina duka pegkegchau takatnumag, Apajui nemajin aidaun nagkagas imatika anentaimainawai.

<sup>9</sup>“Tujash wi tajime: Atumesh duka nu wajukauwa nunisjume k nunimainaitjume, dekas kuichkia duka tikich pegkegnum yayakjum kumpajum ikaugkatajum, nu dutikagmin atumdau amutugmakmataish, Apajui ni pujutajii tuke auwa nui jujamkitin asamtai.

<sup>10</sup>“Aents imachik ajamaitkush pegkegnum takauk, kuashat ajamash nunisag dekas pegkeg aidaunak takamainai; nuniai tikichia nu imachik ajamash pegkegnum takaachuk, kuashat

ajamash pegkegchaunak takamainai.

<sup>11</sup>Aents ju nugka juwi pujus, kuichik kuashat ajamaitak pegkejan takaachunash, éitugsaya Apajuish tuke pujutaiya nuwish kajintsash awaimainaita? <sup>12</sup>Atumin ju nugka juwi pujus, takagtusti tusa Apajui amasbauwa nu, betek takaschautigminash éitugsaya nayaimpinmaya dekas tuke atina nunash amamainaita?

<sup>13</sup>“Makichik inakak jimag apugtinuk amaitsui. Tikich apujin imá senchi aneak, tikichin dakitmainai. Nuniachkush makichik apujin wakejus umijak, tikichnak dakitau asa umigmaitso. Numamtuk atumshakam Apajui umigkata tu, wiyakchameatasa anentaimtu wajamaitso.”

<sup>14</sup>Jisus tutai fariseo aidau antukag, dita imá senchi kuichkinak anentaimtin asag, dushikis chichajuidau. <sup>15</sup>Nudiagtai Jisus: “Atumetjume aents aidau emtin pegkeja iman jumamin aidautigmek, tujash Apajui atumí anentaimnak shiig degagtumjume; nuniau asa aents aidau eme anentam ata tus wakegaunak Apajui dakitawai.

**Apajui chichame duwik etsegkam  
tuja yamai etsegbaujai  
pachisa tibau**

<sup>16</sup>“Juan Yamijatn Apajui chichamen eke etsegtsoigkik, aents aidauk Moisés chicham umiktajum tibauwa nuna, nuigtú Apajui etsegtin agagbauwa nunash antujakajui. Tuja Juan Yamijatn yamajam chicham, Apajui inamjatnun etsegbaun nagkabauwa nuwi nagkamas, ashí aents aidauk Apajui inatjati tusag senchi kakanmamainawai.

<sup>17</sup>“Nugka, nayaim aina nu mekgagainatsaigkik, chicham umiktinnun Moisés agagbau piipich aina dukesh umintsukek juwakchatnai.

**Nuwak idaimaitsui Jisus tibau**

(Mt. 19.1-12; Mr. 10.1-12)

<sup>18</sup>“Ashí aishmag aidau nuwen idayinak tikich nuwajai nuwenkug ekagmainawai. Tuja nuwa aishi idaisamua nuna nuwatushkam nunisag ekagmawai.

**Lázaro wiyakchajai**

<sup>19</sup>“Aajakuí aents wiyakuch jaanch dekas pegkejan iwagmamag pujus, kashí kashinig jistamu. <sup>20</sup>Imaní pujai ujunauch Lázaro daagtinun ashí iyashinig kucha kuchapjú wajasun itawag, nunú wiyakcha jeen waitijin apukiajui, nui pujus segamti tusa. <sup>21</sup>Nui pujus senchi yapajak yuwatatus wakegau wiyakuch yuwaku mesajinia akakeamun, nunittaman yawá aidau kuchapen dukatuinak waitkaidau. <sup>22</sup>Lázaro nuní pujau jakamtai, Apajuí aentsji nayaimpinmaya aidau jukiag iwakaju Abraham pujamunum. Nuniku ai wiyakchashkam jakamtai ukusajui.

<sup>23</sup>“Dutikam wiyakchak jiinum pujus senchi waitiak pagkas niimkamá, wainkau Abragkan, Lazaronashkam Abragkai ayaumas ekeemtatman. <sup>24</sup>Nunik wainmawaik senchi jiiiká untsuak: ‘iApawah Abragka, minash wait anenjugta!, nuniakum Lázaro awetugta ni tsjam uwejen yumin uchupig idaijun antinjuk machik bichatmitkajuati, jii imagniamunum pujusan senchi waitiag nuna’, tau. <sup>25</sup>Tama Abraham ayaak: ‘Uchijuh adeagta, ame nugká pujusam shiig aneasam waitkas pujubium nu. Nuniamin Lazarok senchi waitmayi, imanijakú asa yamaik nigka juwig ayamak shiig pujawai, nuniai ame waitiame. <sup>26</sup>Nuigtushkam juwiyati anuí minita takuish minimaitsui, wake ishamain asamtai. Anuiyatigmeshkam

juwi minitasajum wakegakjumesch nagkaemamaitsugme.’

<sup>27</sup>“Tama wiyakuch chichaak: ‘Untsu apawa Abragkah, wait aneasam Lázaro nugká awemata, <sup>28</sup>dutikam mina yatsug cinco batsaama nuna shiig Apajuí chichamen ujatjuktinme, dutikam ditak jujú imag waitta juwig minishtinme’, tau. <sup>29</sup>Tama Abraham ayaak: ‘Ditak Moisés agagbau, nuigtú Apajuí etsegtin aidau agagbauwa nuna aujus imatiksag umiinak waittanmag minimainchau ainawai’, tiu. <sup>30</sup>Tama wiyakuch ayaak: ‘Apawah Abragka, dekas aents jakau nantakí chicham ujaam antugkag tudau takatan idayinak Apajuin nemagmain ainawai’, tau. <sup>31</sup>Tutai Abraham chichajak: ‘Moisés chicham umiktinun, nuigtú Apajuí etsegtin aidau agajajua nuna betek uminatsu anidauk, jakau nantakí ujamash dekaskeap tawa tusag antugmainchau ainawai’, tiuawai.

**Tikichin pegkegchau emaidaun pachis Jisus tibau**

(Mt. 18.6-7, 21, 22; Mr. 9.42)

**17** <sup>1</sup>Nuna ashimak Jisus ni jintintaiji aidaun chichajak: “Aentsuk tudau takatnak kakajus uwemtumaitsui, tujash aents tikichin tudaun takamtikaina nuna wait anentajai. <sup>2</sup>Ju uchi piipichia jumamtin mina yamá nemagtuidaun makichik aentskesh pegkegchaun takamtikaidauk, dekas kaya muun dekeetai aina iman jukí kuntugnum jigká detuais, nayants ajugká ajapmain ainatai.

<sup>3</sup>iKuitamamkatajum atumek!

“Amina yatsum pegkegchaun takagtamkuish, ankaipa tusam senchi titá, tama tsagkugtugta takuig tsagkujata. <sup>4</sup>Tuja makichik tsawantinig sieteya imagnia pegkegchaun takagtamas, sieteya imania tsagkugtugta tusa segapakuish tsagkujata”, tiuawai.

**Apajuiyai kajintsá anentaibaunum  
dutikmainai tibau**

(Mt. 21.21)

<sup>5</sup>Jisus tutai jintintaiji aidau:

—Apujuh, Apajuiyai kajintsá anentaimta nu aan senchi sukagtusta, —tuidau.

<sup>6</sup>Tiagtai Jisus ayaak:

—Atum Apajuiyai kajintsá anentaimaujum mostaza jigkayiai nuninchikesh ajutjamainakuig, numi sicómoro waja jujú chichagkujum: ‘Teganim nayantsanum wajaata’, tamak nunisag uminmainai, —tiuwai.

**Inak aidauk apujin umignai tibau**

<sup>7</sup>“¿Atum aidautigmesh inakjum nugkan pukug tsayaak wekaetau, nuniachkush bakagmin kuitamak pujau wakitki jégá taamtai, wayam: ‘Juwi tantá ekeemsam yujumak yuwata’, tumainaitjum? <sup>8</sup>Duka tutsuk: ‘Agkú yujumak yuwatin inagtugkata, nunikam yapagamam sujustá, wi shiig yuwan, umutnash uwajan uminkamtaí, amesh duwi yuwata’, tumainaitjume. <sup>9</sup>Inakem ame tibaunak imatiksag umigtamkamtaí yuwagmesh: See ame umikbaun yuwag duwi, tusagmesh ¿tukamujum? Dekas tajime: Duka tuke tuchau ainagme. <sup>10</sup>Numamtuk ainagme atumshakam, Apajuí takatan amasbauwa imá duke umikjum idaikugmek: ‘Jutii inak aidautik atumchataí ainaji, imá ni tujabauk umiká idayidau asaja’, tumainaitjume.”

**Diez aents jata lepra achikbau  
aidaun Jisus etsagakbau**

<sup>11</sup>Jisus Jerusalén wegak, Samaria nugka, Galilea nugkajai tesagdayamunum junta asamtaí nagkaebau. <sup>12</sup>Nuna nagkagag jegawajui aents yaakta ukukiag batsatbaunum,

nuniai diez aents lepra achikam waitú batsamin igkugtatus jiiinag ikaag ijunas, <sup>13</sup>senchi untsumkag:

—iJisusah jintinkagtinuh, jutiish wait anenkagtujia! —wajaidau.

<sup>14</sup>Imatiagtai Jisuschakam:

—Sacerdote pujamunum jegajum wantinkatajum, —tiu.

Tima ditashkam jintá wesag, dita jaamujinak tsagagkaju. <sup>15</sup>Nunik dita aina nuwiya makichik ni tsagagbaujin wainmamak, senchi jiiiká Apajuin eme emematak waketak, <sup>16</sup>Jisusan jegantun tikishmag pujujus, see tau ni tsagagbaunum, duka Samarianmaya aajakuí. <sup>17</sup>Nunitai Jisus chichajak:

—¿Diez aidau tsagagchagmaka?

¿Nueveya dusha wajukawagmae?

<sup>18</sup>¿Imá jukeuchikaih tikich nugkanmayayaitak wakitki Apajuí ememati duka? —tau.

<sup>19</sup>Tusa Jisus:

—Wajakim wetá, amek minai kajintsá anentaimam duwi tsagajume, —tiuwai.

**Jisus ni taatnuji pachisa etsegkamu**

(Mt. 24.23-28; 36-41)

<sup>20</sup>Fariseo aidau Jisusan iniinak:

—¿Wajupa asaya Apajuí jutiin inapamush atinaita? —tusag iniidau.

Tama ni ayaak:

—Apajuí inamjatna duka duwiyap atatua tusaish kakajus dekamaitsui.

<sup>21</sup>Nuniau asamtaí: ‘Apajuik juwi inamui, awi inamae’, tabauk achatnai. Apajuik yamaiya juwik atumnak inapajume, —tiuwai.

<sup>22</sup>Tusa idayak ni jintintaiji aidaun pempeentuki chichajak:

—Tsawan jegatnai, wi Apajuí Uchijiyaitkun Aentsmagan Akiinauwaitag nuna wakitkimtai, atum utusaik makichik tsawantaikish wainkag tusajum wakeyagtinaitjum nunú, tujash takugmeshkam minak waitkashin

ainagme. <sup>23</sup>Nunashkam tujabiagtinai: ‘Juwi pujawai, awi pujume’, tujamainakuish wegpajum. <sup>24</sup>Wi Apajuí Uchijiyaitkun Aentsmaga Akiinawaitag nunak, peem pachiachmau peeti wamkes nayaimpin tsaaptin emak, tikich yantamnumash tsaapmitkama numamtuk wajaktinaitjai. <sup>25</sup>Nunú tsawan jegatsaig, dekatkauk senchi waittsattajai, aantsag aents aidaush dakitjiagtatui. <sup>26</sup>Wi Apajuí Uchijiyaitkun Aentsmagan Akiinawaitag nuna minittakun wajataik, Noé pujai wajukejutú aina numamtuk wajagtinai. <sup>27</sup>Ditak yutain yuwinak, umutan umuinak, nuwentan nuween, aishintan aishin, nawanjin suju waja batsatai tsawan jegamtaí, Noé arcanum egkemá waitin epenmatai, nu jag abauji ashí nugkan amuak, tikich aents aidaunak ashí tajak utsagkui. <sup>28</sup>Nunisag Lot pujusmataish, yutan yuwinak, umuinak, sumainak, sujuinak, ajakmainak, nuigtú jegá jegam wajainak batsamajakú aina numamtuk wajagtinai, wi juwi minittaku wajataish. <sup>29</sup>Lot yaakat Sodoma pujau jiinki wematai, nayaimpinmaya jii azufrejai pachimjamu, yumi yutak wajukeama imaanik iyaajui, nuniak aents aidaunak ashí apekag ijinawajui. <sup>30</sup>Numamtuk wajaktinai, Wi Apajuí Uchijiyaitkun Aentsmagan Akiinawaitag nuna mininakun wantinbaush.

<sup>31</sup>“Nu tsawantin aents jega jegamká tuntupé paka inagnakbaunum waka pujaushkam, wajiji jegá aunak akaikig jumaitsui. Nunisag ajajin takaak wekagushkam jeenig waketmaitsui. <sup>32</sup>Adeagtajum Lota nuwe wajakauwaita nunú. <sup>33</sup>Ashí aents ju nugka juwi pujutan wakegak, mina nemagtuk waittan dakitauk uwemtjashtin ainawai. Untsu dita pujutin uyumachuk uwemjatin ainawai.

<sup>34</sup>“Junashkam tajime: Jimag aents kashi makichik pegaknumag tsanias tepaushkam, makichik juwaku, tikichik ukuam atinai. <sup>35</sup>Jimag nuwa shaa dekeenak pujuidaushkam makichik juwaku, tikichik ukuam atinai. <sup>36</sup>Jimag aents ajanum takaak wekagushkam, makichik juwaku, tikichik ukuam atinai.”

<sup>37</sup>Juna Jisus tutai:

—Apuh, ¿dusha tuwig dekaskesh nuniktinaita? —tusag iniidau.

Tuinam Jisus:

—Duka tuwí jakau tepettawa, nuanuí chuwaagak tuwakagtinai, —tiuwai.

**Apu chichaman epegkin nuwa wajejai pachis Jisus augmattsamu**

**18** <sup>1</sup>Junashkam Jisus mijamtsuk Apajuinash ausatnume tusa jintinkagtak nagkama augmatu: <sup>2</sup>“Makichik yaaktanum pujujakuí apu chichaman epegkin, duka Apajuinash ishamsash anentaimtuchu, aents aidaunashkam ajantus diichu aajakuí. <sup>3</sup>Nunú yaaktanmag makichik nuwa wajeshkam pujau asa utugchat ajusam, apun jegajua: ‘Jujú epegtujuata’, tusa segau. <sup>4</sup>Tusa imatjú pujugmash yaitnak dakitú pujau asa nigki anentaimas: ‘Apajuinash ishamsanush anentaimtuchuitjai, aents aidaunashkam ajantusnush diichuitjai; <sup>5</sup>nunin akunush, nuwa waje waa waamak tajutak waitkaja junak, yaigkan epegtuatjai dutikam agkan idaitusti’, ” tiuwai.

<sup>6</sup>Jisus juna ti: “Apu chichama epegkin tikima pegkegchaukesh aatus tiuwa nunin aish, <sup>7</sup>Apajuish niina nemajin aidau utugchatnum pujusag kashi tsawaishkam untsuamash, ¿yaisuk idaimainkaih? ¿Nuniachkush dukap asan yaigtajai tumainkaih? <sup>8</sup>Dekas tajime: Apajuik dukap atsuk waamak yaimpamainaitjume. Tujash wi Apajuí

Uchijiyaitkun Aentsmagan  
Akiinawaitag nuna ataktú nugká  
minaknuk, wajumchik Apajuí  
anentaimtuidauk batsatai taatnaitjai”,  
tiuwai.

**Fariseo apu kuichkiji atinun  
yajumnujai pachis Jisus  
augmattsamu**

<sup>9</sup>Aents aidau dita imá pegkejan takauwa iman anenmamainak, tikich aidaunak dakituidau asagmatai, Jisus jujú augmatbaun pachis: <sup>10</sup>“Jimag aents Apajuin ausatatus jega Apajuí ememattainum wegajui, makichik fariseo, tikich apú kuichkiji atinun yajumnujai. <sup>11</sup>Nunik fariseo Apajuin aujak wajai wajas: ‘Apawah, see tajame, wika tikich aents aidau kasa, pegkegchau takau, tsanijimta wekaetin, jujú apú kuichkiji atinun yajumin puja juninkesh atsujai. <sup>12</sup>Wika aminak makichik tumigtinig jimag tsawantai yujumkan ijagmá pujusan segaugme, kuichkinash mina akijuinakuig diezmó wajaujai’, tau. <sup>13</sup>Tujash apú kuichkiji atinun yajumnuk nigka ukunum wajas, ni tudaujin anentaimtus wake besemag dekapeak, machikish nayaimpinak pagkaish diitsuk detsepen ijuak: ‘Apajuiyah, wika tudauwaitjai, minash wait anenjugta’, ” tiuwai. <sup>14</sup>Jisus nuna ti: “Dekas tajime: Apú kuichkiji atinun yajumna duka tudauji tsagkujamu asa shiig aneas waketai, fariseok nunikchauwai. Ashí aents eme anenmamaidaunak Apajuik imanchauch diyawai; utsu imanchauch anenmamaidaun eme anentus diyawai”, tiuwai.

**Jisus uchi ikautkamu**  
(*Mt. 19.13-5; Mr. 10.13-16*)

<sup>15</sup>Nuna tusa ashimkamtai uchi aidaun Jisusan ikautuidau uchin antinjukti

tusag. Imatikiagtai ni jintintaiji aidau wainkag uchigtin aidaun jiyaidau. <sup>16</sup>Tiagtatman Jisus antuk, uchin untsuká:

—Tutsuk idaisatajum, ashí uchi aidauk minai kauntatnume, utugkajum awagkigpajum. Jujú uchi anentaimaina jumamtin aidaunum Apajuik inamjata tawai. <sup>17</sup>Dekas tajime: Aents aidau, uchi mina anentaimjutuina imanis anentaimjutuinachuk, Apajuí inamak amain ainatsui, —tiuwai.

**Apu wiyakuch Jisusan iniasbau**  
(*Mt. 19.16-26; Mr. 10.17-27*)

<sup>18</sup>Nuna Jisus timatai apu wiyakuch Jisusan iniak:

—Jintinkagtin pegkejah, ¿wajina dutikmainaitja pujut tuke atina nuna jukitasanush? —tau.

<sup>19</sup>Tama Jisus ayaak:

—¿Wagka pegkejá tujutme? Makichkish pegkejak atsawai, imá Apajuuya duke pegkejak. <sup>20</sup>Amek dekame chicham umiktin agagbaunum: ‘Tsanijinawaipa, magkagtuawaipa, kasamkaipa, wainkamek tsanumkagtujaipa, amina apa dukujai eme anentsam diiyaakum yaigtá’, tawa nunú.

<sup>21</sup>Tama ni chichaak:

—Wika nunak datsauch asanuk ashí umikuitjai.

<sup>22</sup>Nuna tutai Jisus antuk ayaak:

—Nuigtú makichik umimain ajutjamui: Ashí amina ajutjamaina duka sujukam ujunauch aina nu susata. Nu dutikawamin nayaimpinum wajigmik ajutjamtinai. Nu dutika ukuakum mina nemagtukta, —tiuwai.

<sup>23</sup>Nu tama antuk wake besekuí, shiig wiyakuch asa. <sup>24</sup>Nunik senchi wake besektatman Jisus wainak chichajak:

—Wiyakuch aidauk kakajus Apajuí minash inatjati tusag idaimamainchau



ainawai. <sup>25</sup>Camellok aujá jiinish waigká nagkaemamainai, tujash wiyakuch aidauk Apajuí minai inamjati tusag kakajus idaimamainchau ainawai, —tiuwai.

<sup>26</sup>Jisus tabaun tikich aidaushkam antukag:

—¿Yaki tujash uwemjaush amainaita? —tuidau.

<sup>27</sup>Tiagtai Jisus ayaak:

—Aents aidau dutikmainchauwa nunak Apajuí dutikmainai, —tiuwai.

**Mina nemagtuaidau ditanu  
ukukbaujin nagkaesau  
jukiagtinaí tibau**

(Mt. 19.27-30; Mr. 10.28-31)

<sup>28</sup>Tutai Pedro ayaak:

—Jutii aidautik iina ajutjamaidauk ukuinaku nemagkamiajime, —tau.

<sup>29</sup>Tutai Jisus ayaak:

—Ashí aents Apajuinun takainak yujainak jeen, nuwen, yachin, uchijin, apajin dukujijai ukukiag yujaidauk, <sup>30</sup>jujú nugka juwi pujusash, ni ukukbaujin nagkaesau jukiagtinaí, nuigtushkam atak atina duwi pujut tuke atina nui pujusagtin ainawai.

**Kampatuma juna Jisus ni  
mantamnatnuji etsegkamu**

(Mt. 20.17-19; Mr. 10.32-34)

<sup>31</sup>Jisus ni jintintaiji doce aina nuna akanak juki: “Jerusalén jegattag duwi, Apajuí etsegtin aidau, Apajuí Uchijí Aentsmaga Akiinauk nuniktinaí tusa agajajua duka uminkattawai. <sup>32</sup>Nuniau asamtai minak aents judiuchu aidaunum sujutkagtatai, dutijuawagmatai pegkegchau chichagtuinak, dushiktuinak usuktiagtatai; <sup>33</sup>asututnash asutu awa awajtuinakua mantuawagtatai; tujash dutijuawagmataish kampatum tsawanta juwi ataktú nantaktatjai”, tau.

<sup>34</sup>Tujash ni jintintaiji aidauk shiig dekamainchau dekapedau, shiig antukchamnum tau asamtai.

**Jisus Jericonmaya aents  
wainmachu etsagagbau**  
(Mt. 20.29-34; Mr. 10.46-52)

<sup>35</sup>Jisus yaakat Jericó jegattak wegai, aents wainmachu jintá yantamen ekeemas: “Kuichik sujustajum”, tusa sumá eketu. <sup>36</sup>Nuniau kuashat aents nagkaemainak pampainamun antuk iniimu:

—Wagka imatainawa, —tusa. <sup>37</sup>Tutai: —Jisus Nazaretnumia wetai imatuinawai —tusag ujaidau. <sup>38</sup>Tiagtai senchi untsumak:

—iJisusah, David wegantu uchijiyah, minash wait anenjugta! —wajau.

<sup>39</sup>Imattai aents eemak ashinaidau itatkati tusag jiyaidau, tujash nigka nuní senchi untsumak:

—iDavid wegantu uchijiyah, minash wait anenjugta! —wajau.

<sup>40</sup>Wainmachu imatbaun antuk Jisus wajantá:

—Jukijum juwi itagtuatajum, —timatai jukí ejentuntam, <sup>41</sup>Jisus iniak: —¿Minash utugtukti tusamea wakegame? —tau.

Tama ni ayaak:

—Apuh, wika niimtijiti tusan wakegajai, —tau.

<sup>42</sup>Tutai Jisus chichajak:

—iWainmakta! Amek minai kajintsá anentaimam duwi tsagajume, —tiu.

<sup>43</sup>Tusá tamawaik wainmakui. Nunik Apajuin emematkamaikia Jisusan nemagkauwai. Tuja ashí aents nuna wainkajushkam Apajuin emematuidau.

**Jisus Zaqueo jeen webau**

**19** <sup>1</sup>Nuna dutika ukuak Jisusak yaakat Jericó wayaa nagkaebau. <sup>2</sup>Nuniaí Zaqueo apú kuichkiji atinun

yajumin aidaun apuji shiig wiyakuch, nunú yaaktanmak pujau. <sup>3</sup>Nuniau asa, Jisusash wajukukita tusa wainkatatus wakegau, nuniayatak kuashat aents tuwagkagmatai wainmainchau dekapjau sutajuch asa. <sup>4</sup>Nuniak Jisus wetinmanini eemak tupikaki, numi sicómoro wajaunum waka ekeemsau, Jisus nagkaematai wainkatatus. <sup>5</sup>Nuniai Jisuschakam nui jegak pagkai diyak:

—Zaqueoh, wamkesam akaikita, amina jeemin minajai, —tiu.

<sup>6</sup>Tama Zaqueoshkam wamkes akaiki, shiig anentus Jisusan juki niina jeen emauwai. <sup>7</sup>Nunitai ashí aents aidau: Aents tudaugtinu jeen kanagtatus wegawai, tusag augmatuidau. <sup>8</sup>Tujash Zaqueok niina jeen ejega wajakí, Jisusan:

—Apuh, yamai nagkamsanuk aents ujunauch aina auna jimaituk wajijun akantukan tinamtajai, dutikakun wi kasagkamug aidaunash ipaksumta imajin susatjai, —tau.

<sup>9</sup>Tutai Jisus ayaak:

—Yamaik ashí amina pataimijai uwemkaugme, Abraham dekaskeapi tiuwa nunisjumek dekaskeapi tujutum nuaduí, dekas Abraham wegantu wajasugme. <sup>10</sup>Wi Apajuí Uchijiyaitkun Aentsmaga Akiinawaitag nunak, aents megkaejau aidaun egakan uwemtijatasan tauwaitjai, —tiuwai.

**Apu ni inake aidaun kuichik tinamí  
ukukbau pachisa augmatbau  
(Mt. 25.14-30)**

<sup>11</sup>Jisus Jerusalén jegattak wegau asamtai, aents aidau ni chichaamu antugkaju asag, awi jegaa apu wajasá waamak inamjashtimpash tusag anentaimaidau asagmatai augmatbaun nagkabau.

<sup>12</sup>Nuniak tau: “Makichik aents ashí aents aidau eme anentsá diitai aajakuí,

nunú tikich nugkanum atushat weuwai, nuwi apu emam wakitki niina nugkeen taatatus. <sup>13</sup>Eke wetsuk niina inaken diez aina nuna untsuká ikaunmak, makí makichik aentsun, cien tsawantai takasá jumainun kuichkin tinamí chichajak: ‘Jujú kuichkia juwik waji sujakjum, kuichik aan kuashat ikaugkatajum, nuniagmin wisha taatjai’, tiuwai. <sup>14</sup>Nunikunak aents niina kajejuidau asag, dekas apun chichaman awetuinak: ‘Jutiik dakitaji aanú iina apuji atí tusaik’, tiajui.

<sup>15</sup>“Tujash nigka apu adaikam wakitki niina nugkeen tauwai. Nunik niina inake kuichik tinamká ukukbauji aidaun untsukaju, maki makichik aentsush kuichkinash wajupak ikaugkaje tusa dekajuatatus. <sup>16</sup>Tijam makichik niyá eemak jegantá: ‘Apuh, ame kuichik sujusmayum nunak, aan nagkaemasan cien tsawantai takasá jumainun ikauntukjame’, tau. <sup>17</sup>Tama ni ayaak: ‘Ayú, amek inak pegkejitme, machik susamuitkum kuashat ikaugkaume, duwi wishakam diez yaakta aina nuna apuji emattajame.’ <sup>18</sup>Tusa inagnaig tikitchakam jegantun chichajak: ‘Apuh ame kuichik sujusmayum duka, nuigtú cincoa imajin kawegke.’ <sup>19</sup>Tutai nunashkam aikasag chichajak: ‘Ameshkam cinco yaakta apuji atá’, tiuwai.

<sup>20</sup>“Tuja tikitchakam tajuntun chichajak: ‘Apuh, juuwai kuichikmek jukita, jaanchi shiig ijian kuitamkamun itajuagme, <sup>21</sup>wika amek senchi takamtikagtakum waitkagkagtinaitam nuna dekagjame, nuigtush ame susachu ayatikum atantin, aikasmek ame ajak ajakmachbau aig, juukam yajumin asamin, ishamakun kuichikgminak takamtiksachmajai’, tau. <sup>22</sup>Tama ni ayaak: ‘Amek inak pegkegchawaitme, amina chichamjuming bakumattame,

wi senchi takamtikagtakun  
waitkagkagtin, susachu ayatkun  
tikichnash atantin, aikasnuk wi  
ajachbaugnak ju waitiatkumesh,  
<sup>23</sup>¿wagka kuichik kawegti tusa  
egketainum egkeam ukugtukchamiume?  
Dutikauwaitkuminig wi wakitki taakun  
kawegkun jumain awajkajai', tau.  
<sup>24</sup>Tusa idayak tikich nui ijunun  
chichajak: 'Aanú kuichkin takaka nu  
jukukjum, cien tsawantai takasá  
jumainun ikaugka nu susatajum.'  
<sup>25</sup>Tutai aents chichajuinak: 'Apuh,  
niinuk cien tsawantai takasá jumain  
kuichik ikaugkamuji ajajama', tuidau.  
<sup>26</sup>Tujash wi tajime: 'Ni kuashat ajá duka  
nuní dukap uwaetuka suwam atinai;  
untsu piipich ajá duka, nu piipich  
ajamua duke atantam atinai', tiu.  
<sup>27</sup>Nuna tusa idayak aents nui ijunun  
chichajak: 'Mina, apu we tusa dakitjuju  
aina nunú juwi itanjum kajegtajum',  
tiuwai.

**Jisus Jerusalén apu  
wajasá wayaamu**

(Mt. 21.1-11; Mr. 11.1-11;  
Jn. 12.12-19)

<sup>28</sup>Juna tusa ashimak Jisus  
nagkaemaki Jerusalén weuwai. <sup>29</sup>Nunik  
yaakat Betfagé tutai Betaniajai olivosan  
mujajin tikiju abaanum jegantatak  
wegak, Jisus ni jintintaijin jimajan  
awemak:

<sup>30</sup>—Wetajum au yaakat jegattak aents  
batsata awi, awi jegakmajum burro  
makichik aentskesh entsamchatai jigkaam  
wajau wainkattagme, nu atia jukim  
itagtuatajum. <sup>31</sup>Nu atiangmin makichik  
aentskesh: Wagka atieme tujamkujaish:  
Apu atsumau asamtai juwaji titajum, —tiu.

<sup>32</sup>Tiajam Jisusa jintintaiji aidaushkam  
wegag, jegakmá ni tibaunak imatiksag  
betek wainkaju. <sup>33</sup>Nunik jegantun  
atittaman burrugtin wainak:

—¿Wagka burrush atiagme? —tau.

<sup>34</sup>Tama dita ainak:

—Apu atsumau asamtai juwaji,  
—tiaju.

<sup>35</sup>Dutika jukiag Jisusan itaantaju,  
dutikawag awantak nugkuagbaujin  
jukig burro tuntupen aitkagmatai,  
Jisus ekeemiu. <sup>36</sup>Nunik Jisus wetai,  
aents aidauk dita awantak  
nugkuagbaujin jintanum ainag emaidau.  
<sup>37</sup>Nunikag olivosan mujají  
chapaibaunum jegantatak weenak, ashí  
Jisusa nemajin aidauk shiig dakujusag  
senchi jiikag Apajuin emematuidau,  
Jisus ashí pegkeg takaamun wainkaju  
asag, nuninak:

<sup>38</sup>—iApajuí awemamu iina Apuji  
mina juuwai iina agkanmitkagmatna  
duka, nayaimpinum agkan batsata  
dushakam aantsag agkan  
batsamiagtatui! —wajaidau.

<sup>39</sup>Imatiagtai wajumak fariseo nui  
pachitkau aidau:

—Jintinkagtinuh, amina nemagtamin  
aidau imataina nu imattsuk itatjata tusa  
itatmitkajia, —tuidau.

<sup>40</sup>Tama Jisus ayaak:

—Dita itatiagtaik kaya aina ju  
pampaumain ainawai, —tiu.

**Jisus Jerusalegnumia  
aents aidau egaagbau**

<sup>41</sup>Jisus Jerusalén tikiju wesa yaaktan  
wainak, aents nui batsamin aidau  
anentaimtus buutu. <sup>42</sup>“Jerusalegnumia  
aidautijum, wi agkanmitkamainaitjim  
nunú yamaikish dekawagminig, Apajuik  
agkanmitkagmamaainai. Tujash atumek  
Apajuí awemamuapita tujutchaujum  
nuaduí, Apajuishkam dekamainchau  
etamkaje. <sup>43</sup>Nunin asamtai atumnak  
tsawan tikima ishamain  
ajutjamtinaitjume, shiwajum  
kautjamkag yaaktagminak peegmak  
apagtamak, ashí yantamnum

dakagmajag jetepakagtinai.

<sup>44</sup>Dutijamainak atumnak ashí amupainak jeemnash ashí tsaikagtinai, imatikamu asa makichik kayakesh tikich kayanum patamiukesh juwakchatnai. Atumek Apajuí atumin tajutjabau aigkish: lina uwemtijamjatasampap tae, tusagmek dekaachu asagmin.”

**Jega Apajuí ememattainum aents  
batsatun Jisus jiigbau**

*(Mt. 21.12-17; Mr. 11.15-19;  
Jn. 2.13-22)*

<sup>45</sup>Nuna tusa idayak, Jisus wayau jega Apajuí emematku ijuntainum, nunik nui sujak batsamatman jijjú. <sup>46</sup>Dutika chichajuinak:

—Apajuí chichame agagbaunum: ‘Mina jegajuk Apajuí aujku ijuntaiyai’ tawa nuniaig, atum kasá aidau batsamtai awasaugme, —tiu.

<sup>47</sup>Nunik Jisusak jega Apajuí ememattainum kashí kashinig jintinkagtau. Nunitai sacerdote apuji, chicham umiktinun jintinkagtin, nuigtú judío apuji aidaujai wajuk maawajik tusag chichaidau. <sup>48</sup>Tujash yupichu dutikmainchau dekapedau, kuashat aents aidaush ni chichagkagtamunak puyatjus antujuidau asagmatai.

**Sacerdote apuji aidau  
Jisusan iniasagbau**

*(Mt. 21.23-27; Mr. 11.27-33)*

**20** <sup>1</sup>Jisus jega Apajuí ememattainum wayaa, yamajam chichama nuna aents aidau jintintak pujujai, sacerdote apuji aidau, chicham umiktinun jintinkagtin, tikich judío apuji aidaujai utsanawajui.

<sup>2</sup>Nunikag Jisusan iniinak:

—¿Aminash ya jintinkagtuata tusash awetamae? ¿Yana chichamenia jusha juniamae? —tuidau.

<sup>3</sup>Tama Jisus ayaak:

—Wishakam iniastajime, aigkatajum: <sup>4</sup>¿Ya Juagnash yamijatjata tusash awemauwaita, Apajuik awemauwait, atsa aents aidauk awemauwait? —tau.

<sup>5</sup>Tama utujimkag ditak pempeentunikiag chichainak: “Juagnak Apajuí awemauwai, tajinish, ‘¿Tujash wagka dekaskeapi tichau ainagme?’ tujamtata jama. <sup>6</sup>Tuja aents awemauwai tajinchakam, ashí ju aents aina juka: Juagak Apajuí etsegtinai, tuidau asag kayai tukugmag mantamain ainawai”, tuidau. <sup>7</sup>Nunikag: “Dekatsji” timi tusag Jisusan jegaantag:

—Dekatsji, yatsu Juagnash yamijatjata tusash awemauwait, —tuidau. <sup>8</sup>Tiagtai Jisus ayaak:

—Ayú, wisha tichattajime yana chichamenia jutikaja nunak, —tiu.

**Takau pegkegchau aidau  
pachisa augmattsamu**

*(Mt. 21.33-46; Mr. 12.1-12)*

<sup>9</sup>Junashkam Jisus aents aidau jintintak augmatbau nagkama tau: “Makichik aents ajajin uvan ajakmakui, dutika wajumak aentsun: ‘Atum ju takastajum, dutikakjum minash sujustajum’, tusa susa ukuak weuwai dukap asan taamig tusa. <sup>10</sup>Nunik uva juut jegamtai, makichik inaken awemauwai, aents ajanum takaina nui jegamtai, uva neje susam jukí itagtuati tusa, dutikam jegattaman achikag suwi suwimainakua sutsuk wainak awagkijui.

<sup>11</sup>Dutikawagmatai tikich inaken awemauwai, dutikam jegattaman, nunashkam suwimawag pegkegchau chicha chichajuinakua sutsuk wainak awagkijui.

<sup>12</sup>Nuna dutikawagmatai ataktushkam kempatuma juna tikich inaken awemauwai, dutikamtaishkam ajanum takaina nu senchi suwimá, upu upujú jiikí ajapawajui.

<sup>13</sup>“Dutikawagmatai dekas ajagtina nunú chichaak: ‘¿Yamaish utugkatjaki? dekas

mina uchig anetaijua juna awetijai, dutika ai nuna wainkag ajantus diischajaintash' tiuwai. <sup>14</sup>Tujash ajanum takainak batsata nu uchi minittaman wainkag: 'Auwai ju aja juna jukitnuk, dekas maa ajapami, dutika juka iinu emami', tuidau. <sup>15</sup>Tusag achiká jukiag ajá ukumtikiag maawajui.

"¿Nunash ajagtina dusha itugmainaita? <sup>16</sup>Dekas ajagtina nu tajakug nunú ajanum takaina nunak kajeg utsaak, tikich aents aidaun susa idaimainai."

Nuna Jisus tutai antukag:

—iDuka tuke dutikamak achatnaitji!  
—tuidau.

<sup>17</sup>Tiagtai Jisus ditan diyaak:

—¿Tujash wajina pachisaya Apajuí chichame agagbauwa nuwish:

'Aents jegá jegamin aidau kayá ajapawajua nunú, kaya dekas jegá ichichkatin apututia iman wajasé', tawa nunash tawa?

<sup>18</sup>Aents nu kaya nui iyauk tsainkatnai, tuja kaya aentsnum iyaakug aentsnak tuke yuku ematnai, —tau.

<sup>19</sup>Nuna augmatas tutai antukag:

"Jutiinak tujamak tawai", tusag sacerdote apuji aidau, chicham umiktinun jintinkagtin aidaujai achikta tuidau. Nuninayatak aents aidaun ishamainak dutikainachu.

### **Apú kuichkiji pachisa**

#### **Jisus iniasbau**

(Mt. 22.15-22; Mr. 12.13-17)

<sup>20</sup>Nuninak aentsun awemajui, iish pegkeg aina duke takainaji tusajum yunumkajum, Jisus makichik iniibau iniastajum, wajintuk tujamit nunikmatai tsanumjuja achiká Romanmaya apunum sujukmi tusag. <sup>21</sup>Tiajam ditashkam Jisusan jegajiag:

—Jintinkagtinuh, jutiik dekainaji amek dekas tutupit dekaskea duke jintinkagtame, aentsú imanjinkish etegkeatsme, Apajuí jinti dekaskea duke jintiame. <sup>22</sup>Nuniau asamin

amina iniagme: ¿Roma apuji kuichkijish sumainkaih, atsa sumainchaukaih? —tuidau.

<sup>23</sup>Tama Jisus dita anentaibaujin shiig dekaju asa:

—¿Wagka minash tsanujatasagmesh wakejutagme? <sup>24</sup>Iwaintugkakjua makichik kuichik. ¿Yana niimé dakumkaya daajish agagbauwaita?

Tama dita aiinak:

—Anka Roma apuji dakumkamui tuidau. <sup>25</sup>Tiagtai Jisus ayaak:

—Roma apujinua duka nigki susatajum, Apajuinua dushakam Apajuik susatajum, —tiu.

<sup>26</sup>Nuna Jisus ashí aents antuinamunum timatai, tsanumjujag achikta tuinakush dutikmainchau diisaju, nuninak nu aaja aikam, ayatak puyatjukag diidau.

### **Jakau nantagtin pachisa iniimsamu**

(Mt. 22.23-33; Mr. 12.18-27)

<sup>27</sup>Juna tusa machik aig, wajumak saduceo aidau, jakauk nantagchagtin ainawai tinu asag, Jisusan iniinak:

<sup>28</sup>—Jintinkagtinuh, Moisés papí agag ukugtamkiuwa nui: 'Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai', tawai.

<sup>29</sup>Tuja nuniamunum, siete yachigbau aajakajui, nuanuiya nagkamchak iwai nuwedauwai, tujash uchinak akiitsuk jakauwai. <sup>30</sup>Nunikmatai tikich yachi jukishkam, uchinak akiitsuk jakauwai.

<sup>31</sup>Tuja kempatuma nu jukish, uchinak akiitsuk jakauwai, nuni nuninakua siete aajakajua duka, uchinak akiitsuk ashí jinawajui. <sup>32</sup>Nunikagmatai duwi pujus nuwashkam jakauwai. <sup>33</sup>Siete aajakajua duka ashí nunak nuwatjaju aina duwish ¿dekas yana nuweg atinaita atak nantainamunmash? —tuidau.

<sup>34</sup>Tusa tiagtai Jisus ayaak:

—Ju nugka juwig aishmag aidauk nuwenainawai, nuwa aidaushkam

aishinainawai, <sup>35</sup>tujash uwemkaju aidau jakau nantajag, tuke pujustin aina nuwig makichkish nuwenbauk atsutnai, <sup>36</sup>jatanash jakachagtinai. Ditak Apajuí aentsji nayaimpinum batsata nuninuk agtinai, ditak jakauwaitak nantakijau asag Apajuí uchijí agtinai. <sup>37</sup>Jakau aidau nantajagtinun pachis Moisés agajua nunú shiig dekamtijamui, Apajuí numi zarza tutai kegamunum chichaak: ‘Wika Abraham, Isaac, Jacob aina nuna Apajuijaitjai’, tiuwai. <sup>38</sup>Wagki iApajuik jakau aina nuna Apajuijinchui, nigka iwaaku aidaun Apajuijyai! Apajuí diismak jakau aidaush iwaaku batsatainawai.

<sup>39</sup>Aatus timatai chicham umiktinun jintinkagtin aidau:

—Jintinkagtinuh yajau tichaume,  
—tuidau.

<sup>40</sup>Nuna timatai ataktuk iniaschajui.

**Kristush yaá wegantukita tibau**  
(Mt. 22.41-46; Mr. 12.35-37)

<sup>41</sup>Nuniagtai Jisus ditan iniinak:  
—¿Wajuk asamtaiya Kristuk David wegantui tuinawa? <sup>42</sup>Davidchakam aikasag Salmosnum agak:

‘Apu mina Apujun chichajak,  
ekeemsata mina untsujuí;

<sup>43</sup>nunikamin wi amina shiwajum  
aidaunak,  
ame najamsa ekeemtaigmin  
ikaunmakmatai duwi ame  
diisminum’, tiuwai.

<sup>44</sup>David Apug tujakua nuniaish ¿wajuk asaya David wegantush amainaita? —tau.

**Jisus chicham umiktinun  
jintinkagtin aidau pegkegchauji  
pachisa tibau**  
(Mt. 23.1-36; Mr. 12.38-40;  
Lc. 11.37-54)

<sup>45</sup>Ashí antú ijunainai niina jintintaiji aidaun chichajak: <sup>46</sup>“Atumek

kuitamamkatajum, chicham umiktinun jintinkagtin aidau, nugkutai esagman nugkujag yujatan wakejin aina nunin aijum. Ditak aents kuashat ayamunum igkuntuinakush, eme anenjus kumpamjitnume tusa wakegainawai, nunisag jega ijuntainum utsanainakush, dekas apú ekeemtai shiig iwajamu aina imannum ekeemsatatus wakegainawai. Jistatin yuwamunmash, ekeemtai shiig iwajamunum ekeemsatatus wakegainawai. <sup>47</sup>Nuwa waje aidau jeenash atankiag, aents aidau pegkegnap takainawa tujuttinme tusag, Apajuin au aujuinakua ukú yujau aina nunin aigpajum. Nunú aidau imá senchi suwimkan jukiagtin ainawai.”

**Nuwa waje ujunauch Apajuinu  
anentag egkeamu**  
(Mr. 12.41-44)

**21** <sup>1</sup>Jega Apajuí ememattainum wiyakuch aidau, Apajuinu atin kuichik egketainum anentag kuichik egkeamun Jisus wainkau. <sup>2</sup>Nuniai makichik nuwa waje shiig ujunauch jimag kuichik cobre najanamun egkettamanash wainkauwai. <sup>3</sup>Nunik: —Dekas tajime: Jujú nuwa waje shiig ujunauchitak tikich egkeawaja nuna nagkaesau kuichkin egkeae. <sup>4</sup>Tikich aidauk kuichik ampunum egkeenawai, tujash jujú nuwa waje ujunauchia juka ni sumasa yumainjinak ashí egkeae, —tiuwai.

**Jega Apajuí ememattai tsayam  
atinai tusa Jisus etsegkamu**  
(Mt. 24.1-2; Mr. 13.1-2)

<sup>5</sup>Jisusak tusa chichá wajaig, wajumak aents aidau: Ju jega Apajuí ememattaya juka, kaya shiig pegkeg aidau ekenjá jegamkayap, Apajuinu atí tusag anentag ikaunmakbauwai imatika iwajamuita, tusag augmatuidau. Nuniagtai Jisus chichajak:

<sup>6</sup>—Atum ju imatiksa iwaja jegamkamu wainjum juka, makichik kayakesh ekenjamu aina nuwiyag juwakchatnai, ashí tsaikbau atinai, —tiuwai.

**Nugka nagkantsaig wantinkagtin aidaun pachis Jisus etseggamu**

(Mt. 24.3-28; Mr. 13.3-23;

Lc. 17.22-24)

<sup>7</sup>Juna Jisus tutai iniinak:

—Jintinkagtinuh, ĩnunash wajutik dutikawagtin ainawa? ĩNunú aidaun uminkatin tsawan jegattak wajataish, waji wantintinaita? nunú ujabatkata, —tuidau.

<sup>8</sup>Tama ni ayaak: “Kuitamamkatin atajum tsanugmajainum, kuashat aents aidaun mina daajun adaimasag; ‘Witjai Kristunuk, tsawantak jegawai’, wajagtinai, imatuinakuish dekaskeapi tusajum antugkaipajum. <sup>9</sup>Maaninawai tuinamu antitnaitjume, nuigtú maaniawagtatus pampanyamushkam, imaninakuish ishamkatin aigpajum, dekatkauk jujú aidauwá nagkaemagtinai, tujash nagkanmauk waamak achatnai.”

<sup>10</sup>Tusa nuigtushkam: “Nugka yaignum batsamin aidaun tikich nuninum batsatujai maaniagtinai, tuja nuninai nugka muunnum batsamin aidaushkam, mai imannumiajaig maaniagtinai.

<sup>11</sup>Senchi ugbaush ashí nugkanum atinai, yapagdash tepeatnai, nuigtú jata aentsun nagkaematug ijinbaush atinai. Nayaimpinmayashkam shiig ishamain wantinajtnai.

<sup>12</sup>“Tujash ju ashí wi tajim nu eke jegatsaig, atumnak achigmakag waitkagmasagtinai. Dutijamainak jega ijuntai aidaunum awaintamawag, nui jujamkiag aents achiká chimpitainum egkepawag, nui jujamkiag tikich apu aidaunum ejetamawag, nui

inagkeapakiag apu dekas nugkanum inamin aidaunmash ejetamawagtinai, mina nemagtuidau asagmin, mina pachitus titinme tusag. <sup>13</sup>Tujash nuna dutijamainakuish, mina pachittsajum tikich ujamainuk yupichu ajutjamiagtinai. <sup>14</sup>Nuniakjumes: ‘Wajintu chichaknuk ayamjumkatja’, tusagmek anentaimigpajum. <sup>15</sup>Wi atum chichaktinnak dekantikatnaitjime, dutikamu asagmin atum chichataik, makichkish aigmamainchau dekapagiagtinai. <sup>16</sup>Tujash atumi apa, yatsum, pataim, kumpajum aina duke sujupakagtinai, dutijamawagmatai dita maamuk maam agtinai. <sup>17</sup>Atum mina nemagtin aidautigminak ashí aents aidaun kajegtabiagtinai.

<sup>18</sup>Imatijamainakush minaig datumtamain ainatsui. <sup>19</sup>iWajiu wajastajum! Atum mina nemagtukbautak pujautigmek, pujut nagkanchau jukiagtin ainagme.

<sup>20</sup>“Suntag aidaun Jerusalegkan tentea au wainkugmek, yaaktanak wamkeap tsaikagtatua titin atajum. <sup>21</sup>Nuna nuninakuig, atum Judea batsatutigmek mujanum pisagtajum. Jerusalén batsatutigmesh yaaktak jiiinjajum ukuktajum. Tuja aents ajajin takaak batsatushkam, Jerusalén wakitkig waimainchau ainawai. <sup>22</sup>Duka Apajuí Israelan suwimkan susatnai tusa agagbauwa nunú uminak imanitnai.

<sup>23</sup>Tujash nunú tsawantin nuwa ejamtin, nuigtú uchi amuntsuaku agtina nunak wait anentuinajai. Wagki Israel nugka juwig shiig senchi waitiamu atinai. Apajuí suwimkan suwau asamtai.

<sup>24</sup>Maaniamunum maamush agtinai, dutikainak tikich aidaunak achijag, tikich nugkanum judiuchu aidaun batsatbaunum kuashat yajuakagtinai. Dutikawag Jerusalén juwajunak, judiuchu aina nu inainak waitkagtin

ainawai. Duti dutikainakua Apajuí tibauwa nu jegatai idaisagtinai.

**Apajuí Uchijí Aentsmaga  
Akiinawuwa nu minitnuji tibau**  
(Mt. 24.29-44; Mr. 13.24-37)

<sup>25</sup>“Nuniamunum etsa, nantu, yaya aidaushkam yaunchkesh nunishtaiji nuninamu wainnatnai. Ashí nugkanmaya aents aidauk senchi ishamiagtinai, nayants shiig senchi tsukatak uutbauji antuinak: Wajukawajik, wajagtinai. <sup>26</sup>Imatainak jaka iyauke agtinai, nugkanum nagkaemaktinun anentaimtusag ishainak, nayaimpinmaya machikish umuchmainchau aidaushkam buchitaidau asagmatai. <sup>27</sup>Nunú imaniamunum wi Apajuí Uchijiyaitkun Aentsmagan Akiinawaitag nuna, yujagminum pachitkau tsawan wajasan mina senchigjai minamun waitkagtinai. <sup>28</sup>Nunú nagkamna imaninakuig atumek shiig aneastajum: Waamkeap waitiag nuna Apajuí agkanmitkagmataji, tusajum.”

**Numi higuera pachis Jisus  
augmattsamu**  
(Mt. 24.32-35; Mr. 13.28-31)

<sup>29</sup>Junashkam Jisus augmataka tau: “Diistajum numi higuera, nuniachkugmesh tikich numi esat dekatai aina dukesh. <sup>30</sup>Atumek nuna duke betenkainakuig: Waamkeap esat nagkamnattawa, tusajum dekau ainagme. <sup>31</sup>Nunisjumek atumshakam ashí wi taja nunú imanisag uminag wegau wainkugmek: Apajuí ju nugka juwi inamjatnuk namput wajatsuapi, titin atajum.

<sup>32</sup>“Dekas tajime: Wi Jerusalegan pachisan ashí tijim duka, yamai aents batsata jusha ashí jinuinatsaig uminkatnai. <sup>33</sup>Nayaimpik nugkajaig

megkaejatnai, tujash mina chichamjuk umintsukek juwakchatnai.

**Umintsajum dakamsatajum tibau**

<sup>34</sup>“Shiig kuitamamkajum umintsajum dakamsatajum, Apajuíyai anentaimtan datumtamain, nampet, ju nugka juwiya imá senchi anentaimtut aina nu tupanajum batsatkujum, wi pachiachmau minakui ishamjukajum. <sup>35</sup>Ashi aents aidauk chinamunum kuntin dekeemama numamtuk wajakagtinai. <sup>36</sup>Atumek shiig umintsajum ashí tsawantai Apajuik ajuj pujutajum, nunú ishainak nagkaemagtina nuanuish waitkats, wi Apajuí Uchijiyaitkun Aentsmagan Akiinawaitag nuna aents aidauk suwimkan susatasan minakuish, ajankas igkunkamnujum.”

<sup>37</sup>Jisusak tsawai jega Apajuí ememattainum jintinkagtua, kiitaik Olivosa mujajin weejakuí. <sup>38</sup>Nuniau asamtai kashikmasag jega Apajuí ememattainum aents aidauk kauntsagké aidau, jintinkagtamuji antukagtatus.

**Jisus maami tusa chicham  
umigkamu**

(Mt. 26.1-5; Mr. 14.1-2; Jn. 45-57)

**22** <sup>1</sup>Jista pag levadurajai pachimtsuk inajua yutai Pascua tutai jegattak wajai, <sup>2</sup>sacerdote apuji aidau, chicham umiktinun jintinkagtin aidaujai, aentsun ishamaidau asag, Jisus wajuk maawajik tusag chichaidau.

<sup>3</sup>Nuniamunum Jisusa jintintaiji doce aina nuwiya Judas, Iscariote tuuta awagmatia nuna iwanch egkemtuau, <sup>4</sup>dutikam sacerdote apuji aidaujai, nuigtú jega Apajuí ememattain kuitamin aidaujai: Wajuk Jisus achiká sujumainaita, nuna pachisag chichasaju. <sup>5</sup>Nuna chichas umikag shiig aneenak: Kuichik akikmí, tusag ame dutikata akiktajame, tiajuí. <sup>6</sup>Tama Judaschakam



ayú tusa wajuk Jisusan aents  
atsamunum sujukajak tusa egau.

**Pascuatin yuwatin umikbau**

(Mt. 26.17-19; Mr. 14.12-16)

<sup>7</sup>Pascuatin, pag levaduragtuchu yuaku  
uwig aishmag tsakat maa yutai jegau  
asamtai; <sup>8</sup>Jisus, Pedron Juagjai awemak:  
—Wetajum, nunikjum Pascuatin  
yuwatin umiktajum, —tiuwai.

<sup>9</sup>Tuinam dita aainak:  
—éTuwí umiktí tusamea wakegame?  
—tuidau.

<sup>10</sup>Tiagtai Jisus ayaak:  
—Yaakat wayamunum makichik  
aishmag yumí aimak waketu  
wainkattagme, nunú pataetuktajum,  
<sup>11</sup>nunikjum jeentin jeen wayaakui:  
‘Jintinkagtin chichagtamak: Agkantash  
awash wi mina jintintaig aidajai  
Pascuatin yumainush, tujamae’ titajum,  
<sup>12</sup>tajumin ni inaktugmastatui yakí  
tesamu muun shiig umikbaun, nuanuí  
umiktajum, —tiu.

<sup>13</sup>Tusa tiajam wegag Jisus tibaanak  
imatiksag wainkaju. Nunikag nui  
Pascuatin yuwatnunak umikajui.

**Jisus inagnaku Pascuatin yuwamu**

(Mt. 26.20-25; Mr. 14.17-21)

<sup>14</sup>Yujumak yuta jegamtai, Jisus mina  
chichameg etsegtugkatajum tusa  
etejamu aina nujai mesanum jegantag  
pekaamsajui. <sup>15</sup>Nunik chichaak:

—Senchi wakemajai, eke  
mantuinatsaig ju Pascuan atumjai  
ijunjan yuwatasan. <sup>16</sup>Dekas tajime:  
Atumjaig ataktuk jutikanuk Pascuanak  
yuwashtainaitjai; atak Apajuí inabauji  
jegatna duwi yuwatin asan, —tiuwai.

<sup>17</sup>Nuna tusa idayak umutai copanum  
ekeematman juki, Apajuin see tusa  
jintintaijin suwak:

—Ju copa juwiya ashí atum  
aidautijum uwagtajum, <sup>18</sup>dekas tajime:

Ataktuk jutikanuk uva yumijinak  
uwagchatnaitjai, atak Apajuí inabauji  
jegatna duwi uwagtin asan, tiuwai.

**Jisus, mina anentaimjutsajum**

**yuwakjumek juní  
dutikatajum tibau**

(Mt. 26.26-29; Mr. 14.22-25;  
I Cor. 11.23-26)

<sup>19</sup>Tusa idayak pagkan juki Apajuin see  
ti puuká, jintintaiji aidan susa  
chichajak:

—Jujú pagka juka mina iyashig  
atumní mantamnatta nuna iwainawai,  
juka tuke jutiksagmeké atin atajum  
mina anentaimjutkujum.

<sup>20</sup>Tusa ashí yuwawagmatai umutai  
copanum ekeematman juki, nunashkam  
aikasag Apajin see ti:

—Ju vino copanum awa juka, mina  
Apag yamagman mina numpajuí atum  
uwemkatnun anagtamawajua nunú  
uminkatnun iwainawai. <sup>21</sup>Mina  
sujutkatta duka ju mesa juwig wijai  
eketui. <sup>22</sup>Tuja wi Apajuí Uchijiyaitkun  
Aentsmaga Akiinawaitag nuna,  
nuniktinai tusa agajajua nuna  
umiktasan wejajai, tujash imina  
sujutkatta nuna imá senchi wait  
anentajai! —tau.

<sup>23</sup>Jisus tutai ni jintintaiji aidau  
pempentunikiag iniinidau, yaki  
dutikati tusag.

**Yaki dekas eme anentaish  
atinaita tiagbau**

(Mt. 19.28; 20.25-28; 23.11;  
Mr. 9.34-35; 10.42-45; Lc. 9.46;  
Jn. 13.12-15)

<sup>24</sup>Nuna tusag idayinak: Jutii ainag  
juwiwash yaki atakesh imá wagakush  
atinaita, tusag ditak pempentunikiag  
pampandayidau. <sup>25</sup>Tudayagtai Jisus  
chichajak: “Apu judiuchu aidauk aentsnak  
ditanua nunin emak inainawai, nuna

dutikaidauk shiig takaawai tama au ainawai, <sup>26</sup>tujash atumek nuninuk amaitsugme. Atum ainajum anuiya eme anentai atag takug, uchi eme anentsá diishtaya nunin anenmamain ainawai. Inamna dushakam aantsag tikichin takagna nunin amainai. <sup>27</sup>¿Atumesh wajuk anentaimjume, mesanum eketa dukaih eme anentsá diitaish, atsa ajaama dukaih? Mesanum eketa nunuwai. Tujash wika yujumkan ajamauwa numamtin wajasan, wi atumin ajampeajime.

<sup>28</sup>“Atumek wi shiig utugchatnum wekaekuish wijaig ijuntsajum yujasú asagmin, <sup>29</sup>wi atumnak apu emaktinaitjime, mina Apag mina apu etiuwa dutiksanuk, <sup>30</sup>dutikamu asajum wi inantinaitag nuanuí atumesh mina mesajuí wijai yuwatnaitjume, nuniakjum Israelan uchijí doce aajakajua nuanuiya wegantu aidau inakjum, ekeemtai aidaunum ekeemsnaitjume.”

**Jisus Pedron ugtuktatme tusa ujakbau**

(Mt. 26.30-35; Mr. 14.26-31; Jn. 13.36-38)

<sup>31</sup>Jisus junashkam Pedron tiuwai:

—Simón, iwanch Apajuin segae, trigo pegatiama numamtuk atumin pegkegchaunum dekapjamsatatus; <sup>32</sup>tujash wishakam aminak segatmagme, minai kajintsá anentaibaujum mijakaim tusan, ame mina waintsamjai tujutmesh, ataktú minai anentaimjam tikich aidaush anentai ichichtugminum tau asan. <sup>33</sup>Tama ni ayaak:

—Apuh, wika amina achigmagak egkepainakuish, nuniachkush mantamainakuish amijai jakatasan umintsan wekaejai, —tau.

<sup>34</sup>Tutai Jisus ayaak:

—Pedro, yamai kashia juwik atash eke shinatsaig, Jisusnak waintsamjai tusam kampatumá ugtuktatme, —tiu.

**Waitiakuish kuitamamain tibau**

<sup>35</sup>Tusa idayak:

—Wi atumin chichagkagtuktajum tusan ishimkun, wájí egkea jutaigmekesh, kuichik, sapat aidaukesh jukigpajum tusan ishiakuitjim duwish, ¿wájí atsumjauwaitjume?

Tama dita aiinak:

—Apuh atsumjachamiaji, —tuidau.

<sup>36</sup>Tiagtai Jisus ayaak:

—Tujash yamaik wájí egkea jutaigmeshkam jukitajum, espadajum atsugtamkuig, awantak pataká nugkutajum sujakum makichik sumaktajum. <sup>37</sup>Yamaik, duwik Apajuin etsegtin aidau mina pachitus againak: ‘Aents pegkegchaujai betek maam atinai’, tibauwa nu minai uminkattawai, —tau.

<sup>38</sup>Tutai dita aiinak:

—Apuh, juwi jimag espada ajutjamui, —tiajuí.

Tiagtai Jisuschakam:

—Maake idaisatajum, —tiuwai.

**Jisus Getsemaní pujusá Apajuí ausamu**

(Mt. 26.36-46; Mr. 14.32-42)

<sup>39</sup>Tusa jinki weuwai Olivosan mujajin nui tuke weu asa, nunitai jintintaiji aidaushkam ashinkajui. <sup>40</sup>Nuanuí wakag ni jintintaiji aidaun chichajak:

—Juwi pujusjum Apajuí aujú pujutajum, iwanch pegkegchau takastinme tusa dekapjamsainum.

<sup>41</sup>Tusa ukuak nigka kanakí machik kuwaesag tikishmag pujus Apajuin aujak: <sup>42</sup>“Apawah, amesh wakegakmek wi waitmainaitag nu agkanmitkajuata; tujash wi wakegamuk achati, ame wakegamu atí”, tiuwai.

<sup>43</sup>Tusa aujai Apajuí aentsji nayaimpinmaya wantintuku Jisusan anentain ichichtugtatus. <sup>44</sup>Jisus ni

waittsatnujin shiig senchi anentaimtus, Apajuin senchi aujak numpan sekijai segaju, nunik nugká kitaidau.

<sup>45</sup>Jisus Apajuí augbaun inagnak jintintaiji batsakbaun jegantun diikmá, wake besemag dekapenak ane anentaimainakua kajig batsatun wainak:

<sup>46</sup>—¿Wagka kajiish batsatjume? Nantakjum Apajuí ausatajum, iwanch pegkegchaun takastinme tusa dekapjamsainum, —tiuwai.

**Jisus achiká jukimu**

(Mt. 26.47-56; Mr. 14.43-52;

Jn. 18.2-11)

<sup>47</sup>Tusa Jisus eke chichaak wajai, ni jintintaiji doce aina nuwiya Judas daagtin kuashat aentsun saasá ni emjuk tajuntau, Jisusan kugkuastatus.

<sup>48</sup>Dutikam Jisus ayaak: —Judasah, Apajuin Uchijí Aentsmaga Akiinauk kugkuasmeap sujame, —tiuwai.

<sup>49</sup>Jisusan achikagtatus nudiagtai, niina jintintaiji aidau:

—¿Apuh, maaniattajik? —tuidau.

<sup>50</sup>Tusa tuinai, tikich nui ijuna nuwiya espadajin ukuini juwakug, dekas sumo sacerdote apuji inaken kuwishí untsujinian asankau. <sup>51</sup>Dutiktai Jisus:

—Maake, aikatsuk idaisatajum.

Tusa kuwishí asankamun juki ataktú anujtuk pegkeg awajtusui. <sup>52</sup>Nuna dutika sacerdote apuji, jega Apajuí ememattain kuitamin aidaujai niina achiktatus kauntau aidau chichajak:

—¿Atumek kasa achiktasa utugmaina imatijuagmeap, espadak tinamdaekajum, numi aidauk takuinasuajum

minitjuinagme? <sup>53</sup>Wi kashí kashinig jega Apajuí ememattainum atumjai ijunnuweg duwikish jutikagmek achigchau agmaugme. Tujash yamaik atum mina jutijuatnun iwanch atumin inapakui jutijagme, —tiuwai.

**Pedro Jisusnak wainchaujai tusa ukbau**

(Mt. 26.57-58; Mr. 14.53-54;

Jn. 18.12-18, 25-27)

<sup>54</sup>Tuja Pedroshkam ikaag pataetus wega wegakua sumo sacerdote jeen jegantú, <sup>55</sup>nunik jegaa jí ikapajag anamainak batsatbaunum, niishkam nui ditajai anamak ekeemsau. <sup>56</sup>Nunittaman makichik nuwa, apú inake tanta diikmá wainak dii wajatu, nunik:

—Jushakam Jisusjai wekaemajama, —tau.

<sup>57</sup>Tama Pedro chichaak:

—Nuwah, wika wainchaujai aunak, —tau.

<sup>58</sup>Nuna tusa machik eketaig,

tikitchakam aikasag:

—Amesh Jisusa jintintaijitamjama, —tau.

Tama Pedro ayaak:

—Atsa, wichauwaitjai, —tau.

<sup>59</sup>Tutai idaisajam makichik hora tumain ekeematman tikitchakam aikasag:

—Dekaskenum jushakam Jisusa jintintaiya jama, Galileanmaya asa, —tuidau.

<sup>60</sup>Imatjuinam Pedroshkam:

—Wika atum tajum nunak dekatsjai.

Tusa chichaak wajai, atash shinukuí.

<sup>61</sup>Nunitai Jisuschakam ayampá Pedron diisú, dutikam Pedroshkam Jisus chichajak: “Atash eke shinatsaig kampakumá ugtuktinaitme”, tibaun adeaju. <sup>62</sup>Nunik Pedro agaa jiinki senchi wake besemag dekapeg kajegmamak butiuwai.

**Apu aidau Jisus maatajum tusa inamjamu**

(Mt. 26.59-68; Mr. 14.5-65;

Jn. 18.19-24)

<sup>63</sup>Jisus diyaku atajum tibau aidau dushikinak awatuidau. <sup>64</sup>Dutikainak jiin epetkag chichajuinak:

—¿Dekakia ya awatamni? —tuidau.

<sup>65</sup>Tusag kuashat pegkegchaun chichajuinak waitkaidau.

<sup>66</sup>Imá imatikainakua tsawajag, judío apuji aidau, sacerdote apuji aidau, chicham umiktinun jintinkagtin aidaujai ijunjag Jisusan jukiag, chichaman inagnau batsatbaunum ejegawagmatai, iniinak:

<sup>67</sup>—¿Ame dekas Kristukaitam? tukagtita, —tuidau.

Tama Jisus ayaak:

—Wi Kristuitjai takuish, dekaskeapi tujutchattagme, <sup>68</sup>wi atumin iniamash aigmatsugme, nuigtush akupjumaisugme. <sup>69</sup>Tujash yamaya juwi nagkamsanuk wi Apajú Uchijiyaitkun Aentsmagan Akiinauwaitag nunak, Apajú ashí senchigtina nuna untsujin ekeemsattajai, —tiuwai.

<sup>70</sup>Tutai pampanjag iniinak:

—¿Untsu amekaitam Apajú Uchijim? Tuinam Jisus ayaak:  
—Dekaske atum tujutjum nuuwaitjai, —tiuwai.

<sup>71</sup>Nuna timatai:

—¿Nuigtush ya etsegtukti tusaya dakainaji? ii dekas ni chichaamu antugkagjama, —tuidau.

#### Jisus Pilatuwai ejegamu

(Mt. 27.1-2, 11-14; Mr. 15.1-5;

Jn. 18.28-38)

**23** <sup>1</sup>Chicham inagnatainum aents ijunag batsatuk ashí wajajag, Jisusan jukiag Romanmaya apu Pilato pujamunum ejegawaju. <sup>2</sup>Dutikawag Jisusa tsanumjuinak:

—Jujú aents jutii nugken chichaman tsuwapak wekagas, witjai Kristunuk, Roma apujish kuichkik sumaitsui, tu wekagu asamtai juwi itaaji, —tuidau.

<sup>3</sup>Tiagtai Pilato iniak:

—¿Amekaitam judío aidau apujim? Tama Jisus ayaak:

—Ame tujutam duka dekaske, —tau.

<sup>4</sup>Timatai sacerdote apuji, nuigtú tikich aents tuwakú aina nuna Pilato chichajak:

—Wika jujú aentsnak makichkish pegkegchau dutikamunum bakumamainnak dekaagsujai, —tau.

<sup>5</sup>Tutai nuní nagkaemasag:

—Tujash aanú aents aidau jintintak dapamkagtú wekaenuwe. Nuniak Galilea nagkamas jintí jintinkagtakua juwish Judeanmash dutiksag dapamkagtú wekaewai, —awajuidau.

#### Jisus apu Herodesai ejegamu

<sup>6</sup>Jisus Galilea nagkama jintinkagtinuwe tabaun Pilato antuk:

—¿Dekas jujú Galileanmayachukaih? —tusa iniimu.

<sup>7</sup>Tutai:

—Awiyayai, —tuidau, Apu Herodesa inamtaijinia asamtai. Nuna tiagtai dekaa, Pilato Jisusan Herodesai awemauwai, niishkam nu tsawantin Jerusalén taa pujau asamtai. <sup>8</sup>Dutika ejetim Herodes Jisusan wainak shiig aneasu, kuashat tsawantai: Itugsanuk wisha aents dutikmainchau ni iwainag takaamunash wainkag, tusa wakedá pujú asa, <sup>9</sup>kuashat iniasu tujash nigka aikchauwai. <sup>10</sup>Nunitai nui sacerdote apuji, chicham umiktinun jintinkagtin aidaujai ijunaidau, wainak senchi tsanumjuidau. <sup>11</sup>Imatiagtai Herodeschakam ni suntaji aidaujai, Jisusan aentschau chichajus dushikinak, jaanch pegkeg apu nugkutai aina ibaan anugkug, ataktú Pilato pujamunum awebau. <sup>12</sup>Nuna dutikainak Herodesak Pilatojaig kumpamdayawajui shiwag pujuwaitak.

<sup>13</sup>Ataktú itawagmatai, Pilato sacerdote apuji aidau, tikich apu aidau, ashí aents aidaujai ijumjau.

<sup>14</sup>Dutika chichajak:

—Atum jujú aentsun dapampawai tusajum itagtuawagmin atumesh antagmin, atum pegkegchau tajum nuna iniasan dekaajuatakamanush

dekajuachmajai. <sup>15</sup>Nunisag Herodeschakam dekajuachu asa awagkintai juwi itawaje. Nuniau asantai, wika ni mantamnati tusanuk tumaitsujai; <sup>16</sup>ayatak asutiatajum tusan akupkatjai, —tiu.

<sup>17</sup>Nunak ashí mijantin jista Pascua inagkeamunum, aents achikam egketaina nuwiya makichik jiikí idaitai asantai tiuwai.

<sup>18</sup>Tutai aents nui tuwak ijunuk ashí pampanjag:

—iWaagkamek ancha akupkatame!  
iDekas Barrabás akupkata! —awajuidau.

<sup>19</sup>Duka Jerusalegnum Romanmaya apu dakituinaku pampandayamunum aentsú maú asantai achikam egketu.

<sup>20</sup>Tiagtaishkam Pilatok Jisusan akupkata tau asa, ataktú awentsag ditan chichajak:

—Dekas Jisusan akupkatjai, —tau.

<sup>21</sup>Pilato tutai nuní nagkaemasag senchi untsumkag:

—iAchigtá! iAchigtá! —awajuidau.

<sup>22</sup>Imatjiagtai kampakatma juwishkam Pilato chichajak:

—¿Tujash wájí pegkegchauna takasé jusha? wika ni pegkegchau takasbaunum bakumaku mantamnamainjinak degagchau asan, ayatak asutiawagmatai jiiktajai, —tau.

<sup>23</sup>Tutaishkam nuní senchi untsumkag, achinjati wajainak Pilatunak wagagkiaju.

<sup>24</sup>Imatiagtai Pilatushkam:

—Dita tuina dutiksag uminkati, —tiuwai.

<sup>25</sup>Dutikak Barrabás, Jerusalegnum Romanmaya apu dakituinaku pampandayamunum aentsú maú asantai achikam egkemtatman, numú jinkiti tuidau asagmatai nuna jiyaak, Jisusnak dita tuina dutiksag umiktinme tusa sujuk idaisauwai.

### Jisus achigbau

(Mt. 27.32-44; Mr. 15.21-32;

Jn. 19.17-27)

<sup>26</sup>Tima Jisusan achigtatus juki emasag, yaakat Cirenemaya Simón

daagtin ajajinia minittaman, Jisus achigtin numi yapajia achiamun ayankaju. Dutikam Jisus eemak wetai, ukuunum yanas wegau.

<sup>27</sup>Jisusan kuashat aents nemajus ashinainamunum, nuwa aidaushkam imanisag ukunum saegas, untsu untsumas buu buutuinakua ashinaidau. <sup>28</sup>Imatiagtai Jisus nuwa aidaun ayampatua:

—Jerusalegnumia nuwa aidaush, minak eganjaigpajum, atumek egaamakjum uchijum anentaimtusjumes buuttajum.

<sup>29</sup>Tsawan jegagtamiagtinai, nunikmatai: ‘Uchigtin aidautigmek uchigtuchu wajasjum, tikich nuwa kaga uchigtuchu muntsujinash amuntsuachu aidauk, yajau aneas batsatainatsupita’, wajatin ainagme. <sup>30</sup>Imanik senchi waituinak mujá pagkajagi: ‘iMujah, yumpunkum ijijatuakia!’ awajiagtinai. <sup>31</sup>Wi tudau takaschau aig, imatijuawag waitkajuinaish, ¿Apajuish wagkag tudau aidaunash waitkaschati? —tiuwai.

<sup>32</sup>Jisusan jukiag, nuigtú jimag aents magkagtin aidaunashkam achijagtatus jukiag emaidau. <sup>33</sup>Dutikawag nain “buuk sakajua” nuninai tutainum ejegawag, Jisusan achijag, magkagtin aidaunashkam achijajui, dutikawag makichik untsugnumanini awajuinak tikichnak menajinini awajawajui. <sup>34</sup>Dutikam Jisus chichaak: “Apawah, tsagkujata dekainachu asag, minak jutjuinawai”, tau.

Nuniai suntag aidauk, yana kayajig jinkit nunú Jisusa jaanchjinak jukiti tusag wasugkamaidau. <sup>35</sup>Nuniamunum aents aidauk Jisusan dii ijuntuinai, apu aidau dushikinak:

—Tikichnak yajau uwemtikchauwe, yamai niishkam dekas Kristu, Apajuí etegjamuitkug nigki akaiki uwemjati, —tuidau.

<sup>36</sup>Suntag aidaushkam dutiksag dushikinak vino chujuinun jukiag aagtatus jegantag, <sup>37</sup>chichajuinak:

—Ame dekas judío apujiyaitkumek, akaikim uwemjakia, —awajuidau.

<sup>38</sup>Tuja ni chaikenchakam griego, latín, hebreo chicham aidauwai: “Juuwai judío aidau apujig”, tusa agatug adujtukajui.

**Magkagtin aidau chichakbau**  
(Mt. 27.45-56; Jn. 19.28-30)

<sup>39</sup>Jimag magkagtin achijam deta nuwiya makichik Jisusan pegkegchau chichajak:

—Ame dekas Kristuitkumek, aaní nematsuk amea akaikim, jutiishkam uwemtikagtujia, —tau.

<sup>40</sup>Tutai nui tikich detau kumpajin aiká: —¿Ame machikish Apajuik ishamsmek, nijai betek achinjam nemasmesh? <sup>41</sup>Jutiik pegkegchau takasbaunum dekaskenun waitiaji; tujash juka pegkegchau takasbaujig shiig atsujuu, —tau.

<sup>42</sup>Tusa Jisusan ayampattsag: —Jisusah, minash ame apu wajasam inamjattam nuniakmesh kajimatjukipa, —tiuwai.

<sup>43</sup>Tutai Jisus ayaak: —Dekas tajame, yamaya juwik amek wijai nayaimpinum pujuttame, —tiuwai.

**Jisus jakamu**  
(Mt. 27.45-56; Mr. 15.33-41;  
Jn. 19.28-30)

<sup>44</sup>Etsa tutupit wajasú ai nagkamas ashí nugkanum suwe wajas, etsa dukap tegau aishkam imanisag asauwai. <sup>45</sup>Nunik suwe wajas ai, jega Apajuí ememattainum jaanch ejaamu auk yakiin nagkamnas ichiinak jimaituk kanakú. <sup>46</sup>Nuniai Jisus senchi untsamak chichaak:

—Apawah, amina uwegmin mina wakanjunak idaijai, —tusa jakauwai.

<sup>47</sup>Nunik jakamtai, nuigtú kuashat nagkaemajun capitán wainak, Apajuin emematak:

—Dekas ju aentsua juka shiig pegkejai, —tau.

<sup>48</sup>Aents nui ijunas dii ijuntuidaushkam Jisus nunik jakamtai wainkag, wake besemag dekapenak waketuinak, detsepenak awatkiag weedau. <sup>49</sup>Nuninai ashí Jisusa waitaiji aidauk, nuwa Galilea nagkamas, Jisusa saetusag yujajakú aidaushkam, ikaag ijunas Jisusan dii ijuntuidau.

**Jisus ukusbau**  
(Mt. 27.57-61; Mr. 15.42-47; Jn. 19.38-42)

<sup>50</sup>Judeanum yaakat Arimatea tutai awa nuwiya José daagtin, niishkam apu chichaman inagdau aina nuwiya pegkeg aidau nak takaak pujau. <sup>51</sup>Nigka Apajuí minash inatjati tusa wakeyin asa, tikich aidau Jisusak mantamnati tiagtaish dakitjauwai. <sup>52</sup>Nuniku asa Pilatun jegají, Jisusa iyashin segauwai. <sup>53</sup>Dutika, numi yapajiamunum Jisus nemattaman akakí sávana pujuú pempeag, kaya waa muun tai umikbau, makichik aentskesh ukuschamunum egkeauwai. <sup>54</sup>Nunú tsawantak, tsawan ayamtai atin asamtai, ashí umintai aajakú.

<sup>55</sup>Nuwa Galilea nagkamas Jisusa nemajus yujasaju aidaushkam, José wetai pataetukaju, nunik wainkaju Jisusan wajuk ukusaje nuna, <sup>56</sup>nunik waketug jegá kaunkag, Jisusa iyashí ukatkatnun shiig pegkeg kugkuin aidau, nuigtú yakagtinnash najanawaju, dutikawag tsawan ayamtai tsawaju asamtai, ayamjaju chicham umiktinnun tawa nunisag.

**Jisus nantakbau**  
(Mt. 28.1-10; Mr. 16.1-8; Jn. 20.1-10)

**24** <sup>1</sup>Tumig tsawagmatai shiig kashikmasag nuwa aidau kugkuin najanamujin jukiag, Jisus ukusbaunum wegaju. <sup>2</sup>Nunik jegakmag wainkaju kaya

muuntai epenbauk ekemak atatman. <sup>3</sup>Dutika wainkag utuawaju, tujash Jisusa iyashinak wainkachajui. <sup>4</sup>Nunikag puyatkg ijunai, jimag aents winchamtinun nugkuaju diti ayaumas wajaantaju. <sup>5</sup>Nuna wainkag senchi ishainak, nugká tsuntsumawag ijuntsamtai chichajak:

—¿Wagka iwaaku pujaush jakau ukutainmash egagme? <sup>6</sup>Juwig atsawai nigka nantakne. Adeagtajum ni Galilea pujus <sup>7</sup>chichaak: ‘Wi Apajuí Uchijiyaitkun Aentsmagan Akiinawaitag junak, achijuk aents tudaugtin aidanum sujutkgmatai mantuawagmataish, kmpatumchik tsawantai nantaktinaitjai’, —tiuwa nunú.

<sup>8</sup>Tama ditashkam yaunchuk, Jisus nuniktinaitjai tibauwa nuna adeajaju. <sup>9</sup>Nunik ukusmaunmaya waketug jegawag, ashí dita wainkamujinak Jisusa jintintaiji once juwakajua nuna ujakaju, aikasag ashí tikich aidanashkam. <sup>10</sup>Duka ju aajakajui: María Magdalanmaya, Juana, tikich María Jacobo dukujija numú, nuigtú tikich nuwa aidajui, Jisusa jintintaiji aidanak ujakajui. <sup>11</sup>Nuwa tusa etsejiagtaish, wainak tu yujatsush tusag, ditak dekaskeapi tichajui.

<sup>12</sup>Nuniagtai Pedrok jinkug tupi tupikakua Jisus ukusbaunum jegantá, tekená diikmá imá sabananak wainkau, nunik wajukamki tusa ane anentaimkawa jegá wakítkiu.

#### **Emaús wetatman wantintukbau**

(Mr. 16.12-13)

<sup>13</sup>Nunú tsawantinig Jisusa jintintaiji jimag, yaakat yaijuch Emaús tutai, Jerusalén juwaki once kilómetro abaanum jegatatus wegaju. <sup>14</sup>Nunik weenak ashí Jisus dutikamun pachisag augmatuidau.

<sup>15</sup>Nuna tuinak ditak tudayinai, Jisuschakam amainag ditajai ijunag ashinu. <sup>16</sup>Tujash ditak, Jisusapita tuinachu asag pachiakats ashinaidau. <sup>17</sup>Nuniagtai:

—¿Jintá wesagmesh, waji augmatkugmea wake besemjash ashinjume? —tau.

<sup>18</sup>Tutai Cleofas daagtin ayaak:

—¿Amesh Jerusalegnumiayaitkumek, waji nagkaemaki dusha dekatsum? —tau.

<sup>19</sup>Tama Jisus ayaak:

—¿Wajuk awa? —tau.

Tutai:

—Jisus Nazaretnumia Apajuí etsegtin, chichamesh senchigtin, Apajuí senchijin wainchatai aidanash iwainag, ashí aents aidash wainainamunum takauwe, nuna <sup>20</sup>sacerdote apuji aidau, tikich juditi apuji aidajui mantamnati tusag, Romanmaya aidanum sujua idaisagmae, dutikamtai numinum achijag maawagmae. <sup>21</sup>Tujash jutiik: Niimpap Apu wajas, Israel aents aidautinak ashí iina shiwaji aidanumash agkanmitkgmattaji, tusa dakauji. Nuna dutikawaja duka kmpatum tsawan nagkaemawai. <sup>22</sup>Nuniamunum nuwa jutiijai yujau aidau kashikmas Jisus ukusbaunum wegaju, anantai jegagmainchaun <sup>23</sup>Jisusa iyashin waitkachag, nayaimpinmaya aents wainka ajin: Jisusak iwaaku pujawai, tujamaji tusag wakítki kaunawag ujpakagmae. <sup>24</sup>Tiagtai jutiijai ijunag yujau aina nuwiya Jisus ukusbaunum wejiag, nuwa tiagbaunak dutiksag Jisusa iyashinak wainkachag waketug kaunkagmae, —tuidau.

<sup>25</sup>Tiagtai Jisus ayaak:

—¿Wagka shiig anentaimtugium dekaskeapi tumainchaush dekapenagme, yaunchuk Apajuí etsegtin aidau ashí juniktinun pachis agajajua dusha? <sup>26</sup>¿Kristuk imatika waitkasa maam, ni inamtaijinig wayatnai tusa agagbauchukaih?

<sup>27</sup>Tusa, Apajuí chichamen agagbauwa nuna, Moisés agagbauwa nui nagkamas, ashí Apajuí etsegtin aidau agajajua nuna ujakaju.

<sup>28</sup>Nunik yaakat yaijuch Emaús jegamunum, Jisusak nagkaemaki wegau, numí atushat wegau wajukmaina numamtuk. <sup>29</sup>Nunitai:

—Dekas juwi jutiijai juwakta, kiyawai, —tuidau.

Tima nui ditajai juwakui. <sup>30</sup>Nunik yujumkan yuwatatus mesanum jegantag pekaamsamunum, Jisus pagkan juki Apajuin see tusa puuká susaju. <sup>31</sup>Nunitai: Dekas Jisusapita tusag dekaawaju, nuninai ditajai eketu megkaekau. <sup>32</sup>Nunikmatai ditak pempeentunikiag:

—¿Wagkaik jintá minis Apajuí chichameg nuní awai tusa ujakui, shiig aneasua minimag duwish anentaimjaish diischamji? —tudayinau.

<sup>33</sup>Tamawaik Jerusalén waketug, Jisus chicham etsegkata tusa ishiaktin once aina nu, nuigtú tikich aidaujai ijunag batsatbaunum jegawaju. <sup>34</sup>Nunik jegawagmatai:

—Dekas Jisusak nantakne, nunik Simogkan wantintuke, —tusag ujaidau.

<sup>35</sup>Tama ditashkam:

—Iish jintá wesá Jisus wainkamji, nunika jegá jegaa ajin, pagkan puuk amasmatai, dekas Jisusapi tusa dekaamji, —tusag etsejuidau.

**Jisus chicham etsegtugkatajum tusa ishiaktinji etegjamu akatjamu**

*(Mt. 28.16-20; Mr. 16.14-18;*

*Jn. 20.19-23; Tak. 1.4-9)*

<sup>36</sup>Nuna pachisag chichainak batsatai, Jisus ejapeen wajantá ditan kumpamak:

—Apajuí atumnash shiig agkan anentaimsa pujutan amastinme, —tiuwai.

<sup>37</sup>Tama ditak senchi ishamkaju, wakanchawashit tusag. <sup>38</sup>Imaniagtai Jisus chichajak:

—¿Wagka minash wakanchawashit tusagmesh ishamjagme? ¿Wagka utujimsagmesh anentaimjutjume?

<sup>39</sup>Tusa:

—Wika Jisusaitjai, mina uweg dawegjai achikjum diigtustajum, wakanik nejesh ukunchish atsugnai.

<sup>40</sup>Takug niina uwejen, dawenmashkam achiamu aajakua nuna

ditan inaktusajui. <sup>41</sup>Dutikam shiig aneenayatak, dekaskeapi tumainchau dekapiagtai chichajak:

—¿Yumainuk atsgutamainawak?

—tau.

<sup>42</sup>Tutai namak achijuamun puukag, dapá yumijijai susaju, <sup>43</sup>dutikam ditash wainainaig yuwauwai. <sup>44</sup>Nunik Jisus:

—Juna pachisan atumjai pujusan, Moisés, Apajuí etsegtin aidau, Salmosnumash mina pachitus agajajua duka ashí uminkattawai tusan ujayajime, —tiuwai.

<sup>45</sup>Nuna aatus taku Apajuí chichamen agagbauwa nuna shiig dekamtikawajui, <sup>46</sup>dutika nuigtushkam:

—Apajuí chichame agagbauwa nuwig, Kristuk waitkasa maam atinai nunikash kauptum tsawanta juwi nantaktinai, <sup>47</sup>nunikmatai niina daajin pachis Jerusalén nagkamas, ashí nugkanmash etsejiagtinaí, tudaujin idayinak tsagkugnagtinme tusag, <sup>48</sup>atum ainagme ju ashí wainkaujum nunú etsejatin aidautigmek. <sup>49</sup>Tujash yamaikik Jerusalégkak juwaktajum, nuniagmin wi mina Apag Wakaní Pegkejin anagkagtuamua nuna awetitjime, ni senchintijamawagtatui, —tiuwai.

**Jisus nayaimpinum wakitkimu**

*(Mr. 16.19-20; Tak. 1.9-14)*

<sup>50</sup>Juna ashí ujak ni jintintaiji aidaun yajuak, yaakat yaijuch Betanianmanini weuwai, nunik nui Jisus uwejen takuí: Apajuí yaimpaktinme, tiuwai. <sup>51</sup>Tusa akateamuik yakí takuniuwai. Nunik nayaimpinum wakitkimtai, <sup>52</sup>ememati ukuinak, shiig aneasag Jerusalén waketjajui. <sup>53</sup>Nunikag jega Apajuí ememattainum kashí kashinig tuke ijuntsagké aidau Apajuin emematuinak.

Aatus atí.



## YAMAJAM CHICHAM JUAN AGAGBAU

---

### Kristu chicham dekaskea nunak itauwai

**1** <sup>1</sup>Chicham dekaskea duka Kristui, nunú nugkash najannatsaig Apajuijai aajakuí, nunin asa niishkam Apajuike, nigki Apajuí wajukuíta nunash shiig dekamtijamauwai. <sup>2</sup>Nagkamtinish nigka Apajuijaig tuke pujujakuí. <sup>3</sup>Apajuijai najankauwai ashí ii wainainag nunak, nunin asa ashí wájí najankamu aina duka, makichkish shiig atsawai ditak najaneaku tumainuk. <sup>4</sup>Niinig pujutash aajakuí, nuniau asamtai, ni nunú pujutan aentsun inagkeatkiuwai, nunú tsaaptin nugká tauwa nu, ii dekachbaunash dekamtijamauwai. <sup>5</sup>Ashí suwe aidaunak Jisus tsaaptina nunú tsawan emauwai, imatikamu asa suwea dushakam tsaaptina nunak depetmainchau dekapjauwai.

<sup>6</sup>Apajuí makichik aentsun Juan daagtinun awemauwai yamijatjatnun, <sup>7</sup>nunú Jisus tsaaptina nuna pachis etsegtai, ashí aents aidaush dekaskeapi titinme tusa. <sup>8</sup>Juagkak Kristu tsaaptina nu ajakchauwai; niinak Kristu tsaaptina nuna pachis, aents aidaun ujaktí tusa Apajuí awemauwai, <sup>9</sup>nu ashí aents aidaun tsaapmitkatnuk waamak taatin asamtai.

<sup>10</sup>Chicham dekaskea duka Kristui, nunú nugkanum akiinauwai. Nuigtushkam Kristuk najankauwai ashí najankamu nugkanmaya ii wainainag junak. Iman juwi taamtaishkam, juwapita Apajuí awemamuk tusajag

dekaachaju ainawai. <sup>11</sup>Dekas nugkanum niinbau aidau batsatbaunum tauwai, nunikmataishkam ditak pachikchajui.

<sup>12</sup>Ditanbauk dutikawagmatai, tikich aidau dita jukiag, niina chichamen etsegtai dekaskeapi tuinak, shiig wakejus antugkajui. Nu aents nunikaju aidaunak Apajuí uchijí emakui. <sup>13</sup>Ditak Apajuí uchijí wajasajua nunak, Apajuiya nu niina uchijí emakbau asag, ashí akiinaidautik, aentstí wakegamunum akiinainag nunin ainatsui.

<sup>14</sup>Chicham dekaskea duka Kristui, nunú Aentsmaga Akiina jutijai wajumchik mijan pujusuí. Jutii dekas Apajuí Uchijí tikima makichkiuchia nuna senchijig, ni dekas chichaamu, wait anenkagtamujija nujai waitkabiaji.

<sup>15</sup>Juan Jisusan pachis chichaak: “Wi atumin ujaakun mina ukujui minitta nunú, dekas mina nagkaetasuk atatuí, nigka nagkamtinish tuke pujujakú asa, timayag duka juuwai”, tiuwai.

<sup>16</sup>Ashí niina imanjiya nuwiyag pegkeg pujutak jukiuwaitji, nunika ajin tuke kashí kashinig yaimpakui. <sup>17</sup>Apajuik duwik chicham umiktinnak Moisesan susauwai, dutikam ni aents aidaun ujakuí, untsu yamaik anejatta duka chicham dekas chichata nujai, Jisukristuiya juwaji. <sup>18</sup>Apajuinak makichik aentskesh tuke wainchau ainawai, tujash niina Uchijí, ni aneetaijiya nunú, Apajuí nuninai tusag shiig ujjapakagji.

**Juan Yamijatín Jisukristu  
pachisa etsegtukbau**

(Mt. 3.11-12; Mr. 1.7-8; Lc. 3.15-17)

<sup>19</sup>Jerusalegnunia apu aidau, sacerdote, levita aidaujai Juangkan aentsun ishitkauwai: Dekas Kristukaitam, tusajum shiig dekajuatajum tusa. <sup>20</sup>Nu tusá ishiakbau aidau jegají iniam, Juan shiig imagnis chichaak:

—Wika Kristuchuitjai, —tiuwai.

<sup>21</sup>Tusa timatai awentsag iniinak:

—¿Dekas tujash yaitpa? ¿Apajuí etsegtin Elías aajakua dukaitam? —tuidau.

Tama Juan chichaak:

—Wika Eliaschauwaitjai, —tau.

Timataishkam awentsag iniinak:

—¿Apajuí etsegtin taatna dukaitam?

Nu tamashkam:

—Atsa, duchauwaitjai, —tau.

<sup>22</sup>Tutai ashí tujinkag:

—Wait aneam amesh yaitpa dekaskesh nunú shiig uajatkata, shiig dekaa jutii awetabiagma nu ujaktasataji, dita amina dekgatamatatus wakejutpaidau asagmatai, —tuidau.

<sup>23</sup>Tama Juan ayaak:

—Wika makichik aents eemak taa, uwegshunum wekagas senchi jiiká chichagkagtak: ‘Apu wekaesatnun jintan shiig iwajug esegak tutupit dakuegajama’ numamtuk, atumí anentaimish shiig iwajajum umiktajum ‘Apu minitin asamtai’, titinai tusa Apajuí etsegtin Isaías tiuwa nuuwaitjai, —tiuwai.

<sup>24</sup>Fariseo aidau aents ishiakbau Juangkan ausatatus jegajiang batsamtuidau nuna timatai:

<sup>25</sup>—Tujash ame Kristuchu, Eliaskeshkam Eliaschau, Apajuí etsegtin taatnai timawa dukesh achayatkumesh ¿wagka aentsush yamiame? —tuidau.

<sup>26</sup>Tusa tama, Juan aiimak:

—Wika yumí yamijatjai, tujash tikich atum ainajum anuí makichik pujawai, yamaikik duka Apajuí awemamuapita tusagmek dekatsjume. <sup>27</sup>Nigka duwik nagkamas tuke pjuwaitak mina ukujui patatkawai. Wika niya ibauchu asan, ni sapatji jigkamunakesh atitmaitsujai, —tiuwai.

<sup>28</sup>Nunak nugka Betábara tutai Jordán amain Juan yamijatak pujamunum tiajui.

**Juan Yamijatín Jisus pachisa tibau**

<sup>29</sup>Kashinia duwi Jisus minittaman Juan Yamijatna nu wainak: “Juuwai dekas Apajuí Uwigji,<sup>a</sup> ashí aents aidau tudaujin akikmak mantamnatta nunú.

<sup>30</sup>Juuwai atumin chichagkun: ‘Mina ukujui, tikich minitta nunuwai dekas mina nagkaetasuk, nigka duwikish tuke pujujakú asa’, timag duka. <sup>31</sup>Wikishkam niinak wainchauwaitkun yumí yamijatmajai, Israel aents aidauk ni wantintai, shiig dekaatnume tau asan, tiuwai.”

<sup>32</sup>Nuna ti junashkam: “Wakaní Pegkeji pauma nunin wajas Jisusai ekeemtatman wainkabaijai. <sup>33</sup>Nuniakuish wika niinak eke dekachbaijai yaita nunak, nuniai Apajuí yamijatjata tusa awetiuwa nu chichagtak: ‘Wakaní Pegkeji akaiki yaayai ekeemu wainkattame, nunú atatui Wakaní Pegkejijai yamijatjatnuk’, tujutmayi.

<sup>34</sup>Wika nuna wainkau asan, dekas nigka Apajuí uchijiyai tajai”, tiuwai.

**Nagkamchak Jisusa  
jintintaiji aajakaju**

<sup>35</sup>Kashinia duwi Juan Yamijatín ataktú jimag jintintaijijai wajai, <sup>36</sup>Jisus nagkaemattaman wainak:

---

a 1.29 Judío aidauk ditá tudaujin tsagkugnagtasag, tuké uwijá uchijin aishmagkun maa apejakú ainawai. Juan Jisusan pachis: ‘Juuwai dekas Apajuí Uwigji’ tiuwa nunak, jutii tudaujin mantamnatin asamtai tiuwai.

—Diistajum, auwai dekas Apajuí Uwigjig, —tiuwai.

<sup>37</sup>Nuna Juan tutai Jisusan nemajuinak, Juagnak ukukiajui. <sup>38</sup>Nunik miniagtatman Jisus ukujin ayampá diikmá wainak:

—¿Atumesh wájí egagme? —tiu.

Tutai dita aiinak:

—Jintinkagtinuh, ¿dekas amesh tuwí pujame? —tuidau.

<sup>39</sup>Tiagtai Jisus ayaak:

—Wegajai, awi wainkatajum, —tau.

Tima niijai ijunag Jisus pujamunum, etsa ashí akagu asamtai, nuwig kajigkaju.

<sup>40</sup>Nuna Juan Yamijatin takui antuka jimagti Jisus nemagkajuitag nuwiyag Andrés aajakuí, Simón Pedro tutaya nuna yachi. <sup>41</sup>Andrés Jisusan wainak, tikichnak tutsuk dekatkauk niina yachi Simogná weji:

—Yamaik Mesías wainkaji, —tusa ujakuí. (“Mesías” tawa nunak “Kristu” taku tawai.)

<sup>42</sup>Nuna tusa Andresak Simogkan juki Jisus pujamunum ejegamtai, Jisus wainak chichajak:

—Amek Simón Jonasa uchijiyaitme, tujash yamaik amina daagmik Cefas<sup>b</sup> atatui, —tiuwai, (nunak ‘Pedro’ taku tawai.)

<sup>43</sup>Kashinia duwi Jisus Galilea wekamá Felipen wainkauwai, dutika:

—Wegajai, mina jintintaig aminum, —tiuwai.

<sup>44</sup>Duka Felipek yaakat Betsaidanum Andrés Pedrojai pujujakua nuwiyag niishkam aajakuí. <sup>45</sup>Dutikam Felipeshkam weuwai Natanaelan ujaktatus, nunik jegají ujaak:

—Duwik Moisés chicham umiktin aidaun agak, ‘Makichik aents Apajuí etegkamu nugkanum taatnun’ pachis

agajua nunú dekas wainkamji, tikich Apajuí etsegtin aidaushkam dutiksag agakajui. Nunú aentsuk Jisusai, José Nazaretnumiaya nuna uchijí.

<sup>46</sup>Nunú tusa ujaam Natanael chichaak:

—¿Nazaretnumiash makichik pegkejash jiinmainkaih? —tiuwai.

Tusa tama Felipe chichaak:

—Dekas wemí amesh wainkamnum, —tiuwai.

<sup>47</sup>Tima Felipejai juwakiag Jisus pujamunum jegantagtatus wetatman, Jisus wainak:

—Juuwai dekas Israel aents tsanumtanaash tsanumainchauwa duka, —tau.

<sup>48</sup>Tama Natanael antugmamak:

—¿Minash tuwí waitkamume?

Tama Jisus ayaak:

—Wika aminak Felipesh tajutjama ujjapatsaig, numi higuera wakentin pujamin wainkamjame, —tau.

<sup>49</sup>Tusá tama Natanael chichaak:

—Jintinkagtinuh, amek dekas Apajuí Uchijiyaitme, ametme Israelan Apujimek, —tau.

<sup>50</sup>Tama Jisus ayaak:

—Higuera wakentin pujamin wainkamjame taja duwikik, ¿Dekas Apajuí Uchijim-papita tujutam? Tujash dekas juní nagkaemas iwainamu wainkattame.

<sup>51</sup>Nuna ti nuigtú chichaak:

—Dekas tajime: Atumek nayaim ujanmatai Apajuí aentsji nayaimpinmaya aidaun, wi Apajuí Uchijiyaitkun Aentsmaga Akiinauwaitag nuna, minai taawag waketuidau wainkagtin ainagme, —tiuwai.

#### Yaakat Caná nuwenbaunum Jisus yumin vino emamu

**2** <sup>1</sup>Kompatuma nu tsawamunum nuwenbau Galilea nugkanum yaakat Caná tutainum au asamtai,

**b 1.42** “Cefas” tawa nunak arameo chichamnum kayan tawai. Tuja Pedro tawa duka diistá Mateo 16.18.

María Jisusa dukujiya duka nui pujau.

<sup>2</sup>Jisuschakam jintintaiji aidaujai ipaamu asa, ditashkam wegajui. <sup>3</sup>Nuwenbau nagkamnamtai umuinamunum, vino abuekauwai. Nunikmatai María Jisusan chichajak:

—Vinunak amukaje, —tiuwai.

<sup>4</sup>Tama Jisus ayaak:

—Dukuwah, ¿wagka minash dusha tujutme? Wi iwainmamkun shiig dekaajuatnume tusan takamainuk eke tsawantak umintsui.

<sup>5</sup>Tutai ajaamak yujaun María chichajak:

—Ni tujamtata duka imatiksagmek umigkatajum, —tiuwai.

<sup>6</sup>Timatai nui seis buits kaya najankamunum, judío aidau yumin aimag, tuke dutiktai atí tibau asamtai, nijamajakú aina nu batsatu, nu buitsnumag cincuenta, setenta litros<sup>c</sup> tumain pimuidau. <sup>7</sup>Jisus ajaamak yujaun chichajak:

—Yumi shikigjum aanú buitsnum aimjatajum, —tiu.

Timatai ajamau aidaushkam yumin shikikag buitsnum aimjaju. <sup>8</sup>Imatika aimjagmatai:

—Yamai shikikjum dekatkauk jista chichamja auwá susatajum, —tau. Tusa tima nunaa shikik susauwai. <sup>9</sup>Dutika susam jistan chichamjauk yumi vino emamunak dekatsuk uwag, pegkejan dekapjauwai. Inak yumin shikik aimkaju aidauk, yuminap jutikawa tusajag shiig dekaidau. Nuninaig jistan chichamja nu, nuwena nuna utsuká:

<sup>10</sup>—Tikich nuwenaidauk yama nagkamchak pegkejan ajaamasag, aents senchi uwajagmatai, duwi vino imanchau ajamau agmae. Tujash amek

nagkamchakum pegkeg ajasmesh yamaish imanuk ajamame, —tiu.

<sup>11</sup>Juna jutikauwa nunak Galilea nugkanum yaakat Caná tutai awa nui, aents dutikmainchaun Jisus nagkamchak yumin vino emauwai, niina imanjin iwainmamkatatus. Nuna dutikamtai niina jintintaiji aidauk: Dekas Apajuí Uchijimpapita, tusa shiig dekaawajui.

<sup>12</sup>Nuna Jisus dutikamtai, ni dukují, niina yachi, ashí jintintaiji aidaujai ijunjag Capernaum jegawajui, nunik nui wajumak tsawantai batsamsajui.

**Jisus jega Apajuí ememattainum aents batsatu jiijá ishiakbau**

(Mt. 21.12-13; Mr. 11.15-17;

Lc. 19.45-46)

<sup>13</sup>Judío aidau jistamtaiji, Pascua jegattak wajasmatai, Jisusak Jerusalén weuwai. <sup>14</sup>Nunik jega Apajuí ememattainum waikmá, baka aidaun, uwig aidaun, paum aidaun sujuinak utsanawag, kuichkin yapajiin aidaushkam pekajaidaun wainkauwai. <sup>15</sup>Nunik nuwi duwap etsentsjamu atatman juki chapikmag, jiyaká iwiya, jega Apajuí ememattainum batsatunak uwig aidaun, baka aidaujaí ashí jiiig ishimak, kuichkin yapajidaunashkam nagkimjuk nugká akaketuk, mesajinashkam shitaki ajuntug idayak, <sup>16</sup>paumá sujin aidaun:

—Ju aina juka ashí agaa jiiigtajum. Atumek, mina Apajun jeega juka wají sujutaig emaigpajum, —tiuwai.

<sup>17</sup>Nuna tutai jintintaiji aidau Apajuí chichame agagbaunum: “Amina jeemnak senchi akasmatjai”, tusá agagbauwa nuna adeajajui.

<sup>18</sup>Dutiktai apu aidau:

c 2.6 “Cincuenta, setenta litros” tawa juka versión (DHH) tawai, tikich versión aidauk “dos o tres medidas” tuina, tikichik “cien litros” tuidaush ainawai, nunin asag ashí pegkejak ainawai.

—¿Wají iwainakmea aents dekas chicham antugtai wajukeya nunikmesh, aentsush aikamesh jiigmesh ishime?

—tusa imatjuidau.

<sup>19</sup>Tusá tama Jisus ditan chichajak:

—Ju jega Apajuí ememattaiya jújú tegaktatjume, dutikawagmin wi kumpatumchik tsawantaik ataktú jegamkattajai, —tiuwai.

<sup>20</sup>Tutai apu aidau:

—Ju jega Apajuí ememattaiya ju cuarenta y seis mijadai jegamkamua duká, ¿ame kumpatumchik tsawantaik jegamkattam? —tuidau.

<sup>21</sup>Nunak Jisusak dekas jegan taku tichauwai; niina iyashin pachis taku tiuwai, maam kumpatumchik tsawantai nantaktin asa. <sup>22</sup>Jisus juna tiuwa nunak, niina jintintaiji aidaushkam ni mantamna nantakmatai, dekas niina iyashin takumpap tiuwaita tusag adeajajui. Nuninak Apajuí chichamen agagbauwa nuna, tuja Jisus tibauwa nunashkam dekaskeapi tiajui.

#### **Jisusak ashí aents anentaibaunash dekawai**

<sup>23</sup>Jisus jista Pascua tutain inagkeaktatus Jerusalén jegaa pujus, makichik aentsush dutikmainchaun iwainag takatai, kuashat aents aidau, dekas Apajuí Uchijimpapita, tiajui. <sup>24</sup>Nuniagtaishkam Jisusak: Dekaskeap imagnis anentaimjutuinauwa tichauwai, nigka shiig dita anentaibaujinak waituidau asa. <sup>25</sup>Nigka, tikich aents aidau, juka aentsuk nuní anentaimainawai tusa ujatkatí tichauwai, ni aentsun anentaimtainak shiig dekajui asa.

#### **Nicodemo Jisusan tajuamu**

**3** <sup>1</sup>Makichik aents Nicodemo daagtin fariseo aajakuí, ashí judío aina nui eme anentsá diitai. <sup>2</sup>Nunú Nicodemo Apajuin pachis ausatatus kashi Jisusan jegajuiwai. Dutika aujak:

—Jintinkagtinuh, jutiik dekainaji dekas aminak Apajuí awetabiuwai, jutií aidautin jintintuati tusa. Apajuíjai pujachuk aents dutikmainchau aidau, ame kuashat iwainajam takaam imatikag takamainchau ainawai.

<sup>3</sup>Tusá tama Jisus ayaak:

—Dekas tajame: Aents wakanin akiinachuk Apajuí inamak amaitsui, —tau.

<sup>4</sup>Jisus tutai Nicodemo iniak:

—¿Wajukaya aents muuntash ataktú wakitkish akiinmainaita? ¿Ataktú dukujin egkemkag nuaduí akiinmainait?

<sup>5</sup>Tutai Jisus ayaak:

—Dekas tajame: Wakaní Pegkejiya nu egkemtuja pujutí yapagtuachbauk, Apajuí inamataijinig wayashtinai. <sup>6</sup>Aents akiiamuk aentsun uchijigke, untsu Wakaní Pegkejin akiinuk Apajuí uchijiyai, nunú Wakan egkemtugbau asa. <sup>7</sup>Juna ataktú akiinmainai, takui wajukaik nunikaishni tusamek utujimsam anentaimipa, ashí betek ataktú akiinmainai. <sup>8</sup>Daseg ni wakegamunum umpuawai, dutikak numi ishinbau antayatkuish, tuwiya minawa, tuja tuwí nagkaemakish wegawa duka dekashtayame. Ju shiig dekatsug juninke aents Wakaní Pegkejin akiinaushkam, —tiuwai.

<sup>9</sup>Tama Nicodemo awentsag:

—¿Nunash wajukag nunikainta? —tusa iniau.

<sup>10</sup>Tutai Jisus ayaak:

—¿Ame Israel aidau jintinnaitam ibauwaitkumek dusha dekatsum?

<sup>11</sup>Dekas tajame: Iik dekamu chichaaji, tuja wainkamu etsegji. Tujash atumek dekaskeapi tatsugme. <sup>12</sup>Atum wi ju nugka juwiya pachisan tamash dekaskeapi tachautigmesh, ¿Itusagmek dekaskeapi titagme nayaimpinmaya pachisa chichaakuish?

<sup>13</sup>“Makichkish nayaimpinmag wachau ainawai. Tujash Witjai nayaimpinmayan, Apajuí Uchijiyaitkun Aentsmagan

juwi Akiinaunuk. <sup>14</sup>Moisés dapi dakumká najanamun uwegshunum yakí jilkua numamtuk, minashkam yakí jiiḡkagtin ainawai, wi Apajuí Uchijiyaitkun Aentsmagan Akiinauwaitag nunak, <sup>15</sup>dutijuawagmatai, ashí aents mina dekaskeapi tujutuidauk pujut nagkan-chauwa nuna jukiagtin ainawai.

**Apajuik aentstin imá senchi  
anempau asa uchijin  
awetugmauwai**

<sup>16</sup>“Apajuik ashí aentstin senchi anejatu asa, ni Uchijí makichkiuchia nunak awetugmauwai, ashí niina dekas Apajuí Uchijimpapita tusa niinig kajinas anentaimaidauk, waitut nagkanchaunmag wechatnume, ayatak pujut nagkanchaunum Apajuíjai tuke pujustin atinme, tusa. <sup>17</sup>Apajuik Uchijinak ju nugka juwig aentsun suwimkan susati tusag awetugmachui, ayatak aents aidaun ayamjuk uwemtikati tusa awetugmauwai.

<sup>18</sup>“Apajuí Uchijiya nuna dekaskeapi tuinak, niinak umijuidauk waittanmag wechagtin ainawai, untsu niina dekaskeapi tuinachu, chichamenash umijuinatsu nunú waittanmag wegagtin ainawai. <sup>19</sup>Apajuí Uchijí ju nugka juwi taa, ditá tudauji aidaunak paan iwaintukajui, suwenum batsamaina numamtuk wajainamun. Dutikamaitak aents aidauk, tudau takatan imá senchi wakegaidau asag, Apajuí wakegamujiya nuna takainak tsaaptinnum pujumaina numamtuk wajamaina nuna dakitjaju asag, Apajuíjaig tuke kanaak kanakagtin ainawai. <sup>20</sup>Tudau takau aidauk tsaaptinnak dakituinawai, nunidau asag, wi pegkegchau takaamujun iwaintugkai, tusag tsaaptinnak tupantuinawai. <sup>21</sup>Tujash dekaskenum pegkeja nuna takaidauk, ditá takatjin paan iwainaktasag Jisusai mininawai, Apajuí wakegamun takasú asag.”

**Juan kampakumá etsegkamu**

<sup>22</sup>Jisus juna tusa ukuak, ashí niina jintintaiji aidaujui Judea nugkanum wegajui, nui yamijatiagtai dukap tsawan pujusuí. <sup>23</sup>Nuniai Juagshakam Enón Salimnum jegaattak awa nui pujus yamijatu, nui yumi au asamtai, ashí aents niini jegauk betek yamimakaju ainawai. <sup>24</sup>Nunak Herodes Juangkan eke achiatsaig nunikajui.

<sup>25</sup>Nuanú Juagká jintintaiji aidaui, judío apuji aidaujui, aentsush wajuk tudaujinash pegkemainaita tusag tudayinau, <sup>26</sup>nunikag Juangkan jegaantag:

—Jintinkagtinuh, amijai Jordagkan amain pujubium nunú, ame mina ukujui minittawai tusam etsegmayum nu yamai yamijattai, kuashat aents aidaui nemajuinawai, —tuidau.

<sup>27</sup>Tama Juan chichaak:

—Apajuí dutikata tichamuk aunak aikmaitsui. <sup>28</sup>Atumek shiig degaktagme, wi atumesh ashí antuinagmin paan iwainakan, wika Kristuchuitjai, wika niina pachis etsegtukti tusa emtika awemamuitjai, tusan timayag duka. <sup>29</sup>Makichik aents niina nuwe atinjijai wajas chichaagtai, niina kumpají antujak shiig aneas wajama nunisnuk, wishakam shiig senchi shiig aneajai, nuna pachisag chichainamun antaknuk, aents aidaui shiig antujuinak niinak nemajuidau asagmatai. <sup>30</sup>Niinak kashí kashinig aents tuwajuinak eme aentiagtatui, dutikainak minak junik diijagtatui.

**Yakiya tauwa nunú imá  
wagaakui tibau**

<sup>31</sup>“Yakiya tau asa nigka ashí nagkaekagtasui. Untsu wi nugkaya asan, chichaaknush nugkaya aidaunak pachisan chichaajai. <sup>32</sup>Nayaimpinmaya

tauwa nu ashí ni wainkamujin dekas antukbaujijai pachis etsejui, nunitaish aents aidauk dekaskeapi tuinatsui.

<sup>33</sup>Untsu ni etsegbaun aents antujuk dekaskeapita tuidauk, Apajuinu dekaskea nunaap tawa tusag shiig antujuinawai. <sup>34</sup>Apajuí awemamua duka Apajuinak pachis chichaawai, chichamenash shiig etsegtawai, Wakaní Pegkeji ashí susamu asa. <sup>35</sup>Apajuik niina Uchijin aneau asa, ni senchijinak susauwai ashí tikich aidanash nigki diísti tusa. <sup>36</sup>Apajuí Uchijiin dekaskeapi tuidauk, pujut nagkanchaunum tuke pujusagtina; untsu Apajuí Uchijin dekaskeapi tuinachuk, Apajuí suwimke shiig ishain atina nui pujus waittsagtinaí”, tiuwai.

#### Jisus Galilea wegaku jiinkimu

(Mt. 4.12; Lc. 4.14)

**4** <sup>1</sup>Fariseo aidau: Jisus aents aidau jintinbau, nuigtú yamiamu aidau imá kawemai Juagdaun nagkaesau, tuinamun antukajuí. <sup>2</sup>(Jisusak yamijat-jachui niina jintintaiji aidau yamijatjaju ainawai.) <sup>3</sup>Nuniau asamtai fariseo aidau nuna dekaje tabaun antugmamak, Jisusak Judeanak ukuak ataktú wakitki Galileanum weuwai.

#### Samarianmaya nuwajai igkunikbau

<sup>4</sup>Nunik Samaria nugkanum nagkaemak, <sup>5</sup>yaakat Sicar tutainum jegawajui, yaunchuk Jacob ni uchijin Josen nugkan susauwa nui. <sup>6</sup>Nunik Jisus miná minakua senchi pimpikiu asa, Jacopan yumigmatji aajakua nui, etsa tajiastatak wegai, nu yumigmatnum ayaumas ekeemsauwai. <sup>7</sup>Nunia Samarianmaya nuwa yumin shikiak tantamtai:

—Minash yumi ajamjusta uwagtajai, —tusa Jisus segauwai, <sup>8</sup>jintintaiji aidauk yaakat yutain sumaktasag wegaju ai.

<sup>9</sup>Nu tusá segam nuwa Jisusan ayaak:

—¿Wagka minash ame judiuwaitku-mesh, yumi ajamjusta tusamesh segatme, wi Samarianmaya aish? Judío aidauk Samarianmaya aidaujaig makichkish augdaichau ainawai, —tau.

<sup>10</sup>Tama Jisus ayaak:

—Ame dekas wi Apajuí anentag awemamun, amina yumin segajam nunú dekajuamek, dekas tajame minashkam segatmainaitme, tujutkuminig wi dekas yumi pujut tuke atinun sukagtina nuna amamainaitjai, —tiu.

<sup>11</sup>Tutai nuwa chichaak:

—Apuh, ame yumi shikitai takaktsum aniaumesh, yumishkam initak awa aniaish, ¿wajiyai shikikam sujustasamek tame? <sup>12</sup>¿Ame ii muunji Jacob aajakua nunú nagkaesaukaitam? Ii muunji Jacob aajakua nu juna yumigmatnak ukugtam-kiuwai. Niishkam ju yumigmata junak ashí ni uchijijai umujakuí, tagkujinashkam junak suujakuí, —tau.

<sup>13</sup>Tusá tama Jisus chichaak:

—Ju yumia juna umauk, ataktushkam tuke kitajagtinaí, <sup>14</sup>untsu wi yumi midauwa nu susam uwaju aidauk atakea duwish kitaagchatin ainawai, ayatak ni anentain tuke yumi pukuni jiiinama imaní ajamu asa. Nu aentsnue mag yumi pujutan sukagtina duka tuke atinaí, —tiuwai.

<sup>15</sup>Tama nuwa:

—Apuh, nunú yumi minash sujustá, kitamakun yumin shikiakun waketjag imaní pujuig, —tiuwai.

<sup>16</sup>Tutai Jisus chichajak:

—Weme aishum untsukam jukim juwi niijai tantata, —tau.

<sup>17</sup>Tama nuwa ayaak:

—Wika aishinchauwaitjai, —tiuwai.

Tutai:

—Dekas tame, wika aishinchauwaitjai tame duka; <sup>18</sup>cinco aishum ajutjamajakuí, tuja yamai ajutjama dushakam

amina aishumchauwai. Duwi dekas aishinchauwaitjai tame duka tame, —tau.

<sup>19</sup>Nunú tama nuwa chichaak:

—Apuh, ame dekas Apajuí etsegtin diyajame. <sup>20</sup>Ii muunji aajakajua nu Apajuin emematuinak shimujakmauk au muja auwai, tujash atum judío aidautigmek, Apajuí emematku ijunmainuk imá Jerusalegkak awai tinu ainagme.

<sup>21</sup>Tutai Jisus ayaak:

—Nuwauchih, dekaskeapi tujutta, tsawan jegamtaig imá ju muja juwig, imá Jerusalegnumag Apajuk ememat- chatin ainagme. <sup>22</sup>Atumek ya ememat- jume dusha dekatsjume, tujamtaí iik shiig dekau asa, Apajuí emematji, uwemtikagtinuk judiunmaya atin asamtaí. <sup>23</sup>Yamaik tsawantak uminui, yamaya juwik mina Apajun emematui- dauk, dekaskenum Wakaní Pegkeji tabauwa dutiksag emematiagtata nunú. Mina Apajuk aatus emematjitnume tusa wakegawai. <sup>24</sup>Apajuik Wakani. Nunin asamtaí niina emematin aidaushkam dekaskenum Wakaní Pegkeji wakega dutiksag emematmain ainawai, —tiuwai.

<sup>25</sup>Tutai nuwa ayaak:

—Mesías<sup>d</sup> Kristu daagtin taatna nunak dekajai, ni taak ashí ujpaktinai.

<sup>26</sup>Tutai Jisus ayaak:

—Nunak wi amina augjam juuwaitjai, —tiuwai.

<sup>27</sup>Tusa nuwan aujak pujaun jintintaiji kaunkamá wainkag anentai jegagchajui. Nunikajash ¿wají pachismea nuwash augme? ¿Wagka augme? tutanakesh tichajui. <sup>28</sup>Nunik kauntamtaí, nuwak yumi shikitaíjinak ukuak yaaktanum weuwai. Nunik jegaa aents aidaun ujaak:

<sup>29</sup>—Atumesh minijum diistajum, awi aents pujuma nu, waitchauwaitak wi nunikbaugnak ashí ujatrame. ¿Yakita, Mesiaschawashit? —tiuwai.

<sup>30</sup>Tutai aents aidaushkam, Jisus pujamunum jegajiagtatus ashintukajui. <sup>31</sup>Nuwa yaaktanum wematai, Jisusa jintintaiji aidau:

—Jintinkagtinuh, amesh yuwata, —tuidau.

<sup>32</sup>Tama ni ayaak:

—Mina yutaijuk atum wainchamu ajutui, —tau.

<sup>33</sup>Tutai ditak pempeentunisajag:

—Tikichiash yutainash ajamsagma, —tudayinau.

<sup>34</sup>Tiagtaí Jisus chichajak:

—Mina awetiu wakejamu umiamua nu, nuigtú ni takatji ashimjamua nuuwai mina yutaijuk. <sup>35</sup>Atum chichaakjum: Ajak juutak eke ipaksumat nantu awai, tinu ainagme. Tujash wi tajime: Pagkai diistajum, ajak ajakbaur uminag saigká, juumain wajas awai. <sup>36</sup>Ju ajak juwaamun mina yaintui- daunak, wi ajakan ajakú asan, akiktatjai pujut nagkanchau tuke ajitnun, dutikam niishkam nunú juwaamun yainkau asa, shiig dakujus pujustinai wijai betek.

<sup>37</sup>Duwik chicham tibau awai: Makichik aents ajaawai, dutikamun tikich juwaawai, tibauwa duka waitchauwai.

<sup>38</sup>Wika atumnak, atum takasá ajakmachbaugmin juuktajum tusan ishiakbaijime, dutikamu asajum tikich ajakmamuk juukbaijume, —tiuwai.

<sup>39</sup>Nuna tutai niina jintintaiji aidaush- kam yumigmatnum ayumas pujusag chichaak pujuinai, nuwa yaakat jegaa: “Wi nunikbaugnak ashí ujatrame”, tusa etsegbaun antukag, kuashat Samarian- maya aents nunú yaaktanum batsatai-

---

**d 4.25** Hebreo chichamnum “Mesías” tai, griego chichamnum “Kristu” tawai, nunak “Apajuí Apu atinun etegka awemamu” tawa nunak taku tuinawai.



dauk, dekas Kristuapita tiaju ainawai.

<sup>40</sup>Nunikag Jisusan kautuawag: Juwi kanajam wetá, tusag segajui. Tuinam nui jimajá kanajui. <sup>41</sup>Nui pujus chichatai niina chichamen antuinak, nuní kuashat dekaskeapi tiaju ainawai. <sup>42</sup>Nunikag nuwan chichajuinak:

—Yamaik imá ame ujabatkamum duwikik dekaskeapi tatsuji, dekas jutiishkam ni chichaamuk shiig antugkaji, nunikaju asaja: Dekas juwapita ashí aents aidau ditá tudaujin suwimak jumainun ayamjuktina duka, tuinaji —tiajui.

**Capernaumnumia capitani uchijin  
Jisus etsagagbau**

<sup>43</sup>Samarianum jimajá kanag Jisus jiinki Galilea weuwai. <sup>44</sup>Jisus junash pachis: “Apajuí etsegtinuk niina nugkenigkik eme anentamak achauwai”, tiuwai. <sup>45</sup>Galilea jegaamtai, nuwiya aents aidau shiig anentus jukiajui, Jerusalén pujus takaamun ditashkam jista Pascua tutain jistamainak jegawag ashí wainkaju asag.

<sup>46</sup>Ataktú Jisus Galilea nugkanum yaakat Caná tutainum jegauwai, duwik ni yumi vino emamunum. Nuwi tikich yaakat Capernaum tutainum makichik suntajá apuji uchijí jaak tepau. <sup>47</sup>Nunú suntajá apuji Jisus Judeanmaya jiinki Galilea tae tabaun antuk, tajua igkug chichajak:

—Mina jegajuí tajutuam mina uchig ashí nagkanki tepegtima nu etsaentujata, —tusa segauwai. <sup>48</sup>Tama Jisus chichaak:

—Aents dutikmainchau iwainamum waintsukek kakajus dekaskeapi tumaitsume, —tiuwai.

<sup>49</sup>Tutai suntajan apuji ayaak:

—Apuh, wait aneam, mina uchig tikima mayai nagkantsaig jegaam etsaentujakia, —tau.

<sup>50</sup>Tama Jisus chichajak:

—Wetá, amina uchigmik tsagaje, —tiuwai.

Tutai suntajá apuji Jisus tabaun dekas nuniktatuapi tusa wakitkiuwai. <sup>51</sup>Nunik waketkamá jintá ni inake minittaman igkugkui. Dutika igkugkam apujin chichajak:

—iAmina uchigmik tsagagmae! —tusa ujakuí.

<sup>52</sup>Tama:

—¿Etsash wajukeaiya tsagagmae?

Tutai inakshakam:

—Yau etsa tegawai bichatjame tsuweamunak, —tau.

<sup>53</sup>Tama uchi apajishkam anentaimjau:

—Jisus etsa nuní aimpap: “Uchigmek tsagagatui”, tujutmae tusa.

Nunik suntajá apuji ni ashí patayijaí: Jisusak dekas Apajuí awemamui, tiajui.

<sup>54</sup>Jisus jimaja juna wainchatain iwainakua nunak Judeanmaya jiinki Galilea jegaat dutikauwai.

**Aents wekaechau yumi ipiakbau  
Betesda tutainum pujaun  
Jisus etsagagbau**

**5** <sup>1</sup>Duwi pujus Jisus Jerusalén weuwai, judío aidau jistamiagtai pachinkatatus. <sup>2</sup>Yaakat Jerusalén pegmagbaunum dekatkau wayamunum, waiti Uwijá Waitai tutainum, ayaumas tikijuch yumi ipiakbau hebreo chichamaik Betesda tutai aajakui. Nuanuí uwet cinco aak pekaamu au. <sup>3-4</sup>Nunú aaknum kuashat aents aidau wainmachu, shutú, iyashí jaka ekeemjukbau aidaujai nugká tepetpet waigkag batsataidau. <sup>5</sup>Nuanuí makichik aents treinta y ocho mijadai jaa pujú tepau. <sup>6</sup>Nunik tepettaman wainak, kuashat mijadai nunisag tepenun dekau asa, Jisus jegantun:

—¿Tsagagtasamesh wakegatsmek? —tusa iniasui.

<sup>7</sup>Tama jau ayaak:

—Apuh, yumi tagkittai yuminum ajunmain atsau asamtai, tikich imá iyainawai, —tiuwai.

<sup>8</sup>Tutai Jisus chichajak:

—Nantakim ainká tepetaijum jukim wetá, —tiuwai.

<sup>9</sup>Tusá tamawaik nunú aentschakam tsagajui. Nunik ainká tepetaijinak juki weuwai, duka tsawan ayamtai aig nunikui.

#### **Tsawan ayamtai chichamjukkau**

Nunik wetatman tsawanchakam ayamtai tsawaju asamtai, <sup>10</sup>judío aidau, aents tsagajun chichajak:

—Ju tsawanta juka ayamtaiyai, nuniau asamtai amek amina ainká tepetaimek jukimek wemaitsume, —tuidau.

<sup>11</sup>Tama ni ayaak:

—Tujash mina etsaentuju chichagtak, amina ainká tepetaimek jukim wetá tujutmajamah, —tau.

<sup>12</sup>Tutai dita iniinak:

—¿Yae amina ainká tepetaijum jukim wetá tujabiush? —tuidau.

<sup>13</sup>Tujash nigka: Jisusap etsaentugmae, tusagkesh dekachu, Jisusak weu asamtai, nuigtushkam kuashat aents asamtai dekaachui. <sup>14</sup>Dutikamu ajuma duwi Jisus, jega Apajuí ememattainum waikmá, ni aents etsagagbaujin wainkau, dutika chichajak:

—Nijah, yamaik tsagajam pegkeg wajasume, ankauwaitkum awagkimek tudauk takasaipa, jamayum nuní nagkaemasam jata jujutmamkim, —tiuwai.

<sup>15</sup>Nu tusa tima aents tsagajushkam judío aidaun wejí: “Mina etsaentugma duka Jisusai”, tusa ujakajui. <sup>16</sup>Tusá ujakajam judío aidaushkam: Jisus tsawan ayamtai aig etsaegkagtuje, tusag egaidau. <sup>17</sup>Imatikam Jisus chichaak:

—Mina Apajuk yamai tsawanta juwish takaawai, nuaduí wishakam dutiksanuk takaajai, —tiuwai.

<sup>18</sup>Nuna tutai judío aidauk kajegkag maata tuidau, tsawan ayamtai aig etsagaju asamtai, nuigtushkam: Wika Apajuijai betek takaajai, mina Apajuk Apajuiyai, tau asamtai dutikaidau.

#### **Apajuí Uchijiya duke dutikmainuk**

<sup>19</sup>Nu imatjuinam Jisus chichaak:

“Dekas tajime: Wika Apajuí Uchijí asan wi wakegamunak takamaitujai, ashí mina Apag takaamun wainag nunak takamainaitjai, nunuwai mina Apag wakegamuk. <sup>20</sup>Nunak mina Apag anentu asa, jintinjawai nuní nagkaema-

sashkam shiig puyatjusa diyaam atí, tujutu asa. <sup>21</sup>Mina Apajuk aents jakaunash inanki ataktú pujutan egketug apugna ibau asamtai, wishakam wi wakejamugnak pujutan suwajai.

<sup>22</sup>Apajuk aentsnak, ju uwemjati, tuja juka uwemjashiti tsag etejashtinai. Nunak ashí mina idaitugsauwai, ame duka dutikata tusa. <sup>23</sup>Mina tujutiu asa

mina antugtin aina dutijamsag, aminash antugtabiagti tusa ashí minaig idaisauwai. Tujutiu asamtai mina antugtuinachuk, Apag mina awetiuwa nunashkam antujuinatsui.

<sup>24</sup>“Dekas tajime: Wi tajim juna antuk, shiig dekaskepita tusa taku mina awetiuwa nunash dekas niimpap awemauwaita tauk, ni jaakush suwimak jukí waitmainjinak ukuak, dekas pujut tuke atina nuna jukiag pujusagtinai.

<sup>25</sup>Dekas junashkam tajime: Aents yamai tsawanta juwi pujuidaush pujutjinig jakaujai betek ainawai, nuniai minak umigtak pujuidauk, wi Apajuin Uchijin minakun untsubaun shiig paan antugtukagtin ainawai, nu ainawai tuke pujusagtin aidau. <sup>26</sup>Apajuk shiig senchigtinai, iman asa nigki pujutan

sukagtinuk. Ni iman asa, wi niina Uchijí asamtai, minashkam nigki pujutan sukagtiti tusa sujusmayi. <sup>27</sup>Dutijusag wi Apajuí Uchijiyaitkun Aentsmagan Akiinau asamtai, amek aents aidaushkam diistá ju uwemjati, tuja juka uwemjashti tusam etegjata, tujutiuwai. <sup>28</sup>Juna wi tajim juka anentai jegagchamin anentaimtigpajum. Tsawan jegatnai ukusbau aidau wi untsubaun antukag, <sup>29</sup>aents pegkejan takasú aidauk, pujut tuke atina nuna jukiagtatus nantajagtina nunú. Untsu pegkegchaun takasú aidauk suwimkan jukiagtatus nantajagtinai.

#### Apajuí awemamuitjai Jisus tibau

<sup>30</sup>“Wika wi wakegamunak takamaitsojai, mina Apag dutikata tujutbauwa dutiksanuk dutikajai, nunin asa wi dutikamua duka pegkejai, nuaduí wika wi wakejamunak takatsuk, mina Apag awetiu wakejamunak takaajai. <sup>31</sup>Wi wiki pachimasan nuninaitjai tusan etsegtumakuig, wainak tawai tujutmainaitjume. <sup>32</sup>Tujash awai tikich mina pachitus shiig etsegtuju, nunú mina pachitus etsegtuja duka dekas tawai. <sup>33</sup>Atum mina pachittsajum dekatasajum, aents aidau Juan pujamunum awemauwaitjume, dutikam ni atum awemamun ujakua duka dekaske, wainkag tichauwai. <sup>34</sup>Wika aents mina pachitus etsegtugkatnume tusanuk wakegatsjai, junak atum uwemjamnujum tau asan tajai. <sup>35</sup>Juagkak lámpara ekemakam kegak tsaaptin emama numamtinuk aajakuí. Nuniau asamtai wajumak tsawanchik atumshakam dekas niina chichame wakejusjum antugkujum shiig aneejakuitjume. <sup>36</sup>Juan etsegtugkauwa nunú mina iwaintawai, tujash nuní nagkaemas wi takasbauwa nu minak iwaintawai. Wi takaag nunak mina Apag dutikata tujutmawa nunak takaajai, nunú dekamtijamainawai dekas mina Apag

awetiuwa nunak. <sup>37</sup>Nuigtushkam mina Apag juwi awetiuwa dushakam, mina pachitus shiig etsegtujui. Atumek ni chichaamujig antugchauwaitjume, waintashkam wainchau ainagme. <sup>38</sup>Atumek niina chichamega duka umigtsugme, dekas Apajuí awemamuapi tujutchau asajum. <sup>39</sup>Atumek Apajuí chichame agagbauwa nunú shiig kuitamsajum augjume, nuwiya pujut tuke atina dushakam jukitasajum, tujash nunú agagbauwa nuwig mina pachitus chichauwai. <sup>40</sup>Nuniaig atumek minaiya dekas pujut jutak dakitajume.

<sup>41</sup>“Tujash wika aents aidau mina eme anenjús chichagtitnume tusanuk wakegatsjai. <sup>42</sup>Wika atumnak shiig dekajime, Apajuí aneatsjum nunashkam. <sup>43</sup>Wika mina Apag awetimtai juwig taajai, nuniaig atumek minak dakitjagme. Tuja tikich, awemachmaitak nigki nagkami minakuig, imá shiig anentsajum jumainaitjume. <sup>44</sup>Atumek, imá atumek pempeentunisjum eme anendayakjum, Apajuí emematmaina duka pachiatsum aniautigmesh ¿itugsagmek mina chichamjush dekaskeapi tujuttajume? <sup>45</sup>Atumek ni Apajin ujatjamak bakugmattawai tusagmek minak anentaimjutigpa. Wika bakumaitsojime. Atumin bakugmatnuk Moisés chicham umiktajum tibauwa nunú umiktasa batsatjum nu bakugmattajume. <sup>46</sup>Tujash atum Moisés agagbauwa nu dekaskeapita takugmek, minash dekaskeapi tujutmmain ainagme, nunak mina pachitus agajui. <sup>47</sup>Moisés agagbau dekaskeapi tichautigmesh, ¿itugsagmek mina chichamjush dekaskeapi titajume?” tuiwai.

#### Cinco mil aentsun Jisus ayugkamú

(Mt. 14.13-21; Mr. 6.30-44;

Lc. 9.10-17)

**6** <sup>1</sup>Nuna ti ukuak Galilea kuchají Tiberias tuuta awagmatia nuna amain Jisus katigkú. <sup>2</sup>Nuniamunum kuashat aents saetukajui, nigka aents

duitikmainchaun takaak, jau aidaun etsagamun wainkaju asag. <sup>3</sup>Aents imaniagtai Jisusak mujanum waka, ni jintintaiji aidaujui ekeemsauwai, <sup>4</sup>Judío aidaun jistamtaiji Pascua tutai tikiju wajasú ai. <sup>5</sup>Nunik nuwi ekeemas Jisus niimkamá shiig kuashat aents minidaun wainak, Felipen iniak:

—¿Yutaish tuwiya sumaktatji aents imanik miniina au ayugmainush? —tiuwai.

<sup>6</sup>Jisusak ni duitikatnujinak shiig deokayatak, Felipen wajintuk aigkat tusa dekapeak tiuwai. <sup>7</sup>Nu tama Felipe ayaak:

—Doscientos kuichki pag sumaka, makí makichik aents imá imachik tinamash tuké jegamaisui, —tiuwai.

<sup>8</sup>Tutai tikich Jisusa jintintaiji Simón, Pedro tuuta awagmatia nuna yachi Andrés chichaak:

<sup>9</sup>—Juwi makichik uchi cinco pag cebadajai najanamun, nuigtú jimagchik namakan takakui. Tujash junakeuchik imaan aents aina duka betek yumain ainatsui, —tiuwai.

<sup>10</sup>Tusa tiagtai Jisus ayaak:

—Aents aidauk shiig pekaajum batsagtajum, —tiuwai.

Tiajam ditashkam dutiksag nui chijichi kuashat ayau asamtai, nuwig betek pekaa batsasajui cinco mil aishmag tumainun. <sup>11</sup>Dutika umikagmatiai Jisus pagkan juki Apajuin see tusa, ni jintintaiji aidaun tinabiuwai, duitikawajam dita aents aidaunak ashí imatiksag tinabijai. Dutiksag namaknashkam aents wakegainamuji-nak imatiksag tinamkajui. <sup>12</sup>Aents shiig yuwawag ejemakagmatai, Jisus jintintaiji aidaun chichajak:

—Pag ampinka duka yajuaktajum, wainak utsankai, —tiuwai.

<sup>13</sup>Tiajam ditashkam, cinco pag cebada najanamun puujá tinamkamua nuna

yuwinak, ampigbau aidaunak yajuakag doce chagkinnum aimjajui. <sup>14</sup>Dutika-wagmatai aents aidaushkam, Jisus aents duitikmainchaun dutikau asamtai chichainak:

—Juka dekas Apajuí etsegtin ju nugka juwi taatnai timawa nuuwai, —tuidau.

<sup>15</sup>Nuna tuidau asag aents aidauk: Jisus dakitaigkishkam ijuuntuja juki, iina apuji emá apusami, tuinamun Jisus dekaa, jiinki ataktú muja yakí jiiitkaunum nigki wakauwai.

#### **Jisus yumí awanken wekaesá webau**

*(Mt. 14.22-33; Mr. 6.45-52)*

<sup>16</sup>Nunikmatai, Jisusa jintintaiji aidauk kiyau asamtai, kuchanum utsaanawajui.

<sup>17</sup>Nunikag botenum chimpimjag kuchanum Capernaum katigkagtatus shimuidau. Kiyag suwe wajasú aigkishkam Jisusak tatsuk megkaekau asamtai, <sup>18</sup>ditak ashinainai, dase senchi dasentak, kuchanak senchi tsukatmitkau. <sup>19</sup>Imatikamaitak seis kilómetros amainun kuwagainai, Jisus yumí awanken wekagas boten adjikattak minittaman wainkajui. Nunik wainkag sapigmaidau.

<sup>20</sup>Imaniagtai Jisus chichaak:

—iWitjai ishamjukaigpajum! —tiuwai.

<sup>21</sup>Nuna timatai shiig anentus botenum egkejag jukiag, machik wesag wamkes dita jegatasa wegamunmag anuumkajui.

#### **Jisusan egakagtatus ashinkagbau**

<sup>22</sup>Kashinia duwi aents kuchá amain batsataidauk, Jisusa jintintaiji aidauk imá makichik bote tepaun jukiag weenak, Jisusnak jutsuk ditak ashinkamun adeajaju. <sup>23</sup>Nuniamunum yaakat Tiberiasnumia bote aidau, Jisus Apajuin see tusa pagkan puujá, aents aidaun ayugkauwa nui, tikiju anumkajui.

<sup>24</sup>Nunikagmatai Jisus ni jintintaiji

aidaujai nui atsuagtai, nunú bote anumkauwa nuwig chimpimjag Capernaum wegajui, Jisusan egakagtatus.

**Jisus witjai yutai pujutan sukagtinnuk tibau**

<sup>25</sup>Nunik kuchá amain katigkag nui Jisusan wainkag:

—Jintinkagtinuh, ¿wajutiya amesh juwish katigmaume? —tusag iniidau.

<sup>26</sup>Tama Jisus ayaak:

—Dekas tajime: Atum mina egatuinajum duka, wi aents dutikmainchaun iwainakan dutikamag dui, iina dekamti-jamatasampap aikagmae tusa dekachiatkujum, wi pag tinamim shiig ejemakaju asajum egatjume. <sup>27</sup>Yutái dukap atsuk ashimdauwa duka anentaimtigpajum. Dekas anentaimtus-tajum yutai abuechau tuke pujutan sukagtina nu jukitasajum. Nunak wi Aentsmagan Akiinaun, Apajuí mina Apajua nu: Ame duka dutikata, tusa inatjau asantai amastatjime.

<sup>28</sup>Timatai aents aidau iniinak:

—¿Wají dutikmainaita Apajuí wakejamu umigkatasais? —tuidau.

<sup>29</sup>Tiagtai Jisus ayaak:

—Apajuik atumnak, wi awemag juna dekas Apajuyip awemae tusag niinak anentaimtiagtinme tujamjume. Nuuwai ni wakejamuk.

<sup>30</sup>Tutai:

—¿Tujash amesh wají wainchataish iwainagmae takaame, jutiish nu wainkaja dekas Apajuí awemamu asampap aikawa tumainush? —tusag iniinak, <sup>31</sup>—jutii muunji duwik batsamajakajua dushakam yutai maná tutain yuujakú ainawai, Apajuí chichame agagbaunmashkam nuna pachisag, nunak ‘Apajuí nayaimpinmaya pagkan akaketujakuí’, tawai —tuidau.

<sup>32</sup>Tiagtai Jisus ayaak:

—Dekas tajime: Moiseschauwai nayaimpinmaya pagkan aentsun akaketkawk. Mina Apajui yutai dekas nayaimpinmayan sukagtau, ni dutikauwai. <sup>33</sup>Nayaimpinmaya akaiki ju nugka juwi taa puja nuuwai, ashí aents nugkaya aidau pujutan susatnuk. Nuuwai pag Apajuí sukagtamuk.

<sup>34</sup>Tutai:

—Apuh, nunú pag dekas tuke pujutan sukagtin tame duke sukagtita, —tuidau.

<sup>35</sup>Tiagtai Jisus chichaak:

—Witjai yutaiya numamtin pujut tuke atinun sukagtinnuk. Aents minai minidauk tuke yapajuashtin ainawai. Nunisag aents mina dekas Apajuyip awemauwaita tujutushkam tuke kitaagchagtinai. <sup>36</sup>Tujash duwik timajim dutiksanuk yamaishkam tajime, atumek minak waitiatkujum: Dekas Apajuí awemamap tae, tusagmesh dekaskeapi tujuttsugme. <sup>37</sup>Ashí mina Apag ikautjamu minai¿ kaunainawai; aents minai kaunaidaunak jiiknuk ajapmaitsujai. <sup>38</sup>Wi nayaimpinmayan ju nugka juwi taag nunak, wi wakegamugnak takastasanuk junikchamjai. Wika mina Apag awetiuwa nunú wakejamun takastasan tauwaitjai. <sup>39</sup>Mina Apag awetiuwa duka ashí aentsun wi niina suwag nunak, imatiksag shiig kuitamas, makichkish emegkautsuk, jakagmataish tsawan dekas nagkanbaunum nigki inanjatín atí tusa wakejutawai. <sup>40</sup>Mina Apajuk, wi ni Uchijitag juna waitkag, dekas kajinas anentaimaidauk tuke pujustin atinme tusa wakegawai. Nunú aents aidau jakagmataishkam, tsawan nagkanbaunum wiki inanjagtinaitjai, —tiuwai.

<sup>41</sup>Jisus: “Witjai yutaiya numamtin pujut tuke atinun sukagtinun nayaimpinmayan taunuk”, tibaun pachis judío aidau pampantuinak:

<sup>42</sup>—¿Ju Jisus José uchijiyae duchaukaih? Juna apají niina dukujijai jutii shiig wainnuweg jamah, ¿wagka nayaimpinmayan akaikin nugkaa taajai tusash tawa? —tuidau.

<sup>43</sup>Tiagtai Jisus chichaak:

—Wi timajim duka pampantsuk idaisatajum. <sup>44</sup>Makichik aentstigmekesh mina Apag wakemitkagmashkuig, atumek wakekagmek minaig kaunmaitsugme. Aents minak jikatjus kautjuidaunak, nugka nagkanbaunmash inankin uwemtijatnaitjai. <sup>45</sup>Apajuí etsegtujakú aina nu agagbaunum: ‘Apajuí taa ashí jintinkagtitnai’, tabau awai. Nuaduí ashí mina Apajun antujuidauk niinayan unuimajag, minai kaunainawai.

<sup>46</sup>“Mina Apajun wainkaju asagkesh nuninatsui. Imá wiktijai niina shiig wainnunuk, nijai pujaun juwi miniu asan. <sup>47</sup>Dekas tajime: Mina, dekas Apajuí Uchijimpapi tusa dekaskeapi tujutuk, pujut tuke atina nuna jukiagtinaí. <sup>48</sup>Witjai yutaiya numamtin dekas pujut tuke atinun sukagtinnuk. <sup>49</sup>Yaunchuk atumin muunjum aidau uwegshunum batsamsag, maná nayaimpinmaya kakegun juuká yujakajush batsatainatsui, jinawaju ainawai. <sup>50</sup>Tujash junak yutai manaya nuna pachisnuk tatsujai. Wika nayaimpinmayan akaikin aentsnum tau asan, mina nemagtuidauk pujutan jukiagtinme atakesh jakachmig tuinakjag tusan tajai. <sup>51</sup>Witjai yutaiya numamtin pujut tuke atinun sukagtin nayaimpinmaya akaikiunuk. Jujú pagka juna yuwauk tuke pujutnuí. Wi yutai sukagtittag duka mina iyashjuke. Nunak ashí aents juwiya aidash pujut tuke atina nuna jukitnume tau asan dutikattajai.”

<sup>52</sup>Nunú tabaun judío aidau antukag ditak chichainak:

—¿Utugkaya nunash niina iyashinia-nakesh yutai jukish yuwatajum tusash

sukagtumainaita? —tusag pampantuidau.

<sup>53</sup>Tiagtai Jisus ditan chichajak:

—Dekas tajime: Atum Aentsmaga Akiinauwa nuna iyashinia yuwachkugmek, umutash niina numpe umachkugmek, tuke pujuta duka jukishtinaitjume.

<sup>54</sup>Aents mina iyashjun yuwak, umutnash mina numpajun umauk, pujut tuke atina nuna jukiagtinaí; nuniku aidanuk tsawan nagkanbaunmashkam wi inankiagtinaítjai. <sup>55</sup>Wagki mina iyashjua nuuwai dekaskenum yutai shiig ichichmamtan sukagtina duka, antsagke mina numpajua dushakam.

<sup>56</sup>Mina iyashjun yuwak, umutnash mina numpajun umauk, dekas wijai ijutkau ainawai. Nunidaujaig wishakam ditajai pujajai. <sup>57</sup>Apag mina awetiuwa nuwi dekas pujutak awai, nuniau asamtai wika nijai pujajai, wi wajuakeag nunisag aents minaiyan yuwidaushkam wijai pujusagtinaí. <sup>58</sup>Wika junak pag nayaimpinmaya nugkaa akaikiuwa nuna pachisan chichaajai. Jujú yutaig atumin muunjum duwik maná tutain yuujakú aina nuninchauwai. Tujash nuna yuwawaju aidauk ashí jinawaju ainawai, untsu ju yutain yuwidauk tuke pujusagtinaí.

<sup>59</sup>Jisus juna pachis jintinkagtuauwa nunak, yaakat Capernaun jega judío ijuntaijin wayaa jintinkagtuauwai.

#### **Chicham pujut tuke atina nuna sukagtin**

<sup>60</sup>Nunú tu jintinkagtamun kuashat niina ijuntú yujaidau antukag:

—Juna tawa duka shiig dakitmainai ¿yaki nunash antugkati? —tusag ashishmatuidau.

<sup>61</sup>Nuna tiagtatman Jisus dekajua:

—¿Wi tajim duka atumnak shiig awajtamkachajek? <sup>62</sup>Atumesh wi Aentsmaga Akiinauwaitag juna nayaim-

pinum mina duwik pujutaijua nui, ataktú waketbau waitkugmesh, ¿wajuk anentaimtugmainaitjume? <sup>63</sup>Dekas Wakaní Pegkejiya nuuwai pujut tuke atinun sukagta duka, tuja wi timajim nunak minaig kajintsá anentaimsatajum tusan timajime, nunak wika dekas mina iyashig yuwatajum tusan tichamjime. Wi atumin timajim nunuwai Apajuinu-miag, nuigtú pujutnash sukagtina duka. <sup>64</sup>Nuniaigkishkam atum ainajum anuiyatijum, dekaskeap nunak tawa tichamin anentaimaidautigmeshkam ainagme.

Nunak Jisusak, duwik yama nagkam-chak niina jintintaijin etegjauwa duwik ya dekaskeapi tuinatsua, nuigtush ya sujama atinaita nunashkam dekaajakuí, nunin asa tiuwai. <sup>65</sup>Nuigtushkam ekesag tiuwai:

—Atum mina dekaskeapi tujutuina-chu asagmin, makichik aentstigmekesh mina Apag wakemitkagmachkuig, minaig tamaitsumge timajime.

<sup>66</sup>Nuna timatai kuashat aents niina ijuntú yujajuidauk tuke tupantuinak ukukiajui. <sup>67</sup>Nunikagmatai Jisus ni jintintaijin doce aina nuna:

—¿Atumesh anka wetasajum wakegatsjumek? —tau.

<sup>68</sup>Tutai Simón Pedro ayaak:

—Apuh, ¿jutiish yaayaig wetaji, ame chichamjum pujut tuke atinun sukagta aniaish? <sup>69</sup>Jutiik ame tame duka dekaskeapi tuinaji. Nuniau asá shiig dekaji, amek Kristuitme Apajuí pegkegma nuna Uchijí, —tiuwai.

<sup>70</sup>Tutai Jisus ayaak:

—¿Wichaukaitag atum doce ainajum nuna etegjaunuk? Dutikamu ainajumi-nig anuig makichik iwanch pachitkawai, —tiuwai.

<sup>71</sup>Jisus tiuwa nunak Judas Iscariote, Simogka uchijiya nu nijai wekaenaitak pempeentuki sujam atin asa tiuwai.

### Jerusalén wetsuk Galilea pujusbau

**7** <sup>1</sup>Juna tusa idayas Jisusak Galilean-mag wekaesauwai, Judea nugkan-mak wetsuk, nuwiya aidau maata tabau asa. <sup>2</sup>Tujash judío aidau ditá muunji uwegshunum aakmaja yujajakbau anentaimtusa jistamtaiji tsawan jegattak wajai, <sup>3</sup>niina yachi chichajuinak:

—Amek juwig juwatsuk, Judea nugkanum jintintaijum batsata nui wetá, ditash ame takaamugmin wainkatnume. <sup>4</sup>Aents ni takaamun iwainagtatus wakegauk uukag takachu ainawai. Ju ame takaam imag takaakmek, ashí tikich aents aidaush wainainamunum takastá, —tiajui.

<sup>5</sup>Nunak niina yachi aidaukesh: Dekas Apajuí awemamuapi, tsag dekainachu asag tiajui. <sup>6</sup>Nunú tama Jisus chichaak:

—Apag mina awetak, ashí tikich aidaush iwaintuja takastá tujutbauwa duka eke tsawan jegatsui, tujash atuminig ashí tsawantak agkan ajutjamainawai. <sup>7</sup>Atumnak ju nugkan-maya aents aidauk kajegtamain ainatsui, tujash minak kajegtuinawai, wika dita pegkegchaun takainamun wainu asan, pegkegchauwai tuinamu asag. <sup>8</sup>Atumek jistanmag wetajum, wika minishtatjai. Mina awetiu takastá tujutbauwa nunú eke tsawan jegachu asamtai, —tiuwai.

<sup>9</sup>Nuna tusa idayak nigka Galileanum juwakui.

### Aak aakmagbau pachisa jistamtainum Jisus webau

<sup>10</sup>Nunik juwakuitak niina yachi shiyakagmatai, niishkam aents dekajua-wainum tusa uumak, yaunchuk aak aakmaja yujajakbau pachisa jistabau-num weuwai. <sup>11</sup>Judío aidauk nu jistanum batsamsag, Jisusan wainkata-sag eginak:

—¿Dusha tuwig pujawa? —tusag imatuidau.

<sup>12</sup>Nunú imat yujainai, nu aents tuwakbaunmaya wajumak niina pachisag: “Duka aentsuk dekas pegkejai”, tuinai, tikich chichaidau: “Auk pegkegchauwe, aentsun wainak tsanú wekaenuwe”, tuidau.

<sup>13</sup>Tusa tuinakush iwainak paanmasag chichainachu, apu aidaun ishamaidau asag.

<sup>14</sup>Jistamainamu tsawan ejapeantu ai, Jisuschakam jega Apajuí ememattainum wayaa jintinkagtuauwai. <sup>15</sup>Nunik nui jintinkagtutai, judío apuji aidauk puyatjusag diinak:

—Imaanik papiin ausachua annaitkush, ¿utusaya imatikash dekawa? —tiajui.

<sup>16</sup>Nunú aaja tuinam Jisus chichaak:

—Wika midaunak jintinkagtatsjai, wika mina awetiuwa nudaun jintinkagtajai. <sup>17</sup>Aents dekas Apajuí wakegamun takastatus wakega nunú minak: Dekas Apajuin chichamen jintinjamji, nigka niinunak jintinjamtsuji, tusa dekamain ainawai. <sup>18</sup>Aents niina imanjin pachis chichauk, aents antugtuidau eme anenjitnume tusa tinu ainawai, untsu aents mina awetiuwa nuna eme anentinme tusa chichauk, waitjusagkesh chichatsuk, nigka dekaskea nunak chichau ainawai.

<sup>19</sup>“¿Dekas Moisés atum chicham umiktinun amaschaukaitjum? Tujash nunú susamuitkujum makichkitigme-kesh umiatsjume. Nuniatyatkugmesh ¿wagka minash mantuatasagmesh wakejutagme?”, tau.

<sup>20</sup>Tusa tutai aents nui pekajaidau aikag:

—Aminak dekas iwanchia nu pujugtame, ¿ya aminash mantamata tawa? —tiajui.

<sup>21</sup>Tiagtai Jisus chichaak:

—Wi tsawan ayamtai aig, aentsun etsagagmag nuaduú anentai jegatsjume.

<sup>22</sup>Moisés, uchi aishmagkuch akiinkuig tuke pakaji ajapjitajum tujabijui, (nunak Moisesak ni nagkamachu aig, atumi muunjum nagkabau asamtai) atumshakam tsawan ayamtai tsawaju aigkish tuke dutikin ainagme. <sup>23</sup>Duka dekaske, atumek Moisés timawa nuna uwaekaig tusajum, tsawan ayamtai tsawaju aigkishkam uchi aishmag akiinamtaig pakaji ajapjin ainagme. Nunin ainayatkugmesh ¿wagka wi tsawan ayamtai tsawaju aig, aents jaun etsagagmag duwish kajeagme?

<sup>24</sup>Atumek aents dutikamujiya nu shiig dekaagsukek pegkegchauwai tiigpajum, shiig dekaajum duwi nuninai takugmesh titajum, —tiuwai.

#### **Jisus ni minimuji pachisa etsegkamu**

<sup>25</sup>Nuna tutai wajumak aents Jerusalén batsamin aidau antukag:

—¿Auchukaih maatasag egaa yujajiagma nu? <sup>26</sup>Diisjua aents tuwakbaunum wajan chichataish pachitsuk idayinana. ¿Dekas Apajuí awemamui tuidau asajampash apu aidaush ayatak diina? <sup>27</sup>Jutiik ju aents tuwiyampaita duka shiig dekaji, tujash Kristu minamujinak makichkish dekajuachagtinaí, —tiaju.

<sup>28</sup>Tuinamun Jisus jega Apajuí ememattainum jintinkagtak pujaw antuk, senchi jiiká chichaak:

—Dekas atumek dekagume, wi tuwiyania minaja duka. Tujash wika. wi wakegamun takastasanuk minichuitjai, wika atumin wainchataigmia nunú awetimtai tauwaitjai. <sup>29</sup>Wika niijai pujaun juwi tau asan niinak shiig dekajai, nigki minak awetiuwai, —tiuwai.

<sup>30</sup>Nuna tutai achiká jukiagta tuidau, tujash makichik aentskesh jegaantag



achikchajui, ni achinkatnujig eke jegaachu asamtai. <sup>31</sup>Kuashat aents dekas Apajuí awemamap tae tuidau asag:

—¿Kristu taatnai tibauwa nu taash, ju aents jutii wainchataijin iwainag takaa juní nagkaemasampash takastinait? —tuidau.

#### **Fariseo aidau Jisusan achikta tibau**

<sup>32</sup>Aents aidau Jisus pachisa chichainamun fariseo antukag, sacerdote apuji aidaujai ijunag chichasag, achijatin jega Apajuí ememattai kuitamin aidaun:

—Jisus achiktajum, —tiajui.

<sup>33</sup>Tiaju ai Jisus chichaak:

—Wika atumjaig wajumchik tsawan-chik pujusan, nuaduí mina awetiu pujamunum wetatjai. <sup>34</sup>Atumek minak egatkagtinaitjume, tujash waitkashtin ainagme, wi pujamunmag minimainchau asajum, —tiuwai.

<sup>35</sup>Timatai apu aidau ditá ditak iniininak:

—¿Aush tuwig ii wainmainchaun-mash wetí? ¿Judío aidau kanajag shiyak, griego aents batsatainamunum pujuina nuna jintintak wetin asampash tawa? <sup>36</sup>¿Nunash wajuk tujamkua, ‘atumek minak egatkugmesh waitkash-tin ainagme, wi pujamunmak minimainchau asajum’, tujama nunash tujamji? —tiajui.

#### **Yumi pujutan sukagtinun pachis Jisus tibau**

<sup>37</sup>Jista ashimnamua nunú tsawan dekas imá puyatjusa anentaimtutai asamtai, nunú tsawantín Jisus wajantá senchi jiiká chichaak:

—Aents kitabauk, minai tanta uwagti.

<sup>38</sup>Ni mina dekas Apajuí Uchijimpapita tusa anentaimtujuidaunak, agagbau chichaa nunisag, niina anentainig yumi pujutan sukagtina nunú pukuni jiintitnai, —tiuwai.

<sup>39</sup>Jisus nuna tiuwa nunak, niina dekaskeapi tusa nemajuidauk Wakaní Pegkejin jukiagtínun pachis taku tiuwai. Nu tsawantaik Wakaní Pegkejig eke taachu, Jisus eke mantamna anean nayaimpinum waachu asamtai.

#### **Aents aidau Jisusan pampankiag kanajagbau**

<sup>40</sup>Nunú tabaun aents antukaju chichainak:

—Juka dekas Apajuí etsegtin taatnai timawa nu taajamah, —tuidau.

<sup>41</sup>Tikich chichaidau:

—Juka Kristui, —tiajui.

Nuna tuinai tikich chichaidaushkam:

—Atsa duchauwai ¿Kristu Galilean-maya amaikait? <sup>42</sup>Apajuí chichame agagbauwa nui chichaak: ‘Kristuk David wegantunum akiinu asa, Davitash Belegnum akiinauwa nunisag niishkam Belegnumak akiinatnai’, tawa aniaish —tuidau.

<sup>43</sup>Nuna tusag aents aidauk Jisusan pampankiag ditak kanajajui. <sup>44</sup>Nuninai tikich aents Jisusan achiká jukiagtatus wakejuidaushkam achikchajui.

#### **Apu aidau Jisusak Apajuí awemamuapita tichamu**

<sup>45</sup>Nunikag achijatin jega Apajuí emematku ijuntain kuitamin aidauk jegawajui, fariseo aidau, tikich sacerdoten apuji aidau batsatbaunum. Nunikag-matai:

—¿Wagka Jisusash juwi itachugme? —tusag iniasajui.

<sup>46</sup>Tusá tuinam dita aினak:

—Makichik aentskesh nu aents chichama imatika chichauk tuke wainkashbauwai, —tiajui.

<sup>47</sup>Tiagtai fariseo chichainak:

—¿Atumesh tsanuamak yujainajum?

<sup>48</sup>¿Jutii apuji aidau, nuniachkush fariseo apuji aidaukesh niiní dekaskeapi

tuinawash dusha wagka anentaimsajum diyatsjume? <sup>49</sup>Au aents chicham umiktinun dekatsu auk tikí pegkegchawai, —tuidau.

<sup>50</sup>Tiagtai nui Nicodemo niishkam fariseowaitak Jisusan ausatatus kashi jegajuiwa nunú chichaak:

<sup>51</sup>—Jutii chicham umiktinji chichaak: ‘Aents chichaamuji antugtsukek suwimak susami tumaitsui, dekatkauk chichamujiyá antugka, nuaduú shiig ni dutikamujish dekaaja dutikmainai’ tujamji, —tiuwai.

<sup>52</sup>Tutai dita aainak:

—¿Amesh Galileanmayagkaitam?

Apajuí chichamen agagbauwa nu shiig kuitamsam ausam diisia, Galileanmaya aentsush Apajuí etsegtinush asauwashit nunú, —tiajui.

<sup>53</sup>Tusa ukuinak makí makichik ditá jeen shiyakajui.

#### Nuwa ekagmaku Jisus ejeentunbau

**8** <sup>1</sup>Tujash Jisusak Olivosan mujajin weu, <sup>2</sup>nunik kashinia duwi kashik-mas wakitki, jega Apajuí ememattainum jegauwai. Nunikmatai kuashat aents tuwagkam ekeemas jintinkagtutan nagkamauwai.

<sup>3</sup>Nuniai chicham umiktinun jintinkagtin aidau, fariseo aidaujai, nuwa tikich aentsjai takamun wainkag jukiag itajiajui. Dutika itaa aents tuwakag ijunbaunum ejapea awaantag, <sup>4</sup>Jisusan iniinak:

—Jintinkagtinuh, ju nuwa ekagmaku jukí itanji. <sup>5</sup>Moisés chicham umiktajum tujabiwa duka, nuwa junin aidaunak ayatak kayai tukua tukuakuajum maatajum tawai, ¿tujash amesh wajinpa? —tuidau.

<sup>6</sup>Nunak wajintig ni timatai duwi tsanumjugasag tiajui. Tujash Jisusak tsuntsumá ekeemas uwejen nugkanum agau. <sup>7</sup>Nunitaishkam ayatak iniidau, imatjam Jisus pagkai chichaak:

—Atum ainajum anuiyash yaita machikish tudaun takachush, nu iman dekatkauk kayai tukutí.

<sup>8</sup>Tusa ataktú tsuntsumá nugkan agau. <sup>9</sup>Nuna timatai ditá tudaujinash dekgamamaidau asag, muunchinum nagkamna makí makichik jii jiinkawag ashí shimuinak, imá Jisusnak nuwajaig ukukiajui. <sup>10</sup>Nunikagmatai Jisus pagkai niimkamá aents atsuagtai nuwan iniak:

—Nuwauchih, amina aents itagmawaga dusha wajukawagmae. ¿Makichikesh tukugmachajek? —tau.

<sup>11</sup>Tusa tama nuwa ayaak:

—Apuh, makichikish tukugchaje, —tiuwai.

Tusa tutai Jisus chichagkushkam:

—Wishakam aminak suwimkan jukiti tusanuk tumaitsujame. Yamaik jeemin wetá, tujash awagkimek tudauk takasaipa, —tiuwai.

#### Jisus tsaaptinun aentsun itajuauwai

<sup>12</sup>Aents aidau ataktú ijunjamtai, Jisus jintinkagtak:

—Witjai ju nugka juwi tsaaptinjai betek tauwaitag nunak. Nunin asamtai aents mina nemagtuidauk tsaaptin pujutan sukagtin tuke ashimnachua nuna jukiagtatui, nuna jukiajuk suwenmak wekaesachagtinai.

<sup>13</sup>Nuna tutai fariseo aidau chichajak: —Ame imanaitjai tusam etsegtumam duka tikima pegkegchawai, —tuidau.

<sup>14</sup>Tiagtai Jisus ayaak:

—Wi wiki pachimasan taja dushakam wainkachui. Wika dekgamamjai tuwiyanua juwi taamja nunak, nunisnuk tuwí wetatja nunashkam shiig dekajai, nuniaig atumek shiig dekgatsjume.

<sup>15</sup>Atumek ju nugkaya aents aidau aentsun etegkin aina nunisjumek aentsuk etegkeagme, tujash wika makichik aentsnakesh etegkeatsjai.

<sup>16</sup>Tujash wi etegkeaknuk dekaskenum dutikmainaitjai, ju pegkegchauwai, ju pegkejai tusanchakam. Wikik nunak dutikmaitsujai, mina Apag awetiuwa nujai atuekan etegmain asan. <sup>17</sup>Atum chicham umiktin papiinum agagbauwa nuwig: Jimag atuegak mai nunak pachis etsegtuinakui nuaduí dekaskeapi takugmesh titajum, tibauwai. <sup>18</sup>Wishakam chicham dekaskea nuna etsegjai tumamjai, tuja mina Apagshakam aikasag: Chicham dekaskea nunak etsejui, —tujutui.

<sup>19</sup>Nuna tutai:

—¿Amina Apash tuwí pujawa?  
—tusag iniidau.

Tama Jisus ayaak:

—Atumek minakesh dekahtsugme, nuniau asajum mina Apagshakam dekamaitstugme. Atum minash dekahtsugmek mina Apagshakam dekamain ainagme, —tiuwai.

<sup>20</sup>Nunak Jisusak jega Apajuí emematku ijuntainum jintinkagtak tiuwai, Apajuinu kuichik anentang suwaku chimpitai puja nui pujus. Ni achinkatnujig tsawantak eke jegachu asamtai, makichik aentskeshkam achikajag jukichu ainawai.

**Wi wegamunmag  
minimaitstugme tibau**

<sup>21</sup>Jisus ataktú chichaak:

—Wika wetatjai, nunikmatai atum mina egatkagtinahtjume, nuniakjumesh atumek wi tuwí wegaja nuwig minishtin ainagme, atumin tudajum idahtsuk pujusjum jau asajum.

<sup>22</sup>Tutai judío apuji aidau chichainak:

—Atumek wi wegamunmag minimaitstugme tujama nunash, nigki maamatin asampash tujama, —tuidau.

<sup>23</sup>Nuna tusa tiagtai Jisus ditan:

—Atumek juwiyag ainagme, wika yakiyayaitjai. Atumek ju nugka juwiya

aentsuitjume, tujash wika ju nugka juwiyachuitjai. <sup>24</sup>Atumek mina: Dekas juwapita Apajuí Uchijig, tujuttsujum duwi jaakjumesh atumin tudaugminig jakatnaitjume timajime, —tiuwai.

<sup>25</sup>Tutai iniinak:

—¿Tujash dekas amesh yaitpa? —tusa tuidau.

Tama Jisus ayaak:

—Wika nunak atumnak yaunchuk nagkamsan tuké ujjajime. <sup>26</sup>Atumdaun pachisan nuninawai tusa etsegmainuk kuashat ajutui, mina awetiuwa dushakam dekaskea nunak chichauwai, wi ju nugkaya aidautigmin tajim nunashkam, wika ni chichaamun antukbaujun tajime.

<sup>27</sup>Nuna aatus chichataish, ni Apajinap pachis tawa tusajag dekainachu.

<sup>28</sup>Nuaduí Jisus ditan chichajak:

—Atumek minak wi Aentsmagan Akiinawaitag nu, yakí numinum achiijajum takugjum detusjum, nuaduí dekas juka Apajuin Uchijimpapita tusagemek, nuigtú wi wakegamun takaatsug dushakam dekajuatin ainagme. Wika mina Apag jintinjuamua nunak atumnashkam tajime. <sup>29</sup>Mina Apag awetiuwa duka wijaig tuke pujawai, imá minakek idaitatsui, wika ashí ni wakejamua nunak takau asamtai, —tiuwai.

<sup>30</sup>Nuna Jisus tutai kuashat aents: Dekas Apajuí Uchijimpapita, tiajui.

**Dekaskea nunú  
agkanmitkagmamainai tibau**

<sup>31</sup>Jisus judío aidau niini dekaskeapi tiaju aidau chichajak:

—Wi atumin tajim jujú chicham betek umigtakjume, dekas mina nemagtin amainaitjume. <sup>32</sup>Nuniakjum chicham dekaskea dushakam dekamainaitjume. Nu dekaskea nunú agkanmitkagmamainai, —tiuwai.

<sup>33</sup>Tutai dekaskeapi tichau aidau aiinak:

—Jutiik Abragka uchijí wegantu asaja, makichkiakesh tikich inaku waitkamak asachuítj. Nunin ainajinish, ¿amesh wajukeakmea agkanmaemai-naitjume tukagtame?

<sup>34</sup>Tiagtai Jisus ayaak:

—Dekas tajime: Aents pegkegchaun takaina duka, pegkegchau takata nuna waitkatai ainawai. <sup>35</sup>Inakak inamnun jeenig tuke pujuchu ainawai, nuna uchijinchu asag, untsu inamnun uchijiya nunú jegag tuke pujuwai, duka niina uchijí asa. <sup>36</sup>Nuniau asamtai atumin Apajuí Uchijí agkanmitkgamakuig, dekas shiig agkanbaekagtin ainagme. <sup>37</sup>Dekagime atum Abraham wegantuitjum nunak, nuninaitkujum mina chichameg dekaskeapi tumainchau dekapeau asajum mantuatasajum wakejutagme. <sup>38</sup>Wika mina Apag iwaintugkamun wainkau asan chichajai, atumshakam nunisjumek atumin apa tabauwa nu dutiksagmek takau ainagme, —tau.

<sup>39</sup>Tutai dita aiinak:

—Iina muunjig dekas Abragkai, —tuidau.

Tiagtai Jisus chichajak:

—Atum dekas Abragka uchijí ainakjumek, ni takasua dutiksagmek takamain ainagme. <sup>40</sup>Wi dekaskea nu jintinmaitkujum, minak ayatak mantuatasajum wakejutagme. Abragkak makichkish annunak anentaimajakchauwai.

<sup>41</sup>Atumek, atumin apajai betek takaagme, —tiu.

Tama dita aiinak:

—Jutiik wainka kasanum akiamuk ainatsji, iina apajiya duka dekas Apajuyia nuuwai, —tuidau.

<sup>42</sup>Tiagtai Jisus ayaakshakam:

—Atumin apa dekas Apajuyiitkuig minashkam anenmain ainagme. Wika

wiki nagkamnuak juwig taan pujatsjai, mina Apag awetakui wika taan juwi pujajai. <sup>43</sup>¿Wagka wi chichaamush dekamain dekapeatsjume? Duka mina chichameg antut dakituidau asajum nuniagme. <sup>44</sup>Atumin apa duka iwanchia nuuwai. Atumek niinu asajum, ni takaamua dutiksagmek takastasajum wakegajume. Yama nagkamchakug iwanchia nu nagkamauwai magkagtutan, dekaskea nunak dakitak waitjutan imá waitjin weuwai. Nigka waita nuna apají asa, waitjutan pujugnai, nu imá shiig awagmamu asa. <sup>45</sup>Atumek nunin asajum, wi dekaskea nuna etsegkuishkam dekaskeapi tujuttsugme. <sup>46</sup>Atum aidautigminiash ¿ya wi tudau takasbaugnash dekagtuinawa? ¿Wagka wi dekaskea nuna etsegkuish, dekaskeapi tujuttsugme? <sup>47</sup>Apajuinu aidauk, Apajuí chichamen antujuk umijin ainawai. Tujash atumek Apajuinuchu ainajum nuaduí, nu antutak dakituinagme.

#### **Kristuk Abraham akiintsaij pujuwai**

<sup>48</sup>Nuna tusa tutai judío aidau Jisusan chichajuinak:

—Juwi tibaiji, amek Samarianmaya aents asam wakan pegkegchau egkemtugmagmatai tu wekaeme, timayag duka dekaske.

<sup>49</sup>Tama Jisus ayaak:

—Makichik iwanchkesh minak atsugtawai. Wi takaag nunak Apajum ememattasan aikajai, dutikaig atumek minak emematjuinatsjume. <sup>50</sup>Wika wikik emematjitnume tusanuk wakegatsjai, nuniaig Apajuí ememat tinme tujutu asa, nigki nunak egak mina emematjumainnak iwainawai. <sup>51</sup>Dekas tajime: Aents wi taja nuna dekaskeap tawa tusa tauk ajumaish jakashtinai, —tiuwai.

<sup>52</sup>Tutai nuigtú judío aidau aikag:

—Yamaik shiig dekaji, dekas aminí wakan pegkegchau pujugtamuapi tusaik. Abraham, nuigtú tikich Apajuí etsegtin aidaushkam ashí jinawajui, nunikaju ainaig ame yamai chichaakum: ‘Mina chichamjun umigtauk ajumaish jakashtinai’, tame. <sup>53</sup>¿Amek dekas ii muunji Abragka nu nagkaesau asamek dusha tame? Abraham, nuigtú tikich Apajuí etsegtin aidaush ashí jinawajua nuniaish ¿amesh wajak takumea dusha tumame? —tiajui.

<sup>54</sup>Tama Jisus ayaak:

—Wi wiki emematmamkun midaunak pachimasa chichaamuk tiki wainak amainai. Tujash minak mina Apag emematjawai, atum iina Apajig Apajuiyai tajum nunú. <sup>55</sup>Nunú túsá tayatkugmeshkam nigka wainchawaitjume, tujash wika wainnujai. Wainchaujai takunuk atum tikima wait ainajum, wisha ibauk wegakun tumainaitjai. Wika shiig wainu asan, ni tujutbaunashkam dutiksanuk umigjai.

<sup>56</sup>Atumi muunjum Abraham aajakua duka, wi ju nugka juwi taamujun waitkatatus wakegas dakak pujusuí, nuniau mina waituk shiig aneasui, —tiuwai.

<sup>57</sup>Nuna tutai judío aidau Jisusan chichajuinak:

—Ame cincuenta mijankesh pujatsum aniyatkumesh, wajutí wainkau asamea, ¿Abragkan wainkabajai tame? —tuidau.

<sup>58</sup>Tama Jisus ayaak:

—Dekas tajime: Wika Abragkash akiintsai g tuke pujuwaitjai, —tau.

<sup>59</sup>Tutai aents aidau kayan jukiaju tukutasag, tujash Jisusak uumak jega Apajuí ememattainmayag jiinkiuwai.

**Aents wainmachu akiinaun  
Jisus etsagabau**

**9** <sup>1</sup>Jisus nuwiya jiinki wekamá, aents yama akiinmawaik tuke wainmachu akiinaun wainkauwai. <sup>2</sup>Nunikmatai ni jintintaiji aidau iniinak:

—Jintinkagtinuh, ¿wagka jusha wainmachush akiinauwaita? ¿Ni apají tudaujiniash ankauwait, atsa niina tudaujinigkiash aanin akiinauwait? —tuidau.

<sup>3</sup>Tiagtai Jisus ayaak:

—Juka ni tudaujinig junikchauwai, tuja apají dukují tudaujinkish ankachui. Ju junin akiinauwa juka, Apajuí ni senchijin iwainaktatus wakegau asamtai aanin akiinauwai. <sup>4</sup>Eke tsawaiya juwik, mina awetau dutikata tujutmawa nunak takastajai, kiyagtatui, nunikmataig makichkish takamainchau agtatui. <sup>5</sup>Yamai nugkaa pujag juwik, nugkan tsaaptinjiyaitjai, —tiuwai.

<sup>6</sup>Nuna tusa Jisus nugkaa usukmá, niina usukinig nugkan uchupig juki, wainmachu jiin anujtukui. <sup>7</sup>Dutika chichajak:

—Yumi ipiagbau Siloé tutaya awi weme nijamita, —tiuwai. (“Siloé” tawa nunak: “Awemamu” taku tawai.)

Túsá tima wainmachushkam we, nijami shiig wainmaku. <sup>8</sup>Nunik wainmakmatai nu wainmachujai ijutkau batsamin aidau, tuja tikich niina wainin aidaushkam:

—¿Juchaukaih jintá ekeemas wainkauch sujustajum tusa sumá ekeemnuwe nunú? —tusag iniimaidau.

<sup>9</sup>Nuna tiagtai tikich aents chichainak:

—Ehé, nunuwai, —tuinai tikich chichainak: —Duchauwai auk, ayatak nujai betekmamtainai, —tiajui.

Tiagtai nunú aents tsagaju nigki etsegtumak:

—Witjai, —tumabiuwai.

<sup>10</sup>Tutai:

—¿Tujash wajukamea wainmakume? —tusag iniidau.

<sup>11</sup>Tama ni etsejak:

—Makichik aents Jisus daagtin, niina usukin nugkajai machik pachimag jiijug anujtujuk chichagtak: ‘Yumi ipiagbau Siloé tutaya nuwi weme nijamita’, tusa

awetime. Tujutmatai wenu nijamakman wainmakmajai, —tau.

<sup>12</sup>Tutai:

—¿Nu aentsush tuwí pujawa?

Tusá iniinam:

—Achah, dekatsjai, —tiuwai.

**Fariseo aidau wainmachu  
tsagajun iniasagbau**

<sup>13</sup>Nunú duwik wainmachu aajakun jukiag fariseo batsatainamunum ejegawajui. <sup>14</sup>Jisus aents wainmachun tsawan ayamtai aig, usukin nugkan uchupig jiinum anujtuk etsagaju asamtai, <sup>15</sup>fariseo aidau:

—¿Duwik wainmachumesh yamaish utusamea wainmame? —tusag iniidau.

Tama ni chichaak:

—Minak Jisus usukin nugkan uchupig jijuí anujtujuk: Nijamita, tujutmatai nijamin wainmakmajai, —tau.

<sup>16</sup>Wajumak fariseo aidau chichainak:

—Nunú aents dutijama duka Apajuí awemamuitkug tsawan ayamtai aig takamaisui, —tuidau.

Nuna tuinai tikich chichaidau:

—¿Tudaugtinaitkush utusaya aents dutikmainchaunash aikash takaawa?

Tusag ditak kanajajui. <sup>17</sup>Nunikag waketjusag duwik wainmachu wekayin tsagajun jegaantang:

—Amesh aents amina etsaentamjaush ¿ya tame?

Tusa iniam ni chichaak:

—Wika Apajuin etsegtinai tajai, —tiuwai.

<sup>18</sup>Nuna tutaish judío aidauk, dekas jujú wainmachuwe nuwap wainmake tumain dekapenachu, nuninak wainmachu apajin dukujijai untsukag, <sup>19</sup>iniinak:

—¿Jukaih atumi uchijum wainmachu akiinawai tuina nunú? ¿Nunin akiinaush yamaish utugsaya wainmawa? —tuidau.

<sup>20</sup>Tiagtai nuna apají dukujijai chichaak:

—Juka iina uchijí wainmachu akiinawai nuwai, <sup>21</sup>tujash wajuk wainmake duka iik dekaagsuji, tuja yaki niimtikme dushakam dekatsji. Ni iniastajum, nigka uchuchichua aanin asa, nigki ujpamainai ni wajuk wainmake nunak, —tiuwai.

<sup>22</sup>Nuna tiajua nunak judío aidau: Jisusak dekas Apajuí awematnaitjai tibauwa nuwapita tuidauk juga ijuntainmak jiikí ajapami, waichu atí tusa chicham umikbau asamtai, nuna dutijamawainum tusa ishamainak tu chichakajui. <sup>23</sup>Nuniau asamtai wainmachu apajig dukujijai:

—Ni iniastajum tikima uchuchichui, —tiuwai.

<sup>24</sup>Nuna timatai judío aidau duwik wainmachu aajakun ataktú untsuká itan chichajak:

—Apajuiya nuna emtin dekaskenum waitjutsuk etsekgata. Jutiik dekanaji nu aentsua duka tudaugtinai.

<sup>25</sup>Tiagtai ni ayaak:

—Wika dekatsjai, dekas tudauwashit nunak. Wika duwik wainmachuitkun, yamai wainmag junak shiig dekajai, —tiuwai.

<sup>26</sup>Tutai ataktú iniinak:

—¿Utugtamkame? ¿Niimtijamtatikush wajina dutikame? —tuidau

<sup>27</sup>Tusá iniam:

—¿Wagka dutik etsaentugmae tusa etsekguish dekaskeap tawa tujutchayat-kugmesh, ataktú etsekgati tusagmesh wakegagme? ¿atumesh ni nemagkatasa-jum wakegau asagmek tajum? —tiuwai.

<sup>28</sup>Tusa tutai pegkegchau chichajuinak:

—Amek nunú aents nemagme, tujash jutiik Moisés aajakua duke umigji.

<sup>29</sup>Moisesan Apajuí aujukua duka dekajai, tujash au aents amina etsaentamja duka machikish dekantsui, niish tuwiyampaita duka, —tiaju.

<sup>30</sup>Tuinam aents wainmachu tsagaju chichaak:

—iWaj! anentai jeagmainkaih mina etsaentuja nu, tujash atumek dekatsjume tuwiyagkita nunú aentsush. <sup>31</sup>Jutiik dekaji Apajuik aents tudaugtin aidau wakegamunak umigtsui, nigka niina emematuinak ni wakegamun umiina nuna antujuinawai. <sup>32</sup>Duwikish tuke dekachbauwai, aents wainmachu akiinaun makichik aents etsagajui tusa etsegbaukesh. <sup>33</sup>Aents mina etsaentuja nu, Apajuí awemam taachuitkug, makichkish aikamait sui, —tau.

<sup>34</sup>Tusa tutai:

—Ame akiinmawaik nagkamsam ibau tudau aajakuitkumek, ¿jutií jintinkag-tuatasam wakegam? —tusag jega ijuntainum pujaun jiikiag awemajui.

<sup>35</sup>Nunú dutika wainmachu tsagaju jiiki awemamun Jisus dekaa wekamá wainak:

—¿Amesh Apajuí Uchijinish dekaskeapi tamek? tiuwai.

<sup>36</sup>Tama nu aents chichaak:

—¿Apuh dusha yaita? Wisha nuna wainkan niinig dekaskeapi titajai, —tau.

<sup>37</sup>Tutai Jisus ayaak:

—Amek duka wainme, wi amijai chichaag juuwaitjai, —tumabiuiwai.

<sup>38</sup>Tutai nu aentschakam Jisusan tikishmatug pujujus:

—Apuh, yamaik ame tame nunak dekaskeapi tajame, —tiuwai.

<sup>39</sup>Tutai Jisus ayaak:

—Wi ju nugka juwi tauwaitag nunak, aents aidau: Wika pegkegchau asan wainmachua nuninaitjai, nunin asan Apajuinak dekatsjai tumamainak, Apajuin tsagkugtugta tama, ditá pegkeg-chauji tsagkujam, wainbaujai betek wetinme; nuniai tikich aidau: Wika pegkegchaunak takachujai, nunin asan wainmaujai betekaitjai tumamaidau

asamtai, Apajuí ditá pegkegchauji tsagkujacham, Apajuinak dekatsuk wainmachujai betek juwakagtin asamtai, tauwaitjai, —tiuwai.

<sup>40</sup>Nuna tutai fariseo aidau wajaidau iniinak:

—¿Jutiish wainmachu aina annukaitag? —tuidau.

<sup>41</sup>Tiagtai Jisus ayaak:

—Atum wainmachu ainakjumek atumin tudaugminish bakumamainchau amainaitjume, tujash atum wainbauwaitjai tajum awi dekas bakumatin ainagme, —tiuwai.

#### Uwijan kuitamin uwigijjai pachisa augmatbau

**10** <sup>1</sup>Nunik Jisus chichaak: “Dekas tajime: Uwijá wenuke waitijiya nuní waitsuk, yajá yantamnum wayaa nunak aents kasa nunin ainawai, <sup>2</sup>tujash dekas uwijan kuitamna duka waitijin wainai. <sup>3</sup>Tuja waitin kuitamnuk, uwigjintin minitai ayatak waitin ujati idaitinai, nunak uwigshakam niina chichamenak shiig antujin ainawai. Nuniau asa ni jiyaakushkam makí makichik daajinak adaituk jiiinai. <sup>4</sup>Dutika jiijá juki ni eemak, uwijan ukuunum saak weegame, nunitai uwigshakam nuna chichamenak shiig antuju asag saetinai. <sup>5</sup>Uwijak niina wainchataijinak, chichamenakesh yajá antujiatkug nemagchau ainawai, ayatak pisag shiminai”, tiuwai.

<sup>6</sup>Jisus juna pachis fariseo aidaun jintintuauwai; dutikamashkam ditak nuna tujamkumpap tawa tusag dekaachajui.

#### Aents uwijan shiig kuitamna numamtinaitjai Jisus tibau

<sup>7</sup>Jisus ataktú chichaak: “Dekas tajime: Witjai uwijan wenuke waitijiya numam-tinnuk. <sup>8</sup>Tuja wi taatsaig kuashat

kaunawaju ainawai, tujash nunú aidauk kasa, uwijan yajumin ainawai. Nunak uwijak chichamenash antujuinatsui. <sup>9</sup>Witjai waitiya numamtinnuk, aents minai waidauk uwemjagtin ainawai. Nunú aents aidauk shiig dakujus batsamtainai Apajuí kuitabau asag.

<sup>10</sup>“Kasak ayatak kasamkatatus, magkagtuatatus, jegan tsaiktatus mininai. Tujash wika pujutan jukitnume, nunikag shiig atsumkas batsamsatnume tusan miniuwaitjai. <sup>11</sup>Witjai dekas aents uwijan shiig kuitamna numamtinnuk. Nunin asan mina aentsug uwemjatnume tabaunum mantamnattajai. <sup>12</sup>Untsu aents ayatak akiká, kuitamjutkata tusa ukukbau aidauk, kuntin yukagtin uwijan yuwatatus minittaish, uwijak niinuchu asagmatai tupikaak ajapa ukukmatai, nunú kuntin yukagtin yuwak ipisig ishimmnai. <sup>13</sup>Nunú aents tupiká duka, ni tagkujichu asamtai, ayatak akikam takau asa nuniawai.

<sup>14</sup>“Witjai dekas aents uwijan shiig kuitamna numamtinnuk. Wika mina aentsug aidaunak shiig dekainajai, nunisag ditashkam minak shiig dekajui-nawai. <sup>15</sup>Aantsag mina Apajush shiig dekajui, wishakam niinak imatiksasuk shiig dekajai, nuniau asan wika mina aentsug pujutan jukitnume tabaunum mantamnattajai. <sup>16</sup>Uwig tikich wenuknumiaya numamtin, tikich mina nemagtuidaush ajutui, nunashkam yajuakan makichik wenuknumak chimpiaaku utugmaina numamtuk ijumjattajai, dutika ai ijunjag batsamsag, mina chichamjun antugtuinakui wiki ditanak kuitamkattajai.

<sup>17</sup>“Mina Apajuk anentui, wika mina aentsug aidau uwija numamtin aina nuna ayamjakun, mantamnan ataktú nantaktin asamtai. <sup>18</sup>Tuja minak mantumain ainatsui. Wika wiki

sujumankattajai. Wiki sujumankan jakan ataktushkam wiki nantaktinaitjai. Wi nunimain ajuta nunak mina Apag nunikta tujutiuwai.”

<sup>19</sup>Jisus tusá chichaamun judío aidau antukag, ditak pempeentunikiag pampandayidau. <sup>20</sup>Nuninai kuashat aents chichainak:

—¿Wagka aanin wakan pegkegchau egkemtuam imaanag chichaa wekaga aniaush antujuinagme? —tuidau.

<sup>21</sup>Tujash tikich chichaidau:

—Makichik aentskesh wakan pegkegchau egkemtuamuk junak imatiksag chichamaitsu jama. ¿Itusaya aents wakan pegkegchau egkemtuamush aents wainmachunash niimtikmainaita? —tuidau.

#### Judío aidau Jisusan maata tiagbau

<sup>22</sup>Tsetsek tepeau ai, Jerusalén jistamaidau jega Apajuí ememattai jegamkamua nunú tsawan jegau asamtai. <sup>23</sup>Tuja Jisus jega Apajuí ememattainum Salomón waiti ujugbaunmanini wekagun, <sup>24</sup>Judío aidau Jisusan tentea apakag chichajuinak:

—¿Wajupa asamea shiijash etsegkat-tame? Ame dekas Kristuitkumek, shiig ujajatkakia, —tuidau.

<sup>25</sup>Tiagtai Jisus ayaak:

—Wika timajime, tujash atum minak nuna etsegkuish dekaskeapi tujuttsugme. Mina Apag dutikata tusa inatjamunak wika paan iwainakan atumnash iwaintajime. <sup>26</sup>Tujash atumek mina aentsjuchu asajum, dekaskeapi tujuttsugme. <sup>27</sup>Mina aentsug aidaunak shiig wainjai, ditashkam shiig chichamjunash antugtuidau asag, uwig aidau uwijá kuitamnun nemajuina numamtuk nemagtuinawai. <sup>28</sup>Wi ditanak pujut tuke atina nunak suwajai, dutikamu asag ditak tuke waittsashtin ainawai. Minai batsatunak makichikikesh atanjukchag-



tin ainawai. <sup>29</sup>Mina Apag ashí tikich aidaunash nagkaesauwa nunú minak sujusuí. Nunin asantai niina uwejen aunak makichkish atanmain ainatsui.

<sup>30</sup>Wika mina Apagjaig makichkiuchitji, —tiuwai.

<sup>31</sup>Tutai judío aidau kayan jujukiaig tukutá tuidau, <sup>32</sup>dutikainam Jisus chichaak:

—Wi mina Apajun senchijin takaakun kuashat pegkeg aidau atumin iwaintukmajime. Tuja, ¿wají takasbaunma minash kayaish tukugta-sagmesh wakejutagme? —tau.

<sup>33</sup>Tama dita ainak:

—Jutiik ame pegkeg iwainajam takaamunmag kayaik tukumaitsujime, amek dekas shiig aentsuitkum Apajuí pegkegchau chichagkum, Apajuiya imanuk jumamam duwi kayaik tukunjattame.

<sup>34</sup>Tiagtai Jisus chichaak:

—Atum chicham umiktina nuwig: ‘Wika atumnak apajuí ainagme tajime’, tusa agagbauwai. <sup>35</sup>Apajuí chichame agagbauwa nuanuig: ‘Atumek apajuí ainagme’ tujamui, nunak dekas tujamainawai. <sup>36</sup>Apajuí mina ju nugka juwi awetimtai tau asan, wika Apajuin Uchijiyaitjai takuish, ¿wajuk anentaimsagmea, Apajuí pegkegchau chichagkaume tusagmesh tujutjume? <sup>37</sup>Wi mina Apag wakega dutiksanuk takaachbau wainkugmek dekaskeapi tujutigpajum. <sup>38</sup>Mina dekaskeapi tujutchamin dekapeakjumes, mina Apag dutikata tujutmawa nuna wi iwainakan takaakui, nu wainkajum dekaskeapi tujuttajum, nuniakjum minai Apag ai, wi niijai pujag dushakam dekaajum dekaskeapi timinjum.

<sup>39</sup>Tutai ataktú achikag jukiagta tuidau, imatikainam Jisus jiinki wegak uwemjauwai.

<sup>40</sup>Nunik Jisus wakitki namak Jordagan amain etsá minitaijia nuní Juan

yamijatujakbaunum jegaa pujusuí.

<sup>41</sup>Nunikmatai kuashat aents wejiaig wainainak:

—Juan aents dutikmainchaun iwainachkush jujú aentsun pachis chichaaya duka dekaske, —tuidau.

<sup>42</sup>Nuna tuidau asag nui batsataidaik kuashat aents Jisusnak dekaskeapi tiajui.

### Lázaro jakamu

**11** <sup>1</sup>Yaakat Betanianmaya aents Lázaro daagtin jaak tepau. Duka umayí María, Marta aatus ijunag nunú yaaktanmag batsamajakajui. <sup>2</sup>Maríaya juuwai kugkuinu juki Jisusan nawen ukatug niina intashinig ujgutuja nunú. <sup>3</sup>María, Martajai Jisusan chichaman akupjuinak:

—Apuh, amina kumpajum aneetaigmea duka jaawai, —tiajui.

<sup>4</sup>Nu akatjamu tusá ujaam Jisus:

—Aunak tuke jaak jakashatui, Apajuí senchijin, nuigtú Apajuí Uchijí senchijnashkam iwainaktatus aniawai, —tiuwai.

<sup>5</sup>Jisusak Martan niina kaijai, nuigtushkam umayí Lazaronashkam senchi aneejakuí. <sup>6</sup>Imaatiknaitak jaawai tabaun antukashkam wetsuk, ni pujamunmag jimajá kanajui, <sup>7</sup>nunik ni jintintaiji aidaun chichajak:

—Judeanum ataktú wakettsaik wegagmi, —tiuwai.

<sup>8</sup>Tama dita ayaak:

—Jintinkagtinuh, amina awiya judío aidau kayai tukú tukugmainakua mantamawagtatus imatijabiagmaya nuniaigkik, ¿awi ataktú wemi tusamesh tame? —tuidau.

<sup>9</sup>Tiagtai Jisus ayaak:

—¿Makichik tsawantan doce hora ajatsuak? Aents tsawai wegaguk tukuumaitsui, shiig wainak wegau asa.

<sup>10</sup>Untsu kashi wegauk tukuumaian ainawai, tsaaptinum wainmak wegachua asa.

<sup>11</sup>Nuna ti nuigtú:

—Iina kumpají Lazarok yamaik kanag tepawai, tujash wi wejin inankittajai, —tiuwai.

<sup>12</sup>Nuna tutai ni jintintaiji chichajui-nak:

—Apuh, dekas kanag tepauku nantak-tatajama, —tuidau.

<sup>13</sup>Jisusak Lázaro jakamtai taunak, ditak ayatak kanagmatais tawatai tusag tiajui. <sup>14</sup>Tiagtai Jisus paan iwainak:

—Lazarok dekas jakae, <sup>15</sup>tuja wi awi juwakchau asan shiig anejai, atumek wi au inanbau wainkajum dekaskeapi tiagtin asagmin. Tujash jegaa diisagmi, —tiuwai.

<sup>16</sup>Tutai Tomás, Jimagmamutu taiya nunú, tikich Jisusa jintintaiji aina nuna chichajak:

—Jutiish niijag wegagmi, mainakush jutiijai mantamatnume, —tiuwai.

**Jisus witjai jakaunash  
inanmainnuk pujutnash  
sukagtinnuk tibau**

<sup>17</sup>Jisus Lázaro pujutain jegakmá, Lázaro ukusam cuatro tsawan wegai jegauwai. <sup>18</sup>Betaniak Jerusalén jegattak kampatum kilómetro jegaantu. <sup>19</sup>Tuja kuashat judío aidau shimutkajui Marían, Martajai ijagsagtatus, umayí jajukam buutuina senchi wake besemag batsatu asantai, anentain ichichtugasag.

<sup>20</sup>Nuninai Jisus taattak minawai tabaun Marta antuk, Jisusan igkugtatus jintai, Mariák jegag juwakui. <sup>21</sup>Nunik Marta Jisusan igkug chichajak:

—Apuh, ame juwi pujutaik mina ubajuk jamain wajakchae, <sup>22</sup>tujash wika yamaikish ame Apajuí segamunak imatiksagkeap amamainaita tajai, —tiuwai.

<sup>23</sup>Tusá tama Jisus ayaak:

—Amina umaimik aneantatui, —tau.

<sup>24</sup>Tama Marta chichaak:

—Dekas tame, wika dekajai tsawan nagkantina duwi aneantina nunak, —tiu.

<sup>25</sup>Tutai Jisus chichajak:

—Witjai jakaunash inanmainnuk, wikitjai pujutnash sukagtinnuk. Aents minai kajinas anentaimaidauk, jakaash pujut nagkanchaunum pujusagtinai. <sup>26</sup>Tuja yamai iwaaku batsata dushakam, mina: Dekas Apajuí Uchijimpapi, tujutuina imá minak umigtuidauk, waitut nagkanchaunmag wechagtin ainawai. ¿Dusha amesh dekaskeap nuniktinaita tamek? —tiuwai.

<sup>27</sup>Tama:

—Ehé Apuh, wika dekaskeapi tajame. Amek Apajuí Kristun ju nugka juwi awematnaitjai timawa nunú asam, Apajuí Uchijiyaitme, tiuwai.

**Lázaro ukusbaunum  
Jisus jegantá buutbau**

<sup>28</sup>Nuna tusa ukuak, Martak kai Marían jegantun niinak akanki:

—Jintinkagtin juwi taa untsugmawai, —tiuwai.

<sup>29</sup>Nunú tamawaik Mariáshkam wajaakug Jisusan wainkatatus wejiuwai.

<sup>30</sup>Jisusak yaaktanmag eke waitsuk, Marta igkugbaunmag pujau. <sup>31</sup>María waujus jiinki wetai, judío aidau María anentai ichichtuina kauná batsatush-kam: Umayí ukusbaunum jegantá buuttas wegatai, tusag pataetukajui.

<sup>32</sup>Nunik Mariák Jisus wajamunum jegantá tikishmatug pujus:

—Apuh, ame juwi pujutaik, mina ubajuk jakachampastaih, —tau.

<sup>33</sup>Tusa María buuttai, judío Marían pataetuk kaunkaushkam buutiagatman Jisus wainak, shiig senchi wake besemag dekapjauwai. <sup>34</sup>Nunik:

—¿Tuwí ukusmaugme? —tusa iniimu.

Tutai:

—Apuh juwi ukusmaji, tantá diistá, —tiajui.

<sup>35</sup>Tima jegan diikmá wainak Jisus buutu. <sup>36</sup>Nunitai judío aidau:

—iDiisjuah, yaitnaku aneejakuajah! —tuidau.

<sup>37</sup>Tiagtai tikich aidau:  
—¿Jujú wainmachunash wainmit-  
kauwe ibaush, Lázaro jataish utugkat-  
nuki, ni pujutaish jakatnasha? —tuidau.

**Jisus Lázaro inankimu**

<sup>38</sup>Jisus ataktú senchi wake besemag  
dekapjau, nunik waa muun taimunum  
ukusá kaya aputukbaun jegantun:

<sup>39</sup>—Kayak ekektajum, —tiuwai.

Tutai Marta chichaak:

—Apuh, mejeawastaih, ukusam  
cuatroa imania kintamjae, —tau.

<sup>40</sup>Tutai Jisus ayaak:

—¿Ame dekaskeapi takumek Apajuí  
senchijí iwainamu wainkattame  
timajam duka, dekaskeap dutikmainaita  
tatsumek? —tiuwai.

<sup>41</sup>Timatai Lázaro ukuaku epenbaun,  
kayan eketkaju. Dutikamtai Jisus  
nayaimpin pagkai diyaak:

—Apawah see tajame, amek minak  
tuke antugtau asamin. <sup>42</sup>Wika shiig  
dekajai, amek minak tuke antugtusmeké  
ame nunak. Nuniyatkun yamai tajame,  
jujú aents ijuna jushakam shiig  
wainkag, dekas Apajuí awemamuapi  
tujuttinme tusan, —tau.

<sup>43</sup>Nuna ti idayak senchi untsuká:

—iLázaro, nantakim agaa jiinkita!  
—tiuwai.

<sup>44</sup>Tama Lazaroshkam ukuaku uwejí  
nawejai jaanchi shiig pempeaja, nuigtú  
yapiin jaanch aputusa ukusbauk  
imanisag jiinkiuwai. Nunikmatai Jisus  
chichaak:

—Atiatajum wetí, —tiuwai.

**Jisus maami tusa  
chicham umigkamu**

(Mt. 26.1-5; Mr. 14.1-2; Lc. 22.1-6)

<sup>45</sup>Kuashat judío aidau Marían uyunai-  
nak yujaidauk, Jisus nu dutikamu  
wainkag: Dekas juka Apajuí Uchijimpa-  
pita, tiajuí. <sup>46</sup>Tujash wajumak aents

fariseo aidaun jegajuawag, Jisus  
dutikamun pachis ujakajui. <sup>47</sup>Nunú  
ujakajam fariseo aidau, sacerdoten apuji  
aidau, nuigtú apu ditan nagkaesau  
aidaujai ijunjag chichainak:

—Au aentsua nunú aents dutikmain-  
chaun kuashat iwainag takaa aush  
¿utugkattaji? <sup>48</sup>Ayatak idaisa ajinig ashí  
aents aidau niinak: Dekas Apajuí  
Uchijimpapita, tusag nemajiagtai,  
Romanmaya apu aidau suntajan  
ishitjamkamtai kautjamak, juga Apajuí  
emematku ijuntaiya juna yumpunjamai-  
nak ashí jutijai amupaktatajama,  
—tuidau.

<sup>49</sup>Nuna tiagtai nuwiya Caifás daagtin  
nunú mijantin sumo sacerdote atí tusa  
adaikam pujau asa chichaak:

—Atumek duka machikish dekats-  
jume, <sup>50</sup>anentaimsagmesh diyatsjume,  
ashí aents jinumaina nuna makichik  
aents mantamnamaina duka, —tiuwai.

<sup>51</sup>Nunak Caifasak nigki nagkamig  
tichauwai. Nunú mijantin ni sumo  
sacerdote wajas pujau asamtai, Apajuí  
tu anentaimtikbau asa, Jisusai judío  
aidaunum mantamnatnuk, tiuwai.  
<sup>52</sup>Tujash imá judío aina nuwigkik maam  
amaitisui, ashí aents tikich nugkanum  
batsata nunashkam uwentikak niina  
uchijí emakta tau asa, Jisus maam  
atinun taku tiuwai. <sup>53</sup>Nuna timatai nunú  
tsawantaik apu aidauk: Jisusak dekas  
mantamnatni, tusag chichaman umigka-  
jui.

<sup>54</sup>Tibaun Jisus dekagmama shiig  
wantinka wekaemainchau asamtai,  
Judea nugkanak ukuak, makichik  
yaakat yaijuch Efraín tutai uwejush  
tikiju anem aunum weuwai. Nui jegaa  
ashí niina jintintaiji aidaujai ijunag  
pujusuí.

<sup>55</sup>Nuniamunum judío aidau Pascuatin  
uwijan maawag yuujakú aina nu tsawan  
tikiju wajasú asamtai, kuashat aents

Jerusalén ashinaidau, nui jegawag: Nu jista tsawaakuig pegkediaja jistamtai atí, tibau asamtai nuna umikagtatus.

<sup>56</sup>Tuja aents aidauk Jisusan wainkagtatus egaa yujajuidau, nunidau asag juga Apajuí ememattainum wayaa ekeemsa-jash pempentunisag iniininak:

—¿Atumesh Jisusash wajuk anentaimtagme, ju jistanmash minitpash, atsa pujustimpash? —tuidau.

<sup>57</sup>Fariseo aidau sacerdote apuji aidaujai aentsun akatenak:

—Makichkitigmekesh Jisus pujamuji dekagkugmek etseगतajum, achiká jukimi, —tiajui.

**Betanianmaya nuwa Jisusa dawen kugkuinui nijatjamu**

(Mt. 26.6-13; Mr. 14.3-9)

**12** <sup>1</sup>Seis tsawan asa jista Pascua jegatin ai Jisusak Betania weuwai, Lázaro jakamtai ni inankiuwa nuna pujutaijin. <sup>2</sup>Nui jegamtai Jisusan eme anentsag yutain umigkajui. Dutikawagmatai Marta yutain pekasmatai, Lázaro, nuigtú tikich aidaush Jisusjai mesanum jegantag ekeemsa yuwidau. <sup>3</sup>Nuninai María kugkuin ayatak nardok najanamu, senchi akik trecientos gramos ajamun juki tajuntun, Jisusa nawen ukaatuk, niina intashinig ujujtujui. Nu dutikamu kugkuntig jeganak akijauwai. <sup>4</sup>Imanikmatai Judas Iscariote, Jisusa jintintaijitak pepeentuki sujuktina nu chichaak:

<sup>5</sup>—¿Wagka dekas trescientos tsawan takasá kuichik jumaina imaan akik sujuka, nunú kuichik ujunauch aidaun yaimainnash aikawa? —tau.

<sup>6</sup>Nunak Judasak dekas ujunauch aidaun puyatjakug tichauwai. Nigka kasa asa kuichik egketai kuitamkata tusa susam wekagas, aents aidau nu egketainum kuichik chimpianum, wakenmag kasamá wekaga asa

dutikatatus tiuwai. <sup>7</sup>Nuna tutai Jisus chichaak:

—iTutsuk idaisata! Junak mina ukugsagmatai jutijuawagtinun jutijawai. <sup>8</sup>ujunauch aidauk atumjaig tuke batsabiagtatui, untsu wika atumjaig pujushtatjai, —tiuwai.

**Lázaro maami tusa chicham umigkamu**

<sup>9</sup>Kuashat judío aidau Jisus Betanianum pujawai tuinamun antukag wegajui, niina wainainak Lazaronashkam jakau aig Jisus inankiu asamtai, wainkata tuidau asag. <sup>10</sup>Nudiagtai sacerdoten apuji aidaushkam: Lázaro maami, tusag chichaman umigkajui, <sup>11</sup>ni nantakbaujin wainainak kuashat judío aidau Jisusan: Dekas Apajuí Uchijimpapita, tusag nemajuidau asagmatai.

**Jisus Jerusalén apu wajasá wayaamu**

(Mt. 2.1-11; Mr. 11.1-11; Lc. 19.28-40)

<sup>12</sup>Jista Pascua atin asamtai, kuashat aents Jerusalén wegajui. Nunik kintamag tsawaukmag, Jisus taattak minawai tuinamun antukag, <sup>13</sup>duká tsupijag jijnag igkuinak, senchi untsumkag:

—iApajuí awemamu jutii Israel aidauti Apuji, iina agkanmitkagmatatus mina jujú emematiagmi! —wajaidau.

<sup>14</sup>Jisusak burrun wainak nui ekeemi minau, duka duwik agagbaunum:

<sup>15</sup>“Yaakat Siognumia aents aidautigmek ishamkaigpajum, diistajum atumin apujum burrunum entsatkau mina nunú”, tawa nu uminkauwai.

<sup>16</sup>Jisus burrunum ekeemi wetaish, ni jintintaiji aidauk nu agagbau tawa nunak anentaimtugchajui, nunikajuitak Jisus nayaimpinum wakitkimtai, Jisus

nuniktinun pachis yaunchuk agajajua duka, dekas imanisagkeap uminkae tusag adeajajui.

<sup>17</sup>Aents aidau Jisusa nemajus yujaidauk, Jisus Lázaro jakaun untsuká inantun wainkaju asag, nuna dutikame tusag, ashí dita wainkamujinak tikichnash ujaidau. <sup>18</sup>Jisus aents dutikmainchau dutikamua nuna antukaju asag, aents aidauk Jisusan igkugkagtatus jintujajui. <sup>19</sup>Nuniagtai fariseo aidau pempentunisag tudayinak: —iDiisjuah, ashí aents igkugtatus ashintuinana! Ii chicham umikmag duka dutikmainchau emaji, —tiajui.

#### **Griego aidau Jisusan wainkatatus kaunkamu**

<sup>20</sup>Jista tsawagmatai Apajuin emema-tiagtatus Jerusalén wegamunum, wajumak griego aents aidau pachiinkajui. <sup>21</sup>Nunú aidau, Felipe yaakat Betsaidanmaya Galilea nugkanum pujuwa nuna jegaantang:

—Apu Jisus wainkatasa wakegaji, —tiajui.

<sup>22</sup>Tima Felipe Andresan jegajua ujakú, nunik nijai atuegak Jisusan jegajuawag, tujamainawai tusag ujakajui. <sup>23</sup>Tusá ujaam Jisus chichaak:

—Wi Aentsmaga Akiinaun nayaimpinum wakitkittag duka yamaik tsawan umiintugkae. <sup>24</sup>Dekas tajime: Ajakan jigkayí akaká nugkaa ajachmak nunisag makichik jigkai aawai, untsu nugkaa initak ajaam jaka tsapai nejeakug kuashat jigkaijuwame. <sup>25</sup>Aents ju nugka juwí pujutan imá senchi wakegawk uwemjashtin ainawai. Untsu aents pujutin uyumachuk uwemjatin ainawai. <sup>26</sup>Aents mina umigtuktatus wakegawk nemagtuktinme, mina umigtin aidauk wijai pujusagtinaí, tuja mina umigtin aina nunak mina Apagshakam eme anentinaí.

#### **Jisus ni mantamnatnuji etsegkamu**

<sup>27</sup>“Yamaik shiig kuashat anentaimkun waitijai. ¿Wajintajaki: ‘Apawah, mina mantuawagtata nunak idaitustinme’, titajash? Tujash wika ni tabaun umikta-san tauwaitjai.”

<sup>28</sup>Nuna tusa: “Apawah, amina senchijum aents aidau iwaintukta”, tiuwai.

Nuna tai nayaimpinmaya chichaak: “Mina senchignak iwainakbaijai, tujash ashí aminí nagkaemaktata duwi awentsanak iwainaktatjai”, tiuwai.

<sup>29</sup>Nu tabaun nui aents ijunu antukag: —Ipaantai, —tiajui.

Tuinai tikich chichaidau:

—Nayaimpinmaya aents chichaké, —tuidau.

<sup>30</sup>Tiagtai Jisus chichaak:

—Juna chichaa nunak mina antumti-juktasag tatsui, atumin antumtijamkag-tatus tawai. <sup>31</sup>Aents ju nugkaya aidau etegnagtina duka yamai jegawai, tuja yamaíya juwíki iwanch ju nugka juwí inama nunú depetkamu atata dushakam. <sup>32</sup>Mina numinum achii jag yakí takujiagmatai, jakan nantaakun, ashí aentsnak minai minaig ikaunmantatjai, —tiuwai.

<sup>33</sup>Nunak ni wajuk maam atinaita nuna aentsun dekamtikak tiuwai. <sup>34</sup>Tutai aents aidau aiinak:

—Jutii chicham umiktina nuanuig: Kristuk tuke pujutnui, tusa agagbauwa nu dekaji. Nunú taish, ¿wagka amesh Aentsmaga Akiinauk, maatasa yakí takuam atatuí, tame? ¿Nu Aentsmaga Akiinaush yaita?

<sup>35</sup>Tiagtai Jisus ayaak:

—Yamaikik atumjai ijunjan pujajai, tujash dukap tsawantak pujushtatjai, wajumchik tsawanchik pujuttajai. Witjai tsauptinjai betekmantinnuk, eke atumjai pujag juwíki wi jintinkagtamuk

unuimagtajum. Suwenum wekaguk dekatsui ni wegamujiinak shiig wainak wegachu asa. <sup>36</sup>Wi tuke tsaptinjai betekmantinun atumjai pujag juwik dekaskeapi tujuttajum, atumesh wi tsaptinaitag nuna uchijí aminjum.

Juna Jisus tusa idayak, aentsun ejamki jiinki weuwai.

### **Judío aidau Jisusan dekaskeapi tichamu**

<sup>37</sup>Jisus aents dutikmainchaun iwainag ditash wainainamunum takataish dekaskeapi tichajui. <sup>38</sup>Dita nuninamunum Apajuí etsegtin Isaías agagbau:

“Apuh, ¿ya iina chichamenash dekaskeapi tuinawa?

¿Apush yana niina senchijinash iwaintuke?” tawa nu betek uminkauwai.

<sup>39</sup>Aatus nunidau asag dekaskeapi tumain dekapenachu. Tuja junashkam Isaías agak:

<sup>40</sup>“Apajuí, nu aents aidauanak anentaimtanash anentaimainchau emakbau asag, jiinchakam epetkamua numamtin ainawai.

Nuninchau ainakug mina chichamjun antukag pujutjin yapajinakuig, wi ditanak uwemtikmainaitjai”, tiuwai.

<sup>41</sup>Isaías juna tiuwa nunak, Jisusa imanjin wainkau asa, niina pachis tiuwai.

<sup>42</sup>Tujashkam kuashat aents aidau, nuigtú apu aidaushkam Jisusnak dekaskeapi tiajui. Nuninajash fariseon ishamainak iwainmainachu, ditá ijuntajjin tuke jiyaku jiyaam aig tusag. <sup>43</sup>Nunak aents eme anenkagtamua nuna imá senchi wakegainak, Apajuí dekas eme anentam amaina nunak imanchau anentuinak nunikajui.

### **Jisus aentsun uwemtijatasan tauwaitjai tibau**

<sup>44</sup>Jisus senchi jiiká chichaak: “Aents mina dekaskeapi tujutuina duka, mina

Apag awetiuwa nunashkam dekaskeapi tuinawai. <sup>45</sup>Tuja mina waituina duka, mina awetiuwa nunashkam wainainawai. <sup>46</sup>Wika ju nugka juwig tsaptinnum wainmatiamana numamtuk aents aidau dekamtikatasan taamjai, mina dekaskeapi tusa nemagtuidauk suwenum wekagu wajukmaina numamtuk tudaunak takaa batsaminum tusan. <sup>47</sup>Aents mina chichamjun antayatak umigtachunak wika bakushtajai; wika aents aidau bakutasanuk juwig taachmajai, aentsun uwemtikatasan taamjai. <sup>48</sup>Mina dakitjak, chichamjunash betek umiachun bakutnuk awai, chicham wi tukagtimag nunuwai tsawan nagkanbaunum bakujattinuk. <sup>49</sup>Wika wi wakegamunak chichaatsjai, Apag mina awetiuwa nunú chichagkagtukta, nuniakum jintinkagtuata tujutbaun tajai. <sup>50</sup>Nuaduí wika mina Apag umiktajum tukagtimua duka, pujut tuke atina nunap sukagtawa tajai. Tau asan wi atumin ujaajim, nunashkam mina Apag tujutmawa dutiksanuk ujaajime”, tiuwai.

### **Jisus ni jintintajji aidau nawe nijatkamu**

**13** <sup>1</sup>Pascua jegatin tikiju wajasú ai, Jisus ni Apajin wegaku ju nugka ukuktinjin dekau asa, ni jintintajji aidau nagkamsa aneejakbaujin iwaintukui, wetatak pujusash imatiksaik aneamujin.

<sup>2</sup>Nunik yujumkan yuwinak pekaamsamunum Judas Iscariote Simogkan uchijiya nuna, Jisus sujutnum iwanch anentaimtijuawai. <sup>3</sup>Tuja Jisusak Apajuijai pujau taamujinak dekau, nunisag dekau ataktú Apajuiyai wakitkitnujin, nuigtú niina Apají senchimtika: Ashí ame diistá, tusa idaitusbauwa nunashkam. <sup>4</sup>Nunia asa yujumak yuwaku pekagbaunum Jisus wajakí, awantak pataká nugkuagbaujin

awimak toalla juki akachuma wajantuí,  
<sup>5</sup>nunik mantignum yumin yajaa apujus,  
 niina jintintaiji aidau nawe nijattan  
 nagkama nijatuk, toalla akachumamun  
 juki ujugtuk emau.

<sup>6</sup>Dutikak Simón Pedronashkam  
 jegantun, nawe nijatjata tama:

—Apuh, amek ibauwaitkumek mina  
 dawejuk nijatjumaitsume, —tau.

<sup>7</sup>Tutai Jisus ayaak:

—Yamaikik wi juna jutikag juka  
 dekatsme, tujash duwi dekaattame,  
 —tiuwai.

<sup>8</sup>Tusa tama Pedro chichaak:

—Apuh, amek mina dawejuk tuke  
 nijatjugchattame, —tiuwai.

Tutai Jisus ayaak:

—Amina nawemin wi nijagchamtaig,  
 amek wijaig ijunmaitsume, —tau.

<sup>9</sup>Tama Simón Pedro chichaak:

—iUntsu apuh, imá dawejuk nijatsuk,  
 uwejush nijatjakum, buukeagshakam  
 nijatjugta! —tiuwai.

<sup>10</sup>Tutai Jisus ayaak:

—Yamá mainuk pata patakag maak  
 pujumaitsumi tsuwatjin ajapau asa, ayatak  
 naweeg nijatam amainai, anmamtuk  
 atumek tsuwatchau ainagme, tujash ashí  
 tsuwatchauk ainatsjume, —tiuwai.

<sup>11</sup>“Ashí tsuwatchauk ainatsjume”,  
 tiuwa nunak aents niina sujuktin jutiijai  
 pachitkau asantai wainu asa, tiuwai.

<sup>12</sup>Nuna ti ashí niina jintintaijin nawen  
 nijatuk, Jisus ataktú ni awantak pataká  
 nugkutaijin nugkujá mesanum jegantá  
 ekeemas:

—¿Wi juna jutikajim dusha atumesh  
 shiijak dekajum? <sup>13</sup>Atum mina: Jintinkag-  
 tinú, Apú, tujutjum duka dekas iman asamtai  
 tujutjume. <sup>14</sup>Wi Jintinkagtin, Aputnash  
 Aputkun atumin nawemin nijatjajim  
 antsagmek, atumesh atumin kakagchajum  
 pempeentunikjum iwaintuniktajum. <sup>15</sup>Junak  
 atumin ditash juna wainkaja jutiksag  
 takastinme tusan iwaintakun aikajime.

<sup>16</sup>Dekas tajime: Inakak apujin nagkaesau-  
 chui, tuja awemamua dushakam  
 awakagtiuwa nuna nagkaesachui. <sup>17</sup>Juna  
 wi tajim jujú shiig dekaajum, atumesh  
 umiktasajum takaagtaik, Apajú shiig aneas  
 pujustinme tusa yaimpaktatjume.

<sup>18</sup>“Tujash junak ashí atumin takun  
 tatsujime. Wika shiig dekajime atumnak  
 wi etegjau asan, nunin aigkish duwik  
 Apajú chichame agagbauwa nui: ‘Wijai  
 ijunag yuwina nuwiyag pempeentugkiag  
 sujutkagtinai’, tibuwa nunash dekajai.

<sup>19</sup>Nuniyatkun junak uajime, nu tsawan  
 jegakui dekas Apajú Uchijimpapita  
 tujutminjum tau asan. <sup>20</sup>Dekas tajime: Wi  
 awemamun dakittsuk juwauk, mina  
 jujuinawai. Untsu mina jujuina duka, mina  
 awetiuwa nuna juwinawai.”

#### Jisus Judas sujum atin etsegkamu

(Mt. 26.20-25; Mr. 14.17-21;

Lc. 22.21-23)

<sup>21</sup>Jisus nuna ti senchi wake besemag  
 dekapeg, ashí antuinamunum paan  
 iwainak:

—Dekas tajime: Atum ainajum  
 juwiyag makichik minak sujutkattawai,  
 —tau.

<sup>22</sup>Nuna timatai niina jintintaiji aidaush-  
 kam yana takug tawa tusag, mai niinia,  
 mai niinia wajaidau. <sup>23</sup>Nuniai niina  
 jintintaiji aina nuwiya, makichik Jisusa  
 aneetaiyya nunú yujumak yuwamunum  
 Jisusai ayaumas yuwak eketu. <sup>24</sup>Nunitta-  
 man Simón Pedro tutaya nu: Ame iniasta,  
 tusa iwijau. <sup>25</sup>Dutikam ni Jisusan:

—¿Apuh, dusha yaita? —tusa iniau.

<sup>26</sup>Tama Jisus ayaak:

—Yana wi pagkan uchutuan susattaja  
 nunú atatui.

Tusa pagkan puuk juki uchutua Judas  
 Iscariote Simogkan uchijiyi nuna  
 susauwai. <sup>27</sup>Nuna dutika suwaig  
 wamkes Judasan iwanch egkemtujui.  
 Dutikamtai Jisus chichajak:

—Ame dutikata tame duka wamkesam dutikata, —tiuwai.

<sup>28</sup>Nuna tutaishkam makichkish anentaimtugchajui, ni sujam atinum takumpap tawa tusajag. <sup>29</sup>Judas kuichkin kuitamin asa, kuichik chimpitain takaku asamtai, tikich anentaimsajag jista atinum atumna nu sumakta tusampash tawa, nuniachkush ujunauch aidau susata tusampash tawa, tiaju.

<sup>30</sup>Tama Judaschakam pagkan waujusyuwa jinkiuwai. Nunak kashi nunikui.

#### Yamajam chicham umiktin tibau

<sup>31</sup>Judas jiinki wematai Jisus chichaak:

—Apajuí senchigtina nunak, wi Apajuí Uchijiyaitkun Aentsmaga Akiinauwaitag duwi dekaawagtatui, nunak wi nuniktatag nuna wainainak Apajuinak eme anentiagtatui. <sup>32</sup>Wi niinak puyatjusa umigkamu asa, yaunchuk wi aajakbaujua nunak imanuk etittawai. <sup>33</sup>Uchuchig aidauh, atumjai ijunjanuk kuashat tsawantaik pujushtatjai. Judío aidau: Egatkugmesh waitkashtajume, timag dutiksanut atumnashkam tajime. Atumek wi wegamunmag yamaikik minimain ainatsjume. <sup>34</sup>Chicham umiktajum tibaun yamai wishakam tajime. Ashí iikdaisajum makí makichik aneeniamu iwaintuniktajum. Wi atum aneamujun iwaintukjim aikasjume atumshakam tikichjaish iikdaisajum aneenimain ainagme. <sup>35</sup>Atum aaja pempeentunikjum aneediagtaik, dekas Jisusa jintintaijimpap ainawa tujabiagtin ainawai, —tiuwai.

#### Jisus Pedron uugtuktatme tusa ujakbau

(Mt. 26.31-35; Mr. 14.27-31; Lc. 22.31-38)

<sup>36</sup>Nuna tutai Simón Pedro iniak:

—Apuh, ¿tuwí wetatme? —tau.

Tama:

—Wi wetatag nuwig yamaikik minimain ainatsjume, tujash duwi pujusjum minitin ainagme, —tiu.

<sup>37</sup>Tutai Pedro ayaak:

—Apuh, ¿wagka yamaikish minimainchawaitja? Wishakam amijai jakatasan umintsan wekaejai, —tau.

<sup>38</sup>Tutai Jisus ayaak:

—¿Dekaskek wijai mantamnatasam umintsam wekagam? Dekas tajame: Eke atash shinatsaig kauptumá: ‘Wika Jisusnak waintsamjai tujuttatme’, —tiuwai.

#### Mina Apag pujamunum wenu ataktú taakun jukitjime tibau

**14** <sup>1</sup>Nuna ti: “Atumek wi tajim nunú anentaimtakjum wake besemag pujuigpajum. Apajuyiaig dekaskeapi tusajum imá senchi anentaimkujum, minaiskam imanisjumek anentaimtajum. <sup>2</sup>Nayaimpinmag mina Apag pujamunmag kuashat agkan awai atum pujumainuk. Nu achakuig ujamaitsujime. Nu iman au asamtai, wi atum pujustinnak umigkatjime tusan wegajai. <sup>3</sup>Yamai wenu atum pujustinun umikan, ataktú waketsanut taattajai, mina pujutajui pujustajum tusan atumin juwakun. <sup>4</sup>Atumek wi tuwí wegaja duka dekagme, nuniau asajum jintashkam wainjume, wajuk wi pujamunmash wamainaitjume dushakam.”

<sup>5</sup>Tutai Tomás:

—Apuh, ame wegamuk dekatsug aniautish, ¿wajuk dekaik minitji? —tau.

<sup>6</sup>Tutai Jisus ayaak:

—Witjai jinta numamtinnuk, tuja dekasketnash wikitjai, nuigtushkam wikitjai pujujnash sukagtinnuk. Imá minaig kajinas anentaimaina duke mina Apajuig jegamain ainawai. <sup>7</sup>Atum wi yaitja nunú shiig dekagkugmek, mina Apagshakam aikasjume dekamain ainagme. Yamaiya juwikiuch mina waitjum nunisjume mina Apagshakam wainjume, —tau.



<sup>8</sup>Tutai Felipe chichaak:

—Apuh, Apa iwainkagtukta, nu wainká maak juwakagmi, —tiuwai.

<sup>9</sup>Tama Jisus ayaak: Felipeh, tuke atum wijai ijunjajum batsamin ainayat-kugmesh, ¿eke shiig dekaagsumek? Mina shiig dekajuina duka, Apagnash-kam aikasag dekainawai. Nuniaish, ¿wagka Apa iwaintugkata wainkatjai, tame? <sup>10</sup>¿Dekaskeapi tujutsumek wi mina Apagjai makichik aentsua numam-tinaitag duka? Wi tajim nunak nuigtú iwaintajim nunashkam wi wakegamug-nakek dutikatsjai. Mina Apag dutikata tibaun iwaintajime. <sup>11</sup>Wi mina Apagjai pujau asamtai, mina Apag minai pujawai taja duka dekaskeapi titajum. Nu dekaskeapi tichamin dekapeakju-mesh, wi takaamu wainkugmekesh, dekaskeapi tujuttsajum dekapjustajum.

<sup>12</sup>Dekas tajime: Mina dekas Apajuin Uchijimpapita tusag umigtuidauk, ditashkam wi takaag juní nagkaemas takasagtin ainawai, wi mina Apag pujamunum wemataishkam. Awi wakan atumin pachisan Apajun segattajime, ni atumin yaimpaktinme tusan. <sup>13</sup>Atum ashí atsumamu pachisjum, mina Apajush wakegamu, wisha wakegamua nu segatkugminig, imatiksanuk amastat-jime, mina Apagnash shiig emematiag-tinme tusan. <sup>14</sup>Atum mina pachittsajum dekaskeapi tusajum, ashí atsumamu segatkugminig imatiksanuk umiktatjai.

**Wakaní Pegkejin awetittajime tusa  
Jisus anagkagtuamu**

<sup>15</sup>“Atum mina anenkugmek, wi chicham umiktajum tajim nunú betek umiktajum. <sup>16</sup>Dutika umigtakjuminig Apajun segattajai, atumiin pujus tuke ichichtamtina nuna Wakaní Pegkejin awetugmati tusan. <sup>17</sup>Nunú Wakaní Pegkeji dekaskea nunak jintinkagtina nunak, aents mina umigtuchu aidauk

jumain ainatsui, waintanash wainchau asag, ni tabaunash dekamainchau ainawai. Tujash atumek wainjume, nigka atumiin pujau asa, aantsag tuke atuminig pujutnai.

<sup>18</sup>“Tuke bitaika numamtukek ukukchatnaitjime, waketjusnuk ataktú tajuatnaitjime. <sup>19</sup>Machik asa mina umigtuinatsu duka waitkachagatui, tujash atumek waitkattajume mantua-wagmatai aneantatag duwi. Witjai pujutan sukagtinnuk, nunin asamtai atumshakam tuke wijaig batsamtin ainagme. <sup>20</sup>Tujash nu tsawan jegattawai, nunikmatai shiig dekattagme, wi mina Apagjai makichik aentsua nuninaitag duka, antsagmek wi atumjai ijutkau pujamushkam. <sup>21</sup>Aents wi chicham umiktajum timawa nuna umiakug dekas mina anentak nuniawai. Nuna nuniaun mina Apagshakam aneettawai. Aikasnuk wishakam aneettajai, dutikamu asajum aan nagkaemasjum shiig dekajuattagme.”

<sup>22</sup>Tutai Judas (Iscariotechu) chichaak:

—Apuh, ¿amina nemagtamchau aidauk wantiintutskesh itusamea imá jutiikesh wantinkagtuktatme? —tau.

<sup>23</sup>Tama Jisus ayaak:

—Mina anentuk wi taja nuna umiktatui; nudiaun mina Apajuk aneettawai. Dutikakui, wishakam mina Apagjai niina anentain tajuan tuke pujustinaitjai. <sup>24</sup>Untsu mina anenchau wi taja nunak umigtukchattawai. Atumin wi tajim duka mina chichamjuchui, Apag mina awetiuiwa nuna chichamegai.

<sup>25</sup>“Junak atumjai pujag juwik ashí ujajime. <sup>26</sup>Tujash wi mina Apajun segattajai Wakaní Pegkeji atumi ichichtamjatnun awetugmati tusan, nunú wi wemataish yaimpaktatjume nuniak jintinjamattajume, nuigtushkam ashí wi jintintuajim nunashkam anemti-jamjattagme.

### Jisus akatmamku tibau

<sup>27</sup>“Shiig agkan anentaimesa pujutan ukugjime. Wi shiig agkan anentaimesan pujutajua nuna amajime, wika ju nugkanmaya shiig aneetan sukagtina nujai beteknak amatsjime. Nu uyumak-jum anentaimekum ishamá pujuigpa-jum. <sup>28</sup>Wika wegajai, nuniknush wakettisanuk atumjai pujustasan tajuattajime, tabaushkam antugtuk-maugme. Dekas mina shiig anenkug-mek, wi Apag mina nagkaetasu asamtai, nui wegajai tabaug antugtakjume shiig aneemain ainagme. <sup>29</sup>Junak emtikan tajime, nu uminu wainkujum dekaskeapi timinjum tusan.

<sup>30</sup>“Atumjaig kuashat chichaa pujush-tatjai, ju nugka juna apuji iwanch midau asamtai, nigka mina depetumain-jig senchijig atsujuu. <sup>31</sup>Tujash mina Apag tabaun umigkattajai, wi mina Apag aneamujun ashí dekaatnume tau asan.

“Wajagtajum, juka ukuaku wegagmi.

### Jisus wika uva numijiya numamtainitjai tibau

**15** <sup>1</sup>“Witjai dekas uva numijiya numamtinnuk, untsu mina Apajui ajakan kuitamna numamtina duka. <sup>2</sup>Mina kanaweg nejeachunak tsupiwai, untsu nejeaunak, jegamujinak asantak kuitamui aan nagkaemas nejektí, tusa. <sup>3</sup>Atumek wi jintintuamjim nu umiau asajum, ajak jeeshji asanjamua numamtin ainagme. <sup>4</sup>Wi atumjai ijuntsan pujag antsagmek atumshakam wijaig ijutkau atajum. Ajakan kanawe, numijin achitkachu nigki kanakí auk nejemaitsui. Atumshakam numamtuk wijai ijutkau achakjume pegkeg aina duka iwainamaitisugme.

<sup>5</sup>“Witjai dekas uva numijiya numam-tinnuk. Atumek mina kadaujua numam-tin ainagme. Wijai shiig ijutkauwa nunú

pegkeg aidaunak iwainamainai. Atumek wijai ijutkau achakjume Apag wakega-mua duka makichkish dutikmain ainatsjume. <sup>6</sup>Makichkitigmekesh wijai ijutkau achakjume, numí kanawe nejeachu asamtai tsupika ajapamu kukagmatai apetiama numamtuk awajam atinaitjume.

<sup>7</sup>“Tujash atum wijaig ijutkau pujakjum, wi ashí jintintuajim dushakam betek umiakjume atum atsumamu segattajum, nuniakjuminig ashí amastinaitjime. <sup>8</sup>Atum pegkeg takaamu aina duke iwainagtaik, tikich aidaush mina Apagnash shiig emema-tiagtatui, nuninak dekas mina jintintaig ainajum nunashkam dekagmawagtatui.

### Jisus niina jintintaiji aidaun, mina kumpag ainagme tibau

<sup>9</sup>“Apag mina anenta aikasnuk atumnashkam anejime. Wi anejim antsagmek atumshakam aneenitajum. <sup>10</sup>Wi chicham umiktinun ukugjim ju umiakjuminig wishakam aneettajime, wi mina Apajun chichamen umiju asamtai, ni anenta aikasnuk.

<sup>11</sup>“Juna wi tajim nunak wijai betekak shiig aneasag dakujus pujustinme tusan tajime. <sup>12</sup>Chicham umiktajum tibaun wi patasnuk tajim duka: Mina nemagtin aidautigmek pempentunisjume aneenitajum, wi atumin anejim antsagmek, tajim nuuwai. <sup>13</sup>Makichik aents ni kumpajin ayamjuktatus mantamna nu iwainawai senchi anejata nunak, nu anejata nuna nagkaesau anejatmainuk atsawai. <sup>14</sup>Atum wi tajim nu imatiksagmek umiautigme mina kumpag ainagme. <sup>15</sup>Nuniau asagmin wika inak ainagme tumaitisujime. Inakak apuji takaamujinak ashí dekagchau ainawai. Wika atumnak kumpag ainagme tajime, mina Apag tujutbaunak ashí ujakjim nuaduí.

<sup>16</sup>Atum minak etegtuachu ainagme, witjai atumin etegjaunuk, dutikau asan mina chichameg etsegkujum, ajak senchi nejegama numamtuk wajaktajum timajim duka ajumaish tuke atinai. Nuaduí atum atsumamujum mina pachittsajum mina Apag segamak amasagtinai. <sup>17</sup>Yaunchuk timajim dutiksanuk tajime: Mina nemagtin aidautigmek pempentunisjumek aneenitajum.

**Tikich aents aidauk  
kajegtamiagtinai Jisus tibau**

<sup>18</sup>“Aents mina nemagtuchu aidau, atum mina nemagtau asagmin kajegta-mainakuish, adeagtajum, mina dekas nagkamchakug kajegtuku ainawai. <sup>19</sup>Atum ditajai betek agtaik, dita aneenina aikagmasajag anempamain ainagme. Tujash wi atumnak dita aina nunin ainum tusan etegjan midau emakbau asajum, ditajai betekchau ainajum duwi kajegtamainawai. <sup>20</sup>Wi, ‘inakak apujin nagkaesachui’ timajim duka aneaku atajum. Mina waitkagsaju aina dutiksajag atumnashkam waitkag-masagtinai. Mina chichamjun antugtu-kag umiidauk atum etsegbaun antuina-kush, dutiksag umikagtatui. <sup>21</sup>Nunak mina nemagtuidau asagmin imatijabiag-tinai, mina Apag awetiuwa nuna dekajuinachu asag. <sup>22</sup>“Wi juwi taan chichaman etsegka-chuitkuig ditá tudaujinig bakumamain-chau ainawai. Tujash yamaik mina chichamjun antukaju asag, wika dekachu asan tudaunak takaayajai tumain ainatsui. <sup>23</sup>Mina kajegtuidauk mina Apagnashkam kajeguinaawai. <sup>24</sup>Wi iwainajan dita wainainai tikichish dutikmainchaun takaschauwaitkuig bakumamain ainatsui. Tujash wi iwainaja takaamun wainainayatak ayatak kajegtuinak, mina Apagnashkam

kajeguidau asag bakumagtinai. <sup>25</sup>Nunak dita chicham umiktinjin agagbauwa nui: ‘Wainak kajegtukagtinai’, tawa nunú uminu asamtai aikajuinawai.

<sup>26</sup>“Tujash wi mina Apajuiyan Wakaní Pegkeji dekaskea nuna jintinkagtinun awemattag nunú atumnak yaimpaktat-jume, dutikak mina pachittsash shiig dekamtijamattagme. <sup>27</sup>Dutijamainakui atumshakam yama nagkamawaik tuke wijaig batsamsau asajum, mina pachittsajum tikich aidaush ujaktat-jume.

**16** <sup>1</sup>“Nuna wi jintintuajim nunak minai kajintsá anentaimat megkaekaijum tabaunum tajime. <sup>2</sup>Tsawan jegataik jega ijuntainum wayaagminish agaa jigmagtin ainawai, dutijamawag mantamainak: Juka Apajui wakegamu takaju asá jutikaji, tiagtinai. <sup>3</sup>Nunak mina Apagnash, minashkam shiig dekajuachaju asag dutijamiagtinai. <sup>4</sup>Juna tajim nunak, nu tsawan jegagtam-kujaish wi tibauwa nu adeagminjum tusan ujajime.

**Wakaní Pegkeji jintinjamattajume  
Jisus tibau**

“Junak yaunchkek tichamiajime atumjai pujau asan. <sup>5</sup>Tujash yamaik mina awetiuwa nujai pujustasan wegajai, makichkitigmekesh tuwí wegame tusagmekesh inintsachugme, <sup>6</sup>wi nuna takui ayatak wake besemag pegajume. <sup>7</sup>Tujash dekaskea nuna tajime: Dekas wi juwi pujutsuk wegamu nu imá pegkejai. Wi wechataik, atumin yaimpak anentain ichichtugmamaina duka tajutjamai-tsugme. Nuaduí wi wenu nunak awetittajime. <sup>8</sup>Dutikam Wakaní Pegkeji taa, aents aidau ditá tudaujin paan dekamtikattawai, pegkeg takata nuna, nuigtú aents aidau tudau takaidaun Apajui suwimkan susatna nunashkam.

<sup>9</sup>Tudau takaina duka, mina dekas Apajuí Uchijimpapita tujutuinaats nu ainawai. <sup>10</sup>Wi pegkejan takaunuk mina Apajuí wetatjai, nunikmataig ataktuk waitkashtatjume. <sup>11</sup>Wakaní Pegkejiya duke Apajuí ju nugka juna apujin suwimkan susatna nunash dekamtikattawai.

<sup>12</sup>“Atumin ujamainjuk juní kuashat ajutui, tujash atumek yamaikik ashí dekamain ainatsjume. <sup>13</sup>Tujash Wakaní Pegkeji dekaskea nunak chichauwa nunú, ashí dekaskea nunak jintinjamattajume. Nigka ni wakegamujinak chichatsuk, mina Apagdaun antukbaujin, atak agtina nunashkam dekamtijamattajume. <sup>14</sup>Wakaní Pegkejiya nu mina imanua nunak iwaintugmak, imá midaunmayanak atumnak dekamtijamattagme. <sup>15</sup>Ashí mina Apagdauwa duka midau ainawai. Nuaduí Wakaní Pegkeji imá midaunmayanak atumnak dekamtijamattawai taja nunak tajime.

**Wake besemag pujamu shiig  
aneastinaitjume Jisus tibau**

<sup>16</sup>“Wajumak tsawantai minak waitkashtatjume, nunikjum dukapech tsawan asajum ataktú waitkattagme, eke mina Apajuí wegatsaig.”

<sup>17</sup>Nuna tutai niina jintintaiji aidau ditak pempeentunikiag iniininak:

—¿Wajuk nunash takua, wajumak tsawantai minak waitkashtatjume, nunikjum dukapech tsawan asajum ataktú waitkattagme, eke mina Apajuí wegatsaig tujamji? <sup>18</sup>¿Wajina takua: Wajumak tsawan asajum tujama nunash tawa? Wajuk takus tawa dekamaitui, —tuidau.

<sup>19</sup>Nuna tusag dekas iniasmi tusag anentaimiagtatman Jisus wainak:

—Atumin wi chichagkun: Wajumak tsawantai waitkashtatjume, nunikjum dukapech tsawan asajum ataktú

waitkattagme, tajim duká, ¿atumek pempentunikjum iniininajum? <sup>20</sup>Dekas tajime: Atumek wake besemag anentaimtugkujum buuttatjume, nuniagmin aents pegkegchau aina duka shiig aneeniagtatui mina mantuinak. Nuninai atumshakam wake besemag pujamugmik sakapakjum ataktú shiig aneestatjume, wi nantakin wantintuktatjim duwi. <sup>21</sup>Nuwa uchigmatji jegagmak najaimak wake besemag pujuwame, nuniau uchin uchigmak shiig aneak najaimajakbaujinak kajimatame. <sup>22</sup>Anmamtuk atumshakam yamaikik buuttatjume, nuniagmin ataktú wi wantinkamtai waitkajum, atumi anentaiminish shiig aneasjum dakujustatjume, nu dakujutnak makichkish emegkatjamain ainatsui.

<sup>23</sup>“Nunú tsawantaik makichkitigmesh inintsashtin ainagme. Dekas tajime: Mina pachittsajum mina Apag segamak, mina jintintaig asagmin ashí amastatjume. <sup>24</sup>Duwikik atumek minak eme anenjusjumek mina Apajuk segachuitjume. Tujash yamaik segatajum, mina Apag yaimpakui shiig aneasminjum.

**Jisusai ju nugkanmayan  
ashí depetkauk**

<sup>25</sup>“Yaunchkek atumnak augmatbaujai apattsan tuké jintinnujime. Tujash tsawan jegattawai, wi shiig paan mina Apajun pachisan ujaktatjim nunú. <sup>26</sup>Nunikmatai atumek tutupit mina pachittsajum Apag segatajum, wika atumi pachisnuk segatú pujugchattajime. <sup>27</sup>Apajuk tuké atumnak anempajume, atum mina anentu asagmin, nuigtushkam Apajuí dekas awemamuapita tujutjum duwi. <sup>28</sup>Wika Apagjai pujaun ju nugka juwig tauwaitjai, nunikun yamaik ju nugka junak ukuakun ataktú mina Apajuí wegajai.”

<sup>29</sup>Tutai niina jintintaiji aidau chichajak:

—Yamaik augmatbaujai apatka tutsuk shiig antumain tukagtiume. <sup>30</sup>Yamaik dekaji amek ashí dekame, nunin asam jutii anentaibaushkam shiig dekame, nuniau asam atsumatsme dita anentai-baujin tujuttinme tusamek. Nuaduí jutiiik dekas Apajuiyap awemauwaita tuinaji, —tuidau.

<sup>31</sup>Nuna tiagtai Jisus ayaak:

—¿Yamá dekaskeapi tujutjumeK?

<sup>32</sup>Tujash yamaik tsawantak jegae, atum makí makichik kanagjum shimakjum, imá minakeuch ukugkittajum nunú. Tujash imá wikik juwakchattajai, mina Apag wijaig pujawai. <sup>33</sup>Junak wika atumek wijai ijutkau batsatkujum, shiig agkan anentaimsajum pujusminjum tusan tajime. Ju nugka juwi pujusjumeK kuashat waitiamu igkugtinaitjume, tujash nuniakjumesH minai kajintsá anentaimsatajum, ju nugka juwi iwanch pegkegchaun takantikagtina nunak wi depetkajai.

#### Jisus niinu pachisa Apajuí segamú

**17** <sup>1</sup>Nuna ti idayak Jisus nayaimpinum pagkai: “Apawah, minak tsawantak umintugkae. Minash ememattai etita aents aidaushkam: Dekas Apajuin Uchijimpapita, tusag dekaJuanume. Wishakam aminash dutiksanuk aents aidaunmash iwainaktajame, emematjamiagtinme tusan. <sup>2</sup>Ame minak ashí nugkanmaya aina nunak, nigki diistí tusam idaitugsauwe, dutikakum senchigmishkam sujusmauwe, mina nemagtin aidau ame sujusmauwa nunash pujut nagkanchaun susati tusam. <sup>3</sup>Nu pujut nagkanchauwa nunak, amina dekaGmawag: Imá jukeapita dekas Apajuik, tujamainak, ame mina awetiuwaitam nunashkam: Dekas juwap uwemtikagtumainaita, tuidau jukiagtinaí.

<sup>4</sup>“Wika ju nugka juwi pujusnuk emematjame aminak, nuniakun ame umiktá tusam tujutiuiwaitam nunash

imatiksanuk takaakun dekamtikajai aents aidau emematjamtinme tusan.

<sup>5</sup>Apawah, yamaik ame minash yaunchuk nugkash najannatsaig amijai emematjain ajabia imanuk etita.

#### Jisus ni jintintaiji aidaun segatbau

<sup>6</sup>“Ame ju aents aidau etegjam sujusuitam nunak, wishakam amina pachisnuk shiig jintintuawagjai. Duka aminuk sujusuitme, dutikamu asag ditashkam chichamjumnak betek umigtamainawai. <sup>7</sup>Nunidau asag yamaik ashí wi takasbaug aina nunak shiig dekaawaje, dekas Apajuí dutikata tibaunak betekap takasé, tusag. <sup>8</sup>Aikasnuk ame mina chicham etsegtugkata tusam tujutbau-nak imatiksanuk ujakagmajai, dutikam ditashkam wakejus antukagmae nuninak: Dekas Apajuí awemamuap tauwaita, tusag dekaskeapi tujutuina-wai.

<sup>9</sup>“Duwi ditanun pachisan segagme aminu asagmatai, tikich aents mina nemagtuinatsu nuna pachisnuk segatsjame. <sup>10</sup>Ashí aents midau aina duka aminu ainawai, tujamtai aminu aidauk midau ainawai. Nunú aidau mina emematjuinawai, tikich aidaushkam Jisusa imanjin wainkatnume tusag.

<sup>11</sup>“Wika aminí minau asan ju nugka juwig nuigtuk pujushtatjai, tujash jujú aidauk juwainawai. Apawah pegkegmah, amina senchijum sujusbauwai wi kuitamag aikasmek kuitamkata. Iina umigtamainak ii makichik anentaimag nunisag ditashkam anentaimitinme. <sup>12</sup>Wi ju nugka juwi ditajai pujaknuk, ame senchijum sujusbauwai ditanak kuitam-nujai, makichkish emegkatkachjame, dutikamaitak makichik megkaekae, yaunchuk chicham agagbauwa nu uminu asamtai.

<sup>13</sup>“Nunikmataish ditak shiig aneetnume, wi shiig aneag imanisajag

tusan, eke anuí minitsuk segajame.

<sup>14</sup>Amina chichamjumnashkam jintintuawagmajai, dutikai aents aidau ditanak kajejuinawai. Wi ju nugka juwiyachuitag ditash nuninuk asagmatai. <sup>15</sup>Nunú aents aidaujai ijunag batsamsainum ditash batsasta tusanuk segatsjame, iwanch waitkainakuish ayamjukta tusan segajame. <sup>16</sup>Wi ju nugkanmayachuitag nunisag ditashkam juwiyachu ainawai. <sup>17</sup>Amina chichamjum dekaskea nunak umigtamkatnume ditash pegkeemtikata. <sup>18</sup>Ditanak aents katsek aidau batsatbaunum ishimjai, chichamjumin jintinkagtuatnume tusan, ame mina awetiuwaitam dutiksanuk. <sup>19</sup>Wi amina takagkun mina pujutjunak ashí idaitusjame, nunisag ditashkam aminu dekaskea nuna takagtamainak, ashí ditá pujutjinak idaitugmastinme tusan wakegajai.

**Jisus ashí niina  
nemajin agtin segatbau**

<sup>20</sup>“Imá jujú aidaunakek segatsjame, dita chicham etsejuinamun antuinak: Dekas nigkiap uwemtikagtumainaita, tusag nemagtukagtin aidaun pachisnushkam segajame. <sup>21</sup>Wi amijai ijutkau asamtai, ameshkam minai ijutkam nunisag, ditashkam pempentunisag ijutkau atinme, nuninak jutiijaish ijutkau asag makichik agtinme. Nuniagtai aents amina dekaskeapi tujamchau aidaush, ame mina awetiuwaitam nunash dekajuatnume, tusan segajame. <sup>22</sup>Dutiksanuk amina imanjum inagkeatjukiuwaitam nunak, imatiksasuk ditanashkam wisha inagkeatkijai, ii makichik duke anentaimag nunisajag, ditashkam nuninuk agtinme tau asan. <sup>23</sup>Wi ditajaig ajai, ame wijai ame, nunisag ditashkam makichkiuchia nunin agtinme. Nu dita nuninamun wainainak aents amina dakitjamin aidaush:

Jisusnak dekas Apajuiyap awemauwaita, juna anea imatiksagkeap jutiinash anempaji, titinme.

<sup>24</sup>“Apawah, ame sujusbau aina nunak mina pujutaijui ditash pujusag, nugkash najannatsaig ame mina anentujakú asam, amina imanjum ashí mina sujusum nunash wainkatin atinme tusan wakegajai. <sup>25</sup>Apag pegkegmah, aents amina dekaskeapi tus umigtamainachuk dekagmainatsui, tujash wika aminak wainjame, ju ame sujusbau aina jushakam ame mina awetiuwaitam nunak dekainawai. <sup>26</sup>Wi amina pachisnuk ditanak shiig dekamtikamjai, aan nagkaemasnush tuke dekamtik-sanké atatjai, ame mina anentam aantsag ditaish atí, nuniakuí jutiishkam ditajai ijutkau amí tau asan”, Jisus tiuwai Apajin segaak.

**Jisus achikbau**

(Mt. 26.47-56; Mr. 14.43-52;  
Lc. 22.47-53)

**18** <sup>1</sup>Jisus nuna ti inagnak, niina jintintaiji aidaun yajuak jiinki entsa Cedrón tutai amain katigká, numi olivos tutai ajakbaunum jegantaju. <sup>2</sup>Judas Jisusan sujuktinchakam nunak shiig dekau, nui Jisus ditajai kuashtá ijunin asamtai. <sup>3</sup>Nunin asa Judas, kuashtat suntag Romanmaya aidaun yajuak, nuigtú sacerdote apuji, fariseo aidau ditashkam, jega Apajú emematain kuitamin aidau ishiakbaujai, lamparan, nuigtú jii ekemajag, nagkin tinamdaekag, Jisusan kautuawajui. <sup>4</sup>Imaninaig Jisusak ni dutikam atinjinak shiig dekagmamusa asa, paan ditá emtin wajantá:

—¿Ya egagme? —tiuwai.

<sup>5</sup>Tuinam dita aiinak:

—Jisus Nazaretnumiaya nu egainaji.

Tiagtai Jisus ayaak:

—Witjai nunak, —tumabiuwai.

Judas Jisusan unupiaagtatus wekagushkam, nui ditajai ijutkau asa, <sup>6</sup>Jisus: “Witjai”, tutai puyatkag waketsags nugkaa kakekaju. <sup>7</sup>Nunikagmatai awentsag:

—¿Ya egagme? —tiuwai.

Tutai dita aiinak:

—Jisus Nazaretnumiaya nu egaji.

<sup>8</sup>Tiagtai Jisus ayaak:

—Yaunchuk witjai timajim jama, mina dekas achigkatasa egatkugmek, tikich aina juka idaisatajum, wetinme, —tiuwai.

<sup>9</sup>Nunak Jisus Apajin segaak:

“Apawah, ame sujusbaunak makichkish emegkatkachjame” tiuwa nu betek uminu asamtai tiuwai. <sup>10</sup>Nuna tusa taig Simón Pedro tutaiya nu, espada akachumamujin ukuini juwakug, dekas sumo sacerdote inake Malco daagtinun kuwishí untsujiya nuna asankauwai.

<sup>11</sup>Dutiktai Jisus Pedron chichajak:

—Espadajum jukim awajata, ¿amek, mina Apag waittsati tujutbauwa nunak umimainchawk anentaimtujam? —tiu.

#### Jisus Anasa jeen ejegamu

<sup>12</sup>Nuna tusa taig suntag aidau, ditá capitanji, nuigtú jega Apajuí ememattain kuitamin aidaujai ijuntujag Jisusan achikag jigkajajui. <sup>13</sup>Dutikawag Anasa jeen ejegawajui Caifasa wegajin, nu mijantinig Caifás sumo sacerdote wajas pujau asamtai. <sup>14</sup>Nunú Caifás judío aidaun chichajak: “Ashí aentsun ayamjuk uwemtijatnuk, dekas makichik aents mantamnamainai”, tiuwa nunuwai.

#### Pedro Jisusnak waintsamjai tibau

(Mt. 26.69-75; Mr. 14.66-72;

Lc. 22.54-57)

<sup>15</sup>Jisusan jukiag emagtai, Simón Pedro tutaya nu, tikich Jisusa jintintaijiya nujai ukunum pataesag weedau. Nunú

tikich Jisusa jintintaijiya duka, sumo sacerdote waintai asa, Jisusan apú jeen awayagtai niishkam wayauwai. <sup>16</sup>Nunítai Pedrok agaag juwakui. Nunikmatai nu sacerdote waintaiji asa wayauwa nunú, waiti kuitamnun aujus Pedron awayauwai. <sup>17</sup>Nui Pedro waittaman, nuwa waiti kuitamin chichajak:

—¿Amesh auna aentsun achikaja nuna jintintaijichukaitam? —tusa iniau.

Tama Pedro ayaak:

—Atsa, wika auna jintintaijichuitjai, —tau.

<sup>18</sup>Tsetsek asamtai, sacerdote apujin inake aidau, suntajá apuji aidaujai, jiin ikapajag anamainak ijunbaunum Pedroschkam nui jegan anamak wajau.

#### Sumo sacerdote Anás Jisusa dekajuatatus iniasbau

(Mt. 26.59-66; Mr. 14.55-64;

Lc. 22.66-71)

<sup>19</sup>Nuniai sumo sacerdote Jisusan jegantun, niina jintintaiji aidaun pachis, nuigtú waji jintinkagtinume tusa iniau.

<sup>20</sup>Tama Jisus aimak:

—Wika ashí aents antuinamunum chichaujai. Tuke jintinkagtinujai jega ijuntainmash, jega Apajuí ememattainum wayaanush ashí judío aidau ijunainamunmash paan iwainakan chichaujai.

<sup>21</sup>¿Wagka minash ininjume? Minak inintsuk dekas wi chichaamun antuku aina nu, wajina pachisaya jintinkagtinuwe tusajum iniastajum. Dita wi tibaugnak shiig dekainawai, —tiuwai.

<sup>22</sup>Juna Jisus tutai, jega Apajuí emematku ijuntain kuitamin makichik juwatki yapinum awatak:

—¿Amesh sumo sacerdotesh tu chichagkamum? —tiuwai.

<sup>23</sup>Dutikam Jisus ayaak:

—Wi pegkegchaun chichakmataig tujutta, wajina tija nunú. Wi pegkejan taja duwish ¿wagka awatame? —tiuwai.

<sup>24</sup>Nuna timatai Anás Jisusnak jigkagbautak awemauwai sumo sacerdote Caifás pujamunum.

**Pedro ataktú Jisusnak  
waintsamjai tibau**

(Mt. 26.71-75; Mr. 14.69-72;  
Lc. 22.58-62)

<sup>25</sup>Nuna dutikainai Pedroshkam jíí anamak wajattaman:

—¿Amesh juna aentsun achikaja auna jintintaijichukaitam? —tuidau.

Tama Pedro chichaak:

—Atsa wichauwaitjai, —tiuwai.

<sup>26</sup>Tusa titatman sumo sacerdote inake, Pedro kuwishí asankauwa nuna patayí jegantun chichajak:

—¿Wi amina Jisusjai numi olivos ajakbauwe nuwi nijjai wajamin wainkamjamjama? —tau.

<sup>27</sup>Nu tamashkam Pedrok ataktushkam aikasag: “Wichauwaitjai”, taig atash shinukuí.

**Jisus Pilato jeen awayamu**

(Mt. 27.1-2, 11-14; Mr. 15.1-5;  
Lc. 23.1-5)

<sup>28</sup>Nunikmatai Caifasa jeenian Jisusa jukiag Romanmaya apu pujusá inamtaijin ejegawajui. Dutikawag pag levadurajai pachimsuk inagkamu yutai Pascua tsawau asantai, judío aidauk nuwig wayachajui: Pegkegchau utsumakaja Pascuatin yuwachajaig, tuidau asag. <sup>29</sup>Nunidau asagmatai Pilato jiinki wajan iniinak:

—¿Jusha wajukamtaiya achikjumesch itagtuauugme? —tiuwai.

<sup>30</sup>Tutai dita ainak:

—Pegkegchaun takachuitkuig jutika achikaik itagmaitusujime, —tuidau.

<sup>31</sup>Tiagtai Pilato chichaak:

—Untsu atum jukijum, atumi chicham umitaigminish wajuk aentsush suwimak susami tibauwaita dutiksagmek suwimkak susatajum, —tiuwai.

Tuinam apu aidau chichainak:

—Jutii judío aidautik numinum achinag mantamnati tuinaji, tujash makichik Romanmaya apukesh, atum dutikatajum tichamu asaja iik dutikmaitusuj, —tiajui.

<sup>32</sup>Nunak Jisus yaunchuk chichaak, dutik mantuatin ainawai tibau uminu asamtai tiajui.

<sup>33</sup>Tiagmatai Pilato ataktú jega niina pujusá inamtaijin wakitki wayaa, Jisusa iniak:

—¿Amekaitam judío aidau Apujim? —tau.

<sup>34</sup>Tama Jisus ayaak:

—¿Dusha amek anentaimsamek inintam, atsa tikich mina pachitus tujabiagmataig tujutam? —tiuwai.

<sup>35</sup>Tama Pilato ayaak:

—Wika judiuchuitjai, ame pataim judío aina nunú, sacerdote apuji aidajai achigma-kag jujamkiag minai itagmawaje. ¿Wají pegkegchauwa takasmaume juna jutijama-wagtatkuish? —tau.

<sup>36</sup>Tama Jisus ayaak:

—Mina inamtaijuk ju nugka juchau-wai. Wi juwiya ataik, mina jintintaig aidau achikag judío apuji aidaunum sujukainum tusag ayamjutuinak maanimain ainawai, —tiuwai.

<sup>37</sup>Tutai Pilato chichajak:

—¿Untsu nuniakmek amek dekas Apuapitme? —tau.

Tama Jisus ayaak:

—Ame tujutam duka dekaske. Wika ju nugka juwig chicham dekaskea nuna etsegkatasan tauwaitjai. Ashí aents chicham dekaskea nuna antukag umiina nu mina chichamjunak antuguinawai, —tiuwai.

<sup>38</sup>Nuna timatai Pilato:

—¿Wajimpaya dekaskea dusha? —tusa iniau.

**Jisusak dekas mantamnati tiagbau**

(Mt. 27.15-30; Mr. 15.6-17;  
Lc. 23.17-25)

Nuna ti ukuak agaa jiinki, judío aidau ijuntatman chichajak:



—Wika ju aents bakumamainjinak dekajuachjai. <sup>39</sup>Tujash Pascua jegakuig, aents achikbau makichik jiiktá takugmin tuké jinuweg dutiksag, atumi Apugminash éjiiktú tusagmesh wakegagmek? —tau.

<sup>40</sup>Nuna tutai ataktú ashí senchi untsumkag:

—iAanka jiiкипа, dekas Barrabás jiiktá! —wajaidau.

Duka Barrabasak kasa aajakui.

**19** <sup>1</sup>Imatiagtai Pilato Jisusan suntag aidaun asutiatajum tusa inajui. <sup>2</sup>Dutikamtai suntag aidaushkam jagkin chapikmajag atsejutain najanawag atsemitkakag, jaanch yamakaitkaun anugjag, <sup>3</sup>chichajuinak:

—iJuuwai judío aidaun Apujig, emematmi! —awajuidau.

Tuinakug yapinum awatuidau.

<sup>4</sup>Dutikainai Pilatushkam ataktú jiiintuki:

—Wika ju aents bakumamainjinak makichikish dekajuachjai, tau.

<sup>5</sup>Tusa Jisusan jagki atsejutai najana atsemitkakbaun, nuigtushkam jaanch yamakaitkau anugjamunak imatiksag jiiikiuwai, dutika Pilato chichaak:

—iJuwi itanjai diistajum! —tiuwai.

<sup>6</sup>Nunik jiiinkimtai wainkag, sacerdote apuji aidau, achijatin aidaujai ijunag senchi untsumkag:

—iAchigtá! iAchigtá! —awajuidau.

Imatiagtai Pilato ditan chichajak:

—Imatjakjumekek atum jukijum achigtajum. Wika ni pegkegchau takasbaujin mantamnamainjinak dekajuachjai, —tiuwai.

<sup>7</sup>Tutaishkam apu aidauk:

—Jutii chicham umiktin agagbauwa nu umiaku maumainaitji, wagki nigka, Apajuí Uchijiyaitjai tumamu asamtai, —wajaidau.

#### Pilato Jisusan ataktú iniasbau

<sup>8</sup>Nuna imatiagtai Pilatushkam nuní senchi ishankagtukui. <sup>9</sup>Nunik juga niina

pujusá inamtaijin ataktú wayaa Jisusan iniak:

—éAmesh tuwiyampaitpa? —tau.

Tamashkam Jisusak aikchau. <sup>10</sup>Ayaa-cham Pilato chichaak:

—éWagka minash aigtsume? éDekatsmek wiitagjama achigtajum takunush, akupkatajum tusanush tumainaitag duka? —tiuwai.

<sup>11</sup>Tusa tama Jisus ayaak:

—Mina Apag dutikata tujamchakuig, makichikish minak dutijumaitsume. Tujash mina aminí itajiaja nu ainawai dekas amina nagkaetamsag tunamaina duka, —tiuwai.

<sup>12</sup>Nuna tutai Pilato Jisusan, utusanuk jiiikiag tusa kakantu, nunitaishkam judío aidauk senchi untsumkag:

—Ame aanú akupeakmek Roma apujiya nuna kumpajig achattame. Aanka Jisusak nigki apuitjai tumamá wekaenuwe, nunin asa Roma apujiya nunak shiwajiyai, —awajuidau.

#### Jisus sujukbau

<sup>13</sup>Nunú tuinamun Pilato antuk, Jisus agaa jiiiktajum tusa idayak, chicham dekaku ekeemtaijin ekeemsauwai hebreo chichamnum Gabata tutainum. “Gabata” tawa nunak “kaya ukatkamu” taku tawai. <sup>14</sup>Pascuatin yuwatnun uminainak batsatai, etsashkam tutupit wajasú asamtai, Pilato judío aidaun chichajak:

—iPai, juwi atumí Apugminak itantajime! —tau.

<sup>15</sup>Tama senchi untsumkag:

—iMantammati! iMantammati!

iAchigtá! —wajagtai, Pilato chichajak:

—éAtumí Apugminash wagkanuk achigtaja? —tiuwai.

Nu tamashkam sacerdote apuji aiinak:

—iAanka iina apujinchui, iina apujig Roma puja duke! —tuidau.

<sup>16</sup>Tiagtai Pilatushkam:

—Achigtajum, —tusag ditai sujua idaisuwai, dutikamtai dita Jisusan jukiajui.

**Jisus achigbau**

(Mt. 27.32-50; Mr. 15.21-37;

Lc. 23.26-49)

<sup>17</sup>Dutikam Jisus ni achinjatnunak numi yapajiamun yanakí jiinkiu, nain “buuk sakajua nuninai” tutainum jegatatus. (Duka hebreo chichamnumag Gólgota tawai.) <sup>18</sup>Nui ejentag achijag, nuigtushkam jimag magkagtinun achijag, Jisusan ejapeawag awajawajui. <sup>19</sup>Dutikawagmatai Pilato Jisusa chaiken taapnanum: “Jisus Nazarenumia, judío aidau apuji”, tusa agag adujtukui.

<sup>20</sup>Duka hebreo chichamai, griego chichamaish, latín chichamaishkam agagbau aajakuí. Dutikamun Jisusak yaakat tikiju achigbau asamtai, kuashat judío aidau nui nagkaemaidauk nu agagbaun aujuida. <sup>21</sup>Nu dutikamu asamtai, sacerdote apuji aidau, tikich apu aidaujai Pilatun jegantag aujuinak:

—‘Judío aidaun Apujiyai’ tusam agajum auk aikatsuk, juka ‘judío Apujiyaitjai tumamá wekaenuwe nuuwai’, tusam agagta —tiajui.

<sup>22</sup>Nunú tuidaun Pilato chichajak:

—Wi agagmag duka nunisag atatui, —tiuwai.

<sup>23</sup>Suntag aidau Jisusan achijag, jaanchjin jujukiag ipaksumta imajin ichiajag makí makichik tinamdaekajui. Nuna dutikawag tikich dekas nugkutaiji ayatak yaikiin nagkamsa apajá nugkaan ashimkamun asamtai, <sup>24</sup>suntag aidau ditá ditak pempeentunikiag chichainak:

—Dekas juka ichiagchagmi, yana kayajig jiinkit nunú dekas jukiti, —tiajui.

Nunú uminkauwai, duwik agagbau chichaak: “Mina jaanchjun, yana kayajig jiinkit nu jukitnai”, timawa duka.

<sup>25</sup>Jisusa dukují, niina kajjai, tikich María Cleofasa nuwe, nuigtú María Magdalanmaya aatus Jisus achigbaunum anijus ijunaidau. <sup>26</sup>Nuniagtatman Jisus dukujin wainak, ni jintintaiji dekas niina aneetaiijiya nunashkam wainak chichajak:

—Dukuwah, yamaik anuwai amina uchigmik, —tau.

<sup>27</sup>Tusa idayak, duwi ni aneetaiiji wajattaman:

—Anuwai amina dukuk, —tiuwai.

Nunú tima niina dekas aneetaiijig Jisusa dukujinak juki jegá emauwai.

**Jisus jakamu**

(Mt. 27.45-56; Mr. 15.33-41;

Lc. 23.44-49)

<sup>28</sup>Nuna ti Jisus ashí ni dutikmainjinak umikú asa, duwik agagbau uminkati tus:

—Kitamajai, —tiuwai.

<sup>29</sup>Tutai buitsnum vino chujuau aimkam pujaunum esponja ajugká juki, numi hisopo kanawen ayai takuji aapawajui. <sup>30</sup>Dutikam Jisuschakam vino chujuauanak uwag chichaak:

—iYamaik ashí umikjai! —tusa tsunsumá jakauwai.

**Jisus bijagnum nagkí ijumu**

<sup>31</sup>Junak Pascua jegatsaig nuniku asamtai, apu judío aidau, aents achigbau aidauk achinjamutkek achagti, tusag dakitin asag, nunú tsawan ayamtaiya duka dekas puyatjusa diitai asamtai, Pilatun jegajiag chichajuinak: Suntag ishikata aents achijam detaina nuna kagkajin kupijag, ashí kuwajag yajuaktinme, tiajui.

<sup>32</sup>Tima niishkam suntagnak imatiksag ishikauwai, dutikam suntagshakam dekatkau aents Jisusjai ayaumas achijam deta nuna kagkajiná kupigkajui, tikichnashkam dutiksag kupigkajui.

<sup>33</sup>Nuna dutikawag Jisusan jegantun diikmag, jaka nematai, kupigtsuk idaisajui.

<sup>34</sup>Dutikawaju ainaig makichik suntag nagki Jisusan bijagnum iju ichigkuí. Dutikam numpa yumijai saekiuwai.

<sup>35</sup>Wika nunak dekas wainkau asan etsegjai, wainkachbaugnak etsetgsujai. Wi wainai dutikawaju asagmatai, atumshakam shiig dekaatajum, nunikjum dekaskeap nunikuita timinjum tusan ujajime. <sup>36</sup>Nuna ukunchin kupigkachajua nunak, Apajuí etsetgin agagbaunum: “Makichik ukunchinakesh kupigkachagtinai”, tibauwa nunú uminkauwai. <sup>37</sup>Tikich Apajuí etsetgin agagbauwa nuwiskam: “Ijumu wainkagti-naitjume”, tawai.

#### Jisus ukusbau

(Mt. 27.57-61; Mr. 15.42-47;  
Lc. 23.50-56)

<sup>38</sup>Nuna dutikawagmatai, José yaakat Arimateanmaya, niishkam Jisusa jintintaiji asa, judío aidaun ishamau asa wakenmataik Pilatun jegají: Jisusa iyashin wi jukin ukustajai, tusa segauwai. Tama Pilatushakam: Jukita, tima José wejí. Jisusa iyashin jukiwai. <sup>39</sup>Nuna dutika ai, Nicodemo Jisusan kashi ausatatus jegajiwa dushakam, treinta kilos kugkuin mirra, álóe tutajai pachimjamun takus tauwai. <sup>40</sup>Nunikmatai Joseshkam nujai atuegak Jisusa iyashin jukiag, jaanch pegkeja jukiag kugkuin itanbauwai ukatuk pempejag, judío wajuk ukumau ainawa dutiksag ukusajui. <sup>41</sup>Jisus achigbaunum ayaumas numi ajakbau aunum, aents ukustin waa taimu yamagmauch makichik aentskesh ukuscha-munum, <sup>42</sup>judío aidaun ayamtaiji tsawan ashí jegau asamtai, Jisusa iyashinak jukiag ukusajui nu imá tikiju asamtai.

#### Jisus nantakbau

(Mt. 28.1-10; Mr. 16.1-8; Lc. 24.1-12)

**20** <sup>1</sup>Tumig tsawagmatai kashikmas suwe aig, María Magdalanmaya Jisus ukusbaunum weuwai, nunik jegakmá Jisus ukusá kaya aputuka

ukukbau ekekam atatman wainak, <sup>2</sup>tupi tupikakua Simón Pedro tikich dekas Jisusa aneetaiyya nujai pujaun jegajua-wag chichajuinak:

—Iina Apujin ukusagma nunak jukiaje, tujash dekatsji tuwig ukusaje, —tusa ujakuí.

<sup>3</sup>Tusa ujakajam Pedro tikich Jisusa jintintaiyya nujai ukusbaun diisagtatus wegajui. <sup>4</sup>Nunik mai tupikainayatak, tikich Pedro nagkaesau tupikau asa, niyyá eemak Jisus ukusbaunum jegantui. <sup>5</sup>Nunik jegantá tekená diikmá imá sabananak wainkauwai, tujash nigka wayachui. <sup>6</sup>Nuniai Simón Pedro ukunum juwaku taankug, Jisus ukusbaun utuauwai, nunik diikmá imá sabanak atatman wainkauwai, <sup>7</sup>nuigtushkam Jisusa buuké pempenjamuk dushá akanka shiig ninuja aipkimun wainkauwai. <sup>8</sup>Nunú niyyá tantauwa dushakam wayaa niish wainak: Dekaskeap nantakne, tiuwai. <sup>9</sup>Ditak Apajuí chichame agagbaunum: Jisusak maamash ataktú nantaktinai tibauwa nunak aneenu, nunidau nuna wainkag shiig dekaawajui. <sup>10</sup>Nunikag Pedro, tikich Jisusa jintintai aajakua nujai ditá jeen wakitkajui.

#### Jisus María Magdalanmaya wantintukbau

(Mt. 28.1-10; Mr. 16. 9-11; Lc. 24.10)

<sup>11</sup>Nuninaig Mariak juwak Jisus ukusbau agaajin ayaumas buutú wajau. Buutkabaikia Jisus ukusbaun tekenas diikmá, <sup>12</sup>jimag nayaimpinmaya aents pujun nugkuaju chaiknum makichik eketai, tikich dawenmanini ekeematman wainkauwai. <sup>13</sup>Nu nunik pekajaidau iniinak:

—¿Wagka buutme?

Tama nuwa chichaak:

—Wika mina Apujun jujutkiagmatai, tuwig ukusagmae nunash dekachu asan buutjai, —tiuwai.

<sup>14</sup>Nuna tusa ayampakmá aents wajattaman wainkauwai, dutikash

Jisusapi tusag tachau. <sup>15</sup>Nunia nu aents iniak.

—¿Wagka buutme? ¿Ya egame?  
—tiuwai.

Tama ni anentaimsag, ajak ajakbaun kuitamnuskaitai tau asa:

—Ame Jisusa iyashí jukiuwaitkumek tuwí ukusmaume nu ujatkata, wi jukitjai, —tiuwai.

<sup>16</sup>Tutai:

—iMaríah! —tiu.

Tama ayampatua diikmá Jisusan wainak hebreo chichamai:

—Rabuni, —tiuwai. (Nunak jintinkag-tinú taku tiuwai.)

<sup>17</sup>Nuna takug achikta tama Jisus chichajak:

—Achigkaipa, eke mina Apajuí waatsjai. Wetá nunikam mina dekaskeapi tujutin agma nu, yamaik iina Apají pujamunum wegajai tujamae tusam ujakta, —tiuwai.

<sup>18</sup>Nu tima María Magdalanmaya dushakam, Jisusa jintintaiji aidau batsatbaunum jegaa: Wi dekas Apunak wainkamjai, nuniai juna akatugmae, tusa ujakajui.

**Jisus ni jintintaiji aidau  
wantintukbau**

(Mt. 28.16-20; Mr. 16.14-18;  
Lc. 24.36-49)

<sup>19</sup>Nunú tsawantin kintabaunum, Jisusa jintintaiji aidaushkam, judío apuji aidau ishamaing, waitin shiig epediag ijunag batsatainai, pachiach-mau Jisus ejapena wajantá ditan kumpamak:

—Apajuí atumnash shiig agkan anentaimsa pujutan amastinme, —tiuwai.

<sup>20</sup>Nuna tusa uwejen achigbaun, bijagnum nagkí ijumunashkam iwaintu-kui. Nunitai Jisusa jintintai aidaushkam Jisusan wainkag shiig aneasajui. <sup>21</sup>Nuna

duitika iwaintuk Jisus ataktú chichajui-nak:

—Apajuí atumnash shiig agkan anentaimsa pujutan amastinme. Mina Apag juwi awetiwa dutiksanuk atumnashkam uwemat pachisjum etsegkatajum tusan awemajime, —tiuwai.

<sup>22</sup>Nuna takug ditainini suut umpuinui, dutikak:

—Yamaik Wakaní Pegkeji jukitta-jume. <sup>23</sup>Atum ju nugka juwi tsagkujash-bauk, nayaimpinmashkam tsagkugnag-chatnai. Untsu atum ju nugka juwish tsagkujamuk nayaimpinmashkam tsagkugnagtinai, —tiuwai.

**Jisus ataktú wantinkamu**

<sup>24</sup>Nuwi Jisus wayaunak, Tomás Jimagmamutu tuya duka atsau asa wainkachui. <sup>25</sup>Nuniku asamtai wainkau aidau:

—Apu wainkamji, —tusag ujaidau.  
Tama Tomás chichaak:

—Wika Jisusa uwejen clavo akaetuk-baun wainkan, nuigtushkam bijajin nagkí ijuagmaya nunash inujuan dekapsan, dekaskeap nantakne tumainaitjai, —tiuwai.

<sup>26</sup>Ocho tsawan asag ashí Jisusa jintintaiji aidauk ijunajui, nuwig Tomaschakam pujau. Waitinak shiig epenag batsataig ataktú Jisus ejapeen wajantá kumpamak:

—Apajuí atumnash shiig agkan anentaimsa pujutan amastinme, —tiuwai.

<sup>27</sup>Nuna tusa Tomas chichajak:

—Tsajam uwegmin mina uweg inuata dutikakum shiig diistá, juwi tantam bijajushkam inuata. iUtujimá pujutsuk, dekaskeapi tujutta! —tiuwai.

<sup>28</sup>Tama Tomás ayaak:

—Mina Apujuh, amek mina Apajui-juitme, —tiu.

<sup>29</sup>Tutai Jisus chichajak:

—Tomasah, yamai mina waitkaum duwi dekaskeapi tujutme. iMina waittsuk dekaskeapi tujutuina nu imá shiig aneasagtinai! —tiuwai.

**Jisus Apajuí Uchijiya nuna dekaatnume tabaunum agagbau**

<sup>30</sup>Jisus aents aidau dutikmainchaun ashí iwainag niina jintintaiji aidaush wainainamunum takasua duka, ashí ju papinumag agagchamui. <sup>31</sup>Nuniaig juka: Atumesh Jisusak, Kristu, Apajuí Uchijimpapita, tusajum dekaskeapita takujum, pujut tuke atina nu jukimnunjum, tusan agatjime.

**Jisus jintintaiji aidaun ataktú wantintukbau**

**21** <sup>1</sup>Nunik tikich tsawantai ataktú Jisus kucha Tiberias tutai tugkitken batsatun wantintukui. Junak juní dutikauwai. <sup>2</sup>Simón Pedro, Tomás Jimagmamu tutai, Natanael Caná Galilea awa nuwiya, Zebedeo uchijí aidau, nuigtú jimag Jisusa jintintaiji aidau batsataidau. <sup>3</sup>Nuninamunum Simón Pedro chichaak:

—Namakan maatjai, —tau.

Tutai, tikich aidaushkam:

—Inum wegagmi, —tusag botenum chimpimjag shiyakaju, nunikagaju ajuntuinakua tsawampainakush makichkish maachajui. <sup>4</sup>Nunikag yamá tsawaig, Jisus kuchanum uwetus wajau, nunittaman niina jintintaiji aidau wainainakush, Jisusap wajawa tichajui.

<sup>5</sup>Nuniaí Jisus:

—Uchig aidauh, ¿makichik namak-kesh maachugmek? —tiuwai.

Tama dita aiinak:

—Atsá maachji, —tiajui.

<sup>6</sup>Tiagtai Jisus chichaak:

—Retjum untsugnumanini ajugtatum dutikakjum namak achiktatjume,

—tuinam dutiksag ajugkag kuashat namak chimpimkamtai jiihtakamag tujinkajui. <sup>7</sup>Nunikmatai Jisusan dekas aneetaijiya nunú Pedron chichajak:

—iAuk Apu Jisusai! —tiuwai.

Tabaun Pedro antamuik kutugin nugkujá namaká tseke iyagkuí. <sup>8</sup>Nuniaí tikich aidauk botenum minidau, retnum namak chimpimkaun japisag, anumkat-nuk cien metros au asantai. <sup>9</sup>Kukag jiihkamag jii ikapagbaunum makichik namak, pagjai jiyamun wainkajui.

<sup>10</sup>Dutikainai Jisus chichaak:

—Namak achikujum aanú wajumak itatajum, —tiuwai.

<sup>11</sup>Tutai Simón Pedro namak muun aidau ciento cincuenta y tres retnum chimpimkaun, botenum egkemtug japikí kukag jiihkí, wajumak juki ejeetauwai. Imaan chimpimkash rednak ichiagchauwai.

<sup>12</sup>Nunik ashí uminkamtai Jisus chichaak:

—Tantajum yujumak yuwatajum, —tiuwai.

Nuna tutaish makichkish: Amesh yaitpa, tusagkesh iniaschajui, juka Jisusapita tuidau asag. <sup>13</sup>Nuna ti kaunkamtai Jisus jegantá, pagkan juki tinamak, namakan jukishkam dutiksag tinamkauwai.

<sup>14</sup>Junak Jisusak maamu nantakí kempatuma juwi niina jintintaiji aidaun wantintukui.

**Jisus Pedro kempatamá iniasbau**

<sup>15</sup>Yujumak yuwá nagkankamunum Jisus Simón Pedron iniak:

—Simón Jonasa uchijiyah, ¿minash jujú aentuina juní nagkaemasmek anentam? —tiuwai.

Tama Pedro ayaak:

—Ehé Apuh, ame wi aneajam duka dekgatame.

Tutai Jisus chichajak:

—Mina aentsug aidau uwijá uchuchiji kuitamtaya numamtuk kuitamjutkata, —tau.

<sup>16</sup>Tusa ataktú iniak:

—Simón Jonasa uchijiyah, ¿minash anenmek? —tau.

Tama Pedro ayaak:

—Ehé Apuh, amek dekagtame wi aneam duk, —tiuwai.

Tutai Jisus chichajak:

—Nuniakmek mina nemagtin uwija numamtin aina nunú shiig jintintuata.

<sup>17</sup>Tusa kempatuma juna iniak:

—Simón, Jonasa uchijiyah, ¿minash anenmek? —tau.

Tama Pedro wake besekú, kempatuma juwishkam: Minash anenmek, tabau asa, nunik Pedro ayaak:

—Apuh, ame ashí dekagtame wi dekaskenum aneam duk.

Tutai:

—Untsu ame mina nemagtuina nunú uwig kuitamtayama numamtuk kuitamjutkata. <sup>18</sup>Dekas tajame, ame datsauch asamek, amek nugkujam ame wakegamunum wejakuítme. Tujash wi tajame, ame muuntuch wajasaminig, tikich aidau kuntujum awentamin anugtamjag, ame weta tachamunmag jujamkiag etabiagtinaí, —tiuwai.

<sup>19</sup>Nunak Pedro wajak maam atinaita nuna ujaak tiuwai. Nuna ti:

—iNemagtukta! —tiuwai.

**Jisusa aneetaiji pachisa chichasbau**

<sup>20</sup>Tima Pedro ayampá niimkamá Jisusa dekas aneetaiji, duwik tikich tsawantai yujumak yuwamunum niini ayumas wajas: Apuh, yaita amina sujupaktinush, tusa iniasua nu minittaman wainak:

<sup>21</sup>—Apuh, ¿tujash jusha wajukatnaita? —tau.

<sup>22</sup>Tama Jisus ayaak:

—Wi wakegaknuk nigka iwaakuk pujaig taatin atajai tumainaitjai. ¿Amesh dusha wagka uyumame? Duka tutsuk amek minak nemagtukta, —tiu.

<sup>23</sup>Nunú tabaun tikich Jisusa jintintaiji aidau antukajui. “Dekas jakashtinai tawapita” tuidau. Tujash Jisusak: “Juka jakashtinai”, tusag tichauwai. “Wi wakegaknuk nigka iwaakuk pujaig taatin atajai tumainaitjai, ¿Amesh dusha wagka uyumame?” tiuwai.

<sup>24</sup>Junak Jisusa dekas jintintaiji aajakua nunú, ashí ni wainkamujinak, jintiamujinashkam dekaske tusa agajui. Dutikamu asamtai dekaskeapi tuinaji.

<sup>25</sup>Jisus takasbauwa duka shiig kuashtai, nunú makí makichik pachisa agamak, ju nugka juwig ayatak papikes piyakaintai.

Aatus atí.

# JISUS CHICHAM ETSEGTKATAJUM TUSA ETEGJA ISHIAKBAU AIDAU TAKASBAU

## Apajuí Wakaní Pegkeji anagkagtuamu pachisa tibau

**1** <sup>1</sup>Mina anetaiju Teofiloh, wi yama nagkamchakun papiin agajan awetibiajam nunak, Jisus nagkamchak ashí takasbauji, jintinkagtuamujinashkam, <sup>2</sup>ni nayaimpinum wegak takuniuwa nuna pachisan agatjabiajame. Eke nayaimpinum wetsuk, ni: Mina chichameg etsegtugkatajum tusa ishiaktinji etegjamu aidau jintintuauwai, jutika takastajum tusa, Wakaní Pegkeji dutikata tabau asa. <sup>3</sup>Waitkasa maam nantakí, ni chichame etsegtkatin aidau etegjamua nuna, cuarenta tsawantai paan kuashtá wantintukui, dekas iwakuapi tujuttinme tusa. Nuniak Apajuí inabaujin pachis jintintuauwai.

<sup>4</sup>Nui ditajai ijunag pujusá, Jisus ni etejamuji aina nuna chichajak:

—Jerusalegnum dakastajum, mina Apag Wakaní Pegkejin amastajime tusa anagtamamun tjakmajim nunú umintsaignik wegpajum. <sup>5</sup>Juagkak yumiik yamijatjauwai, tujash atumek dukap tsawan atsuk Wakaní Pegkejiya nujai yamigbau atajume, —tiuwai.

### Jisus nayaimpinum wakitkimu

<sup>6</sup>Tutai ni jintintaiji aidau iniinak:  
—¿Apuh, yamaikik jutii apuji wajasam, yaunchuk agkan batsamiag nuninuk ekagtittam? —tuidau.

<sup>7</sup>Tama Jisus ayaak:

—Mina Apajua duke tu tsawantinia dutikatnaita nuna umikua duka, atumek dekamaitugsme. <sup>8</sup>Ni Wakaní Pegkejin sujamsatta nuna senchijí jukijum, mina pachittsajum juwi Jerusalegnum, Judeanum, Samarianmashkam, ashí tikich nugka atushat aina nuwishkam etsegtattajume, —tiuwai.

<sup>9</sup>Nuna tutai ditash dii ijunaig takuniuwei, nuniaig yujagkim ijikuí. Nunikmatai awenag wainkachajui. <sup>10</sup>Nunik Jisus nayaimpinum wetai pagkai dii ijunai, jimag aents pujun nugkuaju ditai ayaumas wajaantaju, <sup>11</sup>nunikag ditan chichajuinak:

—Galileanmaya aents aidauh, ¿wagka nayaimpish diish ijunjume? Yamai Jisus nayaimpinum wegak takuniu wainkajum junisag ataktush minitnai, —taju.

### Judas Iscariote kajemag jakamunum Matías etegkamu

<sup>12</sup>Nunú tusá tijam Jisus chicham etsegtugkatajum tusa etejamu aidauk, Olivosa mujajin batsatu Jerusalén wakitkiajuí, tsawan ayamtai tsawagma-taig tikujuk wekaenasti, tibau asamtai.

<sup>13</sup>Yaaktanum jegawag jega yakí tesamunum wakaju nui batsataidau asag, nuna daajig ju ainawai: Pedro, Juan, Jacobo, Andrés, Felipe, Tomás, Bartolomé, Mateo, Jacobo Alfeo uchijiya nunú, Simón Zelote tutai, Judas Jacobo

uchijiya nunú. <sup>14</sup>Ashí nunú aidauk kashí kashinig makichik anentaiyaik ijunas Apajuin aujuinak ijunaidau, Jisusa yachi aidaujai, María Jisusa dukujiya nu, nuigtú tikich nuwa aidauškam.

<sup>15</sup>Nunú tsawantin ciento veinte ijunjajui Jisusa nemajin aidau, nunikbaunum Pedro wajakí chichaak: <sup>16</sup>Yatsug aidauh, David Wakaní Pegkeji dekamtikam agak: Judas Jisusan achiktinme tusa unupiagtinun pachis tibauwa duka uminkae. <sup>17</sup>Judasak jutiijai ijunag wekagas niishkam jutii takaag jutiksag takaajakuí. <sup>18</sup>(Nuninaitak Jisusan sujak kuichik jukimui nugkan sumaku ainawai, tujash nigka kajeemag tsujimak achapai iyaak pujaká ampujin jiijá jakauwai. <sup>19</sup>Nunik jakamtaí Jerusalegnumia aents aidau antukag, nunú nugkan Acéldama adaikajui ditá chichamen. Junak “nugka numpeagbau” taku tiajui.) <sup>20</sup>Nuna nunikua nunak, yaunchuk David Salmosnum agak:

“Niina jeeg ukumkimu atatuí,  
makichik aentskesh nuwig  
pujuschatnai  
niina takatjinak tikich takastinai”,  
tiuwa nunú uminkae.

<sup>21</sup>“Nunin asamtaí Jisus jutiijai pujusmataí tuke ijunag yujasajua nu jutiijai batsatainawai. <sup>22</sup>Duka Juan Jisusan yamijua duwi nagkamas, tuke Jisusjai wekagas, nayaimpinum wegaunash wainkauwa nuwiya amainai. Nunin asa imá shiig Jisus nantakbaun pachisash jutiijai betekak shiig etegmainai.”

<sup>23</sup>Pedro tutai, jimag aentsun ju atí tiaju, José daagtin Barsabás tuuta, Justo tuuta awagmatia nuna, tikichin Matiasan. <sup>24</sup>Nuna tiagmataí Apajuin aujuinak: “Apuh, amek ashí aentsú anentaimtajig dekauwaitam ibau asam, ju jimaja juiyash yaita ame etegkamush,

nunú iwainakta juuwai tusam, <sup>25</sup>niishkam ame chichamjum etsejuinag juna uyumakti, Judas ni tudau takaamujin waittsatnujiya nuwi wegak ukukí nuna takastí tusam”, tiajui. <sup>26</sup>Tusa Apajuin segag, José kayajin, Matiasa kayajijai egkea pegajajui, dutikamunum Matiasan kayají jiinkiuwai; nunikmataí, Jisus chicham etsegtugkatajum tusa ishiaktinji etegjamu once juwakua nuanuí Matiasan pachiauwajui.

#### Wakaní Pegkeji aents aidau egkemtuqbau

**2** <sup>1</sup>Tsawan jista Pentecostés tutai tsawagmataí, ashí Jisusa nemajin aidauk dita tuke ijuntaijin jeganum ijunjajui. <sup>2</sup>Nunik nui ijunai, dase minak wajukeya imatuk nayaimpinmaya senchi uutun, ashí nu jeganum batsatuk antukajui. <sup>3</sup>Nu imatbaunmaya jiiya numamtin, ashí aents nui ijununak makí makichik buuken pekaamtujui. <sup>4</sup>Nunikmataí Wakaní Pegkejishkam ashí aentsun egkemtuqajui, dutika Wakaní Pegkeji chichamtikam tikich chichaman chichaidau.

<sup>5</sup>Nunú tsawantinig Judío Apajuinun puyatjus umin aidau, tikich nugkanum batsamin aidauškam Jerusalén jista asamtaí ijunjajui. <sup>6</sup>Nunú imatuk uutbaun antukag kuashat aents aidau ijunjaju, nunikmag makí makichik ditá chichamen chichaidaun antukag puyatkajui. <sup>7</sup>Nunikag puyatkag ditak pempentunisag:

—¿Ju aents aina jujú Galileanmaya ainatsuak? <sup>8</sup>¿Nuninaitkujash utusaya imatiksash ii chichamenash chichainawa? <sup>9</sup>Juwig ijunjaje: Partianmaya, Medianmaya, Elamnumia, Mesopotamianmaya, Judeanmaya, Capadocianmaya, Pontonmaya, Asianmaya, <sup>10</sup>Frigianmaya, Panfilianmaya, Egiptunmaya, juka ditak nugka Libia tutaya



nuwiya, Cirene tutaiya nuna nagkaikiag atushat batsamin ainawai. Tuja Roma batsatushkam, <sup>11</sup>wajumak judfo aidau, nuigtú tikich ayatak judfo atajai tumabiag judfo waigkú aidaujai kaunkaje. Tuja Cretanmaya aidaushkam, Arabianmaya aidaujai kaunkaje. iJutiishkam ashí iina chichamen Apajuí imanjin pachis etsejuina duka shiig antuinaji! —tudayinau.

<sup>12</sup>Nuna tusag ashí aents aidauk senchi puyatkag:

—¿Wajukaya junash juninawa?  
—tudayinau.

<sup>13</sup>Juna aatus tuinai, tikich aidauk tuke aneas dushikinak:

—Nampejajama, —tuidau.

#### Pedro chichagkagtukbau

<sup>14</sup>Tusa tiagtai Pedro ditá kumpají aidaujai ijunag eketu wajakí senchi chichaká: “Mina pataag judío aidauwah, ashí Jerusalén batsamin aidauwah, jujú shiig antuktajum wi titatjim nu. <sup>15</sup>Atum nampejaje tukagtajum duka nuninchauwai, kashikijamah. <sup>16</sup>I juniag juka duwik Apajuí etsegtin Joel nuniktinai tibauwa nu uminkui juniaji, duka:

<sup>17</sup> ‘Ashí aents aidauk, tsawan inagnamunum Wakaní Pegkejin susatnaitjai.

Dutikamu asag ditá uchijí aidau, nawanji aidaushkam mina pachit-tsag etsejiagtinaí.

Datsauch aidauk paantak iwaintakun, muuntuch aidau kajanum iwaintuktinaitjai.

<sup>18</sup> Wakaní Pegkejiya nunak, aishmag mina nemagtuidaun, nuwa aidaujai betek amastinuitjime.

Dutikawajam duwi mina pachittsagmek etsegtutinuitjime.

<sup>19</sup> Nayaimpinmaya ishamain aidau iwaintuktinuitjime.

Nugkaashkam duwikish wainkashbaun iwaintuktinuitjime numpan, jiin,

nugkanum senchi bukuitamun.

<sup>20</sup> Etsag etsanjashtinai, nantushkam numpa kapantuwa iman wajastinai,

eke Apu Apajuí minitin tsawan iman atina nu jegatsaig.

<sup>21</sup> Ashí aents Apu Apajuin segauk uwemjagtinaí’, tawai.

<sup>22</sup> ‘Israel aents aidautigmesh wi chichaakui antuktajum: Jisus Nazaretnumiaya nuna Apajuí niina senchijin susauwai, dutikam aents dutikmainchaun atumin iwaintugmakajui, dekaskeapi tujuttinme tau asa, duka atumek shiig dekagme. <sup>23</sup>Tujash Apajuí yaunchuk nunikti tiu asamtai, atum achikjum aents pegkegchau aidauknum sujukuitjume, dita numinum achijag maatnume, tusajum. <sup>24</sup>Tujash Apajuí ataktú inankiuwai ni jaak najaimak waittsamujijiya nuna agkanmitka, dutikamu asa jaamua duka Jisusnak depetkachui.

<sup>25</sup> ‘Davidchakam Jisusan pachis agajui: ‘Wainbajjai mina Apujuk tuke wijai pujaun, mina untsujuinini, makichkish ishamain ajiní tujutu asa.

<sup>26</sup> Nuaduí mina anentaijuish shiig anejai nuniakun shiig aneasan kantamjai,

jakanush nantaktinaitja tau asan.

<sup>27</sup> Apajuíyah, mina wakanjuk ukumainmagkek amek idaitugsashatme.

Tuja amina inakem pegkegma duka kauptú tusamkesh idaisashtatme.

<sup>28</sup> Ame inaktugsauwaitme jinta pujutnum ekagta nunú.

Dutijuam amek minai pujau asam, minashkam shiig aneemtijusuitme.’

<sup>29</sup>“Yatsug aidauh, shiig dekaji jutii aidautik iina muunji David aajakua nu jakamtai ukusbauwa duka. Nu ukusbauk yamaikishkam awai. <sup>30</sup>Tujash Davitak Apajuin etsegtin asa dekaajakuí, Apajuí chicham yapajimainchaun anagkuak, ni wegantunum makichik akiinatna nu Apu atinai tusa. <sup>31</sup>Nuna aatus ujaam dekau asa, Kristu maawag-matai, Apajuí ukusbaunmag idaitsuk, inankimu asa kaugchatnunashkam nuniktinai tusa etsejujukuí. <sup>32</sup>Nunú Jisusan Apajuí inankiuwa duka, jutii ashí wainkau asaja etsegtuinaji. <sup>33</sup>Dutikam nantakí niina Apají inamtaijin untsujin ekeemsauwai. Nunik Apajuí Wakaní Pegkejin amastinaitjime tusa anagkagtuauwa nuna awetugmamu minamu antukugme, waintash yamai wainjum nuuwai. <sup>34</sup>Nayaimpinum wakauwa duka Davidchauwai, nigki juna agak:

‘Apu mina Apujun chichajak,  
ekeemsata mina untsujuí,

<sup>35</sup> nunikamin wi amina shiwajum  
aidaunak amina dawemin  
ikautkatjame,

dutikamtai ame wajuk dutikattame  
nu dutikamnum’, tiuwai.

<sup>36</sup>“Duka ashí Israel aents aidautik shiig dekamain ainaji, nunú Jisus atum achigjum mauwaitjum nuna, Apajuí atumi Apujum ema ni Uwemtikagtin atí tusa etegkauwai.”

<sup>37</sup>Nunú tabaun antukag puyatuk kuashat wake besemag anentaimjag, Pedron, nuigtú tikich aidau Jisus chicham etsegtugkatajum tusa etegkamu aina nuna iniinak:

—Yatsug aidauh, ¿tujash jutiish wajukmainaitji? —tuidau.

<sup>38</sup>Tiagtai Pedro ayaak:

—Tudau takat idaikujum pujutjum yapajiatatum, nunikjum makí makichik Jisukristu daajin yamimagtatum.

Nuniagmin Apajuí tudaugmin tsagkug-tamjag, Wakaní Pegkejinash amastinme. <sup>39</sup>Apajuí anagkagtuamun Joel tiuwa duka atumdau, atumi uchijum aina nudaun, nuigtushkam ashí nugkanum atushat batsataina nudaunush atinun tiuwai. Nunak iina Apuji iina Apajuijiya nu aents aidau midau atinme tusa untsuktin asa, tiuwai.

<sup>40</sup>Nuna ti, tikichnashkam kuashat chichaman aents aidau tiuwai:  
—Aents pegkegchau takaina duka atumek uwemtugtatum.

<sup>41</sup>Tusa Pedro tabaun antukag dekaskeap tawa tuidauk, kuashat aents yamimakajui. Nunú tsawantinig Jisusan dekaskeapi tuidauk tres mil aents kawegkajui. <sup>42</sup>Jisus chicham etsegtugkatajum tusa etegjamu aidau jintintuamun betek umiinak, shiig ijuntsag pempentunisag yainidau dita ajuinamujijai. Nuninak Apajuin aujuinak ijunjag, Jisus minak anentaimjutsajum pag yuwatajum tibauwa dutiksag yuwidau.

#### **Nagkamchak Jisusa nemagkaju aidau pujutji**

<sup>43</sup>Jisus chicham etsegtugkatajum tusa etegjamu aidau, aents dutikmainchaun kuashat iwainaja takaamun wainkag puyatjusag diidau. <sup>44</sup>Nuninak Jisusan dekaskeapi tusag nemajuidauk shiig ijuntsag batsataidau, nuninak ashí ditá wajiji ajuinamujai atsubiagtaik iikdaisag sudayidau. <sup>45</sup>Nunidau asag, ditá wajijin sujukag, nugkenashkam sujuk, makí makichik atsumainamun diis kuichkin akandayidau. <sup>46</sup>Kashí kashinig jega Apajuí ememattainum ijuntsagké aidau, nuninak Jisus mina anentaimjutsajum pag yuwatajum, tibauwa nuna ditá jeen ijunjag shiig anendaisag dakujusag yuwinak, <sup>47</sup>Apajuin emematuidau. Imadiagtai ashí aents aidauashkam wakejus diinau.

Nunidau asagmatai Apajuishkam kashí kashinig aentsun uwemtikak ikaweau.

**Aents wekaechaun Pedro  
etsagagbau**

**3**<sup>1</sup>Makichik tsawantin Pedro, Juagjai jega Apajuí ememattainum wegajui etsa dukap tegau ai, Apajuí aujku ijuntai jegau asamtai. <sup>2</sup>Nunú jega Apajuí ememattaiya nuna waitiji daajig Shijam tutai aajakuí, nunú waitinum aents shutú akiinkush nuninuk akiinaw asamtai, kashí kashinig waitinum itan apujin asa apukiuwai, aents wainiagtai kuichkin segamí tusag. <sup>3</sup>Nunin asa, Pedro Juagjai jega Apajuí ememattainum wayattak minittaman wainak:

—Wait aneasam kuichik sujustá,  
—tusa segau.

<sup>4</sup>Tama Pedro Juagjai wainkag:

—Dijjattsakiah, —tiu.

<sup>5</sup>Tama shutuuk sujustatkumpap tujutua tusa dakau. <sup>6</sup>Nunitai Pedro chichajak:

—Kuichkik atsugtawai, oroshkam atsugtawai, tujash mina ajuta nuna amastajame. Jisukristu Nazaretnumiaya nuna daajin tajame: iWajakim wekaesata!

<sup>7</sup>Nuna takug uweje untsujin achiká awajkiu. Dutikamuik nawe, wanushkam pegkeg wajasú. <sup>8</sup>Nunikmatai tseke wajakí wekagu, nunik ditajai ijunag jega Apajuí ememattainum nigki wekagas tsekeas dekapki, Apajuí emematki wayau. <sup>9</sup>Nunik wekagas Apajuí emematun ashí aents wainaidauk, <sup>10</sup>jega Apajuí ememattai waitiji Shijam tutainum ekeemas segamá ekeemnuwe dukeapi, tusag puyatjuk ishambag diidau, wajakag ankae tusag.

**Jega Apajuí ememattainum Pedro  
chichagkagtukbau**

<sup>11</sup>Pedro, Juagjai shutú etsagagbauwa duka ditanak akupeachu. Nuniai ashí

aents aidauk nuna antukag, pisajag Salomón waiti ujabau tutainum pujuttaman jegaantag, ijuuntug puyatjuk diidau. <sup>12</sup>Imatikainam Pedro aents aidau chichajak: “Israel aents aidauwah, ¿wagka imanikjumesch puyatkaugme? ¿Wagka imanikjumesch diijatjume? Iina senchijinkish juka etsagagchaji. Jutii imá pegkeg asajaikish juka aikatsji. <sup>13</sup>Junak iina muunji Abraham, Isaac, Jacob aina nuna Apajujiya nunú, mina Uchijun Jisusan ememattinme tusa jutikae. Atum achiká sujukagminish Pilatok akupkata taig atum dakitjauwaitjum nuna. <sup>14</sup>Aents pegkejam, pegkegchau takachu ayamjutsuk, aents pegkegchau magkagtin ayamjakjum jiikiuwaitjume. <sup>15</sup>Nu dutikakjum Jisus dekas pujutan sukagtina nunú mauwaitjume. Tujash Apajuí inankiuwai, duka jutii ashí shiig dekainaji, wainkaju asaja. <sup>16</sup>Atum jujú tsagaju wainjum juka, Jisusai kajinas anentaimu asa tsagaje. Jisusai kajinas anentaimak tsagaja juka ashí atumshakam wainjume.

<sup>17</sup>“Mina yatsug Israel wegantu aidauh, wika shiig dekajai, atum atumí apujum aidaujai, Jisus mauwaitjum duka dekachu asajum mau ainagme.

<sup>18</sup>Jisusan dutikawajua nunak, duwik Apajuí etsegtin aidau: ‘Uwemtikagtin atí tusa etegkamua nunak maawagtin ainawai’, timawa nunú imatiksagmek umikugme. <sup>19</sup>Nuniku akugmesh yamaik tudau takat idaikujum pujutjum yapajiatajum, Apajuí atumi tudaugminash esaktugmag ichichmamtan amastinme. <sup>20</sup>Tuja Apajuí atumi uwemtijamjatnun Kristun, yaunchuk etegkauwa nuna ataktú awetugmatnume. <sup>21</sup>Tujash yamaikik Jisukristuk nayaimpinmag pujuttawai, ashí waji aidau yamagmitkamua tsawan jegatnun, Apajuí etsegtin aajakaju etsegkaju aina

nu jegatí tusa. <sup>22</sup>Moiseschakam ii muunjín chichajak: ‘Apu Apajuí makichik aentsun jutii wegantunmayan mina chichamjun etsegtujín atí tusa etejatnai mina utugtukua dutiksag, nunú antugkatajum. <sup>23</sup>Tuja ashí aents nunú Apajuí etsegtina nuna chichamen antugkachajuk tuke megkaekagtínai, niina aentsji aidaujaish ijunjachagtínai’, tiuwai.

<sup>24</sup>“Tikich Apajuín etsegtín Samuelash aikasag tiuwai; tuja nuigtú tikich Apajuí etsegtín aidaushkam Jisusan pachisag aikasajag ni taatnujinak tiajui. <sup>25</sup>Apajuí niina etsegtín aidaun anagkuauwa duka atumdauwai tuja jutii muunji aajakajua nujai chichaman apakua dushakam atumdauwai. Nuna tiuwa nunak juna Abragkan tiuwai. ‘Amina tijajum wegantunmaya makichik akiinatna nuaduí ashí nugkanmaya aidauk pegkegnum yumigsamu agtínai’ tiuwai. <sup>26</sup>Apajuí ni Uchijín maawagmatai inankí dekatkauk atunná awetugmae, mina Uchig yaigtínme dutikam makí makichik tudaujin idaisatnume tujamu asa.”

#### Pedro Juagjai apu aidau emtin chichakbau

**4** <sup>1</sup>Pedro Juagjai aents aidaun aujak chichaa wajai, sacerdote aidau, jega Apajuí ememattaiya nuna kuitamnun apuji, saduceo aidaujai kautkaju. <sup>2</sup>Nunikag Pedro Juagjai aentsun jintintak: Jakau aidau nantagtinnak, Jisus maam nantaak iwainak ukukni, tuidau asagmatai kajekaju. <sup>3</sup>Nunik achiká jukiag aents achiká egketainum egkeawag ukukiaju etsa akagu asamtai, kashín dekajuami tusag. <sup>4</sup>Tujash kuashat chicham etsegbaun antukaju dekaskepí tuidauk, imá aishmagkuk dekapam cinco mil aents wajasajui.

<sup>5</sup>Kashinia duwi Jerusalén ijunjaju judío apuji aidau, tikich apu aidaush-

kam, nuigtú chicham umiktínun jintinkagtín aidaujui. <sup>6</sup>Nuanuí pujau sumo sacerdote Anás, tuja nuwig pujuidau Caifás, Juan, Alejandro, nuigtú tikich sacerdote aidau, sumo sacerdote patayí aidaushkam. <sup>7</sup>Nunikag, Pedron Juagjai itantagmatai ejapeen awaantag iniinak:

—¿Yana senchijinia jusha, yana daajinia jutikagme? —tuidau.

<sup>8</sup>Tama Pedro Wakaní Pegkeji chichamtikam chichaak:

—Yaakta apuji, Israel aents aidaun apuji aidautigmeshkam antuktajum: <sup>9</sup>Atumek aents jau pegkegnum yaigkag nu pachisjum iniimjume, junash utugkag etsagaje tusajum shiig dekaata tusajum. <sup>10</sup>Nunín asamtai ujaktajime shiig dekaatajum, ashí Israel aents aidaush dekaatnume, ju aents ashí wainjum juka, Jisukristu Nazaretnumia atum achigjum maawagmin Apajuí inankiuwa nuna daajín tsagaje.

<sup>11</sup>“Nunú Jisus atum aidautigjum, aents jegá jegamin aidau kayan dakitug idayín aina dutikajum idaisauwaitjume. Tujash yamaik kaya dekas jegá ichichkatin apututia iman wajasé. <sup>12</sup>Tikichik iina uwemtijamainuk atsawai, ashí nugka aina nuwiyagkesh Apajuí juna nemajuinak uwemjatnume tusa awemamuk tikichik atsawai”, tiuwai.

<sup>13</sup>Pedro Juagjai ajankas chichaagtai apu aidau wainkag, papiinash ausachu unuimagchau aina nuninaitkush itugsaya imatikash chichainawa tusag anentai jegagchaju, nunikag dekas Jisusa jintintaimpap ainawa, tusag dekaawaju. <sup>14</sup>Aents tsagajush nuwig wajaun wainaidau asag, aikag nuní atsu jama tusag tumain dekapenachu. <sup>15</sup>Nunidau asag agaa jiijaju, nunikag juwakag ditá ditak ijunag chichainak:

<sup>16</sup>—¿Au aents aina dusha utugkag-tatji? Aentskesh dutikmainchaun

aikawaja nunak ashí Jerusalegnunia  
aidauk wainkajajama. Imatikawaju  
asagmatai waitai tusaikish tumaitsuji.  
17Tujash nuna pachis augmatiagtai  
tikich aidau Jisusan dekaskeapi tiinum  
tau asa: ‘Yamai nagkamsagmek Jisus  
pachisjumek makichik aentskesh  
ujakaigpajum, nu idaichakjuminig  
suwimkan amastatjime’ timí, —tuidau.

18Tusag Pedron Juagjai untsukag:

—Yamai nagkamsagmek Jisusa daaji  
pachisjumek makichik aentskesh  
jintintuawaigpajum, —tiaju.

19Tama dita aimainak:

—Atumesh anentaimsatajum ¿Apajuí  
emtinish pegkegai ni umigmaina nu  
idaiku atum umigmaina dusha? 20Jutiik  
ii wainkamu antukbau aina duka  
tutsukek idaimaitsuji, —tuidau.

21Tiagtai apu aidau:

—Atum nu idaichakjuminig suwim-  
kan amastatjime tusag awemaju,  
suwimak jumainnak waitkachaju asag.  
Nuigtú aents aidaush nunú dutikamun  
wainkag, Apajuin emematuidau  
asagmatai. 22Makichkish tsagaumain-  
chau aig etsagagbauwa duka cuarenta  
mijan tumain ajujakuí.

### Jisusa nemajin aidau Apajuí ausagbau

23Pedron Juagjai jiiki awemajui,  
dutikam Jisusa nemajin aidau batsatbau-  
num jegawag, sacerdote apuji aidau, tikich  
apu aidaujai tiagbaunak aatus tujabiagmae  
tusag ashí ujaidau. 24Tusa ujinam  
antukag ashí ijunag Apajuin aujuinak:  
“Apuh, ametme nayaim, nugka, nayants  
aina nu najankam ashí nui batsamsatin  
najankaumek, 25amina inakem David jutií  
muunji aajakua nunú Wakaní Pegkeji  
chichamtikam:

‘¿Wagka aents aidaush pampai-  
nawa? ¿Wagka shiig anentaimtsu-  
kesh chichamnash najanainawa?

26Nugkanmaya apu aidau nuigtú  
yaakta apuji aidaushkam ijunjag,  
Apun kajejuinak ni etegka Apu ema  
Uwentikagtin emauwa nunash  
kajejiagtinai.’

27“Tibau asamtai, Herodes Poncio  
Pilatojai jujú yaaktanum ashí Israel  
aents aidau, judiuchu aidaujai ijunjag,  
amina Uchijum Jisus pegkejam etegkam  
awemauwaitam nuna kajejuinak, 28ame  
yaunchuk nuniktin atí tibuwa dutiksag  
umikaje. 29Apuh, ameshkam dekame  
amina inakem aidaun awantuina duka.  
Dutikau asam senchijum susata, ditash  
ishamkagtutsuk chichamjumin etseगत-  
nume, 30nuninak jau aidaunash ame  
senchigmin etsagainak, ame Uchijum  
Jisusa daajin aents dutikmainchaunash  
iwainatnume, tusam.”

31Nuna tusa Apajuin aujus nagkanai  
dita batsatbau buchitkau. Nuna aatus  
nuniaig Wakaní Pegkeji aents nui  
ijununak ashí egkemtuju, dutikamu asag  
sapigmakas Apajuí chichamenak  
etsejuidau.

### Jisusa nemajin aidau pempentunisag yainikagbau

32Ashí Jisusa nemajin aidauk betekak  
anentain idajus anentaimtunaidau,  
nunidau asag betek anentaimaidau.  
Tuja makichkish imá midauk atí tusag  
anentaimainachu asag ikdaikag  
sudayidau. 33Tuja Jisus chicham  
etsegtugkatajum tusa etegkamu  
aidaushkam, Apu Jisusa senchijin ni  
maam nantakiuwa nuna pachisag  
etsejuidau, imadiagtai Apajuishkam  
niina nemagkaju aidaunak senchi  
yayau. 34Makichik aentskesh atsumamu-  
jig atsujuidau, wagki Apajuí yayamu  
asag. Nuninak ditá nugken sujukag, jee  
ajuinamunashkam sujuk kuichkin  
jukiag, 35Jisus chicham etsegtugkata-  
jum tusa etegkamu aidau batsatbaunum

itaidau, aents aidau atsumamujin diijus susatnume tusag. <sup>36</sup>Nuanuí makichik aents José, Leví wegantu ajuntai Chiprenmaya nuna Jisus etejamu aina nu Bernabé adaikamua nunú, nui pachitkau. (Bernabé tawa duka “ichich-kagtin” taku tawai.) <sup>37</sup>Nunú aents nugken sujuk kuichkin juki, Jisus etejamu aina nuna susauwai.

### Ananías Safirajai

**5** <sup>1</sup>Tuja Ananiaschakam niina nuwe Safirajai nugken sujukui. <sup>2</sup>Nunik kuichkin jukiag nuwejai chichasag, kuichkin akanak ukuinak, tikich akankamun jukiag Jisus chicham etsegtugkatajum tusa etegkamau aidaun susauwai. <sup>3</sup>Nunikmatai Pedro chichajak:

—Ananiasah, ¿wagka iwanch wakejamu takaakmesh, Wakaní Pegkeji tsanugtasamesh wakejame, nugkem sujukam kuichik jukim aminu amain ukukiuwaitkumesh? <sup>4</sup>Nugka sujukum duka aminui. Nunin asamtaí nugka sujukam kuichik jukium dushakam aminui. Nunin aish, ¿wagka jusha juniame? Amek aentsuk tsanugchaume, Apajuí tsanujume, —tau.

<sup>5</sup>Nu tusa tamawaik Ananiasak jaka iyaantui, tuja ashí aents nuna dekaawajuk senchi ishankajui. <sup>6</sup>Nunik jakamtaí datsauch aidau tajuntag pempeag jukiaju ukustatus.

<sup>7</sup>Nunik kampfatumchik hora nagkaemai, Ananiasa nuweshkam aishi jakamunak dekasuk wayau. <sup>8</sup>Nunikmatai Pedro iniak:

—Nugka sujuka kuichik jukimuk ashí itaji tibaujum nu ¿dekaskekaih? —tau.

Tutai nuwa ayaak:

—Ehé, nunichik sujukmaji, —tau.

<sup>9</sup>Nuwa tutai Pedro chichajak:

—¿Wagka aishumjai betekash Wakaní Pegkejiya dusha tsanugtasamesh wakegagme? Amina aishumin ukusag

ukuinak kauntaja anke aminashkam ukugmasagtatui.

<sup>10</sup>Tusa tamawaik Safirashkam Pedro wajamunum ayaumas jaka iyaantu. Nunikatman datsauch aidaushkam waikmá jaka tepettaman wainkag jukiag, aishi ukusbaunmag ayaunas ukusajui. <sup>11</sup>Nu nunikagbaun Jisusa nemagkaju aidauk tikich aents aidaushkam antukag senchi ishankajui.

### Aents dutikmainchau aidau kuashat iwainakbau

<sup>12</sup>Jisus chicham etsegtugkatajum tusa etegkamau aidau, aents dutikmainchau aidaun ashí aents wainainamunum kuashat iwainaidau; tuja Jisusa nemajin aidaushkam jega Apajuí ememattai Salomón waiti ujugbaunum ashí ijunaidau. <sup>13</sup>Tujash Jisusa nemajuinachuk eme anentus diinayatak ditajai ijuntanak dakituidau. <sup>14</sup>Tujash Jisusan dekaskeapi tusag nemajuidauk aan kuashat kawegku aishmag aidau nuwa aidaushkam. <sup>15</sup>Tuja jau aidaunashkam ainká tepetaijijai jiikiag jintanum batsaidau, Pedro nagkaematai makichkinakesh niina wakaní wakanman wajantati, dutikam tsagagtinme tusag. <sup>16</sup>Jerusalén tikiju batsataidaushkam jau aidaun, aents wakan pegkegchau waitkam batsamin aidaunash yajuakag ikaunmamu aidauk ashí tsagagkaju.

### Pedro Juagjai waitkasagbau

<sup>17</sup>Imatikiagtai sumo sacerdate, saduceo aidaujai wainkag senchi kajegkaju. <sup>18</sup>Dutikawag chicham etsegtugkata tusa Jisus etejamu aidaun achikag, aents achiká chimpitainum egkeawajui. <sup>19</sup>Tujash nayaimpinmaya aents kashi tajua waiti ujati jiyaak: <sup>20</sup>“Wetajum, nunikjum jega Apajuí ememattainum wayaajum, ashí ju chicham pujutan sukagtina jujú aents

aidau ujaktajum”, tiu. <sup>21</sup>Nu tabaun antukag kashinia duwi, jega Apajuí ememattainum wayawag jintinkagtuidau.

Nuninai sumo sacerdote ditajai ijunja chichataiji aidaujai, nuigtú ashí judío apuji aidau untsukag, chicham epegkata-tasa ijuntainum ijunjag, Jisus chicham etsegkata tusa etegjamu aidau achiká egkeamun: Jiikjum itatajum, tusag suntajan awemaju. <sup>22</sup>Tima jegajua diikmag wainkachaju, nunikag waketjag ditan ujinak:

<sup>23</sup>—Aents achiká chimpitaig shiig epenjamuwe, suntag nuna kuitamaidaushkam waitinum ijunmae. Tujash ujai wayaa diikmá wainkashmaji, atsuagmae, —tuidau.

<sup>24</sup>Tusa etsejuinamun sumo sacerdote, tikich jega Apajuí ememattain kuitamin aidau apuji, nuigtú sacerdote apuji aidaujai antukag ijunjag chichainak:

—¿Tujash nunash wajuakeakug nunikainta? —tusag anentai jegagchajui.

<sup>25</sup>Nuna tu ijunai makichik aents tanta: —Atum aents achikjum egkeamujum duka, jega Apajuí ememattainum wayaa batsamas aents aidau jintintú pujuagma jamah, —tuidau.

<sup>26</sup>Tiagtai suntajá apuji aidau niina suntajijai wejiag, shiig kuitamsag juki itawaju, tutit awajai aents juna antujuidau kayai tukú tukujuinakua mantuawainum tuidau asag. <sup>27</sup>Itawag, apu aidau tuwakbaunum ejapeen awantagmatai, sumo sacerdote chichajak:

<sup>28</sup>—¿Antukchamkajum ii yamai nagkamsagmek Jisus pachisjumek aents aidauk jintintuawaigpajum tibaijim duka? ¿Wagka antukchaugme? Atum aajajum ashí Jerusalegnumia jintinbau asag, jutii aidautin ditap nu aentsnak mau ainawa tujamainawai, —tuidau.

<sup>29</sup>Tuinam Pedro niina kumpají aidaujai chichainak:

—Dekas dekatkauk, aentsuk umigtsuk Apajuí umigkata tabauwa nuuwai jutiinuk. <sup>30</sup>Atum Jisus numi yapajiamunum achigjum maawagmin, iina muunji aajakajua nuna Apajuijiya nunú inankiuwai. <sup>31</sup>Dutika niina untsujin ekentsauwai Apu ema Uwemtikagtin atí tusa, nuigtú Israel aents aidau tudaujin idayinak tsagkugnagtinme, tusa. <sup>32</sup>Jutiik dekas wainkau asaja etsegji, tuja Wakaní Pegkejiya dushakam dutiksag etsegtau asa jutiinash dekamtijamji. Wagki Apajuik niina umijuina nuna Wakaní Pegkejiya nunak suwawai, —tuidau.

<sup>33</sup>Nunú tuinam kajekgag maata tuidau. <sup>34</sup>Nu apu aina nuwiya makichik fariseo Gamaliel chicham umiktinun jintinkagtin asamtai, chichamesh dekas umigtai wajakí:

—Atumek agaa jiinkijum machik wajastajum, —tusa jiikí ni wajanatá.

<sup>35</sup>Tikich apu aidau chichajak:

—Israel aents aidauwah, ju aents aidau maatasajum anentaimtuinajum duka kuitamamkatajum. <sup>36</sup>Adeagtajum yaunchuk, Teudas nigki wi apu atajai timatai ayú tusag, cuatrocientos aents saetus yujajuidau nuna maawagmatai wainak pampagkag megkaejajua nu.

<sup>37</sup>Nu nuniku ainai, Judas Galileanmayashkam aentsú daaji agatbau jegamunum, niinashkam kuashat aents nemagkajui, tujash nunash maawagmatai niina nemajuidauk pampagkajui. <sup>38</sup>Nunin asamtai dekas jujú aents aina juka waitkatsuk idaisatajum wetinme. Jujú dita takaina ju ditak jutiká yujainakug megkaekattawai; <sup>39</sup>Untsu dekas Apajuinuitkuig atumek depetmaitsujume, Apajuí takatji aig Apajuijai maaniaku aaní batsattsujiash, —tiuwai.

<sup>40</sup>Nuna tusag Jisus chicham etsegtugkatajum tusa etegjamu aidau awayawag asutiawag:

—Jisus pachismek aents aidauk ujakaigpajum, —tusag akupkaju.

<sup>41</sup>Tijam ditashkam apu batsatun ukukiag weenakush, shiig aneasag dakunkut weedau, wagki ditanash Apajuí eme anentus, Jisus pachisa etsegbaunum waittsatnume tabau asa.

<sup>42</sup>Tusá imatjuawagmashkam yamajam chichama nuna, Jisusnak Apajuí etegkauwai Uwemtikagtin atí, tusa etsegtanak idaitsuk, kashí kashinig aents aidaun jega Apajuí ememattainum, makí makichik jeganmashkam jintinkagtuidau.

**Yujumak yuwamun tinamkagtitin  
aidau etegjamu**

**6** <sup>1</sup>Nunú tsawantin Jisusa nemagkaju aidau kuashat kawegkaju asag, griego chichau aidau nuwe waje aidau, yutai shiig ajampenashbau asag, hebreo chichau aidaujai kajegdaikaju. <sup>2</sup>Nudiagtai Jisus chicham etsegtugkatajum tusa doce etegjamu aina nu, nui batsataidau asag, ashí Jisusa nemagkau aidau ijumjag chichainak:

—Apajuí chichame etsegmaina nu idaiku, yujumkan wajuk yuwawagtatua nu uyumaka wekaetuta duka shiigchawai. <sup>3</sup>Nunin asamtai yatsug aidauh, atum ainajum anuiya siete yatsug kajittsá diimain etegjatajum Wakaní Pegkeji ajamu, shiig anentaimas dutikmain, nunú aidau ju takatnak diistinme. <sup>4</sup>Nuninai jutiik Apajuí aujut, chichame etsegta nujai uyumakagmi.

<sup>5</sup>Nuna aatus tiagtai, aents tuwakaju aidauk wakekaju, nunikag etegkawaju Esteban Apajuíyaig kajinas anentaimna nuna, Wakaní Pegkejish ajamun, tikichin Felipe, Procoron, Nicanoran, Timogkan, Parmenasan, Nicolás Antioquianmaya judío atajai tumamiuwa nujai. <sup>6</sup>Nuna etegjag jukiag Jisus chicham etsegtugkata tusa

etegjamu aidau batsatbaunum ejegawaju, dutikawagmatai ditashkam buuknum achikag Apajuin aujtusaju.

<sup>7</sup>Tuja Apajuí chichame etsegbaushkam nuní senchi wegau, nunisag Jisusa nemajuidaushkam nuní senchi Jerusalegkak kawegkaju; sacerdote aidaushkam kuashat Jisusa nemajuidau.

**Esteban achiká jukimu**

<sup>8</sup>Apajuí niina senchijin, Estebangkan senchi yayau, dutikamu asa aents dutikmainchaun aents aidau iwaintau.

<sup>9</sup>Jega judío agkanmagau aidau ijuntai tutaya nui ijunin aidau, yaakat Cirenenmaya, Alejandrianmaya, nugka Cilicianmaya, Asianmaya aina nu ijunjag Estebagjai tudayinai. <sup>10</sup>Tujash Estebangkan wagagsag chichajuinachu, nigka Wakaní Pegkeji dekamtikam chichau asamtai. <sup>11</sup>Nunidau asag tikich aidau:

—Atum: ‘Moisesan pegkegchau chichajak, Apajuinashkam pegkegchau chichaju ii antugkabiaji’ titajum, —tusag wakenmag akikaju. <sup>12</sup>Nuna dutikawag aents aidau, judío apuji aidau, chicham umiktinun jintinkagtin aidounashkam inajaju. Dutikawajam Estebangkan achikag jukiag, chicham dekaku ijuntainum ejegawaju. <sup>13</sup>Dutikawagmatai wainak tsanumjuhti tibau aina nu chichajuinak:

—Ju aentsuk jega Apajuí ememattai pegkegma nuna pachis, chicham umiktina nunashkam pegkegchau chichajú wekaewai. <sup>14</sup>Jutii dekask antukbaiji, ni chichaak: ‘Jisus Nazaretnumiaya nunú ju jega Apajuí ememattaiya junak tsaiká idayak, Moisés ju jutikatajum tujabauwa nunashkam yapagkattawai’ timayi, —tuidau.

<sup>15</sup>Ashí aents nui ijunjajuk nuna tiagtai, shiig esettsag Estebangkan diikmag, nayaimpinmaya aentsu yapijai betek wajas eketun wainkajui.



**Esteban apu aidau emtin  
chichakbau**

**7** <sup>1</sup>Sumo sacerdotē Estebagkan: ¿Dekaskek tujamaina? tusa iniasu, <sup>2</sup>tama ni ayaak: “iYatsug aidauh, muun aidautigmesh antuktajum! Ii Apajuiji dekas imana nunú, iina muunji Abraham aajakua nuna, Harán wegatsaig Mesopotamia pujuttaman wantintuk, <sup>3</sup>chichajak: ‘Nugkemik pataim aidaushkam ukuktá, nunikam wetá wi nugkan inaktustatjam nui’, tiuwai. <sup>4</sup>Tima Abragshakam Caldea nugkanak ukuak, Harán nugkanum pujustatus weuwai. Nuwi pujai apají jakamtai, Apajuí ii yamai batsatag ju nugkanum awemauwai. <sup>5</sup>Tujash nugkanak niinu atí tusag susachui, eke uchijish atsujaig ayatak anagkuauwai, ni jakamtaish niina uchijí wegantu aidau batsamsatnunak susatnaitjai, tusa. <sup>6</sup>Nuigtushkam Apajuí Abragkan chichajak: ‘Amina uchigmiin akiinak wegagtina duka, tikich nugkanum pachinawag nugkenchau, inaku waitkam cuatrocientos mijan batsamsagtinaí’, tiuwai. <sup>7</sup>Tuja nuigtush Apajuí: ‘Wi ditan inak waitkaidaunak suwimkan susatnaitjai, dutika ai nuwiya jiiinjag jujú nugka juwi kaunawag mina umigtiagtatui’, tiuwai. <sup>8</sup>Tuja Apajuí Abragjai chichaman apaak, ashí uchi aishmag akiinuk pakaji<sup>a</sup> ajapjitajum tiuwai, tibau asa Abraham Isaakan akiag ocho tsawan wetai, dutikauwai. Isaakshakam Jacopan akiash dutiksag dutikauwai, tuja Jacobshakam aikasag doce uchijí aajakajua nunash dutikauwai.

<sup>9</sup>“Nunú Jacopan uchijí aidau iina muunji aajakajua duke ditá yachinak Josen wainak kajejuidau asag, Egipto

jukitnume tusag sujukajui. Tujash Apajuí Josejai au asa, <sup>10</sup>ashí ni waitiamujinak agkanmitkauwai, dutika yachantikauwai. Nunikmatai Faraón Egipto apujiya dushakam wakejus Josenak diisuí, dutikau asa: ‘Egiptunmag ame inamjata nuniakum ashí mina jegajuiyash amek diistá’, tusa apu emauwai.

<sup>11</sup>“Nuniku ai Egipto, Canaán nugkanmash ashí yapajut tepeauwai, nunikmatai ii muunji aajakajua dushakam yumainji atsujuinam senchi waituidau. <sup>12</sup>Imaní batsatu, Egiptunum trigo sujamu awai tabaun Jacob antuk, ni uchijí aidau ishiakui. Nunak nagkamchak wegashbaun wegajui. <sup>13</sup>Nunikaju ataktú sumaktatus jegamunum, José ni yachin wainak: ‘Wika atumin yatsumitjai’, tusa ujakajui, nunikmatai Faraogshakam Josek Jacopa uchijimpapi tusa dekauwai. <sup>14</sup>Nunik José, apajin ashí niina patayí aidaujai kaunatnume timatai setenta y cinco aents Egipto jegawajui. <sup>15</sup>Nui Egipto jegaa pujus Jacopak jakauwai, nunisag ii muunji aajakajua dushakam nuwig jinawajui. <sup>16</sup>Nunikagmataish ditá iyashí aidauak jukiag Siquem ejegawag, Abraham yaunchuk ukumatain Hamora uchijinun akikmak sumakua nui ukusajui.

<sup>17</sup>“Apajuí duwik Abragkan anagkuauwa nu uminkattak wajau asamtai, Jacopa uchijí wegantu aidauk shiig kuashat wajasaju. <sup>18</sup>Imanikaju ai, yamajam apu Egiptunum ekeemiuwai Josen wainchau. <sup>19</sup>Nunú apu jutii muunji aajakajua nuna tsanujá suwimkan suwinak waitkaidau; imatikainak uchi aishmag akiinkuig jutsuk ayatak maatajum, tusa inamjauwai. <sup>20</sup>Nunú tsawantin Moiseschakam akiinauwai, nunikmatai Apajuishkam

aneas diisuí, tuja apají ditá jeen kumpatum nantu uukag apusajui; <sup>21</sup> dutikawag uumainchau wajasmatai, uchi egkemainun najatuawag egkeawag namaká inanakiuwai. Dutikamun Faraogka nawanji wainak juki ni tuke uchijima tsakapajui. <sup>22</sup> Dutikamu asa Moisesak Egiptunmaya unuimataijinak ashí unuimaju aajakuí. Iman asa, chichamesh antugtai ni takatjinish imanuk ajakuí.

<sup>23</sup>“Cuarenta mijan ajamu ni patayí Israel wegantu batsatbaunum weuwai. <sup>24</sup> Nunikmá wainkauwai Egiptunmaya aents, ni patayí Israel aentsun suwimun. Dutiktai niishkam nuna ayamjak Egiptunmayan mauwai. <sup>25</sup> Moisés anentaimsag Apajuí mina yatsug Israel aents aina nunak, ni agkanmitkati tujuttata nunash dekgatuinawapi tau. Tujash ditak nunak duiyap aniawa tichajui. <sup>26</sup> Kashinia duwi Moisés niina patayí jimag ditak pempeentuniki maaninak tikichin suwimtatman wainkauwai; nunik epegtuatatus: ‘¿Wagka yatsumjaish pempeentunikjumes mesh maanish yujagme?’ tiu. <sup>27</sup> Tama yachin suwima nu Moisesan shitakiu, dutika: ‘¿Ya aminash apu chichaman epegkin atí tusash adaitamkame?’ <sup>28</sup> ¿Minash yau Egiptunmaya maamum dutiksamek mantuatasamek tujutam?’ tau. <sup>29</sup> Nu tima Moisesak tupikaki Madián nugkanum jegauwai, nunik nui pujus jimag uchin akiauwai.

<sup>30</sup>“Nui pujusá cuarenta mijan wegai, muja Sinaí tutain uwegshujin Apajuí aentsji nayaimpinmaya, numi jagkigtin zarza tutai kegamunum wantintuku. <sup>31</sup> Nunittaman Moisés wainak puyatkau, nunik shiig wainkatatus adjitmatman Apajuí utsuká: <sup>32</sup> ‘Witjai, amina muunjum Abraham, Isaac, Jacob aajakajua nuna Apajuijinuk’, tiu. Nuna tutai Moisesak senchi ishamak kujau,

diitnash diimainchau dekapeau. <sup>33</sup> Nunitai Apajuí chichajak: ‘Sapatjum ukuimakta, ame wajam anka nugkak pegkegmai. <sup>34</sup> Dekaskenum mina aentsug Egipto batsamas waituina nuna wainkajai, nuigtush buutainak mina untsujuina nunash antugkajai, nunikan ditan agkanmitkatasan taajai. Nuaduí ame Egipto nugkanum wetá’, tiuwai.

<sup>35</sup>“Israel aents aidau Moisesan dakituinak: ‘¿Ya aminash apu chichaman epegkin atí tusash adaitamkame?’ tiajua nuna Apajuí apu ema, ame agkanmitkata tusa awemauwai. Nunak nayaimpinmaya aents Apajuí awemamu numi jagkigtin zarza tutainum Moisesan wantintukua duwi tiuwai. <sup>36</sup> Tibau asa Moisés ii muunji Egipto nugkanum batsamtatman jiijuí, aents dutikmainchaun Egiptunum iwainak, nayants kapantu tutainmash, nuigtú cuarenta mijadai uwegshunum awekasashkam dutiksag iwainakuí.

<sup>37</sup>“Nunú Moisesak Israel aents aidau chichajak: ‘Wiiya jumamtinun tikichin Apajuí atum wegantunmayan makichik aentsun, mina etsegtujin atí tusa etegiatnai’, tiuwai. <sup>38</sup> Nuigtushkam Israel aents aidaujai uwegshunum batsatbaunmash Moisesan muja Sinaí tutainum, Apajuí aentsji nayaimpinmaya ausam, chicham pujutan sukagtina nuna jukiuwai, iina muunji aidau ujaktinun, dutikamun jutiinash ujakapajui.

<sup>39</sup>“Dutikamu ainayatak iina muunji aidauk chicham umitan dakituinak ayatak Egipto waketjagtatus anentaimajakajui. <sup>40</sup> Nunidau asag Aarogkan ii apajuimatin najanata ni emjuptakti, Moisés Egipto batsatjin jiiigmajamia duka dekgatsuji wajukants megkaeka, tiajui. <sup>41</sup> Tusag toro tsakata nuninun najanawag, kuntinun maa apeenak dita najanamujin emematuidau, dutikainak

shiig anentuidau. <sup>42</sup>Nudiagtai Apajuish-kam ditanak idaisauwai etsan, nantun, yaya aina nuna ememattinme tusa. Nunak Apajuí etsegtin nuniktinai tusa agak:

‘Israel aents aidauh,  
 ¿atum uwegshunum cuarenta  
 mijadai yujasuitjum duwish  
 kuntin maa apeakjumes  
 emematjiuk ainajum?’

<sup>43</sup> Duka dutijutsuk atum apajimatin  
 Moloc,  
 nuigtú yaya Renfán tutaiya nu  
 najanajum emematjukum jegam-  
 kamu takusjum yujau asagmin,  
 Babilonia nugkanum atushat  
 emattajime, Apajuí tiuwai.’

<sup>44</sup>“Iina muunji aajakajua nunú  
 uwegshunum jegan jegamkajui, Apajuí  
 Moisesan ame wainkaum imatiksamek  
 jegamkata tibauwa nuna. <sup>45</sup>Nunú jega  
 duka iina muunji jidiagtaish ditá uchijí  
 aidaunu juwakui, nunikua nuna  
 Josuejai tikich nugkanum aents  
 batsatbaunum utsanainak itawajui,  
 nunikag aents nui batsatunak Apajuí  
 yayasam jiiyajui, dutika itamuk David  
 pujujukua duwishkam aajakuí. <sup>46</sup>Apu  
 Davitak Apajuí wait anenjamu asa,  
 Jacob wegantu Apajuijiya nudaun jegan  
 jegamkatatus wakejukui. <sup>47</sup>Tujash  
 Salomón jega Apajuí ememattainak  
 jegamkauwai. <sup>48</sup>Dekaskenmag Apajuik  
 aents jega jegamkamunmag pujumai-  
 tsui. Juna pachis Apajuí etsegtin  
 chichaak:

<sup>49</sup> ‘Mina ekeemtaijuk nayaimpia  
 auwai, untsu mina najamtaijua  
 duka nugka nuuwai.

¿Minash wají jegak jegagtuktagme?  
 ayamainjush atsugta juniaish, ¿tu  
 amainaita mina ayamtaijush?’

<sup>50</sup> ¿Atumek wi ju aina junak ashí  
 najankauwaitag duka dekatsju-  
 mek? Apajuí tawai’, ” tiuwai.

<sup>51</sup>Nuna tusa Esteban: “Atum aidautig-  
 mek tuke antakchawk aajakuitjume,  
 antutaigminish, anentaiminchakam Apajuí  
 anentaimtuchu aina nunú anentai  
 ajutjamainawai. Atumek atumi muunjum  
 aajakajua nujai betek asajum Wakaní  
 Pegkejishkam kajejuinagme. <sup>52</sup>Apajuí  
 etsegtin aajakajua nunash, ¿iina muunji  
 aidaush waitkatskesh idaisauk aina? Ditak  
 Kristu taatnujin pachis etsejuidaunash maa  
 ajapejakú ainawai. Yamai Kristu  
 taamtaishkam nunisjumek atumes  
 wainkajum tsanú tsanumjuinakuajum  
 mauwaitjume. <sup>53</sup>Atum dekas chicham  
 umiktinun Apajuí aentsji nayaimpinmaya  
 sujamsamu takakiatkugmesh umiatsjume.”

#### Esteban maamu

<sup>54</sup>Esteban nuna aatus tutai, senchi  
 kajekgag, nainak taket emenawag katetmit-  
 kaidau. <sup>55</sup>Imaninaig Esteban Wakaní Pegkeji  
 ajamu asa, nayaimpin pagkaji diikmá Apajuí  
 tsawan wajasbaunum, Jisuschakam Apajuí  
 untsujinini wajattaman wainak:

<sup>56</sup>—Nayaim ujanmatai, Apajuí  
 Uchijiyaitak Aentsmaga Akiinauwa nu  
 Apajuí untsujin wajaun wainjai, —tau.

<sup>57</sup>Nuna tutai aents aidauk kuwishinak  
 paket epenkag, senchi pampanjag ashí  
 wajatjag achikag <sup>58</sup>jukiaju, yaaktan  
 ukumtiklag kayai tukuag maatatus, nuninak  
 ditá jaanchjinak awimajag datsauch Saulon:  
 —Ame kuitamkata, —tusa susajui.

<sup>59</sup>Imatika kayai tukuinam Apajuin aujak:  
 “Apu Jisusah, mina wakanjuk jujutkita”, tusa  
<sup>60</sup>tikishmag pujus senchi jiiká: “iApuh, ju  
 aents mina mantuinak tunamaina juka  
 ayatak tsagkujata!” tiuwai.

Nuna ti jakauwai.

#### Saulo Jisusa nemajuidaun waitkasbau

**8** <sup>1</sup>Sauloshkam: Estebagkak dekas  
 mantamnati, tusa chichamnak  
 ijutkau aajakuí.

Nunú tsawan wegamunum Jisusa nemajin Jerusalén batsatun waitkatan nagkamawajui. Imatikainam ashí pisajag pampagkaju Judea nugkanum, Samarianmashkam. Nuniagtaish Jisus chicham etsegtugkatajum tusa etegjamu aidauk nuwig batsatu. <sup>2</sup>Tuja Estebagnak wajumak aents Apajuin puyatjus umijin aidau, Estebagkan iyashin jukiag ukusag, senchi buutiajui. <sup>3</sup>Nuniamunum Sauloshkam Jisusa nemajin aidau makí makichik jeganum utua, aishmag aidau, nuwanashkam achig yajumu, aents achiká egketainum chimpiatatus.

#### **Samaria nugkanum Apajuí chichame etseggamu**

<sup>4</sup>Tujash aents pisajú aidauk, dita tuwí jeginawa nuanú yamajam chichaman pachis etsejuidau. <sup>5</sup>Nuniamunum Felipe Samarianmaya aidau yaaktajin jegaa, Kristun pachis etsegtai, <sup>6</sup>aents aidaushkam kaunkag Felipe etsegbaunash puyatjus antujuinak, aents dutikmainchau iwainamunash wainaidau. <sup>7</sup>Dutikak kuashat aents wakan pegkegchau egkemtuamu aidaunashkam etsagau, dutikamu asa wakan pegkegchau aidauk senchi untsamak jiinaidau, nuigtushkam wekaechau aidau, shutú aidaunashkam etsagakui. <sup>8</sup>Nuna dutiktai nunú yaaktanmaya aidauk shiig aneedau.

<sup>9</sup>Nuniamunum iwishin Simón daagtin aentsun etsagautai, Samarianmaya aents aidauk puyatjus diinam: “Wika imajaitjai” tumamá pujau. <sup>10</sup>Tutai ashí uchi, muun aidaujai nagkamas puyatjus antujuinak: “Juuwai ‘dekas Apajuí senchimitikamua duka’”, tuidau.

<sup>11</sup>Tuidau asag nuna antujuidau, duwik nagkamas ni tunchijiin tsanumak iwainamun puyatjus dii batsataidau asag. <sup>12</sup>Tujash Felipe yamajam chicham Apajuí inabaujin, Jisukristun pachis

etsegbaun antukag, dekaskeapi tusag kuashat aishmag, nuwa aidaujai yamimakajui. <sup>13</sup>Nuniamunum Simogshakam dekaskeapi tau asa yamimajui, nunik Felipejai wekaetan nagkabau, aents dutikmainchau kuashat iwainatai puyatjus diyau asa.

<sup>14</sup>Nuniamun Jisus chicham etsegtugkatajum tusa etegjamu aidau Jerusalén batsatu, Samarianmaya aidaush Apajuí chichamen wakejuinawai tabaun antukag, Pedron Juagjai awemajui.

<sup>15</sup>Dutikawajam ditashkam jegawag Apajuin aujtusaju, Wakaní Pegkejin jukitnume tusa, <sup>16</sup>ditaig makichkinmakesh Wakaní Pegkeji taachui, ayatak Apu Jisusa daajinak pachisag yamimakaju asagmatai, <sup>17</sup>Pedro Juagjai buuknum achikag Apajuí aujtuinam, Wakaní Pegkeji egkemtuajui.

<sup>18</sup>Jisus chicham etsegtugkatajum tusa etegjamu aidau aentsun buuknum achikag, Apajuí aujtutai Wakaní Pegkeji egkemtaun Simón wainak:

<sup>19</sup>—Minash aanú senchi sujustajum kuichkin akiktajime, wisha tikich aents aidau buuken achiaknush Wakaní Pegkejin egketin atajai, —tusa segauwai.

<sup>20</sup>Tutai Pedro chichajak:

—Amek kuichkigmijai megkaekaitme, Apajuí anentag sukagtusbauwa nunú kuichki sumakta tiu asam. <sup>21</sup>Amek jutii takainag jutikamkesh takamaitsume, amek Apajuí diismak shiig anentaimtsume. <sup>22</sup>Nuniau asam pegkegchau anentaimam nu idaikum Apajuí ausata. Ame anentaimsam tium nunash tsagkugtamain achaintash. <sup>23</sup>Wainjame, shiig senchi kajeam nuna, imaniau asam pegkegchau takata duka idaisashmin dekaepeame, —tiuwai.

<sup>24</sup>Tama Simón ayaak:

—Atum minash Apu segatjitajum, atum mina tujutjum nunú imanisag jegagti, —tiuwai.

<sup>25</sup>Pedro Juagjai Jisus pachisa etsegbaun ashimkag, Jerusalén waketuinak, yaakat Samarian ukukiag aents batsatbaunum weenak, yamajam chichaman pachisag etsejuidau.

**Felipe Etiopianmaya aentsun  
Jisusan pachis ujakbau**

<sup>26</sup>Nuniku ai nayaimpinmaya aents, Apajuí awemamu, Felipen chichajak: “Felipeh, wamkesam Jerusalén ukukim, yaakat Gaza tutainum jinta amatka nui aents atsamu uwegshua nui wetá”, tiuwai. <sup>27</sup>Nu tima Felipeshkam weu, nunikmá Etiopianmaya aents Jerusalén Apajuin ememattatus weu wakettatman igkugku, Etiopía apuji nuwa Candace daagtina nuna kuichikijin kuitamin. <sup>28</sup>Nugken waketak carrojí caballo wegaku japitaijiya nui egkemas Apajuí etsegtin Isaías agagbaun au aukawa wegau.

<sup>29</sup>Nunittaman Wakaní Pegkeji Felipen chichajak: “Au aents carronum wega au adijkata”, tiuwai. <sup>30</sup>Tama Felipeshkam adijkamá Apajuin etsegtin Isaías agagbaun au aukawa minittaman antujuk iniak:

—¿Ame aujam dusha, antakmek aujam? —tau.

<sup>31</sup>Tama ni ayaak:

—¿Wajuk antuktajaki, nuna taku tawai tusa ujachbaunush? —tiuwai.

Nuna tusa Felipen:

—Juwi wakam, ekeemsam ujatkata, —tusa segam niishkam wakauwai. <sup>32</sup>Ju agagbauwa juna auju:

“Uwig maatasa juki ematia numamtuk jukiag emagmayi maawagtatus, uwig uje tsupigmash takamtak tepegama nunisag niishkam chichakchabi.

<sup>33</sup>Nuniau asa ayatak yunumkabi, nunitaish makichkish ayamjauk atsusuí,

niina uchijgkesh atsugsauwai maamu asa.”

<sup>34</sup>Tibauwa nuna apu Etiopianmaya Felipen iniak:

—Wait aneasam minash ujatkata, ¿juna Apajuí etsegtin tiuwa nunash yana pachis takua tiuwaita? ¿Nigkik tumamiuwait, atsa tikichin takug tawa?

<sup>35</sup>Tutai Felipeshkam nunú ni auja nuna pachitus, chicham yamagman Jisusan pachis ujakú. <sup>36</sup>Nunik wegamunum entsa aunum jegaak:

—¿Ju entsa awa juwi wi yamimagta tamash wají utugchata amainaita? —tusa iniau.

<sup>37</sup>Tutai Felipe ayaak:

—Ame dekas anentaiminish dekaskeapi takumek yamimamainaitme, —tiuwai.

Tama ni ayaak:

—Wika Jisusak dekas Apajuí Uchijim-papita tajai, —tiuwai.

<sup>38</sup>Tutai carrujum awantata tima awantamtai, mai akaikiag entsanum jega Felipeshkam nunú aentsun yamijuí. <sup>39</sup>Entsanmaya jiinkimtai, Wakaní Pegkeji Felipenak jukiuwai. Dutikamtai apuk ataktuk wainkachu; tujash nunikmataishkam apu Etiopianmayag shiig aneas weuwai. <sup>40</sup>Felipek Azotonum wantinak, ashí yaaktanak nagkaetsuk Jisusai uwemtikagtau tusa chicham yamagma nuna chichá chichagkagtakua Cesareanum jegauwai.

**Jisus Saulo wantintukbau**  
(*Tak. 22.6-6; 26.12-18*)

**9**<sup>1</sup>Nuna nuninai Sauloshkam Jisusa nemajuidaun maatasa awantanak idaichau. Imaniau asa sumo sacerdoten jegají:

<sup>2</sup>—Papí agajam sujustá Damasco jegaan jega ijuntaiya nui wayaknush nuna inakmasan, Jisusa nemajuidaun aishmag, nuwa aidaujai achijan,

Jerusalén ikaunmaktajai, —tusa segau. <sup>3</sup>Tutai papiin agatug susau. Dutikam yaakat Damasconum jegaattak tikiju anem wajas wegai, pachiachmau nayaimpinmaya etsantug Saulon tenteauwai. <sup>4</sup>Dutikam nugká iyaaaju, nunikmá: “Saulo, Saulo ¿Wagka minash waitkajame?”, tabaun antukui.

<sup>5</sup>Tama Saulo iniak: “¿Apu amesh yaitpa?” tau. Tutai ni ayaak: “Wika Jisusaitjai, ame ya waitkame nuuwaitjai. Amek baka kajeká jagkin dajag beseakush dekaptama numamtuk, amek pegkegchau wegakum imaniame”, tau. <sup>6</sup>Tutai Sauloshkam ishamak kujaukmaikia: “Apuh, ¿wajukati tusamea wakejutame?” Tutai Apu Jisus ayaak: “Nantakim yaakat jegata, nunikamin awi ame dutikmainjumnak tujabiagtatui”, tiuwai.

<sup>7</sup>Aents Saulojai ashinuk senchi ishamkaju, chichamunak antuinayatak wainainachu asag. <sup>8</sup>Nunik Sauloshkam nugká tepau nantakí niimtakamá wainmamainchau wajasú. Nunikmatai aents aidau uwegnum egkesag Damasco ejegawaju. <sup>9</sup>Dutikam kumpatum tsawan, machikish niimtsuk, yujumkanash yutsuk, umutnashkam umutsuk pujau.

<sup>10</sup>Damasco Jisusa nemajin Ananías daagtin pujau, nunittaman Jisus wantintuk: “iAnaniasah!” tiuwai. Tama ni ayaak: “Apuh, juwi pujajai”, tau.

<sup>11</sup>Tutai Apu Jisus chichajak: “Jinta Untsug tutaya nui wetá. Nunikam Judasa jeen jegaam iniimsata Saulo daagtin Tarsonmaya pachisam, nui Apajuí aujak pujau wainkattame. <sup>12</sup>Wi ujakmajai, Ananías daagtin tanta uwejen buukmin antimpaktatui, dutijamantai niimtatme tusan”, tiuwai.

<sup>13</sup>Tusa tama Ananías chichaak: “Apuh, au Jerusalén pujusá amina nemagtamin aidaun tikima pegkegchau waitkamun pachitus mina ujatiagma jama. <sup>14</sup>Nunú

sacerdote apuji aidau inajam, juwiya amina nemagtamin aidau amina pachipasag chichaina nunash ashí yajuaktatus taajama”, tiuwai.

<sup>15</sup>Tutai: “Tutsuk wetá. Aunak wika mina pachitus ashí judiuchu tikich nugka aidaunmash, apu aidaunash, Israel aents aidaunashkam ujaktí tusan etegkajai. <sup>16</sup>Wi mina pachitus etsejak senchi waittsatnujinak ujaktatjai”, tiuwai.

<sup>17</sup>Tima Ananiaschakam, ayú tusa Saulo pujamunum weuwai. Nunik Saulo pujamunum jegá wayaa, niina uwejen buuknum achiaak:

—Yatsug Sauloh, Apu Jisus jintá minamin wantintugmaka nunú awetine, amina ataktú niimti, nunik Wakaní Pegkejinash jukiti tujamu asa, —tiuwai.

<sup>18</sup>Tusa achiká tamawaik, wamkes niina jiiina namaká saepaga numamtin kaketukui dutikam wainmakui; nunikmatai Ananías yamijuí. <sup>19</sup>Dutikam pimpijá pujamunash yujumkan yuwa chichag, Jisusa nemajin Damasconmaya aidaujai wajumchik tsawantai ijunag pujusú.

#### **Saulo Damasco chichagkagtukbau**

<sup>20</sup>Duwi pujus judfo jega ijuntai aidaunum wayaa chichagkagtak Jisusak Apajuin Uchijiyai, tusa etseju. <sup>21</sup>Nuna tusa etsegtaí, ashí aents nuna antuidauk puyatjukag:

—¿Juchaukaih Jerusalén wekagas, awiya aents Jisusan pachis chichaidau achig yajuaktatus aintú wekaetinuwe nu? ¿Aukechukait juwiyannash achijá sacerdote apujin sujukagtatus taa wekaemaya nunú? —tuidau.

<sup>22</sup>Tujash Saulok Apajuí senchijijai etseju, Jisusak dekas Kristui tusa. Imattai judfo Damasco batsataidau, wainak tu wekaewai tuinakush depetkachujui.

**Saulo chagkin muunnum egkea  
yaaktanmaya jiikbau**

<sup>23</sup>Nunikag dukap tsawan asag judfo aidau, itusaik Saulo maawag, tusag chichaman umijuidau. <sup>24</sup>Imatjuinamun Sauloshkam antugmamkau, tujash ditak tsawai kashishkam yaakat pegmagbau waitijin dakak batsamtuidau Saulo jiinkui maami tusag. <sup>25</sup>Imatjuidau asagmatai Saulo jintintaiji aidau chagkin muunnum egkeawag yaakat pegmagbaunum yakí iwakag kashi jiikiag awemajui, nuní uwemjauwai.

**Saulo Jerusalén wakitki jegaamu**

<sup>26</sup>Saulo Jerusalén jegaa tikich Jisusa nemajuidaujai ijunjatatus wakegau. Nunitaishkam ditak ishamaidau: “Saulok Jisusa nemagtsuapi”, tuidau asag.

<sup>27</sup>Nuninaig Bernabé Saulon juki, Jisus chicham etsegugkatajum tusa etegiamu aidau batsatbaunum ejegau. Dutika Saulo jintaa wesa Apu Jisus wainkamujin, Jisus Saulo ausamun, Saulo Damasconum jegaa ajankas Jisus pachisa chichasbaujai etsegtau. <sup>28</sup>Nunik Saulok Jerusalén juwak pujusá, ditajai ijunag wekagas ajankas Jisusan pachis chichagkagtau. <sup>29</sup>Nunik pujus judfo, griego chichaman chichau aidau Apu Jisusan pachis ditan ujidau, tutaish ditak ayatak maatatus chichaman umijuidau. <sup>30</sup>Dutikiagtatman tikich yatsut Jisusa nemajuidau nuna antukag, Saulon jukiag Cesareanum ejegawag nui inagkeak-ki Tarsonum awemajui.

<sup>31</sup>Dutikawagmatai Jisusa nemajuidau ashí Judea nugkanum, Galileanmaya, Samarianmaya aidaujai, shiig agkan batsatainak nuní senchi ichichmamaidau. Jisusnak ajantusag anentaimtuidau, nunidau asagmatai Wakaní Pegkejiya nu yayasajam batsatainak, ayatak nuní kuashat kawedau.

**Pedro Eneas etsagagbau**

<sup>32</sup>Pedro Jisusa nemajin aidau diyak wekaetau asa, Lidanum Jisusa nemajin batsataidaunashkam waikatatus weuwai. <sup>33</sup>Nunik nunú yaaktanum aents Eneas daagtin wekaechau asa, ocho mijadai imá pegajinig tepenun waikauwai. <sup>34</sup>Dutika wainak:

—Eneasah, Jisukristu etsaentamui. Nantakta nunikam ainak tepetaijum jukita, —tiu.

Tamawaik Eneasak pegkeg wajas wajakiuwai. <sup>35</sup>Dutikamun yaakat Lidanum nuigtú yaakat Sarognum batsamin aidau aents etsagamun waikag Apu Jisusan nemagkajui.

**Dorcas jakaun Pedro inankimu**

<sup>36</sup>Nunú tsawantin yaakat Jopenum, Jisusa nemajin Tabita daagtin pujau. (Duka griego chichamnumak “Dorcas” taku tawai). Nunú nuwak ashí pegkeg aina nunak takaak, aents ujunauch aidauunash yayaak pujau. <sup>37</sup>Imaní pujau Dorcas jakauwai. Nunikmatai iyashin shiig nijatjag jega makichkia ekeni jegamkamunum iwakag, makichik tesamunum awayaa aepsajui. <sup>38</sup>Pedro Lidanum pujau, Jope tikiju awa nui. Nuniaun dekajuawag Jisusa nemajin aidauhkam jimag aentsun akateak: “Jopenum megkaetugsuk tajutuati tujabiagmae, tusa ujaktajum”, tusa awetiaju.

<sup>39</sup>Tusa ujakajam Pedroschkam ditajai weu. Nunik jegamtai jukiag jakau tepamunum awayawag, ashí nuwa waje aidau tenteawag ijunтусag buutuinaik, Dorcas iwaaku pujusá jaanch peetai, kutug aidaujai najantaijin inaktuidau. <sup>40</sup>Dutikam Pedroschkam ashí aentsun jiiig idayak, tikishmag Apajuin aujus, nuwa jakaun pempentusag:

—iTabita nantakta! —tiu.

Tama nuwa jakaushkam niimi, Pedron wainak nantakí ekeemsau. <sup>41</sup>Nunikmatai Pedroshkam uwegnum achik awajai, Jisusa nemajin aidaun, nuwa waje aidaujui untuk ikaunman iwaintukaju. <sup>42</sup>Nunú dutikamun ashí Jopenmaya aidauk dekaawag Apu Jisusan dekaskeapi tiaju. <sup>43</sup>Nuna dutika Pedrok Jopenum Simón duwapé apijin tutaiya nuna jeen kuashat tsawan pujusuf.

**Cornelio Pedro utugtitajum  
tusa awemamu**

**10** <sup>1</sup>Yaakat Cesareanum, Italianmaya suntajan apuji capitán Cornelio daagtin pujau. <sup>2</sup>Duka ashí niina patayí aidaujui ijunas Apajuinak puyatjusag emematin aidau. Nunin asa judío ujunauch aidaun yayaak kuashat kuichkin suwau, nuniak Apajuinashkam tuke aujsagké au. <sup>3</sup>Nuní pujaun etsa dukap tegau ai, Apajuí aentsji nayaimpinmaya ni pujamunum waittaman shiig paan wainkau. Nunik chichajak:

“iCornelioh!” tiuwai. <sup>4</sup>Tama Corneliok puyatuk wajas dii wajatu, nunik ishamayat: “¿Apuh, wagka tujutme?” Tama nayaimpinmaya aents ayaak: “Apajuí, ame aujam nunak antugtamak, ame aents atsumaidau yayamunash ashí waitjamkae. <sup>5</sup>Nuniau asamtai yaakat Jopenum aents awemata, Simón, Pedro tutaya nuna utitnume. <sup>6</sup>Nigka tikich Simón duwape apijin tutaya nuna jeen nayantsan uwetus pujawai.”

<sup>7</sup>Nayaimpinmaya aents chichaman ujak wakitkintai, Cornelio jimag ni inaken, makichik suntajan dekas Apajuinak anentaimtus wekayin kajittsá diitaijjijai untuká, <sup>8</sup>ashí ni wainkamujinak ujak, duwi Jopenum awemauwai.

<sup>9</sup>Tusá tima kashinia duwi jintá eke Jopenum jegattak weenai, Pedroshkam

etsa tajiastatak wajasú ai, jega jegamká tuntupé paka inagnakbaunum wakauwai, nui pujus Apajuin ausatatus. <sup>10</sup>Nui pujus senchi yapajak yuwatatus wakegayatak eke inajiagtai, pujukmá niishkam shiig paan wainkauwai, <sup>11</sup>nayaim ujanmatai, sávana muun wegkagma iman makí makichik nagkatjamujin jigkatkamu nugkanum akaetatman, <sup>12</sup>nunú sabananum ashí kuntin yuchatai, chigki aidaujui, dapi aidaushkam pachimka chimpiamu yakiya akaiki, nugkaa tajamtai, <sup>13</sup>nayaimpinmaya chichaak: “Pedro, ju kuntin aina aanú maam yuwata”, tiu.

<sup>14</sup>Tama Pedro ayaak: “Apuh, dutikashtajai, wika ju aidauk yuwawaipajum tibauwa nunak tuke yuchaujai”, tiu. <sup>15</sup>Tutai awentsag nayaimpinmaya chichaak: “Apajuí pegkeg emakmauwa duka amek yuchaujai tiipa”, tiuwai. <sup>16</sup>Kampatumá dutika, duwi ataktú nayaimpinum awagkiuwai.

**Pedro judiuchu jeen wayaamu**

<sup>17</sup>Nunú nunikun wainak: “¿Wagkanuk aunash aik wainkaja?” tusa anentaimtú pujai, Cornelio aentsji aidau: Simogkan jee tuwí pujawa, tusag inii iniimainakua waitinum tantag, <sup>18</sup>senchi untsumkag:

—¿Ju jega juwi Simón daagtin, tikich daaji Pedro tutaya nu pujatsuak? —tusa iniimu.

<sup>19</sup>Pedro eke ni wainkamujiya nuna anentaimtú pujai, Wakaní Pegkeji chichajak: “Simogka kampatum aents egapainawai, <sup>20</sup>waamak akaikita, nunikam ditajai ijunjam utujimtsuk wetá, wi ditanak awemamjai”, tiuwai.

<sup>21</sup>Tama Pedroshkam akaiki, Cornelio aents ishiakbaun jegantun:

—Witjai, ¿wajuk asagma egatkugmesh miniugme? —tiu.

<sup>22</sup>Tama dita aiinak:

—Capitán Cornelio, aents dekas pegkegnak takau, Apajuinak puyatjus



emematin, ashí judío aidaush aneenak wakegas diin aina nuna, Apajuí aentsji nayaimpinmaya: ‘Pedro utitajum tusam awemata, ni taa ame dutikmainnak tujamti’, tima jutiin awetamatai minaji, —tuidau.

<sup>23</sup>Tusa ujakam Pedroshkam jegá awayawajui, dutikam nui kajigkaju. Nunik tsawajag Pedroshkam aents kaunkaujai wetai, wajumak Jopenmaya Jisusa nemajuidashkam uyudiaju.

<sup>24</sup>Nunikag ashí ashinkawag kashinia duwi, Cesareanum Cornelio ashí niina patayí aidaujui, dekas ni kumpají shiig tsanitaiji aidaun ipaa pujamunum jegawajui. <sup>25</sup>Pedro jegá jegattaman, Cornelio jiintuki igkuak tikishmatjau ememattatus. <sup>26</sup>Dutikam Pedrok achiká chichajak:

—Wajaita, wishakam ame aentsuitam annuketjai, —tiuwai.

<sup>27</sup>Tusa chichá chichakua waikmá Cornelio ipaamu aidau tuwak atatman wainkau. <sup>28</sup>Imanik atatman wainak Pedro chichajak:

—Atumek dekagme, judío aidautik judiuchu aina duka, ditá jeenkesh utuchu ainaji. Tujash Apajuí mina: ‘Wi pegkeg emakbauwa duka, pegkegchau ainawai, tiipa’ tusa dekamtijuame.

<sup>29</sup>Tujutiú asamtai, tajutuati tujamae tujutuinauish utujimkas wamkesan minimjai. Yamai dekaatasan wakegajai, wagka minash untsugkamugme nuna, —tiuwai.

<sup>30</sup>Tutai Cornelio ayaak:

—Cuatro tsawan pujajai, nuna wainkan, ju agkua juniai mina jegajuí pujusnuk yujumkan ijagmaan yutsuk pujusan, Apajuin aujgun pujumjai. Nuni pujai nayaimpinmaya aents jaanch dekas winchamtin wajaknun nugkuaju wajantuntame. <sup>31</sup>Nunik chichagtak: ‘Cornelio, ame Apajuí aujam nunak antugtamae, ame aents atsumaidau

yayam nunash waitjamkae. <sup>32</sup>Nunin asamtai yaakat Jopenum aents awemata, dutikam Simón, tikich daaji Pedro tutaya nuna itaatnume. Nigka, tikich Simón duwape apijin nayants uwetus puja nuna jeen pujawai’, tujutmae. <sup>33</sup>Nuna tujutiú asamtai wamkesan utugtitaum tusan awetim-jame, dutikamu asam ameshkam taume. Yamai Apajuí waipamunum juwi ijunjaji, nunidau asaja wakegainaji, amina Apajuí tujabau iishkam ame etsegkumin antukagtasas.

#### **Pedro Cornelio jeen chichagkagtukbau**

<sup>34</sup>Tima Pedro nagkama chichaak:

—Dekaske, yamaik wishakam shiig dekajai, Apajuik aents aidaunak akanag juka jushá awai, jushakam niishá awai tusag tatsui. <sup>35</sup>Ashí nugkanmaya aents aidau, niinak puyatjus anentaimtuinak pegkegnak takaagtaik, shiig anentus diyawai. <sup>36</sup>Apajuí Israel aents aidaun chichajak: ‘Jisukristu taa yamajam chichaman, shiig agkan batsamsatnun pachis etsegkatnai. Nigki ashí aentsun apuji atinai’, tiuwai. <sup>37</sup>Atumek ju chicham tibauwa juka, ashí Judea nugkanum Galileanmashkam Juan chichagkagtak yamijatujakua nui nagkamsajum dekau ainagme. <sup>38</sup>Apajuí Jisus Nazaretnumiaya nuna, Wakaní Pegkeji susa senchintikam; nuigtushkam Apajuí niini pujau asamtai wekagas, pegkejan takaak, aents iwanch egkemtuam waitú batsatanash etsagajakua dushakam shiig dekagme. <sup>39</sup>Jisus Judea nugkanum, yaakat Jerusaalegshakam, ashí ni takasbauji wainkau aidautik jutiyyaitji. Nunittaman numinum achijag maawaju ainawai. <sup>40</sup>Dutikawagmatai Apajuí kampatum tsawanta juwi inanki, iinashkam iwaintugmakui. <sup>41</sup>Tujash ashí aentsnak wantintugchawai, jutiú aidautin Apajuí duwik nagkamas, ju aidau etsegka-

tin atinme tusa etegjamu aidautinak wantintugmakui. Jutii aidauti dekas ni maamu nantakmatai ijuntuja yuwaku, umutash uwajagmai. <sup>42</sup>Nunidau asajin ni jutiiinak: ‘Wejum chicham etsegkujum, yamaik Apajuí Jisusnak aents iwaaku, jakau aidaujai etegkin ema apusae, tusajum etsegkatajum’ tusa awetabijui. <sup>43</sup>Ashí Apajuí etsegtin aajakú aina duka, Jisusan pachisag etsejuinak niina dekaskeapi tuidauk tudaujinish tsagkujam agtinaí tiajui, tiuwai.

#### Judiuchu aidaun Wakaní Pegkeji egkemtugbau

<sup>44</sup>Pedro tusa chichaa waji, Wakaní Pegkeji ashí aents nunú chichaman antuidaunak egkemtujajui. <sup>45</sup>Judío Jisusa nemajin aidau Pedrojai kaunkajuk, judiuchu aidaun Wakaní Pegkeji egkemtugmatai anentai jegagchajui, <sup>46</sup>tikich chichaman chichainak Apajuin emematuidau asagmatai. <sup>47</sup>Nudiagtai Pedro chichaak:

—Atumesh jutiijai betekak Wakaní Pegkeji jukiú ainayatkugmesh, ¿wagkagmek yamimagchatagme?

<sup>48</sup>Dekas yamimaktajum tusa, ashí yamikajui Jisukristu adaisag, dutikawajam Pedron:

—Juwi wajumak tsawankesh pujusam wetá, —tusag segajui.

#### Pedro ni wainkamujin Jerusalegnumian ujakbau

**11** <sup>1</sup>Jisus chicham etsegtugkatajum tusa etegjamu aidau, nuigtú Jisusa nemajin aidau Judea batsatushkam dekaawaju: Judiuchu aidaushkam Apajuí chichamen wakejus antuinawai tabaun. <sup>2</sup>Tujash Pedro Jerusalén wakitki jegamtai, chichaman patatuidau wajumak judío Jisusa nemajin aina nu: <sup>3</sup>—¿Wagka amesh aents judiuchu aidau batsatbaunum wemesh, ditajai

ijunjamesh yujumkash yuwaume? —tuidau. <sup>4</sup>Imatjuinam Pedroskam, ashí ni wajuk wekaesae nui nagkamas, wainkamujinash pachis ditan ujainak:

<sup>5</sup>—Wika yaakat Jopenum pujusan Apajuí ajuj pujukman, nayaimpinmaya sávana muun wegkagma iman makí makichik nagkatjamujin jigkatkamu nugkanum akaetatman wainkamjai, <sup>6</sup>nuniakui esettsan diikman ashí kuntin yuchatai aidau, chigki aidaush, dapi aidaushkam pachimka chimpianum wainkabajai. <sup>7</sup>Nuniai nayaimpinmaya chichagtak: ‘Pedro, ju kuntin aina nu maam yuwata’, tujutmayi. <sup>8</sup>Tujutkui wi ayaakun: ‘Apuh dutikashtatjai, wika ju aidauk yuwawaipajum tibauwa nunak tuke yuchaujai’, tibajai. <sup>9</sup>Nuna tai awentsag chichagtak: ‘Amek Apajuí pegkeg emakbauwa duka pegkegchau ainawai tumaitsume’, tujutmayi. <sup>10</sup>Kompatuma imania iwaintujuk ataktú nayaimpinum awagkibi. <sup>11</sup>Nuna dutikamtai pujai, Cesearanmaya apu awemamu kempatun aents jega dekas wi pujamunum tajutiagmayi. <sup>12</sup>Nunikagmatai Wakaní Pegkeji chichagtak: ‘Utujimsuk ditajai wetá’, tujutmayi. Tujutmatai jujú seis Jisusa nemajin aina jujai wegagmai, nunika jega ditajai utsanabiji. <sup>13</sup>Nunika ajin, Cornelio niina jeen Apajuí aentsi nayaimpinmaya waintintuk chichajak: ‘Aents awemata yaakat Jopenum. Simón, Pedro tuuta awagmatia nuna utitnume. <sup>14</sup>Dutikam ni tajutjama ame, amina pataimijai uwemjatnugminak shiig ujakpakti, tujutmae’ tusa ujakpakmayi. <sup>15</sup>Wi dita batsatbaunum jegaan ditajai chichai, jutiiin yama nagkamchak utugtambakia ditanash dutiksag Wakaní Pegkeji egkemtujagmae. <sup>16</sup>Nuna nunikmatai adeagmajai, duwik Jisus chichaak: ‘Juagkak yumí yamijatujakuí, tujash wika Wakaní Pegkejiyai yamigti-

naitjime', tujabauwa nuna. <sup>17</sup>Nunin asamtai, Apajuí jutiin Apu Jisukristu dekaskeapi tusa nemagjin, Wakaní Pegkejin amasajua dutiksag ditanash susaja nunash, ¿wisha yaitja Apajuí dutikaun, dutikawaipa titinnush?

<sup>18</sup>Nuna aatus tabaun Jerusalegnumia Jisusa nemajuidauk antukag, shiig anentaimsag Apajuin emematuinak:

—Dekas Apajuiya duke judiuchu aidaunash yamaik dekas pujutjin yapajiwag, pujut nagkanchaun jukitnime tusa aikae, —tuidau.

#### Antioquianum Jisus nemajut nagkamamu

<sup>19</sup>Estebagkan maawagmatai pujusag, Jisusa nemajuidau waitkatan nagkamawajui. Dutikainamu asag wajumak Fenicianum weenai, Chiprenmash, Antioquianmashkam shiyakaju. Nui batsamsag yamajam chichaman Apu Jisusan pachisag imá judío aidaunak jintintuidau. <sup>20</sup>Nuninai wajumak Jisusa nemajin aidau Chiprenmaya, Cirenenmaya aidau yaakat Antioquianum jegawag, griego aidaunashkam yamajam chichaman Apu Jisusan pachisag ujaidau. <sup>21</sup>Nunidau asagmatai, Apu Jisuschakam ditanak niina senchijin suwau. Aatsa dutikainamu asag kuashat aents ditá pegkegchahu anentaimtaijinak idayinak, Apu Jisusnak dekaskeapi tusag nemagkajui.

<sup>22</sup>Nunú nuninamun Jisusa nemajuidau Jerusalegnum batsatu antukag, Bernaben Antioquianum awemajui. <sup>23</sup>Dutikam jegaa, Apajuí wajuk yayawa nuna wainak senchi shiig aneasu. Nunik: Anentaiminish shiig ichichmamejajum Apu Jisus nemagkatajum, tusa chichaju. <sup>24</sup>Bernabek aents pegkeg,

Wakaní Pegkejish ajamu, kajintsá anentaimtanmash imanuk asa, kuashat aentsun Jisusdau atinun ijumjauwai.

<sup>25</sup>Nuna dutika Bernabek Tarsonum weuwai Saulon egaak, <sup>26</sup>nunik wainak Antioquía jukiuwai. Nuwi Apu Jisusa nemajin aidaujai makichik mijan pujusuí, kuashat aents aidaun jintintak. Nunik Antioquianum nagkamas, Jisus mina chichameg etsegtugkatajum tusa etegjamu aina nuna, “Kristunu” ainawai, tiuwai.

<sup>27</sup>Nunú tsawantinig wajumak Apajuí etsegtin Jerusalegnumia Antioquía wegaju, <sup>28</sup>nuanuiya makichik Agabo daagtin wajakí, Wakaní Pegkeji chichamtikam: “Senchi yapajut ashí nugkanum tepeattawai”, tusa etseju, duka Apu Claudio inamak pujai jegauwai. <sup>29</sup>Nunikmatai Jisusa nemajin Antioquianmaya aidau, tikich Jisusa nemajuidau Judeanum batsamas waitiagtai, yaigmí tusag makí makichik aents dita wajupa susatjai tawa dutiksag, dutikati tusag umikajui. <sup>30</sup>Dutikawag anenjauch ijumjamun jukiag, Bernabé Saulojai wegagtai, Jisusa nemajin aidaun apuji Judea batsataidaun awetiajui.

#### Jacobon mainak Pedro achiká egkeamu

**12** <sup>1</sup>Nunú tsawantaik apu Herodes ni suntaji aidaun Jisusa nemajuidau achigtajum tusa ishikau. <sup>2</sup>Dutikak Jacobo<sup>b</sup> Juagkan yachiya nunak: Espadayai maatajum, tusa inamjauwai. <sup>3</sup>Nu dutikamu judío aidaun shiig awajkagmatai: Pedroskam achiktajum, tima achikajui. Duka tsawan pag lewaduragtuchu yutaiya nu jegamunum nunikui. <sup>4</sup>Dutika achikag-

**b 12.2** Ju “Jacobok” Juagkan yachi Zebedeo uchiji Jisus chicham etsegtugkata tusa etegkamu aajakua nunuwai. Jacoboa duke Santiago tuuta awagmataiyai.

matai Herodes aents achiká chimpitainum Pedron egkeauwai, dutikak dieciséis suntajan: Atum cuatro cuatro kanagjum Pedro kuitamkatajum, tusa ishiakui. Nunak: Jista Pascua nagkaemakmatai aents aidau ijunjamunum jiikin, chichaman dekajuatjai, tusa anentaimu asa dutikauwai. <sup>5</sup>Dutikamu asa Pedrok aents achiká egketainum shiig kuitamkam egketu, nuniai Jisusa nemajin aidauk, Pedron pachisag mijattsuk senchi Apajuin aujtuinak batsatu.

**Pedro aents achiká egketainum  
pujaun Apajuí jiikbau**

<sup>6</sup>Nunú kashia duwik, Herodes: Kashin jiiktajai ashí aents waikatnume, tusa tibauk tsawaatsaig, Pedrok jimag suntag ejapeam, jimag jiju ikagmauwai jigkajam kanú tepau, nuniai tikich aidauk waitin kuitamainak ijunaidau.

<sup>7</sup>Nuninai Apajuí aentsji nayaimpinmaya awemamu wantintuku. Nunikmatai jega aents achiká chimpitaig tsawan wajasuí. Nunik nayaimpinmaya aents wayaa Pedro kanag tepettaman bijagnum antig ishintaak: “Wamkesam nantaktá”, tiuwai. Nuna taig Pedro jiju ikagmauwai jigkagbauk tsujinag kakekauwai.

<sup>8</sup>Nunikmatai nayaimpinmaya aents chichajak: “Jaanchjum nugkujam akachumam, sapatjumshakam wegamakam shiig jigkagtá”, tiuwai. Tima Pedroskam dutiksag umikmatai, nayaimpinmaya aents chichajak: “Pataká nugkutaikum nugkujam, wi wegakuí pataetugkata”, tiuwai.

<sup>9</sup>Tama Pedroskam nayaimpinmaya aents wetai pataetuku, jusha dekaskeash junia tusa shiig dekachiatak. Nigka kajanum wantintugbaunash wainag tau.

<sup>10</sup>Juwakiag suntag dekatkau kuitamak ijunun nagkaikiag, tikich ijununashkam dutiksag nagkaikiag, kempatuma juwi

dekas waiti ayatak jijuk epenbaunum jegantajui. Nuniamunum nu waiti iman nigki ujaniuwai. Nunikmatai jiinkiaju, nunik jinta yaaktanum wegaunum kuwaká waketak, imá Pedronak ukukiuwai.

<sup>11</sup>Dutikam Pedroskam: “Dekaskeap mina Herodes achijuk mantuata tau asantai, Apajuí ni aentsjin awetuji jutijawa, mina pataag judío aidau mina waitkagmain aina nuna agkanmitkajuatatus”, tusa anentaimjau.

<sup>12</sup>Nuna tusa idayak, Juan tikich daaji Marcos tutaya nuna dukují María pujamunum, kuashat aents ijunag niina pachisag Apajuin aujtuinak batsatbaunum jegantá, <sup>13</sup>Pedro waitin ijuau ujatjitnume tusa, nunitai nuwauch Rode daagtin yakita tus diistatus jegantú.

<sup>14</sup>Nunik jegantá waitinak ujatsuk wajas antukmá, Pedro chichamen antujuk shiig aneas tupikaki wakitki:

—Pedro tanta waitinum wajawai, —tiuwai.

<sup>15</sup>Tutai:

—iWainkam tatsumek!, —tiajai.

Tama:

—Atsa, dekas ni chichamen antugkamjai, —tiuwai.

Tutaishkam:

—Pedrok amaitsui, niina wakanitskai-tai, —tiajai.

<sup>16</sup>Nuna tuinai ataktushkam waitin ijuau, dutiktai waitin ujakmá, Pedron wainkag puyatkajui. <sup>17</sup>Nuninaig jegá wayaa uwejen takuinu bitat asatajum tusa, nunik wajuk Apajuí aents achiká chimpitainum egketun jiikne nuna etseju, nuna etsejuk nuigtú:

—Atum anuí Jacobo, tikich yatsut aidaushkam ujaktajum, —tusa ukuak nigka jinki yajá weuwai.

<sup>18</sup>Pedro nuniku ai tsawagmatai, suntag aidauk nuna emegkakag:

—¿Dusha wajukamki, utusag jiinkime? —tusag senchi pampaidau.

<sup>19</sup>Nuniku ai, Herodes suntajan: Pedro egaktajum, tusa ishitkauwai, dutikamu wainkachagmatai: Achikbaun kuitamin aina nunú kajegtajum, tusa ishitkam kajegkajui, nuna dutika Herodes Judeanak ukuak Cesarea weuwai nui pujustatus.

#### Herodes jakamu

<sup>20</sup>Herodes Tironmayan, Sidognumia aina nuna shiig senchi kajegkauwai; tujash dutikamu ainayatak apu Herodesjai chicham apakmí tusag chichaman umikag, Blasto apu Herodesjai takau asamtai, kajintsá diitaijiya nuna chichajuinak: “Wait aneasam ame jutii pachijattsam, dekas kajegdaisuk agkan batsamsagmi tuinawai tusam apu Herodes titá”, tajui Herodes inabaujiniyan yutain sumaidau asag. <sup>21</sup>Tiagmatai Herodes tsawantan dekapatuawai, nunik nu tsawan jegamtai jaanch dekas pegkeg apú nugkutaijin nugkug shiig iwagmamag, chicham dekaatasa ekeemtainum ekeemas nagkama chichatai, <sup>22</sup>aents aidauk senchi unsumkag: “iShiig aentschauwai, Apajuí chichau wajawai!” awajuidau. <sup>23</sup>Nuna imatjuinai, Apajuí ni aentsji nayaimpinmayan makichik awetim jatan susauwai, Apajuin emematchau asamtai; dutikam dukap atsuk Herodesak aka amukam jakauwai.

<sup>24</sup>Tujash Apajuí chichamega nunak aan nagkaemasag ashí antamunum etsejuidau.

<sup>25</sup>Bernabeshkam Saulojai dita takaamujinak ashimak, Jerusalén waketuinak Juan, tikich daaji Marcos tutaya nuna jukiaju.

#### Bernabé Saulojai Apajuí chichame etsegku yujasbau

**13** <sup>1</sup>Yaakat Antioquianum Jisusa nemajin aidau batsatbaunum Apajuí etsegtin aidau, jintinkagtin aidaushkam batsataidau. Nunuka ju

ainawai: Bernabé, Simón (Shuwin tutai), Lucio Cirenemaya nu, Manaén (Herodes Tetrarrajai ijunas tsakajua nu) nuigtú Saulo aatus. <sup>2</sup>Nuninak, Apajuí emematuinak yujumkan ijagmakag batsatai, Wakaní Pegkeji chichaak: “Bernabek Saulojai awematajum, wi dita takastinun mamiktuawaitag nui wegag takastinme”, tiuwai.

<sup>3</sup>Tiajam yujumkan ijagmawag, buuknum achikag Apajuin aujtusag awemajui.

<sup>4</sup>Nunik Wakaní Pegkeji awemam yaakat Seleucia jegaa, botenum egkemag katigkaju nayantsa ajuntaijin Chipre tutainum. <sup>5</sup>Nunik yaakat Salamina tutainum jegawag etsejuidau Apajuí chichamen juga judío ijuntainum. Juan Marcos tutaya nunashkam yaimpakti tusag ayajui.

<sup>6</sup>Nu ajuntainmag ashí wekaetus chichamnak etsejuk ukuinak, yaakat Pafos tutainum jegawajui. Nunikmá wainkajui judío aents Barjusus daagtin, iwishin Elimas tuuta awagmatai pujaun. Duka wainak Apajuin etsegtinaitjai tusa tsanumin aajakuí. <sup>7</sup>Nunú iwishnuk apu Sergio Paulo tutajai pujau. Nunú apuk dekas yacha aajakuí. Nunú Bernaben Saulojai untsukuí, Apajuí chichamen antuktatus wakegau asa. <sup>8</sup>Nunittaman iwishin griego chichamaik Elimas tutaya nu, Apu Sergion utugchatan aputau: Chichaman antuk dekaskeapi ti tau asa. <sup>9</sup>Tutai Sauloshkam tikich daaji Pablo tutaya nu; Wakaní Pegkeji ajamu asa shiig emetug diis iwishnun chichajak:

<sup>10</sup>—Amek tikima wait, pegkegchau, iwanchin uchijí, ashí pegkeg aina nuna shiwajiyaitme. ¿Wagka Apajuin chichame dekas pegkeja dusha, pegkegchauwa nuninush chichagme? <sup>11</sup>Yamai Apajuí suwimkan amasmatai, wainmachu wajasam etsa etsanbaush waintsuk dukap tsawan pujustatme, —tiuwai.

Nunú tamawaik iwishnushkam wainmachu wajasá, aentsun egakú egkegsamtaí wekaesatjai tusa. <sup>12</sup>Dutikamtaí apushkam, Apajuí chichame etsegbaunash puyatjus antuku asa, nuna wainak wajak dekaskeapi tiuwai.

**Pablo Bernabesai yaakat Antioquia,  
Pisidia nugkanum awa nui  
chichagkagtukbau**

<sup>13</sup>Pablo ni kumpají aidaupai Pafos jegawag, botenum chimpimjag Perge shiyakaju, Panfilia nugkanum awa nui. Nui batsatbaunum Juagkak ditan ukuinak Jerusalén wakitkiuwai. <sup>14</sup>Nunikmataí ditak Perge ukuinak Pisidia nugkanum, yaakat Antioquia awa nui wegajui. Nui pujai, tsawan ayamtaí tsawagmataí jega judío ijuntaijin wayawag ekeemsajui. <sup>15</sup>Nuniai chicham umiktin agagbauwa nuna, Apajuí etsegtin agagbau aidaunash ashí aujus ashimkag, jega ijuntaiya nuna apuji chichajuinak:

—Yatsug aidaup, atumesh jutii tukagtu-main chicham ajutjamkujaig tukagtitajum.

<sup>16</sup>Tama Pabloskam wajakí, uwejen takuinu bitat asatnume tusa, nunik:

—Israel aents aidaup, ikaya aidaupijum Apajuí puyatjusjum umijin aidaupigmeshkam antugtuktajum. <sup>17</sup>Israelan Apajuijiya nu, iina muunji aajakajua nuna etegiauwei, dutikamu asa kuashat aents wajasajui eke Egiptunum pachiinas batsatiatak, imanikagmataí Egipto batsatun Apajuí niina senchijiin jiijuí. <sup>18</sup>Dutika yajuak uwegshunum cuarenta mijan batsas, dita pegkegchau takaagtaish katsunjuawai. <sup>19</sup>Dutika Canaan tutainum, siete nugkanmaya ditash chichaaku aidaup batsamnun depeetuk ii muunji aidaup batsasuf. <sup>20</sup>Nunak ditak cuatrocientos cincuenta mijan apugtuchu batsamsajui.

“Nunidaun Apajuí apu chichaman epegkin aidaup adaitujui, nunis batsataig makichik uchi Apajuin etsegtin atin,

Samuel akiinauwai. <sup>21</sup>Nunik pujusmataí, Samuelan segau ainawai: Iina apujish ajutjamti, tusag. Tiagtaí Apajuí Saulan Cisa uchijin, Benjamín wegantun: Ju atumin apugmik atí, tusa susauwai, dutikam cuarenta mijan inamjuawai. <sup>22</sup>Dutikamun Apajuí idaimittak Davitan: Ju apu atí, tusa adaikauwai. Dutika Apajuí chichaak: ‘David Isaí uchijiya juna wainkajai, jujú shiig awajtaiwai, wi wakejamunash betek umigtumaina nuna.’ <sup>23</sup>Nunú David wegantunum akiinauwai Jísus, Apajuí: ‘Israel aents aidaupigmin uwemtijamjatnun awetitnaitjime’, tusa anagtamaupa nunú. <sup>24</sup>Tujash Jísus eke jintinkagtutan nagkamtsaig, Juan ashí Israel aents aidaunak: ‘Tudau takat idaikujum yamimagtajum’, tusa chichajú wekagu. <sup>25</sup>Nuniai Juan jakatnuji tikiju wegau asamtaí chichaak: ‘Wika atum anentaimjutjum duchauwaitjai; tujash mina ukujui makichik minittawai, nunak wika niya imanchau asan niina sapatjinakesh atitmaitsujai’, tiuwai.

<sup>26</sup>“Yatsug aidaup Abraham wegantu aidaupwah, nuigtú tikich nugkanmaya aidaupijum Apajuí puyatjusjum umijin aidaupigminash, Apajuí ju chicham etsegbaun antukag uwemjatnume tusa awetugmaje. <sup>27</sup>Tujash Jerusalegnumia aidaup, ditá apuji aidaupshkam, juka Jísusapi tichaju ainawai, nunisag Apajuin etsegtin agagbaun ashí tsawan ayamtaí tsawautai jega ijuntainum aujuinakush, nuna takumpap tawa tusag dekainachu asag; Jísusan mantamnati tiaju ainawai, nuna dutikainak Apajuí nunikti tibuauwa nuna umikajui. <sup>28</sup>Ni bakumamainjig atsujai, Pilatun segajui maami tusag. Dutika mau ainawai. <sup>29</sup>Nuna dutikainak umikajui agagbaunum chichaak: ‘Jísusak dutikam atinai’, tibuauwa nuna. Dutikawag Jísus iyashinak numinum achijam detaun akakí jukiag ukusú ainawai. <sup>30</sup>Dutikawagmataishkam Apajuí jakaunak inankiuwai.

<sup>31</sup>Dutikam kuashat tsawantai wantintukui Galilea nagkamas Jerusalegkash tuke niijai ijunag yujajakú aina nuna. Nunú ainawai yamai niina pachis, ashí aents aidaush antuinamunum etsejuina duka.

<sup>32</sup>“Nuaduí jutiishkam yamajam chicham atuminish etsejuinai: Apajuí ii muunji aajakajua nuna anagkuauwa nu, <sup>33</sup>duka yamaik jutii ni wegantu ainag nui uminkae, Jisusan inankiuwa nuaduí. David Salmo2.7num agak tiuwai: ‘Ametme mina uchigmek, wi akiinati tima akiinau asam, nuaduí pujutnash wiki amasjai’, tibauwa nunisag. <sup>34</sup>Apajuí junak emtika etsegekawai, Jisus inankim ajumaish tuke jakashtina nuna pachis: ‘Wi Davitan dekas pegkeg aidaun anagkuauwaitag nunak aminí umiktinaitjai’ tusa. <sup>35</sup>Nuaduí tikich Salmonmash: ‘Ame uchijum pegkegma nuna iyashí kaugtí tusamek idaisashtatme’, tibauwai. <sup>36</sup>Dekaskenmag duka David pachisa tichamui, nigka ni wegantu aina nuwig Apajuí dutikata tibaunak ashí imatiksag umik jakauwai, nunikmatai niina muunji ukumataijinig ukusam kaujuí. <sup>37</sup>Tujash Jisusa iyashig kaugchawai, Apajuí inankimu asa. <sup>38</sup>Yatsug aidauh, atumesh ju shiig dekaatajum: Jisusai tudau tsagkugnawak awai, tusa etsejuinag nu, <sup>39</sup>tuja Moisés chicham umiktinun amasajua nunú umikmawaikish, bakuma-maichau ainagme tamakesh asachuitjume; tujash ashí aents Jisusai dekaskeapi tusag sujumanaidaunak bakumamainchau emakajui. <sup>40</sup>Kuitamamkatajum Apajuin etsetgin aidau agagbauwa nu atumin uminkai. Nunú agagbau tawai:

<sup>41</sup> ‘Antuktajum dushikkagtin aidauh.

Wi Apajuí asan,  
atum puyatjusa diimainun iwainta-  
mash dekaskeapi tichatnaitjume,  
tuja tikich aentskesh nuna ujpaina-  
kuish pachikchatin ainagme.  
Nunidaun asajum megkaejatnait-  
jume.”

<sup>42</sup>Juna tusa ashimak Pablo ni kumpají aidaujai, jega judío ijuntainmaya jijnjagmatai, judiuchu aidau:

—Tikich tsawan ayamtai atata duwishkam jutiksamek ujjatkata, —tusag segaidau. <sup>43</sup>Nunú ijunbau ashimnakmatai, judío aidau, tikich judío atajai tumamiu aidaujai Pablon Bernabejai pataetukajui, nuniagtai:

—Atumek Apajuí anempaidau asag wait anenjamjum asagmatai, shiig ichichmamjum pujustajum, —tusa chichagkajui.

#### **Pablo Bernabejai Judío aidaujai pampandajum**

<sup>44</sup>Nunú tsawan ayamtai jegau asamtaí, kuashat aents yaaktanum batsamin aidau ijunjajui Apajuí chichame etsegbaun antukagtatus. <sup>45</sup>Imaanik aents tuwakajun judío aidau wainkag senchi kakajag, Pablok wainak tu wekaewai tusag pegkegchau chichajuidau. <sup>46</sup>Tuinam Pabloskam Bernabejai puyatkas chichainak:

—Dekas dekatkauk atum mina pataga judío aidautijum Apajuí chichameg ujaktajum tibau asaja ujakmajime.

Tujash atumek pujut tuke atina dushakam dakitau asagmin, yamaik judiuchu aina nui ju chichamak etsekgagtati. <sup>47</sup>Jutiinak Apu Apajuí: ‘Wi aminak judiuchu aina nuwish tsaaptina numamtin emajame, mina chichamjun ashí nugkanmash etsekgati,

nunitai ditashkam uwemjatnume  
tau asan’, tujamajui.

<sup>48</sup>Nuna antukag, judiuchu aidauk shiig aneasajui, nuninak Apajuí chichamega juka dekas shiig pegkejai tuidau; nunikag ashí aents pujut nagkanchaun jukiagtinme tibau aina duka dekaskeapi tiaju. <sup>49</sup>Nunikagmatai ashí nunú nugkanmag, Apajuí

chichamenak dekawajui. <sup>50</sup>Nudiagtai judío aidau, nuwa dekas Apajuin puyatjus umijin eme anentsá diitai aidaun, nuigtú aishmag dekas chichamesh antugtai aidaujai chichasag: Atum Pablo Bernabejai jiikjum awematajum, tusag inajaju. <sup>51</sup>Nunú aaja tijam ditá sapatjin ukuinak jukiag, nui tsuwat ayaun awatuk akaketuk ukukiajui yaakat Iconio weenak. (Nunak chichaman dakitjaju asagmatai, dita suwimak jukitnuijin iwaintak dutikawajui.) <sup>52</sup>Nuna dutikawagmataish Jisusa nemajin aidauk, shiig aneasag dakunkut batsataidau, Wakaní Pegkeji ajamu asag.

**Pablo Bernabejai yaakat Iconionum  
yamajam chicham etsegkamu**

**14** <sup>1</sup>Pablo Bernabejai yaakat Iconio jegawag tuke nunin asag, jega judío aidau ijuntaijin wayawaju, nunikag Jisusan pachisag etsejiagtai antukag kuashat judío aidau, judiuchu aidaushkam dekaskeapi tusag Jisusan nemagkajui. <sup>2</sup>Tujash judío dekaskeapi tuinachuk, tikich judiuchu aidaun chicham dekaskechunak tsanuidau, Jisusa nemajuidau kajegkatnume tusag. <sup>3</sup>Nuninaig Pablo Bernabejai dukap tsawan pujusajui, nunikag Apu Jisusai kajinmas chichagkagtuidau, nuniagtai Apu Jisus senchijin suwau aents dutikmainchaun iwainagtai wainainak, chichaman etsejuina nunash dekaskeapi titinme, tau asa. <sup>4</sup>Nunitai Iconionmaya aidauk wajumak aents kanakajui; nunikag judío dekaskeapi tuinachujai ijunainai, tikich wajumak Jisus chicham etsegtugkatajum tusa

etegjamu aidaujai ijunaidau. <sup>5</sup>Nunidau asag judío aidau, judiuchu aina nujai, apu aidaujai chichaman umigkaju, Jisusa chichamen etsejuidaun waitkasag kayai tukuí tukuinakua kajegmí tusag. <sup>6</sup>Nunú tuinamun Pablo Bernabejai dekagmamawag, nugka Licaonia tutaya nui yaakat Listra, tikich Derbe, tutaya nui, nuigtú tikich yaakat tikijumamtin aidaunum jegawag, <sup>7</sup>nuwishkam yamajam chicham uwemta nuna pachis etsejuidau.

**Listranmaya aidau  
Pablon kayai tukuagbau**

<sup>8</sup>Nu Listranum makichik aents yama akiinmawaik nagkamnas, tuke wekaechau kagkajinash umushchau pujuttaman wainkajui. Dushakam nui ekeemas, <sup>9</sup>Pablo chichagkagtutai antú eketun, Pabloskam esetus diikmá, dekas nigka etsaentumainapi tusa anentaimá eketun wainkauwai. <sup>10</sup>Dutika senchi jiiká chichajak:

—iWajaim, shiig tutupit wajastá!  
—tiuwai.

Tamawaik tseke wajakí wekaetan nagkabau. <sup>11</sup>Pablo dutikamun wainkag aents aidauk, Licaonia chichamai senchi untsumkag:

—iApajuí aidau aentsmaga jutiin akaetugmakiaje!

<sup>12</sup>Tusag Bernaben chichajuinak:

—Juka apajuí Jupiterai<sup>c</sup> —tuidau.

Tuja Pablon ni chichagkagtau asamtai:

—Juka apajuí Mercuriowai —tuidau.

<sup>13</sup>Nunú yaaktanum niiniasuk apajuí Júpiter tutai ememattai jega au, nuna sacerdoteji toro aidaun jukiag, nuigtush-

---

**c 14.12** ‘Júpiter’, ‘Mercurio’ tawa nunak versión Reina-Valera (RV) tawai. Tikich versión Dios Habla Hoy (DHH) takug: ‘Zeus’, ‘Hermes’ tawai. ‘Zeus’, ‘Hermes’ aina juka griego aidau apajimtaiji aajakajui. Nuna romanmaya aidau tuinakug ‘Júpiter’, ‘Mercurio’ tujakajui nunak tuinayatak.



kam iwagmamak yagkug aidaujai yajuak, kuashat aents aidaujai kaunkauwai. Nunikag nunú toron maa apeenak, Pablon Bernabejai emematta tuidau.

<sup>14</sup>Nu nuniamun Pablo Bernabejai wainkag, jaanchjin tujit ichigkag aents tuwaká ijunbaunmak ditashkam eteena wajan senchi untsumkag:

<sup>15</sup>—Muun aidauh, ¿wagka ancha aikagme? Jutiishkam atum ainajum annuketji. Atum wainkajum aikajum aanú idaikujum, dekas Apajuí iwaaku pujú nayaimpin, nugkan, nayantsan, ashí nui ayaa nuna najankauwa nu nemagkatajum tusa, chicham yamagma nu etsejin ainaji. <sup>16</sup>Yaunchuk tsawan aajakua duwik Apajuik ashí aentsun: Dita wakejuinamunak takastinme, tusa idaisauwai. <sup>17</sup>Dutikauwaitkush: Wi Apajuiyaitag nuna dekajuatnume, tau asa yumin yutumtikawai, ajakshakam shiig tsapaidiag nejeawagmatai, nuna yuwinak shiig dakujustinme tujamu asa.

<sup>18</sup>Tusá ujainamash, aents aidauk nunú toro maa apeaku dita ememattanak kakajus idaimainchau dekapedau.

<sup>19</sup>Nuninai wajumak judío, Antioquianum batsamin aidau, tikich Iconionum batsamin aidaujai kautuawag, aents tuwakú aidauk anentaimitan yapagtuawaju, dutikawajam Pablonak kayai tukuí tukuinaku: Maajistai, tusag japikí jukiag, yaaktan ukumtiksg aipkiajui. <sup>20</sup>Dutika aipkiagmatai, Jisusa nemajin aidau tentea apakag batsamtuinai, Pabloskam anean nantakí, ataktú yaaktanum wayaa, kashinia duwi Bernabejai Derbenum wegajui.

<sup>21</sup>Nui jegawag yamajam chichama nuna etsejiagtai, kuashat aents nuna antukag Jisusa nemagkagmatai ukuinak, Listra, Iconio, Antioquía aina nuní waketjajui. <sup>22</sup>Nuanuí jegawag Jisusa nemajuidaun anentai ichichtuinak:

—Atum Jisusai dekaskeapi tiuwaitjtm nuwig anentaimsajum pujustajum,

dekaskenum Apajuí inamtaijin wayata takuik, dekatkauk kuashat waitmainaitji, —tiaju. <sup>23</sup>Nunikag Jisusa nemajin aidau makí makichik yaakat batsata nui, nuna diin agtinun adaitug, yujumkan ijagmawag batsamsag, ashí Jisusai sulumankau aidauk: Ni kuitamkati, tusag Apajuin aujtusag ukukiaju.

#### Pablo Bernabejai Siria nugkanum Antioquía awa nui wakitkimu

<sup>24</sup>Nuna dutikawag ukuinak Pisidia nugkan nagkaikiag Panfilia nugkanum jegawajui. <sup>25</sup>Nunikag yaakat Perge jegawag chichaman etsegkag ukuinak, Atalianum jegawajui. <sup>26</sup>Nui nagkaemakiag botenum egkemawag Antioquía wegajui, nuwiya aidau yama nagkamchak Pablon Bernabejai, Jisusa chichame etsegkatajum tusa awemainak Apajuin aujtusajua nui, takatan ashimkag jegawajui. <sup>27</sup>Nunik Antioquía jegawag, ashí Jisusa nemajin aidau ijumag, Apajuí dita takainamunum shiig kuashat yaigkagbaun pachis ujakaju, judiuchu aidauh wajuk Apajuin dekaskeapi tiaje nunashkam. <sup>28</sup>Nunikag Pablo Bernabejai kuashat tsawantai nuwig Jisusa nemajin aidaujai ijunag batsamsajui.

#### Jerusalegniumia aidau ijunjamu

**15** <sup>1</sup>Nunú tsawantai wajumak Judeanmaya aidau Antioquía jegawag, Jisusa nemajin aidau jintintuinak: “Atumek Moisés chicham umiktinun agajua nui, pakamaktajum tibauwa nu umiachkugmek uweemain ainatsjume”, tuidau. <sup>2</sup>Tuinamun Pablo Bernabejai antukag, ditajai senchi pampandaijajui. Nu aatus au asamtai Antioquianmaya aidau: Pablon, Bernaben, nuigtú tikich Jisusa nemajin aidaujai etejajui Jerusalén wetinme, nunikag nunú yaaktanum Jisus chicham

etsegtugkatajum tusa etegjamu aidau, nuigtú Jisusa nemajuidaun diin batsata nujai, nuna pachisag chichastinme tau asag.

<sup>3</sup>Dutika awemajam, Fenicia nugkanum tuja Samaria nugkanmashkam nagkaemainak: “Yamaik judiuchu aents aidaushkam duwik umitaijinak idayinak Apajuin nemajuinawai”, tusa etsejiagtai ashí Jisusa nemajin antukag shiig aneedau.

<sup>4</sup>Pablo Bernabejai Jerusalén jegawagmatai Jisusa nemajin aidau, Jisus chicham etsegtugkatajum tusa etegjamu aidaujai, Jisusa nemajuidaun diin aidaushkam shiig anentus jukiajui, dutikawajam ditashkam Apajuí yayasam dita takasbaujinak imatiksag ditanash ujaidau. <sup>5</sup>Tiagtai wajumak fariseo aidau, Jisusan dekaskeapi tusag nemagkaju aidau wajaidiag chichainak:

—Dekas judiuchu aidau Jisusa nemajuina dushakam, Moisés chicham umiktajum tibauwa nunash umiktinme nuninak pakamamain ainawai, —tuidau.

<sup>6</sup>Tuidau asagmatai Jisus chicham etsegtugkatajum tusa etegjamu aidau, Jisusa nemajuidaun diin aidaujai ijunjaju: Dusha dekas wajuk amainkita, tusag dekawagtatus. <sup>7</sup>Kuashat nuna pachisag chichá chichamjamunum, Pedro wajakí chichaak:

—Yatsug aidauh, atumek shiig dekagme, Apajuí atum ainajum anuiyatigmin mina etegtuaauwa duka, aents judiuchu aidaunash yamajam chicham uwemta nuna pachis etsegtai antukag, ditashkam Jisusan dekaskeapi titinme tujutu asa. <sup>8</sup>Apajuí anentaibau-nash ashí dekaauwa nunú, wi ditanash uwemtijatasan wakegag nunash dekaatnume tau asa, jutiin Wakaní Pegkejin sujamsagmaya dutiksag ditanash Wakaní Pegkejin egketjagmayi.

<sup>9</sup>Apajuik jutiinash, tikich judiuchu aina nunashkam, ditash aentsua nunin diigmatsuk, ashí betek Jisusaig kajinas anentaibiagtai, ditá anentainash pegkemtikijui. <sup>10</sup>Nunin aish éwagka atumesh dusha Apajuí ekajmainush, iina muunji aidaukesh umikchaju, yamaikish jutiish umimainchauwa dusha, Jisusa nemajin aidau umiktinme tusagmesh wakegagme? <sup>11</sup>Duka nuninchauwai, yamaik jutií Apu Jisus dekaskeapi tabaunum uwemainag nunisag ditashkam uwemainawai, —tiuwai.

<sup>12</sup>Timatai ashí itatjag Bernabé, Pablojai Apajuí yayasam aents dutikmainchaun, judiuchu aidaunmash iwainagbaun etsejiagtai, ekeemsag antú pekajuidau. <sup>13</sup>Chichaamun ashimkagmatai Jacobo wajakí chichaak:

—Yatsug aidauh, minash antugtuktajum. <sup>14</sup>Apajuí wajuk judiuchu aidaunash yamaik wait anentug, mina aentsug agtinme tusag etegjag, nuna pachis Simón ujakakaje. <sup>15</sup>Nunak Apajuí etsegtin agagbauwa nujai betek nunikaje, nu agagbaunmag Apajuí chichaak:

<sup>16</sup> ‘Ju junikmatai wi David wegantu aidau jega tegaekauwa numamtuk wajakaja nuna, ataktú jegamaina numamtuk awajkattajai, agkan batsamsatnume tusan.

<sup>17</sup> Dutikam ashí tikich nugkanmaya aidaush imá minak egatuinak, mina aentsug aina nujai betek agtinme tau asan, tiuwai.

<sup>18</sup> Apu Apajuí yaunchuk nagkamas jujú chichaman dekamtijamauwa nu yamaish aatus tawai.’

<sup>19</sup> “Nuadú wika aents judiuchuitak, Apajuin nemagkaja duka ju dutikatajum tusaik waitkaschagmi tajai. <sup>20</sup>Dekas ayatak papí agatjagmi: Ashí apajimtai aidau anagkuamu aina duka yuwawaig-

pajum, tsanijimtach tsanijinawaigpajum, kuntin ayatak pempeaja maamu aina nuna nejesh, kuntin ayatak jakau aina nuna nejeshkam, numpashkam yuwawaigpajum, tusa duke tiagmi.

<sup>21</sup>Yaunchuk nagkamas awai ashí yaaktanum Moisés chicham umiktajum tusa agagbauwa nuna etsejuidauk, duka tsawan ayamtai tsawagmatai jega ijuntainum tuke aujtayai”, —tiuwai.

#### **Judiuchu aidau papí agaja awetimu**

<sup>22</sup>Tutai Jisus chicham etsegtugkatajum tusa etegjamu aidau, Jisusa nemajuidaun diin aidaujai, ashí Jisusa nemajin aidaujaishkam shiig chichasag dita aina nuwiyam, Pablo Bernabesai Antioquianum wegagtai awemagtatus etegjajui. Dutikainak Judas tikich daaji Barsabás tutaya nuna Silasjai etegkawajui, nunú aina nui dekas eme anentsá diitai aidau, <sup>23</sup>Dita wegagtai papiin agatuinak:

“Jutii dekas Jisus chicham etsegtugkatajum tusa etegjamu aidauti, Jisusa nemajuidaun diin aina nujai ijuntsan, atum Jisusa nemajin aidautijum judiuchu Antioquia, Siria nugkanum, Cilicia nugka aina nuwish batsatainajum nunú aidautigminash shiig anentsan kumpamjime.

<sup>24</sup>Wajumak aents juajuiya, jutii wetá tichamaitak atumiin midiag tajutjamawag, anentaimtagminish pachimjamkag ukugmakiaju tabau dekaamji. <sup>25</sup>Nunikaja ashí ijunja chichasá, jimag aents etegka, jutii aneetaiji yatsug Bernabé, Pablojai anuí atumin ijagtsamsatatus mininakuí awemainaji. <sup>26</sup>Bernabé, Pablo aina juka, ditak Apu Jisukristu chichamen etsejuidau asag, maata tuinamash ditá pujutjinak puyatjuina-tsui. <sup>27</sup>Dita mininakuí Judasan, Silasjai awetajime, dita anuí tajutjamawag shiig igkumpasag, ashí juna pachisajag ujakpaktinme. <sup>28</sup>Wakaní Pegkejija duka

atumnak atum umikchamna imannak tujamtsugme, jutiiishakam aikasaik anentaimtuidau asaja ayatak: <sup>29</sup>Ashí apajimtai aidau anagkuamu aina duka yuwawaigpajum, tsanijimtach tsanijinawaigpajum, kuntin ayatak pempeaja maamu aina nuna nejesh, kuntin ayatak jakau aina nuna nejeshkam, numpashkam yuwawaigpajum tusa tajime. Jujú aina nujai kuitamamkugmek shiig imagnisjum pujuttagme.”

<sup>30</sup>Jujú aatsa agatja susam sujuktatus Antioquianum wegajui. Nunikag jegawag ashí aentsun ijumjag, nunú papí agagbaun susajui. <sup>31</sup>Dutikawajam Jisusa nemajin aidau nuna papí ausag dita tiagbaun antuinak, shiig senchi shiig anejasu, anentai ichichtuinamu asag. <sup>32</sup>Judas, Silas aina dushakam Apajui etsetgin asag, nuwiya Jisusa nemajuidaunash ujaak, anentai ichichtujag wakemitkakaju. <sup>33</sup>Nui dukap tsawan batsamsag Judas waketai, Jisusa nemajin aidau shiig anentsag akateg awemajui. <sup>34</sup>Tujash Silasak kumpají waketiagtaish juwakui. <sup>35</sup>Pablok Bernabejaig Antioquiai juwakag, tikich aidaujai ijunjag Apu Jisusa pachis yamajam chichaman jintinkagtuidau.

#### **Pablo ataktú Apajui chichame etsegku webau**

<sup>36</sup>Wajumak tsawan batsamsag Pablo Bernaben chichajak:

—Ataktú Jisusan nemagkaju aidau ijagsami, ashí yaaktanum Apu Jisusa chichame etsegkabiag nui wajuk ditash batsatainawak nu diiyaku, —tiuwai.

<sup>37</sup>Nu tabaunum Bernabé, Juan tikich daaji Marcos tutaiya nuna ayatatus wakegau. <sup>38</sup>Tujash Pablok nunak ayamainchau dekapeau, wagki Marcosak Panfilianum ditan ukuak, ijunas takatnum wechau asamtai.

<sup>39</sup>Nunitai kuashat jiya jiyaniuinakua mai kanakaju. Nunik Bernabek Marcosan juki Chiprenum weuwai.

<sup>40</sup>Nuniai Pablok Silasan juki, Jisusa nemajin aidau:

—Apu Jisus yaimpamunum wekaesatajum, —tusa shiig akatjajam, nuwiya jiinkiag, <sup>41</sup>Siria nugkanum, Cilicia nugkanmashkam Jisusan nemajuidaun anentain ichichtukiag nagkaemaidau.

**Pablo Silasjai Timoteojai  
igkunikagbau**

**16** <sup>1</sup>Pablo yaakat Derbenum jegaa nagkaemaki Listranmashkam jegau. Nunikmá makichik datsauch Timoteo Jisusa nemagnun wainkau, nuna dukujig judío nuwa Apajuí nemajin, untsu apají griego aents aajakuí. <sup>2</sup>Jisusa nemajuidau Listranum, Iconio batsataidauk, Timoteon pachisag pegkejan chichajuidau. <sup>3</sup>Tuidau asagmatai Pablo Timoteo uyuntusti tusa wakegau asa, pakaji ajapjuatajum tima pakajajui, judío nui batsamin aidau pegkegchaun anentaimtinum tau asa, apají griegon ashí dekaidau asagmatai. <sup>4</sup>Nunikag ashí yaaktanum nagkaemainak, Jisusa nemajin aidau unaidau, Jisus chicham etsegtugkatajum tusa etegjamu aidau, nuigtú Jisusa nemajuidaun diin aidau Jerusalén batsamas agagbaun pachisag. <sup>5</sup>Aatus nunidau asagmatai, Jisusa nemajin aidau dita kajintsá anentaibaujinish nuní nagkaemas ichichamaidau, nuninak Jisusa nemajuidaushkam kashí kashinig ayatak kawedau.

**Macedonianmaya aents Pablon  
kashi wantintukbau**

<sup>6</sup>Wakaní Pegkejiya nunú Asia nugkanum etsegtatajum tusa awemashbau asag, Frigianum jegaa Galacia jugaashkam nagkaemakiag, <sup>7</sup>Misia

nugkanum jegawag, Bitinia nugkanum wegagtatus anentaimaidau; tujash Wakaní Pegkeji wetinme tusag idaisachui. <sup>8</sup>Nunikag Misanak tutupnik nagkaikiag Troas jegawajui. <sup>9</sup>Nunikag Pablo nui kintamtatman kashi paan Macedonianmaya aents wajantun: “Juwi Macedonia katigkam minash jintinjuata”, taun wainkauwai. <sup>10</sup>Pablo nuna wainkamtai, dekas Macedonia wegagmi tusa umintsabijai, junak Apajuiyap yamajam chichaman awi etsekgati tujamu asa jutikawa tusaja.

**Pablo Silasjai Filiposnum chichaman  
etsejiagtai Lidia sujumankamu**

<sup>11</sup>Nunikaja Troasnum egkemjá tutupnik wega wegakua ajuntai Samotracionum jegaa, kashinia duwi Neapolisnum jegabijai. <sup>12</sup>Nui pujusá, Filipos Macedonianmaya yaakat dekas iman, Romanmaya aidau batsamtainum jegawabijai. Nunika nui machik tsawan pujusabijai. <sup>13</sup>Nuniamunum tsawan ayamtai tsawagmatai, yaakat ukuaku namaká uwet jegawabijai, jutii anentaimsaik judío aidau Apajuí aujtajig awis awatai tau asaja. Nunika jegaa pekaamsaja nuwa aidau ijunjaju chicham ujabijai. <sup>14</sup>Nunú nuwa aidauun nuwa Lidia daagtin Tiatiranmaya, jaanch yamakaitkau dekas pegkeg aidau unaidau, Apajuinash emematin asa ekeemas antú ekeemayi. Nunittaman Apajuí anentaimtjabin Pablo etsegbaunash shiig antukti tusa. <sup>15</sup>Dutikamu asa Jisusan nemagkamtai, ashí niina patayijai yamigbajai. Nu dutikam:

—Atumesh, wi dekas Jisusan nemagkau waitkugmek, mina jegajui kaunajum kanagatajum, —tujamkui ni pujamunum wegabijai.

**Pablo Silasjai achiká aents  
achikbau chimpitainum egkeamu**

<sup>16</sup>Nunika pujusá Apajuí aujtainum wegajin, nuwa inak wakan pegkegchau

dekantikam etsejin igkumpaktatus jiintugmakmayi. Nunú nuwa dutika takatai niina apuji aidauk kuashat kuichkin juwidau. <sup>17</sup>Nunú nuwa, jutii Pabloyai wegajin pataetugmak minis senchi untsamak:

—iJu aents aina juka Apajuí nayaim-pinmayaya nuna umijin asag, nuwiya chicham uwentikagtina nuna atumnash ujakagktatus minitjamainawai!

—wajau.

<sup>18</sup>Nunak kuashat tsawantai imatú wekaetai, Pablo kajejuk, ayampatua wakan pegkegchau nuwauchinum pujaun chichajak:

—Jisukristu daajin tajame, aanú nuwauch ukuakum jiinkim wetá, —tiuwai.

Nunú tusa tamawaik wakan pegkegchaush wamkes jiinki wegak nuwanak agkan ukukuwui.

<sup>19</sup>Tujash nuna apuji aidau ni dekamamtai kuichik jutaijin dutikash-min wajasmatai, Pablon Silasjai achiká jukiag, chicham dekatasa ijuntainum apu aidau emtin ejegawaju. <sup>20</sup>Dutika chichaman epegkin aidanum ejeyag chichainak:

—Jujú judío aents ainayatak iina yaaktajin taawag dapamkagtuinawai, <sup>21</sup>nuninak ditá pujutjin jutii Roman-maya aidautik makichkish dutikmain-chauwaitag nuna jintinjamainawai, —tuidau.

<sup>22</sup>Nuna tiagtai aents aidauk Pablon Bernabejai pampantug wajatkiagmatai, apu chichaman epegkin aidaukham:

—Awikjum numí suwimatajam, —tusa inamjau. <sup>23</sup>Timatai senchi suwí suwimainakua, achikbau chimpitainum egkeawag, achikbaun kuitamin aidanum:

—Wejum shiig kuitamkatajam, —tusa awemajui. <sup>24</sup>Nunú tusa tima, achikbau kuitamnushkam juki, jegá awayaa imau nagkatkamunum ejegan, taapna dawe

dekapasa agtukbaunum nawen wegajug shiig chanuag kuwakchamin ema ukukuwui.

<sup>25</sup>Imatika ukukim, Pablo Silasjai ahaet Apajuin aujuinak, kantantan kantam wajagtai, tikich aents achigbau chimpijushkam antú batsatu. <sup>26</sup>Imatú batsatai pachiachmau senchi uujak, jega aents achiká chimpitai ajigbau aidanum senchi pegau, imatiktai ashí waitig ujanjauwai. Tuja aents achiká jiju ikagmauwai jigkakbaushkam tsujinag kakekaju. <sup>27</sup>Imaniai achikbau kuitamin kanag tepaushkam shintaak diistakamá, ashí waitig ujanag aun wainak, aents achigbau aidauk shiyakeapi tusa, espadajin ukuini juwakug maamata tau. <sup>28</sup>Nunitai Pablo senchi untsuká:

—Maamawaipa, jutiiik ashí betek batsatji, —tiuwai.

<sup>29</sup>Tutai achikbaun kuitamnushkam:

—Jii ekemakjum sujustajum, —tau.

Tutai jii ejentuntam juwakug, sapí sapigjai tupikaki Pablo Silasjai wajamunum kujaukmaikia wayakug tikishmatjau. <sup>30</sup>Dutika juki agaa jiikí:

—Muun aidauh, ¿wisha wajukmainaitja uwemjata tusanush? —tusa iniau.

<sup>31</sup>Tusa iniinam dita aiinak:

—Apu Jisukristuig dekaskeapi tita, nu nuniakum amek ashí amina pataim aidajui uwemjattame.

<sup>32</sup>Nuna tusa Jisukristu chichamenashkam niina ujaak ashí niina patayijai ujakuí. <sup>33</sup>Dutikam ahaet aig, achikbaun kuitamnushkam Pablon Silasjai suwimku tsupigbau numpa waigkun nijatku. Dutikam nuaduí ditashkam ashí nuna patayijai yamikuí.

<sup>34</sup>Nu dutikawajam ditá jeen jukiag yujumkan ajamsajui. Nu aentsuk ashí ni patayijai shiig anejasaju, Apajuiyai dekaskeapi tusag sujumankaju asag.

<sup>35</sup>Kashikmas apu chichaman epegkin aidau, achijatin aidanum awetajau, aents

achikbaun kuitamnun ujaktí Pablon Silasjai jiihtinme tusag. <sup>36</sup>Tibau asa achikbaun kuitamnushkam Pablon chichajak:

—Apu chichaman epegkin aidau chichaman akupjutak akupkati tujutne, nunin asamtai jiinkijum shiig aneasjum wetajum, —tiuwai.

<sup>37</sup>Tusa tama Pablo achijatin aidaun chichajak:

—Jutiik Romanmaya aents ainajinig shiig chichaman dekgatamsuk tuwakbaunum asutamawag aents achiká chimpitainum egkepawagmae; dutijabau ainayatkush, ¿wagka yamaish tikich waipainatsaigkish uuká jigmakta tuinawa? Duka nunimait sui, dekas dita taawag iinak jigmaktinme, —tuidau.

<sup>38</sup>Tusa timatai achijatin aidau apu chichaman epegkin aidaun jegajuawag, timae tusag ujaidau. Tama nuna antukag senchi ishankaju, Romanmaya aentsuitjai tau asagmatai. <sup>39</sup>Nunikag Pablon, Silasjai wejijaju:

—Wait aneasjum tsagkugtugtajum —tita tusag.

Dutikawag jiikiag:

—Juig pujutsuk wetajum, —tusag awemaju. <sup>40</sup>Tiajam jiinkiag Lidia jeen shiyakaju, nui jegawag aents Jisusa nemajuidaun wainkag shiig anentain ichichtujag ukuinak shiyakajui.

Pablo Silasjai Tesalónica jegaamu

**17** <sup>1</sup>Nunik ashinak yaakat Anffipolis, nuigtú Apolonijai nagkaikiag jegawajui Tesalonicanum jega judío aidau ijuntaijin. <sup>2</sup>Pablok tuke nunin asa, jega ijuntainum wayauwai, nunik kumpatum tsawan ayamtainum judío aidaujai Apajuí chichame agagbaun pachis tudayinau. <sup>3</sup>Dutikak, Kristuk waitkasa maam ataktú nantaktinai tusa agagbauwa nuna pachis jintias ujaak:

—Wi Jisusan pachisan atumin ujaajim, nuuwai Kristuk, —tiuwai.

<sup>4</sup>Nuna tutai wajumchik judío aidau Jisusan dekaskeapi tusag sujumankaju, nunik ditashkam Pablo Silasjai wekaebaunum ditajai ijunjajui. Tuja kuashat griego Apajuí emematin aidau, nuigtú kuashat nuwa puyatjusa diitai aidaushkam, Jisusan dekaskeapi tusag nemagkaju. <sup>5</sup>Tujash judío dekaskeapi tuinatsu nu kajeenak, aents pegkegchau, nuigtú daki aidaun ipaa ditajai ijunjag aentsun dapampainak ashí yaaktanmayanak ekaajaju; nunikag Jasogkan jeen jetekaju, Pablo Silasjai pujatsuash, pujakuig japikí jukiaja aents dekas tuwakbaunum ejegami tusag. <sup>6</sup>Tujash Pablonak Silasjai wainkachag, Jasogkan, tikich Jisusa nemajin aidaujai jukiag yaaktanum dekas apu pujamunum ejegawajui. Dutikawag:

—Ju aentsua ju, jimag aents ashí nugkanum wekagas dapamkagtú wekaenuwe nunú juwi iinashkam tajutjamamtai, <sup>7</sup>Jasón niina jeen awayaa apusae, ashí ju aina juka Roma apujiya nu chicham umiktin najanamua nunak dakituinawai, ditak tikich apu Jisus daagtin awai tuidau asag.

<sup>8</sup>Nunú tabaun aents aidauk, ashí apu aidaujai antukag, senchi pampaidau. <sup>9</sup>Imatiagtai Jasón tikich Jisusa nemajin aidaujai apu aidaun chichajuinak:

—Jasta, dekas jutii yajá wetajum tusa awemanti, nu tau asá kuichik ukuaji, iina yaaktajin jiiinjagmataig ataktú awagtugkitajum, untsu jiiinjashmataig kuichkik tuke jukitajum, —tiaju.

Nuna tiagmatai apu aidau Jasogkan, tikich Jisusa nemajin aidaunash akupkajui.

Pablo Silasjai Berea jegawagbau

<sup>10</sup>Dutikawajam wamkesag kashi aig, Pablonak Silasjai Bereanum awemajui.

Dutikam jegawag judío aidau ijuntaijin wegajui. <sup>11</sup>Bereanmaya aidauk Tesaloni-canmaya aidaun nagkagas shiig anentaimkau asag, wkegas chicham etsegbaunash antujuidau, nuninak kashí kashinig Apajuí chichamen shiig kuitamas aujuuidau, nu tawa dusha dekas ajampashit tusag dekawagtatus. <sup>12</sup>Imanidau asag kuashat judío aidauk dekaskeapi tuidauk Jisusan nemagkajui, tuja griego aidau, nuigtú nuwa eme anentsá diitai aidaushkam dekaskeapi tusag Jisusan nemagkajui. <sup>13</sup>Nuniagtat-man judío Tesalonicanmaya aidau, Pablo Berea wekagas Apajuí chichamen etsejui tabaun dekaawag, shimutkag nuwishkam aentsun dapampakaju. <sup>14</sup>Nudiagtai Jisusa nemajin aidau Pablon: Amek nayants anunjukam wekaesam wetá tusag awemaju, nuniai Silas Timoteojai juwakajui. <sup>15</sup>Pablo uyunaidauk Atenas ejegawag ukukiaju. Nunú waketiagtai Pablo, Silasan, Timoteojai chichaman akupjak: “Waamak juwi taatnume, juwi ditajai igkuniktajai”, tiuwai.

#### Pablo Atenas pujusbau

<sup>16</sup>Pablo Atenas jegaa, Silasan Timoteojai dakak pujus, shiig kuashat anentain idajtus diyau, ashí yaakta nuanuig imá ditá apajimtai aina duke ayau asamtai. <sup>17</sup>Nuniau asamtai jega judío aidau ijuntaiya nui wayaa judío aidaujai kuashat tudayu, tikich Apajuin umijuidaujaishkam, nuniak kashí kashinig yaakta ejapeen aents tuwakbaunmash dutiksag tudayu. <sup>18</sup>Nunisag, aents Epicuro daagtin jintinkagtuamun aujin aidau Epicúreos tutai, tikich aents Zenón daagtin jintiamun aujin aidau Estoicos tutai

aidaujai kautkag, Pabljai tudayinau. Nuniagtai tikich aidau:

—¿Au aentsush wajina pachisaya imá chichawa? —tuidau.

Tiagtai tikich chichaidau:

—Auk tikich nugkanmaya apajuijim-tain pachis etsejin aina numamtainai, —tuidau.

Nunak Pablo Jisusan pachis yamajam chichaman etsejak ni mantamna nantak-baujai etseju asamtai, tiajui. <sup>19</sup>Tusag Pablon, Areópago tutainum, apu aidau ijuntaijin ejegawag iniinak:

—¿Jutiish ame yamajam jintinkagtam nunú tukagtumainchaukaitam? <sup>20</sup>Ame jintinkagtam duka juti antushtai jintinkagtame, nuniau asamin jutiish nunash wajina takug tawa tusa dekatasa wakegainaji, —tuidau.

<sup>21</sup>Ashí Atenas batsamin aidauk, nuigtú tikich ikaya kaunkau nui batsamin aidaushkam, yamajam chicham etsegbaun antuinakjag tikichnak uyumatsuk, nuna shiig dekawagtatus wakeyin asag tuidau.

<sup>22</sup>Nuna tiagtai, Pablo Areopagonum<sup>d</sup> jegau asa, nuwi ejapeen wajantá chichaak:

“Atenasnumia aidauh, atum apajim-jum duka dekas pujawapi tusajum anentaimtin ainajum nunak wainjime.

<sup>23</sup>Atumi apajuijum emematku ijuntaig-min diyakun wekaesan, altarnum ‘iApajuí wainchatai!’ tusa agaja adujkamun wainkamjai. Nunú ‘Apajuí wainchatai’ atumesh waintsuk emema-tin ainajum nuna wishakam pachisan etsejgai.

<sup>24</sup>“Apajuí nugkan najana, ashí nugkanum ayaa nunash najanauwa duke, nayaimpin nugkanashkam apujig. Nigka aents jega Apajuí ememattai atí

**d 17.22** *Areópago* tawa nunak, yaaktanmaya apu aidau chichaman dekawagtatus tuwakua nuna tawai. Nunak nunijakú ainawai, aents ikaya taamtai chichaman antugkagtatus.

tusa jegamkamunmag pujuchui. <sup>25</sup>Tuja aents takagtusmatai pujustajai tusag atsumchauwai. Niiyai pujutnash, mayainash ashí wájí aina nuna sukagtinuk.

<sup>26</sup>“Tuja makichik aents najanamua nuanuiyag yujak ashí nugkanum batsamsatnume tiuwai. Dutika mamik-tujui tsawantan tuja nugka dita batsamsatnunashkam, <sup>27</sup>nui batsamas mina egatkatnume nuninak dekajuatnume tusa. Tujash dekaskenmag jutiijaig atushtak atsui. <sup>28</sup>Apajuí senchijin pujuidau asá buchituinaji; nunisag atumin muunjum dita anentaibaujinian agau aidaushkam: ‘Jutiik Apajuin uchijí ainaji’, tiajui. <sup>29</sup>Apajuin uchijí ainakuik, makichik aents nigki anentaimas, ni anentaimtamun dakumak oroikish, jiju platayaikish, nuna dutikachkush ayatak kayaikesh najanamua aina nunintsukaitai Apajuik tusaik anentaimtumaitsuji. <sup>30</sup>Nunak aents dekachu asa nuniagtaish, Apajuí pachitsuk idaisau akushkam, yamaik aents ashí nugkanum batsamin aidaush, dita tudau takaamujinak idayinak, minak nemagtuktinme, tawai. <sup>31</sup>Apajuik makichik tsawantan mamikiauwei, nunú tsawan jegatai ashí nugkanmaya aidaun, Kristu Aentsmaga Akiinau mantamna ataktú nantakiuwa nuna, yamaik aents pegkegchau aidau, pegkeg aidaujai etegjam akankam ijumjata titin asa”, tiuwai.

<sup>32</sup>Mantamdauwaitak aneantu tabaun antukag tikich aidauk ayatak dushikinai, tikich chichainak:

—Dekas imá pegkeg ju tame duka tikich tsawantin antakuish antukagmi, duwi etsegkata, —tiaju.

<sup>33</sup>Tiagmatai Pabloskam ukukiuwai.

<sup>34</sup>Tujash wajumak aents Apajuin dekaskeapi tusag nemagkajui. Nuanuí pachitkau Dionisio daagtin, Areopagotum ijunin, tuja makichik nuwa

Dámaris daagtinchakam, nuigtú tikich aidaushkam.

### Pablo Corinto jegaamu

**18** <sup>1</sup>Pablo nuna dutika ukuak, Atenas jiinki yaakat Corintonum weuwai. <sup>2</sup>Nuanuí jegakmá makichik judío Pontonmaya Áquila daagtin niina nuwe Priscilajai Italianmaya tau asantai, Pablo ijagsatatus weuwai. Nunak apu Claudio ashí judío aidau Roma batsata duka jinjatnume tau asantai nunikui. <sup>3</sup>Nunik jegakmá duwapen apijug jegamin asag, duwapen apijainak batsamatman wainak, niina takataijjai ditashkam betek takaidau asantai, Pabloskam nui juwakui, ditajai ijunag takastatus. <sup>4</sup>Tuja ashí tsawan ayantai tsawautaik, jega ijuntainum jegaa, judío aidaun, griego aidaunashkam, Kristun dekaskeapi tumamtiagiatus tuke ujasagé au.

<sup>5</sup>Silas Timoteojai Macedonia pujau taawagmatai, Pablok imá chicham etsegbauwa nunak takau, dutikak judío aidaunak: “Apajuí etegkamu Kristu, atum dakajum nunuke Jisusak” tusa chichagkagtau. <sup>6</sup>Tujash judío aidauk Pablonak shiwagmaidau, nuninak pegkegchaun chichajuidau. Imatjuinamu asa Pabloskam niina nugkutaijin pegajá wajantá chichaak:

—Atumek bakumajum megkaekatin ainagme, wika nunak uyumamaitsuji. Yamaya juwi nagkamsanuk wika tikich aents judiuchu aidaunum wetatjai, —tiuwai.

<sup>7</sup>Nuna tusa ukuak jega ijuntainmaya jiinki, Justo Apajuí umijin nui ayaumas pujaunum jegau. <sup>8</sup>Tuja Crispo, jega ijuntaiya nuna apuji ashí niina patayijai Jisusan dekaskeapi tusag nemagkaju. Tikich Corintonmayashkam kuashat aents nunú chichaman antukag dekaskeapi tusag yamimakaju. <sup>9</sup>Nuniku



ai Apu Jisus Pablon kashi paan wantintuk chichajak: “Sapigmakaipa, chichagkagtam duka idaitsuk chichagkagtukta. <sup>10</sup>Wi amijaig wekaejai, makichkish amina pegkegchau awajtamkatasag achigmamaitsui. Ju yaakta juwishkam mina aentsug aidauk kuashat ajutui”, tiuwai. <sup>11</sup>Nunú tima Pablok Corintonmak makichik mijan jimaituk, nuwiya aents aidaunash Apajuí chichamen jintintak pujusuf.

<sup>12</sup>Nunú tsawantinig Galión Acayanmaya apuji we pujai judío aidaun ijunjag, Pablon shimutuk achiká jukiag, apu pujamunum ejegawag, <sup>13</sup>apun chichajuinak:

—Ju aentsua ju ashí aents aidaun ni wagagki dekas Apajuyia duke emematain ainagme tayatak, Moisés chicham umiktajum tibauwa nunak umiatsui, —tuidau.

<sup>14</sup>Tiagtai Pabloskam chichaktatus nagkamata taig, Apu Galión judío aidaun chichajak:

—Ju aents pegkegchau takasbau, nuniachkush magkagtuamukesh pachisjum takugminig atum judío aidauntijum tajum nunak antugmainaitjime; <sup>15</sup>tujash ayatak chichama nunak, aentsun daaji aidaun pachitus, atumin chicham umitajum aidaujui chichawai. Nuniau asantai imá atumek juka iwajatajum, wika aanin aidaun epegkeata tusanuk wakegatsjai.

<sup>16</sup>Tusa chicham epegkeaku ijuntainmayan agaa jiijú. <sup>17</sup>Dutikawajam ashí aents aidaun ijinjag Sóstenes, dekas juga ijuntain apujyia nuna achikag, apush wajasá dii wajataig suwimaidau. Dutikiagtaishkam apu Galiogkak shiig pachikchau.

#### **Pablo Antioquianum wakitkimu**

<sup>18</sup>Pablo Corinto Jisusa nemajuidaujai kuashat tsawan ijunag pujus, Áquila

Priscila aatus Siria nugkanum ashinkauwai. Tujash Cencrea wetatus botenum egkemtsuk, Pablo awamajui, ni duwik nuniktajai tibaujin umikta tau asa.

<sup>19</sup>Nunik yaakat Efeso anumkamunum, Pablo Aquilan Priscilajai ukuak nigka juga ijuntainum weu, nunik judío ijunjamunum Jisusan pachis chichasú.

<sup>20</sup>Nunikmatai Pablon:

—Wait aneamam juwi dukap tsawan pujusam wetá, tusa segaidau, tujash nigka dakitjauwai, <sup>21</sup>nuniak:

—Jerusalén jista atata nui pujuta tusan wegajai, Apajuish wakegakuig ataktú waketjukin tajuattajime atumin wainkatasan, —tiuwai.

Nuna tusa botenum egkemag Efeson ukuak weuwai. <sup>22</sup>Cesarea jegaa Jerusalén weu, nuwiya Jisusa nemajuidau kumpamatatus; nunik Antioquía weuwai.

<sup>23</sup>Nui jegaa dukap tsawan pujus ataktú jiinkiu, Galacia, nugkanum, Frigia nugkanmash ashí Jisusa nemajuidau makí makichik anentain ichichtugtatus.

#### **Apolos Efesum chichagkagtukbau**

<sup>24</sup>Nunika wekaebaunum makichik judío Apolos daagtin, yaakat Alejandrianmaya Efesum jegauwai. Nunú aentsuk Apajuí chichame agagbaunashkam shiig dekau asa, imatiksag shiig chichagkagtin aajakuí.

<sup>25</sup>Nigka, Apu Jisus pachisaish jintintuamu asa, wakekegat shiig paan antumainun Jisusan pachisashkam jintinkagtau, tujash nigka imá Juan Yamijatak jintinkagtuamunak dekau.

<sup>26</sup>Apolos juga ijuntainum wajantá shiig machikish puyatkas wajas chichamujin Priscila Aquilajai antujuk, ajum chichamujin ashimkamtai akanak jukiag, Jisusan pachis shiig juní awai

tusag ujakajui. <sup>27</sup>Apolos Acaya nugkanum wetai, Efesonmaya Jisusa nemajin aidau papiin agatjaju, nuwiya Jisusa nemajuidaush shiig anentus jukitnume tusag. Dutikam Apolos Acaya jegaa, Apajuí yayasam Jisusan dekaskeapi tiaju aidaun kuashat yaigkuí. <sup>28</sup>Aatus nuniau asamtai judío aidaushkam, Jisusak Apajuí awemachbauwai tumainchau dekapedau. Wagki duwik Apajuin etsegtin aidau Jisus pachisa agagbaun iwaintug: “Ju Jisus taji duke Kristuk”, tau asamtai.

### Pablo Efeso pujusbau

**19** <sup>1</sup>Apolos Corinto pujai, Pablok mujanmanini tsupina Efesonum jegakmá, kuashat aents Jisusa nemajuidau wainkauwai. <sup>2</sup>Nunik:

—¿Atumesh Jisus nemagkugmesh Wakaní Pegkejish jukiuk ainajum?  
—tusa iniau.

Tama dita ainak:

—Jutiik Wakaní Pegkeji awai tabauk machikish antuchitji, —tiaju.

<sup>3</sup>Tiagtai awentsag iniak:

—¿Atumnash ya yamigmajuitjume?

Tusa tama dita aimainak:

—Jutiinak Juan yamigmajui,

—tuidau.

<sup>4</sup>Tiagtai Pablo ayaak:

—Juagak ayatak aents aidau tudau takatan idayagtai yamijakuí, nuniakush mina ukujui minitta nunú dekaskeapi titajum, —tiuwai Jisusan pachis.

<sup>5</sup>Nunú tabaun antukag Apu Jisusa daajin yamimakajui. <sup>6</sup>Nunikagmatai Pablo ditá buuken achikmatai, Wakaní Pegkejishkam ditanash egkemtujajui. Dutikawajam ditashkam tikich chichaman chichaidau, nuninak Apajuí tabaunash etsejuidau.

<sup>7</sup>Nuna nunidauk ashí ijumjamak doce aents aajakú ainawai.

<sup>8</sup>Pablok kauptum nantua imajin jega ijuntainmag wesag pujau, nui jegaa

chichagkagtakush ishamkagtutsuk chichau, nuniak aents aidaunash Apajuí inabaujin pachis shiig dekamtikau.

<sup>9</sup>Tujash wajumak aents aidau antumtik-mainchau aidauk dekaskeapi tuinachu. Nunidau asag tikich aents aidaush antuinamunum, yamajam chicham etsegbaun pegkegchau chichajuidau. Nudiagtai Pablok Jisusa nemajuidaunak ashí yajuak, makichik aents Tirano daagtinun jintinkagtutajjin jeganum utsaa, ditanak kashí kashinig Apajuin chichamenak jintintu. <sup>10</sup>Dutika takaak jimag mijan pujusuí. Nuniau asamtai ashí aents Asia nugkanum batsamin aidauk, judío aidaui, tikich judiuchu aidaushkam Jisusa chichame etsegbau-nak antukajui. <sup>11</sup>Apajuishkam Pablon yayau dutikam kuashat aents dutikmainchau aidaun iwaidau. <sup>12</sup>Imati-kau asamtai pañuelo aidaun jukiag, jaanchikish Pablo iyashin antigkag aents jaun ejeti, nunash antigkag etsagaidau, dutikam wakan pegkegchau aidaushkam jiinaidau.

<sup>13</sup>Dutikiagtai wajumak judío aidau jintá yujasag, wakan pegkegchau aentsun egkemtuaun jiiuidau asag, Apu Jisusa daajin adaisag jiiikta tuidau; nuninak wakan pegkegchaun chichajui-nak: “Pablo Jisusan etsegta nuna daajin jiiinkitajum”, tuidau.

<sup>14</sup>Nunak sacerdote aidaun apuji Esceva daagtin judío aentsua nuna uchijí siete aajakajua nu dutikaidau.

<sup>15</sup>Nuna tiagtai, wakan pegkegchau ayaak: “Wika Jisusnak wainnujai, tuja Pablos yaita nunak shiig dekajai; tujash atumesh ¿ya ainagme?”

<sup>16</sup>Nuna tusa tamawaik, aents wakan pegkegchau egkemtuamua dushakam tupikatki achikag, ashí ditanak wagagkiag senchi suwimaidau, imatikainam jegan ukuinak shiig wisú, tikich upu upujukim wegauke asajui.

<sup>17</sup>Nu nunikbaun judío aidau, judiuchu aidaushkam Efesonum batsamin aidauk ashí antukag, senchi ishankajui. Imaninak Apu Jisusan pachisag emema-tuidau. <sup>18</sup>Nunisag kuashat Jisusan dekaskeapi tusag nemagkaju aidauk, kaunawag ashí antuinamunum dita pegkegchau takataiji aidaunak ashí etsegtumaidau.

<sup>19</sup>Nuigtushkam kuashat aents iwanchin papijin ajus takajakú aidaushkam, papijin ikaunmak, ashí aents wainainamunum apekaju. Nunú papí aina nuna akikeg cincuenta mil kuichik tumain aajakuí. <sup>20</sup>Aatus Apu Jisusa chichameg niina senchijijai, ashí tikich nugkanmash pampag wegau.

<sup>21</sup>Nunú nunik nagkaemakui ai, Pablo: —Macedonianmaya aidaun, Acayanmaya aidaujui ijagsatjai, nunikan Jerusalén jegatjai, —tiuwai. Nuigtushkam:

—Jerusalén jeganuk Roma wemainaitjai, —tiuwai. <sup>22</sup>Nuna tusa jimag niina yain aidau Timoteon, Erastojai Macedonianum awemajui, nunik nigka machik tsawan Asia pujustatus juwakui.

#### **Efesonum pampandaijama**

<sup>23</sup>Nunú tsawantai Yamajam chicham pachisa kuashat pampandayamu asauwai. <sup>24</sup>Nunak Demetrio daagtin, jiju plata tutain takau asa, jega Diana ememattain dakumas najanu, dutika sujuk nijai takau aidaujui kuashat kuichkin juidau. <sup>25</sup>Nuniak aents nijai takau aidaujui, nuigtú tikich ditajai betekmantuk takau aidaunash ipaa ijunjag chichainak: “Muun aidauh, atumek dekagme, iik jujú jutika sujaku shiig pujú ainaji. <sup>26</sup>Tujash atumesh wainjume, antutash antugjume, jujú

Pablok apajuí aidau aents najanamu aina duka apajuichu ainawai tusa, kuashat aents aidaun, dekaskeap nuninaita tumantikui, nunak imá Efesowa juwig tatsui, ashí Asia nugkanmayanashkam tu wekaetawai. <sup>27</sup>Juna jutika juka shiig puyatjumainai, jutii sujuinag juna sujumainchau etamkamtaig megkaemainaitji, tujash imá duke nunimait sui, jega iina apajuiji Diana<sup>e</sup> daagtina nuna jeeshkam pachikchamu atatui, nunitai Asia nugka juwiya, ashí tikich nugkanmaya aidaush emematin agma nunak dakitug idaisagtatui.”

<sup>28</sup>Tiagtai antukag, senchi kajekag untsumainak: “iDiana Efesonmayanua juke dekas imanuk!” wajauidau.

<sup>29</sup>Imataidau asag ashí yaaktanmayag shiig dekaashmin wajasag wainak pachimdaekaju. Nunikag jimag aents Macedonianmaya Pablon uyunaidaun, Gayo daagtin, Aristarcojai pujuttaman achikag jukiagi, japí japinakua dekas jega shiig muun aents aidau tuwatain egegawaju. <sup>30</sup>Nuna dutikawagmatai Pablo nui wayaa aents aidaun ausatatus weta tutaishkam, Jisusa nemajin aidau: Weepa, tusag emetuawajui. <sup>31</sup>Asianmaya apu aidau, wajumak Pablo kumpají aidaushkam nigka auna aanina awig pachinkaigka, tusag chichaman akupjukajui. <sup>32</sup>Nuniai ijunjamunum wajumak aents makichik wajiin pachisag senchi untsumaidau, nuniai tikich aidauk tikichin pachisag untsumaidau, aents aidauk kuashat pachimdagaidau, nuniai kuashat tikich aidauk dekainachau, wajina pachisag ijunjaje nunak. <sup>33</sup>Imadiagtai judío aidau Alejandron shitakiagi emaidau, ame tikich aidaush shiig ujektá tusag, dutikam Alejandroshkam uwejen

---

e 19.27 “Diana” tawa duka griego aidau apajuijimtaji aajakuí. Tikich versiognumak “Artemisa” tawai Diana tawa nunak tayatak.

takuinu bitat asatnume tusa, judío aidaun ayamjus ashí aents antuinamunum chichaktatus. <sup>34</sup>Nu chichatai diikmag judío aentsun wainkag, senchi untsumkag: “iDiana Efesonmayanua juke dekas imanuk!” wajai wajainakua jimag hora amainun ejesattak wegagtai,

<sup>35</sup>nunú yaaktanmaya apu chichatai agatin wajantá, imatuidaun itatmitkak chichaak: “Efesonmaya muun aidauh, ashí tikich nugkanmaya aidaush dekainawai, jujú yaakta juwiya aidaun, apajúi Diana ememattaiya nuna jeenak kuitamkati tibauwai, ashí niina niimejai betekak nayaimpinmaya iyaajua nunashkam. <sup>36</sup>Imaan dekaidau asag, junak wainkayai tumain ainatsui. Dekas bitat asatajum, wainkajum shiig anentaimtsuk pegkegchauk dutikawaig-pajum. <sup>37</sup>Jujú aents atum juwi itaujum juka, atumi apajuijum ememattai jega nunakesh pegkegchauk ematsui, apajuiuginakesh pegkegchauk chichag-tsui. <sup>38</sup>Demetrio, niijai takau aina nujai, tikich aentsjai chichaman tudaitatus wakegainakug, apu chichaman epegkin aidaun batsata nui ditak wegag, makí makichik ditanua nunak tudaimain ainawai. <sup>39</sup>Untsu atum tikich tumain ajutjamainakuig, nunú pachisjumek dekas ijunjamunum tumain ainajume. <sup>40</sup>Yamai pampandaibau asa juka puyatjumainnum pujaji, apu Romanmaya dekaa waji pampanjume tujamkuish tumainnum batsattsui.” <sup>41</sup>Nuna tusa aents aidaunak ishiakui.

**Pablo Macedonia  
Greciashkam webau**

**20** <sup>1</sup>Nunú pampandayamu nagkan-kamtai, Pablo Jisusa nemajin aidaun untsukú. Dutika chichá chichagkawa ashimak, ditan pagkuk akateg ukuinak, Macedonia weuwai. <sup>2</sup>Nui wekagas ashí Jisusa nemajuidaunash

ijajus anentain ichichtug ukuak Grecia jegauwai. <sup>3</sup>Nui kampatum nantu pujus: “Siria nugkanmag lanchanum wetajai”, tusa pujukmá dekauwai, judío aidaun Pablo maami tusag uminas dakainamun:

—Nunik dekas kukag Macedoniaya atú nagkaemaktajai, —tiuwai. <sup>4</sup>Tusa wetai saetukajui Bereanmaya aents Sópater daagtin Pirro uchijiya nu, Aristarco Segundojai Tesalonicanmaya aidaun, Gayo Derbenmaya dushakam tikich Timoteo, nuigtú Tíquico, Trofimojai Asianmaya aina dushakam. <sup>5</sup>Ju yatsut aina juka ditá eemag yaakat Troasnum jegawag dakagmagmayi. <sup>6</sup>Ditak nuninai jutiik ukunum juwakaja pag levaduragtuchu inajuamu yuwaku jistamtai tsawagmatai, nunú inagkeaki Filiposnumiati botenum jiinki, cinco tsawan Troasnum jegaa, nui makichik tumig inagkeakiabiayi.

**Pablo Troasnum ijasbau**

<sup>7</sup>Tumig tsawagmatai ijunjabiaji Jisus jakamu anentaimtusa pag yuwawagtasa, nuniamunum Pablo kashinia duwi jiinkitin asa, Jisusa nemajin aidaun jintí jintintai aehaet wajasuí. <sup>8</sup>Jutiik jega yakí tesamunum kuashat lámpara ekemagbaunum ijunja batsamijai. <sup>9</sup>Nuniamunum makichik datsauch Eutico daagtin, ventananum eketu. Pablo chichá chichagkagtakua ayatak emau asamtai kaja achikuí, dutikam shiig initjau kanag yakí kampatum jega ekenbaunmaya juwaki nugká iyawabi. Nunikmatai inankamag jakaun inankiajui. <sup>10</sup>Nunikmatai Pablo akaetuki, uchin pagkuk inankiabi. Dutika Jisusa nemajuidaun chichajak:

—Puyatkaigpajum iwaakui, —tiabi.

<sup>11</sup>Nuna tusa Pablo ataktú yakí waka, Jisus mantamnamujin anentaimtusag pagkan puug yuwa chichá chichagkag-

takua, tuke tsawampag weuwai. <sup>12</sup>Nunitai uchin iwaakun jukiag shiig aneasag juwakajui.

#### **Pablo Mileto webau**

<sup>13</sup>Jutiik iiyá emka lanchanum juwaki Aso wegabiaji, nuanuí Pablo igkugka jukitasa, nigka: “Kukag wetasan wakegajai”, tiu asamtai. <sup>14</sup>Nunika Pablo Aso taamtai igkunika nui niish egkemjamtai Mitilene jegabiaji. <sup>15</sup>Nunika wega wegakua kashinia duwi ajuntai Quío tutainum diiká nanamsabiaji, nui juwaki kashinia duwi Samos anumtainum anumkabiaji. Nunika Trogilio kanaja kashinia duwi Mileto jegawabiaji. <sup>16</sup>Nunak Pablok Asia nugkanum dukap tsawan pujutan dakitau asa, Efesonum wetanak dakitjauwai, waamak Jerusalén jegá niishkam jista Pentecostés pachinkata tau asa.

#### **Pablo Efesonmaya Jisusa nemajuidaun diin aidaujui akatdaijamu**

<sup>17</sup>Pablo Mileto pujus, Efesonmaya Jisusa nemajuidaun diin aidaun untukabi kautjuktinme tusa. <sup>18</sup>Tima kaunkamtai chichajak: “Atumek dekagme wi yama nagkamchakun, juwi Asia nugkanum taawabiag duwi nagkamsan wajuk pujusja duka. <sup>19</sup>Ashí tsawantai atumjai ijunja pujusan, Apu Jisusa umigkunchakam emematsuk pujusan, kuashat negayai Apajú augbajai, tuja mina pataag judfo aidaushkam imanik pegkegchau aidaun egatjuinak waitkajianume. <sup>20</sup>Nuna imatijuinakuish, wika chicham pegkeg atumin yaimpamaina nunak tuke ujabijime. Jintinbaijime iwainajan aents tuwakbaunmashkam, tuja atumin jeeminchakam dutiksanuk jintinbaijime. <sup>21</sup>Mina pataag Judfo aidaunash,

judiuchu aidaunashkam tudau takatak idaikujum, Apajú nemagkujum, Apu Jisuschakam dekaskeapi titajum tusan, ujayajime. <sup>22</sup>Yamaik Jerusalén wegajai, Wakaní Pegkeji awetau asamtai, awish utugtukagtig nunash dekatsuk wegajai. <sup>23</sup>Untsu Wakaní Pegkejiya nunú, ashí wi yaaktanum wegamunmag chichagtak: ‘Aminak achigmakag egkepatatus dakagmainawai, waittash imanik kuashat waittsattame’, tusa ujabtaunak dekaujai. <sup>24</sup>Tujash wika nunak puyatjuchujai, wika mina pujutjunak uyumas-nukesh diichujai, wi wakegag nunak Apu Jisus yamajam chicham Apajú anempa nunú etsegkata tujutbauwa nuna betek umikan, nagkankatasan wakegajai.

<sup>25</sup>“Yamaik dekas atumnash tajime, wi atum aidautigmin Apajú nuní inapaji tusan ujakjim anuiyatigmekesh minak waitkashtin ainagme. <sup>26</sup>Nuaduí yamaya juwik titasan wakejajime, minak atumiin bakumaminuk makichkish atsugtawai. <sup>27</sup>Wagki wika Apajú tawa nunak makichkish uugká idaitsuk, ashí iwaintusan ujakjim nuaduí. <sup>28</sup>Nuaduí atumek kuitamamkatajum, ashí aents Jisusa nemajin aidaun, Apu Jisus niina numpeen akikmak sumakua nuna, Wakaní Pegkejiya nu atumin, uwijá kuitamin aidau uwigiin kuitamajama imatikas, shiig kuitamkatneme tusa aputamsajua duwi. <sup>29</sup>Dekajai wi wemataig, tikich aents aidau kuntin kajan uwijan amuwama numamtuk, Jisusa nemajin aidautigmin emegkapakagtatus kautjamkagtatui. <sup>30</sup>Atum ainajum anuiyag, dekaskea nunak jintinkagtutsuk, waita nuna jintinkag-taush agtatui, Jisusa nemajuidaush wi jintiag junak umiktinme tusag. <sup>31</sup>Nu nunikaijum aneaku atajum; adeagtajum wi kampatum mijadai tuke kashi tsawaishkam, makí makichik atum

aidautigmin nuní pujustajum tusan chichagkun, negá negajai imatjimijim nunú.

<sup>32</sup>“Yatsug aidauh yamaik Apajuiyai idaijime, ni anejatbaunum chichaman sujamsauwa nujai juwaktajum, nu chichamak senchigtinai, iman asa atum Jisusai aan nagkaemasjum kajintsá anentaimtanum yaimpaktatjume, nunitai Apajuí ni aentsji aidaun jukitnun anagkuauwa nunash imatiksag amastatjume. <sup>33</sup>Wika tikichdau kuichik, jaanch, oro aidaunakesh wakeejuk wekaechabijai. <sup>34</sup>Nunak nunitsuk wika mina uwejuig takasbaijai, wi atsumamun juwakun tikich wijai yujaidau atsumainamunash yaigtasan. <sup>35</sup>Tuke jintinbaijime aajam takamain ainagme, nuniakjum tikich atsumaidaush yaimainaitjume tusan. Adeagtajum Apu Jisus chichaak: ‘Ni juwak shiig anea nuní nagkaemas shiig aneawai tikichin suwa duka’, tiuwa dushakam.”

<sup>36</sup>Juna tusa idayak, Pablo ashí tikich aidaujai tikishmajag ditajai ijunas Apajuin aujsajui. <sup>37</sup>Nuna nunikag ashí buutuinak, Pablon pagkukag kugkuyanume akatdayinamunum. <sup>38</sup>Senchi wake besemag dekapianume, Pablo chichaak: Ataktú awenagmek waitkashtinaitjume, tau asantai. Nunikag botenum egkematus wetaishkam saetusag ejegawajabi.

#### Pablo Jerusalén webau

**21** <sup>1</sup>Jisusa nemajin aidau ukuinaku lanchanum chimpimjá, tutupit Cos wegabijai, nunika kashinia duwi Rodas jegaa, nagkaemasaik Pátara jegawabijai. <sup>2</sup>Nui jegakmá lancha Fenicia wegau wainká, nui egkemjá weyaji. <sup>3</sup>Nu nagkaiki wesá ajuntai Chipre wainkabijai; duka menanmanini ukuaku Siria wegabijai. Nuniamunum lanchanmayan wajiin jiigta tuinakui Tiro anumkabijai. <sup>4</sup>Nui jegakmá Jisusa

nemajin aidau wainkaja, nui makichik tumig ditajai batsabijai. Nuniamunum Wakaní Pegkeji dekamtikamu asag, Pablon chichajuinak: “Jerusalegkak wemaitsume”, tiajabi. <sup>5</sup>Tujash tibau aig, makichik tumig nagkaemakmatai jijnjabijai. Nunika wegajin ashí Jisusa nemajin aidauk, ditá nuwe uchijí aidaujai uyuntamas minianume yaaktan ukukiag, nunikagmatai nui kaamatkanum utsanawaja ashí tikishmakaja Apajuí ausabijai. <sup>6</sup>Nunú nunika pagku pagkuní ukunikiaja lanchanum egkemjin ditashkam jeen waketjajabi.

<sup>7</sup>Tironmayati juwakiaja nayants wegamuk, Tolemaidanum jegaa, nui jiinkí Jisusa nemajuidau batsatbaunum jegawaja, chichai chichainakua makichkia kanaja ukukiabijai. <sup>8</sup>Kashinia duwi jiiinkiaja Cesarea jegawabijai. Nunika Jisus chicham etsegtugkatajum tusa etegjamu aina nuna yain siete aajakajua nuwiya, Felipe wegagas chichagkagtina nuna jeen jegaa kanabijai. <sup>9</sup>Felipe nawanji cuatro agkanjam Apajuí etsegtin batsabianume.

<sup>10</sup>Nuanuig kuashat tsawan pujajin Apajuí etsegtin Judeanmaya Agabo daagtin taawabi, <sup>11</sup>nunik Pablo akachumtaijin juki, uwejen nawenishkam jigkamag chichaak:

—Wakaní Pegkeji chichaak, Jerusalén jegamtai judío aidau juna akachumna nuna achikag jigkajag, judiuchu aents aidanum sujukagtatui tawai, —tiabi.

<sup>12</sup>Nuna takui antukaja jutii, Cesareanmaya aidaujai ijuntuja, Pablo chichagku:

—Dekas Jerusalegkak weepa, —tibaiji. <sup>13</sup>Nunú tajinchakam Pablo ni aigmak:

—¿Wagka buutkugmesh minash wake besemjash anentaimtijagme? Wika ayatak jigkagbau atasanuk umintsan

wekaetsujai, wika Apu Jisusa chichame etsegbaunum Jerusalén mantuinakuish jakatasanush wakegajai.

<sup>14</sup>Taku depetmain wegachkui, tujinká: —Apu wakegamu atí, —tusa idaisabijai.

<sup>15</sup>Nu tusa idaisa pujusá, chimpiima umintsá Jerusalén ashinkabijai. <sup>16</sup>Nu wegajin Cesareanmaya wajumchik Jisusa nemajin aidau uyuntamsagmayi. Nunikag Chiprenmaya Mnasón daagtin nigka duwik nagkamas Jisusa nemajin pujaunum ejetamawagmayi, niina jeen ikapagti tusag.

#### Pablo Jerusalén jegaamu

<sup>17</sup>Jerusalén jegaa ajin nuwiya Jisusa nemajuidau shiig anenjamsag jujamkiagmayi. <sup>18</sup>Kashinia duwi Pablo: Jacobo ijagsami takui, niijai ashinkabijai. Nui jegakmá ashí Jisusa nemajin aidaun diin batsatbaunum jegawabijai. <sup>19</sup>Nunika ajin Pablo ditan kumpamá, duwi makí makichik ni wekaesamunmayan, judiuchunum wekaebaunmash Apajuí nuní yainkame tusa ditanash ujabi. <sup>20</sup>Nunú tabaun antukag Apajuin emematiagmayi. Nunikag Pablon chichajuinak:

—Dekas yatsujuh pegkejai ame tame duka, tujash amesh wainme dekapa-mainchau iina patayí judío aidau Jisukristun dekaskeapi tusag nemajuina duka. Nuna nuninakush ditak, Moisés chicham umiktinun ukugtamkimua duka tuke idaitsuk umigmainai tuinawai.

<sup>21</sup>“Tujash amina chichagtamainak, auk nigka ashí iina patayí judío aidaun, nuigtú judiuchu aidau batsatina nunash jintintak: ‘Moisés chicham umiktajum timawa duka umigmai-tsugme, uchi aishmagkuch akiinkuish, pakagkagmek ajapjumaitsugme, iina muunji takajakua dushakam atumek

idaisatajum’, tusa tawai tujamaina nunash, <sup>22</sup>¿wajuk asamtaiya tujamainawa? Nunú tabaun antú batsata nunidau asag, ame juwi taamugmin dekagtamainakug kautjamkagtatui. <sup>23</sup>Nunin asamtai ju dutikmainaitme: Jutii ainag juwi, cuatro aents yamai umiktatus batsatainawai Apajuí anagkuamun. <sup>24</sup>Nunú yajuakam wetá nunikam ditajai pegkeeta, dutikam ju aents diwimkagtukagmataish ame akikmatkata, dutikawamin ditá intashin tsupigtinme. Nunú nunikamin ashí waipakag amina augmatjamsag tujamiagbaunash wainkampap tuinawa, niish dekas Moisés tibau ii umiinag nunash imatiksagkeap umiawa, tujabiagtatui. <sup>25</sup>Judiuchu aidau Jisusan dekaskeapi tusag nemajuina dushakam, ashí apajimtai aidau anagkuamu aina duka yuwawaigpajum, tsanijintash tsanijinawaigpajum, kuntin ayatak pempeaja maamu aina nuna nejesh, numpashkam yuwawaigpajum tusa agatjabijai”, tiaju.

#### Pablo achikbau

<sup>26</sup>Tusa tima cuatro aentsú yajuak we, kashinia duwi ditajai pegkediag, jega Apajuí ememattainum Pablo wayaa, sacerdoten chichajak:

—Jutii pegkeemu tsawan umintaik makí makichik kuntinun sumakag, Apajuin anentag susatasag taawagtatui, —tusa ujakajui.

<sup>27</sup>Nuna tusa tuke duti dutikakua siete tsawan ejetatak wajamunum, wajumak judío Asia nugkanum batsamin aidau, Pablo jega Apajuí ememattainum pujaun wainkag, ashí aentsun ujakag dapampakaju. Dutikawag Pablon achikag, <sup>28</sup>senchi unsumjukag: “iIsrael aents aidauwah, yainkatajum! Ju aentsua juuwai ashí nugkanum wekagas, aentsun jintintak: Jutii judío

aidauti umigtaiji aidauk umigkaigpajum taku, Moisés chicham umiktajum tiuwa nunash pegkegchau chichajak, jega Apajuí ememattaiya junash aikasag pegkegchau chichajú wekaenuwe duka. Nuigtú yamaishkam griego aents aidaun jega Apajuí ememattai pegkegma juwi utsaa pegkegchau awasae.”

<sup>29</sup>Nunak, Tróximo Efesonmaya nujai Pablo yaaktanum wegagun wainkaju asag, jega Apajuí ememattainmash awayaestai tusag tiajai.

<sup>30</sup>Nuna antukag ashí nu yaaktanmayag pampaidau. Nuninak pisajag kautuawag, Pablonak achikag jega Apajuí ememattainum wajaun japikí agaa jiyamuik, wamkesag waitinak epetiagmayi. <sup>31</sup>Ayatak maata tiagtai, wamkes Romanmaya suntaja comandantejin, ashí aents Jerusalegnunia aidauk senchi maaninawai, tusa ujakam, <sup>32</sup>suntag aidaun ijumag, ashí tikich suntajá apuji aidaunash yajuak pisajag aents tuwaká abaanum kautkagmayi. Nuna wainkag Pablon suwimaidaushkam idaisagmayi. <sup>33</sup>Nunikagmatai comandante jegantun, Pablon achiká juki jimag jiju ikagmawai, jigkagtajum tusa sujuk idayas ajuma duwi jegantun: ¿Amesh dekas yaitpa? ¿Wají chichamaiya aikagmainawa? tusa iniibi.

<sup>34</sup>Tujash wajumak aents aidau, tikich wajiin pachisag untsumainai, tikich aidaushkam dutiksag tikichin tuidau, imatuidau asagmatai comandanteshkam shiig dekamainchau dekaeau asa:

—Suntajá batsamtain jukitajum, —tiuwai. <sup>35</sup>Tiajam Pablon juki, suntag aidau ditá batsamtain awayatasag, papajá iwakbaunum jegantag yanakiag jukiajui, aents aidauk Pablon achiktatus imatikaidau asagmatai. <sup>36</sup>Ashí aents

aidauk saegas wesag senchi untsumkag: “iAyatak mantamnatí!” awajiangmayi.

### Pablo aents tuwakbaunum ayamjumaku chichakbau

<sup>37</sup>Suntajan batsamtaijin awayattaku emam, Pablo comandanten iniak: —¿Wisha machik augmaitsujamek? —timayi.

Tusa iniam comandante ayaak: —¿Amesh griego chichamash dekamek? <sup>38</sup>¿Ame yamaipat, Egiptunmaya aents Romanmaya apun shiwagmá, chichaman tsuwapá cuatro mil maanin aidaun yajuak uwegshunum jijjua duchaukaitam? —tau.

<sup>39</sup>Tama Pablo ayaak:

—Wika judiuwaitjai, mina pujutaijuk yaakat muun Tarso, Cilicia nugkanum awa nuwiyayaitjai. Wait aneasam ayú tujutta, aents aina juna machik ausatasan wakegajai, —timayi.

<sup>40</sup>Tusa tutai comandanteshkam ayú tima suntajan batsamtaijin wayatasa watai papajá iwakbaunum wajas, uwejen takuiniabi, aents pampaun itatmitkak ausatatus. Dutikam aents itatjagmatai hebreo chichamai ditan aujak:

**22** <sup>1</sup>“Israel wegantu yatsug aidauwah, ashí muun aidautig-mesh wait aneasjum antugtuktajum, wi chichaakui.”

<sup>2</sup>Tusa Pablo hebreo<sup>f</sup> chichamai chichattaman antujuk chichatsuk takamtak asagmayi. Nunikagmatai Pablo chichaak:

<sup>3</sup>“Wika judiuwaitjai, yaakat Tarso Cilicia nugkanum awa nui akiinawaitjai, nunikuitkun juwi Jerusalén tsakajuitjai, papiinashkam Gamaliel jintinjuauwai, iina muunji aajakaju

f 22.2 Tikich papinomag “arameo” tuinawai. “Hebreo” chichamak arameojaig betekmamtin aajakuí. Jutii chichame Wampisdaujui betekmamtina anmamtin.



chichaman umijakajua dutiksag. Dutikamu asan, atum yamaya juwish Apajuiya duke takagsatasajum wakegainajum, imatiksasuk wishakam imá niinak takagsatasan wakejinaitjai. <sup>4</sup>Wika duwikik yamajam chichama juna umiktatus wakegaidaunak egakan maatasan, ashí nuwaí nuwaima yajuakan aents achiká chimpitainum chimpiyajai. <sup>5</sup>Sacerdote apuji aidauk, ashí apu aidaushkam nunak shiig dekagtuinawai. Dita papí agag sujusajui, Damasco iina yachi judío aidau batsatbaunum jegá nuna inakmas, Jisusa nemajin aidaun egak achijá, juwi Jerusalén ikaunmamtai, suwimak susami tusag.

**Pablo ni yapajinamu etsegtumamu**

*(Tak. 9.1-19; 26.12-18)*

<sup>6</sup>“Nuna dutika sujusagmatai, nuna jukin Damasco jegattakun jintá wegai, etsa tajiastatak wajasú ai, nayaimpin-maya senchi etsantug egketkamtai, <sup>7</sup>nugká iyaagbaijai. Nunikan chichaman antukbaijai: ‘Saulo, Saulo ¿wagka minash waitkajame?’ <sup>8</sup>tujutkui wi iniakun: ‘¿Apu amesh yaitpa?’ tibaijai. Tusan tai ni aijak: ‘Wika Jisus Nazaret-numiyaitjai, ame ya waitkame nuuwaitjai.’ <sup>9</sup>Wijai yujaidaushkam tsaaptinun wainkag ishankagmayi, nuninayatkush mina aujtaunak nuna takumpap tawa tusag dekaachagmayi. <sup>10</sup>Nuna tujutkui: ‘Apuh, ¿wajukati tusamea wakejutame?’ tusan iniasbaijai. Nuna tai Apu Jisus chichagtak: ‘Nantaktá nunikam wegam antsamek Damasco jegata, awi jegawamin ame dutikmainnak ujakagtatui’, tusa tujutmayi. <sup>11</sup>Tsaaptina nu wainmachu etimtai, wijai yujaidau egkegsag Damasco ejetiajabi.

<sup>12</sup>“Nuanuí makichik aents Ananías daagtin, Apajuí puyatjus umijin, Moisés

chicham umiktajum tibaunash umin asamtai, ashí mina pataag judío Damasco batsamin aidauk niina pachisag pegkeg chichagtai pujubi. <sup>13</sup>Nunú Ananías mina tajutí chichagtak: ‘Yatsug Sauloh, yamaik ataktú wainmakta, tujutmayi.’ Nuna tusa tujutmawaik niimin wainmakbaijai. <sup>14</sup>Nuna nunika ai chichagtak: ‘Iina muunji aajakajua nuna Apajuiji, duwik nagkamjamas aminak wi wakegamunash dekaatin atí tusa etegtamjau asa, yamai dekas Pegkeja nunash wainak, ni chichamujinash antugkati tusa aikagmaume. <sup>15</sup>Dutijabau asamtai yamai nagkamsamek, ame ni pachisam ashí nugkanum wekaesam etsegkattame, nuniakum ame wainkamugmesh, ame chicham antukbaugmijai tuke etsegsamké atatme. <sup>16</sup>Yamaish nu nuniktinaitkumesh, ¿wají dakame? Wajaktá nunikam imá Apu Jisusa duke anentaimtusamin yamigtajame, dutikam tudaugminish tsagkugnagminum’, tujutmayi.

**Pablo judiuchu aidaunum awemamu pachisa etsegtumamu**

<sup>17</sup>“Nuna ashí umikan Jerusalén wakitkin jegaan, jega Apajuí ememattainum Apajuin aukun pujusan, <sup>18</sup>Apu Jisus paan wantintujun waika ai chichagtak: ‘Jerusalegka juwig pujutsuk juka ukuakum wamkesam jiinkita, juwiyag ame mina pachittsam etsegtaiash antugtamakachagtatui’, tujutmayi. <sup>19</sup>Tujutkui wi chichaakun: ‘Apu minak dekajuinawai, wi jega ijuntainum wekaetusan nuwiya aents amina dekaskeapi tusa umigtamaidaun, achiká jukin aents achikbau chimpitainum chimpiakun suwimduweg nunak. <sup>20</sup>Esteban, amina inakem amina pachipas chichaun mainakuish, wishakam chichaman ijutkan, nuna

maidaun jaanchjinashkam wiki kuitam-  
juyag nunash shiig dekgatuina jama.’

<sup>21</sup>Tusa tai Apu Jisus chichagtak: “Tutsuk wetá, wi aminak atushat tikich nugkanum aents judiuchu aidau batsatbaunum awemattajame’, tujutmayi”, tiuwai.

#### Pablo Romanmayayaitjai tibau

<sup>22</sup>Pablo tusa chichatai antú antujuina-  
kua ashimtai, aents aidauk senchi pampajag: “Ju aentsua juka ayatak mantamnati, mautskek idainaschati”, tusa imatuinak, <sup>23</sup>jaanchjinak japikí tujit ichigkag wajantag, nugka yukuukuntun atsaaki jukiag yakí nagkimawag wajagtai, <sup>24</sup>comandante suntajin:

—Anuí atum batsatbaunum awaya-  
jum asutiatajum, wajuk asamtaig aents aidash imatjuinawa nuna etsegkati,  
—tusa awemabi. <sup>25</sup>Dutikawajam Pablonak jigkagbautak awasag asutiata tama, nui capitán wajau asamtai chichajak:

—¿Atumesh Romanmaya aentsush shiig chichame dekgatsuk asuttanmash inagbaukaitjum? timayi.

<sup>26</sup>Nunú tama capitán antuk, coman-  
danten wejí jegaantun chichajak:

—Ame asutiatajum tusam aents awemaum duka Romanmaya aentsui, nunin asamtai dutikmaitsui, —tiyabi.

<sup>27</sup>Nu tima comandante Pablon jegaan-  
tun iniak:

—¿Dekas ame Romanmaya aentskai-  
tam? —tau.

Tama Pablo ayaak:

—Ehé, wika Romanmayayaitjai,  
—tuuyi.

<sup>28</sup>Tutai comandante chichaak:

—Wi Romanmaya aents wetasanuk kuashat kuichkin akikmakuitjai,  
—timayi.

Apu tutai Pablo ayaak:

—Wika Romanmaya aents asan Romanmayaketjai, —tuuyi.

<sup>29</sup>Nuna timatai Pablon asutiatus ijunjaushkam ukukiagmayi. Comandan-  
teshkam “Romanmaya aentsuitjai” tutai antuk, ni jigkagtajum tusa inamjau asa senchi sapigmakmayi.

#### Pablo judío dekas apuji aidau ijunjamunum awayamau

<sup>30</sup>Kashinia duwi comandante Pablonash:  
¿Wagkag judío aidaush imatjuinawa? tusa shiig dekgajuata tau asa, jiju ikagmawwai jigkagbaunak atitug sacerdote apuji aidau, tikich dekas apu aidaujai ijunjatnume tusa ipaa, ashí ijunjamtai, nuaduí Pablon ejapeen awaantagmayi.

**23** <sup>1</sup>Dutika awaantam Pabloskham apu aidau ijunjaun shiig esetug diis chichaak:

—Yatsug aidauh, wika Apajuí umijin asan pegkek anentaiyai pujuwaitjai, nunisnuk yamaya juwishkam, pujajai.

<sup>2</sup>Tusa tutai sumo sacerdote Ananías, aents Pablon adijis ijunjun:

—Aanú tawa nu weni awatita,  
—timayi. <sup>3</sup>Tutai Pablo nuna chichajak:  
—iAentsun tsanuawah, amina dekas Apajuí awatamtatui! Chicham umiktin tawa dutiksamek dekgatuatasam eketiakumesh, ¿wagka weni awatita-  
jum tusamesh tujutme?

<sup>4</sup>Nuna tutai nui pekaju Pablon chicha-  
juinak:

—¿Aajamesh Apajuí sumo sacerdotejish pegkegchaush chichagkamum? —tiajabi.

<sup>5</sup>Tama Pablo ayaak:

—Yatsug aidauh, wika sumo sacerdo-  
tenak dekachu asan tajai. Apajuí chichame agagbauwa nu chichaaksha-  
kam: ‘Atumin apujum aidauk pegkeg-  
chau chichajigpajum’, tawai.

<sup>6</sup>Nuna ti saduceo aidau, fariseo aidashkam ijunjamunum pachitjaun wainak senchi jiiká chichaak:

—Yatsug aidauh, wika fariseowaitjai, mina muuntug fariseo aajakú aina nu akiiamuitjai, nunin asan wika: ‘Aents aidauk jakag dekas nantakiagtin ainawai’ tau asantai, nuna dekgatua-wagtatus imatjuinawai, —tuuyi.

<sup>7</sup>Nuna Pablo timatai fariseo aidau, saduceo aidaujai ijunag aidau, ditak pampá pampandayinakua kanakajabi. <sup>8</sup>Saduceo aidauk: “Jakau aidauk tuke nantagchatin ainawai, nayaimpinmaya aentsush atsuinawai, wakanchakam shiig atsawai” tuinai, fariseo aidauk ashí nunak awai tinu asag nunikagmayi.

<sup>9</sup>Nunikag kajekag senchi untsumiagtai, wajumchik aents dekas Moisés chicham umiktajum timawa nuna jintinkagtin fariseo aidau asag, wajakiag chichainak:

—Ju aentsua juka makichik pegkeg-chaunakesh takaschae, dekasji wakankesh nuniachkush, Apajuí aentsji nayaimpinmaya aina dukesh ausau amainai.

<sup>10</sup>Tusa senchi jiyaniagiagai, comandanteshkam puyati, nuniak Pablon achikag jiiikiag maawainum tusa, suntag aidau chichaman awetiabi:

—Kaunawag jiiiktinme, dutika ataktú dita batsatbaunum ejegawagti —tusa.

<sup>11</sup>Dutika ejegam kanittaman, kashi Apu Jisus Pablon wantintuk: “Pabloh, anentaim ichichiaqta, Jerusalegka juwi mina pachittsam etsegkaum antsamek, Romanum ejetamawagmataish etsegkata”, tiuwai.

### **Pablo maami tiagbau**

<sup>12</sup>Kashinia duwi, wajumchik judío aidau ijunag chichasag, Pablok dekas maami, tusa chichaman umigkag, wainka tunai, dekas yujumak yutsuk, umutash umutsuk batsamsá, Pablo maa nuaduú yujumkak yuwawagmi, maashkuik yuwachagmi, tusag shiig chichasajui. <sup>13</sup>Nuna tuidauk cuarentan

nagkaesau aajakajui. <sup>14</sup>Imaan aina nu sacerdote apuji aidau, nuigtú tikich apu aidau jegajag chichajuinak:

—Jutii aidauti Apajuí adaisaja, Pablo mautskek yujumkak makichkish yuwachagmi tusaja chicham umikji.

<sup>15</sup>Yamaik atumesh, ashí tikich aidautig-mijai comandante segatajum, atum pachimasjum jutii batsatbaunmash itatajum, jutiishkam shiig kuitamsa chicham dekaajuami tsajum, dutik unupiajagmin atumiin eke taachuk jutii maawagmi, iik umintsá atatji, —tiagmayi.

<sup>16</sup>Nu tuinamun Pablo umayin akiinau uchi antuk, suntajan batsamtajjin diichji pujau asantai jegajua ujakmayi.

<sup>17</sup>Dutikam ni Pablo capitainin untsuk itan:

—Ju uchi jukim comandante pujamunum ejegata, dutikam ju uchi ni ujamain awa nuna ujaktí, —tusa timayi.

<sup>18</sup>Tima capitanchakam uchin juki, comandante ejeti:

—Pablo achikam puja nunú untsujuk, jujú uchi jukim comandante ejetita, ni ujamain chicham awai tawa nuna ujaktí tujutmatai, juna uchin jukin itajai, —tiuwai.

<sup>19</sup>Tama comandante uchin uwegnum achiká juki, niinak akanki ema:

—¿Wají ujakkata tame? —tusa iniau.

<sup>20</sup>Tama uchi niina ujaak:

—Iina patayí Judío aidau chichaman umikagmae, amina pachipasag: ‘Kashin Pablo jukim dekas apu batsatbaunum itata, dutikawamin wají chichamak ajawa nunú shiig kuitamsa dekaajuami tusa segatá’, tujabiagmae. <sup>21</sup>Nuna tujamainakuish kakajus ‘ayú’ tiipa. Cuarentan nagkaesau aents uumkag dakainawai: ‘Jutiik Pablo maachkuik yujumkak yutsuk umutash umutsuk batsamsagmi’, tusag; nuní chichaman umikag, yamaik amina utusag ayú tiya

tusag nunak dakagmainawai, —tusa ujakmayi.

<sup>22</sup>Nunú ujakam comandante uchin chichajak:

—Wetá, nunikmesh mina ujatkaum duka makichik aentskesh ujakaipa, —tusa awemabi.

**Pablo apu Félix pujamunum awemamu**

<sup>23</sup>Nunú ujaká ukukim jimag capitandin untuká itan:

—Doscientos suntag dawé wetin aidau ijumjam nuigtú setenta suntag caballonum wegagtin aidaushkam ijumjam, dutiksamek doscientos suntag nagki tinamkam dushakam ijumjata, kashi a las nueve jegai Cesareanum wetinme.

<sup>24</sup>Nuna tusa, nuigtushkam makichik caballo shiig umiktajum Pablo entsamkatin, dutikajum nui ekenjum iwaakuk shiig kuitamsajum apu Félix pujamunum ejegatajum, tusa awemak <sup>25</sup>juna papiin agatug awetiuwai:

<sup>26</sup>“Wi Claudio Lisias, amina apu Félix chichame antugtayah, juna papiin agajan awetakun kumpamjame.

<sup>27</sup>Judío aidau, ju aentsua juna achikag maata tuidaun, wi mina suntajujai shimutkan ayamjukjai, Romanmaya aentsui tabaun antukan.

<sup>28</sup>Wajinmak imatjuinawa tusan dekajuatan wakegau asan, judío apuji aidau ijunbaunmash ejegamjai.

<sup>29</sup>Nunikman dita chicham umitaiji aidau pachisag nuna umiatsui, tuidaun antugkamjai; tujash ni achinak egkemainnakesh, maam amainnakesh waitkashmajai. <sup>30</sup>Tuja judío aidau maawagtatus chichaman umigkagbaun ujatkgamatai dekaan, anuí amina awetajame; dutikakun chichaman aputuidaunashkam

segamjai ame antaminish niina pachisag titinme, wagkag kajejuinawa nunash tusan, duwi wainiami.”

<sup>31</sup>Tuja suntag aidauk apu nuniktajum tibaunak imatiksajag Pablon caballo-num ekeni jukiag, kashi we weenakua Antipatrisnum jegawajui. <sup>32</sup>Nunikag kashinia duwi suntag dawé ashinuk ditá batsamtaijin waketuinai, suntag caballo-num shibauk Pabljai wegagmayi.

<sup>33</sup>Nunik Cesarea jegawag papí agagbaun apun suwinak, Pablonashkam ejegawagmayi. <sup>34</sup>Nunú papí agagbaun aujus diisá, Pablon apu iniak:

—¿Amesh tuwiyampaitpa? —tau.

Tama ni ayaak:

—Wika Cilicianmayayaitjai —tutai dekajua <sup>35</sup>chichajak:

—Jasta, amina chichaman aputugmaina nu kaunak chichainakui, duwi dekajuatjame.

Tusa achijatin aidau:

—Jukijum Herodesan pujutaijiya awi ejegajum, atum shiig kuitamkatajum, —tusa awemabi.

**Pablo Apu Felisai ejegam ni ayamjumaktinji chichakbau**

**24** <sup>1</sup>Cinco imajin kanaja tsawamunum sumo sacerdate

Ananías, tikich wajumak judío apuji aidajui, makichik abogado Tértulo daagtinun ayasá Cesareanum kaunawajui, chichaman Pablon tiagta tusag.

<sup>2</sup>Pablon itawagmatai Tértulo wajakí apu Felisan aujak:

—See tajame apuh amina, ame inamu asamin agkan batsatainaji, nuigtushkam amina yachagminig kuashat wájí iina nugkeenish iwagnaka duwi. <sup>3</sup>Ashí nu dutikamua nunak ashí yantamnum shiig aneas juwainawai, nuaduí apu Felisa eme anentajame. <sup>4</sup>Tujash kuashat tsawantan atankijam tau asan, wait aneamam jutii chichamush machik

antugkagtukta tusan segajame. <sup>5</sup>Ju aentsua ju, judío aidaunak tuke chichaman tsuwapjin asa, ashí nugkanum wekagas judío aidau batsatbaunmash ni dapamkagtu wekaenai, niyai dekas Jisus Nazaretnu-mia pachis waitá etsejin agma nuna chichamjú wekaetinuk. <sup>6</sup>Nuigtushkam jega Apajuí ememattaiya nunashkam, tikich aentsun awaintua pegkegchau emau asantai, achikaja jutii chicham umiktin agagbauwa dutiksaik dekajuami tajin, <sup>7</sup>comandante Lisias suntajin utsanjama, senchi kakantus juki, <sup>8</sup>aents juna chichaman tuina juka dekas au apu puja awi wetinme, tujamaji. Nunin asantai imá ameketme ju ashí jutii pachisa etsegtuinag nu dekamainmek.

<sup>9</sup>Nuna tutai judío aidau nui ijunushkam:

—Ni tawa duka dekaske, —tuidau.

<sup>10</sup>Nuna tiagmatai Pablon apu iwijau chichaktí tusa. Dutikam Pabloshkam wajakí chichaak:

—Apuh, ame kuashat mijanai jújú nugka juwi apu wajasam chicham epegkeakum pujau asamin shiig aneasan wi ayamjumamainun titajame. <sup>11</sup>Ameketme dekas ju shiig chicham dekamainaitam duka. Wika Jerusalén Apajuin ememattasan taanuk, ayatak doce tsawanchik pujusmajai. <sup>12</sup>Nuanuí makichik aentsjai jiyaniaigkish, nuniachkunush jega Apajuí ememattainum, jega ijuntainmagkesh, tikich yaaktanmagkesh chichaman aentsun tsuwapjuan dapampá wekagaigkish waitkachagmae. <sup>13</sup>Jujú aents aidau mina chichaman tujutiagtatus kaunawaja juka, dekas wi nunikbaugnak aminak nuna nunikmae tusagkesh ujpamain ainatsui. <sup>14</sup>Wika iina muunji aajakajua nuna Apajuijin umigjai, nuniau asan Yamajam Jinta juna

etsegjai, dita waitai tuina nuna. Wagki wika chicham umiktin agagbauwa nuna, Apajuí etsegtin aidau agajajua nunash dekaskeapi tau asan. <sup>15</sup>Wishakam dita aidau, Apajuik aents pegkeg aidau, pegkegchau aidau jinawajunash inanjatnapita tuina dutiksanuk tajai. <sup>16</sup>Nuaduí Apajuí emtinish mina anentaimtajuish pegkeg, antsanuk aents aidaunmash pegkeg atasan kakanmamjai.

<sup>17</sup>“Wika wajumak mijadai tikich nugkanum wekagun, mina nukajui aents waituidau anenjauch suwakun, Apajuinash anentag susatasan taamjai. <sup>18</sup>Nunikan pegkeenu asan, jega Apajuí ememattainum pujumjai, tujash nuwig kuashat aentsuk atsuagmae, nuigtú pampandayamukesh atsume, nuniatumnum wajumak mina pataag judío Asianmaya aidau tajutuawag waitkagmae. <sup>19</sup>Nunú mina tujutuidau aminí kaunawag, mina pegkegchaujush ajutuash nuna tujamain ainawai. <sup>20</sup>Nuniachkush, ju kaunak ijuna jújú aidaukesh, mina pataag judío aina nuna apuji batsatbaunum mina ejetiagmataish, wi bakumamainnash dekagtuawagmasha nuna ujpamain ainawai. <sup>21</sup>Untsu nui ejetiagmatai senchi jiiikan chichaakun: ‘Yamai mina jutijajum juka, wika jakau aidaush nantajagtinai tau asantai, nu dekgatuatasajum jutijagme’, tusan imá nunak timajai.”

<sup>22</sup>Nuna tutai Apu Félix, nigka duwik nagkamas yamajam chicham etsegbau-nak shiig dekau asa, chicham dekagbau-nak nui tsujig idayak:

Comandante Lisias taamtai, nuaduí atum chicham etsegbaunak dekajuat-jime, —timayi.

<sup>23</sup>Nuna tusa idayak capitani:

—Pablok jukijum achikbautak apusatajum, dutikakjumesh machik agkan idaisatajum, niina kumpají aidaush kautuawag wainkatnume, nuninak yaigtinme, —timayi.

<sup>24</sup>Dukapech tsawan pujus Apu Félix, niina nuwe Drusila judío nuwa nujai taa:

—Pablo jiiikum juwi itatajum, —tima, Jisukristuwa duke dekaskeapi tumainai tusa etsegbaun antuku. <sup>25</sup>Tuja nuigtushkam Pablo, pegkeja duke takatan pachis, iik kuitamantan, tsawan dekas nagkanbaunum Apajú aentsun etegiatna jujai pachis etseju. Imattai Apu Félix ishamak:

—Yamaik wetá, wi tikich tsawantin, agkan ajutkui duwi taan untsuktajame, —timayi.

<sup>26</sup>Apu Felisak, Pablonak kuichkin sujusmatai akupkatjai tau asa, tuke untsusagké au, nijai chichastatus.

<sup>27</sup>Tuke duti dutikakua jimag mijanan inagkeakiuwai. Nunik Félix jiiintai, Porcio Festo yapajinauwai. Nuniak judío aidaujai shiig juwakta tau asa Pablonak achikbautak Felisak ukukiuwai.

#### Pablo apu Festui ejegamu

**25** <sup>1</sup>Nunik Festo apu we kumpatumchik tsawan pujus Cesareanmaya jiinki Jerusalén weuwai.

<sup>2</sup>Nunik jegaamtai sacerdote apuji aidau, judío apuji aidaushkam, dekas chichame antugtai aidaujai ijunag, Pablon pachisag apun ujaidau. <sup>3</sup>Nuna dutika ujainak: Wait aneamam ame Pablo juwi Jerusalén itatajum tusam, chicham awetí itaata, tusag segaidau. Nunak juki inibiagtai, jintá dakak maata tuidau asag, tiajui. <sup>4</sup>Tiagtai Festo ditan chichajak:

—Tujash Pablo Cesareanum achikam pujajama. Nuniau asamtai wi juwi wajumak tsawan pujusan wejitanan anentaimjai. <sup>5</sup>Nuaduí dekas atum aidautijum, yaita chichame antugtai aidaush, nunú aidautijum wi wegakui minijum, nunú aents dekas pegkeg-

chaun takasuitkuig awi etsegtuktajum, —tiu.

<sup>6</sup>Nuna tusa Festok Jerusalén ocho tsawan pujus Cesarea jegaa, kashinia duwi dekas apú ekeemtaijin ekeemas, Pablon itaatajum, tusa aentsun ishitkauwai. <sup>7</sup>Tusa ishiakam Pablon jukiag awayawagmatai, judío Jerusalegnumia kaunkajuk, Pablon jegaantag adijis ijunas, juka aents nuninai, tusag wainak eketkiag tikima pegkegchaun etsegtuidau, waintanakesh wainkachu ainayatak. <sup>8</sup>Imatjuinam Pablo ni ayamjumaktatus chichaak:

—Wika makichik pegkegchaunakesh takaschamjai. Chicham umiktajum timawa nuna pachisnukesh, jega Apajú ememattaiya nunakesh, Roma apujinakesh pegkegchauk chichagkachmajai, —timayi.

<sup>9</sup>Nuna tusa taig, Festo judío aidaujai shiig juwakta tau asa, Pablon iniak:

—¿Amesh Jerusalén wetasamesh wakegatsmek? Jerusalén jegawamin wisha awi taan chichaman dekajujame, —tau.

<sup>10</sup>Tama Pablo niina ayaak:

—Wika dekas Roma apuji inabaunum pujau asamtai, awi minak chichamnash dekagtumain ainawai. Amek minak shiig dekagtame, wika makichkish mina pataag judío aidauan pegkegchaunak takagsachmajai. <sup>11</sup>Wi dekas pegkegchau takasú asan maam amainaitkunuk, mantuawaipajum tumamaitujai, tujash mina pachitus wainak tujutuina aniaigkik, makichik aentskesh ditaig sujutmain ainatsui. Wika dekas Roma apujiya duke chichaman dekagtuati tusan segajame, —timayi apun.

<sup>12</sup>Nuna tutai, Festo niina ijunja chichataiji aidaujai ijunag chichasag, Pablon chichajak:

—Dekas Roma apujiya nu dekagtuati tame nuniau asam, Roma apuji pujamunum wetatme, —tiabi.

### Festo apu Agripajai chichasbau

<sup>13</sup>Wajumchik tsawan asa, apu Agripa, Berenicejai Cesarea jegawajui Feston kumpamawagtatus. <sup>14</sup>Nui jegawag kuashat tsawan batsataidau asag, Festo nunú apun Pablo pachis ujaak:

—Juwi makichik aents Pablo daagtin Félix achiká ukukbau pujawai. <sup>15</sup>Jerusalén pujai sacerdote apuji aidau, judío apuji aidaushkam niina pachis dekas mantamnati tita tusag segatiagmayi. <sup>16</sup>Tujutuinakui wi ayaakun: ‘Romanmaya apu aidautik aents chicham tsuwapjuamua nunú, tikich aents chichaman tuina nujai igkumtikamash, ayamjumamainjin taigkik mantamnati tusaik tuchau ainaji, tibaijai. <sup>17</sup>Nuna ti ai, ditashkam juwi kaunawagmatai, wishakam kashinia duwik chicham dekaata tusa ekeemtainum ekeemsan: ‘Nunú aents itagtuatajum’, ti ai <sup>18</sup>itawagmataish, chichaman tsanumjuidaushkam, ni pegkegchau takasbaujin tuinatusash tusa anentaimtusmayag nuninnakesh tichagmayi. <sup>19</sup>Imá ditá muunji Apajuin umijin aina nunak, tikich Jisus daagtin maamu, yamaik anean nantakui asa iwaaku pujawai, Pablo tibaujinak pachisag etsegtiagmayi. <sup>20</sup>Tuina-kui, wika nuna pachisnuk imatikan shiig dekachu asan, utugkajak tuutun, Pablon, amesh dekas Jerusalén jegatasamesh wakejatsmek, awi chichaman dekajuatjame tusan tibaijai. <sup>21</sup>Nuna tai, wika dekas Roma apuji Augusto chichamnak dekagtuati tajai, tujutkui, yamaikik untsu junismek pujustá, wi aents ejetamain akui awematjame tusan idaisamjai, —tau.

<sup>22</sup>Tusa tutai Agripa chichaak:

—Wishakam wakegajai ni chichaakui antugkatasan.

Timatai Festo ayaak:

—Kashin dekas ni chichaakuig antugkata, —tiuwai.

<sup>23</sup>Tusa idaisam kashinia duwi, Agripa, Berenicejai shiig iwagamjag, ashí

suntajan apuji aidau, nuigtú nunú yaaktanmaya dekas chichame antugtai aidaujai, chicham dekaatasa ijuntainum utsanawagmayi. Imanikagmatai Festo:

—Pablon utitajum, —tima itawajui.

<sup>24</sup>Dutikawagmatai Festo chichaak:

—Apu Agripah, ashí muun aidautijum jutiijai juwi ijunjaujum nu aidautigminash tajime, ju aentsun juwi itaag juna, ashí judío aidau chichaman aputusaje Jerusalén nagkamsag, nunisag juwi Cesareanum taamtaish: ‘Juka ayatak mantamnati’, tusag segatuinawai.

<sup>25</sup>Tujash wi diismak ju aentsua juka, ni pegkegchau takasbaunum mantamnainjig atsujuui. Dutikau asan niishkam Roma apujiya nu chichaman dekagtuati tujutu asamtai, niini untsu awematjame, timajai. <sup>26</sup>Tujash wi mina apug Roma puja nunash, junak dekas juní asamtai jutikainawai tusan papiinash agatmainchau dekapeau asan, juwi atumní itajai, tuja dekas apu Agripah, amina niish inias dekajuati, dutikamtai wajintig nuna wisha antugkan papiinash agatjatjai, tajai. <sup>27</sup>Aents jutika achikbau, nuna dutikau asamtai jutikainawai, tutsuk awemamuk shiig dekamaitsui, —tiabi.

### Pablo ni utugchatji pachisa apu Agripa ujakbau

**26** <sup>1</sup>Nuna timatai Apu Agripa Pablon chichajak:

—Yamai ame nunikbaugmek etsegtumakta, —timayi.

Tama Pabloskam: Jasá asajum antugtuktajum, taku uwejen takuí, wajaí chichaak: <sup>2</sup>“Shiig aneasan amesh antugtamin, mina apug Agripah chichaajai, mina pataag judío aidau mina pachittsag etsegtujuina nuna pachisan wishakam etsegumaktasan. <sup>3</sup>Amek judío aidauti dutikataiji aina duka ashí dekame. Nuniau asamin minash

shiig emamkesam antugtukta tusan segajame.

<sup>4</sup>“Ashí mina pataag judío aina juka minak shiig dekagtuinawai, wi mina nugkajuish, Jerusalegkash datsauch asanush wajuk pujukaitja nunak. <sup>5</sup>Nuigtushkam wi datsauch asanuk, fariseo asan dekas chicham umiktin tibaunash uwaetsuk imatixsanuk umin ayag nunak dekainawai, nunidau asag nuniyi tusag wakegainakug ujpamain ainawai. <sup>6</sup>Yamai mina juwi itajuawaja nunak, Apajuí iina muunji aajakajua nuna anagkuaawa nuna wishakam dakau asamtai, nuna dekagtuawagtatus itajuawaje. <sup>7</sup>Israela uchijí doce aajakajua nunú wegantuk imanisajag Apajuí anagkagtuamua nunú umintai wainkagtatus dakaidau asag, tuke kashish tsawajjai Apajuinak emematuinak umijuinawai. Nuna apu Agripah, amina ujaagam nuaduik mina pataag judío aidauk yamaish chichaman aputujuinawai. <sup>8</sup>¿Wagka atumesh, Apajuí jakau aidaunash inanjatna dusha dekaskeapi tatsugme?

**Pablo Jisusa nemajuidaun  
waitkajakbaun pachis  
etsegtumakbau**

<sup>9</sup>“Wishakam duwikik Jisus Nazaretnu-mian pachis chichaidaunak senchi kajejakun kuashat waitkabajai. <sup>10</sup>Jerusalegnumshakam imatixsanuk takabajai. sacerdote apuji inatjagmatai Jisusa nemajin aidaunak kuashat achijá ikaunmakan, achijatka chimpijattainum chimpibajai, mainakuish wisha inamkagtibajai. <sup>11</sup>Kuashtá aents aidaun suwibajjai, dita umijuinamujiin idaimitkastasan. Nunak wika ashí jega judiuti ijuntajai aidaunum wekaesan dutikajjai, imatikau asan, ditanak senchi kajejakun, tikich yaakat aidaunum batsatunash imatixsanuk wekaetusan egasan yajubajjai.

<sup>12</sup>“Nuna dutikatasan yaakat Damasco webajjai, sacerdote apuji aidau dutikata tusa awetuinakui. <sup>13</sup>Mina apujuh, nunikan wekaman, etsa tajajau ai, nayaimpinmaya tsauptin etsa etsanbaujin nagkaesau, minak ashí wijai minidaujai ijumag egketkabi. <sup>14</sup>Dutijamantai ashí nugká kakekabajai. Nuniamunum hebreo chichamai nayaimpinmaya chichagtak: ‘Saulo, Saulo ¿wagka minash waitkajame? Amek baka kajeká jagkin dajag beseakush dekaptsama numamtuk amek pegkegchau wegakum imaniame’, tujutmayi. <sup>15</sup>Tujutkui: ‘¿Apuh amesh yaitpa?’ tusan iniai: ‘Wika Jisusaitjai, ame ya waitkame nuuwaitjai. <sup>16</sup>Tujash nantakim, wajantá. Yamaik mina inakeg atí tusan wantintukjame, nuniau asam ame wainkaum nu etsegtugkata, ataktushkam jutixsanuk wantintuktajame, dutikamash dushakam dutiksamek etsegtugkata. <sup>17</sup>Wi judío aidau, tikich judiuchu aidaujai, amina kajegta-mainakuish ayamjuktatjame, dutikau asan judiuchu aidaunum awemajame, <sup>18</sup>ame awi weme mina chichameg etsegbaun antukag shiig dekaawag, pegkegchaun takainak suwenum wajukmaina numamtuk wajaidau asag, iwanchin inatai yujá nunak idayinak, dekas pegkeja nuna takainak, tsawai wekaemaina numamtuk wajainak Apajuin umigkatnume. Nuna nuninak mina dekaskeapi tujutuinak, ditá tudaujinash tsagkugnagtinme, nunikag Apajuí pegkemtikbau aidau jukiagtina nuna ditashkam jukiagtinme’, tujutmayi.

<sup>19</sup>“Aatus tujutiu asamtai, Apu Agripah, mina nayaimpinmaya tujutunak intinjutsuk betek umigkabajai. <sup>20</sup>Dutikau asan dekatkauk Damascunmaya aidaun nunú chichamnak ujakbajjai. Nui nagkaematkin Jerusalegnumianash, nuigtú



ashí nugka Judeanmayanash ujakan, nuigtushkam judiuchu aidaunash: ‘Tudau takat idaikujum, Apajuí nemagkatajum, nuniakjum dekas Apajuí nemajuidau takamaina nunú takaakjum iwainmamkatajum’, tusan. <sup>21</sup>Juna wi tau asamtai, jega Apajuí ememattain pujai, mina pataag judío aidau achigkag mantuata tiagmae. <sup>22</sup>Tujash Apajuí yaintsamtai ichichmamsan imanishuk yamaish wekaesan, Apajuin pachisan, ashí aents imanchauch aidaunash, apu aidaujai ijumjan ujasnuké ajai. Wika uwaesanuk chichatsjai, Apajuin etsegtin aidau, Moiseschakam nuniktinai tusag juna againak: <sup>23</sup>Kristuk juwi taa waitkasa maam atinai, nunikash aents jakaush nantashainum ni nagkamchak nantaktinai, nunik chicham dekas tsaaptin uwentikagtina nuna ashí judío aidaunash, judiuchu aidaujai ujaktinai’”, tiuwai tuuyi.

<sup>24</sup>Pablo ni ayamjumak nuna tutai, Festo senchi chichaká:

—iPabloh, imaanjachumek!  
Imanikam papí au aukawam imaanjaume, —timayi.

<sup>25</sup>Tama Pablo ayaak:

—Apu Festoh, dekas chichame antugtayah, imaanjachjai. Wi chichaag duka kuashat anentaimtumainai, tuja dekasket-nash dekaske. <sup>26</sup>Anuí apu Agripa eketa dushakam junak shiig dekawai, nuniau asamtai ni antaish shiig kajjintan wishakam chichaajai, niish junak ashí dekawapita tusan, juka uuká takatsuk ashí iwainaja takasbau asamtai. <sup>27</sup>¿Amesh apu Agripah, Apajuin etsegtin tiajua dusha dekaskeap tiuwaita tamek? Wika ame dekaskeapi tame nunak dekagjame.

<sup>28</sup>Tama Agripa ayaak:

—Machikiuch nu pachisam tame duwikik, minash Jisusan nemagkati tusam wakejutam, —timayi.

<sup>29</sup>Tutai Pablo chichajak:

—Wi tikima kuashat etsegsuk, machik etseptaish Apajuik, aminak

mina nemagtukti tujamui. Tujash imá aminakek tujamtsui, ashí aents juwi wi chichaamun antuina jujai nemagtukti tau asamtai, wi wajukeyag junimain ainagme, tujash mina jiju ikagmawwai jigkatjagmatai wajag junitsuk.

<sup>30</sup>Juna Pablo timatai, nuaduí Apu Agripa, tikich apu Festo, Berenice, ashí nui aents ijunujai agaa jiinkigmayi, kanakiag nuna pachisag chichasagtatus.

<sup>31</sup>Nunikag nui chichainak:

—Ju aentsua juka ni pegkegchau takasbaunum mantamnamainjig atsujui, junin aigkik achikbautkek egkeemaittui, —tusa,

<sup>32</sup>Agripa Feston chichajak:

—Ju aentsua juka akupmainitji, niish dekas Roma apujiya nu chichamnak dekagtuati tichawaitkuig, —timayi.

#### Pablo Roma awemamu

**27** <sup>1</sup>Chichai chichainakua dekas Italianum awemami tusag, Pablon ashí tikich achigbau aidaujai yajuak makichik capitán Julio daagtin apu Augusto suntajin diina nuna: Ame jukim ejegata, tima yajupakmatai, <sup>2</sup>Adramitionum anumtainum, lancha Asianum wetatus uminas aunum chimpimjá ajin, Aristarco nugka Macedonianum yaakat Tesalónica awa nuwiyashkam nui egkemjau asamtai, ditajai ijunja ashí ashinkawa, <sup>3</sup>kashinia duwi Sidognum anumkabiaji. Nunika ajin Julio, Pablon wait anentau asa, ni kumpají aidaush kautua wainainak kuitamkatnume, tiabi. <sup>4</sup>Sidognumiati jiinkiaja wegajin, dase igku umpumpau asamtai, ajuntai Chiprek ukuaku, ashí ashinkawa, <sup>5</sup>nugka Cilicia, Panfilia aina nuna yantamen ijusa wega wegakua, nugka Licianmaya yaakat Mira tutaiya nui jegabiaji.

<sup>6</sup>Nui jegaa ajin capitán lancha Alejandro drianmaya Italianum wegaun jegajua,

iinashkam nui egkepagnatai nagkaemaki webaiji. <sup>7</sup>Kuashat tsawantai diipasa we batsabaiji, nunisa ashintsá senchi takai takainakua Gnidonum jegaa, nuwiyati nagkaemaki wesá dase yajá umpumpau asamtai, Salmogkak tutupnik nagkaiki, ajuntai Creta tentea nagkaiki, <sup>8</sup>wai waitiakua tugkitak anuasa ashí ashinkawa yaakat Lasea tikijunum, Anumtai Pegkeg tutainum jegawabaiji.

<sup>9</sup>Kuashat sawan megkaekabaiji, yumi tepeau asa nayantsanum wetak ishamain asamtai, Pablo aents nui chimpijun chichajak:

<sup>10</sup>—Muun aidauh, ju ii wegag duka dekas tikima ishamain atin dekaepejai, lanchashkam wájí aidaujai utsagtatji, tuja jutii aidautishkam jinakuik jinumainaitji, —timayi.

<sup>11</sup>Nunú tamash suntajan capitanjiya duka, lanchagtina nuna, lanchá anunna nujai antujak, Pablo chichamenak antugkachajui. <sup>12</sup>Nunú anumtaig yumi tepeamtaig pegkegchau weu asamtai, nui ashinuk dekas juka ukuaku Fenice jegasá dekapsagmi, anumtai Cretanum etsa akaetaiya nuní au asamtai, dasesh imanik atsawai, awi yumi tepeamtaish inagkeakiagmi, tiaju.

#### Nayants wegamunum senchi dasenkamu

<sup>13</sup>Nuna tusag surnumia dase diipas dasentai: Dekas yajau juniatsui wegagmi, tusag nuwiyati pempegkiagmatai, ajuntai Creta tugkitken tikiju wajasá wegamunum, <sup>14</sup>etsá minitaijiya atú ayaumas senchi dasentuk midau, <sup>15</sup>senchi umpumpak yajá pempempaki etamkui, dase depetki waketmainchau dekapeaku, junisaikish wemí, tusa idaisabaiji. <sup>16</sup>Dutika ajin dase jujamkimitai wega wegakua, ajuntai yaijuch Claudia tutai ukujin dase imanik senchi

umpuashbaunum nagkaemaku, bote yaijuch nenea minamu wai waitkainakua lanchanum patai <sup>17</sup>idaisabaiji, dutika ajin lancha muunta nuna shiig jigkajagmayi wewe ema idaisatatus dase ebesejai tuidau asag. Nuna dutikawag Sirtenum pajagkim awa nui patamig tuidau asag, jaanch ejaamunash kuwajag idaisagmayi, ayatak daseg umpug emati tusa. <sup>18</sup>Kashinia duwishkam daseg senchi dasentu asamtai, lanchanum wájí chimpiamunak jiig utsaidiagmayi. <sup>19</sup>Kompatuma juwi untu ashí jutii aidautik lanchanum wájí chimpiamuk juki utsabaiji nayantsanum. <sup>20</sup>Kuashat tsawantai etsag, yaya aidaujai waintsuk yujau asaja, daseshkam imatijamsag ukapittak awajamu asamtai:

—iJegashtatjiapi, jinattajiapi!  
—tiagbaiji.

<sup>21</sup>Yujumak ijagmaka kuashat tsawantai yujanu asamtai, Pablo ejapeen wajaná chichaak:

—Muun aidauh, dekas wi timajim nunú antugtumainus ankamujumtai, nunikuitkugminig Cretanmag dakasuitkuik, imanika waitiaku wájí aidauš utsá yujamaitsuji. <sup>22</sup>Tujash jakashtajiash tusagmek ishankaigpajum. Lancha beseakuish makichikitgimesh jakashtatjume. <sup>23</sup>Yamai kashia juwi, wi Apajuí umijag nunú, ni aentsji nayaimpinmaya awemamu wantintujuk, <sup>24</sup>chichagtak: ‘Pablo ishankaipa, amek apu Roma puja nunu’ jegatasam wegame. Nuniau asamin, ashí ju lanchanum chimpija junak Apajuí kuitamkattawai, jinawainum tusa.’ <sup>25</sup>Nuaduí muun aidauh shiig aneastajum, wika dekas Apajuí tibaun nayaimpinmaya aents tujutma duka imanisagkeap uminkattawa, tajai. <sup>26</sup>Tujash makichik ajuntainum jegainaku patamtatji, —tuuyi.

<sup>27</sup>Nunika yujasá jimag tumig inagkeakbau ai, makichik kashi nayants Adriático nanamsabiaji, dase umpumpak mai ikatia mai ikatia awá awajtamkuí wegamanum, lanchanum takau aidau aehaet ai, nugkan tikiju adijun dekapenak, <sup>28</sup>kunajin dekaapa diikmag treinta y seis metros kunají atatman wainkajabi, dutikawag nuní dukapech ekemsag dekapakmag veintisiete metros atatman wainkag, <sup>29</sup>kaya tukuig tusag ishainak, lancha ukujin cuatro ancla tutain jiijuí anagbaun nayants utsawajabi, lancha nanaamsati tusag. Dutikawag:

—iItusag waamak tsawaja!, —tuyanume. <sup>30</sup>Nuniai lanchanum takau aidau, umkag wegagtatus bote yayjuch lanchanum pataimun ajuinak, lancha nujinchin ancla awa nunas ajuinaitai tumain wajakiag ajugkajabi.

<sup>31</sup>Nudiagtai Pablo capitanin suntag aidaujai chichajak:

—Ju aents aidau lanchanmak juwainashkuig atumek jiiinjashtatjume, —timayi.

<sup>32</sup>Tutai suntag aidau bote yaigchia nuna anagken tsupijuk nayants ajejajui.

<sup>33</sup>Dutikawagmatai tsawamanum Pablo ashí aents aidau chichajak:

—Jimag tumig yujainaji yujumak yutsuk, wajukatjik tusa dakainaku, <sup>34</sup>nuniau asajumin tajime, pipichikesh yuwatajum. Duka dekas atsumnawai nu ichichmamsa iwaaku jegatasaja, makichikish jakashtatjume, imagnisjumek jegattajume.

<sup>35</sup>Nuna tusa idayak, Pablo pagkan juki, ashí aentsush wainainamunum wajan, Apajuin see ti puuká yuwau.

<sup>36</sup>Nunitai tikich aidashkam wakeesag anentaimsag yuwawaju. <sup>37</sup>Ashí ijumjamak nui lanchanum chimpijutik doscientos setenta y seis aents aajabiaji. <sup>38</sup>Dita yapajuinamunak shiig yuwawag

nuaduí trigonak nayantsanum utsagkajabi, lancha wampumniti tusag.

### Lancha tsainkamu

<sup>39</sup>Tsawagmatai lanchanum takau aidau nugkanak wainkagmayi, tujash nunú nugkapita tusag dekachagmayi. Dutikainayatak nayants egkeentaunum kaamatak atatman wainkag: Awi dekas anuumkashpash, tusa tiagmayi. <sup>40</sup>Tusag ancla anagkenak tsupijug nayantsanmag idayinak, kanait jigkamu aidau nak atiawaju. Dutikawag jaanch lancha nujiin jiiitain nenantagmatai, kaamatak adijkatasa weyaji. <sup>41</sup>Nunikmá pajagkim kaamatak wajas aunum chichijam tukuniagbaunum, lanchak patamatai, lancha nujinchig shiig inital upukuma umushmainchau wajas tepesabi. Nuniai lancha ukujinak ichipig inibi nayants senchi tsukatu asa.

<sup>42</sup>Nunikmatai suntag aidau aents achigbau aidau nak ayatak kajegta tuyanume, yukuak jiiinak pisajainum tusa. <sup>43</sup>Tiagtai suntajan capitanji Pablou uwentijatatus wakegau asa:

—Nu dutiktak dutikawaigpajum, dekas ya imá senchi yukumnaita nunú niiyá eemak yukuak kukag jiiinkitume.

<sup>44</sup>Nunikagmatai nuaduí tikich aidau taapna, lancha chipajá juwikish patabiag katigtinme, —tiabi. Nuna aatus tiu asamtai ashí jinutsuk jiiinjajabi.

### Pablo ajuntai Malтанum pujusbau

**28** <sup>1</sup>Nunika jinutsuk jiiinjaja ijuntsaja, juka ajuntai Maltayapi tusa dekaawabiaji. <sup>2</sup>Nuwiya aents aidau shiijuch kuitamjamainak, senchi tsetsek, yumish yutu wajau asamtai, jiiin ijumjag nuna ekeemainak: Atumesh tantajum anamatajum, tusa ipapawajabi. <sup>3</sup>Nuniamunum Pablo numi pegkeg buku kukajú atatman juki apeeyi.

Dutikamunum nuwiya dapi jii sukuam jiiinak, Pablon uwegnum esai nemajua-wabi. <sup>4</sup>Dutiktatman nui tuke batsamin aidau wainkag pempentunisag chichainak: “Ju aentsua juka dekag magkagtin-tsukaitai, nunin asamtais nayantsanum jakegchamta, juwi dapi esai maatatus aikataih”, tuyanume.

<sup>5</sup>Tujash Pablok dapin pegajá jiiinum jiyawabi, nunikash machikish wajuktsayi. <sup>6</sup>Nunitai uwejenish iyagchatpash, nuniachkush wajupa asag jaka iyaajat tusag dakayanume. Nunik makichkish wajukchatai, dita nunikchatpash tusa anentaimitamujinak idayinak: “Auk apajuitskaitai”, tiajabi.

<sup>7</sup>Nunú ii anumka batsatbaunum tikiju, aents ajuntainum batsatun apuji Publio daagtina nuna nugke aayi, nunú niina jeen jujamki kampatum tsawantai shiig kuitamjamkajabi. <sup>8</sup>Nui Publio apají numpa shiip achikam tsuweak pegaknum tepeeyi. Nunittaman Pablo wejí Apajuin aujus, uwejen antig etsagajabi. <sup>9</sup>Nuna dutikamta tikich nunú ajuntainum batsamin aidaushkam kaunkamta, ditanashkam etsagakabi. <sup>10</sup>Nuna dutikamta aents aidauk shiig anenjamsajabi. Dutijamaidau asag nuwiya juwaki tikichnum wegajinchakam ashí ii jintá wesá atsumainnak imatiksag sujamsagmatai, nu júkí lanchanum chimpimjá shiakabijai.

#### Pablo Roma jegaamu

<sup>11</sup>Nunika kampatum nantu ajuntainum pujusá inagkeakiaja, Alejandrianmaya lancha niishkam nui pujus tsetsek nagkaemakmatai wegakuí egkemjabijai, nunú lancha nujinchin ditá apajimtaiji

Cástor<sup>g</sup> nuigtú Pólux dakumjuka anujtukbau aayi. <sup>12</sup>Nunika ashí ashinkawa Siracusa anumtainum anumkabi, nunika nui kampatum tsawan pujusabi. <sup>13</sup>Nuwiya juwaki anuasa ashí ashinkawa Regio jegawabi. Nunika kashinia duwi wegamunum dase surnumia senchi umpumpakuí, jimagchik tsawantaik Puteolinum jegawabi. <sup>14</sup>Nui jegamunum wajumak Jisua nemajuidau batsatu:

—Wait aneasam juwi jutijai makichik tumig pujusam wetá, —tusa ipapainakuí: —Ayú, —tusaja nui batsamsá, nu tsawan tibau jegakuí nuwiya Romanum jegatasa jiiinkabi.

<sup>15</sup>Romanmaya Jisua nemajuidau juti minamunak chichamnak antukaju asag, iina igkumpaktatus Foro<sup>h</sup> de Apio tutainum, nuigtú Kampatum Jega tutainum kaunawajabi. Pablo ditan wainak Apajuin see ti, niishkam shiig anentaimsabi. <sup>16</sup>Romanum jegaa ajin, tikich aents achigbau aidaunak capitán yajuak, achijatnun dekag apujin ejeti susabi. Dutikak Pablonak niinash akanak makichik suntag kuitamkati tusa apusajabi.

#### Pablo Romanum pujusbau

<sup>17</sup>Kampatum kanag tsawaag, Pablo Romanum batsamin judío aidaun apujin untsuká ijumag ditajai chichaak:

—Yatsug aidauh, wika mina pataag judío aidaunakesh pegkegchaunak takagsachu aig, iina muunji umitaiji aina nunakesh pegkegchau chichagtsaig, achigkag Jerusalén dekag Romanmaya aents aidaunum sujutkagmae. <sup>18</sup>Ditak minak kuasat inintsag wi bakumaku

g 28.11 Cástor, Pólux tawa duka, Alejandrianmaya apajimtaiji daaji, jimagmamumu taku tawai.

h 28.15 “Foro” tawa nunak wají ijumja sujutai taku tawai, tuja “Apio” tawa nuuwai nunú wají ijumtaiya nuna nugká daaji, nuanuí kampatum jega pujujakuí kajitai, nuanuí Pablon igkugkajui yatsut Apajuí nemajin aidau. Duka jimajá kanaja Roma jegamainnum aajakú.

mantamnamainnak dekgatuinachak akupjuktatus wakejutiagmayi. <sup>19</sup>Tujash mina pataag judfo apuji aidau dakituinakui: Minak dekas Roma apujiya nu dekgatuati tibajai, wi mina nugkajuiyanak pegkegchau etsegtumainush atsuftaig. <sup>20</sup>Nunú ajutu asamtai atumin untsukjime, atumjaishkam wainiakan nuna pachisan chichastasan, jutii Israel aents aidautik Kristu dakaku pujuinag nuaduí, wishakam jutika jiijuí jigkajam wajajai, —timayi.

<sup>21</sup>Tutai dita chichajuinak:

—Jutiik makichik Judeanmaya papikesh amina pachipas agagbauk jukishmaji, tuja awiya Jisusa nemajuina nunú tainakushkam amina pegkegchaugmin pachitjamsag ujakchagmae. <sup>22</sup>Dekas ame wajuk anentaime nunú chichaktá, ashí tikich nugkanmaya aidaush, ju ame yamajam chicham etsejam juna dakituinak, kuashat augmatus chichaidau antuidau asaja taji, —tuidau.

<sup>23</sup>Nuna tiag: Nu tsawantin dekas aents ijunjagtinme, tusag tsawantan dekapa-waju. Nu tibau tsawan jegamtai, Pablo pujamunum aentsuk tuwakaju, imanik-matai Pabloskam kashik nagkamas: Apajuik nuní inajatui, tusa chichaa chichakua tuke etsanak akapabi. Nuna imatjak Moisés chicham umiktajum tibau, tikich Apajuin etsegtin aidau tibaujai pachis ujabi, ditashkam Kristu Jisus taatnai timawa nunashkam dekawag dekaskeapi titinme tusa.

<sup>24</sup>Wajumak aents Pablo nuna etsegtai dekaskeapi tuinai, tikich dekaskeapi tuinachush aidau. <sup>25</sup>Nunidau asag, dekaskeapi tuinai, tikich dekaskeapi tuinatsu nujai shiig juwamainchau

dekapenak jiinag shibiagmayi, nunitai Pablo chichaak:

—Wakaní Pegkeji chichamtikam Apajuí etsegtin Isaías aajakua nu atumi muunjumin chichajak:

<sup>26</sup>‘Ame weme au aents aidau njaktá:

Chicham etsegbaun kuashat antiagtinai, tujash dekachagtinai,

kuashat pegkeg takaamunashkam wainiagtinai, nuninakjash dekaskeapi tichagtinai.

<sup>27</sup>Juka aentsuk anentainish

dekaskeapi tichamin utugchatan anentaimaidau asag, antuinakushkam wainak antuinawai.

Jiinchakam epetkamua numamtin asag, wainmachu wajukmaina nuninawai; tujash ditá jiin wainak,

ditá kuwishin antukag, anentainish dekawag,

tudau takatan idayinak mina nemagtuinakuig tsagkugmainaitjai, Apajuí tawai’, tiuwai.

<sup>28</sup>Yamai atumesh dekaatajum, yamai nagkamsa Apajuí uwemtikagta nunú pachisa etsegbaunak, ashí aents judiuchu aina nu antukagtatui.

<sup>29</sup>Nuna Pablo timatai, judío aidauk ditak pempeentunikiag pampá pampanyayinakua shiyakagmayi.

<sup>30</sup>Nunikagmatai Pablok nuwig jimag mijan pujusuí. Nuniak niina wainkatus miagiagtaishkam ni jega ikamka pujamunum awaimayi. <sup>31</sup>Shiig agkan machikish waitkascham pujus Apajuí inabaujinak etsejak, Apu Jisukristu pachisashkam aents aidaunak jintinmayi.

# PABLO PAPÍ AGAJA

## ROMANMAYA AIDAU AWETIMU

---

### Pablo Romanmaya aidau kumpabau

**1** <sup>1</sup>Wika Pablo, Jisukristu inakegait-jai. Apajuí minak yamajam chichama nu etsegtugkata tusa etegka awetiuwai.

<sup>2</sup>Jujú yamajam chichama junak, Apajuí yaunchuk anagkagtuamua nuna niina etsegtin aajakajua nunú etsegkajui, dutikak agaju ainawai. <sup>3</sup>Duka niina uchijí Jisukristu iina Apuji, apu David aajakua nunú wegantunum Aentsmaga Akiinauwa nu pachisa agagbauwai; <sup>4</sup>nigka Aentsmaga Akiinauwaitak Apajuí pegkegma imanuk aajakuí, iman asa maamu anean nantaak Apajuí Uchijí senchigtina nunak iwainmankauwai.

<sup>5</sup>Nuniku asamtai, Apajuí jutiinak wait anenjamag Jisusan pachis etsegtukti tusa etegtamjauwai, ashí nugkanmaya aents aina nunú niini kajinas anentaimaidau asag, imá niinak umijuinak shiig anemtiksatnume tau asa.

<sup>6</sup>Atumnashkam ashí nugkanmaya aents aidau, dekaskeapi tiaja nuninuk asagmin, atumnak Apajuí Jisukristunu etamkaje. <sup>7</sup>Ashí atum aidautigmin Apajuí anempau asa, midau atinme tusa etegkamu aidautijum Roma batsatutigmin agatjime: Apajuí iina Apajiya nunú, iina Apuji Jisukristujai wait anenjamag, shiig agkan anentaimsa pujutnum yaimpaktinme.

### Pablo Romanmaya aidau ijagsatasa wakekamu

<sup>8</sup>Dekatkauk mina Apajuijun see tajai ashí atumin pachisan, Jisukristu jakamunum Apajuijai agkan chichamain ajutu asamtai, nuigtú atum Jisukristui kajintsá anentaimjum nunash tikich nugkanmayash dekaidau asagmatai. <sup>9</sup>Apajuí shiig dekgatawai wi atumin kajimattsuk Apajuí aukun tuke aneas nuké ajim nunak. Wika niinak wakejusan takagjai niina Uchijin pachisan etsegtakun. <sup>10</sup>Nuigtushkam Apajuí dekgatawai wi atumin minitasan shiig senchi wakegau asan tuke segas nuké aja nuna, niish wakegakuig tsawantan mamiktujuamtai atumin tajuan wainkatasan. <sup>11</sup>Senchi wakegajai atumin tajuan, atum Jisukristu nemagtanum utugchat dekapeamu akuish, Wakaní Pegkeji dekamtijuamua nuna shiig jintintuatasana, atumesh shiig ichichmamjajum pujustajum tusan. <sup>12</sup>Nuniakjumin, wi Jisukristui kajintsá anentaimag nuninuk atumesh asagmin, pentunisaik anentai ichichtunijagmi tabaunum.

<sup>13</sup>Yatsug aidauh, ubag aidauh, atumshakam wi anuí atumin tajuan wainkatasan kuashtá wakegamua nunú shiig dekaatajum, tujash yamaikish tuke tujajai nuniau asan minimain dekapeatsjai. Wika tikich nugkanmaya

judiuchu aidau Kristu nemagkagmaya nunisjumek atum ainajum anuiyatig-mesh Kristu nemagtanum atumin yaimpamainnash jintintuatasan wakegajai. <sup>14</sup>Wika ashí aents aidau papí unuimajush, unuimagchaush, yachash, yachachu aidaush jintintuata tusa awemamu asan, diwimkagtau anentaimaina imaniajai jintinkagtuata tusan. <sup>15</sup>Imaniau asan atum Roma batsamin aidautigminash yamajam chichama nuna ujektajime tusan wakeesan pujajai.

**Chicham yamagma  
nu pachisa etsegbau**

<sup>16</sup>Wika chicham yamagma nu Kristu pachisa etsegbaunmag datsamatsjai, wagki ashí aents nuna antukag dekaskeapi tuidaunak Apajuí senchig-tina ibau asa uwentikau asamtai, dekatkawk mina pataag judío aidauná uwentikak, duwi judiuchu aidaunashkam uwentikatin asamtai. <sup>17</sup>Ju chicham yamagma ju dekamtijamui, Apajuish wajina dutikawa jutiin pegkeja iman diigmastatkush, nunak imá niinig kajintsá anentaibaunum dutikawai. Aatus agagbaunmash: “Apajuí aentsun pegkejaitme tibauwa nunú imá niinig kajinas anentaimaidau asag, tuke pujustinai”, tawai.

**Apajuí aents dakituinamu asa dita  
wakegamun takastinme  
tusa idaisamu**

<sup>18</sup>Apajuí nayaimpinum pujusag dekamtijamji, ashí aents niina ajantus diitsuk pegkegchaun takaidaunak kajejuk suwimkan suuwa nuna, wagki dita pegkegchau takatinig tikich aidaush dekaskea nuna dekamainchau dekapedau asagmatai. <sup>19</sup>Ditak dekainawai ashí aentstí Apajuinu dekamainaitag nunak, wagki ashí wainainag duka

Apajuí najankamua nuna dekaidau asag. <sup>20</sup>Apajuí wajukuita duka wainmaitsuji, tujash ni takasbauji wainainag nu anentaimtusa diyaku, nuigtú ni nugka yama nagkamchaku najanamu ashí wainainag jujú dekamtijamui, ni dekas Apajuiya nuna, nuigtú ni senchijí tuke atina nunashkam. Nuaduí aents pegkegchau aidauk, wika Apajuinak dekatsamjai tusa ayamjumamainjig atsawai.

<sup>21</sup>Apajuí wajukuita nuna shiig dekainayatak, niinak eme aentus see tutsuk, wainak anentaimaidau asag, ayatak nuninnak ane anentaimainakua pegkeg aina nunak dekamainchau wajasajui. <sup>22</sup>Ditak yacha ainaji tumamainawai, tujash dekachu waigkaje. <sup>23</sup>Nunin asag dekas Apajuí ajumaish jakashtina nu emematmainun idayinak, aents jinin aina nuna, chigki, kuntin, dapi aidau dakumkamun emematuinak Apajuinak idaisajui.

<sup>24</sup>Nuniagtai Apajuishkam aents aidaunak, ditá iyashí pegkegchau wakejuinamun takastinme tusa idaisajui; dutikawajam tikima datsanmainun pempé pempeentunisag takanidau. <sup>25</sup>Nuninak Apajuinu dekaskea nuna idayinak waita nuna antujuinawai. Nunidau asag Apajuí najankamu aina nuna emematuinak umijujakajui, dekas Apajuí najankagtina nuna ememattsuk. Imá nigki tuke ememattai atí. Aatus atí.

<sup>26</sup>Nuniagtai Apajuishkam idaisajui, tikima datsanmainun takastinme tusa. Dutikamu asag, Apajuí nuwanak aishmagjai pujustinme tibauwa nuna idayinak, mai nuwak pempeentunikiag takanijakajui. <sup>27</sup>Nunisag aishmag aidaushkam mai aishmagkuk pempeentunikiag takanistasag imá senchi wakegainak, nuwajai pujutan idayinak datsantainchau waigkag, mai aishmagkuk pempeentunikiag takanijakajui.

Nunidau asag dita pegkegchau takasbaujin suwimkanak egatmamkag ditak waituinawai.

<sup>28</sup>Apajuik aents aidau dakituinamu asa, pegkegchau anentaimta nui idaisauwai. Dutikam pegkegchau dutikmainchau aina nunak takastinme tusa.

<sup>29</sup>Dutikamu asag nunú aidauk ayatak pegkegchaunak takainak, nuigtush pegkegchau, ashí wajiin waké wakegaku wegau, yajau, tikichdaun pegkejan wakegag kajejin, magkagtin, jiyanita wekaetin, tsanumin, chichama wekaetin, <sup>30</sup>augmatkagtin, Apajuí shiwaji, datsantan chichaaku, eme anentaimtubau, ni wagaaku chichagamin, pegkegchaush wajuk takamainaita nuna jintiag anentaimin, apajinash dukujinash chichaman umigchau, <sup>31</sup>anentaimtajish pegkegchau, ni tibaujinash umichu, makichik aentsnakesh shiig anentus diichu, tsagkugkagtu-chu, wait anenkagtuchu ainawai.

<sup>32</sup>Ditak Apajuí aents nuninun takauk suwimkan juinak jakatin atinme tiuwa nunak shiig dekainawai. Nunin aigkish ditak pegkegchauwa nunak takainak, tikich pegkegchaun takaagtaish shiig anentus diinawai.

#### Apajuik dekas aents takasbaujiya dutiksag susatnai

**2**<sup>1</sup>Nuaduí ameshkam, yaki ainme nunin akugmesh, jutiik pegkeg ainaji, tikich aidau pegkegchaun takainawai tusa ayamjumainuk atsugtamjume. Tikich pegkegchaun takainawai takugmesh atumshakam bakumajume, dita takaina nujai betekak takau asajum. <sup>2</sup>Dekaji aents nuninun takaidaunak, Apajuí suwimkan suwakug dekas dita pegkegchau takaamujiya dutiksag suuwa duka. <sup>3</sup>Nunin asamtai amesh tikich pegkegchau takainakui augmatkum, dita takaina nunismek pegkegchau takau asam, Apajuik minak suwimkanak sujuschat-

napi tusamek anentaimtsume, duka makichkish nunikchatnai. <sup>4</sup>Nuigtushkam Apajuí shiig kuashat wait anenjamu asa, suwimkan sujamsuk emamkes dakagma dushakam wainkaya nuninuk anentaimtu-maitsugme. Atumek dekamainaitjume Apajuik imá pujutinak yapajati tabaunmag wait anenjamaina duka. <sup>5</sup>Tujash atumek, dekas nuninapi tusajum pujutjum yapajiachu asajum suwimkak ayatak ikauntugmagme, nuaduí tsawan jegatai Apajuí kajeká, aents pegkegchau takasbaujiya dutiksag suwimkan suwak, atumnashkam suwimkan amastinaitjume. <sup>6</sup>Apajuik, makí makichik aents wajuk takasaje, nuna diijus dutiksag susatnai. <sup>7</sup>Pujut nagkanchaunak susatnai ya aidauwa Apajuin egakaje, ni pegkeja imanuk eti pegkeg takasume tusa pujut tuke atina nuna sujústí tabaunum, pegkegnak takainak kakanmamsaju aina nuna. <sup>8</sup>Tujash aents imá nigki anenmamin aina nunak Apajuí kajejuk suwimkan susatnai, wagki pegkeg takatan dakituinak pegkegchauwa nunak wakejus taká batsatu asagmatai. <sup>9</sup>Ashí aents pegkegchau takatnak batsamtuidauk, waituinak senchi anentaimainak waittsagtin ainawai. Dekatkauk mina pataag judío aidaunmaya pegkegchaun takaidauwá nunikagmatai, duwi judiuchu aidaushkam nunikagtinai. <sup>10</sup>Untsu ashí aents pegkejan takasú aidaunak, Apajuí ni pegkeja imanuk emaktinai. Dutika atumek pegkeg takasugme tusa, Apajuí shiig agkan batsamsatnume tusa idaisatnai. Dekatkauk mina pataag judío aidaunmaya pegkejan takasú aidauwá nunikagmatai, tikich judiuchu aidaushkam nunikagtinai. <sup>11</sup>Apajuik aentsnak juka jushá aentsui, tuja juka tikich aentsui tusash tuchauwai.

#### Chicham Umiktinun Moisés agajua nu

<sup>12</sup>Ashí aents chicham umiktinun Moisés agajua nunú atsugsamu tudau takasú aidauk, Apajuiyaij tuke kanaak



kanakú ainawai. Nunú aidaunak Apajuik chicham umiktina nuna diisá pegkeg takasume, pegkegchau takasume tichatnai. Untsu chicham umiktina nunú ajamaitak tudau takasú aidaunak, Apajuí chicham umiktina nuna diisá wají suwimkana jukittawa nunak titinai, <sup>13</sup>wagki Apajuí emtinig chicham umiktina nunú dekamuikik pegkeg wantinainatsui. Ayatak chichaman umiina nunak Apajuik pegkeg ainagme tawai. <sup>14</sup>Judiuchu aina nuwiya chicham umiktina dusha atsugmaitak, tuke nunin asag dita dutikaina duwi umiinawai chicham umiktá tibauwa nuwiyán, nuninak iwainmamainawai dutikmainchaunash, tuja dutikmainnash dekaina nuna. <sup>15</sup>Nunidau asag iwainmamainawai chicham umiktina duka ditá anentaimtajin ajuina nuna. Juka pegkegchauwapi, juwap dekas pegkejaita tusag shiig dekaina dushakam iwainawai, chicham umiktin dita anentaimtajin ajuina nuna, dita aaja anentaibaujiya duke ayamjuktinai nuniachkush, bakutnai, <sup>16</sup>Apajuí ashí aentsun amek pegkegchau takasume, nuniachkush pegkeg takasume titina duwi. Nu tsawanta duwi Apajuí ni Uchijí Jisukristun, aents aidau ashí takasbauji anentaimsamujish, nuigtú tikichish dekachbaunum anentaimjamujishkam diisgam dita takasbaujiya dutiksamek susata titinai, wi yamajam chicham Kristu Jisusdaun pachisan ujaujim dutiksag.

**Judío aents aidau  
chicham umiktin umiachbau**

<sup>17</sup>Atum ainajum anuiya, wajumak iinia pachitkajum nunú aidautijum, judiuwaitji tusajum ememautigmesh ainagme, nuigtush chicham umiktin ajutjamaina

duwi Apajuijaish shiig ijutkauwaitji tusajum ememagme. <sup>18</sup>Atumek dekagme Apajuí wakegamua dushakam. Tuja chicham umiktina nu dekamtijamjume, dekas pegkeg aina duke etegja takatnashkam. <sup>19</sup>Atum anentaimsagmek, aents wainmachu uwegnum egkesá emamaina numamtuk awajmagtin ainaji, tajume. Nuigtushkam suwenum yujaidau jii ekeemattayama numamtuk awagbau ainaji, tumamjume. Atum anentaimsagmek aents Apajuí dekachu aidau, Apajuin dekaatnume tusa yain ainaji, tajume. <sup>20</sup>Atum anentaimsagmek aents Apajuí chichamen dekainachush jintintin ainaji, dutikaku imaanis anentaimainchaush unuidau ainaji, chicham umiktina nu ajutjamu asamtai wajuk shiijash pujumainaita, nuigtú dekaska dushakam ashí dekainaji, tajume. <sup>21</sup>Atum aaja tikich jintintin ainayatkugmesh ¿wagka atumek jintinmamtugme? Tikich chichagkujum: Kasamchatia, tayatkugmesh ¿wagka kasamjume? <sup>22</sup>Tsanijinchatia, tayatkugmesh ¿wagka tsanijinme? Atum apajimtai dakumkamu dakitayatkugmesh, ¿wagka nu dakumkamu ememattainum wayagmesh, nuwiya wají aidaush kasamjume? <sup>23</sup>Chicham umiktin ajutjamaina duwi ememajume, nuniyat-kujum nu betek umiatsjum nuaduí Apajuik eme anentsagmek diyatsjume. <sup>24</sup>Atum aaja nuniajum duwi yaunchuk agagbau aajakua nui: “Judiuchu aidauk, atum pegkegchau takatigmin Apajuin pegkegchau chichajuinawai” tawa nu uminui.

<sup>25</sup>Jutiik judío aents asaja pakamainag duka pegkejai, tujash chicham umiktinum tawa nu ashí umiinaku aaninakuik pegkeg amainaitji. Tuja pakamaku<sup>a</sup> akugmesh chicham umiachkugmek, pakamakchau aina nujai betekak ainagme. <sup>26</sup>Tuja aents pakamachu aina nunú,

chicham umiktajum tibauwa nuna umiagtaik, pakamakua imanuk Apajuik diyawai. <sup>27</sup>Aents aidau pakamakchau akushkam, chicham umiktina nuwiyau umiidau asagmatai atumek bakumatnaitjume, atum pakamaku ainayatkujum, nuigtú chicham umiktinush dekyatkujum umikchau asajum. <sup>28</sup>Judío aents aidautik wajuku ainaji nu diigsaikish, nuniachkuish pakamakua asajaukish dekas judío aents tamak amaitsuji; <sup>29</sup>dekaskenum judío aents aina duka ditá initkenish yapajidau aina nuuwai. Nunú ainawai initkajinish yapajidau asag dekaskenum pakamakaju aina duka, nunak Wakaní Pegkejiya nunú dutikawai, junak chicham umiktinun Moisés agajua nu dutikatsui. Nunú aidaun Apajuí pegkeg ainagme tawai, ditak aents eme anenjitnume tusag egainatsui.

**3** <sup>1</sup>Atum aidautijum, untsu judío aents atak wainkampapi, pakamamush wainkampapi tujutmainaitjume. <sup>2</sup>Atsá, makichkish nuninchauwai, Apajuik kuashat pegkeg aina nuna jutiinu amainnak dutikauwai: Nunú pegkeg aina nuwiyau dekas imá pegkeja nunak, jutii judío ainag nunutin, Apajuí ni chichamen agagbaun kajinas sujamsauwa nuuwai. <sup>3</sup>¿Tujash wajuku ita wajumak iina patayí judío aidau Apajuí tibaujin umikchajua duwiká, Apajuí jutii anagkagtuamua nunak umimainchauwait? <sup>4</sup>Nunak makichkish nunimaitsu, Apajuik ni tibaujinak dekas imatiksag betek uminai, aentsí waitjin ainajinkishkam. Nunin asantai Apajuí pachisa agagbauwa nu:

“Ame tibaugmek betek umin asamin betek uminai tama atatme, iman asam pegkegchaun aikawai tujamainakuish, bakumamainkesh atsugtamu asantai, tuke depetmaktinaitme”, tawai.

<sup>5</sup>Jutii pegkegchau takaamuji, Apajuí pegkeg takaamujin nuní paan iwainaisish

¿wagka Apajuish suwimkanash sukagtu-mainaita, pegkegchau takau asag nunimainait? (Junak tikich aents aidau wajuk chichainawa nuna dutiksanuk tajai.) <sup>6</sup>iDuka makichkish nuninuk anentaimaitsugme! Apajuik pegkegchaunak takachui. ¿Apajuish wajuk ashí aents aidaunash suwimkanash sumainaita, niish pegkegchaun takauwaitkush? Nunak dutikmaitsu.

<sup>7</sup>Makichik aents: Wi waitjamua nu, Apajuí tibaujin imatiksag betek umina nuna imá paan iwainaisish ¿wagka wisha tudau tamash aja? tumainai. <sup>8</sup>Wajumak aents aidau waitjuinak: Pegkegchau takamainai pegkeg ajutjamti takuik tusa jintinkagtawai, tujutuinauwai, ¿Dekas aajanuk jintinkagtag? Makichkish nuninchauwai, nunú aents mina pachitus tu chichaina duka suwimak jumainun tu yujainawai.

#### Ashí aents aidautik tudau ainaji

<sup>9</sup>¿Wajinmainaitji? ¿Jutii judío aidautika tikich judiuchu aidau nagkaesau imá pegkeg ainag? iMakichkish nuninchauwaitji! Timajim nunisag judío aidautish, judiuchu aidaushkam tudau ainaji. <sup>10</sup>Nunin asantai Apajuí chichame agagbauwa nui:

“iMakichkish aents pegkejak atsawai, shiig makichkiuchikesh atsawai!

<sup>11</sup>Makichkish Apajuí pegkejan wakeja nuna takaukesh atsawai, aantsag Apajuiyai anentaimush atsawai.

<sup>12</sup>Ashí aentsuk Apajuinak tupankaju asag atsumainchau waigkajui, nunin asag ashí pegkegchau ainawai.

iMakichik aentskesh pegkejan takauk atsawai!

iShiig makichkiuchikesh atsawai!

<sup>13</sup>Aentsú suwenig,

aents jakau ukusbau ashiimu  
 tsumaina iman ainawai,  
 waitjuidau asag;  
 ditá weninig dapí tsaagkega iman  
 ajuinawai,  
<sup>14</sup> nunidau asag, kuashat kajeamujin  
 aentsnash pegkegchaun chichajui-  
 nawai.  
<sup>15</sup> Wamkes kajedau asag aentsun  
 maatatus yujajin ainawai;  
<sup>16</sup> dita tuwí yujainawa nuninakush  
 pegkegchaun dutikainak,  
 tikich aents aidaunak waittanum  
 ukuinawai.  
<sup>17</sup> Dekainatsui tikichjaish agkan  
 pujutnak.  
<sup>18</sup> Apajuinash ajantus diinachu asag,  
 umigtanash dakituinawai”, tawai.  
<sup>19</sup> Yaunchuk Apajuí chichamen  
 agagbaunum: “Ashí pegkegchau  
 ainagme”, tawa nunak, jutii judío  
 aidautin Apajuí chicham umiktinun  
 sujamsau asa tujama duka dekanaji.  
 Nunú chicham umikchamunum,  
 chichamjumaka ayamjumamainchau  
 juwakuitji. Nunin asamtai jutii judío  
 aidautish, nuigtú judiuchu aidaushkam  
 wi bakumamainuk atsugtawai tumainuk  
 atsustinai, wagki Apajuí diismak ashí  
 aentstí bakumamainuk ajutjamaidau  
 asagmatai. <sup>20</sup>Chicham umikbauwaikish  
 pegkeg ainagme tamak makichkish  
 achagtinai umikchaju asag, chicham  
 umiktina duka ayatak jutii tudauwaitag  
 nunak dekamtijamui.

**Apajuik Jisukristui kajintsá  
 anentaibaunum uwemtijamui**

<sup>21</sup>Tujash yamaiya juwi iwaintugmake,  
 chicham umiktina nu umiatsjinkish  
 dekaskenmash Apajuish wajuk  
 dutijamua nuna. Juna pachisag chicham  
 umiktina nuwish, Apajuí etsegtin  
 aidaushkam etsegkaju ainawai. <sup>22</sup>Nunú  
 aidau dekamtijamawajui ashí aents

Jisukristui kajinas anentaimaidaunak  
 Apajuí pegkeg ainagme tawa nuna.  
 Aatus Apajuik ashí Jisukristui kajintsá  
 anentaimaidautinak yaá aentsuk ainta  
 nunin ataish nunak pachitsuk, ashí  
 betekak pegkeg ainagme tujamji,  
<sup>23</sup>wagki ashí aentstik betekak tunama-  
 kaju asaja, Apajuí diismak pegkejak  
 wantinkachuitji. <sup>24</sup>Nunin ainajinig iina  
 anempau asa, anenjauch pegkeg  
 ainagme tujabiuwai, Kristu Jisus iina  
 tudaujin esakatjamag agkan etamkau  
 asamtai. <sup>25</sup>Apajuik ashí aentsun  
 dekamtikauwai, aentsú tudaujin  
 tsagkujata tau asa, Jisusan mantamnati  
 tusa etegkauwa nunak. Nunak niina  
 numpe ukajamunum imá niinig kajinas  
 anentaimainak aentsú tudaujish  
 tsagkugnagtinme tusa dutikauwai.  
 Yaunchuk tudau takasbaunak Apajuik  
 pachitsuk idaitugmasui, tujash yamai  
 Kristu jutii tudaujin juki mantamnamu-  
 num, Apajuí dekaskenun tudaun  
 suwimkan suwa nunak iwainmamkae.  
<sup>26</sup>Nunak Apajuik waugtuk dutikchauwa  
 nunin asa, yaunchuk tudau takasbaunak  
 pachikchauwai. Tujash yamaya juwik  
 aentsú tudaujinash wajuk dekasken-  
 mash dutikawa, nuna dutikak Apajuí  
 dekas pegkejan taká nuna iwainmam-  
 kae. Jutii Jisusai kajintsá anentaimai-  
 dautinak: Atumek pegkeg ainagme  
 tujama duwi.

<sup>27</sup>Nunin asamtai jutii ememamainuk  
 makichkish atsawai. ¿Dusha wagka  
 nunikuita? Nunak imá Jisukristuig kajintsá  
 anentaibaunum Apajuí pegkeg etamkauwa  
 duwi nunikui. Nunak chicham umiktina nu  
 umikú asajinkish dutijamachui. <sup>28</sup>Apajuik  
 Jisukristui kajintsá anentaibaunum pegkeg  
 ainagme tujama nunak, chicham  
 umiktajum tibauwa nu umikbauwaikish  
 dutijamtsu duka dekaji.

<sup>29</sup>Atsa ¿Apajuik imá judío aina nuna  
 Apajuijigke, tajumek?, atsa ¿ashí aents

aina nunash Apajuijinchukait? Dekaske-  
num ashí aents judiuchu aina nunash-  
kam Apajuijiyai. <sup>30</sup>Apajuik makichkiu-  
chi, nigki imá Jisukristuig kajinas  
anentaimaidaunak judío aents ataish,  
judiuchu ataishkam pegkeg ainagme  
titinai. <sup>31</sup>Nunin asamtaig, ¿Jisukristu  
kajintsá anentaimtamunum chicham  
umiktina duka imanchau juwaka?  
iMakichkish nuninchauwai! Nunisag  
awai, ayatak nuní nagkaemas paan  
awajsaji, chicham umiktinush wajinma  
yaijatua duka.

**Apajuish wajuk pegkejash diigmawa  
nuna Abraham iwainakbau**

**4** <sup>1</sup>Yamai dekawagmi Abraham iina  
muunji aajakua nudau. <sup>2</sup>Abragkak ni  
takasbauji diigsá aents pegkejai tibau akug,  
nigki emematmamain aajakuí, tujash  
Apajuiyaig ememamain ajakchauwai.  
<sup>3</sup>Apajú chichame agagbauwa nuwig:  
“Abragkak Apajuiyai kajinas anentaimaja-  
kuí, nuniau asamtai Apajú Abragkan  
pegkeg diisuf”, tawai. <sup>4</sup>Aents ni takagsa-  
munum akiakug: Junak anentag amajame,  
tumaitsui, diwibaunum akiau asa. <sup>5</sup>Tujash  
aents pegkejan takaschau aig, Apajú aents  
tudaun agkanmitkauwa nui kajinas  
anentaibiagtai, nunú kajintsá anentai-  
bauwa duwik aents pegkeg ainagme tawai.  
<sup>6</sup>Davidchakam aikasag agajui. Aents  
pegkeg takasbaujish atsujai, Apajú  
pegkeg ainagme tima shiig aneastinjin  
pachis agajua duka. <sup>7</sup>Aatus tawai:

“iShiig aneastinai aentsú pegkeg-  
chauji tsagkujamu aidauk,  
tuja tudau yaunchuk takasbaujish  
tuke idaiku pachitsuk idaitusbau  
aidaushkam!

<sup>8</sup> iShiig aneastinai  
Apajú aents aidau tudaujin  
anenjachbau agtina duka!”

<sup>9</sup>Juna tibauwa jusha ¿Imá jutii judío  
aidautik shiig aneastinnak tiuwait, atsa

judiuchu aidaush shiig aneastinun  
tichaukaih? Nunak ditanashkam tiuwai.  
Yaunchuk timajime Apajuik Abragnak  
imá ni kajittsá anentaimtamua duwik,  
aents pegkeja iman diisuí tusan.  
<sup>10</sup>Tujash nunash ¿wajukamtaiya  
dutikauwaita? ¿pakamakmataig  
dutikauwait, atsa pakamatsaigkik  
dutikauwait? Nunak pakamakmatai  
dutikachui, eke pakamatsaig dutikau-  
wai. <sup>11</sup>Abragkak pakamakú ayatak  
Apajú kajintsá anentaimtamunum  
pakamakchau aigkish, Apajú pegkeg  
diijata nuna dekaatnume tau asa.  
Nuniku asa pakamakchau ainayatak,  
Apajuiyai kajinas anentaimaina nuna  
muunji wajasuí, ashí nunin aidaunak  
Apajuik betekmas pegkeg diyawai.  
<sup>12</sup>Nuigtushkam pakamaku ainakush,  
Abraham eke pakamatsuk Apajuiyai  
kajinas anentaimajakua nunisag  
anentaimaina nuna muunji wajasuí.

**Apajuik Abraham kajinas  
anentaimajakua nunin aidaun  
pegkeg ainagme tawai**

<sup>13</sup>Apajú Abragkan anagkuak: Ju  
nugka juka amina uchijum wegantu  
akiinak wegagtina nudau atin atí,  
tiuwai. Nunak Moisés chicham umikta-  
jum tibauwa nuna umikú asamtaigkish  
tichauwai. Ayatak niini kajinas  
anentaimu asamtai pegkeg diisá tiuwai,  
<sup>14</sup>wagki jutii judío aidauti chicham  
umiktajum tibauwa nunú umiaku  
jumainaitkuig, Apajuiyai kajintsá  
anentaibauk ni anagkagtuamua nujaí  
wainak juwamainai. <sup>15</sup>Moisés chicham  
umiktajum tiuwa duka ii umiachbau-  
num Apajú suwimkan sujamaina nuna  
itagtamji. Tujash chicham umiktina  
nunú atsugtamkuig intimjumaitsuji,  
wagki atsau asamtai.

<sup>16</sup>Nunin asamtai Apajú Abragkan  
anagkuawa nunak, ni wegantu aidaush

kajintsá anentaibaunum anenjauch uwemjatnume tiuwai. Apajuí anagkagtuamuk, jutii judío aidauti chicham uminag nudaukechui, Abraham Apajuiyaig kajinas anentaimajakua nunisag, ashí aents kajinas anentaimaina nudauwai. Aatus asamtai Abragkak ashí jutii aidauti muunjyiai. <sup>17</sup>Nuaduí Apajuí chichame agagbaunum: “Wi aminak kuashat aents aidau muunji emajame”, tawai. Abragkak Apajuí emtin abaujinak wainmamkauwai, nunik ni tabaujinash dekaskeapi tiuwai. Nunú Apajuí jakaunash inanki ataktú pujutan suwak, atsamunmayanash ashí wajiin najanna nuanuí Abragkak kajinas anentaimajakuí.

<sup>18</sup>Nunin asa Abragkak uchijish atsugmaitak, kuashat aentsun muunji atag tau asa, dekas nuniktinapi tusa kajinas dakasui, Apajuí chichajak: “Amina uchigmiin akiinak wegauk, yaya dekapamainchauwa ibau atinai”, tibau asa. <sup>19</sup>Abragkak cien mijan tumain ajamu asa uchinak akiimainchauwapitja tiuwai, nuigtush Sarashkam muuntuch wajasú asa uchinash ejapjumainchau asamtai, tujash dekaskeap duka uminkattawa tusa kajintsá anentaimtanmag mijakchauwai. <sup>20</sup>Nuigtush Apajuí niina anagkuamunash utujimsag anentaimtsuk, nuní nagkaemas kajinmas dekas nuniktatuapi tabaujinak ichichmamag Apajuin see tiuwai. <sup>21</sup>Abragkak: Apajuí ashí senchigtina ibau asampap ashí ni anagkagtuamujinash imatiksag umiktatua, tiuwai. <sup>22</sup>Nunú aaja kajintsá anentaibaunum Apajuik Abragnak pegkeg diisú.

<sup>23</sup>Tujash Apajuí Abragkan niiní kajinas anentaimu asamtai pegkeg diisua duka, imá Abragdauk pachisa agagchamui. <sup>24</sup>Jutii pachipasash agagbauwai: li kajintsá anentaibaunum

pegkeg ainagme tama atinaitag nunú. Duka jutii ainaji iina Apuji Jisukristun jakaunak inankiuwa nunú, Apajuiyai kajintsá anentaimaidautik. <sup>25</sup>Apajuí Jisusnak iina tudaujin mantamnati tusa idaisauwai, nunik maawagmataish ataktú nigki inankiuwai jutiiin pegkeg ainagme tujamta tau asa.

#### **Yamaik Apajuí wait anenjabaunum pujaji**

**5** <sup>1</sup>Apajuí Jisukristui kajintsá anentaibaunum pegkeg ainagme tujabiu asamtai, nijai shiig aneasa agkan pujamu ajutjamji. Iina Apuji Jisukristu, jutii Apajuiyai shiwag aajakbaun epegtugma kumpamtijamauwa nuaduí. <sup>2</sup>Kristu jutiiiní mantamnamunum Apajuí wait anenjamjauwai. Yaunchkek Apajuik wait anenjamajakchauwai, tujash yamaik Jisukristui kajintsá anentaibaunum wait anenjamui. Aaja yamaik Apajuí wait anenjabaunum pujaji, nuigtushkam jutiiik Apajuí tsuwatan antiakchauwa imanuk iishkam wajasaja, atak nijai ijunja pujustinaitag nunú dekainaku shiig aneamu ajutjamji. <sup>3</sup>Imá duwikik shiig aneatsji, kuashat waitiamu ajutjamkuish shiig aneasa batsatji, waitiamua nu utugchat emamkesa katsunjá nagkaetan unuitama duwi, <sup>4</sup>aaja emamkesa utugchat nagkaebaunum Apajuí pegkeg aniagme tujamji, nuna aatus tujamatai atakeap nijai pujustinaitji tusa dekaidau asa shiig aneasa pujuinaji. <sup>5</sup>Nu dekau asaja shiig aneasa pujuidautik tsanugbauk achatnaitji, wagki Apajuí Wakaní Pegkejin amasua nunú Apajuí senchi anejata nuna dekamtijama Apajuí aneen etabiu asamtai.

<sup>6</sup>Jutiiik Apajuí shiwaji wajasá pegkegchau takat idaimainchau waigká batsatjin, Apajuí tsawan mamikiamu jegamtai, Kristuk jutiiiní mantamdau-

wai. <sup>7</sup>Makichik aentskesh tikich aentsun dekaskenum pegkejan takau asamtai ayamjakun mantamnatjai tumainuk atsawai, ¿aents pegkegnum yaigbau asampash: Wi mantamnatjai, tumainait? <sup>8</sup>Tujash Apajuik ni anenkajinak iwaintugmakui, ii tudau ainajinig Kristu jutiini mantamdauwa duwi. <sup>9</sup>Kristu niina numpen Apajuyai iwainakmatai pegkeg ainagme tujabiuwai. Nuaduf aan nagkaemas dekas Kristu iina Apajuí suwimak sujamainnak ayamjutupakmatai waittsashtinaitji. <sup>10</sup>Yaunchkek aents aidautik Apajuin shiwaji ainajinig, ni Uchijí iina ayamjutupak mantamna ni Apajijaish epegtugma kumpamtijamauwai. Yamaik Apajuí kumpají waigkú asajin, Kristush iwaaku pujau asa dekas aan nagkaemas ayamjupaktinai. <sup>11</sup>Imá dukechui jutii Apajuyai shiig aneenag duka, iina Apuji Jisukristu Apajujai epegtugma kumpamtijamauwa duwish shiig aneenaji.

#### Adán Kristujai pachisa tibau

<sup>12</sup>Adán tunamagbaunum aents aidauti tudau takaamush nagkamdauwai, aja tudau takaaku ashí aentstik jinin wajasuitji, wagki ashí tunamaku asaja. <sup>13</sup>Apajuí eke Moisesan chicham umiktinun suwatsaig aents aidauk tudaunak yaunchuk nagkamas takajakajui, tujash Apajuik aents tudaun takaagtaish pachikchauwai, chicham umiktinun eke susachu asa. <sup>14</sup>Nunin aigkishkam Adán pujujakua duwi nagkamas Moisés pujaiskam jinujakú ainawai, Adán Apajuí intimjukbaunum tunamajua nuninachiatak. Adán intimkimunum ashí aentsuk tunamakaju ainawai, nunisag Kristu pegkeg dutikamunum ashí aents aidauk uweemain ainawai.

<sup>15</sup>Tujash Adán tunamagbauwa duka Apajuí anenjauch sujamsamua nujaig

apatkaish tumaitsui. Makichik aentsú tudaujinig ashí jinin wajasuitji. Tujash Apajuí wait anenjamag anenjauch iinu ashí pegkeg aina nunak dutikauwai, Kristun awetugmauwa nuaduf. Makichik aents emesjamua nuna, tikich aents Jisukristuwa nunú wait anenjamag kuashat aentstinun iwajauwai. Aatus Apajuí wait anenjamag nunú aents tunamajua nuna nagkagas pegkejan dutikauwai. <sup>16</sup>Adán tudau takasbauwa duka Apajuí anenjauch sujamsauwa nujaig apatkaish tumaitsui. Adán tudaun takasua duwi ashí aentstik Apajuí emtinish bakumain wajasuitji. Tujash kuashat aents tunamaku aigkish, Apajuí kuashat aentsun anenjauch pegkeg ainagme tawai, nunimainchau aigkish. Aaja dekainaji Apajuí jutii wait anenkagtamua shiig muunta duka. <sup>17</sup>Makichik aents tunamagbaunmag jaamuk asauwai, nunikmatai ashí aentstí jakaig tusa ishamat nagkamdauwai. Tujash nuna nagkaesau makichik aents Jisukristuwa nu pegkejan dutikauwa nu yaimpasmatu depetmaka pujuinaji. Ashí jutiiin Apajuí shiig senchi wait anenkagtak anenjauch pegkeg ainagme tibau aidautik see tusaja kajintsá anentaimainaji.

<sup>18</sup>Makichik aents Apajuí intimjukbaunum nunisaik ashí aentstish intimainaku, Apajuí atumek suwimak juwakjum jakattagme tama asauwaitji. Tujash makichik aents ashí aentstinun pegkejan dutikak waittsauwa duwi, Apajuí ashí aentstinak pegkeg ainagme tusa pujut nagkanchau suwam amainaitji. <sup>19</sup>Makichik aents Apajuí intimjukbaunum ashí aentstik yupichu tudau takamain waigkuitji, nunika tunamakuitji. Tuja makichik aentsua nu Apajuí umigkamunum, ashí aents aidauk yupichu pegkeg ainagme tama

amain asamtai, kuashat aents pegkeg ainagme tama agtinai.

<sup>20</sup>Aents aidauk tudaunak taká batsatai Apajuí chicham umiktinun susauwai. Tujash chicham umiktina nunak dekainayatak, aentsuk nuní nagkaemas tudaun takajakú ainawai. Imanik tudaun taká batsatai, nuna nagkaesau Apajuí wait anenkagtujui. <sup>21</sup>Yaunchkek ashí aentsuk tudau takatan nagkama-wag takainak idaimainchau batsamajakajui, jinin waigkaju asag. Apajuish anmamtuk, yamaik ashí aentsuk shiig aneasag agkan niinig kajinas anentaimas pujuinak, tuke pujustin atinme, wait anenjá pegkeg ainagme tibau asag, tusa wakegawai. Nunú pujuta nunak iina Apuji Jisukristu sujamui.

**Jutiik tudau takatnumag jakauwa numamtuk juwakuitji**

**6** <sup>1</sup>¿Dusha wajuk anentaimtagme? ¿Apajuí senchi wait anenjamjati tusaik tudau taká batsaamainait? <sup>2</sup>iDuka makichkish nunimaitsui! Jutiik tudau takatnumag jakauwa numamtuk juwakuitji, nuniku asaja tudau taká batsamtumaitsuji. <sup>3</sup>Atumek shiig dekagme, jutii Kristu Jisusai kajintsá anentaibaunum yamimainakuik, ni jakauwa numamtuk wajainag duka. <sup>4</sup>Nunin asaja yamimainakuik Kristun ukusajua numamtuk wajainaji, nijai betek jakauwa numamtuk wajaidau asá. Nuniku asaja Kristu Apají niina senchijí imana nujai inankiuwa numamtuk wajainaji yamajam pujutnum pujuidau asaja. <sup>5</sup>Nijai jamaina numamtuk wajakú asá, ni nantakiuwa nunisaik jutiish nantaktinaitji.

<sup>6</sup>Yaunchuk aajakuitag duka Kristu achijá maamua nujai betekak maamua duka dekainaji. Apajuí wakejukui yaunchuk pegkegchau takastasa katsunmainchau senchi wakejuk-

bauwa nunú wainak juwakti tusa, nunikmatai tudau takata nunak idaimainchau batsamtishtinme tujamu asa. <sup>7</sup>Aents jakauwa duka tudaunak taká pujuchui agkanmagau asa. <sup>8</sup>Numamtuk jutiishkam iina tudau takataiji aidauk Kristujai jakau asamtai agkantaitji. Nuaduí Kristujaimpap pujutnaitji tusa kajintsá anentaimainaji. <sup>9</sup>Dekainaji Kristu jakaunak Apajuí inankimu asa ataktuk jakashtina duka. Kristuk jatanak depetkau asa ataktuk jamaitsui. <sup>10</sup>Aents tudaun takaagtai Apajuí suwimkan susatjai tiuwa duka, Kristu waitus jakauwa duwik ashí nagkankauwai. Yamaik nantakí puja nunak Apajuí shiig anemtikak pujawai. <sup>11</sup>Atumshakam nunisjumek tudau takatnumak jakauwa nunin anentaimtumastajum, tuja iwaaku anentaimtumas-tajum, ii Apuji Kristu Jisusjai ijutkau batsatkujum Apajuí shiig aneemtikasata tabaunum.

<sup>12</sup>Nuaduí atumek tudau taká batsaamaitugme, atumi iyashim pegkegchau takastatus wakega nunú takaakjum. <sup>13</sup>Atumi iyashmiin ashí ajutjamaina dukesh, makichik waji pegkegchau dutikatasa takatia nuninuk awasaigpajum. Dekas Apajuiyaig idaimamsatajum jakauti nantamaina numamtuk wajakú asajum, ashí iyashmiin ajutjamaina nunak Apajuí pegkegnum takamtiksati tusajum. <sup>14</sup>Atumek aents aidau, chicham umiktajum tibauwa nuna umikchan suwimkan jukig tusag umiktatus batsamtumaina nunitsuk, Apajuí wait anenjabauum batsatu asajum, tudauwa duke taká batsamtutsuk idaisatajum.

**Aents yana umigkatjai tawa duka nuna umijin wegawai**

<sup>15</sup>Makichik aentskesh: Chicham umiktajum tibauwa nuna umikchan

suwimkan jukig tusag, nuna umiktatus batsamtuina nunitsuk, Apajuí wait anenjabaunum pujau asayap tudau takamainaita tusa anentaimainai. iTujash duka makichkish nunimaitisui! <sup>16</sup>Atumek dekagme, makichik aents wika parjugkan takagkun umijin atajai tumamkug, nuna inake wajasá parjugji wakegamujin umigna duka. Numamtuk aents ayatak tudaunak takau atajai takush, nuniachkush Apajuin umigkatjai tumamainai, tudaunak takau atajai tumamiu asa idaitsuk taká pujauk jatan egatmamak nuniawai. Untsu Apajuin umijin atajai tumamiuk niinak umijak pegkeg aina nunak takaak pujumainai. <sup>17</sup>Apajuin see tajai yaunchkek tudau achikbauwa nunin batsatutijum, Jisukristui kajintsá anentaimat pachisa jintiamu antukjum wakesajum umijin waigkujum nuaduí. <sup>18</sup>Tudau takatnum achikbauwa nunin batsatutijum agkanmitkamu asajum, pegkeg aina nunak takau atajai tumamiuwaitjume, nunikjum pegkeja duke takaakjum batsatjume.

<sup>19</sup>Atumek Apajuinu pegkeg aina duka kakajus antumainchau ainagme, nuaduí yamai aentstinujai apatkan shiig antumtikatjime. Yaunchkek ashí atumi iyashmiin ajutjamaina duka, ashí iyashnum takanitai pegkegchau aina nunú, nuigtú ashí tikich pegkegchau aidau takat aina nuig idaimamsau aajakuitjume. Numamtuk ashí atumi iyashmin ajutjamaina nujai, Apajuí pegkeg diyamu aina duke takatnum idaimamsatajum, Apajuí uchijí aidau wajuk pujumainaita nunisjumek pujakjum.

<sup>20</sup>Atumek tudau takatnum idaimamsau asagmin, Apajuí pegkejan wakega nunú takagsatajum tumainchau aajakuitjume. <sup>21</sup>Tujash ¿wají pegkeja jukiuwaitjume, yamai datsantan

itagtamaina nunú takasuitjum duwish? Duka ayatak jatanmag ejetamjume.

<sup>22</sup>Tujash atumek tudaunum agkanmitkam Apajuí takajin wajasujum nuaduí, yamai dekás pegkeja duka ajutjamjume, nunú pegkeja duka Apajuí uchijí asajum, Apajuí pegkejan wakega duke takaajum nuuwai nijai tuke pujutnum ejetamjum nunú. <sup>23</sup>Tudau takaamuk Apajuiyai ayatak datumkagtawai. Untsu iina Apuji Kristu Jisusjai ijutkau pujamunum juwamuk Apajuí anenjauch nijai tuke pujuu etamtina nuuwai.

#### Chicham umiktajum tibauwa nunú nuwenbauwa nujai apatka dekamu

**7** <sup>1</sup>Yatsug aidauh, ubag aidauh, atumek chicham umiktin aina nu dekau asagmin tajime. Atumek dekagme chicham umiktin aina nunak, ayatak aents yamai iwaaku puja duke umimaina duka. <sup>2</sup>Chicham umiktina dusha, nuwenbaujaish wajukuita nu apatka dekawagmi: Nuwa nemakua duka aishi pujaigkik tikichnumag nemamaitisui tawai chicham umiktina duka. Untsu aishi jakamtaig chicham umiktin tawa nunak, nuwak agkan juwawai tawai. <sup>3</sup>Nunin asamtai aishi pujaig tikichjai nemakug ekagmawai, untsu aishi jakamtai chicham umiktin nuwenbaun pachis tawa nunak agkan juwaku asa, tikichnum nemakug ekagmatsui. <sup>4</sup>Mina yatsug aidauh, mina ubag aidauh, atumesh jumamtuk Kristujai ijunkujum jakauwa numamtuk juwakuitjume, wagki Kristu jakau asamtai. Aaja atumek chicham umiktin tawa nuwig agkan juwakuitjume tikichdau ata tau asajum. Yamaik Kristu jakaunak Apajuí inankiuwa nudau wajasugme, Apajuin pegkejan takagsatajai tusajum. <sup>5</sup>Yaunchkek aents Apajuí dekachujai betek batsamsá, ii pegkegchau takastasa senchi wakegamu aidau



ajutjamajakua duke takajakuitji.  
Chicham umiktina nunú dekyatku  
pegkegchau takastasa nuní senchi  
wakekauwaitji. Ashí pegkegchau  
takajakbauwa duka nuní nagkaemas  
Apajuiyaig datumtamjauwai,  
dutihamamtai tudau takaamu Apajuiyai  
tuke kanaaku kanamaina nui jegantuitji.  
6Tujash yamaik chicham umiktajum  
tibaauwa nunú umitnumag jakauwa  
numamtuk wajakú asaja, agkanmaga-  
waitji achikbauwa numamtin aajakuitag  
duka. Nuniku asa yamaik Apajuik  
takagji, Wakaní Pegkeji yaimpasmatai.  
Jutiish yaunchkek aents aidau chicham  
umiktajum tibaauwa nuna umikchan  
suwimkan jukig tusag umiktatus  
kakanmamaina imaanijakuitji; tujash  
yamaik Apajuí takajuinakukiy yaunchuk  
wajukejakuitag nuninatsji.

**Pegkegchau wakegamu  
minai ajuta nu**

7Nunin asamtaig ¿chicham umiktina  
duka pegkegchauwai tumainait? iDuka  
makichkish nuninchauwai! Chicham  
umiktina nunú atsakuig wika  
wajimpaya pegkegchau wakegamush  
nunak dekaachu amainaitjai, chicham  
umiktina nui: Tikichdau aidau wakeju-  
kaipa tawa dusha atsakuig, tikichdau  
aidau wakejutnak dekaachu amainaitjai.  
8Tujash chicham umiktajum tibaauwa  
nui tawa nuna dekakman, ashí  
tikichdau aidaunak wakemainchauwai-  
tag nunú wakeetan nagkamauwaitjai.  
Yaunchkek chicham umiktina nunash  
eke dekachu asamtai, minai pegkegchau  
wakegamu ajuta dushakam atsauwa  
numamtin aajakuí. 9Wika yaunchkek  
chicham umiktina nunash dekatsuk  
pujujakuitjai; tujash chicham umiktina  
nuna dekakman, pachiachmau pegkeg-  
chau takastasa senchi wakegamunak  
nagkamauwaitjai. 10Nunikan wainmam-

kauwaitjai chicham umiktina nuna  
umiatsug nuna, nuniau asan Apajuiyai  
kanakbaujua nunash dekauwaitjai.  
Chicham umiktina duka pujut tuke  
atinum ejetumaina nuna, Apajuijaig  
tuke kanaaku kanamaina nuwí ejetiua  
nuna. 11Chicham umiktina nui tawa  
nuna dekakman, ashí wakegamu  
aidaunak wakemainchauwaitag nunú  
wakeetan nuní senchi wakemitkajuk  
tsanugkui, pegkegchaun takau asan.  
Pegkegchauwa nuna pegkegtsukaitai  
tusa takaamujun, chicham umiktina  
nuanuí, pegkegchau takauk suwimkan  
juwawai tabaun dekakun, chicham  
umiktin tawa nunisnuk suwimkan  
juwakun, Apajuiyai kanakbaujun  
dekauwaitjai. 12Aajan dekajai chicham  
umiktina duka Apajuiyap tibaauwaita  
tusan. Tuja Apajuí ashí aents aidaun  
umiktajum tawa nunak, ayatak dita  
dutikmainjin diijus tiuwai. Ashí  
dutikatajum tibaauwa duka pegkejai.

13¿Tujash nu iman pegkeg ayatkush,  
wagka Apajuiyai tupautnumash  
ejekagtawa? tautigmesh amainaitjume.  
Duka nuninchauwai. Nuninaitak minai  
pegkegchau wakegamu ajuta nu  
tudaunak takamtijawai. Chicham  
umiktin pegkeja nuna antakun, nuní  
senchi pegkegchau wakegamujui tudau  
takaamunum Apajuijai kanakú asan,  
jakaujai betek aajakuitjai. Tudauk nuní  
iwainmamkauwai dekas tudauwa nuna.  
Aatus nunú chicham umiktina nui  
dekanauwai pegkegchau wakegamua  
duka, pegkegchau takaamua dushakam  
dekaskenum shiig pegkegchauwapi  
tusa.

14Dekaji chicham umiktina duka  
Apajuinu asa nayaimpinmayaya nunú.  
Untsu wika ju nugkanmaya asan  
kakakchauwaitjai. Nunin asan inak  
apujin umijama numamtuk, pegkegchau  
wakegamujun umijag nunak dutiktisu-

kek idaimainchau dekaapeajai. <sup>15</sup>Wika dekamain dekapeatsjai, wi wakegamujua nuna takatsuk, dekas wi dakitamujua nuna takaag duwi. <sup>16</sup>Nuniau asan wi dutikag nunak, dakitamujua nuna takau asan, chicham umiktina duka dekas pegkejapita tajai. <sup>17</sup>Nuaduí wichauwaitjai dekaskenum pegkegchaun takaunuk; minai pegkegchawakegamu ajuta nu takamtijakui nuniajai. <sup>18</sup>Nunin asan wikik pegkejan takamainchawaitag nunak shiig dekagmamjai. Wi pegkejan anentaimesan takastasan wakegag nuna senchimtjuminuk minaig atsugtawai, wagki pegkeja nuna takastasan wakegayatkun takamainchau dekaapeau asan. <sup>19</sup>Pegkeg takastasa wakegamua nunak takatsuk, pegkegchawakegamu ajuta nu takamtijawai.

<sup>21</sup>Dutijau asamtai pegkeja nuna takastasan wakegayatkun, pegkegchawakegamu minai awa nunú tuké takamtija nuna dekagmamjai. <sup>22</sup>Mina anentaijui shiig aneamu ajuta duwi tajai: Chicham umiktin Apajuí sujamsamu umiktina duka pegkejai; <sup>23</sup>tujash wi umigmain tikich minai ajuta nunash dekajai, duka wi pegkeg wakegamujua nuna umigkata taig, pegkegchawakegamu nu dakitmitkajak, pegkegchaun takamtijak achigkauwa nunin eti ajuta nuuwai.

<sup>24</sup>iWajukawajak tajai! ¿Ya agkanmitkagmainaita mina iyashig pegkegchaun takamtijak Apajuiyai datumta nunash? <sup>25</sup>Apajuin see tajai, wagki ni ii Apuji Jisukristua nuna awetugma agkanmitkag mauwa duwi. Wi timajim nuna ataktú awentsanuk tajime: Wika dekaskenmag Apajuinu chicham umiktina nuna umiktasan wakegajai; tujash wikik tudau takatnak idaimainchau dekaapeajai.

### Wakaní Pegkeji wakega dutiksag takamtijusti tusa idaimamau

**8** <sup>1</sup>Tujash yamaik Kristu Jisusai ijutkau aidau suwimak jumainuk shiig atsujuinawai. <sup>2</sup>Duka dekaske, Kristu Jisusai ijutkau pujuidaunak Wakaní Pegkeji yamajam pujutan susa agkanmitkawajui. Dutikamu asaja yaunchuk pegkegchawakegamu dakitayatku takainaku tuke achikbaujai betek pujujakbauwa nuna saikik pujuinatsji, nuigtú pegkegchawakegamu jaká Apajuijai tuke kanaaku kanamaina nuwishkam agkanmitkamu ainaji. <sup>3</sup>Chicham umiktina duka tudau takaamu idaitanmag yaimpamainchau aajakua duka dekainaji, wagki kakakchawakegamu asaja pegkegchawakegamu duke takaaku pujuidau asaja. Nunin asamtai Apajuí nigki yaimpakui niina Uchijin jutii tudaujin mantamnati tusa awetugbauwa duwi. Apajuí Jisusnak aentstijai betek ema awemauwai, dutikamu asa jutii pegkegchawakegamu senchi wakegainag numamtinuk aajakuí. Apajuí Uchijiya nu pegkegchawakegamu takaschawaitak, jutii tudau takaamunum suwimak juwaku waitmainun Jisus niina iyashiin waittsauwa duwi, nunú pegkegchawakegamu nunak depetkauwai. Aatus Apajuik aentsnum tudau najaneauwa nunak, Kristun suwimkan suwak, ii tudaujin suwimak jumainaitag nunak inagnakui. <sup>4</sup>Nunak Apajuik jutii pegkegchawakegainag nunak takatsuk pujuinak, Wakaní Pegkeji wakega dutiksag takaak batsataidauk, ashí chicham umiktina nunak dutiksag umiktinme tujamu asa dutikauwai. Nunú umiktá tujamauwa duka pegkeg asamtai dutiksaik umimainaitji.

<sup>5</sup>Aents aidau dita ashí pegkegchawakegaina nunak takaa pujuidauk, imá

dita pegkegchau wakegaina nunak takaina duka jutiik dekainaji. Untsu Wakaní Pegkeji tabauwa nuna umiidauk, Wakaní Pegkeji wakega nunak wakegas takainawai. <sup>6</sup>Aents ni wakegamua nunak wakegas takaa pujauk, nigki jatan egatmamui; tujash Wakaní Pegkeji wakega nunak umiak puja nunú Apajuijaig tuke pujustinai. Nuigtushkam Apajuijaish epegtumau asa, ashí aents aidaujaish nunisag shiig agkan pujawai. <sup>7</sup>Tujash aents ni pegkegchau wakegamua nunak takastatus anentaímtú pujuidauk, Apajuí shiwaji ainawai, wagki Apajuí wakegamua nu takatnak dakituidau asag, Apajuí wakegamua nuna dutikatatus wakegainakush dutikmainchau dekapenawai.

<sup>8</sup>Aents ni pegkegchau wakejamua nunak taká wekaguk, makichkish Apajuinak shiig aneemtikmaitsui.

<sup>9</sup>Tujash atumek, atum pegkegchau wakegamua nu takaakjum pujatsjume, Wakaní Pegkeji wakega duke takaakjum pujagme, Wakaní Pegkeji atuminish pujugtamu asamtai. Untsu Wakaní Pegkejin Kristu sujama nu atsugbau aidauk Kristunuchu ainawai. <sup>10</sup>Jutiik tunamakaju asajin iina iyashig jakatin ainawai. Tujash Kristu jutiiní pujau asamtai, Wakaní Pegkejiya nu dekas pujuta nuna sujamsajui, wagki Apajuí pegkeg ainawai tujabiau asamtai.

<sup>11</sup>Apajuí Jisukristu jakamtai inankiuwa dutiksag, nigki iina iyashinash pujutan susatnai, Wakaní Pegkejiya nunú iiní pujau ataik. Nunak Apajuik ni Wakaní Pegkeji sujamsamu atumiin pujugtama nuaduú dutikatnai. <sup>12</sup>Dutijamatín asamtai yatsug aidauh, ubag aidauh, pegkeg aina duke takamain ajutjamji, iina iyashí tudau takatan wakega duke taká yujatsuk. <sup>13</sup>Jutii ii wakegamua duke taká yujakuik, tuke waittsatin ainaji; untsu ii wakegamu takata nu,

Wakaní Pegkeji yaimpasmatai idayutik Apajuijai tuke pujustinaitji.

<sup>14</sup>Ashí aents Wakaní Pegkeji wakega dutiksag takamtijusti tusa idaimamaidauk, Apajuí uchijí ainawai. <sup>15</sup>Atumek wakan inajatak waitkagkagtina nu jukichuitjume, ataktú sapig batsamtita tusagmek. Atumnak Wakaní Pegkejiya nu Apajuí uchijí etamkaju asamtai, nunú Wakanía nu ichashtamkui: “Mina Apag” tuinaji. <sup>16</sup>Wakaní Pegkejiya nunú iiní pujau asa iina anentaín dekamti-jamji, Apajuí uchijí ainagme tusa. <sup>17</sup>Apajuí uchijí asaja, ii jukitnun Apajuí anagtabauwa dusha betek jukitnaitji, tuja dekaskenum ju nugka juwi Kristu waittsauwa numamtuk waittsajaik niina imanjiya imanuk atinaitji.

**Apajuí anagtamamua nui kajintsá  
pujuuidau asaja ichichmamja  
batsatainaji**

<sup>18</sup>Ju nugka juwi yamai waituinag duka imanchauwai, Apajuí pujut pegkeg tuke atinun sujamsatna nujai apattsa anentaímtamak. <sup>19</sup>Ashí Apajuí najankamu aina duka wakegas dakainawai, tsawan jegatai jutii Apajuí uchijí aidautin ashí wainainamunum niina imanjiyai iwaintamkatna nuna wainkag-tatus. <sup>20</sup>Ashí Apajuí najankamu aina nunú, ditanu pegkeg aajakajua nunak megkaekaju asag, makichkish atsumashbauwa nunin waigkua duka dekainaji. Nunak dita wakegainak nunikchajui, Apajuí aatus nunikti tibau asag nunika-jui. Dutikamu asag Apajuí makichik tsawantai yapajiatin asa dutikauwa nuna dakainawai. <sup>21</sup>Ashí Apajuí najankamu aidauk jinin atí tibau asag, tuke achikbaujai betek aina nunak, Apajuí agkanmitka shiig pegkeg ematnai. Nunak Apajuí uchijí agkatmitkamu agtina nujai betek Apajuí ditanashkam agkanmitkawagtinai.

<sup>22</sup>Nunin asamtai yamaya juwikish Apajuí najankamu aidauk, dita agkanmagawagtinjin dakainak najaimaku ejettayama imatuinawai, nunin角度 nuwa uchin uchigmaktatus najaimama imanina duka dekainaji. <sup>23</sup>Nunak imá ditakek waituinatsui, jutii atak Apajuí amastina nu jukitin asaja emtika Wakaní Pegkeji jukiú aidautish-kam waituinaji, iina iyashin yapagtugma nu uchijí etamak jujamkitna nu wakeesa dakainaku batsamsaja. <sup>24</sup>Jutiinak Apajuí uwemti-jamjauwa duka dekainaji. Tujash ni nuna dutijabauwa nuaduí ni anagtabauwa dutiksag sujamsatna nu dakainaku kajintsá pujuinaji. Apajuí anagtamamua nunú jukiú akuik, atakeap jukitnaitji tusaik kajintsaik daká pujumaitsuji, wagki ni dakamujiya nuna jukiú asa jukittajapi tusag kajinas daká pujumaitsui. <sup>25</sup>Tujash ii dakainamua duka ii wainchamua nu dakainaji, nuniau asá emamkema dakainaji. <sup>26</sup>Nunidau asaja ichichmamja batsatainaji, Wakaní Pegkejiya nu ii kakakchau wegajinish yaijatu asamtai. Jutii kakakchau ainag duka, Apajuish wajuk aujmainaita duka dekachu asá nunin ainaji, tujash Wakaní Pegkejiya nu jutiin pachipas Apajuin aujtugmawai, anentai senchi idajka chichamai tumainchau dekapstayama imatikas. <sup>27</sup>Nunitai Apajuí aents anentaibaujin shiig dekaju asa, Wakaní Pegkejish wajina tawa nunak Apajuik shiig dekajui, wagki Apajuí wakega dutiksag niina aentsji aidaunak segatu asamtai.

**Jisukristu anempau asa ashí  
utugchatan depetkatnume  
tusa yaimpaji**

<sup>28</sup>Jutii Apajuí aneen aidautik, ii pujutjin ashí nagkaetama duka pegkeg-num yaijata nunú dekainaji. Nunú

aidautik Apajuí yaunchuk anentaimas midau atinme tusa ipaamu ainaji. <sup>29</sup>Apajuí jutii niini kajintsá anentaim-sagtin aidautinak yaunchuk emtika waipakuí, nunú aidautin etegtamjauwai mina Uchig Kristua imanuk atinme tusa. Dutijamau asa niina Uchijinak, niina yachi, umayí kuashat aina nuwig ni iwai atí tiuwai. <sup>30</sup>Dutika yaunchuk anentaimas midau atinme tibau aina nuna etegjauwai. Ni midau atajum tama ayú tiaju aina nuna atumek pegkeg ainagme tiuwai. Nunú pegkeg ainagme tibauwa nuna Apajuí pegkeg emakuí, wijai pujuinak pegkegnak iwainmamtinme wi pegkejaitag imannak tusa.

<sup>31</sup>Ashí wi tajim nuna anentaimsa diisan tajai: Apajuí jutiiin ayamjutpak, nuigtú yaimpau asamtai pachiatjsi iina shiwaji kuashat ainakuishkam, wagki dekas pegkegchau awajtamkatatus wakegaina duka, jutiinak ayatak pegkegnumap yaimpainawa, tau asan. <sup>32</sup>Apajuik makichkish sujijamtasuk ni Uchijin awetugmauwai ashí jutii tudaujin mantamnati tusa. Apajuí ni Uchijin awetugmauwa dutiksagkeap dekaskenum ashí pegkeg aidaun jutiiin sujamsatatus wakekauwa nunash wakesampap sujamsatnaita tusaish dekainaji. <sup>33</sup>Jutii Apajuí etejamu aidautinak, makichik aentskesh Apajuí emtin iina pegkegchaujin etsegtugmakush, makichkish bakugmashtinai, wagki Apajuíya duke iina pachipas, juka pegkeg ainawai tujamau asamtai. <sup>34</sup>Jutii Apajuí etejamu aidautinak, makichik aentskesh suwimkan jukitnume tujamainuk shiig atsawai, wagki Kristu Jisus jutiiin mantamdao asamtai. Tujash nuna nagkaesau Jisukristuk Apajuí inankim aneantu asa, yamaik Apajuí untsujiin dekas eme anentsá diitainum pujusá, Apajuin aujtugmaji. <sup>35</sup>Jutii Apajuí etejamu

aidautinak, wajig iina nagkaetaminta nuniakush, Jisukristu iina anempa nuna datumtijamainuk makichkish atsawai. Waitiamukesh, utugchatkesh, waitkag-mainakugkesh, yapajamukesh, mamua-mukesh, ishamainkesh, jaamukesh makichkish Jisukristu iina anempa nunak datumtijamait sui. <sup>36</sup>Dutiksag Apajú chichamen agagbauwa nui jutiin pachipas:

“Apajuiyah, jutiik aminu asaja, tuké puyatjumainnum pujuinaji mantamata tuidau asagmatai; uwig mautainum jukí ematiama numamtuk awajtamainawai”, tawai.

<sup>37</sup>Ashí nunú aidaunum tikima senchi waitiajinchakam Jisukristu anempau asa yaimpaktatji, ashí utugchat ataish depetin atí tusa. <sup>38</sup>Wika junak shiig dekau asan tajai: Jaamukesh, iwaaku pujamukesh, nayaimpinmaya aents aidaukesh, iwanch wakan pegkegchau senchigtin aidaukesh, ii yamai pujag nuwiyagkesh, atak atina dukesh Apajú jutiin anempa nuna datumtijamainuk makichkish atsawai. <sup>39</sup>Nunisag agkajunum batsamas inamin aidaukesh, nugká batsamas inamin aidaukesh, nugká initken batsamas inamin aidaukesh, nuniachkush ashí Apajú najankamu aina nuwiyagkesh, Apajú jutii anempa nuna datumtijamainuk atsawai. Apajuik ii Apuji Kristu Jisusan awetugmauwa duwi iwaintugmakui, iina senchi anempamujiya nuna.

**Apajú mina aentsug  
atinme tusa etegkamu aidau**

**9** <sup>1</sup>Jisukristun dekaskeapi tinu asan dekas tajai, Wakaní Pegkeji mina anentaimtija dushakam dutiksag tujutu asantai. Aatsa dekaskea nuna dekau asan, <sup>2</sup>shiig kuashat wake besemag dekapeakun anentaijun tuke idagmas-

nuké ajai. <sup>3</sup>Mina yatsug aidau, mina ubag judío aidau senchi aneamunum, wajukanuk yapajintaitkuig wi Kristui kanakan, Apajú suwimkajin wi juwai, dita dekas wi wajukeyag junin wajasaja tajai. <sup>4</sup>Ditashkam Israel aajakua nunú wegantu asag wijai betek ainawai, Apajú midau atí tusa etegkamu asag. Ditak Apajú mina uchig atinme tusa anentaimtusbau ainawai. Ditanak Apajú niina imanjiya nuna iwaintukajui. Ditajai Apajuik chichaman apakuí. Ditan susajui chicham umiktinun Moisés agajua nuna. Ditanak Apajú wajuk emematjitnime tusa wakegawa nunashkam shiig ujakajui. Ditanak Apajú atumnak kuashat yaigtinaitjime tusa anagkuauwai. <sup>5</sup>Ditashkam ii muunji Apajú etegkamu jutii uyujtamkatin aajakajua nu wegantuk ainawai. Nunú ii muunji aajakajua nui Jisukristuk egkemak aentsmaga akiinauwai. iKristui ashí wájí aina nuna diyauk, niyayi Apajuik, nigki tuke ememattai atí! Aatus atí.

<sup>6</sup>Apajú chichamega duka, mina pataag dekaskeapi tuinachu asantai umintsuk juwaktin asagkesh aniatsui, ashí Israel wegantu ainag nuwiyatik Apajú diismak ashí betek etegjichbau ainaji. <sup>7</sup>Nunisag ashí Abraham wegantu aina nuwiya aidautik, Apajú diismak ashí betekak Apajú aentsjig ainatsji, wagki juna Apajú Abragkan tiuwai: “Dekas ame wegantu atina duka Isaaka uchijin akiinkau agtainai”, tusa. <sup>8</sup>Juwi dekainaji, Abraham wegantu asaikish Apajú aentsji ainatsug duka, ayatak Apajú ni Uchijin anagtabauwa nuanuí kajinas anentaimaina nunú dekas Apajú aentsjig ainawai. Apajú diismak nunú ainawai dekaskenum niina aentsji aidauk, nuigtú Abraham wegantu aidauhkam. <sup>9</sup>Apajú Abragkan anagkuak tiuwa duka juuwai: “Tikich mijantin ataktú tajuattajam duwi, Sara uchiji ajittawai.”

<sup>10</sup>Jushakam anentaimtustajum, iina muunji Isaac aajakua duke aajakú Rebeca jimagma uchigmakbau aajakajua nuna apají. <sup>11-12</sup>Nunin aig Apajú ni wakegamujin uchin etegkauwa nunak nunisag atí tau asa, Apajú tiuwai: “Iwaiya nunú ekeuwa nuna umigkatnai”, tusa. Nuna Apajú tiuwa nunak, uchik eke akiinainatsaig, nuigtú pegkejan pegkegchauwa nunash takainatsaig tiuwai. Aatus Apajú etegkeamua duka uminui, ni wajuk wakegawa nunisag, uchi takainamujin diijis dutikachui. <sup>13</sup>Dutiksag agagbaunmash: “Jacopan aneakun, Esaunak dakitajai”, tawai.

<sup>14</sup>Ashí wi tajim nuna anentaimas diisag, Apajú makichkin etegkeak, tikichin idaya nunak pegkegchaunap takawa taushkam amainai. Tujash makichkish Apajúik pegkegchaunak takachui. <sup>15</sup>Apajú Moisesan chichajak: “Wika, wi wakegamujun wait anenjatnaitjai”, tiuwai. <sup>16</sup>Apajúik nunin asa aents etegtuati tusa wakegaidau asamtaigkish etegkeatsui, numiachkush niina shiig awajkatatus senchi takau asamtaigkish etegkeatsui; Apajúik nigki nagkami ni aents wait anenjata tabaujiya nuna wait anentawai. <sup>17</sup>Nunisag Apajú chichame yaunchuk agagbauwa nuwishkam dekamti-jamji. Nu agagbaunum Apajú Egipto apujin chichajak: “Wi aminak apu emamjame, atum dutikashminun atumi nugkemin iwainakun, wi shiig senchigtinaitag nunak aents aidaun iwaintukta tau asan. Nuna dutikattag nunak ashí aents nugkanmaya aidaush mina dekajuatnume tabaunum dutikattajai”, tibus awai. <sup>18</sup>Nuaduú dekainaji Apajúik ni wakegamun wait anenta duka. Tuja aents intimkiti tusa wakegakush dutiksag intimikawai.

**Apajúik judío aents aidaun tuja  
judiuchu aents aidaunash  
wait anentawai**

<sup>19</sup>Tujash atum tujutmainaitjume: “Apajú ni aatus nuna dutikayatkush

¿wagka aents pegkegchauw takaagtaish anmainchau aniagme tusash tawa? ¿Ya Apajú wakegak dutikaunash, aikawaipa tumainaita?” <sup>20</sup>Atum nunin anentaimutigmin tajime: “Makichik aentskesh Apajúin: ¿Wagka jusha jutikame?”, tudaimainuk atsawai. Duwe jukí ichinak najanamush, aentsun pempeentuki: “¿Wagka juní najatuaume”, tumainkaih? Nunak makichkish tumaitsui. <sup>21</sup>Aents duwen takauwa duka, ni wakegamujin diisá najanmainai, nunú duwea duwik amamuk jistatin takastinun najanak, tikichnak ichinak wainka takastinun najanmainai.

<sup>22</sup>Nunin asantai ame Apajúijai tudaimainuk makichkish atsawai. Ni Apajú wakegakug aentsun suwimkan suwak niina senchijin iwainakta takug dutikmainai. Apajú, aents suwimkan juinak megkaejatin aina nuna emamkes dakastatus wakegakush dutikmainai. <sup>23</sup>Apajúik aatus emamkemas aentsun dakak, niina imanji anentai jegagmainchauwa nunak iwainmamui. Nunak ni aents wait anenjata wakejubauw aina nunú wait anentamunum dutikawai. Nunú aidaun Apajú wijai pujustinme tusa wakegauw asa, niina imanji tuke atina nui pujustinme tusa emtikak etegjauwai. <sup>24</sup>Dutikamuw aina nuwiyag jutii ainaji. Jutiinak Apajú midauw atinme tujabiuw asa niinu etamkajui. Tujash jutii ainag nuwiyag, imá judío ainag nuwiyagkek ainatsji, atum judiuchu aentsw aina nuwiyatigmeskham ainagme. <sup>25</sup>Juna pachis yaunchuk Apajú tiuwa nuna, Apajú etsegtin Oseas agagbaunum:

“Yaunchkeshw mina aentsjuchuw aajakúw aidaunash: ‘Mina aentsjuitme’ titinaitjai, duwikish aneeshtaijua nuna: ‘Mina anetajú’ titinaitjai”, tawai.

<sup>26</sup>Junashkam Apajúw tibusw Oseas agajui:

“Nunú nugka nui Apajuí: ‘Atumek mina aentsjuchu ainagme’, tiuwa nu nugkanmag batsatunak makichik tsawantai:

‘Atumek, Apajuí tuke pujuwa nuna uchijí ainawai’ tama atinaitjume”, tiuwai.

<sup>27</sup>Nuigtushkam Isaías ii muunji aajakajua nuna tiuwai Israel aidautin pachipas: “Israelan uchijí wegantu aidauti shiig kuashat nayantsa kamatkajija ibau ainakuishkam, ayatak wajumketi ayamjuka uwemtikjamu agtinaitji, <sup>28</sup>wagki Apuk, ni tibaujiya nunak waamak ashí nugkanum umiktatui”, tiuwai. <sup>29</sup>Nunak Isaiasa duke makichik tsawantai nuniktinun yaunchuk nagkaemakiuwa nunin ema junash agak:

“Apu ashí senchigtina nu, jutiin wait anenjamjachuitkuig, yamaikiuchia juwik Sodomamaya aentsun,

Gomorranmaya aents aidaujai ijinauwa numamtuk awajam amainaitji.

Tujash nigka wait anenkagtau asa, jutiiní akiina yujaktina nuwiyana iwaaku pujustinme tusa idaisawai”, tiuwai.

**Apajuí dutikamua nuwi aents kajinas anentaimaina nuna, Apajuik pegkeg ainagme tawai**

<sup>30</sup>Ashí wi tajim nu anentaimsa diisaik, judiuchu aidauk Apajuí emtin pegkeja iman wantinkatasag kakanmamjachu aina, nunap Apajuí diisag pegkeja iman diisajuita tumainaitji. Ditak Apajuí dutikamujija nuwi kajinas anentaimaidau asag pegkeg diyaam asajui.

<sup>31</sup>Tujash mina pataag Israel aents aina

duka, chicham umiktin aina nuna ausajui umiktatus wakegaidau asag, nu nuniamunmas Apajuí pegkeg diigmasajainta tuidau asag. Aatus kakanmamainakush chicham umiktina nuwiyanak egaidau asag, nunú chicham umiktina nu yayijatmainjig atsuju asamtai, Apajuí emtinig pegkeg diyamak asachajui. <sup>32</sup>Tujash ¿Wagka nunash nunikajuita? Nunak Apajuí dutikamujija nuwi kajinas anentaimtsuk, dita takasbaujin Apajuí emtin pegkeg diyaam atasag wakegaidau asag nunikajui. Nunidau asag Kristuk dita diismak kaya tukumká iyaumain tutitag aama numamtuk aajakuí. Niina dakituidau asag, aents jintá kaya pujaun tukumama numamtuk wajakajui. <sup>33</sup>Aatus Apajuí chichame agagbaunum Kristu pachis Apajuí tibau tawai:

“Shiig puyatjusum antuktajum, wi Siognum<sup>b</sup> apusattajai makichik aentsun,

kaya aputua jega jegamkatasa atsumtayama numamtin atinun.

Nunú kaya nunak kuashat aents tukumak iyajagtinaí.

Tujash nuanuí kajinas ekeemsajui aidauk

dita kajintsá anentaimtusbaujinak makichkish wainkag juwakchatnai.”

**Apajuik ashí aents Jisukristui kajinas anentaimaina nuna pegkeg ainawai tawai**

**10** <sup>1</sup>Mina yatsug, ubag Kristui dekaskeapi tiu aidauwah, wika mina pataag Israel aents aidau dekaskeapi tuinatsu nunú uwemjatnume tusan senchi wakegau asan Apajuinash senchi aujtuinajai. <sup>2</sup>Wika ditanak shiig wainin asan tajai: Ditak Apajuí

**b 9.33:** “*Sión*” tawa duka: 1. #Jega Apajuí ememattai Jerusalén aajakua nuna tawai. 2. #Yaakat Jerusalegkan pachisashkam tawai.

umigkagtatus kakanmamainawai, nuninayatak Apajuinu dekaskea nuna shiig dekainatsui. <sup>3</sup>Ditak shiig dekainatsui, Apajuish niina emtin aents pegkeja iman, bakumamainchau wantinkati takush utugkeawa nunak. Ditak, chicham umiktina nu umiktasa kakanmabaunum Apajuí emtin pegkeg diyaam atajai tau asag, Apajuí pegkeg atinnes tusash wajuk dutikawa nunak dakituinak pachikchajui. <sup>4</sup>Apajuik yaunchkek chicham umiktinnak susajui nuna umiagtai pegkeg ainagme titatus. Tujash duka Kristu tauwa duwi nagkamas chicham umiktina nuna umiagtai, pegkeg ainagme titag tiuwa duka nagkankauwai. Yamaik ayatak Kristu dutikauwa nuwig kajinas anentaimaidau pegkeg ainagme tama agtatui, tiuwei.

<sup>5</sup>Chicham umiamunum, Apajuí pegkeg diiyam amaina nuna pachis Moisés juna agajui: “Aents chicham umiktina nuna imatiksag umiauk, nu umiamua duwik tuke pujutnai” tusa. <sup>6</sup>Tujash Apajuí dutikamua nuwi kajinas anentaimaidaun, Apajuí pegkeg diiyá nuna pachis agakug tawai: “Makichkitigmekesh wainkajum: ‘Yanak aents nayaimpinum wamainun wakata’, tiag tusagmek tiigpajum” tawai. Nunú aaja anentaimainakuik, “Tina uwemtijamjatin Kristu yakí pujau wajuká nugká itawagmi”, tumaina nunin asamtai. Tujash Kristuk nugká tauwai. <sup>7</sup>Nuniachkugmesh makichkitigmekesh wainkajum: “Yaki jakau aidau batsamtain akaikia tiigpajum” tawai. Nunú aaja anentaimainakuik, “Aents jakau batsamtainum Kristu pujau jegají, jukí iwakagmi” tumaina nunin asamtai. Tujash Kristuk aneantui. <sup>8</sup>Nunú Apajuí chichame agagbau tawa duka dekaske, duka aatus tawai: “Apajuí chichame etsegbau atumek antuku asajum, wajuk

Apajuí chichamen antukag tumainuk atsugtamjume, wagki atumi wenimin adaibaunum, atumi anentaimin anentaimaunum awai”, tawai. Nunú chichama nuuwai, jutii pachisa etsejuinag nu. Nunú chichamak, Apajuí dutikauwa nuwi kajintsá anentaimainai tawai. <sup>9</sup>Ame tikich aents aidau ujaakum: Jisusai mina Apujuk, tusam kajintsam Apajuiyap Jisusnak jakau aidanumayanaish inankiuwaita takumek uwemjau atinaitme. <sup>10</sup>Ayatak Jisukristui kajintsá anentaimtamunum Apajuik pegkeg ainagme tujamji. Tuja, Jisusak mina Apujui, tabaunum Apajuí uwemtijamainai.

<sup>11</sup>Aikasag Apajuí chichame agagbauwa nu: “Ashí aents niini kajinas anentaimaidau dita kajintsá anentaimtusbaujinak makichkish wainkag juwakchatnai” tawai. <sup>12</sup>Nunak jutii judío aidautin, judiuchu aents aidanumashkam betek taku tawai, wagki Apuk makichkiuchi ashí aents aidau Apujiya duka. Nigka shiig pegkeg senchigtina ibau asa, ashí aents aidanum yaimainai. Nunin asa ashí ya niina segawa nunak shiig anentus yayawai. <sup>13</sup>Duka agagbau: “Ashí aents Apu Jisukristun uwemtijugta tusa segauk, uwemjagtin ainawai”, tawai. <sup>14</sup>Tujash aents juna taush amainai: ¿Wajuk segatnumki uwemtijugta tusash, Jisukristui kajinas anentaimainachush? Tuja ¿Wajuk niinish kajintsash anentaimsatnumki, chicham ni pachisa etsegbau antukchajua aniaush? ¿Nuigtush wajuk antukinmegki niina pachis etseju atsa aniaish? <sup>15</sup>¿Wajuk etsekatnumki Kristu pachisa etsekkata tusa awemachbau aidanum? Apajuí chichame agagbaunum: “Tikima shiig pegkejai, chicham pegkeja nuna pachis etsejak taa duka”, tawai.

<sup>16</sup>Aents nuna aatus tuidaunak, wika aatsan tumainaitjai: Kristu pachis chichagkagtuktinuk aentsuk awemamui, tujash aents nu chichagkagtamun



antukaja nuwiyag ashí betekak dekaskeapi tuinatsui. Dutiksag Apajuí etsegtin Isaías yaunchuk pujujakua dushakam anentain idagmas: “Apuh, jutii chichagkagtamun antukaja nuwiyag imaanik dekaskeapi tauk atsawai”, tiuwai. <sup>17</sup>Nunú dekamtijamji, chicham etsegbau antuka Jisukristui kajintsá anentaimat nagkamna nuna. Tuja nunú chicham antamua duka, Jisukristu pachisa etsejuinamu antag nuuwai.

<sup>18</sup>Tujash wi iniastajime: Nunash ¿dekaskek chichamnash antukchaju aina, tikich aidau antukchaji tuina nunash? iDekaskenum antukaju ainawai! Wagki Apajuí chichame agagbauwa nuwig:

“Chichamak ashí nugkanum etseggamui”, tawai.

<sup>19</sup>Ataktushkam iniastajime: ¿Dekaskek mina pataag Israel aidau dekaachu aina tikich aents tuina nunisag? Duka nuninchauwai. Dekatkauk Moisés yaunchuk pujujakua nu jutii Israel aents aidautin pachipas Apajuí tujabaun agak tujamui:

“Israel aentschau nu nugkanmag batsamchau aidau yayakun atumnak akasbau emattajime.

Atum aents dekachu aidau tajum nuna yayakun kajentikattajime”, tiuwai.

<sup>20</sup>Dutiksag Isaías Apajuí etsegtujakua dushakam, uminkatnun pachis Apajuí tibaun tutupit tiuwai:

“Aents mina egatú wajakchau aidau, waitkaju ainawai.

Tuja aents mina pachitus iniimjutú wajakchau aidanum, iwainmam-kauwaitjai”, tusa.

<sup>21</sup>Junashkam Apajuí jutii Israel aents aidautin pachipas:

“Ashí tsawantai dakasjai mina aentsug intimkiu ai aimtau aina nuna,

wajukag pujutjin yapajiwajawa nunikagmatai shiig anentsan jukiag tusan”, tiuwai.

**Israel aents aina nuwiyag niini  
kajinas anentaimaidaun  
Apajuí etegkauwai**

**11** <sup>1</sup>Nuna Apajuí tujamiuwa nuna anentaimtusan tajime: ¿Apajuish niina aentsji Israel aidautinash idaitamsau asamtaig, tikich aents aidau, Apajuik idaisauwai tujamain aina? iDuka nuninchauwai! Wagki witjai Abraham wegantu, Israela uchijí Benjamín aajakua nu wegantu asan, Israel aents aina nuwiyag. <sup>2</sup>Apajuik jutii Israel aents aidautinash yaunchuk, juka midau atinme tusa etegtamjau asa, ni aentsji aidautinash idaitamsachui. ¿Atumek eke dekatsjumek Apajuí chichame agagbaunum, Elías Apajuí etsegtin aajakua nu, Israel aents aidau pegkegchau dutikamujin Apajuin ujaak: <sup>3</sup>“Apuh, chichamjumin etsejin aidau ashí kajekgag, ame altarjumash yumpuajag, wiki juwakmatai minashkam mantuatatus aintuinawai”, tiuwa duka? <sup>4</sup>Tama Apajuí ayaak: “Wi siete mil aents mina umigtin aidau ayamjukun uwemtijajai, apajimtai Baal tutaya nuna eme anentus tikishmatug ememat-chaju aidau”, tiuwai. <sup>5</sup>Yamaishkam nunisaik wajumketi juwakji jutii Israel aents aidauti, Apajuí wait anenjamag, jujú uwemkatnume tusa etegjamu aidauti. <sup>6</sup>Nunú wait anenjá etegjamu aidautik, jutii pegkeg takasbaujinig etegjamu ainatsji, wagki aents pegkeg takasbaujin diigsá etegtaiyaitkuig, Apajuí wait anenkagtutaijig atsumainai. <sup>7</sup>Nunin asamtaish ¿wajintu anentaim-tumainaitji? Ashí Israel aents aidauti Apajuí emtin pegkeg wantinkagtasajutiik kakanmamajakú aidautik nuwig jeganchau ainaji; tujash wajumak Israel

ainag nuwiyatin Apajuí etegjamu ainag nuutí Apajuí emtinig pegkeg wantinkaju ainaji. Tuja nuniai ashí tikich aidaunak ditá anentaimtaji yapajitnash wakegainachu asagmatai, Apajuishkam dutiksag wakegainakush makichkish yapajin-mainchau agtinme tusa idaisauwai.

<sup>8</sup>Juna pachis Apajuí chichamen agagbaunum:

“Apajuí, Israel aents aidaunak ditá wakaninia egamujinak anentaimtuja dekaachmin emakui, dutikamu asag yamaikish nuninuk ainawai, jiinish wainmachua nunin, antuinakush antakchauwa nunin atinme”, tawa nunisag.

<sup>9</sup>Aikasag Apu David aajakua nu agagbaunmashkam:

“Dita shiig aneasa juwakta tuinamua duke ditanak, iwagtukbau dawenum jigká emetmaina numamtuk awajkat-  
nume.

Nuniachkush suwenum jigká maumaina numamtuk wajainak suwimkan jukitnume.

<sup>10</sup>Ditá anentaimtajinish aents jiin bushapaju asa shiig wainmatsama numamtuk shiig antumainchau wajastinme, nuninak ashí dita waitiamujin aents kijinun yanakí punus wekae-maina numamtuk tuke waitin atinme”, tiuwai.

**Apajuí judiuchu aents aidaunash uwemtikui**

<sup>11</sup>Ashí jutii Israel aidautinun pachisan tija nuanuish ¿Wajintu anentaimtumainaita? ¿Mina pataag aidautigmin pachipas kaya tukumtayama numamtuk wajakaje tawa nunash, numamtuk Apajuijaish tuke tupagkiaju asagminig tikich aents aidaush tujamainait?

iMakichkish nunikchauwai! Mina pataag Israel aents aidaun intimainak Kristun dakituidau asagmatai, Apajuí atum judiuchu aidautigmin uwemtijamtan nagkabauwai. Nuna dutikak Apajuik mina pataag aidaunak akasmatjukti tusa wakegawai. <sup>12</sup>Nunú mina pataag aidaun intimkimunum, Apajuí ashí aents judiuchu aidaun pegkegnum yaitan nagkabauwai. Dutikau asa: iDekasenum mina pataag aidaun ashí Apajuin umijiagtaik, aan nagkaemas pegkegnum yaigtinai!

<sup>13</sup>Nuaduí atum judiuchu aidautigmin tajime: Apajuí minak judiuchu aidaun chicham ujaktá tusa awetiuwai. Nunin asamtai wi takaag junak, Apajuin see takun shiig aneasan takaajai. <sup>14</sup>Wi judiuchu aidaunum aatus takaamun wainainak, mina pataag aidaush Apajuí akasmatchajaintash nuninak wajumkesh uwemjatnume tusan wakegajai. <sup>15</sup>Mina pataag judío aidaunak Apajuí idayak, nigki ashí aents judiuchu aidauijaish epegtuniauwai. Nuna aatus dutikauwa nuniau asa, makichkish anentaimtusaish tumainchaun ashí aentsdaun pegkejan dutikatnai, Apajuí ataktú mina pataag aidaun niina aentsji emaktina duwi. Dutikamu asa jakau ataktú nantamaina numamtuk wajakagtinai. <sup>16</sup>Ajak nagkamchak nejekaja nuwiya juuká Apajuí suwaji. Nunú dekamtijamji ashí juuktatag dushakam Apajuinua nuna. Aantsag Apajuinun pegkejan takastajai tusa ajak ajaamua dushakam kagkapesh, kanaweshkam ashí Apajuinuk ainawai.

<sup>17</sup>Nunú ajaka nuna kanawe aidaun wajumak tsupija utsagka, ikamia numí kanawe jukí dekas ajaknum ikakmau asa, nuna kagkapienian puwajin juwa numamtuk, Apajuí awajtamkaje atum judiuchu ainajum nuna jutii judío ainag nujai. Apajuí wajumak mina pataag aidaun idayak atum judiuchu ajuminig

wait anenjamjaja duwi. Dutikamu asajum Apajuí duwik ashí pegkeg aidaun Abragkan ashí ni wegantun anagkauwa dushakam ditajai betekak jukiagtin ainagme. <sup>18</sup>Apajuí dutijamawaju asagmatai atum judiuchu aidautig-mek, mina pataag judío aidau nagkaesau pegkeja iman anentaimtumasjum ememaigpajum. Atum imá pegkeg anenmamkugmek adeagtajum, ikamia numi kanawe jukí ajaknum ikakmauwa nuwiyanak ajaka nuna kagkapeg puwajinak jumait sui. Ajaka nuna kagkapanian puwajinak ikamia numi kanawe ikakmauwa nunú juwawai.

<sup>19</sup>Atum anentaimsagmek: “Tujash Apajuí judío aidaunak ajaka kanawe nejeashkuí, tsupika ajaptayama numamtuk ditanak utsagkuajama, jutiin ajaknum ikamaina numamtuk awajtamak”, tumainaitjume. <sup>20</sup>Dekaske, ditak Kristu dekaskeapi tachamunmag dutikam asajui, tujash atumek imá kajintsá anentaibauwa duwik uwemtikamu ainagme. Dutikamu asajum emematsuk dekas ayatak kuitamamkatum. <sup>21</sup>Mina pataag judío aidau dekas ajaka nuna kanawega numamtin aina nuna, kanawe tsupika ajaptayama numamtuk Apajuí awajkauwa nunin asa, atum ikamia numi kanawe ajaknum ikakmauwa numamtin ainajum, nunutijum ni umigchamak pegké idaitamsattagme. <sup>22</sup>Apajuí ashí dutika nu anentaimtustajum. Nunú ni dutikama nu dekamtijamui nigka shiig wait anenkagtina nuna, nuigtú pegkegchau takaakjuminig suwimkan amastatjime tibaujinash betek umina nunashkam. Apajuik mina pataag judío aidau tupanjamu asa ditan idaisauwa duwi iwainmamkauwai ni pegkegchau takaakjuminig, suwimkan amastatjime tibaujinak betek umina nuna. Atum judiuchu aidautigminak Apajuí ni wait

anenkagtamujin iwaintugmainawai. Nunak atumek Apajuiyai kajintsá anentaimekujum pegkeja duke takaakjum pujuagtai, Apajuí tuke wait anenjabiagti tusan tajime, nuniachkugmek numi kanawe tsupika ajaptaya numamtuk awajam aijum tusan. <sup>23</sup>Tuja judío aents aidaushkam dita dekaskeapi tuchataijiya nuna idayagtaik, numi kanawe tsupika ajapamu jukí duwik aajakbaunmag ikamaina numamtuk awajkagtinaí. Apajuik nunak dutikmainai, wagki shiig senchigtina ibau asa. <sup>24</sup>Atumek judiuchu asajum ikamia numi kanawe tsupika jukí, dekas ajaknum ikashtai aig ikamaina numamtuk Apajuí awajtamkaje, niina aentsji aina nui ijumjamak. Aan nagkaemas Apajuí mina pataag judío aidau ajak pegkejan kanawega iman aina nuna, ataktú niina aentsji aidaujai ijumjatnai. Numi kanawe tsupikbau aajakú ataktú niina numijinig ikamaina numamtuk awajkattai Apajuí mina pataag judío aidaunak.

#### **Apajuí niina aentsji Israel aidaunak uwemtijatnai**

<sup>25</sup>Yatsug, ubag Jisusa nemajin aidauwah, Apajuí dutikatnuijin yaunchuk anentaimtusbau dekachbau aajakua nuna dekaatajum tusan wakegajai ememaikum tusan. Mina pataag Israel aina nuwiya Kristuwai kajinas anentaimeinachu asagmatai, atum imá pegkeja iman dekapmamijum tusan tajime. Wajumak mina pataag Israel aidau Jisukristui kajinas anentaimeinachu asagmatai, Apajuí machikish kajinas anentaimeinachu emakui. Nunisag batsamas yaunchuk Apajuí judiuchu aina nuwiya midau atinme tusa emtika wainkamuiji aidau ashí niinig kajinas anentaibau tsawan jegatna nuna ejeyagtinaí. <sup>26</sup>Nu nunikmatai ashí Israel aidaunak Apajuí

uwemtijatnai, nunú pachisa agagbau-num:

“Agkanmitkagtinuk Sión yaaktanum taa,

Jacopa uchijí wegantu aidau pegkegchaujina utsankatnai” tawai.

<sup>27</sup>Juna pachis chicham agagbaunum Apajuí:

“Jujuwai wi ditajai yamajam chicham umigdaikatnun dutikaitaitag duka, ditá tudaujin tsagkujatnaitag nu”, tawai.

<sup>28</sup>Yamaikishkam kuashat mina pataag judío aidauk yamajam chicham etsegbauwa nuna dakituidau asag, Apajuí shiwaji ainawai. Nunak atum uwemjatnume tabaunum nuninawai, tujash Apajuik ditanak etegkau asa aneawai, jutii muunji anagkuauwa nuna anentaimtus. <sup>29</sup>Apajuik shiig yupichu dutikmainun anenjauch sukagtusbaujiya nunak awakchawai, tuja aents ni etegkamuji aidaunash dakitjag idaichawai. <sup>30</sup>Atum judiuchu aidautigmek yaunchkek Apajuí chichameg umigchau aajakuitjume, tujash yamaik mina pataag judío aidau Apajuí chichamen umijuinachu asamtai, Apajuí atumin wait anenjamjaje. <sup>31</sup>Atum umijakchawaitjum nunisag yamai kuashat mina pataag aidau Apajuinaku umijuinatsui, nuniagtai Apajuí atumin wait anenjamjaje. Apajuí umijuinachbau asa idaisauwa nunak, atumin wait anenjamjauwa nunisag mina pataag judío aidau Apajuí wait anenjata tau asa dutikauwai. <sup>32</sup>Apajuik ashí aentsnak umigtukchatnume tusa idaisauwai, nunikagmatai ashí ijumag wait anenjata tau asa.

<sup>33</sup>iApajuí dutikamua duka shiig muuntai, ni yachajiya dushakam nagkanmait sui! iNigka ashí wainnai,

Apajuí anentaimtajiya nuna wajuk dutikattawa, wagka dutikattawa, itugkatasaya dutikattawa nuna anentaimtug ejemainuk makichkish atsawai! iNi takaamujish anentaimtuja ejeyi dekgmait sui! <sup>34</sup>Juna taja juka Apajuí chichamen agagbauwai: “¿Ya dekgmainaita Apu anentaibaujinash, nuniachkush, ya ju jutikata tusash jintinmainaita? <sup>35</sup>¿Ya yaunchkesh Apajuinash makichik wajiinash susauwaita minash aikasag sujüstí tusash?” tawai. Makichkish atsawai. <sup>36</sup>Ashí ni najankamu aina duka Apajuí aatus wakegau asamtai ainawai, nunú aidauk ashí ni shiig aneastinji ainawai. Nunin asamtai: iAshí imá Apajuinaku tuke ememattinme! Aatus atí.

#### Yamajam pujut

**12** <sup>1</sup>Yatsug aidauh, ubag Jisusa nemajin aidauwah, Apajuí wait anenjamjau asagmatai atumi iyashmik Apajuí susatajum, Apajuí anentang sutaiya numamtuk, tusan segajime. Nunikjum imá nigki umigkujum, ashí ni wakeja duke imatiksagmek takaakjum pujustajum. Jutiik nuní Apajuik umigmajin ainaji. <sup>2</sup>Atumek aents Apajuí nemagchau pujuina nujai betekak pujusaigpajum. Imá pegkeg Apajuíyai idaimamsatajum, nigki anentaimtagmin yapagtugmak, pujutjumnash yapagtugmatnume. Dutijamawagmatai dekaattagme Apajuí wakegamujiya nu, pegkeg aidau, Apajuin shiig awagma nunú, nuigtú Apajuí pegkeg atinme tusa dutikauwa dusha wajuku amainaita dushakam.

<sup>3</sup>Junak Apajuí wait anenjug chicham etsekgata tujutiu asamtai, ashí atumin tajime: Atumek tikich aidau nagkaesau anenmamigpajum. Duka nunitsuk ayatak atum dekaskenmash wajuku ainagme nuwig anentaimtumastajum,

atum kajintsá anentaibaunum Apajuí shiig yupichu dutikmainun anenjauch sujamsamu ajutjamaina nunisjumek.

<sup>4</sup>Jumamtinai: Iina iyashig makichkitak kuashat akanjamu ajawai, tujash makichik takata nunakek takainatsui.

<sup>5</sup>Anmamtuk jutiish, Jisusa nemajin aidauti kuashat ainayatku, Kristui ijunainakuik makichik iyashia nunin wegaji. Makichik iyashnumiag kuashat akanjamua nu pempentunisag atsumdayina numamtuk, makí makichkiti tikich aidaujaish pempentunisaik atsumdayinaji.

<sup>6</sup>Makí makichik aidauti yupichu dutikatnun, Apajuí ni wajuk susatjai tiuwaita dutiksag anenjauch amasajua, dutiksaik dutikawagmi. Ni Apajuí tabaujin yupichu etsegтанum anenjauch susamuk, wajuk Apajuiyaish kajintsá anentaibauijish awa, dutiksag dutikmainai. <sup>7</sup>Tuja tikich aentsun yain atí tusa Apajuí wakegat susamuk, dutiksag shiig yaimainai. Apajuí yupichu jintinkagtuati tusa susamushkam, dutiksag jintinkagtumainai. <sup>8</sup>Aantsag anentai ichichkagtin atí tusa Apajuí yupichu dutikatin susamuk, nunisag ichichkagtugi. Aents atsubaun yaigtí tusa Apajuí wakegat susamushkam, wakegas dutikati. Kristu nemagnun apuji aidaushkam shiig puyatjus takastinme, aents waitiaun wait anentauskam aneas dutikati.

#### **Kristu nemajin aidau umimainji**

<sup>9</sup>Tikich aidaujaish dekaskenum pempeentunikjum aneenitajum, dekas aneeniachiatkujum aneeninau wajukmaina nunitsuk. Pegkegchauwa duka shiig dakitakjum, pegkeja duke wakejusjum takau atajum. <sup>10</sup>Yatsut Kristu nemajin aidaujaig senchi aneenitajum. Nuigtushkam pempentunisjumek ajantusa niiniakjum aan

nagkaemas ajantusa niiniamu iwaintuniktasajum kakanmamtajum.

<sup>11</sup>Senchi kakanmamsatajum Apajuí wakejusa takagsata tabaunum, dakik aigpajum.

<sup>12</sup>Shiig aneasjum pujustajum atum jukitin dakakjum pujau asajum. Waitiakjumesh Apajuiyaig emetmamjajum pujustajum. Apajuiishkam tuke aujsagmeké atajum.

<sup>13</sup>Jisukristu nemajin aidau atsumamuji waitkugmek, yaigtajum. Aents amina ijagtsamstatatus minakuishkam, shiig anentsam awayata.

<sup>14</sup>Aents waitkagmainakuish, Apajuí yaigtí tusajum segattajum. Pegkegchau chichagtsuk ayatak Apajuí yaigtí tusajum segattajum.

<sup>15</sup>Aents shiig dakunkut pujaujaig, atumshakam ditajai dakujustajum, untsu aents waituinak buutuidaujaig, atumshakam ditajai ijuntsajum buuttajum.

<sup>16</sup>Tikich aidaujaish eme anendaisajum niinistajum. Ememau aigpajum. Aantsagmek takatnumash betek yaimkatakajum. Tikichin nagkaesau yacha imanuk anenmamigpa.

<sup>17</sup>Amina pegkegchau awajtamaidaush dutiksamkek iikaipa. Duka nunitsuk, ashí tikich aidaush pegkejai tuina duke dutikatasajum kakanmamsatajum.

<sup>18</sup>Senchi kakanmamsatajum, ashí tikich aidaujaish utugchat akuish, epegtunijum shiig agkan pujusta tabaunum.

<sup>19</sup>Aneetaig yatsug aidauh, ubag aidauwah, atumkek iikmakaigpa, Apajuí idaitusta ni suwimkanak susati. Aatus Apajuí chichame agagbaunum: “Witjai aents tikichin pegkegchau awagbaun suwimkan suwaunuk, nunin asan aents pegkegchaunak wi suwimkan susattajai”, Apu Apajuí tiuwai. <sup>20</sup>Atum dutikmainaitjum duka, Apajuí chichame agagbaunum:

“Amina shiwajum yapajakuish  
yutai ajamsata,  
kitamakuishkam umutaish  
ajamsata.

Ame aajam dutikamin,  
amina pegkegchau awajtamin asa  
datsagtatui”, tawa juuwai.

<sup>21</sup>Makichkitigmekesh pegkegchau  
takatnumag idaimamsaigpa, pegkeg-  
chauwa duka dekas pegkeg takaakjum  
depetkatajum.

### Apu aidau umigkatajum

**13** <sup>1</sup>Ashí jutiik apu aina nui  
sumimain ainaji. Makichik  
apukesh nigki nagkami: Wi apu atajai,  
tusa apu weuk atsawai. Ashí apu aina  
nunak Apajuí apu emakui. <sup>2</sup>Nunin  
asamtai nunú apua nui sumimtan  
dakitudauk, Apajuí apu atinme tawa  
nuna shiwagmainak nuninawai. Nuna  
dakitauk suwimkan jukiagtin ainawai.  
<sup>3</sup>Apu aina duka aents pegkejan takaidau  
ishamkati tusaik adaikashbau ainawai,  
untsu pegkegchau takaina nu apunak  
ishamainawai. Apu ishamkats pujusta-  
sam wakegakmek, shiig pujustá.  
Nuniamin apu aidaushkam eme  
anenjamam chichagtabiagtatui. <sup>4</sup>Ditak  
pegkeja nuna takastinme tusa Apajuí  
apusamu asag, aminak pegkegnum  
yaimpamainai. Untsu ame pegkegchau  
takaakmek, dekas apuk ishamainaitme.  
Wagki apuk, wainak suwimkan  
sukagtusti tusaik adaikashbau asag,  
pegkegchau takaina nuna suwimkan  
suwau asamtai. <sup>5</sup>Pegkegchau takasbau-  
num suwimkan sujusai tamawaikik  
apuk umigmaitisui. Nunitsuk jutiik apu  
umigmainuk dekaidau asaja dutiksaik  
umigmainai. <sup>6</sup>Nuaduí apunu kuichik  
atin tibauwa dushakam dutiksagmek  
suwajume, apu aidauk Apajuí takat  
susamua nuna umiinak Apajuin takajui-  
dau asagmatai.

<sup>7</sup>Makí makichkitijum dutikmain aina  
juka betek dutikatajum, wajuk  
akikmankati tibauwaita dutiksagmek  
akikmaktajum, tikich nugkanum waji  
aidau jukí wayaamunmash, wajupa  
akikmakta tujamtatua duka dutiksag-  
mek akikmaktajum, apu aidaush eme  
anentsajum ajantusjum diitajum.

### Pegkegchau takat idaikujum tikichjaish aneenitajum

<sup>8</sup>Makichik aentskesh diwimkaigpa-  
jum, diwimkagtukmesh akikmatskek  
idaisaigpajum. Imá makichki diwimkag-  
tamu akikmamainchauk, pempeentuniki  
aneenita nuuwai. Nuaduí diwimkag-  
tamu akikmamainchau asamtai akikmá  
pujumaina numamtuk, tikich aidajaisih  
pempeentunikjum tuke aneenitajum.  
Wagki tikich aidau aneamua duwi  
chicham umiktajum tibauwa duka  
uminu asamtai. <sup>9</sup>Apajuí chicham  
umiktajum tiuwa duka: “Tsanijina-  
waigpa, magkagtuawaigpa,  
kasamkaigpa, tikichdauk wakeju-  
kaigpa”, tawai. Nuigtushkam kuashat  
tikich aidau umimain awai. “Amek  
anenmamsam tikich aidaushkam  
aneeta”, tawa nunú imatiksaik umiamu-  
num, ashí chicham umiktinum tawa  
duka uminui. <sup>10</sup>Aents aneenit ajamuk,  
tikichnak pegkegchaunak takagmaitisui.  
Nuniau asamtai chicham umiktajum  
tibau umiamua duka, aneeniamua  
nuuwai.

<sup>11</sup>Nunin asamtai jujú tawa duka  
umiktajum. Wagki atumek degagme  
Kristu juwi taatnuji tsawantak namput  
wajaschae, jutii yama Kristu nemagkau  
aayag duwik imá dukap aayi. Tujash  
yamaik tsawantak tikima shiig jegawai,  
Apajuí uwemtjamjatna duka. Nuniau  
asamtai atumshakam kajinkagmek  
batsamigpajum aneaku batsamsatajum.  
<sup>12</sup>Kristu juwi ataktú tataik, kiyag au

tsawauwama numamtuk wajaktinai. Nuaduí pegkegchau aidau takaakjum suwenum wekaemaina numamtuk wajainajum duka idaisatajum. Suntag aidau tsawai maaniatatus wegak maanitaiji aidaun juki maania depetmaktatus uminama numamtuk umintsatajum, Apajuí wakega duke takaakjum. <sup>13</sup>Nuaduí yamai nagkamsaik shiig pujusagmi, aents tsawai wegagu shiig diis wekaemaina numamtuk. Ijunag yuwinamu wekaetusjum ayatak yuwa yuwakua wegakjum nampet batsamtajum duka idaisatajum, iyashnum takanit tunamatja pujugtash, jiyanit yujagku tikichdau diigsá iish imanuk atajai tukamá kajegtashkam. <sup>14</sup>Duka nunitsuk, Apu Jisukristu nemagkaju aidaush wajuk pujumaina ainawa nunisaik pujuinaku, iina iyashí pegkegchau takamtikta dushakam idaikuja, Apajuí wakeja duke umijuinaku pujusagmi.

#### Yatsut chicham patatmainchau

**14** <sup>1</sup>Tikich aidau Kristui shiig kajinas anentaimainachu asag: Juna dutikaknuk pegkegchauwap wemainaitja, tuidau wainkugmek, atumesh nijai betek anenmamsam shiig antugkatajum, dita tuina nunú pachisjum jiyansuk. <sup>2</sup>Awai aents: Yutái aidaunak ashí yumainaitjai tuidaush, nuniai tikich imatikas Kristui kajinas anentaimainachu asag nejenak yuwina-tsui, nuninak ayatak ajakmamunmayanak yuwinawai. <sup>3</sup>Nuniau asantai ashí yutai aidaun tinamag yuwina duka, tikich nuna yuwinachunash dakitmai-tsui. Nunisag ashí tinamag yuwinatsu dushakam chichamnuk patatmaitsui tinamag yuwina nunak, wagki Apajuí nunú aidaunak ashí niina aentsji emaku asantai. <sup>4</sup>Nunin asantai Apajuí ina nuuwai shiig takataish, tuja shiig

takashtaish, tumaina duka, nunin aish žamesh ya asamea tikichi takagna dusha chichamash patatú wekaemainaitme? Apajuik senchigtina ibau asa niini kajinas anentaimaidaunak shiig pujustinme tusa yayamu asag pegkeg-num iwainmamkagtatui.

<sup>5</sup>Tikichnashkam titajime: Aents tsawantan mamikis puyatjus diyau awai, nuniai tikich aidauk: Tsawantak ashí betekajama tuidaush ainawai. Makí makichik aents aidauk dita tsawantan wajuk anentaimtuinawa nunak dita anentaimtusbaujiya nunisag emetmam-jati. <sup>6</sup>Makichik aents tsawantan mamikia: Wika jujú tsawantin Apajuin ememattajai, takug betek umiktí, nuna dutikak Apajuinak ememattatui. Nunisag ashí tinamag yuwina dushakam dutikatnume, nuna dutikainak Apajuinak ememattatui, wagki Apajuin see tusa yuwidau asag. Ashí tinamag yuwinatsu dushakam dutikatnume, nuna dutikak Apajuinak ememattatui, wagki ditashkam Apajuin see tusag yuwidau asag.

<sup>7</sup>Wagki jutiik iik shiig awagmamkata-saik pujatsji, jaakuishkam shiig awagmamkatasaik jainatsji. <sup>8</sup>Nuaduí iwaaku pujakuik Kristu shiig awajkata tabaunum pujuinaji, jaakuishkam Kristu shiig awagmainaji. Nunin asaja iwaaku pujakuish, jaakuishkam imá Kristunuk ainaji. <sup>9</sup>Wagki Kristu maamuitak ataktú nantakuwa nunak aents iwaaku aina nuna, nuigtú jakau aidaunashkam Apuji wajastatus nunikui.

<sup>10</sup>Nunin asantai tikich aidau amijai betek Kristu nemajuina duka, amek Apajuik shiig umigtsume tumaitsugme, nuigtush amijai betek Kristu nemajuina duka wainkaya nuninuk anentaimtumai-tsugme, wagki ashí aents aidautik Apajuuyai tuwaká ajin ni tujamtin asantai.

<sup>11</sup>Wagki agagbaunum chichaak:

“Witjai dekas tuke pujuunuk’,  
Apajuí tawai.  
Nuaduí ashí aents aidauk,  
tikishmatjujag emematjuinak:  
‘Ametme dekas Apajuimek’,  
tujuiagtinaí.”

<sup>12</sup>Ashí jutii aidautik makí makichik iina  
Apajuí inimpakui, wajuk takasuitji  
dutiksaik ujaktinaitji.

**Tikich Kristu nemajuidau  
pegkegchau awajkaig tusa  
kuitamamain  
(1 Cor. 8.1-13)**

<sup>13</sup>Nuaduí pempentunisaikik: Amek  
Apajuik shiig umigtsume, tudaimaitsui.  
Dekas ayatak kuitamamkatajum amina  
tudau etamainchauwa nunin diisam  
takaamugmin tikich Kristu nemajui-  
dauk: Juka tudau wemainapi, tuinaya-  
tak ame takaamun waipaku asag,  
niishkam dutiksag takakmá tudau  
wemaina duka takasaipa. <sup>14</sup>Wika  
Kristujai ijutkau asan dekas nunina  
nunak shiig dekajai, makichkish yutai  
aina duka pegkegchauchui. Untsu  
makichik aents ashí tinamjá yuwamuk  
pegkegchawai takug imá niinigki  
nuninuk. <sup>15</sup>Makichik yatsut: Juna  
yuwaknuk tudauwap wemainaitja tusa  
anentaimtamú ame yuwamin waipak,  
anentaimak waitmaina duka dekas  
yuwawaipa, nuniachkumek anejatkum  
nuniatsme. Yatsum nuna waipak,  
niishkam dutiksag takakmá tunamag  
Apajuiyai tuke kanaak kanamaina  
nuninuk dutikawaipa, Kristu niinishkam  
mantamdau asamtai. <sup>16</sup>Nu atum: Ju  
yutai yuwakuish tudauk wemaitsuapi,  
tayatkugmesh yatsut Apajuin tupanmain  
wainkugmek idaisatajum, nuna diis  
tikich aidau pegkegchaun chichagtam-  
kainum. <sup>17</sup>Apajuí jutii pujutin inajata  
nunak, wájí yuwaji, wájí umaji  
nuniajinkish dutikatsui. Nunak Wakaní

Pegkeji jutiinií puja nu yaimpasmatai  
pegkeg takaaku, agkan tikich aidaujaish  
shiig epegtunia pujaku, dakujusa pujag  
nuna inajatui. <sup>18</sup>Juna ashí imatiksag  
Kristu wakejamun umidaauk, Apajuin  
shiig awagmainawai. Nunidau asagma-  
tai, tikich aents aidauk pegkeg ainawai  
tumain ainawai.

<sup>19</sup>Nuniau asamtai ashí tikich  
aidaujaish agkan pujuinaku, pempentu-  
nisaik Kristuwai kajintsá anentaimat  
ichichtunimainaitji. <sup>20</sup>Apajuí aentsnum  
pegkejan dutikauwa nunú, yutanum  
utugchat apujmaunum wainkaya nunin  
juwakai tudau asaja. Dekaskenmag  
ashí yutai aina duka pegkeg ainawai,  
untsu pegkegchauwa duka aents ju  
yuwamuk tudauwapi tayatak yuwa  
nuuwai. <sup>21</sup>Nuaduí dekas nejek  
yumaitsume, umutaish nampemain  
kajiauk umumaitsume, nuniamin  
yatsum waipak, niishkam dutiksag  
takakmá pegkegchau we tau asam.  
<sup>22</sup>Ame: Wika ashí yutai aidauk  
kajintsan yumainaitjai, tame duka  
Apajuí emtinish pegkejai. Aents juna  
yuwanush pegkegchawai wemaitsuapi  
tusa anentaimtutsuk yuwaushkam, shiig  
aneas yumainai. <sup>23</sup>Tujash utujimiatak  
yuwa duka, nigki suwimak jumainnak  
egatmamui, wagki juka tudauk  
ekagtumaitsuapi tusa kajinas anentai-  
mas yuwachu asa. Ashí jutii dutikamu  
aina nunú: Pegkegchawai ekagtumai-  
tsuapi, tusa kajintsá anentaimtsuk  
dutikamua duka tudauwai.

**Tikich Kristu nemajuidauk pegkeg  
diiyamu aina duke dutikatajum**

**15** <sup>1</sup>Nuaduí jutii Apajuí wakega  
nunú shiig dekau aidautik, iík  
shiig aneasta tabauk egatmamtsuk,  
tikich aidau Apajuí wakegamun eke  
dekainachushkam shiig jintinmainaitji.  
<sup>2</sup>Nuniaku tikich Kristu nemagkau



aidaush shiig awajkatasa wakemainaitji, pegkegnum yayaku ditash Kristui kajintsá anentaimtanum ichichmamjatnume tusa. <sup>3</sup>Wagki, Kristukesh imá nigki shiig awagmamkatasag wakekachui, Apajuí chichame yaunchuk agagbauwa nui: “Apajuiyah, aents amina pegkegchaun chichagtamaina nunak, mina tujutuinaawai”, tawai. <sup>4</sup>Wagki yaunchuk Apajuí chichame agagbauwa nui agakbauwa duka, jutiin jintinjamatin asamtai agakbauwai. Nunú chichama nujai ichichmamku, emetmamsa pujamunum Apajuí dakamuk ajutkagtawai. <sup>5</sup>Apajuí emetmamja pujutan sukagtak ichichkagtina nu atumnash yaimpaktinme shiig anendaisa batsamtanum, Kristu Jisus jintinjamawajua nunisjumek pujusminjum. <sup>6</sup>Nuniakjum ashí betek ijuntsajum, Apajuí, iina Apuji Jisukristu Apajiya nunú ememattajum.

**Judiuchu aidau yamajam  
chicham ujakbau**

<sup>7</sup>Nuniakjum pempentunisjumek shiig anendaisajum judaitajum, Kristu atumin Apajuin ememattinme tujamu asa, shiig aneas jujamkiajua nunisjumek. <sup>8</sup>Juna tajime: Kristu Jisusak judío aidautin yaimpaktatus tauwai, Apajuí iina muunji aidau anagkuauwa nuna umiktatus. Ni nuniak iwainakui Apajuí ni anagkagtua-mujinak betek umina nuna. <sup>9</sup>Nuigtushkam Kristuk tauwai, judiuchu aidaush Apajuí wait anenjamu asag, ditash Apajuin ememattinme tusa, agagbaunum:

“Nuaduí Apajuiyah, wika judiuchu aidaujai ijuntsan amina emematkun, daagmin pachisan kantamjuatjame” tibauwa duwi.

<sup>10</sup>Tikich agagbaunum tawai:

“Judiuchu aidautigmesh, judío Apajuí etegiamu asag Apajuí uchijí aina nujai dakujustajum.”

<sup>11</sup>Nuigtú tikich agagbaunmashkam:

“Ashí aents judiuchu aidautigmeshkam Apajuí emematkujum, ni imanjiya duke pachisjum chichas-tajum”, tawai.

<sup>12</sup>Tuja Isaías agakshakam:

“Isaí wegantunmaya atinai, ashí aents judiuchu aidaunmash inamjatnuk, nunitai ashí aentsuk imá niinak jintan niimjusagtinaí”, tiuwai.

<sup>13</sup>Apajuí niini mijamsuk dakatan sukagtina nu, atum dekaskeapi tautigminak shiig dakunkut pujutan amaak, shiig agkan anentaimsa pujutnashkam amastinme. Dutijamainak Wakaní Pegkeji senchijiya nujai shiig senchi wakeesa Apajuí dakamaina nunash sujamsatnume.

<sup>14</sup>Mina yatsug aidauh, ubag aidautig-meshkam, atumek pegkeg takaakjum tikich jintinmainush dekau asajum, pempentunisjumek chichagdaimain ainajum nunak shiig dekajai. <sup>15</sup>Nunia-yatkun ju papiin agatjime, dekaskenum atum dekamtikata tabau ajuta nuna, tuke aneakuk atinme tau asan. Apajuí minak wait anenjuju asa, <sup>16</sup>judiuchu aidaush Kristu Jisus pachisam ujaktá, uwemjatnume tusa awetiuwai. Tibau asan yamajam chicham Apajuinua nuna judiuchu aidauunash ujaajai. Wakaní Pegkeji ditai takau asa pegkeg emakam, tudaugtuchu pujuinakuí, Apajuí anentang suwamu pegkeja iman, Apajuí emtin ditanash pegkeg iwainakta tau asan.

<sup>17</sup>Nuaduí wi Apajuí takaju asan eme anenmamainuk ajutui, Kristu Jisusan pachisan chichagkagtag duwi. <sup>18</sup>Wika tikichdaunakesh pachisan chichatsuk, Kristu judiuchu aidaush Apajuin umigkatnume tujutiua nunak chichagkagtakun takasmajai. <sup>19</sup>Wakaní Pegkeji senchijin aents dutikmainchaunash

iwainajan takaakun, Jerusalén nagkamsan etse etsekgawan Iliria nugkanmash Kristu pachisnuk ashí etsejajai. <sup>20</sup>Aajan wika wekaesan takasjai, tuwí Kristu pachis etsekgachaje nuwi, wagki tikich etsekgamunum wisha nuwig pataká chichagkagtutnak dakitau asan. <sup>21</sup>Ju chicham agagbau:

“Uwemtikagtin minawai tabaun aents tikich nugkanmaya tuke antukchaju, nuigtú uwemtikagtinun chichamegkesh pachisa etsegbaunash antuchu aidau imapam antukagtinai, uwemtikagtinun chichame etsegbaunak”, tawa jutiksanuk.

<sup>22</sup>Nuna etsekgun pujau asan, atumin wainkatasan minitá takunush minimain dekapjachmajai. <sup>23</sup>Tujash yamaik juwi takamainuk atsugtau asamtai, kuashat mijadai atumiin minitasan wakegá pujau asan, <sup>24</sup>España wegakun atumin wainkatasan minittajai, nunikan atumin wainkan shiig aneasan nagkaemakui, atum yainkatajum wi wemaina duka.

<sup>25</sup>Tujash yamaikik Jerusalén wegajai, Kristu nemajuidau waituidau yaigtin awa juna ejetuatasan. <sup>26</sup>Junak yatsut Macedonianmaya, Acayanmaya aidaujai, Jerusalegnomia Jisukristun nemajuidau waituina nu yaigmi tusag wakeesag anenjauch ijumjaje. <sup>27</sup>Juna wakegas pegkejan jutikaina junak, mina pataag judío Jisusa nemajin aina nu uwemtan pachisag judiuchu aidau nak ujakaje, dutikamu asag ditashkam mina pataag judío aidau nak dita atsumiagtaik yaimain ainawai. <sup>28</sup>Nuna jukin Jerusalén jegaan, atumaidaun susan ukuakun, España wegakun atumiin minittajai. <sup>29</sup>Wika shiig dekajai, anuí atumiin taattag duwik shiig kuashat Jisukristu yaimpektata nunak.

<sup>30</sup>Yatsug aidauh, ubag aidautigmeshkam, atumek Jisukristu iina Apujiya nu

nemagjume. Nuniau asajum tikich aidaujaishkam pempeentunikjum aneenaajume, Wakaní Pegkejiya nunú yaimpasagmatai. Nunidau asagmin atumin segajime, mina pachittsagmesh Apajuí ajujugsatajum, <sup>31</sup>Judeanmaya pegkegchau aidau batsata nu utugchattan aputugmainnash agkanmitkajuati, tuja anentag ijumjamun Kristu nemajuidau Jerusalén batsataidaun ejetuattag nunashkam shiig anentus jukitnume tabaunum. <sup>32</sup>Wisha Apajuí wakegakuig, shiig aneasan atumiin taan ayamjatjai. <sup>33</sup>Apajuí shiig agkan anentaimesa pujamu sukagtina nu atumjaish atí. Aatus atí.

#### Kumpamkagtau

**16** <sup>1</sup>Iina umayí Febe, yaakat Cencreanum Jisusa nemajuidau batsata nuanuí, niishkam dita atsumiagtai yaimna nuna awemag nunú, <sup>2</sup>Jisukristu nemajin asamtai, shiig anentsajum jukitajum. Jisukristu nemajin aidautish utugdaimainaita dutiksagmek, ashí ni atsumakuish yaigtajum. Nigka tikichnash kuashat yainai, nigki minash yaintui.

<sup>3</sup>Priscila, Aquilajai kumpamjutuatajum, wi Kristu Jisusan pachisa etsegtaku wekagai yainkau aina nu. <sup>4</sup>Ditak, mina ayamjutuinauk pujutjin ishamainnum jegantaju aina duwi see tajai, imá wikik see tatsujai judiuchu aidau Jisusa nemagkaju aina dushakam see tuinawai. <sup>5</sup>Tuja niina jeen Jisusa nemajin aidau ijunaina dushakam kumpamjutuatajum, aiksagmek Epeneto mina aneetaijua dushakam, niiyai Acayanmaya nagkamchak Jisusan nemagkauwa duka. <sup>6</sup>María atumin senchi yaimpakua dushakam kumpamjutuatajum, <sup>7</sup>aikasmek Andrónico, Juniasjai kumpamjutuatajum, ditak mina pataag ainawai, nuigtush wijai

betek achinkajui. Ditanak Jisusa jintintaiji aajakú aina dushakam shiig anentin ainawai. Wika eke Kristun nemagtsuk pujai, ditá Kristunak nemagkaju ainawai.

<sup>8</sup>Dutiksamek Amplias, mina aneetaig iina Apuji Jisukristun nemaja dushakam kumpamjutuatajum. <sup>9</sup>Kumpamjutuatajum Urbano, wi Kristu Jisusan pachisan etsejai kuashat yainkauwa nu, tuja mina aneetaig Estaquischakam. <sup>10</sup>Aikasmek Apeles, Kristu dekas takagtusti tibauwa nu, tuja Aristóbulo jeenia aidaush kumpamjutuatajum. <sup>11</sup>Mina pataag Herodiodgshakam kumpamjutuatajum, Narciso jeenia Apu Jisukristun nemajuina dushakam. <sup>12</sup>Aikasmek Trifena, Trifosajai Jisukristu takatjin takainak batsata nu, tuja iina aneetai ubag Pérsida Apu Jisusdaun shiig senchi takasua dushakam kumpamjutuatajum. <sup>13</sup>Nuigtú Rufo, Apu Jisus etegkamua nu, tuja niina dukují minashkam tikima dukujua imana dushakam kumpamjutuatajum. <sup>14</sup>Aikasmek Asíncrito, Flegonte, Hermes, Patrobas, Hermas, nuigtushkam ashí yatsug ditajai ijutkau batsatana dushakam kumpamjutuatajum. <sup>15</sup>Dutiksamek Filólogo, Julia, Nereo, niina umayijai, Olimpaschakam, tuja ashí aents Jisukristu nemajin aidau nijjai ijunag batsatana dushakam kumpamjutuatajum. <sup>16</sup>Atumek pempeentunikjum shiig anendaisajum kumpamdayatajum. Ashí Jisusa nemajin aidau kumpamjamainawai.

<sup>17</sup>Yatsug aidauh, ubag aidautigmesh diiyaku atajum, atum Jisukristu chichame jintinkagtamú antukuitjum nuna yapajiaawag jintinjamaínakuí kanakaijum, nunin aidaujaig atumek ijunjaigpa. <sup>18</sup>Nunú aents aidauk ii Apuji Jisukristunak takajainatsui, dita wakejuinamun tuidau asag, chicham pegkegchi aujuinak shiig tsanuinawai imanís anentaimainachunak.

<sup>19</sup>Ashí dekgatmainawai atum Jisukristu umigjum nunak, nuaduú shiig

aneajai. Nuniau asan utusajag pegkegchaunak takatsuk, aan nagkaemas pegkejan takainak pegkegnumak iwainmamkanum tusan wakegajai, <sup>20</sup>nuniagmin Apajuí shiig agkan anentaimsa pujutan sukagtina nu waamak yaimpaktatjume, iwanchin depetkatnume tusa. Dutijamsag iina Apuji Jisukristua dushakam wait anenjamag yaimpaktinme.

<sup>21</sup>Timoteo, mina takatnum yainta nunú atumnash kumpamjamainawai. Tuja mina pataag Lucio, Jasón, Sosípater aina dushakam aikasag kumpamjamainawai.

<sup>22</sup>Wika Terciowaitjai, wi agajai jujú papiinak, nuniau asan wishakam Apu Jisukristu daajin kumpamjime.

<sup>23</sup>Gayo wi niina jeen pujag dushakam kumpamjamainawai, ashí aents Jisusa nemagkau atsumiagtaish yaina nu. Erastó ju yaaktanum kuichkin kuitamna dushakam, iina yachi Cuartojai kumpamjamainawai. <sup>24</sup>Iina Apuji Jisukristu wait anenkagtutajjiya dushakam ashí atumin ajutjamtinme. Aatus atí.

#### **Inagnaku Apajuí emematbau**

<sup>25</sup>Apajuí emematiagmi, wi yamajam chichama nuna Jisukristu pachisan jintintuauwaitjim nuwig pujustinme tusa kuitamjamaina nunú. Jujú yamajam chicham etsegbauwa juka, Apajuí nugkash najannatsaig yaunchuk dutikatjai tibau dekaachbauwa nuna Apajuí iwainaka nuuwai. <sup>26</sup>Yamai iwaintugmakji Apajuí etsegtin aajakajua nunú agajajua nunak, nuigtush Apajuí tuke pujuwa nuna ashí aents aidauk imá Jisukristunak kajinas anentaimtuinak umigkatnume tibauwa nunashkam.

<sup>27</sup>iApajuí imá nigki yacha, ashí wajiin dekauwa nu emematiagmi Jisukristu daaji pachisa!

Aatus atí.

# PABLO NAGKAMCHAKU PAPI AGAJA CORINTONMAYA AIDAU AWETIMU

## Pablo Corintonmaya aidau kumpabau

**1** <sup>1</sup>Witjai Pabloitjai, minak Apajui Kristu Jisusan etsegtukti tusa wakegau asa etegtua awetiuwai, yatsug Sóstenesjai pujusan, <sup>2</sup>atum Jisusa nemajin yaakat Corinto batsatutigmin papiin agajan awetakun kumpanjime. Atumnak Jisukristu pegkemtijabaijui mina aentsug atinme tusa, ashí tikich nugkanmaya aidaush Jisukristu daajin adayidau asamtai, ditanash, jutiinashkam Apujiya nunú. <sup>3</sup>Ii Apají Apajuiya nu, iina Apuji Jisukristujai wait anenjamag, shiig agkan anentaimsa pujutan atumnash amastinme.

## Pablo Apajui see tabau

<sup>4</sup>Tuke Apajui see tusanké ajai atumin pachisan, atum Kristu Jisus nemajuidau asagmin, Apajui wait anenjamajau asamtai. <sup>5</sup>Apajuik, Jisukristu dekaskeapi tuidau asagmin, ashí pegkeg wakannumia aina nuna amasajui: Ashí chicham dekatan, yachametsnashkam. <sup>6</sup>Dutikamu asajum wi Kristu pachisan atumin jintintuauwaitjim dushakam imanisag juwatjamkajui. <sup>7</sup>Nuniku asajum iina Apuji Jisukristu taatnuji dakakjum batsatjum duwik, Apajui yupichu dutikmaina nuna sujustí tusagmek atsumatsjume. <sup>8</sup>Apajui nigki kuitamjamkattagme, ii Apuji Jisukristu minitta

duwish bakumamainchau agtinme tujamu asa. <sup>9</sup>Apajuik ni anagkagtuamujinak betek umina ibau asa, niina Uchiji Jisukristu iina Apujiya nujai ijutkau pujustinme tusa untsugmakajui.

## Jisukristu nemajin kanainamu

<sup>10</sup>Yatsug aidaauh, ubag aidaauh, iina Apuji Jisukristu wakega dutiksanuk segajime, wait aneasjum makichkia duke chichatajum, tupandaikajum batsamtsuk shiig ijutkau batsatkujum, makichkia duke anentaimtakjum nuní nuninuk anentaimkau atajum. <sup>11</sup>Mina yatsug aidaauh, ubag aidauwah, atum ayatak pampandayá batsatbaun, Cloé patayí ujatkaaju asamtai tajime. <sup>12</sup>Atumek makí makichkitijum chichaakjum: “Wika Pablón nemagnaitjai”, tajumin, tikich: “Wika Apolosan nemagnaitjai”, tai, tikich: “Wika Pedro nemagnaitjai” tuinai, tikich chichaidau: “Wika Kristu nemagnaitjai”, tajume. <sup>13</sup>¿Kristush imaní kuashtak aajakuit? ¿Pablok atumin ayamjutpaktatus numinum achinag mantamdauwait? ¿Nuniachkugmesh Pablo daaji adaisagmek yamimaju ainajum? <sup>14</sup>Wika atumnak yamigchauwaitjim duwi Apajuin see tajai, imá Crisponak, Gayojaig yamigmai. <sup>15</sup>Nuaduí atumek, Pablo yamigbau asan niina nemagjai, tusagmek tujutmain ainatsjume. <sup>16</sup>Nuigtú Estéfanasa

patayinash yamigmai, nuigtuk dekatsjai tikichnash yamijuashitag nunak. <sup>17</sup>Minak Kristuk yamijatjata tusag awetichui, minak yamajam chicham etsegkata tusa awetiü asamtai, aents yachameagbaujin etsejin aina nuniatjsjai, Kristu numinum achijam jakauwa nuna wainkaya nunin diisainum tau asan.

**Apajuí dekatjiya duka aentsú dekatjiiaig betekchauwai**

<sup>18</sup>Aents megkaejatin aina duka, Kristu numinum achinag mantamdauwa nu pachisa etsegbaunash wainak diinawai; tujash jutii uwemkaju ainag nunutinak, chichama duka Apajuí senchijiyai. <sup>19</sup>Ju aaja agagbauwa nui:

“Wi yacha aidaunak yachachu emaktatjai, dutikakun dekataiji-nash emegkatjattajai”, tawai.

<sup>20</sup>Apajuí dekatjiya nu, aentsú dekatjiya nunak imanchauch emae. Dutikamu asa, aents yacha aidau, chicham umiktinash jintinkagtin aidaush, tikichjaish chicham ataish imaakas chichau aidauk wainak juwaje. <sup>21</sup>Nunin asamtai aentsuk niina yachajin Apajuin dekatasag wakekachui, Apajuí niina yachajiya nuna iwainak, aentsuk chicham etsegbaun antukag dekaskeapi tuinak uwemjatnume tibau chicham etsegna nunak, ditak wainkaya nunin diinawai.

<sup>22</sup>Mina pataag judío aidauk wainchatai iwainamun, nuigtú aents dutikmainchau iwainamun wainkatatus wakegainawai, nuninai judiuchu aidauk yacha atatus wakegainawai. <sup>23</sup>Tujash jutiiik Kristu numinum achinag mantamdauwa nu pachisa etsejuinaji, nunak mina pataag judío aidauk pegkegchau diinawai, nuninai judiuchu aina duka, wainak chichama nunin antuinawai. <sup>24</sup>Tujash Apajuí etegja uwemtikamu

judío, griego aina nuwig: Kristuk Apajuí senchijí, nuigtú Apajuí yachajiya nuuwai. <sup>25</sup>Kristu chichame etsegna duka, aents diismak imanchauwa nuninai, tujash aentsun dekatjiya nuna nagkaesauwai. Imanchauchia nunin wantinkushkam, ashí aents senchigtin aidaun anentaimtajin nagkaesauwai.

<sup>26</sup>Yatsug aidauh, atumek aents aidau diismak, yacha wajakin, apu chichame antugtai aina iman, eme anentsá diitai ainatsjum duka dekaamagme. <sup>27</sup>Nunin ainagminig Apajuik, aents yacha aidaun inatsakta tau asa, aents wainkauchia nuna etegkauwai. Dutiksag aents chichame antugtai aidaun inatsaktatus, aents imanchauch aina nuna etegkauwai. <sup>28</sup>Apajuik aents imanchauch anentaku jujú nugka juwig dakitjamu aidaun etegjauwai, aents eme anentai aina nuna imanchau emakta tau asa. <sup>29</sup>Nunak Apajuik, ditak eme anenmaminum tau asa dutikauwai. <sup>30</sup>Tujash Apajuí atumnak Kristu Jisusjai ijupajajui, dutijabau asamtai Kristui iina yachajig, nigki pegkeg etamak, pegkemtijami agkanmitkagbauwai. <sup>31</sup>Nuaduí, Apajuí chichamen chichaak: “Makichik aentskesh emematatus wakegauk, dekas Apu Apajuin ememattinme”, tibau awai.

**Kristu achigbauwa nu pachisa etsegbau**

**2** <sup>1</sup>Yatsug aidauh, ubag aidauwah, wi atumin Apajuinun pachisan ujaktasan tauwaitag nunak, aents yacha shiig jintiag chichaman chichaaku aina imanun iwainmamkatasanak taachbaijai. <sup>2</sup>Wika atumjai pujubiag duwik, tikichnak pachisan chichatsuk, imá Jisukristu numinum achigbauwa nunak pachisan ujakbaijime. <sup>3</sup>Wika ejapeen wajantan atumi emtin chichaktakaman, sapigmakun chichamainchau dekapeakun puyatkan kujaibaijai. <sup>4</sup>Mina

chichamjuk, wi chicham etsegbaushkam, aents yachameagbaujjai tikichin dekas nuninapi tumamtiktatus chichau aina nunitsuk, Wakaní Pegkeji dekamti-jamunum chichagkagtakun, senchijinash iwainakbaijai. <sup>5</sup>Atum Jisukristui kajintsá anentaimauwa nunú, aentsú yachajiya duwi dekamtikamu aijum, dekas Apajuí senchijiya nujai dekamtikamu atinme tau asan.

**Yaunchuk dekachbau aajakua  
nunak Wakaní Pegkeji  
dekamtijamauwai**

<sup>6</sup>Nuniyatku aents yaunchuk Apajuin nemajuk imagnis pujus Jisukristun umijuidauk, jutiishkam kuashat jintiaja ujaaji. Tujash duka jujú nugkanmaya aents aina nuwiya unuimagchamui. Apu inamaina nudaukesh atsui, duka waamak megkaejatin ainawai. <sup>7</sup>Jutiik Apajuí yachají yaunchuk dekachbau uukbau aajakua nu chichaji, nunak Apajuí nugkanash najantsuk ii shiig aneastinjin dutikauwai. <sup>8</sup>Nunak ju nugka juna apuji aidauk makichkish dekaachaju ainawai, nuna dekau ainakug iina Apuji dekas imana nunak achijag maachaju amain ainawai.

<sup>9</sup>Tujash chicham agagbauwa nuanuig:  
“Apajuik niina aneena nudaun umigkauwai, makichik aentskesh wainkachbaun, antutkesh antukchamun, anentaimtutkesh anentaimtuschamun”, tawai.

<sup>10</sup>Tujash jutiinak Wakaní Pegkejiya nu dekamtijamauwai. Wakanía nuuwai ashí shiig ejegag dekauk, Apajuinu makichkish shiig dekamainchauwa nunashkam.

<sup>11</sup>¿Tujash aents aidautikesh wajupatiya tikich anentaibaush dekamainaitji? Aentstik makí makichkiti ii anentaibaujiya duka imá shiig dekainaji. Numam-

tuk Wakaní Pegkejiya duke dekawai Apajuí anentaibaujinak. <sup>12</sup>Jutiik ju nugka juwiya aents unuimaina nu unuimatak ajutjamtsuji, Wakaní Pegkejiya nu jintinjamji, Apajuí wait anenjamag ashí amasbau aina nuna dekaati tujamu asa. <sup>13</sup>Jutii nunú pachisa chichainag duka, aents jintinjamamu unuimagbauk chichatsji, Wakaní Pegkeji jintinjamamu chichainaji. Nunidau asaja Apajuinu pachisaja jintinkagtuinag duka, Wakaní Pegkeji jintinjabauwa duke jintinkagtaji.

<sup>14</sup>Tujash aents wakanin akiinachu aina duka, Wakaní Pegkejiya nuwiya pachisa chichamunak dakituinawai, wainkaya nunin diidau asag, nuigtush antumainchau dekapenawai Wakaní Pegkeji atsugbau asag. <sup>15</sup>Wakaní Pegkeji ajamua duke ashí jintinkagtamunak dekaskeapi tusag dekamainai; tujash nunú aentsnak makichkish nuninchauwai tumain ainatsui. <sup>16</sup>Chicham agagbaunum: “¿Ya Apu Apajuí anentaibaujinash dekagmainaita? ¡Makichkish Apajuí jintinmainuk atsawai!” tawai. Tujash jutiyyaitji Kristu anentaimtaiya nu anentaimkau aidautik.

**Jutiik Apajuí takajin ainaji**

**3** <sup>1</sup>Yatsug aidau, ubag aidauh, wika atumnak Wakaní Pegkeji ajamu kuashat chichagmaina imatiksankek chichagmaitsumjime. Aents Kristun nemagchau aina nujai betekak chichagmainaitjime, atumek Kristu nemagta nuwig uchuchia nunin asagmin. <sup>2</sup>Ayatak jintintuabijime shiig yupichuchin, uchi kuwijuch katsugman yumainchau asamtai muntsu amutiama numamtuk. Wagki atumek yutai katsugmak yumainchauwa nunin asagmin, yamaikishkam nuninuk ainagme. <sup>3</sup>Atumek tikichi pujutí diigsajum kajejagme, nuniakjum

maanitash maaniakjum, tupandaikajum batsatjume. Ju nuniakjum aents nayaimpinum wechatin aina nujai betekak pujutjum yapajitsuk batsatjume. <sup>4</sup>Atum: “Wika Pablon nemagnaitjai” tajumin, tikich chichau: “Wika Apolosan nemagnaitjai” tuinajum duka, eke Kristu nemagchau wajukmaina tu yujagme.

<sup>5</sup>¿Wisha wajimpaitja, Apolosash wajimpaita? Jutiik ayatak Apajuú takajin ainaji, nunin asá jutiik chicham etsegbaunum, atuminish Kristui kajintsá anentaimat ajutjamsajui, duka Apajuú makí makichik dutikata tujabauwa dutiksaik takasaju ainaji. <sup>6</sup>Wi atumin Apajuú chichamen ukakuitjim nunak, ajak ajatiama numamtuk atumí anentaiminig egketuauwaitjime. Wi dutikamunum nui Apolos patagak chichaman ujjapakajua nunak, ajak ajamu yumi jukí ukattayama numamtuk awajtamkajui, tujash Apajuiyai ashí ajakan tsapapauk. Nunin asa nigki atumnashkam Kristuig dekaskeapi tumantijabiuwai. <sup>7</sup>Nunin asamtai ajakan ajau, yumii ajakan ukatjau aina duka wainkayai, Apajuiyai dekas ashí ajakmakbaun tsakapa duka. <sup>8</sup>Wika Apolosjaig mai betekaitjai, nunin asajin Apajuú iina takatjin diigtamas makí makichik akigmaktinai. <sup>9</sup>Apajuú takatjiya nunú takagtanmag Apolosak minak kumpajui; tujash atumek Apajuú ajakji, nuigtú Apajuú jeega numamtin ainagme. <sup>10</sup>Apajuú wait anenjug, Kristu chichame etsegtukta tujutiwa duwi, wika aents jega jeganan yacha jegamkatatus nagkamak shugkú ajiyama numamtuk, wi Kristu pachisan nagkamsan atumnak jintintuauwaitjime. Tikich nui eneniag emainawai, tujash makí makichik kuitamas jegamaina numamtuk, Apajuú chichamenak shiig jintinjamain ainawai. <sup>11</sup>Jisukristu pachisa etsegakmua duka, jega

jegamkatasa nagkamku ajitiama numamtuk awajkamuu asamtai, patakaik tikichik ajimaitsu numamtinai. <sup>12</sup>Nunú jegamkatasa ajiagbauwa nui ekenag aents jegá jegamak, ayatak oroik, dutikashkush kaya pegkeg aidauwai, numiikish, tagkanaikish, dukaikish jegamkamua numamtin aidauk, <sup>13</sup>makí makichik takasbau dekabau tsawan atina duwi, ashí paan wantinjatnai, wajiyaik jegamkamuita nunú. Ashí takasbau aidauk jiiyai apetiama numamtuk dekapemuu agtinai. <sup>14</sup>Tuja jegamkamua nunú esakchamtaig, nuna jegamkauwa duka akiam atinai. <sup>15</sup>Tuja ni takasbauji esagakmuk wainak juwaktinai; nuniaigkish niig uwemjatnai, jega esatai jijnmaina numamtuk.

<sup>16</sup>Atumek dekapemuu jeega nunin asagmin, Wakaní Pegkeji atumin pujugtama nunú. <sup>17</sup>Makichik aentskesh chicham dekaskechun jintinjamawag, jega tegamaina numamtuk awajtamkajunak, Apajuú suwimkan susatnai. Wagki, atumek Apajuú jeega numamtin asagmin, Apajuú Pegkegma nu atumin pujugtamjum nuaduú.

<sup>18</sup>Makichikitigmekesh tsanuam aigpajum. Atum ainajum anuiyatijum, ju nugkanmaya unuimatai aina nu ashí dekauwa iman dekapmamutigmek, dekachua nunin atajum, dekas yacha atasa wakegakjumek. <sup>19</sup>Ju nugkanmaya yachameta duka, Apajuú diismak shiig wainkayai, agagbau aatus tawai: “Apajuik aents yacha aina nuna yachajin ebetjawai, dita dutikatatus anentaimtuina nuna dutikawainum tusa.” <sup>20</sup>Junashkam David agak: “Apu Apajuú diismak yacha aidaun anentaimtajig tikima wainkayai”, tiuwai. <sup>21</sup>Nuaduú makichik aentskesh, tikich aentsun pachisag: Wika nuna nemagnaitjai, tusag ememamain ainatsui. Wagki, jujú aidauk ashí

atumdau ainawai: <sup>22</sup>Wishakam, Apoloschkam, Pedroshkam, nugka dushakam, pujutash, jaamushkam, atum yamai pujajum dushakam, atak atina dushakam. Ashí ju aidauk atumdau ainawai, <sup>23</sup>tuja atumetjume Kristunu aidautigmek, untsu Kristuwai Apajuinuk.

**Jisus chicham etsegtugkata tusa awemamu aidaun takatji**

**4** <sup>1</sup>Atumek jutiik Jisukristun takajin aina nuninuk anenkagtumain ainagme. Jutiinak Apajuí ni duwik anagkagtuamun iwainkagtukchauwa nuna yamai etsegkata tusa awetabiau. <sup>2</sup>Aents tikichin takaja duka, ju dutikata tibauwa nuna imatiksag umiak, kajittsá diyaam amaina nunak iwainmamainai. <sup>3</sup>Apu Jisukristua nu minak awetau asa, nigki mina takatjunashkam, dekask pegkejashit tusa diistatui. Atum mina anentaimjutjum nunak wika pachiatjsai. Dutiksanuk tikich aents aidau mina pachitus chichainakuishkam idajjai. Wikik: Wi dekask pegkejan takasjai, tumaitsujai. <sup>4</sup>Mina pegkegchau anentaimtamu atsugta nuniaigkish, pegkejaitme tamak amaitsujai, tujash mina tujutmaina duka, imá iina Apujiya duke. <sup>5</sup>Nuaduí atumek makichik aentskesh nuniktinai tusagmek tiigpa, ayatak dakastajum Jisukristu juwi taa, suwenum au tsaaptinum jitiamanumamtuk, aentsú anentaimtajin aunak shiig paan iwainakuí wainkatnaitji. Dutika Apajuí makí makichik aentsdaun diijus shiig aneastinjin susatnai.

**Corintonmaya aidau ditak emematmamainamu**

<sup>6</sup>Yatsug aidauh, ubag aidauh, midaun, Apolosdaujai pachisan tajim junak, ditash Apajuí chichame agagbau tawa nuna ewagak anentaimtsuk, jutiinu diis

unuimajagti tusan tajime. Atumin iwaintukmajim nuna tajime, makichkia nu eme anentsá diiyakjum, tikichia nu junik diisaijum tau asan. <sup>7</sup>Atumnash éya tikichin nagkaesau pegkejash etabiae? ¿Apajuí amaschamush wají ajutjamainawa? Ashí Apajuí amasajua nuniaish, éwagka atumek jukiwua nunin anenmamkugmesh ememagme?

<sup>8</sup>Atum anentaimtumasjumek: Jutiik Apajuí chichameg shiig dekaidau asaja, tikich jintinjuati tusaik atsumatsji, tajume. Atumek apujai betek batsatu asajum jutiik atsumkagtatsjume.

Atumesh dekask apu waigkagminig, jutiish atumjai betekak inaamainaitji.

<sup>9</sup>Jutii Kristu chichame etsegtugkatajum tusa ishiakbau aidautik, Apajuí idaitam-samtais mantamnati tusa chichaman umigtamkaje dekapmamaji. Nunin asajin aents ju nugka juwiya aidauk, nayaimpinmaya aents aidauhshkam, wakejumainun iwainakuí diistasa wakejutiamanumamtuk diigmainawai.

<sup>10</sup>Jutiik Kristu aneaku, ni pachisa etsegtamunum anentainkachua nunin diyaam ainaji, tujash atumek Kristu nemajuidau asajum, shiig anentaimkau ainagme. Jutii kakachau ainajin, atumek chicham antugtai ainagme, jutiinak wainkauch diigmainak, atumin eme anenjamask diigmainawai. <sup>11</sup>Yamakishkam jutiik nujantai, kitakaish, nugkumain atsugtamkuish suwinaji, aents aidauh tutitag awajtamainawai, ii emetnaja pujutaish atsugtamainawai.

<sup>12</sup>Jutii uwejenig takai takainakua pimpikiagji, pegkegchau chichagtamainakuish pegkegnumak chichajuinaji, waitkagmainakuish katsuntuinaji.

<sup>13</sup>Jutiin pachipasag pegkegchau chichagtamainakuish, ayatak wait anentsá chichajuinaji. Yamaikish ju nugka juwig ajapamua nunin diigmainak dakitjamainawai.



<sup>14</sup>Junak idatsagtasankesh agattsujime, atumnak mina uchig aneetaig anentsan ichichjatasan agatjime. <sup>15</sup>Atum Kristu nemaju asagmin, diez mil jintinkagtin ajutjamkush apak kuashtak amaitsui. Atumí apanuk witjai, wagki yamajam chicham wi etsegbau antukjum, Kristu dekaskeapi tusajum nemagkau asagmin. <sup>16</sup>Nunin asagmin segajime, wi pujag junisjumek pujustajum tusan.

<sup>17</sup>Nuaduí Timoteo mina uchijua iman aneetaig, Apajuin shiig umigna nuna awetajime, wi Jisusa nemajin asanush wajuk pujuwaitja, nuigtush wajuk jintinkagtinaitja ashí yantamnum wekaesan Apajuí nemajin aidau batsatbaunmash, nunashkam ujpaktinme tusan. <sup>18</sup>Atum ainajum anuiya emebaush ainawai, mina auk atumnak tajutjamashtinai tujutu asag. <sup>19</sup>Tujash wika Apu Jisukristu wakega-kuig wamkes minittajai, nunikan wi anuí taakun dekaattajai, nunú aents ememak tu yujaina dusha dekas Apajuinun takainakpash tuina, atsa ayatak chichainak tuinatsuash nuna. <sup>20</sup>Apajuí jutiin inajata nunak, ayatak chichamaikik inajattsui, niina Wakaní wakega dutiksag takastinme tusa senchijijai inajatui. <sup>21</sup>¿Wají wakegagme, taa suwimkan sujamsati, nuniachkush taa wait anenjamag shiig aajtamsat- nume tajumek?

**Kristu nemagkau pegkegchaun  
takaakuish itugmainaita**

**5** <sup>1</sup>Antukjai atum ainajum anuiya ni dukujimkamujinak tsanijima pujuju tabaun. Duka tikima pegkegchauwai. Aents Kristu nemagchaukesh nunak nuninatsui. <sup>2</sup>Nuniaig atumek ememá batsatjume. Dekas atumek wake besemag batsatkujum, aanú aents dukujimkamujin tsanijima pujuja anka jiikjum awemamainaitjume. <sup>3</sup>Wi

atumjai ijunja pujachkunush wakannu- mag ijutkajai, nunin asan wi anuí pujusan aents nunikun tumainaitag nuna tajai: <sup>4</sup>Atum Apu Jisukristu senchijiya nujai ijuntatjum nuanuig, wisha Apu Jisukristu senchijin mina wakanjuig atumjai ijutkau atatjai; <sup>5</sup>nu aentsuk jiikí ajapeakjum iwanch idaitustajum, dutikam ni nuna iyashin suwimak susam waitiak, pujutjin yapajia Jisukristu minitaiush uwemjati.

<sup>6</sup>Atumek nuninun takau pujaigkik ememasjumek anentaimtumamai- tsugme. Atumek dekagme: “Pag najanatasa nanegbauwa duka, levadura piipich ajuntuamuitak ashí utujá wampushmitkama duka.” <sup>7</sup>Levadura pagkan itugmaina numamtuk, atumin aanú emestamaina duka jiikjum ajapata- jum. Atumek jista Pascuatin pag levaduragtuchu yutaya numamtin tudaugtuchu atajum tusa tajime, wagki iina Pascuaji Kristuk jutiiní mantamdau asamtai. <sup>8</sup>Nunin asamtai ii yaunchuk pegkegchau takajakuitag nunisaik pujusá Kristu ememattsuk, pag levaduragtuchu Pascuatin yujakbauwa numamtuk, dekaskenum emematiagmi.

<sup>9</sup>Wi duwik papiin agajan awetibajim duwishkam, tsanijimtan idayinatsu nujaig ijunjaigpajum tibaijime. <sup>10</sup>Wika junak: Anuí aents Kristun nemagchau aidau tsanijimtan batsamtin, ekagbau, suji, kasa, apajimatasa dakumkamun emematin batsataina nujai tupandaika- tajum, tusanjuk tichabaijime. iWajuk tupandaijatagmeki ju nugka juwi batsamsagmesh! <sup>11</sup>Nunak, Aents Jisukristu nemaju asa: Yatsut ainaji, tayatak pegkegchau takaak, tsanijimta- nak wekaetin, sujitnash suji, apajimtai dakumkamun emematin, tikichin wainak tsanumjin, nampen, kasamin aina nujaig ijunmaitsugme, tusan wika tibaijime. Nunin aents aidaujaig ijunjag-

mek yutakesh yumain ainatsjume.

<sup>12</sup>Wika Apajuí nemajuinatsu nunak suwimak susatajum tumaitsujime. Untsu Jisusa nemajin aidautik, tikich pegkegchaun takainakuig pempeentunikajia suwimkak sudaimainaitji. <sup>13</sup>Apajuí nemajuinatsu nunak Apajuí titatui, nunin asamtai atumiin pegkegchau takau puja duka jiiki ajapatajum.

**Kristu nemajin aidauk chichamnak  
ditak epegmainai tibau**

**6** <sup>1</sup>¿Wagka atumesh, mai Jisukristu nemagkauwaitkugmesh chicham aepjuniagmesh, tikich apu Jisukristun anentaimtuchu aina dusha, ni chichagtamkati tusagmesh wejagme? Dekas aents nunin wejutsuk, atum Jisukristu nemagkau aidautigmek, shiig chichasjum chichamak epegmain ainagme. <sup>2</sup>Ashí Apajuinu aidauk atakea duwi apu waigkag, tikichin diitin ainawai tibau awai. Nunú iman waigtinaitag nuaduí, yamaya juwikishkam chicham imanchau ajutjamainakuig, atumek epegkejajum idaimainaitjume. <sup>3</sup>Jushakam adeagtajum. Jutiik tsawan nagkanakatna duwi nagkamsaik, ii apu waigkaja, nayaimpinmaya aents aidash jutiik diinaku inatin ainaji. Nunú iman aidash dutikatnaitag nunin aish, ¿wagka atumin chicham machik ajutjamkuish shiig atumek epegkeatsjume? <sup>4</sup>Atumek ju nugka juwi maaniamu akuish, aents Jisusa nemagchau aidauk wejumaitsugme ni chichaman epegtuatu tiusagmek. <sup>5</sup>Junak datsamas dekapstatume tusan tajime ¿Atum Apajuí nemajin ainajum anuiyag, yatsut chicham epegtan yachak makichkish atsau asamtaig, <sup>6</sup>mai Apajuí nemagnuk pempeentuniagi, apu chichaman epegkin Apajuí nemagchau aidau emtinish jiyani yujaina?

<sup>7</sup>Atum Jisukristu nemagkau aidautigmek pempeentunikjum maaniajum anka tikima pegkegchauwai. Maanitsuk chicham akuishkam ayatak katsunjá idaimainaitjume. Waitkagmainakuish pachitsuk idaimainaitjume, kasagtamainakuish jukiti tusam idaimainaitjume. Tujash nu aaja idaibauk pegkegchau amaina nuna nagkaesau pegkegchau aniagme. <sup>8</sup>Wi juna tajim juka atumek umitsuk, atum Jisukristu nemagkau ai aidautigmek pempeentunikjum maaniakjum, kasagdaitash imanik kasagdayajume.

<sup>9-10</sup>¿Atumek dekatsjume aents nuna aatus takauk nayaimpinmag wayashtinai tawa duka? Shiig anentaimsajum diistajum pegkegchau takasaijum. Aents tsanijimtanak yujajin aidau, ekagbau aidau, mai aishmagkuk dutikdainushkam, apajimatasa dakumkamun emematin aidash, kasamin aidash, suji aidau, nampenchakam, chicham dekaskechunak tsanumnushkam, tsanumag kasamin aidashkam Apajuí inamtaijinig wayachagtinai. <sup>11</sup>Duwikik atumshakam nuna wi aentsun adaijag numamtinuk aajakuitjume. Nunintigminak atum Apu Jisukristu nemagkagmin, Wakaní Pegkejiya nunú atumin egkemtugmajag pegkeg etabijui. Kristu atumin tudaugminak ajapjupau asamtai, Apajuik atumnak pegkegma iman anentaimtugmajume.

**Iina iyashig Apajuinui**

<sup>12</sup>Ashí waji aidauk takamainaitjai, tujash ashí shiig awajtumain ainatsui, ashí waji aidauk takamainaitjai, tujash nunú depetukti tusanush idaimaimaitsujai. <sup>13</sup>Jushakam: “Yutái aidauk wakenum egkematin ainawai, wakea duka yutai egkematin nuuwai”, tibauwa duka dekaske. Tujash nunak Apajuí mai emegkaktinai, iyashia duka

nuwajai tsanijinati tusaik najanachbauwai, iyashik Apu Jisukristunui, tuja Apu Jisukristu iyashnak ni wakega dutiksag takamtiksatus wakegawai. <sup>14</sup>Apajuí niina senchijinig Apu Jisukristunak inankiuwa, dutijamsag jutiinashkam niina senchijinig inaantamkitnai.

<sup>15</sup>Atumek deka gme, ashí jutii iyashí aina duka Kristu iyashí wegantui. Nuniau asamtai nuwa akiká takatai aina nuninjaig apatdaimaitsuji, ii nuniaku Kristu iyashí jukí, nunú nuwajai apatmaina numamtuk awagmamain asaja. <sup>16</sup>¿Nuigtush dekatsjumek, makichik aentskesh nuwa akiká takatai aina nujai nuwenainakug, makichik iyashkea nunin wega duka? Apajuí chichame agagbaunmash aikasag: “Aents nuwenkujag makichik iyashia nunin wegawai”, tawai. <sup>17</sup>Jujai betekak, Apu Kristun nemajushkam makichik iyashkea nunin wegag, nunú wakannak juwinawai.

<sup>18</sup>Tupanjatajum nuwajai tsanijimat, iyashnashkam pegkegchau etugtamna duka. Tikich pegkegchau aina duka iyashnak imatikag pegkegchau etugtamsui, tujash nuwajai takata nu imatijamui. <sup>19</sup>Atumin iyashmik Apajuin jeega numamtinai, nunin asamtai Wakaní Pegkejiya dushakam atumin pujawai. Nuaduí iyashmia duka atumdauchui. <sup>20</sup>Apajuí ni Uchijí iina ayamjutpaktatus mantamdauwa nuna numpeen sumagmaku asamtai, yamaik niinu ainaji. Iina iyashin takaag duka, ii wakanin takaag nujai imá Apajuik emematbau amainai, ju jimaja juka Apajuinu asamtai.

**Corintonmaya aidau nuwenbau pachisa iniibau shiig ujakbau**

**7** <sup>1</sup>Jukimjai atum mina papí awetugkujum nuwenbau pachisam inintsamujum nunashkam. Nuna pachisnuk

dekas imá pegkejak nuwenmainchau ainawai tajai. <sup>2</sup>Nunimain aig kuashat tsanijinaidau asamtai, makí makichik nuwentin amain ainawai. Nuwashkam nunisag makí makichik aishintin amainai. <sup>3</sup>Aishmag nuwentin aidauk, imá niina nuwejaig tsanimain ainawai; nunisag nuwa aidaushkam, imá ni aishijaig tsanimainai. <sup>4</sup>Nuwa aishidau aina nuna iyashig, ni aishin iyashijai betek we; aishmagkun iyashiya dushakam, nuwe iyashijai betek ainawai. Nunin asag nuwá iyashig aishmagdauwai, tuja aishmagkun iyashí nuwanui. <sup>5</sup>Aishmagkush nuwentin, nuwash aishintin aidauk iyashnum tsanitnumag pempeentunikiajag dakitdaimain ainatsui. Untsu Apajuin aujsatasag mai shiig chichasag, nunikmi tusag, duwi machik tupandaimainai. Nuna nunikajash, iwanchia nu pegkegchaun takamtijusai tuidau asag, wamkes ataktú ijunmain ainawai.

<sup>6</sup>Wika yatsug aidauh, dekas ju umiktajum tusanuk tumaitsujime, ayatak nunimain ainagme tusan tajime.

<sup>7</sup>Wika ashí aishmag aidautigmek, wi nuwenchauwaitag junin atajum tumainaitjime; tujash Apajuí makí makichik wakeetanak anenjauch amasajui, nuwena pujutnash, nuwenchau pujutnashkam; dutikamu asa makí makichik niimtin ainawai.

<sup>8</sup>Tuja datsa, muntsujut, nuigtú nuwa waje, aishmag waje aidaunak, wi nuwenchauwaitag juninuk atajum tumainaitjai. <sup>9</sup>Tujash aents nuwajai takanitsuk shiig pujuschamin deka peauk nuwenmainai, nuwajai takanita nunak anentaimtak waitú pujuig tau asa.

<sup>10</sup>Untsu nuwedau aidaunak idaidai-sainmegka tajai, tujash junak wi tatsujai, junak Apu Apajuí tibaun wishakam tajai. <sup>11</sup>Tuja nuwa aishin

ukuakug nematsuk pujustí, nunimain-chauwaitkug aishijai chichaman iwajug pujustinme; aishmagkuk nuwenak idaimaitsui.

<sup>12</sup>Nuigtú tikich aidaun wi tajai, nunak Apajuí tatsui: Makichik yatsut Kristu nemajin, nuwa Apajuí nemagchaun ayaakuk, nuwa niijaig pujustatus wakeetaig, idaitsuk niijaig pujumainai.

<sup>13</sup>Tuja nuwa Apajuí nemajin, aishi Apajuí nemagchauwaitak niijaig pujustatus wakeetaik ukukinmegka.

<sup>14</sup>Wagki aishmag Apajuí nemagchauwa duka, niina nuweg Apajuí nemajin asamtai, niinashkam Apajuí yaimainai. Nunisag nuwa Apajuí nemagchauwa dushakam, aishmag Apajuí nemajin asamtai, niinashkam Apajuí yaimainai, nuninchau agtaik uchijí aina duka Apajuí nemagchau aina nuninu uchijí amain asagmatai. <sup>15</sup>Untsu Kristun nemagchaujai nuwenamu, idaidsaisami tusa imatjamak idaimainai, nunik agkan juwamainai Kristun nemagnushkam, Apajuik shiig agkan batsamsatnume tusa etegjamu asag. <sup>16</sup>Nuwa Apajuí nemajin aishmag Apajuí nemagchaujai pujakush, nunú yaigmash pujutiin yapajia uwemainashit, duka dekamaitsui. Nunisaik aishmag Apajuí nemajin nuwa Apajuí nemagchaujai pujusash, ni nuwesh pujutiin yapajiash uwemainashit dushakam dekatsji.

<sup>17</sup>Nunin asamtai makí makichikitgmin Apajuí wajuk wakeetan anenjauch amasajuita nunisjumek pujustajum. Atum wajuku pujautigmea Apu Jisus nemagkauwaitjume, duka nunisjumek amainaitjume. Junak wika tikich Jisusa nemajuidaunash ashí ujaajai. <sup>18</sup>Aents uchuchik pakaji ajapjuamu aidaushkam, nunisag pakaji ajapjuamu amainai, tuja ni dutikashbaushkam nuninuk amainai. <sup>19</sup>Wi pakaji ajapjuamuitag jama tusag anentaimtú pujumaitsui, pakaji

ajapjuashbaushkam nunisag: Wi pakagkashmawaitag jama, tusa nunak anentaimtú pujumaitsui. Imá senchi anentaimtumaina duka, Apajuí wakejamu umikta tabauwa nuuwai. <sup>20</sup>Makí makichik aentsuk, ni wajukunak Apajuish mina nemagtukta tusash etegjabi nuninuk amainai. <sup>21</sup>Wainka inaku waitkatai pujautijum Apajuí nemagkauwaitkumek, duka anentaimtú pujuigpa. Untsu ame agkan wemain akuig, duka dekakakanmamsata jiinkitasam. <sup>22</sup>Atum wainka inaku waitkatai batsamin aidautigmin, Apajuí midau atajum tibau aidautigmek, yamaik agkan ainagme. Nunin asajum Apu Kristu wakega duke umiju asajum niina inake wajasugme. Antsagmek agkan pujautijum untsukbau aidautigminash, Apu Kristu inake awajtamsaje. <sup>23</sup>Atumek Kristu niina numpen ukajua nuaduí sumakbau asajum, yamaik Apajuinu ainagme; Nunin asajum Kristua duke umigbaunum aentsú inaku waitkataiya nuninchau ainagme. <sup>24</sup>Yatsug aidauh, ubag aidauwah, atum wajuk pujautigmea Apajuí nemagkauwaitjume, duka nuninuk amainaitjume.

<sup>25</sup>Untsu muntsujut, aishmag datsauch aidau dita chicham umimainji Apu tujutbauk atsgutawai; tujash wi anentibaun tajai, Apajuí wait anenjuju asamtai, imagnisa wekaesan taja juka antugtumain ainagme. <sup>26</sup>Jutiik yamaya juwik tikima ishamainnum pujuinag juniau asá, makí makichik jutii aidautish wajuk pujajiki duka nunisaik pujumainaitji. <sup>27</sup>Amina nuwem akuig idaisaipa. Nunisjumek nuwem atsakuishkam nuwem atinuk egá wekayipa. <sup>28</sup>Tujash ame nuwenbaushkam pegkejai, nuwa agkanjam aishinbaushkam dushakam pegkejai, pegkegchaun takainakug nuniatsui. Nunin aig wi atum nuwenagmek imá

senchi utugchatnum pujakjum waitmain asagmin, dekas nuna tupanjatnume tusan tajime junak.

<sup>29</sup>Yatsug aidauih, ubag aidauih, juna tita tajime: Tsawantak tikijuch wajasé, nunin asamtai nuwentin aidauk nuwenchau pujumaina nunisag pujumain ainawai, nuwen imá senchi uyumak Apajuin takatjin takatsuk idaitsuk. <sup>30</sup>Atum wake besemag pujakjumesh, nuniachkugmesh shiig aneasjum pujakjumshakam, tuja wajijum imá senchi uyumakjumkesh, Apajuí takatjiya duka takatskek idaimaitsugme. <sup>31</sup>Aents ju nugka juwiya takatan takas kuichkin ju aidaushkam, imá nunak takaak Apajuin takatjinak kajimatkiig idaimaitsui, ju nugka juwiya wají aina duka ayatak megkagaidau asagmatai.

<sup>32</sup>Wika wakegajai atumek nuwenat uyumá batsamtigpa tusan, aents nuwenchauk imá Apajuí takatjinak takastatus wakemainai. <sup>33</sup>Nuwenaina duka niina nuwen shiig aneemtiksata tau asa, ju nugkaya takat aina nunak imá senchi uyumainawai. <sup>34</sup>Nuwashkam nunisag ni aishintsuk agkanjam pujakug, ashí ni takaamunak niina pujutjijai Apajuin anagkua, niinak shiig awajkatatus Apajuí takatjiya nunak takainawai. Nunidau aishinawag aishin shiig aneemtiksatus, niina aishi wakejamunak takainak Apajuí takatjiya nunak imatikas puyatjatsui.

<sup>35</sup>Wika junak nuwenmaitsugme tusanuk tatsujime, ayatak pegkegnum yaigtasan, shiig eme anentsá diyaam Apajuish umigmain aminjum tusan tajime.

<sup>36</sup>Aents nawanjintin niina nawanjin: Nawantug tsakajé, nuwena imá shiig pujumainai, takug dekas sujumainai. Duka pegkegchauchui, pegkejai nu dutikamushkam. <sup>37</sup>Tuja tikich aents ni chichaak: Wika mina nawanjunak

aentsnum sujutsuk agkanjaman apusatajai, takug nunashkam dutikmainai, ju dutikamush pegkeg asamtai.

<sup>38</sup>Nawanjin aentsnum sujauk pegkejai, tuja ni nawanjin aentsnum sujatsu nu imá pegkejai.

<sup>39</sup>Nuwa aishidau aina duka aishi iwaaku pujaigkik, aishi idayak tikichjaig aishinmaitsui. Aishi pujaigkik nuwak agkanchawai, untsu aishi jakamtai agkanmagawai, nunik aents ni wakejuniamujaish nemamainai. Tujashkam aents Kristu nemagnujaig, nuninchaujaig nuwentsuk. <sup>40</sup>Tujash wi diismak, nuwa wajemeag ataktuk nematsuk pujak imá shiig aneas pujumainai. Juka wi anentaibauwai, tujash Wakaní Pegkejiya, dushakam jutiksag anentaimu diyajai.

**Apajimtai aidau yutai  
anagkuamush yumainashit  
tusa iniimsamu  
(Rom. 14.13-17)**

**8** <sup>1</sup>Yamai juna agatjime, atum mina ininkujum: Apajimtai aina nunú yutai anagkuamu aina dusha yumainashit, tujutmaujum nuna ujaakun. Atumek juka dekainaji tuinajume. Duka dekaske, dekata duka pegkegchauchui, pegkejai dekatak, tujash dekata duka ayatak emematan sukagtawai. Nunimain asamtai, dekas emematsuk ayatak aneenita nuuwai imá pegkejak, nu nuniamu Apajuin takatjiya nuwish emtikagtau asamtai. <sup>2</sup>Makichik aentskesh yacha iman anenmamuk eke dekatsui, tu dekas dekamainaita nunak. <sup>3</sup>Tujash aents Apajuin anea nunak, Apajuí shiig dekawai.

<sup>4</sup>Yamai anentaimsagmi, apajimtai aina nu yutai anagkuamush yumainashit. Dekaske apajimtai aina duka wainkayai, pujutishkam atsujui. Nigka makichik aentsnakesh pegkegchauk

emamaitsui. Duka dekas Apajuí ainatsui, Apajuiya duka imá makichkiuchi. <sup>5</sup>Tikich aents aidauk: Ju nugka juwig kuashat apajuí ayawai, nayaimpinmashkam imanisag ayawai. Nu imaan apajuí ayau asantai, apu jutiin diigmaku inapa dushakam imanik ayawai, tuinawai. <sup>6</sup>Tujash jutiik dekainaji, imá makichkiuchi iina Apají, iina najapa mayain egketjamak inaantamkiuwa duka. Nuniau asantai iina Apujiya dushakam imá makichkiuchi, duka Jisukristua nunuwai. Ni juwi ashí ayaa nunak najanak, pujutnash suwak, jutiinashkam sujamsauwai. Dutikamu asá iwaaku ainaji.

#### **Aneenitajum tawa dusha wajukuita**

<sup>7</sup>Tujash ashí dekainatsui dekaskea nunak. Wajumak Apajuí nemajin aidau, apajimtai aina nu ememattan unuimat-kaju aajakaju asag, apajimtai yutai anagkuamun dekainayatak yuwinak, ditá anentaimtajin: Apajimtai emematku yuwatsjiash tuidau asag, pegkegchauptap juniaja, tuinawai. <sup>8</sup>Apajuik ii yuwamua nuna diisag imá pegkejak diigmatsui, tuja yutai yuwakuish nuní pegkejak wemaitsui, yuwachkuish nuní pegkegchauptap wemaitsui. <sup>9</sup>Tujash atum agkan anentaimkujum dutikajum nuna, tikich imanis kajinas anentaimainatsu nunú, pegkegchauptap tayatak yuwak tudau weenum tusajum kuitamamkatum. <sup>10</sup>Ame nunú dekyatkm apajimtai ijuntutainum ekeemsam yutaik, makichik yatsut imanis kajinas anentaimtsu nunú waipak, niish nunú apajimtai yutai anagkuamuk yumaitsu nunin aig, nuna wakeejuk yumainai. <sup>11</sup>Ame dekyatkm nuniamin, yatsum Kristui imanis kajinas anentaimtsu nunú megkaemainai, Kristu niinish mantamdau aig. <sup>12</sup>Yatsum shiig dekainatsu nu aaja nuniakjum pegkegchauptap emakju-

mek, atum Kristu tudau takagkujum nuniagme. <sup>13</sup>Nunin asantai wi yuwamujun diis mina yatsug aidau, ubag aidaushkam imanis kajinas anentaimchauptap asag pegkegchauptap wemainaitkuig, nejenak ajumaish yumaitsujai, mina yatsujun pegkegchauptap ejeentaig tau asan.

#### **Pablo ni pujutjin Corintonmaya aents aidau iwaintamu**

**9** <sup>1</sup>Wika Kristu chicham etsegtugkata tusa awemamu asan agkantaitjai, Jisus iina Apujiya nunash wainkauwaitjai, nunin asantai atumesh wi chicham etsegbauptap antukjum, Apu Kristuwai sujumankau ainagme. <sup>2</sup>Tikichik minak: Kristu chicham etsegtugkata tusa awemamuchui tujutuinauwai. Tujash atuminig nuninchauptap, wika dekas Kristu awemamupitja tumamjai, atumek wi chicham etsegbauptap Apu Kristujai ijutkau pujajum duwi.

<sup>3</sup>Mina pegkegchauptap tujutuina nuaduf ayamjumakun juna taja: <sup>4</sup>Jutiishkam yutai, umutai atum sukagtamuk jumain ainaji. <sup>5</sup>Jutiish nuwennaitkuik, Pedron Jisus chicham etsegtugkatajun tusa awemamu, tikich Jisusa yachi aidaujai ditak nuwentin asag, chichaman etsekatagtus mininakush nuweshkam Jisusa nemajin asagmatai, nuwejai miniina anmainaitji. <sup>6</sup>¿Wikik, imá Bernabejaig atumek yaigchamu amainaitag? <sup>7</sup>¿Yaá suntaja ditak akikmakash yu yujaame? ¿Yaita ajakan ajakma nejetaish yutsuk idainush? ¿Yaita uwijan kuitamiatak muntsujin umutsuk idainush?

<sup>8</sup>¿Junash wi aentsun anentaimsanuk taja? ¿Juna pachis chicham umiktina nui tatsuak? <sup>9</sup>Chicham umiktin Moisés agagbauwa nuwig: “Toro trigon dajag pakak wekaga nuna nujig jigkatuawaipa”, tawai. ¿Apajuí toron puyatjau

asag tiuwait, <sup>10</sup>Jutiin pachipas taku tichaukaih? Nunak jutiin pachipas tu agajui. Jushakam anentaimsa shiig diistajum. Aents ajan ajama duka, ajakan juwaa dushakam dekas ajuttatuapi tabauwai takainawai.

<sup>11</sup>Jutiik aents ajakan ajakbau ajamaina numamtuk, Kristu chichamega dushakam atuminig etsegkauwaitji. Nunú chicham antukuitjum nunú atumí pujutjumin esetugmawag pegkeg etugtabiajui. Atumek ju chicham imag jintintuamu ainayatkujum, jutii yumainkesh sukagtuinatsjume. <sup>12</sup>Tikich aidau atumainakui atum yayajum dutiksaik jutiish yayam amainaitji.

Tujash jutiik duka: Yainkatajum tichabiajime, ashí waitiakuish katsunbaiji, yamajam chichaman Kristu pachisa etsegbauwa nuna shiig antumainchau ainum tabaunum.

<sup>13</sup>Atumek shiig dekagme, jega Apajuí ememattainum takaidauk, aents ditá tudaujin tsagkugnagtasag kuntin itaamun maawag altarnum apeenak, nuwiyanak nejeen yuujakú aina duka.

<sup>14</sup>Dutiksag Apu Kristushkam yamajam chichama juna etsejuidauk, nunú chicham etsegbaun antujuina nunú yaigtinme tiuwait. <sup>15</sup>Wika nu tibau aigkish: Yainkatajum tichabiajime, juna agatjim junashkam kuichkin awetugtinme tusankesh agattsujime. Nunin asan wekaesan chichá chichagkagta-kuan nujantai jakachainjash tusanuk segajatchatnaitjai.

<sup>16</sup>Wi yamajam chichama juna etsegkun ememainjuk atsugtawai, wagki juka dekas atsumamu asamtai umikta tabau ajutui, tuja iyamajam chichama nuna etsegsuk idaikunuk, shiig pegkegchaun nunimainaitjai! <sup>17</sup>Wi mina waketajuig takasuitkunuk akiam amainaitjai, tujash Apajuí inatku takau asan, Apajuí dutikata tibauwa nuna

umiakun dutikajai. <sup>18</sup>Nunin asan wi shiig juwamujua duka, yamajam chicham etsegbaunum akijuinatsaig wekaesá takata nuuwai, nuaduí wika shiig aneasan wekaejai, wi chichagbau aidau akijuinachkuishkam.

#### **Yamajam chicham etsegbaunum kakanmabau**

<sup>19</sup>Nuaduí tikichi inataigkesh achayat-kun, ashí aentsun inakega nunin wajasjai, kuashat aents Kristun nemagkatnume tabaunum. <sup>20</sup>Mina pataag judío aidaunum pujaknuk, wishakam nuninuk wegajai, tuja chicham umiktinun umí pujachiatkunush chichama umiina nunin wegajai, ditashkam Kristun nemagkatnume tabaunum, nunak wika Kristu chicham umiktajum tibauwa nuna umiyatkun nuniajai. <sup>21</sup>Antsanuk judiuchu aidaujai pujaknush wishakam nuninuk wegajai, ditash Kristu nemagkatnume tabaunum, Apajuí chicham umiktajum tibauwa nunash umiyatkun, dekaskenmag Kristu chicham umiktá tibauwa nuna umiajai. <sup>22</sup>Aents Kristui imatikas kajinas anentaimtuinachujai pujaknushkam, nuninuk wegajai, ditashkam nunisag Kristun wajumkesh nemagkag uwemjatnume tabaunum. Wi ashí nuniag nunak, wajumkesh Kristu nemagkag uwemjatnume tabaunum nuniajai. <sup>23</sup>Junak yamajam chicham etsegkata tabaunum juniajai, wishakam atak ditajai betek ijunjatasan.

<sup>24</sup>Atumek dekagme, dekapdayamunum tupikainakug ashí betek tupikainayatak, makichik wagaktata nu wajinak juwame. Atumesh nunisjume shiig pujusta tabaunum, waji jukitasa tupikaku wajukmaina imanitajum.

<sup>25</sup>Makichik aents tupikamunum dekapdaisatin akug, kijin aidaun entsakig tupikaumaitsui. Ditak nunak

atsejutai duka kagama nuna jukiagtatus imanin ainawai. Untsu Kristun nemajui-nak kakanmamaina duka, atsejutai atakesh tuke atina nuna jukiagtinai.

<sup>26</sup>Nuaduí wika waji abaunum niiyá jegan jukitatus tupikauwama imaniajai. Nuniau asan mina iyashig pegkegchaun takamtijustatus wakegakuish, aents maanitan yacha, wainak iyatsuk shiig ijuwama imatikajai mina iyashjun suwimkan suwakun. <sup>27</sup>Imatikau asan mina iyashjunak wi depetkin, ni wakejamunak takamtiktuk, wi wakejamunak takamtikjai. Wi chichaman etsejukaikuit-kun, wainka juwakaig tabaunum.

**Israelnumia pachisa Kristu  
nemajuidau jintintuamu**

**10** <sup>1</sup>Yatsug aidauh, ubag aidauh, ashí yujagminum ijam nayants kapantu tutainum katiajua nunú kajimatikijum tusan dakitajai. <sup>2</sup>Nunikagmatai nayants katiamunmash, Moisesjai ijumag yujagkim ijikajui yuminum yamimatiama numamtuk. <sup>3</sup>Nuigtushkam ashí ditak Apajuí yutai nayaimpinmaya awemamun yuwawajui. <sup>4</sup>Tuja umutnashkam kaya muunnumia yumi pukuni jiinkimtai, ashí umujakajui. Kristua duke ditajaiishkam tuke aajakuí, nuniau asa niina Wakaninig dita yujainamunmash uyunajakuí. Nunú kayak Kristun iwainawai. <sup>5</sup>Tujash nuwiya kuashat aidau Apajuin shiig awajkachajui, nunikaju asag uwegshunum jinaa utsankajui.

<sup>6</sup>Nunak jutii iwaintugmak nunikajui, dita waji pegkegchaun wakegajakú aina nunin ainum tusa. <sup>7</sup>Nuaduí atumek dita wajukawajua nunikjume apajimtai dakumkamuk emematigpajum. Nuna pachis agagbau tawai: “Ashí aentsuk yuwinak, umuinak pekaamsajui, nunikag wajajag nantsemawajui.”

<sup>8</sup>Nunin asamtai atumek Pegkegchau Apajuí dakitamuk takasaigpajum, ditak tsanijinainak, nuigtú apajimtai aidaun emematú yujasag makichik tsawantaik veintitrés mil aents jinawajui. <sup>9</sup>Apu Kristush ekajkatag tusagmek wakejigpa. Yaunchuk wajumak aents Apajuí yutai suwamun kajejú yujas, Apajuin ekajek dapí ijinam asajui. <sup>10</sup>Apajuish pegkegchaunmag augmatigpajum. Yaunchuk wajumak aents Apajuí ashishmatú yujakmá, Apajuí awemamu nayaimpinmaya aents ijinam asajui.

<sup>11</sup>Nunú iina muunji nunikajua duka, jutii iwaintugmaji. Nuaduí yamai tsawan inagnamunum batsatainag nunú aidautin, ditash nunikainum tusa anemtijamak agagbauwai. <sup>12</sup>Nunin asamtai atum shiig pujajai tuidautig-mesh kuitamamkatajum, pegkegchau takasaijum. <sup>13</sup>Atum pegkegchau takastasa wakegamu ajutjamkujai nagkaikitasajum waitiajum nunak, ashí tikich aidauh nunisag waituinawai. Tujash imá Apajuiyaij kajinmasjum anentaimsatajum, nigka utugchat atum katsunmainchaunmag waittsati tusag idaitamsachagtatui, ayatak ame utugchatnum jegataish, Apajuí ame wajuk katsunjam nagkaemainaitme nunak amastatui.

<sup>14</sup>Nuaduí aneetaig yatsug aidauh, ubag aidauh, apajimtai dakumkamu emematta duka idaisatajum. <sup>15</sup>Juna tajim junak, atumek shiig antumain asagmin tajime. Juka shiig anentaimsajum atumek dekaatajum. <sup>16</sup>Copanum umutai awa nu, Jisukristu numpe ukaejamunum kuashat pegkeg jukiu ainag nuna iwaintugma nu, Apajuí see tusa umuinakuik, tikich Jisusa nemajuidaujaish ijunsa, Kristu numpe ukagbau-num ashí pegkeg aidau jukiu ainag duke anentaimituinaku nuninaji. Tuja pag puuká yuwinag dushakam, Kristu



mantamnamua duwi uwemat jukiu ainag nu, ashí ijuntsa anentaimituinaku nuninaji. <sup>17</sup>Kuashat aentsuitku makichik paagak ijuntuja puuká yuwinag duka, jutiik makichik iyashkea nunin ainaji tusa iwainmamku nuninui.

<sup>18</sup>Israel aents aidaushkam uwijan maawag Apajuí tudaun tsagkugtamjati tusag altarnum apeenak, nuwiyanak nejen ijuntug yujakaju ainawai. <sup>19</sup>Junak apajimtai aidauk wainak ainatsui, nuniachkush kuntinun maawag apajimtaiji aidaun anagkuina duka, tikich neje aidaun nagkagas pegkeg ainawai takunkesh tatsujai. <sup>20</sup>Judiuchu aidau apajimtaiji aidaun kuntinun anagkuina nunak, wakan pegkegchauwa nuna aikainawai, Apajuinak aikainatsui. Nunin asamtai atumesh nunú dutikakjum, wakan pegkegchaujai ijunjaijum tusan dakitakun tajime. <sup>21</sup>Nuaduí atumek, umutai copanmaya Apu Kristu anentaimtusa umutia nuwiya uwagjum, ajuma duwi umutai copanmaya wakan pegkegchau aina nudau umu wajamait sugme; antsagmek yutai Apu Kristu anentaimtusa yuwatin mesanum awa nuwiya yuwajum, ajuma duwi wakan pegkegchau aina nudau mesanum awa nu yu wajamait sugme.

<sup>22</sup>¿Apu Jisukristu ekajkata tusaik nunimainait? ¿Jutiish ni senchia ibaukaitag ni suwimkaji katsunmainnumash?

**Ashí ii takaamuk Apajuí shiig awajkatasa takamainaitji**

<sup>23</sup>Ashí takamainaitjai, tujash nu takaamua duka minak pegkejak etumait sui. Ashí takamainaitjai, tujash duka tikich Apajuí nemajin aidaunak ashí yaimait sui. <sup>24</sup>Makichkish imá niinunak egatsuk, tikichin pegkegnum yaimaina nuna egamain ainawai.

<sup>25</sup>Ashí neje sumaka yuwakjumes, apajimtai anagkuamuchukait tusagmek

iniimsaigpa, wainka anentaimsaijum; <sup>26</sup>wagki, ju nugka juka, nuigtú ashí nugkanum ayaa dushakam Apajuinu asamtai.

<sup>27</sup>Makichik aents Kristun nemagchau yutain ajamjamsatatus ipapamtai jegagmesh, ashí yutai amainamuk yuwatajum: ¿Apajimtai anagkuamuchukai? tusá iniimtsuk, wainka anentaimsaijum. <sup>28</sup>Nuniagmin, tikich chichagta-mak: Ju nejea juka apajimtai anagkuamui tujamkuig yuwawaigpa, nu etsegkamtai dekau asam wainka anentaimsaijum. <sup>29</sup>Junak atumnak tatsujime, tikich wainak anentaimsai tusan tajime.

Wi shiig agkan anentaimsan nuniamujun tikich aents pegkegchau anentaiai diyamak amainchawaitjai. <sup>30</sup>Wi yuwakun Apajuin see tusan yuwaig, tikich aidauk pegkegchaunak chichagtu-main ainatsui, wi Apajuin see tusan yuwau asamtai.

<sup>31</sup>Ashí junin aidauk, yuwakjumshakam, umakjumes ashí tikich wájí aidau takaakjumes, ashí Apajuí ememattsajum dutikatajum. <sup>32</sup>Makichkish tikichin pegkegchawk iwaintukaigpa, mina pataag judío aidaukesh, judiuchu aina dukesh, Jisusa nemajin aina dukeshkam. <sup>33</sup>Wika atumnak, ashí wi takaamujua nuaduí, ashí shiig awajkatasan wakejajime, mina shiig awajta nunak dutiktsuk, tikichin pegkegnum yaimaina nuna dutikajai, ditash uwemjatnume tau asan.

**Nuwa aidaush jega Apajuí ememattainum wainakush wajukmainaita**

**11** <sup>1</sup>Wi Kristu pujutin diisan niina nemajag antsagmek, atumshakam mina pujutug diisjum Kristu nemagkatajum.

<sup>2</sup>Mina yatsug aidauh, ubag aidauwah, shiig anentajime, tuke minash kajimatju-

tsuk, wi jintintuabijam dutiksagmek betek umiidau asagmin. <sup>3</sup>Tujash wakegajai ju shiig dekaatajum tusan, ashí aishmag aina duka Kristui sumitkau amain ainawai, nuwa aina dushakam aishin sumitkau amain ainawai, untsu Kristui Apajuyai sumitkauwa duka. <sup>4</sup>Ashí aishmag Apajuí aujak, nuniachkush Apajuí chichamen etsejak buuken dukuauk Kristun eme anentus diiyachu asa nuniawai. <sup>5</sup>Tuja ashí nuwa aidau Apajuí aujak, nuniachkush Apajuí chichamen etsejak buuken dukuachuk, aishin eme anentus diiyachu asa nuniawai, intashin ashí awaju asa wajukmaina numamtuk wajau asa. <sup>6</sup>Nuwa buuken jaanchi dukuachuk, dekas imá pegkeg ashí intashinak awag ajapati. Untsu nuniamu datsan ataik jaanchi dukumakti.

<sup>7</sup>Aishmag aidauk Apajuí niya numamti-nuk najanamu asa, nuna senchijin iwaintukta tau asa, jaanchik buukenak dukumaitsui. Untsu nuwa aishmagnumia najanamu asa, niijai betekmamtinuk asa buukenak jaanchi dukumainai. <sup>8</sup>Apajuik aishmagnak nuwanmayan jukig najanachui, untsu nuwan aishmagnumian juki najanauwai. <sup>9</sup>Apajuik aishmag nuwan atsumau asamtai nuwanak najanauwai, nuwa aishmagkun atsumau asamtaig aishmagnak najanachui.

<sup>10</sup>Nunin asamtai nuwak, Apajuí aentsji nayaimpinmaya aidaunash aishin sumimká pujamun iwaintukta tabaunum buukenak dukumain ainawai. <sup>11</sup>Tujash Kristu nemagtanmag aishmagkuk nuwajainchuk amaitsui; aantsag nuwashkam aishmagjainchuk amaitsui. <sup>12</sup>Apajuí nuwan aishmagnumian najanauwa nunisag, aishmagshakam nuwanmag akiinkauwai. Tujash duka ashí Apajuí najankamu ainawai.

<sup>13</sup>¿Atumesh pegkejai tumainkaitjum nuwa buuken jaanchi dukutsuk wajas Apajuin aujuuish? <sup>14</sup>Aishmag intashí esagman tsakapauk datsanmainai. <sup>15</sup>Untsu nuwa intashí esagmaitkush datsanmaitsui,

ditak buuké jaanchi dukumaina nuna intashí ejatkati tibau asa. <sup>16</sup>Ju taji juna pachis makichik aentskesh shiig dekaashmin dekaapeau akuig, ju pachisjum juka Apajuí emematku ijunku tuke aikatia tusajum ujaktajum.

**Jisukristu mantamnamuji  
anentaimtusa yuwamu  
shiig dutikashbau**

<sup>17</sup>Tuja juna tikichin tajim junak shiig anentsan tatsujime, wagki dekas pegkegnum ijunmaina nu pegkegchaunum ijunu asagmin. <sup>18</sup>Antukjai, atum Jisusa nemajin aidautijum ijunjum nuwiatijum, atú atumek tupandayinamun; nunak dekas nuninawapita taji. <sup>19</sup>iDuka dekas tupandaimain ainagme, nuniamunum dekamainai yaita dekas Jisusa nemajin aidau nuninun anentaimainatsu dusha! <sup>20</sup>Aaja tupandaika batsatiakujum, Apu Jisus anentaimtusa yuwawagmi tusajum ijunjum duka dekas nunimain nuniatsjume. <sup>21</sup>Apu Jisus anentaimtusa yuwawagmi tusa ijunbaunmag, makí makichik ni yuwatnuji itaamujin ditá eemak yuwinaí, tikichik yapajayatak juwawai, nuniai tikichik nampedaush ainawai. <sup>22</sup>¿Atumin jeemik atsugtamainawak, nui yuwajum umutaish uwagjum minimainuk? ¿Wagka Jisusa nemajin yumainji atsugbau aidaush imanchau diyakjumes idatsagme? ¿Aniajum duwish wajintajimki? ¿Ememattsanuash anentaimtitjim? Aanú dutikajum nuwig ememattsankesh anentaimtumaitsujime.

**Jisus mina anentaimjuttusajum  
yuwajumek juni  
dutikatajum tibau**

(Mt. 26.26-29; Mr. 14.22-25;

Lc. 22.14-20)

<sup>23</sup>Wika Apu Jisus tujutbauwa dutiksainuk atumnash jintintuabijime: Apu Jisusak sujum asauwa nunú kashik,

<sup>24</sup>pagkan juki Apajin see ti puuká chichaak: “Jujú jukijum yuwatajum, juka mina iyashjua numamtainai. Ju iwainawai atumní wi mantamnattag nuna, juka tuke jutiksagmeké atin atajum mina anentaimjutkujum”, <sup>25</sup>tusa ashí yuwawag vino copanum yajaam ekeemtatman juki: “Ju vino copanum awa juka, mina Apag yamagman mina numpajuú atum uwemkatnun anagtama-wajua nunú uminkatnun iwainawai: Ju tuke jutika umakjumek, mina anentaim-juttsajum jutikatajum.” <sup>26</sup>Nuaduú atumek pag yuwakjum, umutai copanmaya umakjumesh, ni mantamna-mujiya nu etsegtakjum dutikattagme, nunú dutikamua duka Apu Jisus taakui idaisatin asajum.

**Jisukristu mantamnamuji  
anentaimtusa yuwamu  
imanchau diyamu**

<sup>27</sup>Tuja nuna makichik aentskesh imanchau diyayatak pagkan yuwak, umutain copanmayan umauk, Jisusa iyashí, nuigtú niina numpe anentaim-tusa dutikamu asamtai nigki bakumawai. <sup>28</sup>Nuaduú eke pagkan yutsuk, umutnash umutsuk makí makichik pujutjin diimain ainawai. <sup>29</sup>Apu Jisusa iyashí tawa nuna shiig dekatsuk, anentaimkas yuwak, umutnash umakug, ni suwimak juwaku waittsatnujin yuwak nunimainai. <sup>30</sup>Atum ju betek umishtigmin kakakchau, jamamtin waigkugme, ni jauk jakaje. <sup>31</sup>Nuniau asamtai: Wi pegkegchau takaamush atsugtawash, tusa shiig niimasa pujakuik, Apajuú suwimak suwamak amaitsuji. <sup>32</sup>Tujash Apajuú suwimkan sujamkug, aents Apajuiyai kajinas anentaimchau aidaun atak suwimkan susatnaitag duwi, ditak suwimkan juki tabaunum unuimagti tusa aikgammamai-nai.

<sup>33</sup>Nuaduú mina yatsug aidauh, ubag aidauh, yuwatasa ijunkugmek dakanis-tajum. <sup>34</sup>Ni yapajauk niina jeenig yuwa minimainai, ijunku shiig takaachbau-num Apajuú suwimkan sujusai tau asa. Tikich atum inintsamujum nunak anuí taan ujaktajime.

**Yupichu dutikatnun Apajuú  
anenjauch sukagtusbau**

**12** <sup>1</sup>Yatsug aidauh, ubag aidauh, Apajuú yupichu dutikatnun sukagta nu dekaatajum tusan wakegajai.

<sup>2</sup>Atumek Kristu nemagsuk batsamsagmek, wainmachu wajukmaina nunikjum, apajimtai najanamu chichachu aina nunú emematujakuitjum duka dekagme. <sup>3</sup>Nuaduú yamai dekaatajum makichkish juninun tumain ainatsunúnú: Wakaní Pegkeji chichamtikbauk Jisusnak pegkegchauk chichagmait sui, “iJisusak dek as Apui!” taushkam nigki tatsui, Wakaní Pegkeji chichamtikam tawai.

<sup>4</sup>Yupichu dutikatnun Apajuú anenjauch sukagtamuk makí makichik niimtin ainawai; tujash Wakaní Pegkejiya duke nunak dutikawai. <sup>5</sup>Takatash makí makichik niimtin ainawai; tujash duka Apu Jisusa duke takajiatku nunajai. <sup>6</sup>Apajuik kuashat takatan makí makichik niimtinnun takamtikagtumainai. Dutikau asa aents aidaunak etegkeg makí makichik niina takatjin takamtikui. <sup>7</sup>Apajuik makí makichikitin Wakaní Pegkeji takamti-kagta nunak sukagtawai, tikich aidaujaish pempeentunikiag yainikti tabaunum. <sup>8</sup>Wakaní Pegkeji sukagtawai shiig jintiaja chichatan, kuashat unuimata nunashkam; <sup>9</sup>tikichin suwawai shiig kajintsá anentaimtan, tikichin jau aidau etsagautan, <sup>10</sup>tikichin suwawai aents dutikmainchau iwainak-

tinun, tikichin Apajuí tabauji shiig etsegtanum, tikichin wají wakan ajamak jintinkagtawa tusa dekatan, tikichin ii chichashtai aidau chichatan, tikichin nunú chichatai nuna taku tawai tusa etsegtutan. <sup>11</sup>Tujash ashí ju aina junak, Wakaní Pegkejiya duke niina senchijin dutikawai, nuniau asa makí makichik aentsnak, Wakaní Pegkeji ni wajuk wakegawa dutiksag suwawai.

<sup>12</sup>Iina iyashí, kuashat akanjamu akushkam makichik iyashke, anmamtin-ketji jutiish Kristujaig. <sup>13</sup>Nuaduí ashí judío, judiuchu, tikichi takajin, agkan batsamin ainakuish Kristu nemajuinaku makichik Wakanik jukiaju asaja, makichik iyashia nunin wajasuitji. Ashí nunú aidautinak Wakaní Pegkeji pujugtamainawai.

<sup>14</sup>Iyashik kuashat akanjamu ajawai; <sup>15</sup>nunina nuwiya dawé chichaak: “Wika uwejchau asan iyashnumiachuitjai”, takush ¿Iyashnumiachu asag tumainait? <sup>16</sup>Tuja kuwish chichaak: “Wika jiichu asan iyashnumiachuitjai”, takush ¿Iyashnumiachu asag tumainait? <sup>17</sup>Nuniachkush ashí iyashia ju, aya jiiiketkuish ¿utusaya antumainaita? Tuja ashí iyashia ju ayatak kuwishik akuish ¿utusaya kugkuaush dekapmainaita? <sup>18</sup>Tujash Apajuí, ashí ju aidaunak, ni wakegamujin diis shiig batsakuí. <sup>19</sup>Ayatak anentaik ataish ¿Tuwí iyashish amainaita? <sup>20</sup>Tujash kuashtai akanjamuk, nuninaitak makichik iyashke.

<sup>21</sup>Jiik, uwegnak: “Wika aminak atsumatsjame” tumaitsui. Aantsag buukshakam, dawenak: “Wika atumnak atsumatsjime” tumaitsui.

<sup>22</sup>Iina iyashinia ayaa nunú, imanisa atsumachbauwa nunin diyamu imá senchi atumnawai. <sup>23</sup>Iyashnumia imanchauwa nunin diyamua nu imá shiig kuitamnawai, tuja iyashnumia

paan iwainamainchauwa duka shiig ejaká kuitamnawai, <sup>24</sup>untsu iyash paan iwainamain aidauk dutiknatsui. Apajuí, iyashia nuwiya imanchauwa nunin diiyamua nuna dekas puyatjus diistinme, <sup>25</sup>nuninak shiig ijunas atinme, nuniau asag ashí pempentunisa-jag yainiktinme tusa dutikauwai. <sup>26</sup>Aatus asamtai iyashnumia akanjamu aina nuwiya makichik waittaik, ashí iyash waitiawai, tuja iina iyashinia waitia nunú puyatjusa kuitamjinig, ashí iyashik shiig najaimakas ainawai.

<sup>27</sup>Jumamtuk, atumek Kristu iyashí asajum, makí makichkitijum atum takastin akantugmauwaitjume.

<sup>28</sup>Apajuik adaijauwai Jisusa nemajin aidaunum takasagtinun, dekatkauk: Jisus chicham etsegtugkata tibau aidaun, Apajuí etsegtin atinun, jintinkagtuatnun, aents dutikmainchaun iwainaktinun, jau etsagagtinun, atsumamunum yaimkatnun, takatnum inamjatnun, chicham chichashtain chichaktin aidaunashkam. <sup>29</sup>Ashí aentsuk beté betekak ainatsui: tikich nugkanmash yujas chichagkagtuktinush ainai, ni Apajuí etsegtuktinush awai, jintinkagtinush ai, ni aents dutikmainchaun iwainaktinush ainawai. <sup>30</sup>Ni jau aidau etsagagtinush, tikich chichaman chichaktinush, nunú chichatai etsegtuktinush ainawai. Apajuí ni wakegamujin dutikatnume tusa aentsun akaantug susauwai. <sup>31</sup>Apajuí yupichu dutikatnun sukagtamua dekas imana nu jukitasajum kakanmamsatajum.

Tujash wi dekas imana nuna jintintuattajime.

#### Dekas anenka nu

**13** <sup>1</sup>Wi ashí chicham aidaun chichau, Apajuí aentsji nayaim-pinmaya aidau chichatainash chichau akunush anentak atugtakuig, jiju

nuniachkush awattai platillo tutai awatim tsantsantuwama numamtuk wajamainaitjai. <sup>2</sup>Wi Apajuí tabaujin shiig etsejin, tuja Apajuinu dekamainchauwa nunash shiig dekau, kuashat unuimaju, Apajuiyai kajintsá anentabaunum ashí dutikmainush ajutu asamtai, muja aidaunash yajá inagkemain akunush, anentak atsugta-kuig wainkayaitjai. <sup>3</sup>Ashí mina wajiig aidaun ujunauch ayujata tabaunum sujaknush; Kristu nemaju asan apea ajapeam akunush, anentak atsugta-kuig wainkayaitjai.

<sup>4</sup>Aents anejatnuk waitiakush katsuntug pujuwai, wait anenkagtinai, tikichdau diisá wakegak kajé wekaechauwai, ni wagaaku atasash wakechauwai, ememachui; <sup>5</sup>dutikmainchau aidaun taká wekaetuchui, imá niinunak anentaimtú pujuchu, kajeta pujugchau, kajegkagtukbautak pujuchu; <sup>6</sup>tikich pegkegchaun takaagtaish shiig aneechu, untsu pegkejan takagtaik shiig aneas dakunkut pujawai. <sup>7</sup>Waitiakushkam tuke anejatnai, tikichin pegkegchaujina pachittsag chichatsuk pegkeginak pachitus chichagnai, dekaskeashit tusa kuitamas dekauwai, ashí pegkeg aidaunak dakauwai, pegkegchau awagmaku waitkamash katsunnai.

<sup>8</sup>Apajuí chichame etsegbauk nagkankatnai, tikich chicham chichat aidaushkam nagkankatnai, unuimat aina dushakam nagkankagtinai. Tujash anenka duka tuke ashimnakchatnai. <sup>9</sup>Yamaiya juwik Apajuin chichameg machikiuch dekainaji, etseguish machik etsejuinaji. <sup>10</sup>Tujash tsawan jegatnai ashí dekamun atina nu, nunikmatai shiig dekaatnaitji yamai machik dekainag duka.

<sup>11</sup>Wi uchuch asanuk, chichaaknush, anentaimkunush, nunimainai takunush uchi wajukmaina nuniyajai. Tujash

yamai muun wenu, uchi anentaimtai-nak anentaimtsuk, muunta anentaimtatin anentaimjai. <sup>12</sup>Yamai kik ispijunum diyaku tuujin waintayama numamtuk wainji, tujash tsawan jegamtai, Apajuiyai shiig igkunisa wainiaktinaitji. Yamai kik machik dekainaji, tujash tsawan jegaku Apajuí jutiin shiig dekagma imatiksaik niishkam shiig dekaatnaitji.

<sup>13</sup>Kampatum yamai awai: Shiig kajintsá anentaimat, Apajuí dakamu, anenka dushakam. Ju kampatuma juwiyag anenka nuuwai imá senchi wagaakuk.

**Apajuí chichame chichagkagtuta nu  
chicham antushtai chichamua  
nuna nagkaesauwai**

**14** <sup>1</sup>Anentak ajuttí tusajum kakanmamsatajum, nuniakjum atum yupichu dutikatnun Wakaní Pegkeji sukagta dusha jukitasajum wakejitajum, imá senchi Apajuí tabau etsegta nunú. <sup>2</sup>Chicham antushtain chichaina nunak, aentsun aujuinatsui Apajuin aujak tuinawai, nuaduí antujuinatsui Wakaní Pegkeji chicham antushtai tabaun chichau asamtai. <sup>3</sup>Untsu Apajuí tabaun etsejuina duka, ashí aentsun wakanin yayawai, dutikak pegkegnum wakemitkak anentainash ichichtawai. <sup>4</sup>Chicham antushtain chichaa duka, imá nigki jintinmamui; untsu Apajuí tabaun etseja nunú, Jisusa nemajin aidaun wakanin yayawai.

<sup>5</sup>Wakemainaitjai atumesh chicham antushtain chichaktinme tusan, tujash imá senchi wakegajai Apajuí tabaun etsekatnume tusan. Juuwai dekas chicham antushtai chichata nuna nagkaesauk. Tikich chichaman chichaina duka atsumainawai nunak taku tawai tusa etsegtugkatnume, dutikiagtai Jisusa nemajuina dushakam

antukag wakanin shiig ijutkau atinme tusa.

<sup>6</sup>Yatsug aidauh, ubag aidauh, wi anuí taan chicham antushtaiyai Apajuí chichamen etsegmainaitag duka atumnak yaimpamaitsui, dekas Apajuí mina iwaintujuk jintinjuauwa nuna, dekaskea nu shiig dekatan, Apajuí tabaun pachisan, ashí Apajuin chichamega nuna, juuwai dekas pegkejak tusa jintinmainaitjim nu atumnak yaimpamainaitjume. <sup>7</sup>Kantamku awattai guitarra, umputai quena aina nunú wainak pachimkamun shiniagtaik, nunú kantamtainap makí makichik aina nuwig tawa tusag dekamaitsui. <sup>8</sup>Nunisag trompetan umpua dushakam, maaniamunum shiyaktin umintsatnume tusa umputaiya nuna umpushtaik, maaniasag uminmain ainatsui. <sup>9</sup>Atumshakam nunisjumek chicham antushtaiyai augmash, ¿wajak dekaagmek nunap tututua titagme? Nuniakuik wainka tu wekaemainai. <sup>10</sup>Ju nugka juwi makí makichik chicham kuashat ayaa duka, ashí ajuinawai wajintu taku tutaimpaya nunú. <sup>11</sup>Tuja mina aujta nuna, wajina takug tawa nuna dekachkunuk, tikich nugkanmayaya nunin wantinmainaitjai, aantsag mina aujtaushkam minaig tikich nugkanmayaya nunin wantinmainai. <sup>12</sup>Aatus asamtai atumek, yupichu dutikatnun Wakaní Pegkeji sukagtamú jukitasajum wakegautigme, Jisusa nemajuidau yaimaina nu jukitasajum kakanmamsatajum. <sup>13</sup>Nunin asamtai chicham antushtain chichauk Apajuin aujak segamainai, ni tabaujin: Junak takun tajai, tusa etsegmainun paan dekamtijuati tusa. <sup>14</sup>Wi chicham chichashtaiyai Apajuin aujtaik, mina wakanjua duke Apajuinak aujuí, tujash wika nunak wajinkunuk taja nunakesh dekasjai. <sup>15</sup>¿Tujash

wajukmainaitja? Apajuin mina wakanjuí aujkunchakam, nunap taja tusan antukan aujmainaitjai, aikasnuk kantamkunchakam nunap taja tusan antukan kantamainaitjai. <sup>16</sup>Tuja ame wakanmin Apajuí see tabaun tikich antuidauk, nu ame tame nuna dekachu asa “Aatus atí” tusag tumaitsui. <sup>17</sup>Ame Apajuí see tabauk pegkeg amainai; tujash tikichnak wakannum tsakatnak yaimaitsui. <sup>18</sup>Wika atumin nagkaesau chicham chichashtain chichaag duwi Apajuinak see tajai. <sup>19</sup>Tujash Jisusa nemajin aidau ijunainamunmag, ayatak cinco chicham jutii chichataiya nujai jintinkagtuatasan wakemainaitjai, wainkan diez mil chicham chichashtaiya nujai jintinkagtumaina nuna.

<sup>20</sup>Yatsug aidauh, ubag aidauh, uchi anentaimuk wajaigpajum, uchi anentaimu wajamainaitji pegkegchau takashtanum, tuja pegkeg anentaimta nuanuig muun anentaimu wajamainaitji. <sup>21</sup>Chicham umiktinum: “Ju aents aina junak, ditá chichamechui ausattajai, dutikamu asag minak antugtukchagtatu”, tiuwai Apu Apajuí. <sup>22</sup>Nuaduí chicham antushtai chichamua nuna Apajuí nemagchau aina nu antuinak, Apajuinuapi tusag anentaimtustinme tusa iwaintak nuniawai. Tujash Apajuí tabau jintinkagtamua nunú imá kuashat Apajuí nemajuina nunak yayawai. <sup>23</sup>Ashí Jisusa nemajin aidau ijunag batsamas chicham antushtain chichagtaik, Apajuí nemagchau aidau, nuniachkush Apajuí chichamen dekachu aina nu wayaa antuinakug: Imaanuk tu batsatajama, tujamainai. <sup>24</sup>Untsu Apajuí tabaun ditá chichamenig etsejiagtaik, Apajuí nemagchau aidau, nuniachkush Apajuí chichamen imatikas dekachu wayaa antukag: Dekaskeap tawa, tusa niina pujutjinash diimainai niishkam shiig

antau asa. <sup>25</sup>Nuniak ditá tudauji uukbaunash Apajuin ujaak niinak emematak tikishmag pujus, dekas atumiin Apajuí awai tujamainaitjume.

**Apajuik niina emematuinak ijunjang wainak pampamunak dakitnai**

<sup>26</sup>Nuaduí yatsug aidauh, atum ijunku utsanamunum tiagtatui: Wi kantamatjai tai, tikich wi jintiatjai tai, tikich, wi Apajuí iwaintugka nuna etsegkatjai tai, tikich wi chicham chichashtain chichaktajai tai, tikich wi chichakbaun nuna taku tawai tusan etsegkatjai tumainai. Tujash duka ashí betek yainikta tabaunum nunimainai.

<sup>27</sup>Aents chicham chichashtain chichaidauk jimagchikish, nuniachkush kempatumkesh chichamainai makí makichik; tujash aents ni chichakbaujin taku tawai tusa etsegtumainush atai.

<sup>28</sup>Nuna taku tawai tusa etsegmain atsutaik, Jisusa nemajin ijunjamunmag chichamait sui, imá ngiki Apajuin aujak chichamainai. <sup>29</sup>Aantsag Apajuí tabaun etsejush jimagchik, nuniachkush kempatumkesh chichamainai.

Nunitai tikich aidauk dekaskeash Apajuí tabaunash etseja tusa diimainai. <sup>30</sup>Tuja nui aents antak pekaja nuwiya, Apajuí dekamtikam makichik wajakí chichataik, nagkamas chichá duka itatmainai.

<sup>31</sup>Nuniau asamtai makí makichik niiyá ashimkamtai, duwi tikitchakam chichamainai. Nuniagmin ashí tikich aidauhkam unuimagtatus wakeemain ainawai. <sup>32</sup>Apajuí tabaun etsejuidauk ngiki chichatsuk, tikitchakam chichaktí tusa idaitumainai. <sup>33</sup>Wagki Apajuik, makichik aents chichaa nuuwá ashimkamtai, duwi tikich chichakmatai aatus takastinne tusa wakejawai, wainka pampamunak dakitin asa, nunak ashí Jisusa nemajin aidauk nunimain ainawai.

<sup>34</sup>Jisusa nemajin aidau ijunjamunmag, nuwa aidauk chichatsuk takamtak pekaamain ainawai. Moisés chicham

umiktin agagbaunum: “Nuwak aishin sumitkau amainai”, tawa nunisag.

<sup>35</sup>Nuwa dekaatatus wakegakug, niina jeen jegá aishin iniasti, nuwa ijunjamunum chichamua duka maakchau amain asamtai. <sup>36</sup>Atuminigkik Apajuí chichame etsegbauk nagkamnachui, nuigtush imá atumkechuitjume Apajuí chichame antukutigmek.

<sup>37</sup>Makichik aentskesh Apajuí tabaun etsegna iman aentaimtumak: Wakaní Pegkeji dekamtijawai tauk, wi Apu Jisus umiktajum tibaun agatjim juna dekaati.

<sup>38</sup>Tuja juna Apajuí tichamui tauk, wainak tawai.

<sup>39</sup>Nuaduí yatsug aidauh, atumesh kakanmamsatajum Apajuí tabau yupichu etsejin atasajum. Nuniakjumes tikich chicham chichashtain chichaina duka chichamait sui tiigpajum. <sup>40</sup>Atum ijunbaush pegkeg tikichish wakejumain atí, shiig kuitamamsajum ijunjatajum.

**Kristu nantakbau**

**15** <sup>1</sup>Yatsug aidauh, ubag aidauh, junashkam tajime: Wi yamajam chichaman atumiin etsegbau shiig aneasjum antukuitjum nuwig emetmamkauwaitjume; <sup>2</sup>nunikuitjum nu, wi chichaman ujakabijim dushakam dutiksagmek umiakjumek uwemjatagme; nuniachkugmek dekaskeapi tiuwaitjum duka wainkayai.

<sup>3</sup>Nagkamchaknuk wi dekauwaitag dutiskanuk atumnashkam jintintuauwaitjime, Kristuk iina tudaujin jakauwai, agagbau tawa nunisag tusan dekamtikatasan; <sup>4</sup>dutika ukusam kempatum tsawanta juwi nantakiuwai, nunashkam agagbau tawa nunisag; <sup>5</sup>nunik Pedron wantintukui, nui pujus ni jintintaiji doce aajakajua nuna wantintukui. <sup>6</sup>Duwi pujus quinientos inagkeas yatsug aidau juú wantintamuik wantintukui, nuna wainkajuk kuashat

yamaikish batsatui, untsu wajumchik jakaje. <sup>7</sup>Duwi pujus imá Jacobonak wantintukui, nunik ataktú ashí chichaman etsegtugkati tusa etegjamujin wantintukui. <sup>8</sup>Nunik minash inagnamunum wantintugkauwai, uchi duwik akiinawk niiyá wainkamun, tikich uchi awan akiinu imapam waina numamtuk wika wajakuitjai.

<sup>9</sup>Nuaduí wika Kristu chicham etsegtugkata tusa etegjamu aina nuwig wika imanchauwaitjai, wagki wika Jisusa nemajin aidaun aintujakú asan Kristu chicham etsegtugkata tusa awemamainchau aajakuitjai. <sup>10</sup>Tujash Apajuí wait anenjujua duwi, yamaik wi yaitja nunuwaitjai, ni wait anenjak jutijuauiwa duka minaig wainkachui, nuaduí wika Apajuí yaintsamtai dita aina nuna nagkaesan takasjai, wikik imatikmainchau ayatkun. <sup>11</sup>Wi etsegbau, nuniachkush tikich etsegbaukesh antukjum, dekaskeapi tusajum Kristuk nemagkauwaitjume.

#### Jakau aidau nantajagtin

<sup>12</sup>Jutii Kristu maa ukusbau nantakiuwai tusa etseginish, ¿Wagka atumesh jakaik nantagchatnaitji tuinagme? <sup>13</sup>Jakau nantagchatin ataik, Kristushkam nantakchau amainai. <sup>14</sup>Kristu nantakchauwaitkuig, chicham etsegna juka wainak amainai; nuigtush Kristui kajintsá anentaibau ajutjamaina dushakam wainak amainai. <sup>15</sup>Kristu maa ukusbaun Apajuí inankiuwai, nunin asamtai tikich aidau jakaush nantagtin ainawai tusa etsejuinag nu, atum dekaskechui tuinajum nuniakuig, untsu jutiik Apajuik wainka etsegtukji. Atum jakauk nantagchatnai tajum dutsu dekaskeai. <sup>16</sup>Jakau aidau nantagchatnaitkuig, Kristush nantakchau amainai. <sup>17</sup>Kristu nantakchauwaitkuig, atum niiní kajintsá anentaimejum dushakam

wainkayai, nunin asajum tudaunumag batsatjume. <sup>18</sup>Nunin ataik Kristu nemagkau jinawajua duka megkaejajuskaitaih. <sup>19</sup>Jutii Kristu dakainag nunú, imá juwi pujag duwik yainkati tabaunum nuninakuik, tikich aents aina nu nagkaesau wait anenmain batsaamainaitji.

<sup>20</sup>Tujash dekaskenmag Kristuk nantakiuwai. Niiyai dekas jakau nantashainmaya nagkamas nantakiuwa duka. <sup>21</sup>Makichik aents Apajuí intimjukaunum jata nagkamdauwa nunisag, makichik aents mantamna nantakbaunmag ashí jinawajua aidau nantajagtinai. <sup>22</sup>Adán tunamagbaunum ashí jainag nunisag, Kristu nantakbaunum pujut tuke atina nu ashí jukitnaitji.

#### Nantaamuk juní atinai

<sup>23</sup>Tujash juka juní atinai: Nagkamchakug Kristu nantakiuwai; Kristu ataktú juwi minitta duwik, niina nemajin aidau jinawajua nunuwá nantakiagtinai. <sup>24</sup>Inagnamunum ashí senchigtin aina nuna senchijin, iwanchin senchijinashkam Kristu atankitnai. Nuna dutika ni aents uwentikamu aidaun yajuak, Apajuin: “Ame ashí kuitamkam inata”, tusa susatna duwi nugka nagkanbau atinai.

<sup>25</sup>Kristu Apu wajas inamak pujai, ashí niina shiwaji aidauk depetkamui atinai. <sup>26</sup>Tuja Kristu niina shiwajin inagnak tsaitkina nunak, jinin ainag nuna emegkak jachatai ematna nuuwai. <sup>27</sup>Apajuí Kristunak: “Ame ashí inamjata”, tusa idaitusui. Juna tiuwa nunak Apajuinash nigki Kristuk inawai tusag tatsui, wagki Apajuí ashí wajinak Kristun idaitusui. <sup>28</sup>Ashí Kristu idaitusbau atina duwi, Kristu Apajuí Uchijiya duke Apajuuiyai sumimkatnai, ni ashí waji aidauk idaitusbau asa. Nunikmatai Apajuik ashí nigki diistinai.



<sup>29</sup>Atum jakauk nantagchatnai tayatkugmesh, ¿tujash wagka atumesh jakau pachisjumesh yamimagme?

<sup>30</sup>Atak nantaamu atsutin aish, ¿wagka jutiish ashí tsawantaish ishamainnumash yujainaji? <sup>31</sup>Atumek shiig deka gme, wi ashí tsawantai mantammainnum wekaekunush, atum Kristu Jisus nemajuinajum nuna anentaimtakun shiig aneasan dakunkut wekagag duka. <sup>32</sup>Wajumak Efesonmaya aidauk, kuntin kajena iman shiwag ajutuina duwish ¿wají pegkegna jukiwaitja? Dekaskenum aents jinau nantagchatnaitkuig, tikich chichainak: “Yuwawagmi, uwajagmi kashin jaakuik nunikchattaji”, tuina iish tumainaitku, atak nantainamu atinuk shiig dekainag duwi, kuashat puyatjumannum yujainakuish, ju takatak idaitsuk wejuinaji.

<sup>33</sup>Atumek: Atakek nantagchatnaitji, tuina nunú tsanuamak aigpajum. Juna makichik aents tiuwai: “Aentsú pujutji pegkeja nunak, aents pegkegchaujai kumpaniamua nu emestawai.” <sup>34</sup>Dekas aneaku pujakjum tudauk takasaigpajum. Atum ainajum anuiyatijum, Apajuinu dekaskea nu wajumketijum shiig dekachutigmesh ainajum nuna datsaagtinme tusan tajai.

**Jakau aidaush wajuk  
nantajagtina ainawa**

<sup>35</sup>Atum ainajum anuiya: “¿Jakau aidaush wajuk nantajagtinuk ainawa? ¿Wajuku iyashimkag midiagtinaita?”, tautigmesh amainaitjume. <sup>36</sup>Anentainkachuh, jigkai ajaamua duka kaumainai nunikmatai nuwiya ajak tsapamainai. <sup>37</sup>Trigo ajakmakuik dukekgau ajatsuk, jigkayí ajataiyai, tikich ajakshakam dutiksaik dutiktaiyai. <sup>38</sup>Dutikamun Apajuí wajuk wakegawa dutiksag tsapapawai, dutika makí makichik jigkainak wají ajakaita dutiksag suwawai.

<sup>39</sup>Nunisag tikich kuntin aina dushakam betekak ainatsui, aentsun iyashishkam kuntindaujaig betekchawai, chigkinushkam nunisagke, namakshakam aushá ainawai. <sup>40</sup>Aantsag nayaimpinmayash ai, nugkayash awai. Tujash nayaimpinmaya aina nuna shiigmajish awai, nuniai nugkanmaya aina nuna shiigmajish nunisagke. <sup>41</sup>Nunisag etsá etsantajish ai, nantú etsantajishá awai, tuja yaya aidau etsantajish awai; ayatak yayakeshkam betekak etsantuinatsui.

<sup>42</sup>Numamtuk atinai aents jinau nantajagtina dushakam. Aents jakau nantainakug, iyash atakek kaugchatnun iyashimak nantakiagtina. <sup>43</sup>Iyash kakaakchau ukusbau aajakua nu nantaak, shiig pegkejan iyashimak nantakiagtina. Aents jakauk iyashí atumnachu asamtai ukusbauwa duka, senchigtin waigkag nantakiagtina.

<sup>44</sup>Nugkaa yutuna duka, nugkaya iyashia nuuwai; nantaktina duka, nayaimpinum pujustina nuuwai. Awai nugkaa pujaku iyashimtai aantsag awai nayaimpinum pujaku iyashimain.

<sup>45</sup>Aikasag agagbaunum: “Apajuí nagkamak Adagkan najanauwa nunak ju nugka juwi pujumainun iyashin najanauwai.” Untsu inagnak Adán aajakua duka Kristu aajakuí. Nunú iyash nayaimpinum pujaku iyashimkatna nuna iyashimak nantakiu asamtai, iishkam nu iyashik jukitnaitji. <sup>46</sup>Yamai-kik iyash jauwa nu ajutjamainaji, duwi dekas iyash jachauwa duka ajutjabiagtina. <sup>47</sup>Adagkak nugka jukí najanamu asa nugkaya aajakuí, tuja Kristuk nayaimpinmayayai. <sup>48</sup>Jutii iyashí aina juka, Adán nugka najanamua nunú iyashik ajutjamainawai. Untsu atak iyash jukitnaitag duka, Kristu iyashimkawa nujai betekak ajutjamtainai.

<sup>49</sup>Nugkaya iyash iyashimkau ainag

antsaik, nayaimpinmaya iyash iyashimkatnaitji.

<sup>50</sup>Yatsug aidauh, ubag aidauh, juna tajime: Neje numpajai pachimja najanamua duka, Apajuí inamtaijinig wayashtinai. Iina iyashí jauwa juka, ajumaish tuke jachataiya nuwig waimaitsui. <sup>51</sup>Tuja Apajuinu yaunchuk dekaachbau uukbau aajakua nuna ujajime: Jutiik ashí jinashtinaitji, tujash ashí yapajinkau agtinaitji, <sup>52</sup>waamak piit tsuwisaik niimtayama numamtuk, trompeta inagnaku umpuamu antamuik jakau aidauk nantajagtinai, ajumaish tuke jakachagtinun; nuniai jutii iwaaku aidautik iyashí yapagtam agtinaitji.

<sup>53</sup>Dekas atsumnawai iina iyashí kaujá megkaena ju, ajumaish kauchu atinme tusa; yamai iyash jinin aina jushakam, ajumaish tuke jachau atinme tusa.

<sup>54</sup>Nunik iina iyashí ajumaish kaugchatnun, ajumaish jakashtinun iyashimkagmataig, chicham agagbau-num:

“Jaamua duka depetkamu juwake,

<sup>55</sup>yamaik jaamua duka jutiinak mantamait sui.

Depetkamu asamtai jaamush atsutnai, ukumamushkam atsutnai”, tibauwa nu uminkatnai.

<sup>56</sup>Yaunchkek Moisés chicham umiktinun agajua nu ii umishtin tunamainaku jinujakuitji.

<sup>57</sup>Tujash Apajuí see taji, ii Apuji Jisukristu jaamunak depetkau asamtai, jutii niini dekaskeapi tuidautik jaamuk ishamainsug duwi.

<sup>58</sup>Nuaduú atumek aneetaig yatsug aidauh, ubag aidauh, emetmamjajum pujusjum Apu Jisusa takatjig mijattsuk ematajum; wagki atumek dekagme, jutii Kristunu takainag juka wainkaik takainatsji.

**Jerusalegnumia Kristun  
nemajuidau susatin kuichik  
anentag ijumjamu**

**16** <sup>1</sup>Jisusa nemajuidau yaigtin kuichik anentag ijumkugmek, Galacianmaya Jisusa nemajin aidau wi jintintuauwaitag dutiksagmek atumesh dutikatajum. <sup>2</sup>Ashí tumigtin makí makichkitijum atum takasá wajupa jukiugme, nu akantsajum ukú pujutajum. Dutikamu asamtai wi taattag nuaduik kuichik ijumjata tabauk atsutí.

<sup>3</sup>Wi anuí taan atum aents etegkawagmin cartan agajan susan Jerusalén awematjai, atum kuichik anenjauch ijumjajum nuna dekaatnume tusan.

<sup>4</sup>Nuna dutikachkunush, wisha wemainaitkunuk ditajai ijuntsan wemainaitjai.

<sup>5</sup>Tuja wi atumiin minaknuk, Macedonia nugka atú minittajai. <sup>6</sup>Nuniknuk atumjai wajumak tsawan pujusta tajai, nuniachkunush yumi tepeatta nunak anuí pujusnukeash inagkeakintag tajai, nunikan wegakuish atum yainkamnujum tusan.

<sup>7</sup>Nuniau asan ayatak nagkaemaku wainká ukutnak dakitajime, dukapech tsawan atumiin pujusta tau asan, Apu Jisusash aatus wakegakuig. <sup>8</sup>Yamaikik Efeso pujuttajai, jista Pentecostés inagkeakta tau asan. <sup>9</sup>Nu jistatin imá kuashat tuwaidau asagmatai, Apu Kristu chichamen etsegkatjai tajai, kuashat aents aidau kajegtuinaikishkam.

<sup>10</sup>Timoteo anuí taakuishkam shiig anentsajum jukitajum, niishkam wi Apu Jisukristun takajag aunak takaju asamtai. <sup>11</sup>Nunin asamtai makichkitigmekesh imanchau diisaigpajum, dutiktsuk shiig anentsajum yaigtajum ni minai minakuish, wagki wika tikich yatsug aina nujai dakaku pujaji.

<sup>12</sup>Atumin ijagtamsati tusan yatsug Apolosan, tikich yatsug aina nujai wetá

tusan kuashtá segajai; tujash yamaikik anuí minimainjig wakegamuk atsujuí, tuwig minimainji ajit duwi minittawai.

**Inagnaku akatmabau**

<sup>13</sup>Atum Jisukristuí kajintsá anentaim-jum nunisjumek aneaku pujakjum, aishmag wajasjum kakanmamsatajum.

<sup>14</sup>Ashí atum takaajum duka, anenkai takastajum. <sup>15</sup>Yatsug aidauh atumek dekagme, Estéfanás nugka Acayanmaya nu niina nuwejái, uchijí aidaujái dekatkauk Apajuí nemagkajua duka, nunikaju asag Kristu nemajuidaun senchi yainawai. <sup>16</sup>Nuaduí atumek ju aents yaimainak takaina junin aina nu tabau antugkatajum.

<sup>17</sup>Shiig anejái Estéfanás, Fortunato, Acaico aatus tajutuawag atum dutikmaina nuna dita kuashtat yaintuidau asagmatai. <sup>18</sup>Dita mina wakanjuí ichichtujajui, aikasag atumnashkam

ichichtamjajui. Aents junin aina nunú atumek puyatjusjum diimain ainagme.

<sup>19</sup>Jisusa nemajin aidau Asianmaya kumpamjamainawai. Aantsag Áquila ni nuwe Priscilajái, ditá jeenig ijunaina dushakam Apu Kristu daajin kumpamjamainawai. <sup>20</sup>Ashí yatsug aidauh, ubag Kristu nemajin batsataina dushakam kumpamjamainawai. Antsagmek atumesh makí makichkitijum pempentunisjumek shiig anendaisajum kumpamdayatajum.

<sup>21</sup>Wi Pablon ju kumpamdayamunak mina uwejuí agatjime.

<sup>22</sup>Makichik aentskesh Apu Jisukristun aneachuk, inigki suwimkan jukittawai! Wagki Apu Jisusak waamak taattawai.

<sup>23</sup>Atumnash Apu Jisukristu wait anenjamjatnume. <sup>24</sup>Wika atumnak Kristu Jisusan aneag dutiksanuk anejime.

Aatus atí.

# PABLO AWENTSAIK PAPI AGAJA CORINTONMAYA AIDAU AWETIMU

## Pablo Corintonmaya aidau kumpabau

**1** <sup>1</sup>Witjai Pabloitjai, minak Apajuí Kristu Jisusa chichame etsegtukti tusa wakegau asa awetiuwai. Yatsug Timoteojai pujusan atum Jisus nemaju-tijum yaakat Corinto batsatutigmin papiin agajan awetakun kumpamjime, nuigtú Acaya nugkanum batsata nunashkam kumpamjai. <sup>2</sup>Ii Apají Apajuiya nu, iina Apuji Jisukristujai wait anenjamag, shiig agkan anentaimesa pujuta nuna atumnash amastinme.

## Pablo waitiamuji

<sup>3</sup>Emematiagmi Apajuí, ii Apuji Jisukristun Apajiyu nu, niyai jutii Apají tuke wait anenjamna duka, nigki Apajuí ichichkagtina dushakam. <sup>4</sup>Nigki ichichmamtanash sujamui ashí ii waitiamunmash, ditash tikich waitiag-taish dutiksag ichichkagtutinme tujamu asa. <sup>5</sup>Kristu waittsauwa nunisaik jutii ni nemajuidautish kuashat waituinaji, nuniakuish imá niinig kuashat ichichmamainuk ajutjamainaji. <sup>6</sup>Jutii Apajuí chichame etsegjin, tikich aents waitkagmainakuish shiig anenajai, jutii nuniamu diisjum atumesh ichichmamjajum uwemjatajum tabaunum. Tuja Apajuí jutii waitiajin ichichmamtan amakuishkam atum

aidautigmesh: Jutii waitiajinish aikasag-keap Apajuí ichichtamjattaji, tusajum dekamainaitjume. <sup>7</sup>Jutiik atuminig kajinmasa anentaimainaji, wagki atumek jutii waituinag nunisjumek waitiakjumesh, Apajuí ichichmamtan sujabaujai ichichmamaidau asagmin.

<sup>8</sup>Yatsug aidauh, ubag aidauh, jutii Asia nugkanum batsamsaja kuashat utugchatnum waittsabiag nu dekaatum tusan wakegajai. Jutiik tikima atsanja nagkaemainchaunum jegantú asaja: Iwaakuk jiiinjashtatjiapi, tibaiji. <sup>9</sup>Nuniaku: Mantamnati, tujamainakui anentaimaina imanika anentaibiaji. Tujash nu dekamtijamabi iik anenmamsuk, Apajuí aents jakaunash inanna nui kajintsá anentaimtan. <sup>10</sup>Nuniau asajin Apajuí agkanmitkagmabi, dutijamsag ii jamain ishamain ataish ayamjutpak-tui. Nunin asamtai nigkiap ayamjutpak-tatji tusa imá niinig kajinmasa anentaimainaji. <sup>11</sup>Atum jutii pachijattsajum Apajuí augjumin, tikich aidauh jutiin pachijattsag Apajuin aujiagtaig, kuashat tikich aidauh Apajuin see tumain ainawai, Apajuinumia pegkeg juwamua nuna wainaidau asag.

## Pablo Corinto wechamu

<sup>12</sup>Aents aidau ditá yachajinig anentaimes yujau aina nunitsuk, jutiik Apajuí wait anenjamsamta pegkeg aina duke anentaimainaku, tikich aidaujaish kuitamamka

imagnisa yujaidau asaja, atumjaig nuní nagkaemasa kuitamamka yujasmayag duwi eme anenmabauk ajutjamainaji. <sup>13</sup>Wi papiin agatjamjim nuwig, tikich wáji pachisaik atum aujlugmesh antukchamnu-kesh agatjashbaijime, nuniau asamtai shiig ausampap dekawagtatua tajime. <sup>14</sup>Atumek yamaik ii kuitamamsa yujasmayag duka shiig dekatsjume, tujash Apu Jisusa emtin ijunjatnaitag nunú tsawantinig dekajuat-naitjume, jutií wajak pujusuitji nunú. Nunikjum shiig aneakjumin jutiishkam nunisaik atum dutikamua nu diisá shiig aneastinaitji.

<sup>15-16</sup>Wika Macedonia nagkaemakun atumi tajuan wainkan ukuakun, nuwiya waketkunchakam ataktush wainkan ukuktajime tusan anentaimsabijai. Nuna nuniakui atum minashkam wi Judea nugkanum wegakuish, atum yainkamnu-jum tau asan. <sup>17</sup>Wi nuna nuniktajai tiuwaitag nunash ¿anentaimtsukek tiuwaitag? ¿Atumek minishtinaitkumpap wainak minittajai tawa tujutjumek? <sup>18</sup>Tujash Apajuí ni tibaujinak betek umina nu dekgatamui jutií wainka atum tsanuachbaunak. <sup>19</sup>Wi, Silvano, Timoteo, jujú aidauti Jisukristu Apajuí Uchijiya nunú pachisaja atumnak ujakbaijime. Jisukristuk: “Yamaiya juwi dutikattajai” ti, ajuma duwi “dutikashattajai” tujakchauwai. Nigka ni chichakbaujinak imatiksag umijakuí. <sup>20</sup>Wagki Apajuí ashí anagkagtua-mua duka, Kristui ashí uminkauwai. Nuaduí Apajuí emematuinakuik: “Aatus atí”, tuinaji Kristu Jisus pachisa. <sup>21</sup>Tuja Apajuiyai jutiin atumnashkam Kristu nemaju asajin ashí ijupag niinu etamkajua duka. <sup>22</sup>Dutijamak: Juka midau atinme, tujamu asa emtikak Wakaní Pegkejiya nuna sujamsajui. Nuna dutijabau asamtai dekainaji, atakeap pegkeg aina nuna sujamsatnaita tusa.

<sup>23</sup>Tujash wi Corinto minitjai tusa anentaimsamun minichag nunak Apajuí

dekgatawai. Tuja wi minitjai taja nuna dekas tuchataik Apajuí suwimkan sujustí tajai. Wi anuí minichag nunak atumin kakaakan chichagkun wake ebekaijim tau asan minichmajai. <sup>24</sup>Jutiik atum kajintsá anentaimjum duka: Ii wakegamu dutikatajum, tusaik tumaitsujime, atumek Kristui kajintsá anentaimu asagmin ayatak yaimkatasa wakegaji dakujustinme tau asaja.

**2** <sup>1</sup>Nuaduí: Dekas wechatjai, ditan wake besemag anentaimtiká wekayig, tusan juwakbaijai. <sup>2</sup>Atum mina shiig anentijumaintigmin wake besemag anentaimtiktaish, ¿yaki minash shiijash anentijusti? <sup>3</sup>Nuaduí ayatak agatjabiajime, atum mina shiig anentijumain aidautigmin wake besemag anentaimtiktan dakitakun. Wika shiig dekajai, wi shiig aneakuig, atumshakam shiig aneemainaitjume. <sup>4</sup>Tujash wi papiin agatjabiajim nunak, senchi uyumaka waitiamunum buutkun pujusan agatjabiajime. Tujash atumin wake besemag anentaimtijatasanut agatjashbaijime, ayatak wi atumin senchi aneajim nuna dekaatnume tusan agagbaijai.

#### Pablo tsagkugkagtugbau

<sup>5</sup>Tuja mina makichik aents wake besemag anentaimtijujua duka, imá minakek dutijuache, ashí atumesh nunikugmeapi tajai. (Junak wika nunú aents dekas pegkegchau takasbaujiya nunak awagkinuk chichaa wekaechattajai). <sup>6</sup>Atum ainajum nuwiya imá kuashtatijum nu aents suwimak susauwaitjum duka: Maake, anuig atí. <sup>7</sup>Yamaik atumek tsagkujajum anentai ichichtugtatum, wake besemag pujak shiig pujuschamin dekapí. <sup>8</sup>Nuaduí, atum yaunchuk ni aneajakuitjum dutiksagmek aneetatum tusan segajime. <sup>9</sup>Duwik juna pachisan agatjabiajime,

dekas wi tabaunash umikagtimdash tusan dekapsatasan. <sup>10</sup>Nuaduú atum tsagkujattajum nunak, wisha tsagkujattajai. Wi anuí atumjai ijuntsan pujusan Kristu emtin tsagkugmainaitag dutiksannuk. <sup>11</sup>Nu aaja dutikaku jutiik iwanch tsanujati tusaik agkantak idaitumaitsui, wagki dekaji ni pegkegchaun takamtijamsatatus wajuk anentaimnaita duka.

**Pablo yaakat Troas jegá shiig juwakchamu**

<sup>12</sup>Yamajam chichaman Kristu pachisan etsekgatasan yaakat Troas jegaa ai, kuashat aents Apajuú chichamen dekawagtatus wakeyagmayi; <sup>13</sup>tujash yatsug Titun wainkachu asan wakeesan takamainchau dekapeakun, ditanak ukuakun Macedonia nugkanum webajjai.

**Kristui depetmatak awai**

<sup>14</sup>See tajai Apajuin, Kristu depetmaku a imanuk etamu asamtai, jutii ni chichame etsegbauwa dushakam pegkegkugkuina iman, ashí yantannum etsegbaun wakejus antuidau asagmatai. <sup>15</sup>Jutii Kristu pachisa etsejuinag duka, Apajuin shiig awagmawai. Juna antuk umiidaunak Apajuú uwemtikainawai. Jujú chichamak pegkejai chichaman umiina nuwig, tuja megkaejatin aina dushakam jujú chichamnak antuinawai. <sup>16</sup>Megkaejatin aina duka Apajuú chichamenak pegkegchauwa nunin antuinawai, dita megkaejatnujin pachis tau asamtai. Apajuú chichamen antukag umiina nunak Apajuú uwemtikui. Tuja nu chichaman umiina nujaig Apajuú chichamega juka pegkejai, duwi dekainawai: Nayaimpinmap pujustinaitji, tusag. Makichik aentskesh, Apajuú yayachmak shiig dekamaitsui, jujú chichama ju etsegtanak. <sup>17</sup>Jutiik, tikich aidau kuichkin jukitasag wainak

tsanumag chichaman etsejin aina nuninatsji, jutiik Apajuú awetabiu asagmatai dekaskenum ni emtinish etsejuinaji, nuigtush Kristujai ijutkau asaja.

**Yamajam chicham apakbauwa nu pachisa etsegbau**

**3** <sup>1</sup>Wi juna pachisan chichaakuig, atumek: Ni eme anenmamkumpap tu wekaewa, tusagmek tujutmain ainatsjume. Atsa tikich wajukena nunikaik, ¿Jutiin pachijatus papiin agajagbau jukí atum iwaintumainaitjim? <sup>2</sup>Jutii anentaimsa papiinum agamaina numamtuk awajkamutigmek atumetjume, nunin asagmin ashí aents papiin aujus shiig dekamaina numamtuk, atumnak shiig dekagmainawai, atumi pujutjum yapajidaun wainaina nuaduú. <sup>3</sup>Kristuk, jutii chicham etsejuinag jujai ni pegkejan dutikauwa nuna aents aidaush wainkatnume tusa wakegawai. Tujash nigka jujú chichamnak aents aidau wainkati tusag papinumag agagchauwai. Nuigtushkam Apajuú chichaman kayanum agag Moisesan susauwa dutikag agagchauwai. Dekas atumnak Apajuú tuke pujuwa nunú Wakaní Pegkejiya nujai atumi pujutjuminig yapagtamawaju asamtai, tikich aidaush Kristu atumin yapagtabauwa nunak wainkagtatui.

<sup>4</sup>Apajuiyai kajintsá anentaimainaku, Kristu atumiin dutikauwa duka dekaskeapi tuinaji. <sup>5</sup>Juka imá jutiik imatiksa takainaji tumamaitsui, ashí jutii takainag duka Apajuú yaimpasmatai takainaji. <sup>6</sup>Nigki mina takagtin agtinme tusa jutiinak ni inake etamkauwai, yamajam chicham apakbauwa nuna etsejin atinme tujamu asa. Jutii chicham etsejuinag duka chicham umiktin aajakua duchauwai, juka Wakaní Pegkeji takaamua nuuwai.

Wagki chicham umiktin aajakua nu umiachbaunmag Apajuijai tuke kanaaku kanatnum ejekagtiuwei, tujash Wakaní Pegkejiya duka pujut tuke atinun sukagtawai.

<sup>7</sup>Chicham umiktin kayanum agagbau aajakua nunú, Apajuijai tuke kanaaku kanatnum ejekagtiuwa nu, Moisesa yapiin winchamtin awajtusmatai, Israel aents aidauk Moisesa yapiinak diimainchau dekapjajui. Duka, dukap asa megkaekatnaitak ibau wajasuí. <sup>8</sup>¿Dekas Wakaní Pegkeji jutiiní takaamua nuna tsaaptinji aan nagkaemas amainchaukaih? <sup>9</sup>Chicham umiktin bakujatmainaitak iman aajakua nuna nagkaesauwai, Apajuí: Aentsú bakumamainjig atsawai, tawa nu etsegbauwa duka. <sup>10</sup>Nu chicham umiktin iman aajakua duka, yamai yamajam chicham Kristu pachisa etsegna nujai apatkamak imanchauwai. <sup>11</sup>Chicham umiktin megkaekatnaitak iman aajakua nuna nagkaesau atinai yamajam chichama juka. Jujú chichamak ajumaish megkaekashtinai, tuke atinai.

<sup>12</sup>Nuaduí nunú dekaidau asaja jutiik shiig kajintsá chichagkagtuinaji.

<sup>13</sup>Moisés yapiin winchamtin wajasú asa, ju megkagun Israel aents aidau wainkainum tusa, jaanchi juki yapiin ejakua numamtukek jutiik wajainatsji, wagki Kristu chichamega juka tuke megkaekashtin asamtai. <sup>14-15</sup>Tuja Israel aents aidauk Moisés chicham umiktinun agajua nunak, shiig antumainchau dekapjajui. Nunijakajua nunisag yamaikishkam, nuna chichaman aujuinakush antumainchau dekapenawai, jaanchi ejakbau asa shiig wainmainchauwa numamtin juwakaju asag; tujash imá Kristuig kajintsá anentaibaunum shiig antumainaitji.

<sup>16</sup>Ashí aents Apu Jisukristui sujuman-kaju aidauk, ni dekamtikbau asa shiig

paan dekainawai. <sup>17</sup>Iina Apuji Jisukristuk wakani, nunin asamtai Wakaní Pegkeji jutiiní pujus chicham umiktajum tibau umiktasa waitujakbauwa nunak agkanmitkagbauwai.

<sup>18</sup>Dutijabau asamtai yaunchuk iina yapiin jaanch ejatkamua numamtin aajakuitag nunak, yamaik Kristu pachisa dekainag nuaduí, Wakaní Pegkejiya nu anentaimitam yapagtugma Kristu anentaimitajiya imanuk etamji. Dutijamu asamtai Kristu wajukuita nuninuk weenaji. Nunak ni Apu Jisus dutijamu asamtai nuninaji.

**4** <sup>1</sup>Jutiinak Apajuí wait anenjamag, yamajam chichama ju etsegkatajum tujabiu asamtai, mijattsuk chichagkagtuinaji. <sup>2</sup>Nuniaku uuká takaamu nuigtú tikich datsanmain aina duka ashí idaisau asaja, tsanumsaikish chichatsuk, Apajuí chichamesh yapajiasa etsegsuk, imá dekaskea duke ashí aents aidaush pegkeg diiyamua nu Apajuish dekamunum chichagkagtuinaji. <sup>3</sup>Tujash yamajam chicham etsejuinag juna dekamainchau dekapena nunak, aents megkaejatin aina nu nuninawai. <sup>4</sup>Dita dekaskeapi tuinatsu nunak, iwanch ju nugká apujiya nu antumainchau emamu asag nuninawai. Nuaduí yamajam chicham Kristu pachisa etsegbauwa junak dekamainchau dekapenawai, Apajuish wajukuita nunak, Kristu iwainawai tusa pachisa etsegbauwa juna. <sup>5</sup>Chichagkagtuinag duka iinu pachisaik chichatsji, Jisukristu dekas Apua nu pachisa chichagkagtuinaji; tujash jutiik Jisukristu aneamunum, atumí inataigmia nunin ainaji tumamainaji. <sup>6</sup>Wagki Apajuiya duke suwen tsaaptin emati tima, tsaaptin emauwa numamtuk, jutiin anentainish Apajuí imanjiya nu shiig dekaatnun, tsaaptina numamtinun amasuí. Ditash tikich aidaun Apajuin pachis shiig dekamtikatnume, jutiin

Jisukristu Apajuí wajukuita nuna shiig dekamtijamauwa dutiksag tusa.

### Kajintsá anentaibauwai pujamu

<sup>7</sup>Jutiik duwe jukí ichinak najanamunum, nuna initken wají wakejumain pegkeg egketiama numamtuk awajkamuinaji, Apajuí ni senchijí sukagtamua nunú iini au asantai. <sup>8</sup>Nuaduí utugchat ajutjamkuishkam epegsaikí auwaitji. Uyumawai imanik ajutjamkuishkam, wajukawajak tusaikish tuinatsji. <sup>9</sup>Iina shiwaji aidau waitkagmagtaish imá iinakek Apajuik idaitamtsuji, suwimjainainakush mantamtanak mantamainatsui. <sup>10-11</sup>Jutii tuwí wegaji nuwig, Jisusan maatatus itujujakú aina imatijainainaji. Jisus imatikajakbauwa nuna tikich aidash jutii pujutinish betek nagkaema nuna diisag, Jisusap ditanak maam amainnash kuitamainawa tusag dekaatnume tabaunum. Nunin asantai jutiik, Jisus pachisa etsegbaunum ni mantamdauwa nunisaik mantamnatasumintsá yujainaji. <sup>12</sup>Jutii mantammainnum yujasá chicham etsegkamunum, atumesh pujut tuke atina nu jukiú ainagme.

<sup>13</sup>Tujash agagbauwa nui: “Kajintsá anentaibau ajutu asantai chichagkagtajai”, tibawawai, nuaduí jutiishkam nunisaik kajintsá anentaibau ajutjamu asantai chichagkagtuinaji. <sup>14</sup>Apajuí, Apu Jisus maamunak inankiuwa dutiksagkeap jutiinash inantamkiag, atumjai ijupag niina pujutaijin jujamkiagtinaita tusa dekanaji. <sup>15</sup>Duka atum aneamunum imanikaik waituidau asajin, Apajuí aents aidanashkam yaigtatui. Dutikainam juní kuashat Kristun nemajuinak, Apajuinashkam ni wait anenkagtugbaunum see tuinak imá niinak emematiagtatui.

<sup>16</sup>Nuaduí iina iyashí muuntuch wegak mijamkuishkam, iina wakaniya nu kashí

kashinig ayatak senchimeakui mijamtsuji. <sup>17</sup>Ju nugka juwi yamai waituinag duka, Apajuí pujut pegkeg tuke atinun sujamsatna nujai apattsa anentaimtamak wainkayai. <sup>18</sup>Aatus asantai jutiik ju nugkanmaya wainainag juka puyatjutsuk, dekas nayaimpinmaya ii jukitin wainchamua nu imá senchi puyatjusa anentaimtiagmi. Ashí wainainag juka megkaejatin ainawai, tujash eke wainainatsug nuuwai ajumaish tuke atina duka.

**5** <sup>1</sup>Jutiik, ju nugka juwi jega jegamkamu aina nunin ainaji, aak tuke pujuchua numamtin. Tujash iina iyashí aak mamumaina numamtuk wajataishkam, Apajuí tuke atinun nayaimpinum umigtamkamui amastin ajutjamui. Duka aents takasbauwa nunin achatnai. <sup>2</sup>Nuaduí wajukaik yamajam iyash nayaimpinum pujustina nu waamak jukiag tusa anentaimtunaku, shiig aneasa pujumain dekapenatsji. <sup>3</sup>Nunú yamajam iyashia nu iina wakaninak, wisú aig tusa nugkutiamanumamtuk awajkatnai. <sup>4</sup>Ju nugka juwi batsamsaik tuke shiig aneasa batsatainatsug duka, jakata tau asaik nuniatsji, yamajam iyashin Apajuí nayaimpinum umigtamkawa nu jukita tau asa nuniatsji. Wakegainaji ju iyash waitin aina ju ukuaku, yamajam jukí nu iyashimka waitkas pujustasaja. <sup>5</sup>Apajuí umigtamkawai nunú iyash ii jukitna nunak. Nuna jukitnume tujamu asa emtikak Wakaní Pegkejinak amasuí.

<sup>6</sup>Nuaduí tuke kajinmasa anentaimauk ajutjamainaji, wagki iina iyashiya jujai pujakuik, tikich nugkanum batsatu wajukmaina numamtuk, Apu Jisusjai atushat pujuinag nu dekaidau asaja. <sup>7</sup>Yamaik duka wainchayatku, jukitnapitji tusa kajintsá anentaibaunum batsatji. <sup>8</sup>Duwi wake besemjak batsattsuji, jujú iyash idaiku Apu



Jisusjai pujustasa wetinaitag nu imá senchi wakegau asaja. <sup>9</sup>Nuaduí iwaaku pujaknush, nuniachkunush ni pujamunum wakanush, niina shiig awagma nunak takagsamig tabaunum kakanmainaji. <sup>10</sup>Tsawan jegatnai ashí aentstí Kristu emtin ijunjatnaitag nunú, nunikbaunum makí makichik aents nugká pujusá takasbauji pegkega atais, tuja pegkegchau ataiskam dutiksag susatnai.

### Pablo pujutji

<sup>11</sup>Nu nuniktin dekau asaja, puyatjusa tikich aents aidaush Kristu nemagkatum tusa imatjuinaji. Nunak Apajuik shiig dekgatamui, nuniaú asamtai atumshakam shiig dekamain ainagme. <sup>12</sup>Juka ataktú jutií emematmamsa chichaaku tatsuji. Tujash jutií pegkeg tuinag nunú atumesh dekaatajum tusa wakegainaji. Nunikjum aents aidau pegkejan takaak wajukmaina numamtuk wajaina nu, wi dutikag nuna dekainatsu dushakam shiig ujakminjum tau asan. <sup>13</sup>¿Atumesh jutiik pachimasa chichau asajinig, auk imaankau asag tu yujainawai tukagtuinajum? Imaankau asaja, juka Apajuí ememattasa taji, tujash imaankau asajaik chichagkagtui-natsji, juka atum yaigkagtasaja etsejuinaji. <sup>14</sup>Kristu senchi anempa nu dekaidau asaja, niina chichameg wakeesa etsejuinaji. Nigka ashí aents aidanum mantamdauwa duwi, ni nemajuinaku ashí pegkegchau takatak idaisau asá jakaujai betek ainaji. <sup>15</sup>Kristuk ashí aentsun uwemtikatatus mantamdauwai. Nunin asamtai aents niina nemajuidauk, dita wakegamun taká batsamsuk, Kristu ditai mantamna nantakiuwa nudaun takamain ainawai.

<sup>16</sup>Nuaduí jutií Kristu nemajin aidautik Apajuí nemagchau anentaimaina nuninuk anentaimainatsji. Yaunchkek

Kristu nemagchau anentaimaina nunin aajakuitji. Tujash yamaik nuninuk anentaimtuinatsji. <sup>17</sup>Nuaduí aents Kristun nemajuidauk duwik pujutinak idayinak, yamajam pujutan jukiaju asag, dekas yamajam aents ainawai. <sup>18</sup>Ashí nu aina nunak imá Apajuik dutikawai. Nigki ni Uchijin awetugmauwa duwi niijaish igkunikuitji, dutijabau asa jutiinashkam, tikich aents aidaush, Apajuíjai pujutjum iwajatajum tusa ujaktajum tujabiuwai. <sup>19</sup>Nunak Apajuí ni Uchijin awemauwai, ashí aents aidauk epegtumatnume tusa. Dutikamu asa, iina tudauji aidaunash pachitjamtsuk idaitugmasui. Tuja jutiinak: Apajuíjai pujutjum iwajatajum, tusa chichagkagtuktajum tujabiuwai. <sup>20</sup>Nunin asamtai jutiin, Kristu mina chichameg wi tumainaitag dutiksagmek etsegtugkatajum tusa awemamu asaja, Apajuí atumin tujaamaina nunak jutiin tujamiu asamtai Kristu tawa dutiksanuk tajime: Pujutjum Apajuíjai iwajatajum. <sup>21</sup>Kristuk makichkish tudau aina nunak takaschauwai, nunikunak Apajuí jutií tudaujin niinak aents tudaujai betekak emauwai. Ni nunikbaujin iishkam uwemja niijai ijunjau asajin, yamaikish tudau ainajinig, tikima pegkegma iman diigmaji.

**6** <sup>1</sup>Jutiik Apajuí chichame etsegbaunum yaimin ainaji. Nunin asaja segajime: Apajuí wait anenkagtamun iwaintugmaku nu shiig dekaajum, ni chichamesh ayatak antukjum idaitsuk unuimagtajum tusan. <sup>2</sup>Wagki agagbaunum chichaak: “Tsawan wi antugmainaitjam nu jegau asamtai untsugkumin antugkan aikmajame, dutikan uwemainjum tsawanjum jegagtamatai yaigmajame”, tawai. Nu tsawantak yamaiya juuwai Apajuí aigmamainuk. ¡Yamaiyai tsawan uwemaina dushakam!

### Pablo waittsamují

<sup>3</sup>Tikich aidauk pegkegchaukesh iwaintuinsatsji, ii takainag nuna pegkegchau chichajinum tuidau asaja. <sup>4</sup>Ayatak dekas Apajuin inakempap ainawa tusa dekgatmatnume tabaunum, waitiakuish, atsumakuish kuashat katsuntuinaji. <sup>5</sup>Iinak achigmakag asu asutamainakua egkepawagmayi, jetepainakuish waittsabijaji, takatash imanik takabijaji, kanutskesh tuke tsawampabijaji, yujumak yutsuk yujasaishkam imanik waitbajiji. <sup>6</sup>Nu imaninakuish shiig pujuidau asá: Dekas Apajuí inakempap ainawa, tama agbajiji. Apajuin chichamega duka shiig dekainaji, nuniau asaja tikichjaish shiig anendaisha, uyumat aneakas pujuinaji. Wakani Pegkeji jutiini puja nu yaimpasmat, tikich aidaush dekas aneamunum emamkesa shiig takasbajiji. <sup>7</sup>Chicham dekaskea dushakam, Apajuí senchijí iini ajutjama nujai takasbajiji. Nunin asajin jutii shiig pujamujiya nunú, ii shiwaji aidanunum ayamjumamaina nuwúshkam yajjatkauwai. <sup>8</sup>Aents wakejutpas eme anenjamassujamainai, tikich aents dakitjamaidaush ainawai. Aents pegkegnum chichagtamainai, tikich aents pegkegchaun chichagtamainawai. Tikich chichagtamaidau: Waitjin agmae tujamainai, tikich chichagtamaidau: Waitjuchu agmae tujamainawai. <sup>9</sup>Tikich aents waipachu utugtamaina numamtuk awajtamainai; tikich aentsuk shiig waipau utugtamaina imatijamainawai. Mantamattak awajtamainai, iwaaku pujaji. Suwimkan imatijama sujamainakush mantamachajui. <sup>10</sup>Kuashat utugchat ajutjamkujaish, tuke shiig aneasa pujuinaji. Ujunauchitkuish tikichik senchi yainaji, Apajuinu tuke atina nuna jukitnume tusa. Tikichin ajuina imatiksag ajutjamchakush, ashí ajutjamainawai.

<sup>11</sup>Yatsug aidau, ubag Corintonmaya aidauwah, jutii dekaskea duke ujakbajime, ii anentaibaujiya duka uúsá

tutsuk, ashí ujakbajime. <sup>12</sup>Jutii aaja nuniajinig, atumek uúsá anentaime. <sup>13</sup>Nunin asagmin (muun uchijí aidanunum chichajama dutiksanuk tajime), wait aneasjum minash atum anentaibau ujakkatajum, wi atumin uutsuk tajim aikasjumek.

### Jutiik Apajuí jega numamtin ainaji

<sup>14</sup>Jisusa nemagchau aina nujaig nuwenawaigpa. Aantsagmek pegkegchau dutikainamush atuetukaigpa. Wagki, dita anentaime duka jutii anentaime nujaig betekchawai. Ditak Kristunak umiujinatsui. Nuaduí pegkegchaun takaina duka, pegkejan takaina nuna kumpajig amainchawai. Suwea duka tsaaptinajig apatdaimaitsui.

<sup>15</sup>Kristuk iwanchajaig makichkish apatdaimaitsui. Nunisag Kristun nemajuidashkam Kristun nemagchau aina nujaig ijunmaitsui. <sup>16</sup>Atum ainagme dekas Apajuí pujutai aidautigmek. Apajuí jeega duka apajimtai aina nuna jeeg amaitsui. Apajuí chichaak:

“Ditai pujustajai, nunikan ditajaig wetajai. Dita mina aentsug atinme, nuninaku wi dita Apají atajai”, tiuwai. <sup>17</sup>Junashkam Apajuí chichaak:

“Tupandaijatajum aents pegkegchaun takaidaujaig, nuniakjum ashí tunamamain aidau takasaigpajum, nunikagmin wi atumnak jukitjime,

<sup>18</sup>dutikan wi atumin Apa atajai, tuja atum mina uchig, mina nawantug atajum, tiuwai Apu ashí senchig-tina nunú.”

**7** <sup>1</sup>Nuna aatus anagtabau asamtai aneetaig yatsug aidauh, ubag aidauh, shiig kuitamamsa pujaku iina iyashin, wakannumash pegkegchau etamaina duka ashí idaisa pujamainaitji. Apajuí ajantusa diinaku, ni pegkegma ibauk atasa kakanmamainaitji.

### Pablo shiig aneamu

<sup>2</sup>Dekaskenum anejattsa dijattsatajum, wagki makichik aentskesh pegkegchawk takagsachmayag nuaduí. Jutiik atumin pegkegchaw etamainuk jintintuachuitjime. Makichik aentsú wajiji atankita-saikish wainkaik tsanugchabiaji. <sup>3</sup>Wika junak atumek nunin ainagme tusan augmatkun tatsujime. Yaunchuk tibaijim nunisnuk, wika atumnak aneajime ijuntsan pujustasan, jaaknush atumjaig jakatasan wakegajai.

<sup>4</sup>Dekaskenmag ii anentaibaujiya duka uusá tutsuk ashí ujakbaijime. Atumin anentaimtaknuk ememasan anentaimjai. Waitiaknush atumiin anentaimkun shiig aneasan dakunkut pujajai.

<sup>5</sup>Macedonia taawabiag duwi nagkamsa waitiag nunisaik yamaikish ayamsaik batsattsuji. Ashí yantamnum utugchatak igkuibiaji, tikich aidau jutii etsegbaunak dakituidau asag pampanjamainakui ishamkagtaku. <sup>6</sup>Tujash Apajuí aents waituidaun anentain ichichtina nunú, Titun awetugma jutiinash anentain ichichtamjabi. <sup>7</sup>Tujash imá ni taa duwikik nunikchamjai, ni atumin waipak ichichmamjau asa, atum jutii wajatkatasa wakegamun, nuigtú wi waitiamu antukjum kuashat wake besemag batsatkujum, uyumatjuinajum nuna ujatkamtai antukan, nuní nagkaemasan shiig aneasmajai.

<sup>8</sup>Tuja wi papí agaja awemamu ausajum, imá senchi wake besemag anentaimsamugmin ujatkamtai antukan, wishakam kuashat wake besemag dekapjabiajai. Nuniknush nunakek anentaimtuk pujatsjai. Dekas awemamainchauna awemayag tusankesh anentaimtatsjai. <sup>9</sup>Yamaik shiig aneajai, tujash atum wake besemag batsamsajum duwi nuniatsjai. Atum wake besemag batsatkujum Apajuiyai ataktú

wakitkijum duwi. Duka Apajuí dutijamkui nunikugme, nuaduí atumin pegkegchaw awagmamaina duka dutikashjiapi taji. <sup>10</sup>Apajuí wake besemag anentaimtijama nunak, iina pujutin yapajia uwemjati tusa dutijamui, nuniau asamtai nu anentaimtaku waitú pujumainuk atsawai. Untsu Apajuí nemagchaw aidau wake besemag dekapenayatak pujutjin yapajinashkug, Apajuiyai tuke kanaak kanamain ainawai. <sup>11</sup>Atumek wake besemag pujakjumes Apajuí wakega dutiksagmek katsunjaugme. iNunú yamai diistajum waji ajutjamsaje! Nunak atumiin utugchat awa nuna shiig dekamtijamak, minashkam ayamjutkatatus dutijamawaje. Kajeamush, nuigtushkam ishamamush ajutjamsaje, nunikjum mina waitkatasajum wakekaugme, nunikjum ya pegkegchaun takaawa dusha suwimak susaugme. Nu dutikaujum duwi iwainmamkaugme, atumesh dekas nunú pegkegchaw dakituinajum duka. <sup>12</sup>Wi papiin agagmayag nunak imá aents pegkegchaun takasua nuna yaigtasanuk agagchabiajai. Nuniachkunush pegkegchaun takasua nuna apajin yaigtasan-kesh agagchabiajai. Ayatak atum jutii puyatjussum antugkagtajum nuna iwaintuktasan agatjamjime. <sup>13</sup>Ashí nu atumin nagkaetamkiuwa duka jutiinak ichichtamjauwai.

Tujash nunú ichichmamjamua nuní nagkaemas shiig aneasmaji. Tito shiig dakujus pujau wainku, duka ashí atum aidautigmeap dakujutak egketuaugme taji. <sup>14</sup>Wi atumin ememattsan anentaimtamun Titunash ujakmajai. Nuna tija nunak pegkegchaw juwakchajai. Ii ashí dekaskea nu pachisa atum ememattsatibaijim nunisag Titushkam waipakaje. <sup>15</sup>Nigka atumnak senchi anempajume, ni atumin segapakuish betek umijajak-

bau asa. Nuigtushkam eme anentsá jukimu asa. <sup>16</sup>Wika atumiin shiig kajinmamsan pujag duwi shiig aneajai.

**Jerusalegnunia Kristun  
nemajuidau kuichik susatin  
anentag ijumjamu**

**8** <sup>1</sup>Yatsug aidauh, ubag aidauh, Jisusa nemajuidau Macedonia batsata nuna Apajuí wajak wait anentamujin ditan iwaintuke nuna pachisan ujaktasan wakejajime. <sup>2</sup>Ditak senchi waitiamunum batsatiatak, shiig aneasag dakunkut pujusag ujunauch ainayatkush, wiyakuch wajakmaina imaniasag wakejus tikichin anentag yaigkaje. <sup>3</sup>Wi dekas wainkamujun ditanak etsegtajai, dita dutikmainji ajamun diisag wakejus, dita anentaim-tusbaujin inagkeasajashkam anenjauch susagmayi; <sup>4</sup>ditak nagkabiag, yatsug aidau, ubag aidau, Apajuí nemajuidau Jerusalén batsata nunú yaigmí taji tusag segatiagmayi. <sup>5</sup>Wi anentaimtusbauwa nuna inagkeasag dutikawagmayi. Dekatkauk ashí ditá pujutinak Apu Jisukristun idaitusag, nuaduí wi Apajuí wakegamun taja dutiksag umikagmayi. <sup>6</sup>Nuaduí Tito chicham susá awemaji, ni anuí taa, atum tikich wait anenjatin ijumkujum nagkabauwaitjum nuna jukiti tusa. <sup>7</sup>Atumek ashí wagaagme, Kristui dekaskeapi tusa nemagtanmash, tikich chicham dekatnumash, dekaskea nu shiig dekatnumshakam, atum jutiiní unuimajuitjum dutiksagmek, tikich aidaushkam aneasjum yayajume. Antsagmek atum tikich wait anentsajum yayajum nuwishkam wagatajum.

<sup>8</sup>Wika ju dekas umiktajum tusanuk tatsujime. Tikich aidau dekaskenum anenkai wajak shiig wakejus aikainawa nuna wainkatnume tusan tajime. <sup>9</sup>Atumek shiig dekaagme, Apu Jisukristuk wiyakchaitak atumin wait

anenjamu asa, ujunauch wajas tauwa duka. Nunak ni anentag sujamsauwa duwi, atumnashkam dekas shiig pegkeja nuna jukitnume tusa dutijabauwai.

<sup>10</sup>Wika junak atumin shiig awajta-maina nuna pachisan tajime, tikich mijan nagkaemakmaya duwi kuichik anentag ijumkujum nagkamauwaitjum duka, dekaskenum dutikatasajum wakekauwaitjume. <sup>11</sup>Atum wakeasa dutikami tusa kuichik ijumat nagkamau-waitjum duka, yamaish wajupa kuichkish ajutjamainawa nunú ijumjajum idaisatajum awemanti. <sup>12</sup>Wagki, aents wakejus sukagta nuna Apajuik shiig anentus jujawai, wajupau-chia anenjauch suwawa nuna. Apajuik aents shiig atsuja nunak segatsui.

<sup>13</sup>Junak tikich yayakjum atum waittsatajum tusanuk tatsujime. Mai betekak atum atsumamua dusha ajutjamtinme tusan tajime. <sup>14</sup>Yamaik atum dita atsumainakui yaimainuk kuashat ajutjamainawai; tikich tsawant-in atum atsumtaish dita yaimpamain ainawai. Junak mai betekak atum atsumamua dusha ajutjamtinme tusan tajime. <sup>15</sup>Apajuí chichame chichaakushkam: “Kuashat jukiuiwa nudaush ampinjachui, tuja machik jukiunush tagagchawai”, tawai.

**Tito kumpajijai awemamu**

<sup>16</sup>See tajai Apajuin, wi atumin yaigtasan wakegag nunú wakeetanak Titunashkam susau asamtai. <sup>17</sup>Wi awemag juna juki, niishkam atumiin minitatus wakegau asa, wakejus minawai atumin waipaktatus.

<sup>18</sup>Titujai awemajai makichik yatsutan, ashí tikich Jisusa nemajin aidaush chicham yamagma juna shiig jintinkag-tawai tusag wakejin agma nuna.

<sup>19</sup>Niinak Jisusa nemajin aina nu jutiijai minití tusa wakegainawai. Ujunauch

aidau Jerusalén batsata nu kuichik susami tabaunum. Jutii aaja dutikamunum ditak Apajuin see tuinak, tikich Jisusa nemajin aidau yaigtasa wakegag nunash dekaawagatatu. <sup>20</sup>Nunú yatsut atsumaidau yaigtinun, anentag kuashat kuichik ijumjamu juwinag nuna pachisag, wainak augmatjamsainum tuidau asaja tuke kawemak yujainaji. <sup>21</sup>Nuniaku itusaik pegkeja duke takasag tusa kakanmamainaji. Imá Apajuí emtinig iwainmamkatasa nunitsuk, aents aidaush jutii shiig takainamun wainkatnume tabaunum.

<sup>22</sup>Ditajai awemajai tikich iina yachí ashí wajiinum kuashtá dekapsamua nuna, nigka shiig kuitamas takauwai, yamai atuminish shiig kajinmas anentaimin asa wakegas minawai. <sup>23</sup>Titun pachisan tajime: Nigka wijai atuegak atumi yaimpaktatus takauwai. Tuja tikich yatsug jimaja nunak, Jisusa nemajin aina nu awemainawai. Ditashkam Apu Kristun emematin ainawai. <sup>24</sup>Jisusa nemajin aidau dekaatnume tabaunum, atum dita aneamugmish iwaintuktajum, jutiiik atum eme anentaimtuidau asa tajime.

**Jisusa nemajuidau yaigtasa  
kuichik ijobau**

**9** <sup>1</sup>Wika Jisusa nemajuidau yaigtinuk kuichkik ijumjau asagmin, ataktú ijumjatajum tusanuk agatmaitsujime. <sup>2</sup>Wagki, wika atum wakesajum dutikamugminak shiig degagjime, nunia asan Macedonia nugkanmaya aidaun ujaknush, atumí eme anentsan ujainajai. Nuniakun Acaya nugkanmaya aidaush tikich mijanae duwi nagkamas, dita yaimkatnuginak umintsaje tajai. Nunú atum wakejusa dutikamun, Macedonianmaya antukag senchi wakekagmayi. <sup>3</sup>Atum imaniagminig yatsug aidaun awetajime, wi atumin

ememattsan chichaag nuna wainak tu wekaguwa nunin diigsainum tusan, wi etsegtajim nunisjumek umintsajum asatajum tusan tajime. <sup>4</sup>Macedonianmaya aidau wijai anuí takamá, wi tajim nuninchaun waipainakuig, atum datsamain aig, ii atumiin kajinmasa chichakú asaja jutii datsamainaitji. <sup>5</sup>Nuaduí nunin ai tau asan, ju yatsug aidaun: Atum emkajum wetajum, nunikjum tikich mijan nagkaemakmaya duwi yaimkatnun wakejus nagkawagmaya nuna ijumjatnume yaigtajum, tusan awemajai. Aatsa ijumja umisjum asatajum sujimayatku dutiktusuk, wakejusampap jutikainawa tumain atí.

<sup>6</sup>Jushakam adeagtajum: Ajakan machik ajauk machik juwaawai, kuashat ajakmakushkam kuashat juwaawai. <sup>7</sup>Makí makichikitjum atum wajuk susatjai tusagmae anentaimsaugme, dutiksagmek susatajum, junik anentaimiatkujum, nuniachkugmesh tikich apusata tujamainakuí dutiktusuk. Apajuik ya wakejus suwawa nuna imá shiig aneawai. <sup>8</sup>Apajuik ashí pegkeg aina nunak amainawai, dita atumaina duka imanisag ajitnume, nunitai tikich aents atumaina nunash yaigtinme tau asa. <sup>9</sup>Agagbaunum chichaak:

“Ujunauch aidaun kuashat susaja nunak,  
Apajuik kajimatjukchatnai dita pegkeg dutikamujiya nunak”,  
tawai.

<sup>10</sup>Apajuiyai ajak ajakmatnun, nuigtú yuwatnunash sukagtinuk. Nunin asa ajak ajakmamunash nigki tsapapak kuashat nejepitka numamtuk, atum wakesajum yaimjum nunak, nuní nagkaemas kuashat sujamsattagme, tikichin pegkegnum yaigtinme tusa.

<sup>11</sup>Dutikamu asajum, ashí atum tikich yaimainush ajutjamtatjume. Atum kuichik ijumjajum jutiiiní awemattajum

nuna, yatsug aidau, ubag aidau waituidau jukiag, Apajuin see tiagtatui.

<sup>12</sup>Yatsug aidau, ubag aidau yaigtin juwinag duka imá atsumamujinigi yaigtasaik juwinatsji, duka Apajuinashkam see titinme tabaunum dutikaji.

<sup>13</sup>Ditak Apajuin emematiagtatui, atum yaigtatjum duka Kristui dekaskeapi taji tau asajum umigjum nu iwainmamkujum dutikattajum duwi. Nuigtushkam ditak Apajuinak eme anentus diisagatui, atum dita wakejusjum yayakjum, tikich aidaush yaigtatjum nuaduí.

<sup>14</sup>Nuninak atumin anempas Apajuin aujtugmagtatui, Apajuí shiig kuashat wait anenkagtamujin atumin iwaintugmakaja duwi. <sup>15</sup>See tajai Apajuin, chichamaikish tumainchaun shiig kuashat anenjauch sujamsauwa nuaduí!

**Pablo ni takaamuj  
ayamjusa chichaamu**

**10** <sup>1</sup>Witjai Pabloitjai, Kristu kakagchauh nuigtú wait anenkagtin aajakua dutiksanuk segajime. Mina chichagtuinak: Pablok jutiijai pujusag senchi ajankagtinuwe nuninaitak atushat kanaká kakaakan chichagkagtawai tujutuinaawai. <sup>2</sup>Duwi segajime: Wi atumin wainkatasan taakun, jutií pachijatus aents wakegamun takainawai tukagtuina nuna, shiig titajai tusan umintsan pujag nuna kakaakan tiig tusan. <sup>3</sup>Dekaske, jutiik aents ainaji, tujash pegkegchaujai maaninag duka shiig aentsjai maanimaina nunikaik maaninatsji. <sup>4</sup>Wagki, maanitai takuinakag duka ju nugka juwiya ainatsui, duka Apajuí senchijí ashí pegkegchau aidaunash tsaimaina nu ainawai. <sup>5</sup>Nunú senchia duwik, ememainak wainak chichagkagtuina duka itatmitkamainaitji. Dutiksaik aentsú anentaimtajishkam yapagtumainaitji, Kristu umigkatnume tusaja. <sup>6</sup>Ashí

atum Kristu chichame shiig umigkugminig, wishakam atum ainajum anuiya chichaman umiinachunak suwimkan sumainaitji.

<sup>7</sup>Atumek mina niimjuí diigsagmek, paan kakakchauwa nunin diigjume. Atum ainajum anuiya, wika dekas Kristunuitjai tumamuk, minashkam niish Kristunuapi tujutmainai. Wishakam Kristunuketjai. <sup>8</sup>Atum tumamjum nuna nagkaesau ememasan, witjai chicham etsegugkata tusa awemamunuk tumamkunush, Apu Apajuí atum yaigtinun sujamsamu tajim nuaduí datsamatsjai. Atum dekaskeapi tuinajum nuna emegkatkati tusa awetichui. Ayatak atum dekaskeapi tuinajum nuna yaigtí, dutikawajam nuní nagkaemas Kristui kajinas anentaimtinme tusa awetiu asamtai. <sup>9</sup>Wi papiin agajan awetajim junak, uwaktamkatasampap awetugmawa tujuttinme tusanuk wakegatsjai. <sup>10</sup>Tujash awai mina pachittsag: Pablo papiin agag awetugmakug najamnun tujamji, tujash taa pujakug chichamesh puyatjusa antugmainchauwe tujutuinaawai. <sup>11</sup>Nuna aents aatus tujutuidaushkam dekaatnume: Wi papiinum agakun timayag nunak, anuí taaknushkam imatiksasuk umikatjai.

**Aents pegkejak nigki  
pachimasag chichachui**

<sup>12</sup>Wika aents ditak emematmamas chichau aina nujai betekak chichamaitsuji, ditak wainak tumainchaun ditak pachimasag, tikich aina nunin achainjias tusag tu yujainawai. <sup>13</sup>Tujash jutiik ii takaschamunum emematak shiig dakitin ainaji. Apajuiyai jutiish wajuk dutikmainaitji nuna tujamuk. Nigki jutiinak atum Corinto batsatjum anuish takastí tusa wakejutpaji. <sup>14</sup>Tinak Apajuí atumiin awetabaiju

asantai, atum Corintonmaya aidautig-mijaig takasbaiji. Jutiityaitji dekas atumiin taa tikichish etsegchamunum Kristu pachisa etsegkautik. <sup>15</sup>Jutiik ii takaschamu aig, tikich takasbaunmag ememamaitsuji. Ayatak wakeesa dakainaji atumjai aan kuashat takastasa. Atum Kristui kajintsá anentaimjum nu aan nagkaemas ajutjamti tusa. Jutiik Apajuí dutikata tujabauwa duka dutiksaik takainaji. <sup>16</sup>Nuniaku tikich atushat batsataidau yamajam chicham ujakchamu aina nunú ujaktasa wakegaji, tujash tikich chicham etsegkamunum waitsuk, tikich takasbaunum ememaig tuidau asaja.

<sup>17</sup>Jutiikek eme anenmamaitsuji, ayatak Jisukristu takaamujiya nunú eme anenmainaitji. <sup>18</sup>Aents pegkejan takaajai tumama duka wainkayai, dekas Apajuí aentsun pachis, pegkejan takaawai tawa nuuwai dekas imanuk.

**Waitá etsejin aidaun  
pachis Pablo tibau**

**11** <sup>1</sup>Wi imaanjau chichamaina numamtuk wajakuish, katsun-tsajum antugtuktajum. <sup>2</sup>Wika Apajuí akasmataijiya nuna jukiú asan atumnak akasmainaitjime. Kristuig wi atumnak jukin ejeentauwaitjime, niinig pujusjum imá nigki umigkujum, nuwa aentsun adijkachu ni nemaktinjijaig dakaniyama nunisjumek pujustajum tusan. <sup>3</sup>Tujash dapi Evan tsanujua numamtuk atumnashkam tikich waitan jintinkagtin aidau tsanugmainakui, Kristu aneakjum nigki umigjum nunú idaisaijum tusan imá puyatjajime. <sup>4</sup>Atumek, jutii Jisus pachisa etsegkamua nuna tikich aents yajupia chichagkagtuinak, Wakaní Pegkeji jukiúwaitjum nunash pachitsuk, yamajam chicham etsegkamua nunash yajá jintinjainakuish, shiig antugkasajum wakegajume. <sup>5</sup>Tujash wi anuí

taan wakitkiu ai, Jisus awemamu ainaji tusag kautjamawaja nu dekas iman anenmamaina nuna nugkaanik anenmamtsujai. <sup>6</sup>Wi shiig chichachkunush dekatjuig nuninchauwaitjai. Nunak ashí ii dutikamunum tuke iwaintibiajime.

<sup>7</sup>Atumin Kristu pachisan ujaknush kuichkinak segachuitjime, ayatak yaigkan emtikata tau asan. ¿Nuna dutikauwaitag duwiká minak pegkechawai tusajum dakitjajum? <sup>8</sup>Wika tikich nugkanmaya Kristu nemajin aidau kuichkin akigkagmatai, nunú kuichkia duwik atumin yaigtasan wekaeyajai. <sup>9</sup>Wi atumiin pujubiag duwi atsumaknush makichkitigminakesh waitkaschabiajime, yatsug Macedonianmaya aidau taawag ashí wi atsumamunak sujusagmayi. Atumin waitkasaig tusan senchi kuitamamaijai, dutiksanuk atakea duwish wika atumnak tuke waitkaschatnaitjime. <sup>10</sup>Kristui dekaskeapi tau asan dekaskea nunak chichaajai. Nunin asan tajai, Apajuí nemajin Acaya nugkanum batsamin aidaunak makichkish kuichik sujustajum tusanuk segashtinaitjai. <sup>11</sup>Juna wi atumin wakejachu asanuk ¿tu chichagjim? Wi atumin senchi wakejajim nunak Apajuí shiig dekawai.

<sup>12</sup>Wi chichaag jutiksanuk mina takatjunak emattajai. Imaniakun tikich aents waitan jintinkagtin ainayatak, dekas jutii Apajuí awemamu ainag imajuk anenmamaina nunak imijkattajai, aentsun tsanujainum tusan. <sup>13</sup>Ditak waitá etsejin tsanumin ainayatak, Kristu awemamu wajukmaina numamtuk wajainawai. <sup>14</sup>Dita nunina duka wainchataiya nuninuk anentaimtumai-tsui, iwanchakam dita wajukena numamtuk, Apajuí aentsji nayaimpinmaya aina iman weeta wajuawai. <sup>15</sup>Nuaduí iwanchin takajin aina duwi,

aents pegkejan takauwa iman wantinainawai. Tujash nu aents aidauk dita takasbaujiya dutiksaik suwimak suwam agtinai.

**Pablo waittsamu**

<sup>16</sup>Awentsanuk tajime: Wait aneasjum imaanjauwa nunin anentaimjutkugmesh ayatak diigsatajum, wishakam shiig agkan ememasan chichastajai. <sup>17</sup>Wi chichaag nunak, Apu Jisus titá tujutbaun tatsujai. Nuaduí imaanjaujai betek chichaajai wi emematmamsan chichaag nunak. <sup>18</sup>Tujash tikich ainawai ditak emematmamas chichaidaush. Nunin asantai wishakam wiki emematmamsan chichaajai. <sup>19</sup>Atumek shiig anentaimkau asajum, tikich anentainkachu chichaman etsejuinakui shiig antujuinagme. <sup>20</sup>Atumek ashí aentsuk antujuinagme. Tsanugmajag ditan inake etamkatatus wakejutpaidaushkam antugjume. Kuichkin jujutjamaina dushakam imatiksagmek antugjume. Aikasjumek pegkegchau chichagtamainak, yapiminish awatamaina dushakam shiig anentsajum antugkujum umigjume. <sup>21</sup>Datsamayatkun tajime, jutiik tikima kakakchauch asaja nu imanuk nunikchabijai.

Tujash tikich ditak emematmamaina nunisnuk wishakam emematmamjai (imaanjau wajakumaina nuniaknush). <sup>22</sup>Dita hebreo aina nunisnuk, wisha hebreowaitjai. Dita Israel aents aina nunisnuk, wishakam Israel aentsuitjai. Dita Abraham wegantu aina nunisnuk wisha Abraham wegantuitjai. <sup>23</sup>Kristu inakegaitjai tumamainawai, tujash witjai dekas ditan nagkaesaunuk. (Imanaitkun imaanjaujai betek chichajai.) Wika takatnashkam ditan nagkaesau takasuitjai. Ditá nagkaesan achinkanush egkemaawaitjai, ditá nagkaesau asutnauwaitjai. Kuashtá mantumain

awajtukaju ainawai. <sup>24</sup>Cinco imaniá mina pataag judío aidau achigkag, treinta y nueveaya imaniá asutuawaju ainawai. <sup>25</sup>Kompatuma imaniá numí suwimjuawajui. Makichkia kayai kuashat aents tukujajau ainawai. Kompatuma imaniá lancha wi wegamu tepeauwai, nunikmatai jakemain wajakan, makichkiá nayantsa ejapeen tsawampajuitjai. <sup>26</sup>Kuashat wekaesawaitjai, namak ishamainnum, kasa ishamain ayamunmash, mina pataag judío aidau, tikich aents Apajuí nemagchau aidaujai kajegtuinakui. Nuiqtú ishamain aidau yaaktanum, uwegshunum, nayantsanum wegakun, tuja Kristu nemagnaitjai tusa tsanumaidaunum wekaekun. <sup>27</sup>Senchi takasan yaweakun, kuashtá kanutsuk tsawaakun, yapajakun kitamakun, kuashtá yujumkan yutsuk wekaekun, tsetsekai waitiakun, jaanch atsugtakuishkam waittsauwaitjai.

<sup>28</sup>Juna imaniaknush, kashí kashinig Jisusa nemajuina nu uyumamuk tuke ajutui. <sup>29</sup>Makichik aentskesh Jisusa nemajin waitiakui, wishakam waitiajai. Pegkegchaun takasagmataishkam, ditan yayakun nuna pegkegchaun takamti-kaun kajejajai.

<sup>30</sup>Wi ememamainaitag nunak, Apajuí wi kuashat ishamainnum wekaekun kakakchau anentaimtaish yainkauwa duwi ememamainaitjai. <sup>31</sup>Apajuí, ii Apuji Jisukristu Apají nigki tuke ememattaya nu dekagtawai wi dekas taja nunak. <sup>32</sup>Damasco jegaa ai, Apu Aretas tutaya nujai takau aidau, ashí yaakta waitijin achijatin aidaun dakamtijagmayi mina achigkag jujukatus. <sup>33</sup>Tujash Kristu nemajin aidau chagkinnum egketuawag, yaakat peegmagbau ventanajin detuawag ajuntuawagmatai, uwemjauwaitjai achigkata tuinamun.



**Apu Jisus Pablo iwaintukbau**

**12**<sup>1</sup>Dekaskenmag wiki ememat-mamtak shiig awajatsui, tujash Apu Jisus mina iwaintugkamun wainkauwaitag nuna tajai. <sup>2-3</sup>Wainjai makichik aents Kristu nemagnun, catorce mijan nagkaemawai kampatum nayaimpia nui iwakbau aajakua nu. Shiig dekatsjai ashí iyashijai jukimpash iwakabia, atsa nuniachkush wakanina-keash jukiabia, nunak imá Apajuik dekawai. <sup>4</sup>Duka nayaimpinum iwakam wajasá, chicham antushtain antukui makichik aentskesh ujamainchaun. <sup>5</sup>Nu aentsua nuna wika emematmainaitjai, tujash wika makichkish emematmamait-sujai, ayatak wi kakakchamujua nuwi emematmamjai. <sup>6</sup>Tujash wi ememat-mamtasan wakegaknush, tikima wainkanuk tumaitsujai dekaskea nuna tau asan, nunin aig nunak tatsujai, mina imá eme anenjutsuk pujutjun diigtusag, wi chichaamugnash antugtuktinme tusan wakegau asan.

<sup>7</sup>Apajuí mina dekas imanun iwaintug-kauwa duwi, ni imá wagaaku anenmami tujutu asa Apajuí jatan sujusuí, nunú jatak mina iyashjunak jagkí ijuam najaamaina imatijauwai, nunak iwanch dutijauwai mina waitkagsatatus. <sup>8</sup>Dutijuamtai Apajuin kampatumá segajai: “Wi waitiag nuna emegkatjukti”, tusan. <sup>9</sup>Tujash Apu Jisus chichagtak: “Amek wi aneamu asam, ashí ame atsumamugmea dushakam imanísag ajutjamtatu, wagki mina senchijua nunak aents kakakchauwa nui iwainajai”, tujutmayi. Tujutiu asamtai shiig anejai wi kakakchauwaitag duwi, Kristu senchijiya nunash dekaatnume tau asan. <sup>10</sup>Nuaduí shiig anejai kakakchau asan. Pegkegchaun chichag-tuinakuish, atsumaknush, mantuatatus aintuinakuish, utugchat ajutkuish Kristu

nemagbaunum imanikan waitiajai. Kakakchauwa nunin diijuinakuishkam, wika Kristu senchijí ajutu asamtai, wishakam senchigtin dekapmamjai.

**Pablo Kristu nemajuidau  
Corintonmaya uyumasa  
anentaimtamu**

<sup>11</sup>Wi imaanjaujai betek mina pujutjun pachisan chichakmayag duka, atum chichamtijukmaugme. Wagki, atum mina pachittsajum pegkegnun chichag-tumaina nu, tikich waitá jintinjamainak, jutii ainaji dekas chicham antujam amaintik, tuina nu antujuinakjum, minak imanchau diiju asagmin. <sup>12</sup>Wi atumiin pujusnuk shiig emamkesan kuitabajime. Dutikakun atum wainkashbau aidaunashkam imanik iwaintakun, jaunash etsagauyajai. Imá jaunak dutiktsajai, ashí tikich aidaunashkam imatixsanuk dutikajai, atumshakam wi dekas Apajuí awema-muitag dusha dekajuatajum tau asan. <sup>13</sup>Atumek imá makichik wáji dutikach-baunmag, tikich Jisusa nemajuina nujai betekak juwakchaugme, wi atumin: Yainkatajum, tusan segachuitjim duwi. Tujash wi atumin wake besemag egketuauwaitjim duka tsagkugtugtajum.

**Pablo kampatuma junash  
ijagsatjime tibau**

<sup>14</sup>Kampatuma junash ijagsatjime tusan umintan pujajai. Yamaishkam wi atsumamu sujustajum tusanuk waitkas-chattajime. Wika atumin ajutjamaina nunak egatsjai, imá atumnak wainkata-san wakejajime. Aents uchigtin aina nuuwai uchijinu atinun kuichkin ijumaina duka, uchi aina duka apajinu atinnak dutikmaitisui. <sup>15</sup>Nunin asamtai wakeesan ashí wi dutikmainaitag nunak yaigta tajime. Nunisnuk mina iyashjuish waittsattajai, atum wakanmiin megkae-

kaijum tusan yayakun. Wi atumin imá senchi aneajime, dutikamaitkujum atumek minak imatikajum anentsugme.

<sup>16</sup>Wi atumin segakun waitkaschauwaitjim nuna shiig dekaajuinayatak, wainak ajankas tsanugmagtatus tu wekaewai tujutuinawai. <sup>17</sup>¿Wisha tikich yatsug aidaun awetibiajim duwiká tsanugbaijim? <sup>18</sup>Titun atumiin awemakun niijai tikich yatsutan awemabijai, ¿Duká tsanugmajmaya kuichkin sujustinme tusa? Tituk wijai betekai, wagki atumin yaimpaktatus wijai betek takau asa.

<sup>19</sup>Aneetaig yatsug aidauh, ubag aidauwah, atum anentaimesgme, tuke aneas ayamjumakgtatus tuinatsuash tautigmesh amainaitjume, tujash nuninchauwai. Jutiik ayatak Kristu nemajin asaja, Apajuish dekamunum shiig pujustinme tau asá yaigtasa taji. <sup>20</sup>Wagki, wi atumin wainkatasan takaman, atuminian pegkegchau wainkata tachamun atum jiyaniakjum, wainka kajekgtakjum, kajeakjum tupandaikajum, pegkegchau chichagdayakjum, chicham patatdayakjum, ememakjum, wainka pachimdaekajum batsatjumin jegashtajash tusan puyatajai. Nunú nuniakjumin wi atumin kajegkan jiyaka ai, atum minai pegkeg dekatasa dakagbauwa nu nuninchau diigsaijum tau asan. <sup>21</sup>Nuigtushkam puyatajai wi ataktú ijagsattajim duwi, atum ainajum anuiya yaunchuk nagkamas tudau takainak, pegkegchau takataijinak idaitsuk, tsanijimtanak tunamatjag batsamtau asagmatai, Apajuú atumiin datsamtan sujusmatai buutig tusan.

**Anemtikaku inagnaku  
kumpamkagtamu**

**13** <sup>1</sup>Yamai minittag nuuwai kempatuma juna ijagsattajim nu. Aents pegkegchau takaun wainkau,

jimag nuniachkush kempatumkesh etsegtuinakui, atum wajuk dutikattagme duka tumainaitjume. <sup>2</sup>Yaunchuk wi jimaja juwi ijagsatasan tajuawabiajim duwi, pegkegchau takaajum duka idaisatajum tiuwaitjime. Tuja nui pujus tikich pegkegchau takaunash suwimkan susattajai tiuwaitjim nunak awentsanuk tajime: Wi anuí atumin ataktú ijagsatasan minittag nunikman, pegkegchau taká batsatjumin wainkan suwimkan amasaijim tusan. <sup>3</sup>Nuna dutikakui, Kristu nigki niina takatjin inata duka shiig dekaattagme. Kristuk atumin dutijamatta duka kakakchauchui; niina senchijinak atumiin iwainaktatui. <sup>4</sup>Dekaske nigka senchigtuchua nunin wajasuí, nunikmatai yupichu achijaju ainawai, tujash yamaik Apajuú senchijijai pujawai. Jutiishkam nunisaik ni kakakchau aajakua nuninuk ainaji, tujash Apajuú senchijin Kristujai ijunja pujuinaji, atum chicham ujakta tau asaja.

<sup>5</sup>Atumek niimastajum dekask pegkejash takaajum, atsa pegkegchawash takaajum nunú. Atum pegkeg takaakjumek Jisukristu atumiin pujau asantai nuniagme. Tujash Apajuuiyai kajintsá anentaimechakjumek, pegkegchau takaakjum nuniagme. <sup>6</sup>Atumesh itusagmek jutii kuashat dekapsamu asaja, dekask Kristu chicham etsegtugkata tusa awemamu ainag dusha dekaawajum tusan wakegajai. <sup>7</sup>Nuniauan atumshakam pegkegchau takasajum tusan Apajuin ujtajime, wi Apajuin aujag nunak, wi Kristu chicham etsegtugkata tusa awemamuitag nuna dekajuatnume tusanuk tatsujai. Nunak ayatak pegkeja nuna takastinme tusan tajime, atum jutii Kristu awemachbauwa nunin diijatjuminig. <sup>8</sup>Jutiik dekaskea nuna shiwagmamaina duka makichkish takamaitsuji, chicham

dekaskea duke takamainaitji. <sup>9</sup>Atum shiig ichichmamjajum pujajum duwi, wi kakakchawaitkunush shiig aneasan pujajai, nuniau asan pegketnume tusanush Apajuinak tuke aujtajime.

<sup>10</sup>Nuniau asan eke atumiin minitsuk, juna papiin agajan awetajime, wi atumiin taakun najam tiijim tusan, Apu Jisusak atumin waitkasti tusag senchijinak sujuschauwai, ayatak atumin yaigtí tusa sujusuí.

**Ashimku akatmabau**

<sup>11</sup>Yatsug aidauh, ubag aidauh, juna inagnakun tajime: Pegké pujakjum

dakujusa pujustajum, nuniakjum ichichdaitajum, makichkia duke anentaimtuinakjum shiig agkan anentaimsa batsamsatajum, Apajuí atumin anempau asa pegké pujutan sujamsawa nunú atumiin atí. <sup>12</sup>Makí makichkitijum pempentunisjumek shiig anendaisajum kumpamdayatajum. Jisusa nemajin juwi batsata dushakam ashí kumpamjamainawai.

<sup>13</sup>Apu Jisukristu wait anenkagta-muji, Apajuí anenkajiya nu, Wakaní Pegkejiya dushakam ashí atum aidaujai atí.

Aatus atí.

# PABLO PAPI' AGAJA

## GALACIANMAYA AIDAU AWETIMU

---

### Pablo Galacianmaya aidau kumpabau

**1** <sup>1</sup>Witjai Pabloitjai, aentskesh awemashbauwaitjai, wika Jisukristu maamu aajakunak ni Apají Apajuí inankiuwa nunú awemamuitjai. <sup>2</sup>Nunin asan wi juwi ashí yatsug aidau, ubag aidau Jisusa nemajin batsata nujai kumpamkun papiin agatjime, atum Galacia nugkanum batsatjum nuna. <sup>3</sup>Apajuí iina Apajiya nunú, Apu Jisukristujai wait anenjamag, shiig agkan anentaimsa pujutan atumnash amastinme. <sup>4</sup>Jisukristuk nigki jutii tudaujin mantamnatatus tsagkamankauwai, yamai ju nugka tudaunum batsatainag nui agkanmitkagmata tau asa, ii Apají Apajuí wakega nunisag. <sup>5</sup>Nuaduí iApajuiya duka tuke ememattai atin atí! Aatus atí.

### Atsawai tikich chicham uwemtan sukagtumainuk

<sup>6</sup>Atum Kristu wait anenjamjamtai Apajuí nemagkauwaitjum nunú, tikich aidau yamajam chicham uwemtan sukagta nuna yapajia etsejuinamu antukjum, Apajuí tujanjaujum nuaduí anentai jegatsjai. <sup>7</sup>Dekaskenmag tikich yamajam chicham etsegbau asamta-gish tuinatsui. Nunin aig tikich aidau tsanugmainakui nuniagme, nu aidau Kristu chichamen emesjatatus wakegai-

nawai. <sup>8</sup>Tujash jutii pegkeg chichaman atumin ujakuitjim nuna, nayaimpinmaya aentskesh yapajia jintinjabiagtaik, Apajuí suwimkan sumainai. Minashkam wi tibaujun yapajian jintiitaik nigki suwimkan sujumainai. <sup>9</sup>Duwik timajim nunak awentsanuk tajime: Makichik aentskesh, yamajam chicham antukuitjum nuna yapajia jintinjabiagtaik Apajuí suwimkan sumainai.

<sup>10</sup>Wi juna tajim nunak aentsun shiig awajkatasanuk tatsujai, wika Apajuí shiig awajkata tabaunum takaajai. Aents aidaujai shiig juwakta tusanush egatsjai, wi aentsun shiig awajkatasan nuniak-nuk Kristu inakechu amainaitjai.

### Pablo takatji

<sup>11</sup>Yatsug aidauh, ubag aidauh, ju shiig dekaatajum: Wi chicham yamagman etsejag junak aents anentaimsa tibaunak aentskesh etsegsujai. <sup>12</sup>Wika aentskesh jintinjuamtaig dekaachuitjai, imá Jisukristua duke minak dekamtiujauwai.

<sup>13</sup>Atumek wi yaunchuk mina pataag judío aidau takataijin umiakun wajak pujujakuitja duka antukuitjume, Jisusa nemajin aidaun ainjan, dita chicham antuinamujin emegkatkatasan wekaetuyag nunú. <sup>14</sup>Wika mina nugkajuiya aents wijai betek tsakakú aidaunak ashí wagagsan, mina muuntug judío aidau umitajii aina nunak imatiksananuk

umikuitjai. <sup>15</sup>Tujash Apajuí wisha akiintsai, wait anenjug minak etegtuauwai. Dutijuau asa, <sup>16</sup>niina Uchijinash iwaintugkauwai, judiuchu aidaunash Kristuk dekas Apajuí Uchijiyai tusa ujaktí tujutu asa, dutijuamtaish aents aidaunak: Wajukat-taja, tusanuk iniaschabijai. <sup>17</sup>Mina, Jisus chicham etsetugkata tusa eke etegtatsai, yaunchuk etegjamu aidau Jerusalén batsatunakesh jegajuan iniasta tusankesh wetsuk, tutupnik Arabia nugkanum wenu wakettsanuk Damasco jegauwaitjai.

<sup>18</sup>Jisus wantintugkamupatun mijan nagkaemai, Jerusalén Pedro wainkatasan jegaan, nijai quince tsawan pujusuitjai. <sup>19</sup>Tujash nuwig Jisus mina chichameg etsetugkata tusa etejamu aina nunak tikichnakesh wainkashbaijai, imá Jacobo Apu Jisusa yachiya nunak wainkabaijai. <sup>20</sup>Wi juna agatjim junak, Apajuí emtinish waitjutsuk dekaskea nunak agatjime.

<sup>21</sup>Jerusalén pujusan Siria nugkanum nagkaemakiuwaitjai, Sirianmayan weuwaitjai Cilicia nugkanmashkam. <sup>22</sup>Yatsug aidau, ubag aidau Jisusa nemajuidau Judea nugkanum batsatuk, minak igkuntus waitujakchaju ainawai. <sup>23</sup>Nunin asag: “Yaunchkek jutiin aintamak yamajam chicham etsegbau-nash emegkaktatus wakeyin aaya nunú, yamaik niishkam Kristu chichamen etsetgawai”, tujutuina mun antugtuinak, <sup>24</sup>Apajuin emematiajui.

**2** <sup>1</sup>Catorce mijan inagkeakin, ataktú Jerusalén wegakun Bernaben, Titujai ayauwaitjai. <sup>2</sup>Tujash nunak Apajuí wetá tusa dekamtijuamtai wegabijai. Nunikan, wi judiuchu aidaunum yamajam chicham etsegbauwa nuna etsegbabijai. Nuigtushkam Jisukristu nemajin aidau apujinash ujakbaijai, wi takaag nunash

wainka takaatsjash tau asan. <sup>3</sup>Tujash Tito wijai wekagush, griego aents aig pakamakti tichajui. <sup>4</sup>Nuninaig tikich dekas Kristu Jisusa nemajuinachiatok, uumak wisha Kristu Jisusan nemagjai, tusag jutiiní wayaa dekamatus yujasajui, jutii Jisusai agkanmagauwaitag nuna, ataktú awagtamki judío aidau umitaijiya nui aputamsagtatus. <sup>5</sup>Tujash jutiiik machikish ditak antugkashbaiji, yamajam chicham dekaskea nu jutii etsegbau antukuitjum duka, atuminish nunisag atí tuidau asaja.

<sup>6</sup>Jisukristu nemajin aidau apuji aidau, nuigtuk yamajam chichamnakesh ujakchagmayi, (wika dita wajukuk aajakú ainawa nunak puyatjatsjai, wagki Apajuí diismak ashí betek ainag duwi). <sup>7</sup>Apajuí Pedron judío aidau ujaktá tusa awebauwa nunisag, minashkam yamajam chichama ju judiuchu aidau ujaktá tujutbauwa nunak degagtuawajui. <sup>8</sup>Apajuí Pedron: Judío aidau yamajam chicham ujaktá, tusa awebauwa duke minash: Judiuchu aidau ujaktá, tusa awetiuwai. <sup>9</sup>Apajuí dutijuamua nuna Jisukristu nemajin aidau apuji Santiago, Pedro, Juan aina nunú dekajuawag, minak Bernabesai apatukag uwegnum achigmainak shiig anenjamsagmayi. Dutijamawag jutiinak: Judiuchu aidaunum takastajum, tujamak ditak: Judío aidaunum takasag-tatji, tiagmayi. <sup>10</sup>Dutijamawag: Ujunauch aidau Jisukristun nemajuidau Jerusalén batsata nunú yaigtajum, tujabijai. Nunak wishakam shiig kuitamsan takastasan kakanmamsabaijai.

**Pablo Antioquía pujus**

**Pedro jiyakbau**

<sup>11</sup>Tujash Pedro yaakat Antioquía taa, yatsut bakumamainun nuniau asamtai, tikich Kristun nemajin aidau emtin

jijakbaijai. <sup>12</sup>Yama nagkamchakug judiuchu aidauij ijunag yu pujayatak, Jerusalegnunia aidau Jacobo awemamu kaunkamtai, ditak pakamaku asagmatai, nuna ishamak tupaag wekagas, ijunja yutanash idayas wekagu asamtai.

<sup>13</sup>Pedro nuniaun wainainak, tikich judío Jisukristu nemajuidaushkam, judiuchujai ijuntuja yutanak dakitjajui. Nu nudiagtai Bernabeshkam judiuchujai ijunja yutanak dakitjabi. <sup>14</sup>Tujash pegkeg chicham dekaskenum etsegna nuna betek umiinachun wainkan, aents tuwakbaunum Pedro chichagkun: “Ame judiuwaitkum judiuchu wajukmaina nunimum dusha, ¿wagka judiuchu aidaush judío wajukena nuninuk emaktasamesh wakejame?”, tibaijai.

**Judiuchu aidaush judío  
aidaushkam Jisukristui kajinas  
anentaimainak uwemkajui**

<sup>15</sup>Jutiik dekas judío ainaji, nunin asaja chicham umiktina dushakam shiig jintintuamu ainaji, judiuchu aidau chicham umiktinnash dekachu aina nuninuk ainatsji. <sup>16</sup>Iman ainayatkuish chicham umikmawaik pegkejaitme tama amainchauwa nu dekaidau asaja, jutiik imá Jisukristuig kajintsá anentaimainaji. Jisukristui kajintsá anentaibaunum Apajuí, pegkeg ainagme tujamtin asamtai, chicham umiktá tibauwa nu umiamunmag, Apajuik pegkejaitme tujamchatnai. <sup>17</sup>Nunin asamtai Kristu dekaskeapi tabaunum pegkejaitme tama atasaja egainag duka, jutiish tudaugtin asaja nuninaji. Tuja Kristuig kajintsá anentaimainaku chicham umiktajum tibauwa nunú uminatsug dushakam, tudau weenaku nuninatsji. <sup>18</sup>Wi aents aidaun Jisukristui kajintsá anentaimkujum uwemainaitjume tiu ayatkun, dekas chicham umiktajum tibauwa nu umiakjum uwemainaitjume takunuk,

wiki bakumamainaitjai. <sup>19</sup>Chicham umiktinun umiktasan pujaknuk, jakaujai betekak wenu pujubiajai. Tujash yamaik chicham umiktin aidauk, ashí mina tudaugjai Jisukristu achinag mantamdauwa nui nagkaanjamtai agkanmagan tsagagjai. Nunikan Apajuíjai pujajai. <sup>20</sup>Nuniku asan wichauwaitjai iwaaku pujag nunak, Kristu minai puja nu iwamtijawai minak. Wi yamai iwaaku pujag nunak, Apajuí Uchijí mina anentu asa, minai mantamdauwa nuanuí kajintsá anentaibauwai pujajai. <sup>21</sup>Apajuí aents uwemjatnume tusa wait anenkagtak dutikamujija nunak wika dakitatsjai, tuja chicham umiktina nu umiamunum Apajuí pegkeg ainagme tujamainaitkuig, Kristuk wainak mantamdau amainai.

**Wakaní Pegkejiya duka Jisukristui  
kajintsá anentaibaunum junawai**

**3** <sup>1</sup>iAtum Galacianum batsamin aidautigmek anentainkachu ainagme! Wi anuí pujusan, Jisukristu achijam jakauwai tusan etsegkui, paan achigbau wainkajum anentaimtumainaitjum imatiksajum anentaimtibijum nunash, ¿ya atumnash chicham dekaskea nuna umikainum tusash tsanugmajaje? <sup>2</sup>Juna aigkatnume tusan wakegajai: ¿Wakaní Pegkeji jukiwaitjum dusha, chicham umiamunmag jukiwaitjum, atsa Jisukristui kajintsá anentaibaunum jukichukaitjum? <sup>3</sup>Atum Jisukristui kajintsá anentaibagtai, Wakaní Pegkeji niina senchijin amasajui, Apajuí wakegamun takastinme tujamu asa. Tujash ¿wagka: Jutiik kakanmamainaitji Apajuí wakegamu takasta takuik, tajume? <sup>4</sup>¿Kuashat pegkeg takaidau asajum waitkam asauwaitjum duka, wainkagmek waittsauwaitjum? <sup>5</sup>Apajuí Wakaní Pegkeji sujamsau asa, atum wainkash-

baun iwaintugma nunash ¿chicham umiktajum tibauwa nu umiamunmag dutika, atsa Kristu pachisa etsegbau antukjum kajintsá anentaimu asagmin dutikatsuak?

**Apajuí Abragjai chicham apakbau**

<sup>6</sup>“Abragkak Apajuiyai kajinas anentaimu asamtai, Apajuishkam pegkeg diisuí.” <sup>7</sup>Jujú atumek shiig dekaatajum, dekaskenum Abraham wegantu aina duka, Apajuiyai kajinas anentaimin aina nu ainawai. <sup>8</sup>Tuja yaunchuk chicham agagbau aajakua nuwig, judiuchu aidaunash dekaskeapi tabaujinig Apajuí pegkeg ainawai tama agtin dekau asa, emtika Abraham pegkeg chicham ujakbau aajakuí: “Ashí nugkanmaya aents aidauk imá aminig pegkegnum yaigbau agtinai”, tiuwai.

<sup>9</sup>Nu aatus asamtai Jisusai kajinas anentaimaina dushakam, Abragjai betekak pegkegnum yaigbau ainawai.

<sup>10</sup>Ashí aents: Chicham umiktin yaunchuk agagbauwa nunú umiaku uwemainaitji, tuidauk dita bakumainnumag batsatainawai. Wagki, agagbaunum chichaak: “Ashí aents chicham umiktin agagbauwa nuna imatiksag umiinachuk, suwimkan jukitnume”, tibauwai. <sup>11</sup>Dekas duka paantai, makichik aentskesh chicham umiktin agagbauwa nuna umiak Apajuí pegkeg diiyam amaitsu duka. Ni chichame agagbaunmashkam: “Aents pegkejan takaa duka, imá Apajuiyaig kajintsá anentaibauwa duwik ajumaish tuke pujustinai”, tawai. <sup>12</sup>Chicham umiktina duka Apajuiyai kajinas anentaimu tuke pujutnai tatsui. Chicham umiktina duka: “Aents chicham umiktina nuna imatiksag

umiauk, nu umiamua duwik tuke pujutnai”, tawai.

<sup>13</sup>Chicham umiktina nuna umiinachuk suwimkan jukitnume tibau aajakua nunak Kristu agkanmitkagbauwai, iina ayamjutpakta tau asa ni suwimkan juwak mantamdauwai, nunisag agagbaunmashkam: “Aents maamua nu numinum nenam awa duka, Apajuí aents tikima katsek tudaugtin dutikatajum tibau asa dutikam awai”, tawai. <sup>14</sup>Nunak Apajuí Abragkan pegkejan anagkuauwa nunash, judiuchu aidaush Kristu Jisusai dekaskeapi tabauwai, Apajuí Wakaní Pegkejin anagtauauwa nunash jukitnume tabaunum nunikui.

**Chicham umiktina duka Apajuí anagkagtuamujiya nunak emegkaumaitsu**

<sup>15</sup>Yatsug aidaush, aents aidauti nunitaijiya nuna pachisan tajime: Makichik aents tikich aentsjai chichaman umiinak papiinum agajag nuní atí tusa firmamunak,<sup>a</sup> makichkish nuna esaktumainuk, nuigtú eketus dutikmainush atsawai. <sup>16</sup>Numamtuk Apajuí Abragkan anagkuak: “Wiki yaigtinaitjame, dutiksanuk amina tijajumnash yaigtinaitjai”, tiuwai. Tuja agagbauwa nui Apajuí Abragkan anagkuak: “Tijajumin kuitamkatnaitjai”, tibau awa duka: “Kuashat tijajum aidaun kuitamkatnaitjai”, tatsui, “makichik” tawai, nunak Kristun taku tiuwai. <sup>17</sup>Wi tajim duka juuwai: Apajuí Abragjai Kristun pachisag chichaman apakú aina nunak dutiksag kuitamkauwai, dutikamu asamtai cuatrocientos treinta mijan nagkaemai, Moisés chicham umiktinun agajua nuwish, Apajuí anagkagtuamujiya duka nunisag

---

**a 3.15** Chicham firma tawa juka iina chichamenig tumainchau asamtai, nuigtush yapajiash tumainchauwa duwi jutiksaik ukuaji.

juwakui. <sup>18</sup>Apajuí anagtamaúwa nunú chicham umiktina nu umiaku jumainaitkuig, ni anagtamaúwa duka wainak amainai. Tujash Apajuik Abragnak: Wi wait anentau asan yaigtinaitjame, tusa anagkuauwai.

<sup>19</sup>Aatus aish, ¿wajinma atsumnawa chicham umiktina dusha? Chicham umiktina duka ayatak aents aidau tudaujin dekaatnume tabaunum dutikamui, nunú nuniai Apajuí Abragkan: “Tijajumin yaigtinaitjai”, tusa anagkuauwa dushakam akiinaiuwai. Chicham umiktin aajakua nunak, Apajuí nayaimpinmaya aentsun aweti Moisesnak ujakam, niishkam aents aidaun ujakuí. <sup>20</sup>Abragkak tikich chichamjutkati tusag atsumjachui, imá Apajuik niina igkuas dutikatnaitjai tusa anagkuauwai.

#### **Chicham umiktina duka Kristu dutikauwa duwi nagkankauwai**

<sup>21</sup>Apajuí Abragkan anagkuauwa duka, Moisés chicham umiktinun agajua nujaig mai pegkejai iina yaimpau asa. Tuja chicham umiamunum aentsuk uwemkatnume tibauwaitkuig, nu umiamunum pegkeg ainawai tama amain ainaji. <sup>22</sup>Tujash agagbaunmag ashí aentsuk tudau achikbauwa nunin ainawai tujamji, ya aidauwa Jisukristui kajinas anentaimiagtatua, nu aidau Apajuí anagkagtuamua nunak jukitnume tujamu asa.

<sup>23</sup>Nu ii kajintsá anentaimtumaina nu eke taatsaigkik, achijatin aidau aentsun achig chimpia pujuja numamtuk chicham umiktina duka aputamajakuí.

<sup>24</sup>Chicham umiktina duka, inak uchin kuitamak jintintama numamtuk kuitamjamajakuí, Kristu taamtai niiní kajinas anentaimaidaunak, pegkejaitme tama agtinme tujamu asa. <sup>25</sup>Tujash yamaik yaayai kajintsá anentaimainaji, nuadú

yamaik chicham umiktinuk atsumainatsji.

<sup>26</sup>Yamaik ashí Apajuí uchijí ainaji, Kristu Jisusai kajintsá anentaimaidau asaja. <sup>27</sup>Nunikaju asaja yamimakagji Kristujai ijutkau pujamu iwainmamkatasata. Nuniku asaja ni wajukeya numamtuk wajainaji. <sup>28</sup>Dutikamu asaja juka judiuwai, griegowai, inataiyai, inashtaiyai, aishmagkui, nuwai tabauk atsawai, wagki Kristu Jisusai ijutkau ainag nuwig ashí atum aidautigmek makichkia nunin ainagme. <sup>29</sup>Atumek Kristunu asajum Abraham wegantu ainagme, nunin asajum Apajuí Abragkan anagkuauwa dushakam imatiksagmek jukiagtin ainagme.

**4** <sup>1-2</sup>Juna augmattsan ujaktajime: Aents makichik uchigtin asa, ni jaak nuna uchin: Ashí midau wají aina duka aminu atí, tinu ainawai. Uchijin tayatak, duka tikima uchuch asamtai, tikich duka: Ame kuitamsam muumpagmatai sujuttsatin atá, tinai. Apají aaja tibau akush uchik, wajiik dekas niinu aigkishkam, nunú aentsun inakega nunin we pujus, tsakaak niinu emawai. <sup>3</sup>Numamtuk jutiinash nagkaetamui, yaunchkek jutiish dekachu asaja uchijai betek aajakuitag duwi, chicham umiktina duka jutii judío aidautinak inak itugmaina numamtuk achikam batsamajakuitji. Nuniajin atum judiuchu aidautigmek, ju nugka juwiyen pegkegchau pachis jintinamu umijujakuitjume. <sup>4</sup>Nuní batsatjin Apajuí tibauwa nunú tswan uminkauwai, nunikmatai niina Uchijin awetugmauwai, dutikam makichik nuwanum egkemak akiinaiuwai, nunikmatai chicham umiktinum tawa dutiksag dutikawajui, niishkam chicham umiktin tawa nunak dutiksag umikuí. <sup>5</sup>Chicham umiktajum tibauwa nu umiktasa waitú batsatutin, Kristu agkanmitkagmamtai,



niini kajintsá anentaibaunum Apajuí uchijí waigtinme tujamu asa. <sup>6</sup>Kristu agkanmitkagmau asamtai, Apajuí Wakani Pegkejiya nuna awetugmauwa nu ichashtamkui: “Mina Apag” tuinaji. <sup>7</sup>Nunin asamtai yamaik inaku waitkataiya nuninuk ainatsjume, Apajuí uchijí ainagme, nunin asajum atum Kristu nemagbaunum Apajuí sujamsatna dushakam jukitnaitjume.

**Pablo Kristu nemajuidau puyatjusa  
anentaimitamu**

<sup>8</sup>Atumek yaunchkek Apajuik dekachu asajum, wainka apajimtai aina nu umigkujum waitujakuitjume. <sup>9</sup>Tujash yamaik Apajuí atumjaish ijutkau asamtai, yaita Apajuish duka shiig dekajume. Apajuishkam aikasag atumnash shiig dekagmajume, atumesh ya ainagme nunak. Nunin aish ¿wagka atumnash yaimpamainchau, nuigtush uwemtijamainchau, Apajuiai ayatak datumtamain aina dusha, ataktú waketjukjum umigkatasagmesh wakegagme? <sup>10</sup>Atumek Jisukristui kajintsajum anentaimitakujum, mina pataag judío aidau Kristun kajinas anentaimitochu aidau wajukena nuniagme. Nuniakjum yaunchuk Moisés agagbaunum: Tsawan, nantu, mijan aina juna pachis tibauwa nu, jutsu Apajuin shiig awagmatai tusajum umiktasajum takaagme. <sup>11</sup>Atum ju dutikakjumek, wi atumin jintintuamiamjim duka umiatsjume. Nuniakjum in wi atumin jintintuamiamjim nunak, wainkanuap jintiaja tusan uyumajai.

<sup>12</sup>Yatsug aidauh, wi wajukauwaitag nuniktajum tusan segajime, wisha atum wajukeyajum ankauwaitjai, chicham umiktin aidaun umiakun pujusan. Atumek minak makichkikesh tutitag awajtukchawaitjume. <sup>13</sup>Atumek dekagme, wi yama nagkamchakun

yamajam chichaman ujayajim nunak, jaakun senchi waitaiyatkun wekaesan ujayajime. <sup>14</sup>Nunú jata mina waitkajia nunú, atumnak shiig antumainchau awajtamianume. Nuna imaniakuish dakitjugjum idaitutsuk, nayaimpinmaya aents nuniachkush Kristu Jisus taamtai kuitamainaitjum imatijusjum kuitamjukuitjume. <sup>15</sup>¿Nunú imanika shiig aneejakbaush, yamaish wajukagmea sakapakugme? Atum wi mina jijiú waitiakui, jiish ukuintaitkuig atumi jiiim ukuinka sujumain awatuyujum nuaduú tajime. <sup>16</sup>¿Wi atumin dekas chicham dekaskea nuna ujakuitjim duwiká minak dakitajum?

<sup>17</sup>Aents atumin senchi yaigtasa wakejajime tusa imatjutpaina nunak, jutiini datumtamjag, dita waitan jintinjamaina nunak jintinjamatasag imatjutpainawai. <sup>18</sup>Dekas tikich yaigtasa wakegamua duka pegkejai, tujash pegkeg anentaiyai dutikamua nu. Nuna aatus dutikauk, tuke nuninuk amainai, imá wi atumjai pujuttag duwi nunitsuk.

<sup>19</sup>Mina uchig aidauh, wika nuwa uchin najaimak waitama imanikan ataktú atumiin waitiajai, atum Kristu umigkujum nijai ijutkau pujachu asagmin. <sup>20</sup>Wakegajai, utugkanuk yamaya juwik atumiin taan tikichin yapajian ujakajim tusan. Atumiin kuashat anentaimitakun, wajukawajak anentaimitjai.

**Agar Sarajai augmatbau**

<sup>21</sup>Atum chicham umiktina nu umiktasajum wakegautijum tujuttajum, ¿Atumek antukchaukaitjum chicham umiktin juna tawa duka? <sup>22</sup>Nu agagbaunmag, Abragkak jimag uchi ajujakuí tawai, makichik uchijiya nu ni inakenia aajakuí, tuja tikich uchijiya duka dekas niina nuwe inakchauwa

nuwiya ajakuí. <sup>23</sup>Agar inak aajakua nui uchi akiinauwa nunak, Abraham Sarajai wakegau asamtai akiinauwai. Untsu Sarai akiinauwa duka, Apajuí anagkuauwa nu uminbaunum akiinauwai. <sup>24</sup>Jujú jimag nuwa aina juka kuashat anentaimtusa dekamain ajawai, makichik nuwa nu Apajuí Abragjai chichaman apakajua nuna iwainawai. Tikich nuwa nunú Apajuí muja Sinaí tutainum chicham umiktinun Moisesan suwak, nijjai chichaman apakua nuna iwainawai. Agarai akiinaidauk inak agtina nunú akiinkauwai. <sup>25</sup>Tuja Agar anentaimtakui, muja Sinaí tutai Arabia nugkanum awa nuanuí Apajuí Moisesan chicham umiktinun susauwa nu dekaji. Tuja nuigtushkam dekanui niiní akiinauwa aina duka inak aina nunú. Nuigtú Agar anentaimtakui dekanui, yamai yaakat Jerusalén batsamas chicham umiktajum tibauwa nuna umiktatus waituina duka inaku waitkataiya nunin asag, Apajuí dekas uchijí ainatsui. <sup>26</sup>Untsu Sara inakchau aajakua nunú, nayaimpinmaya Jerusalegka nuna iwainawai, nuna uchijí aidauk jutii aidautiyaitji, dekas Apajuí uchijí aidautik. <sup>27</sup>Chicham agagbauwa nuwishkam:

“Nuwa uchin uchigmachuh,  
shiig aneasta,  
uchijum atsugtamu asamtai.  
Shiig aneamugmin untsumkata,  
amek uchi uchigmaku  
najaimatash dekapsachu asam.  
Nuwa idaisamu aina nunú  
imá kuashat uchigtin atin ainawai,  
nuwa aishintin aidaun nagkaesau”,  
tawai.

(Junak kuashat aents aidau Kristui kajinas anentaimaidau Apajuí uchijí agtinai tusa tiuwai).

<sup>28</sup>Yatsug aidauh, ubag aidauh, atumek Apajuí Isaac akiinatnai tima akiinauwa numamtuk akiinauwasajum, Apajuí

uchijí ainagme. <sup>29</sup>Tujash yaunchuk Abraham Sarajai wakegau asamtai, Agarai uchi akiinauwai. Tuja Apajuí akiinati tibau asa Isaac Sarai akiinauwa nuna, Agarai akiinauwa nu kajejujakua numamtuk, yamaishkam chicham umiktajum tibaun umiina nu, Jisukristui kajinas anentaimaina nuna kajejuinawai. <sup>30</sup>Apajuí chichame agagbauwa nui, Apajuí Abragkan chichajak: “Nuwa inaku waitkatia anka niina uchijijai jiiik awemata, wagki Sarai uchi akiinauwa nu juwamunak, Agarai akiinauwa duka jumainchau asamtai”, tiuwai tawai. <sup>31</sup>Jutii Jisukristui kajintsá anentaimaidautik, Agar inatai aajakua nuna uchijiya nuninuk ainatsji. Jutiik Sara Abragkan nuwe inashtai aajakua nuna uchijiya numamtin ainaji.

#### Kristu agkan etabijua nunisjumek pujustajum

**5** <sup>1</sup>Atumek chicham umiktajum tibauwa nu umiktasajum waitú batsatutigmin, Kristu agkanmitkagmawajua nunisjumek agkan pujustajum. Ataktú chicham umiktin umiktasajum waitiujum duka waketjukigpajum.

<sup>2</sup>Shiig antugtuktajum, wi Pablon tajime, atum pakamakjumesh Kristu yayamak achattagme. <sup>3</sup>Ataktú awentsanuk tajime: Aents pakamauk chicham umiktin agagbauwa nunak imatiksag umimainai. <sup>4</sup>Atum: Jutiik chicham umiktajum tibauwa nu umiinaku, Apajuish pegkeg diyaam amainaitji, tuidau asajum Kristuk tujanjaugme. Imá Kristuig kajintsá anentaimjumun, pegkeg ainagme Apajuí tujamaina duka atumek dakitjaugme.

<sup>5</sup>Tujash jutiiik Wakaní Pegkeji jutiiiní pujau asamtai, Kristu dekaskeapi tau asajin pegkeg etamkauwa duwi, Apajuijai pujustinaitag nu dakainaji. <sup>6</sup>Wagki pakamaku akush, pakamakchau akushkam Kristu Jisusaig wainkayai, dekas Kristu

Jisusai kajintsá anentaimku Apajuí aneamunum, tikich aidaujaish aneniamua nuna Apajuik wakegawai.

<sup>7</sup>Duwik shiig pujubiujum nunash, éya chicham dekaskea duka umikaigpa tujabiae? <sup>8</sup>Aannak Apajuí aikgammachaje, nigka ayatak mina aentsug atinme tusa etegtamjajui. <sup>9</sup>Nunin aig atumin waitan jintinjamawaju aina duka, levadura piipich ajuntuamuitak, ashí nanegbauwa nuna wampushmitkama numantuk awajtamkaje. <sup>10</sup>Tujash antsagkeap batsamtatua tatsujime, Jisukristu ataktú aannak idaimitkagmak, duwik batsabajum nuninuk etabiagtaiyap, Apajuí atumin tsanugmaju aidaunak suwimkan susattawa, tajai.

<sup>11</sup>Yatsug aidauh, tikich aidau mina pachittsag: Pabloskam Jisukristui kajinas anentaimaidaunash pakamaktajum, tusa jintintui tujutuinaawai. Nunú dekas ataik mina pataag judío aidauk waitkagmainchau ainawai. Wika: Jisukristu achijá maamua nuanuig kajintsá anentaimkujum uwemjau asajum pakamamaitsumge, tusan etseju asamtai waitkajuinaawai. <sup>12</sup>Aents aidau atumin chichagtamainak: Pakamak-jum uwemainaitjume, tusa jintinjamá yujaina duka, dekas ditak juú tamawaik ashí tsupik ajapmain ainajama tajai.

<sup>13</sup>Yatsug aidauh, ubag aidauh, atumnak Apajuí etegtamag, chicham umiktajum tibauwa nu umiktasa pujutnumag agkanmitkagbau ainagme. Tujash agkanmitkamuitjai tusa ii pegkegchau wakegamu takata duchauwai. Apajuik wakegawai agkanmagau aidauk, tikichjai pempeentuniki aneemis yainikagti tusa. <sup>14</sup>Chicham umiktin agagbauwa duka: “Amek anenmamsam amejai ijutkau aidauk aneeta”, tawa nu imatiksaik umiamunum ashí chicham umiktinum awa duka uminui. <sup>15</sup>Tujash kuitamamkatajum, pegkegchau chichagdayakjum, nuigtú pegkegchau takagdayakjum pempeentuniki anenita nunú atumek megkaekajium.

### Wakaní Pegkeji wakega nunisaik pujumain

<sup>16</sup>Nuaduí tajime: Wakaní Pegkeji wakega duke takaakjum, atum pegkegchau wakegamu takata duka idaisatajum. <sup>17</sup>Pegkegchau wakegamua nunak Wakaní Pegkejig dakitawai, nunisag aentsnum pegkegchau wakegamu awa dushakam Wakaní Pegkeji wakegamua nunak dakitawai. Aatus dakitjunidau asamtai, ii wakegamua nunú takaa, Wakaní Pegkeji wakegamua nunú takaa wajamait sui. <sup>18</sup>Tujash Wakaní Pegkeji jintinjamkui ni wakega duke takau asajum, chicham umiktajum tibau umiktasagmek anentaimtumaitsumge.

<sup>19</sup>Pegkegchau wakegamu takaamu paan wantiina duka ju ainawai: Ekagmamau, tsanijjinbau, Apajuí tsumain diyamu aina nu takaamu, ii pegkegchau wakegamua duke tunamatja pujugbau, <sup>20</sup>apajimtai dakumkamau emematbau, wawejatbau, kajekgagtukbautak pujumu, tsuwat chichamtin, akasmamu, waa waamak kajeamu, shiwagmatkagtamau, datumkagtamau, niish kanaktatus imá anentaimin, <sup>21</sup>pegkejan takaidau kajejamu, nampeamu, yuwa yuwakua wegamu, nuigtú tikich jumamtin aidaunashkam tibajime. Tuja juna pachisan yaunchuk tibajim nunak awaksanuk anemtikjime, jujú aidaun takaa batsatuk Apajuí inamtaijin wayaachagtin ainawai tusan.

<sup>22</sup>Untsu aentsnum Wakaní Pegkeji pujugbau aidauk: Anejatnai, shiig aneena, shiig agkan anentaimas pujuwai, waamak kajeakchau, shiig awakagtin, wait anenkagtin, ni tibaujinak betek uminai, <sup>23</sup>tikichin nagkaesau anentaimtumachu, niina pujutinak kuitamak pujuwai. Ashí junin amain ainawai chicham umiktajum timawa nuwish, jujú aidauk dutikmait sui tachau asamtai. <sup>24</sup>Pegkegchau takatnak idaisatnime tusa Kristu Jisus jutiini

achinjau asamtai, jutiik Kristu Jisusai ijutkau pujuidau asaja, jakau pegkegchaun takamaitu nunin anenmamainaitji.

<sup>25</sup>Yamai Wakaní Pegkeji pujugmautik, nu Wakan takamtijusti tusa idaimamainaitji.

<sup>26</sup>Emebau achagmi, shiwagmaetash shiwagmaetsuk, tikich pegkejan takainamu diisá pempeentuniki kajegdayá batsamchagmi.

#### Tikich aidaujaish pempeentunikjum yainiktajum

**6**<sup>1</sup>Yatsug aidauh, ubag aidauh, atum ainajum anuiya pegkegchaun takau dekagkugmek, atum Wakaní Pegkeji wakega nunú takautijum yaigtajum esemamati. Tujash aneasjum dutikatajum, nuniakjumesh atumesh kuitamamkatajum, dita pegkegchaun takaina dutiksagmek takasaijum. <sup>2</sup>Atumek utugchat ajutjamainakuish pempeentunikjum yainiktajum, aaja dutikdayakjum Kristu timawa nu umiktatjume.

<sup>3</sup>Makichik aentskesh imanchauwaitak eme anenmamá wekaguk, tsanuumak tu wekaewai. <sup>4</sup>Tikich pujamujinak diigtsuk, makí makichik ditá pujutjinak diimainai, nuniau asag pegkejan takainakjag shiig aneemain ainawai. <sup>5</sup>Wagki, makí makichik Apajuí wakegamunash wajuk takainawa nunak diimain ainawai.

<sup>6</sup>Kristu chichame atumin jintinjamuk, atum jintinbautijum ashí ni atsumamujig yaigtajum.

<sup>7</sup>Wainkajum anentaimigpajum. Apajuinak makichkish tsanumain ainatsui. Aents ni ajakmamujin juu aina numamtuk, makí makichik dita takasbaujin dutiksag jukiagtinai. <sup>8</sup>Aents ni wakejamujinak takasuk, nuwiyanak juwak waittanum wegagtinai. Untsu Wakaní Pegkeji inam nunak umigkau aidauk, ditashkam nuwiyanak pujut tuke atina nuna jukiagtinai. <sup>9</sup>Nunin asamtai pegkeg takata duka mijatkachagmi. Imaní batsatu asá, iish

imanisaik batsatkuik tsawan jegakui, ajak ajakmakbau juutia numamtuk Apajuí pegkeg aina nuna sujabau jukitnaitji.

<sup>10</sup>Tsawan eke awa juwik ashí aentsuk tutit awajtsuk pegkegnum yaigtajum, tujash Kristu nemajuina nujai imá senchi yainiktasajum wakeetajum.

#### Inagnaku ujaniamu

<sup>11</sup>Wi yamai junak mina uwejuí letra muuntai agatjim ju diistajum. <sup>12</sup>Kristu numinum achijá maamua nuna pachisa etsejai waitkagsainum tuidau asag, pakamagtajum tujamainawai, aents aidau shiig anenjustinme tusag.

<sup>13</sup>Tujash dita pakamaku aina dukesh chicham umiktina nunak betek umiina-tsui. Nuninayatak atumin pakamaktajum tujamainawai, atum nunikagmin wi tima ankaje tusag ememagtatus.

<sup>14</sup>Tujash wika wiki eme anenmamtanak wakegatsjai. Wakegajai ii Apuji Jisukristu numinum achinag mantamdauwa nunak ememattasan. Kristu minai numinum achinag mantamdau asamtai, wika ju nugkanmaya aidauunak uyumatsjai. <sup>15</sup>Wagki Kristu diismak pakamaku akush, pakamakchau akushkam wainkayai. Dekas imana duka Wakaní Pegkeji yamajam pujutan sukagta nuuwai. <sup>16</sup>Atum Apajuinu aidautijum, jujú tawa jutiksagmek batsatutigminak, nuigtú Kristu nemajin mina pataag Israel aidautigminash, Apajuí wait anenjamag shiig agkan anentaimsa pujutan amastinme.

<sup>17</sup>Yamai nagkamsanuk utugchatan aputugsatnime tusanuk wakegatsjai, wagki mina asutuawagbau iyashjú esamkamu ajutuina nuna diisan: Wika dekas Apu Jisukristun inakempapitja tumamjai. <sup>18</sup>Yatsug aidauh, ubag aidauh, ii Apuji Jisukristu wait anenkagtamujiya nu atumi wakanminish uyuntamsagti.

Aatus atí.

## PABLO PAPI' AGAJA EFESONMAYA AIDAU AWETIMU

---

### Pablo Efesonmaya aidau kumpabau

**1** <sup>1</sup>Witjai Pabloitjai, minak Apajuí etegtua Jisukristu chichame etsegtukti tusa wakegau asa awetiuwai. Atum Kristu nemagkujum Apajuí aentsji waigkú aidautijum Efeso batsatutigmin kumpamjime. <sup>2</sup>Atumnash iina Apají Apajuiya nu, ii Apuji Jisukristua nujai wait anenjamaidau asag, shiig agkan anentaimsa pujutan amastinme.

### Jisukristu nemagka pegkeg pujat juwamu

<sup>3</sup>Apajuí emematiagmi, iina Apuji Jisukristun Apajiya nunú, nigki ashí pegkeg nayaimpinmaya aina nunak sujamsauwai Jisukristu nemagkaju asajin. <sup>4</sup>Apajuik nugkanash najantsuk jutiinak etegtamjauwai. Dutika: Mina Uchijun Kristun awematjai, dutikam aentsun ayamjak mantamnamtai, wi ditan tudaugtuchu emaktajai, dutikam mina emtijuish imanisag wantintinme tujamu asa. <sup>5</sup>Apajuik duwik nagkamas imá niina anejattajinig: Wi ju aidaunak, atak mina Uchig Jisukristu ditai mantamnamtai imá niinig kajinas anentaimainakuí, uwemtikan mina uchig emaktin atajai, tiuwai. <sup>6</sup>Nunak Apajuik jutii wait anenjabaunum, niina Uchijí aneetaijiya nunú jutiiní mantamnamunum tuke emematjitin atinme tusa dutikauwai. <sup>7</sup>Nuna dutikau asa Kristu

numpe ukaejamunum agkanmitkagma tudaunash tsagkugtamjauwai, nunak imá niina anekajinig dutijamauwai. <sup>8</sup>Dutijabau asa jutiinak shiig kuashat dekatan amasuí. <sup>9</sup>Duwik nagkamas Apajuí nigki anentaimas mina Uchig Kristun awematin atajai tibaun dekamti-jamachua nunash yamai shiig iwaintugmak dekamtijamaji. <sup>10</sup>Nuniku asa ashí nayaimpinmayan, nugkaya aidaujai ijumjattawai ni tibaujiya dutiksag, dutikamtai Apushkam imá Kristuk tuke atinai. Nunak ni tsawan tibauji jegatai, uwaetsuk dutikatnai.

<sup>11</sup>Apajuik yaunchuk nagkamas jutiinak etegtamjauwai, dutijabau asamtai Kristui ii jukitnuk ajutjamainaji, nunak yaunchuk Apajuí ni wajuk dutikatatus wakejukaya anentaimtujúita, dutiksag dutikatnai. <sup>12</sup>Nunak dekatkauk jutii judfo aidautin Kristui kajinas anentaimainakuí uwemtijatjai, dutikam minak emematjitnume tujamu asa dutikauwai. <sup>13</sup>Kristu chichame dekaskea nu etsegku, uwemat awai tabau antukjum, atumesh Kristui kajintsá anentaimu asagmin, Apajuí niinu etamak Wakaní Pegkejin awetitnaitjime tusa anagtabauwa nunash amasajui. Dutijamau asamtai yamaik niinuap ainaji tusa dekainaji. <sup>14</sup>Nunú Wakania nuuwai, Apajuí sujabau jukiagtin asajin emtika amasmauwa nu, jutiin ashí agkanmit-

kagma niina aentsji etamkatna duwi, dutijamantai ashí jutiik Apajuí senchig-tina nu ememattinaitji.

### Pablo Apajuí see tibau

<sup>15</sup>Nuaduí atum imá Apu Jisukristuk kajintsá anentaimtakjum ashí tikich Apajuí nemajuidaujaish aneeniamugmin pachis chichainamun antukan, <sup>16</sup>Apajui-nak mijattsuk see tusanké ajai atum nuniajum nuaduí, nuigtú Apajuí aukjunush atumin pachisan tuké segattsanké ajime. <sup>17</sup>Iina Apuji Jisukristun Apají dekas senchigtina nunú dekatan amasagmatai, atumesh Jisukristush shiig paan dekaatajum tusan. <sup>18</sup>Anentaimta nunú iina jiiya numamtina nunashkam tsaptin etugtamtinme tusan Apajuin segajai, dutijamantai atumshakam niina aentsji asajum, nayaimpinum atumdau ajutjam-tin dakainajum dushakam shiig dekaata-jum tusan. Apajuik niina aentsji etegjamunak tikima shiig wakejumai-nun pegkejan suwawai. <sup>19-20</sup>Junashkam shiig dekamtikatasan wakejajime: Apajuik tikima senchigtinai, ni utujimainjig atsujui, nigka ashí dutikmainai. Iman asa ni nemajuidauti-nashkam nigki ayamjutpawai. Kristun maawag ukusagmataishkam nunú senchiik ataktú inankiuwai. Dutika nayaimpinum iwakuí, nijai pujus inamjatatus. <sup>21</sup>Apajuí Kristunak, nayaimpinmaya senchigtin aina nuna nagkaesau, iwanchi senchijinash, nukkaya apu dekas senchigtin aina nunash, ashí najankamu aina nuna nagkaesau senchimitkauwai, yamaya juwish atak atina duwishkam. <sup>22</sup>Dutika ashí najankamu aina nunash, nuigtú niinií sujumankau aidaunashkam Apuji ema idaisauwai, ni diistí tusa. <sup>23</sup>Dutikamu asá ni nemajuidautik Kristu iyashiya nunin ainajin, ni jutiinií ashí

jajutua pujau asamtai machikish agkau atsa nunisag, ashí ni najankamunmash awai.

### Apajuí anenkajin uwemkau ainaji

**2** <sup>1</sup>Atumek yaunchkek Kristui kajintsá anentaimainachu asajum, Apajuí pujutan sukagtina nujaig tupagkiu aajakuitjume. Nunin asajum jakaujai betek batsamajakuitjume pegkegchau takaakjum, Apajuí umigchau asajum. <sup>2</sup>Ju nugkanmaya pegkegchau takat aina nuna, wakan pegkegchau apuji iwanch, aents Apajuin anentaimtuchu aidaun takamtika, nunuke takajakuitjume. <sup>3</sup>Jutiishkam duwikik antsaik, ashí ii pegkegchau takastasa wakejamuk, ii pegkegchau anentaimtamujig wakejesa takainaku batsamajakuitji. Nunijakú asajin, Apajuik tikich aents pegkegchau takaidaun suwimkan suwakug jutiijai suwimkanak sujamain aajakú. <sup>4</sup>Tujash Apajuik shiig senchi wait anenkagtina ibau asa, imá niina anenkajinig anempajui. <sup>5</sup>Jutiik iina tudaujinig jakaujai betek batsatjinig, Kristu maamu aajakui-tak, ataktú nantakiuwa duwi pujutnak amasuí, imá niina wait anejattinig uwentikam asauwaitji. <sup>6</sup>Wagki, Kristu Jisusjai ijutkau asaja Kristujai betek nantakiu ainaji, nunikaja nijai betek nayaimpinum inamjatasaja. <sup>7</sup>Juna jutikauwa nunak atak ashí aents aidaun iwaintuktatus dutikauwai. Ni shiig senchi wait anenjabaujiya nunak, jutii Kristu Jisusai ijutkau pujuinajinish, wajak wait anenjamsaya yaimpaji nuna iwainawai.

<sup>8</sup>Imá niina wait anenkagtutinig, nuigtú niina Uchijinig kajintsá anentaimu asagmin uwentijamjajui. Nunak atum pegkeg takasbaugmin dutikachui, imá Apajuik anenjauch uwentijamjauwai. <sup>9</sup>Jutiik pegkeg takasbaunum uwemkachu asaja,

makichkish ii emematmamainuk  
atsugtamji. <sup>10</sup>Jutiik Apajuí najankamu  
ainaji, nuniautin Kristu Jisusjai ijutkau  
pujajin yamajam pujutan amasajui, ni  
yaunchuk wakekamujia dutiksag,  
pegkejan takastinme tujamu asa.

**Kristu nemajuinaku agkan pujamu**

<sup>11</sup>Nunin asamtai adeagtajum, atum  
judiuchu aidautigmek, mina pataag  
judío yaunchuk pakamakaju asag,  
atumnak Apajuí aentsjinchua nunin  
diigmajakú aina nunú. <sup>12</sup>Nunú tsawanti-  
nig atumek Kristu dekachu asajum,  
Israel aents aidaujaish ijunmainchau  
aajakuitjume. Apajuí ditajai chichaman  
apaak anagkuauwa dushakam dekachu  
asajum, nuní uwemainapita tusa  
dakamukesh atsugtamaidau asagmatai,  
Apajuigtuchu ju nugka juwig  
pujukauitjume. <sup>13</sup>Tujash Kristu Jisus  
atumin ayamjutpak numi yapajiamu-  
num numpen ukajua nuaduí, yaunchkek  
Apajuíjai atushat batsamajakuitkujum,  
yamaik tikijuch ijutkau wajasugme.

<sup>14</sup>Jutii judío aidauti, judiuchu aidaujai  
kajegdayajakuitag nunak, yamaik Kristu  
Jisusjai ijutkau pujuidau asajin, nigki  
agkanmitkagbauwai. Nunú kajegdaya-  
mua duka tanish ejatkagta numamtin  
aajakuí. Nunú nunin aajakua nunak  
tsaik ajapeak makichik niina aentsji  
etamkajui. <sup>15</sup>Judío aidautik yaunchuk  
Kristu nemagtsukek, Apajuí chicham  
umiktajum tiuwa nunú, chicham  
umiktinun Moisés agajua nujai umiaku  
uwemjagtasakanmamajakuitji.  
Nunijakuitag nunú yamaik jutii judío  
aidautish imá Kristuig kajintsá  
anentaimjin, ashí tikich judiuchu  
aidaush imá Kristuig kajinas anentai-  
maidau asagmatai, mai yamajam  
aentsua numamtin etamkauwai. Dutik  
shiiig agkan anentaimsa pujutnak  
amasajui. <sup>16</sup>Jisukristu numi yapajiamu-

num achinag mantamnak judío aidautin  
judiuchu aidaujai ijupajui, Apajuíjai  
epegtuniatnume tusa, dutijama Kristu  
makichik iyashia nunin etamkauwai.

<sup>17</sup>Kristu ju nugka juwi taa, pegkeg  
chicham shiiig agkan anentaimsa  
pujutan sukagtina nuna, atum yaunch-  
kek Apajuí anentaimtuchu aidautigmi-  
nash, jutii Apajuí chichame dekau  
aidautijai ujakajui. <sup>18</sup>Aatus Kristu  
dutikau asamtai, jutii judío aidauti,  
atum judiuchu aidautigmeshkam,  
Wakaní Pegkeji yaimpasmatai Apajuí  
adigmainaitji.

<sup>19</sup>Nunin asajum atumek tikich  
nugkanmayaya nuninuk ainatsjume.  
Kristu nemajuidau Apajuí aentsji aina  
nuninuk wajasú asajum, atumshakam  
Apajuí aentsji ainagme. <sup>20</sup>Atumnak jega  
jegamkatas shugku ajitiamana numam-  
tuk awajtamkajui, Jisus chicham  
etsegtugkata tusa ishiakbau aidau,  
nuigtú Apajuí etsegtin aajakajua  
dushakam Kristu pachis jintinjamawa-  
jua nuaduí. Tuja Jisukristuke kaya  
dekas ashí jegan ichichia numamtina  
dushakam. <sup>21</sup>Jega shugkunum chichigká  
buchitmainchau wajas aama numamtuk,  
jutii Kristu nemajuidautish niinig  
sumimkau asaja, niijaig kanamainchau  
wajasuitji. Nuniku asaja jega Apajuí  
ememattai pegkegma iman ainaji.  
<sup>22</sup>Nunin asamtai atum judiuchu  
aidautigmeshkam, ashí niinig ijunainak-  
jum, jega Apajuí ememattaiya numam-  
tin ainajume, Apajuí sujamsamu Wakaní  
Pegkejia nu pujugtamana asamtai.

**Pablo judiuchu aidaunum takasbau**

**3** <sup>1</sup>Atum judiuchu aidautigmin  
yamajam chicham ujektá tusa  
Kristu Jisus awetiu asamtai, ni pachisa  
etsegbaunum yamai juwi achinkan  
pujajai. <sup>2</sup>Atumnak Apajuí atumin wait  
anenjamana asa, mina: Ame jujú shiiig

ujaktá, tujutiwa duka machikish utujimtsuk dekamainaitjume. <sup>3</sup>Apajuí duwik anentaimas nuna dutikatin atajai tibau dekaachuitag nunak, yamai mina ashí shiig dekamtijuae. Dutijuau asamtai, atumnashkam nuna pachittsan ujumak agatjan awetimjime. <sup>4</sup>Nunú aukujum shiig dekamainaitjume, Apajuí yaunchuk anentaimas Kristu pachisa tibau dekaachbauwa nuna mina dekamtijuau nunú. <sup>5</sup>Nunak aents yaunchuk batsamajakua dukesh dekaachaju ainawai, tujash yamaik, Jisus pachisam chicham etsegkata tusa Apajuí ishiakbau, nuigtú Apajuí etsegtuidaush imá Apajuinak takajujakú aina nunash Wakaní Pegkeji dekamtikawaje. <sup>6</sup>Nigka juna tiuwai: Judiuchu aidaushkam yamajam chicham uwemat awai tusa etsegbaun antukag, Kristu Jisusai kajinas anentaimainak, judío aidaujui betek uwemtan jukitnume. Wagki makichik iyash wajasaju asag, Apajuí Kristu nemajuidaun anagkuauwa nunash jukitnume tujabiuwai. <sup>7</sup>Minak Apajuí wait anenjug yamajam chicham etsegkata tusa awetiuwai, dutijuau asa niina senchijnash sujusuí.

<sup>8</sup>Wika ashí aents Apajuin nemajuina nujai apatkamak imanchauchtjai. Tujash nunin aig Apajuí mina etegtua, judiuchu aidaunash yamajam chichaman ujaktí, dutikak Kristu wiyakchaji nagkanmainchauwa nuna pachisash etsegkati tusa, awetiuwai. <sup>9</sup>Nuigtushkam Apajuí ashí wájí aidaun najankauwa nunú, yaunchuk ni anentaimsamuji umkauwa nunin aajakua nuna mina dekamtijuauwai, aents aidaun ujaktí tusa. <sup>10</sup>Junak nigka Kristu nemajin aina nui niina yachajinak kuashat niimtinai iwainmamkauwai. Juna dutikauwa nunak, ashí dekas wakan pegkegchau aidaun agkajunum batsamin, nu wakan aina nuna apuji

senchigtin aina dusha: Nigkiap dekas ashí yachaita, tujuttinme tusa dutikauwai. <sup>11</sup>Apajuik junak jutikauwai, ni yaunchuk anentaimtugbau tuke atinun ii Apuji Kristu Jisus dutikauwa nuna. <sup>12</sup>Ni nunikbaunum imá Kristuig kajintsá anentaimaidau asaja, kajinmasa Apajuyai jegamaina duka agkan ajutjamji. <sup>13</sup>Nuaduí, wi atum judiuchu aidautigminash Kristu pachisan jintintu asan, juwi achinkan pujasan waitiang nu antakjumes mijakaigpajum tusan segajime. Duka dekas atum ayatak eme anenmamainaitjum nuuwai.

#### Pablo Apajuí aujku emematbau

<sup>14</sup>Wika Apajuí juna dutikatjai tibaunak ashí dutikauwa duwi, iina Apuji Jisukristun Apajiyi nunak tikishmatjan emematjai, <sup>15</sup>nigka ashí niina aentsji aina nuna Apajiyai, nayaimpinum batsata nunash, nugká batsata nunashkam. <sup>16</sup>Wika Apajuinak segatjime, ni ashí pegkeg aidaun ajá nuna amastinme, dutijamawagmatai Wakaní Pegkejiya nunú yaimpasagmatai, atumesh ichichmamjatajum tusan. <sup>17</sup>Nuniakjum atum Kristui kajintsá anentaimaidau asagmin, ni atumiin pujugtamu asamtai, aneenisa pujakjum shiig emetmamjatajum tusan. <sup>18</sup>Nu nuniakjum ashí Apajuí aentsji aidautigmek shiig dekatagme, wajuk Kristu iina senchi anempaji nunú. Ni anejatbaujiya nunú nagkatkamujig atsuuwai. <sup>19</sup>Nuigtushkam segajai, nunú Kristu imaanika anejatbau ashí dekamaitu nuna dekamtijamatnume, dutijamawagmatai Apajuí anentaima imanuk atumesh anentaimkau aminjum tusan.

<sup>20</sup>See tajai Apajuí senchigtina nuna, nigka ii wájí pachisa dutikata tusaya segaji nuna nagkagas ashí pegkejan iinun dutika nuaduí. Iman asamtai jutii anentaimtajiya duka, ni dutika nunú dekatnumag jegatsui. Nuna pegkeja



dutika nunak Wakani Pegkeji jutiini puja nujai dutikawai. <sup>21</sup>iJisus nemajin aidautik Apaju emematiagmi, Kristu Jisusan sujamsau asamtai! iAjumaish tuke ememattai atin ati! Aatus ati.

#### Wakannum ijutkau pujamu

**4** <sup>1</sup>Wika Apu Jisukristu chichamen etseju asan achigkagmatai juwi pujujai, nunin asan atumnashkam Apaju pegkejan takastinne tusa etegtamaju asagmatai, ni etejamu aidaush wajuk pujumain ainawa nunisjumek shiig pujustajum tusan segajime. <sup>2</sup>Atumek kakagchauch, shiig awajkagtin, waamak kajechu atajum. Nuniakjum tikich aidau shiig dutikachu wainkugmesh, pempeentu-nisjumek aneenidau asajum katsunajum dakanistajum, emamkesa iwajamu ati tusajum, <sup>3</sup>nuniakjum Wakani Pegkeji tikich aidaujaish, shiig agkan ijutkau pujutan amainajum duke kuitamkatajum. <sup>4</sup>Jutiik makichik iyashia nunin ainaji, Wakani Pegkejiya dushakam makichki, ni jutiini pujugtamu asamtai, Apaju pujut tuke atinun amastinaitjime tujabiuwa duke ashí dakainaji. <sup>5</sup>Apushkam imá Jisukristuke, niinig kajintsá anentaimainaji, nuniaku imá niinig anentaimsa yamimainaji. <sup>6</sup>Apajuishkam makichkiuchi, ashí aents aidau Apajiya nunú, nunin asa ashí Apaju nemajuina nui inamui.

<sup>7</sup>Tuja Kristu wait anenjamu asa, makí makichik aidautin dekamtijamauwai ni wakejamu pegkeja nu takagsatnun.

<sup>8</sup>Nuadu agagbaunum chichaak:

“Nayaimpinum wakae ni shiwajin depetuk achijá yajuak,  
nunik aents aidau dita yupichu  
dutatkatnunak tinamkae”, tawai.

<sup>9</sup>Depetmak “wakae” tiuwa nunak, nayaimpinmaya juwaki nugka taa, maam nantakí ataktú wakatin asamtai tiuwai. <sup>10</sup>Nu yakiya tauwa duke ashí nayaim aidau nak nagkagag wakauwai,

nunik ashí najankamu aina nuanuí inamui. <sup>11</sup>Nigki adaijauwai: Chichaman etsegkatnume tusa etegka ishiakua nunash, Apajuinun etsegtuktin aidauash, yamajam chichaman etsegkagtin aidauashkam, Jisusa nemajuidau jintintuatnunashkam. <sup>12</sup>Junak Apaju adaijamua nunú aidau, tikich aents aidau yaigtinme, dutikam Apaju wakegamun takajuinak, aan nagkaemas Apajuin dekaskeapi tusag Kristu nemajuidaush kawegtinme tusa dutikauwai. <sup>13</sup>Nunú aaja nunikaja Apaju Uchijí yaita nuanuig kajintsá anentaimainaku, nuigtú niijaig ijutkau pujuidau asa muun anentai jukiaja, Kristujai betek agmi iina anentaimtajinish, aents aidaujai shiig awagdayinaku.

<sup>14</sup>Nuninaku uchi kakajus tsanumaina nuninuk achagmi. Nunidau asaja tikich aidau aentsun tsanuinak waitan jintiina dushakam kakajus tsanumainchau agmi. <sup>15</sup>Nuninaku Apajuinu dekaskea duke chichainaku, tikich aidaujaish pempeentunisaik aneeniagmi. Nunú aaja nuninaku, jutiishkam Kristu iina Apujiya imanuk wajasagmi. Kristu nemajin aidautinak niyai juti buukega numamtinuk. <sup>16</sup>Kristu nemajin aidautik Kristujaig iina iyashí ashí shiig ijunag awa numamtin ainaji. Nunú iyash akanjamua nuanuuiya makí makichik dita takamainjinak takainak jamamtu-chu tsaká numamtuk jutiishkam, Kristu kajintsá anentaimaidautik kuashat ainaji. Tujash Kristuk inapau asamtai makichik iyashia nunin ainaji, nunidau asaja aneenisa pempeentunisaik tikich aidaujaish yaininaku, aan kuashat Apaju wakegamua duke takasagmi.

#### Kristu nemagku yamajam pujut juwamu

<sup>17</sup>Tuja juna tajim nunak, Apu Kristu wakega dutiksanuk tajime: Atumek

aents Apajuí nemagchau aidau wainak anentaimaina nunitsuk batsamsatajum. <sup>18</sup>Ditak suwe ejatkamua nuninun anentaimaidau asag, yamajam pujut Apajuí sukagtusbauwa nunú anentaimtutnash dakituinawai. Ditak Apajuí umigtan dakituidau asag, dekachu weenawai. <sup>19</sup>Nuninak datsantainchau waigkag, ashí pegkegchau aidau takatan idaimainchau dekapedau asag, nunak wakejus tuke taká batsamin ainawai. <sup>20</sup>Tujash atum Kristu nemagkautigmek aan pujutak unuimagchawaitjume. <sup>21</sup>Atumek dekaskenum Kristu pachisa etsegbau antukuitjume, nunikjum ni wajuk pujusti tusaya wakejutpawa nunisjume pujakjum, niiniya unuimajuitjume dekaskea dushakam. <sup>22</sup>Nuaduí atumek, yaunchuk wajuk pujujakuitjume duka idaikujum, duwik aajakuitjum dusha yapajinmainaitjume. Wagki ashí atum nunijakuitjum duka, anentaim tsanugmakui pegkegchau wakegamunum dutikau asagmin emestamkajui. <sup>23</sup>Atumek Apajuiyai idaimamsatajum, yamajam aents etamtinme. Dutijamawagmatai atumesh yamajam anentaimat jukimnujuk. <sup>24</sup>Apajuí yamajam anentaimtan amasajui jutiinashkam ni anentaimka imanuk anentaimkau agtinme tujamu asa, nuninak Apajuí wakegamu pegkeg aina nunak takastime, ni chichame tawa dutiksag, tusa. <sup>25</sup>Waitjuta duka idaikujum, tikichjai chichaakjumesh dekaskea duke chichatajum, wagki jutii Kristu nemajin aidautik makichik iyashkea nunin asaja. <sup>26</sup>Kajeakjumesh, tunamajaigpajum, kajeakjumesh tuke etsa akapakigpajum, <sup>27</sup>iwanch yunumtugmak pegkegchaun takamtijamsainum. <sup>28</sup>Yaunchuk kasamajakú akush, yamaik kasamkaigka, dekas takastí pegkeg aina nunak, nuniak tikich

atsumaidaunash yaigta tau asa. <sup>29</sup>Chicham pegkegchauk chichakaigpajum, dekas chicham pegkeg tikichnash yaimaina duke, tikich antuidaushkam wakejus antumaina duke chichaktajum. <sup>30</sup>Wakaní Pegkejiya nu pegkegchau takaakjum wake besemag anentaimtikigpajum. Apajuí niina aentsji etamkamua nuna iwaintugmakta tau asa Wakaní Pegkejin amasajui. Dutikamu asa nigka jutijaig pujutnai, uwemkau aidautin Apajuí nayaimpinum iwagmak, ashí pegkegchau aidaunum agkanmitkagmatna nuwishkam.

<sup>31</sup>Tikich kajegsá anentaimtut, tikich kajejut, kajeká shinut, tikich pegkegchau chichajut, nuigtú ashí pegkegchau aina dushakam idaisatajum. <sup>32</sup>Nuniakjum dekas pegkeja duke, tikichjaish wait anendajakjum, kajegdaikamu akuish pempeentunikjum tsagkugdaijajum, Apajuí atumin Kristu nemajin aidautigmin tsagkugtamjauwa dutiksagmek.

**Apajuí uchijí aidaush wajuk  
pujumainaita nunisaik pujumain**

**5** <sup>1</sup>Atumek Apajuí uchijí anetai asajum, niya ibau atasajum kakanmamsatajum. <sup>2</sup>Ashí tikich aidaujaish, Kristu jutiin anempajua nunisjume, pempeentunikjum aneenitajum, nigka nigki niina iyashinak sujukui, jutii tudaujin mantuatnume tusa. Kristu mantamdauwa duka Apajuinu anentagkuntin itaamu maamua nu shiig awagmajakua imanuk aajakuí.

<sup>3</sup>Atumek Apajuí aentsji asajum, tsanijinmain ainatsjume, nuigtú tikich ashí pegkegchau aina dushakam, tuja wájí aidaushkam imá midauk atí tusagmek anentaimainchau ainagme. <sup>4</sup>Pegkegchau aidau augmatut, wainka anentainkas chichat, pegkegchaunum iwajut aidauk idaisatajum, wagki nunú

aina duka chichaa yujamain ainatsji, dekas Apajuí emematkujum chichatajum. <sup>5</sup>Atumek shiig dekagme, tsanijimtan yujajin aidauk, ashí pegkegchau aidaunak takaa pujú aidaushkam, tuja itugsanuk wajiijinawag tusa imá nunak anentaimtú pujauk (duka apajimtai emematmaina numamtinai), Kristu inamtaijinig pujuschagtinai. Nuigtush Apajuí jutiin wájí sujabaunashkam jukichagtinai.

**Wakaní Pegkejiya nujai ijutkau pujaku dutikmain**

<sup>6</sup>Aneaku atajum, wainak chichamai tsanugmajainum. Nunú pegkegchau aidaun timajim nuna takaidauk, suwimak tikima ishamainun jukiagtinaí, wagki Apajuí umigtsuk tu yujaidau asag. <sup>7</sup>Nuaduí atumek dita takainamukesh takasaigpajum. <sup>8</sup>Atumek duwikik pegkegchau takaakjum, suwenum pujumaina numamtuk pujujakuitjume. Tujash yamaik Apu Kristujai ijutkau pujakjum, ni pegkejan wakeja duke takaakjum, tsaaptinum pujumaina numamtuk wajagme. Nuniau asajum Kristu aentsji aidaush, wajuk pujumainaita nunisjumek pujustajum. <sup>9</sup>Wagki, Wakaní Pegkejiya nujai ijutkau pujaku dutikamuk: Ashí wait anenkagtut, Apajuí pegkeg aidaun wakega duke takat, nuigtú chicham dekaskea nunú umiamu aina nu ainawai. <sup>10</sup>Nunin asamtai Apu Kristun shiig awagma nu takastasajum kakanmamsatajum. <sup>11</sup>Aents Apajuí nemagchau aidau pegkegchaun takaina duka takasaigpajum, dekas pegkegchaun takaina nunú idaimitkastajum, dutikam ditash pegkejan takainak, tsaaptinum waimaina numamtuk wajaktinme. <sup>12</sup>Dita pegkegchaun uuká takaina nu pachisaik tumaitsui, tikima shiig datsan asamtai. <sup>13-14</sup>Tujash Kristu nemajuina

duka Kristu iwaintamu asag, dita pegkegchau takainamujinak shiig dekamain ainawai. Papí agagbaunum: “Ame kanam duka shintagta, aents jinau aidaunum pujaumesh nantaktá, nunikamin Kristu tsaapmitkagmati”, tawai.

<sup>15</sup>Nuaduí atumek senchi kuitamamkajatjum, anentaimkas batsamsuk shiig anentaimesa pujustajum. <sup>16</sup>Tsawantash wainka megkayigpa, wagki yamai tsawan batsatag juwik, pegkegchau takaamu ayau asamtai. <sup>17</sup>Anentainkachua wajukmaina numamtuk wajatsuk, kakanmamsajum Apajuí wakejamua dusha tuwita nu dekaatajum. <sup>18</sup>Nampekaigpajum, nampeamua duka anentainkachua nunin ekagtau asamtai, duka nunitsuk dekas Wakaní Pegkeji takamti-justi tusajum, niniig idaimamsatajum. <sup>19</sup>Nuniakjum tikich Kristu nemagkau aidaujai chichaakjumesh, Wakaní Pegkeji tujabauwa nunú Apajuí kantam-jutai kantamkujum, shiig dakujusjum Apajuí ememattajum. <sup>20</sup>Nuniakjum Apajuí iina Apajiya nunú, ashí pachisjum tuke see tusagmeké atajum, iina Apuji Jisukristui kajintsá anentaimaidau asajum.

<sup>21</sup>Kristu eme anentamunum, pempeentunisjumek shiig anejasjum sumimdaikatajum.

**Aishmag nuwentin nuwa aishintin aidau batsaamain**

<sup>22</sup>Nuwa aishintin aidauk imá niina aishinak umigmáin ainawai, Kristun nemagkau aidau, imá Kristunak umijuina nunisag. <sup>23</sup>Aishmagkui nuwá apujiya duka, Kristuwai niina nemajuina nuna Apujiya duka. Tuja jutii ni nemajuidautik niina iyashiya numamtin asajin, niyai iina buukega numamtinuk. Nunin asajin nigki

uwemtijamui. <sup>24</sup>Jisusa nemajin aidauti Kristu umijuinag nunisag, nuwa aidashkam imá niina aishinak umigmain ainawai.

<sup>25</sup>Kristu jutii ni nemagkau aidautin anempau asa iini mantamdauwa nunisjumek, nuwentin aidautigmek atumi nuwem aneetajum. <sup>26</sup>Kristuk nunak minaig kajinas anentaimaidauk Apajuí aentsji waigtinme tujamu asa dutikauwai. Ni jutiiin mantamdauwa nuaduí, jutii niina eminish bakumainush atsugbau wantinkauwaitji. Jutii aidautik Apajuí chichame antaku: Wika imá Kristuig kajintsan anentaimjai tajin, tikich yamigmaju ainaji. <sup>27</sup>Niina nemajin aidautinaka tudaugtuchu etamak, imanisag pegkeg iwaintamkata tujamu asa nunikui. <sup>28</sup>Nunisag nuwentin aidashkam niina nuwenak aneemain ainawai, niina iyashí anentus. Ni nuwen aneak niina iyashinash dutiksag aneawai. <sup>29</sup>Wagki makichikish niina iyashinak kajegchau ainawai. Ayatak shiig kuitamak ayujin ainawai, Kristu niina nemajin aidautin kuitamajama dutiksag. <sup>30</sup>Wagki, jutii Kristu nemajin aidautik niina iyashiya nunin ainaji. <sup>31</sup>Yaunchuk agagbaunmashkam: “Aishmag nuwenkug niina apajinaka dukujinash ukumainai, nunikag nuwajai ijunak makichik iyash wegawai”, tawai. <sup>32</sup>Jujú Apajuí yaunchuk anentaimsamu dekaachbau aajakua duka, niini kajintsa anentaimaidautik Kristujaig makichik iyashkea nunin weenag nuwui. <sup>33</sup>Junin asamtai makí makichik atum aidautigmesh nuwem aneetajum atumi iyashim anentsajum, tuja nuwashkam niina aishinak eme anentus diimainai.

#### Uchi aidau apajin umigmain

**6** <sup>1</sup>Uchi aidauh, atumin apa umigkatatum Apu Kristun shiig awagma dutiksagmek, nuwui dekas pegkejak.

<sup>2-3</sup>Chicham umiktina nuwiyen, Apajuí jujú umiakum kuashat tsawan shiig aneam pujuatnaitme tusa anagtabauwa duka: “Amina apa dukujai eme anentsam diistá”, tawai.

<sup>4</sup>Atum uchigtin aidautigmeshkam uchijum takaamujinkish, jintinbaunmagkesh kajemainuk chichagkaigpa, dutiktsuk shiig chichagkam jintintuata Kristu wakega dutiksamem.

#### Inamin aidau ni inake aidaujai dutikmain

<sup>5</sup>Inak aidauh, atumi apujum inapakuig shiig umigkatatum, tujash dekaskenum ajantusa diyamui dutikatajum, ayatak wantinkata tabauwai dutiktsuk, Kristu takagmainaitjum imatiksajum takagsatajum. <sup>6</sup>Takaakjumes inapau wajasá diigmakui shiig anenjusti tusajum takatsuk, Kristu inake asajum tuké wakejusjum Apajuí wakeja dutiksagmek takastajum. <sup>7</sup>Shiig aneasjum dakunkut takastajum, aentsdau takaatsjapi, Apu Kristununap takaja, tusajum. <sup>8</sup>Aents inashtai agkan aidau, inaku waitkatai aidauashkam, dita waji pegkeg takasbauwa dutiksag, pegkegnum Apu Kristu betek akiktina nunú adeagtatum.

<sup>9</sup>Inamin aidauh, atumshakam atumin inakem aidauk shiig kuitamkatatum, wainkajum uwakajum takamtiksagpa-jum. Adeagtatum atumin inapaushkam, Apu Kristu nayaimpinum pujus diigmá puja nunú. Kristu diismak ashí aentsuk betekai. Nunin asamtai nigka dita takasbaujinak betek susatnai.

#### Kristu nemajin aidau wakan pegkegchau aidaujai maaniamu

<sup>10</sup>Yatsug aidauh, ubag aidauh, junashkam tajime: Atumek imá Apu Kristujaig ijuntsajum pujakjum, niina senchijí dekas imana nunú jukitasajum wakejita-

jum. <sup>11</sup>Apajuí nagki ejamatai sujama nujai iwanch tsanugmakuishkam ejamaktajum, nuniakjum ichichmamta-jum. <sup>12</sup>Jutii aidaulik aents aidaujaig maaniatsji. Jutiik dekas wakan pegkeg-chau aidau agkajunum batsamin, nu wakan aina nuna apuji senchigtin aidau, ju nugka suwea juwi pegkegchaun inamin aina nujai maaniaji. <sup>13</sup>Nuaduí ashí Apajuí ii ejamamainun sujama nunú jukitasajum kakanmamsatajum, nu jukiú asajum pachiachmau iwanch waitkagmakuish atsanjatajum. Atum iwanch tsanugmakuish, ashí atsanjag-mek duka tuke depetbau atinaitjume.

<sup>14</sup>Apajuí chichame dekaskea duke anentaimtuta nuuwai, maaniaku wegaku suntajan akachumtaijiya nujai betekak. Suntag jiijuí detsepeen ejabau aina nunisjumek atumshakam ejamakta-jum, pegkeja duke takaaku pujamunum. <sup>15</sup>Maaniamu epegnati etsegkata tusa suntag awemam, sapatjin wegaamak shiig jigkajá umina numamtuk atumsha-kam umintsatajum, Apajuí agkanmaetan sukagtawai tusajum etsegkatasajum. <sup>16</sup>Ju aina nuní nagkaemasag imá Kristuig kajintsá anentaibauwa nunú ajutjamainai, nuuwai atumin tantagju-mik, iwanch akentaijin ekeemak aketjamkui ikagnaktinuk. <sup>17</sup>Kristu iina uwentikagtujua nunuwai, atsejutai suntajan buuken ejata numamtuk atumin ejapauk. Apajuin chichamen, Wakaní Pegkeji sujamsauwa nuuwai iina tuke nagkijig. <sup>18</sup>Duka kajimattsuk

tuke Wakaní Pegkeji wakejamua dutiksagmek Apajuí ausatajum. Machikish mijamtsuk aneaku pujakjum, ashí Kristun nemagkau aidauš Apajuí aujustajum. <sup>19</sup>Atum nuniakjum minash-kam segatjitajum, Apajuí minash yainkati, wishakam ishankagtutsuk yamajam chichaman Apajuinu yaunchuk dekaachbau aajakua nuna uwemat awai tusan etsegkatjai. <sup>20</sup>Apajuí minak ju chicham etsegkata tusag awetiuwai. Dutijauu asamtai nuna chichagkagtakun wekagai juwi achigkagmatai pujajai. Nuniaigkishkam minash segatjitajum, sapigmakas Apajuí chichamenash etsegtuktajai.

#### Akatmabau

<sup>21</sup>Tíquico iina yachi aneetaiija nunú minakui juna papiin agajan awetajime. Nigka minak Apajuin chichame etsegbaun-mag kuashat yainkae, nuniku asa ni anuí mina pachittsashkam ujakagtinme. <sup>22</sup>Junak wika, ni iina pujutjin pachis ujakak atumin anentaimnash ichichtug-magtinme tusan awetajime.

<sup>23</sup>Apajuí iina Apajiya nunú, Apu Jisukristujai, ashí atum anuiyatijum Kristu nemajuinajum nunak shiig agkan anentaiksa pujutan sujamsatnume, shiig aneenisag pujuinak, imá Jisukristuig kajinas anentaimtinme tusa. <sup>24</sup>Aents aidau Apu Jisukristun tuke aneedaunak Apajuishkam tuke yayasagké atinai.

Aatus atí.

# PABLO PAPI AGAJA

## FILIPOSNUMIA AIDAU AWETIMU

---

### Pablo Filiposnumia aidau kumpabau

**1** <sup>1</sup>Witjai Pabloitjai, Timoteojai Kristu Jisusa inake aidauti, ashí Apajuí aentsji aidautijum, nuigtú Jisusa nemagnun diin aidau apuji, tuja Jisusa nemajuidau atsumamujin diin aidautijum Filipos batsatjum nuna ashí ijumjan kumpamjime: <sup>2</sup>Apajuí iina Apajiya nunú, Apu Jisukristujai wait anenjamag shiig agkan anentaimesa pujutan atumnash amastinme.

### Pablo Jisukristu nemajin aidau Apajuí aujtusbau

<sup>3</sup>Atumin anentaime taknuk tuke see tusanké ajai mina Apajuijun. <sup>4</sup>Apajuin aujgunush ashí atum aidautigmin pachisan shiig aneasan tuke segattsanké ajime. <sup>5</sup>Wagki, atum yama nagkamchakjum Jisukristu nemagkauwaitjum duwi nagkamsajum, Jisukristu chichame etsegbaunum yaintijum nunisjumek, yamaikish tuke yaintú batsatjum nuaduí. <sup>6</sup>Apajuí atumiin takat pegkejan nagkabauwa nunak, dutiksagkeap takantiká atatua Jisukristu minítai inagnaktatus tajai. <sup>7</sup>Ashí atum aidautigmin aajan anentaime tajim nunak, senchi aneau asan dutikajime. Apajuí chicham yamagman etsegkati tusa sujusua nuna etsegkui yaintu asajum, atumek mina kumpag aajakuitjume. Yamaishkam

atumek mina kumpagketjume, wi juwi achigkagmatai pujag duwishkam. Wi yamajam chicham etsegbauwa nuna dekgatuawagtatus, apú emtin inintainakuish, ju yamajam chicham Kristu pachisa etsegbauwa juka dekaske tusa chichamunmash, ashí atum aidautigmek yainjume. <sup>8</sup>Wi atumin aneajime tajim nunak, Apajuí shiig dekgatawai, Kristu Jisusa anenkajiya nunú sujusbauwai aneajim nuna. <sup>9</sup>Nuniakun Apajuí aujgunush: Atum aneeniajum nunú aan nagkaemas ajutjabiagti, tuja pegkeg pegkegchajui akanjá dekatnash Apajuí amastinme, nuigtushkam Apajuinua nu dekatnash amastinme tusan segatjime. <sup>10</sup>Dutijamawagmatai pegkeja nunú etegket unuimagjum, atumi pujutjuminish imagnisjum shiig pujuinakjum, Kristu taakuish pegkegchaush atsugbau bakumamainchau atajum tusan. <sup>11</sup>Nuniakjum Jisukristu yaimpasagmatai pegkeg takaamu iwainagtai, nuna wainainak tikich aidauh Apajuin eme anentus ememattinme tusan.

### Wika imá Kristuk umigku pujusta tabauwa nuuwai

<sup>12</sup>Yatsug aidauh, ubag aidauh, mina waji nagkaetukiagma nunú, yamajam chicham etsegbaun aan senchi yainkama nunú dekaatajum tusan wakegajai. <sup>13</sup>Ashí suntag, apú jeen kuitamin aidau, nuigtú tikich suntag

mina kuitamjuina dushakam, wi Kristu umiju asan achinkan egketag nunak shiig dekagtuinawai. <sup>14</sup>Wi junika achinká egketbaun waitkag, kuashat yatsug aidaú, ishamkagtutsuk imá Jisukristuig kajintsá anentaimsa chicham etsegta nuna wakekaje.

<sup>15</sup>Duka dekaske, wajumak aents niina nagkaesan takaakun aents aidaush shiig takainawai tama atajai tamaunum Kristu pachis etsejuinaush ainawai. Untsu tikich aidauk Kristun shiig anentus etsegtuinawai. <sup>16</sup>Nuninai wajumak aidaú Kristu aneamunum etsegtuinawai, Apajuí yamajam chicham dekaskea nuna aents aidaun iwaintukti tujutmatai, juwi achinkan pujag nuna dekagtuídaú asag. <sup>17</sup>Nunú mina nagkaetus takasta tuina duka, pegkeg anentaiyai tuinatsui, imá ditanunak anentaimtus dutikainawai. Nuna dutikainak, wi achinkan yamai egketag nuna aan nagkaemas utugchatan aputugsatasag wakegainawai. <sup>18</sup>Tujash nunak puyatjatsjai, dekaskenum pegkeg anentaiyai etsejuinakush, imá Kristunak pachis etsejuina duwi shiig anejai.

Nuní nagkaemas shiig aneamuk ajuttatui, <sup>19</sup>atum mina pachittsajum Apajuí aurtugjum nuna dekakun. Wagki, wika shiig dekajai atum Apajuí aurtugjum duwi, Wakaní Pegkejiya nu yaintsamtai achikam egketag junak waamak jiinkittag nunak. <sup>20</sup>Duwi juwi pujusnush shiig emetmamjan, mina inastumaina nunak takatsuk pujusta tusan wakegajai, wi aaja pujamun waituinak, tikich aents aidaush minaiyan unuimajag Kristu imanjiya nunash shiig dekaatnume, mina iwaaku jigkiagmataish, nuniachkush mantua-wagmataishkam tusan. <sup>21</sup>Wagki, minaig pujuta duka Kristu umigku pujuta nuuwai, tuja jaamushkam Kristujai pujuta nuuwai. <sup>22</sup>Wika iwaaku

pujutnash wakemainaitjai, tuja jatanashkam wakejumainaitjai, nuniau asan shiig etegmain dekapeatsjai. <sup>23</sup>Minaig shiig utugchatai jimaja juwiya etegkata tabauk: Wakegajai jakan Kristujai pujustasan, nunú imá pegkeg asamtai; <sup>24</sup>tujash atum mina atsumjuinajum nuna dekau asan, <sup>25</sup>dekas iwaakuap atumjai ijunjan pujuttaja, nuniaknuap atum Kristui kajintsá anentaimjum nuaduú shiig aneasinme tusan yaigtatjime tajai. <sup>26</sup>Tuja wi ataktú atumiin wakettsanuk tattag duwi, aan nagkaemas Kristu Jisusai dakujamu ajutjabiagtinme tusan tajime.

#### **Yamajam chicham Kristunu tawa nunisaik pujut**

<sup>27</sup>Ayatak segajime, atumi pujutjuminish yamajam chicham Kristunu tawa nujai betek pujustasajum kakanmamsatajum tusan. Nuniakjumin wi atumiin taaknush, tuja atushat pujaknush, ditak makichik anentaiyaiik shiig ijuntsag Kristu uwemtikagtamun pachisag etsejuinawai tabaun antuktasan wakegajai. <sup>28</sup>Nuniau asamtai yamajam chichaman dakituina duka ishamkaigpajum, nunú atum nuniamua nunú, Apajuí ditanak suwimkan suwak, atumnak uwemtijamjatna nuna iwaintuinawai. <sup>29</sup>Apajuik ayatak Kristuig kajinas anentaimsatnume tusag wakegatsui, Kristu nemagbaunmashkam waittsatnume tusa wakegawai. <sup>30</sup>Nuaduú atumesh wijai betek waituinagme. Atumek minak waitkauwaitjume wi wajupa waittsaija duka, tuja yamaishkam antugtajume wi wajupa waitiatsja nunú.

#### **Shiig aneenisa batsatbau**

**2** <sup>1</sup>Atumin Kristu niina senchijin aents wakemitkaktinun sujamsajua nunak, wika shiig dekajai. Nunú dekas

asamtai, wi titatjim nunú dutikakjum minash shiig aneemtijustajum. Nuniakjum atumek pempeentunisjumek aneeniakjum anentaish ichichtunigtajum. Atumek Wakaní Pegkeji ajutjamu asagmatai, tikich aidaush wait anentajum nunashkam dekaai. <sup>2</sup>Nunú nuniakjum, ashí shiig anendaisajum pempeentunikjum aneeniakjum, makichik anentaimitama duke ijuntusjum anentaimitakjum, minash shiig aneemtijustajum. <sup>3</sup>Atum ememamugmin, nuniachkugmesh shiwagmagata tabauwai takatsuk, ayatak imanchaich anentaimitumakjum makí makichkitijum, tikich aidau imá pegkeg diitajum. <sup>4</sup>Makichkish imá niinu pegkeg amaina nunak egatsuk, ashí tikich aidaunash shiig awagmamaina nuna egaktinme.

**Kristuk Apajuiyaitak ni imanjinak idayak aentstijai betekak wajasuí**

<sup>5</sup>Atumesh Kristu Jisus anentaimitajakua nuninuk anentaimitkau atajum.

<sup>6</sup>Nigka Apajú aajakuitak nugká taag imanuk atasag wakekachui.

<sup>7</sup>Ni aajakbauwa nunak idayak jutijai betek wajas, ashí aents aidau inataijiya nunin wajasuí.

<sup>8</sup>Aentstiyaitag nuninuk wajasú asa, Apajú umigbaunum mantuatumesa idaimamsauwai, nunik numi yapajiamunum achijam jakauwai.

<sup>9</sup>Nunikmatai Apajú ataktú inanki, yakí nayaimpinum iwak, ashí aents aidaun Apuji emauwai.

<sup>10</sup>Dutikamtaí nayaimpinum batsamin aidaush, nugkanmaya aidaush, ashí Apajú nemagchau jakau aidaushkam imá Jisukristunak tikishmatug ememattinme tusa.

<sup>11</sup>Nuninak Jisusai Apuk tiagtinme, dutikainak iina Apají Apajuiya nunak ememattinme tusa.

<sup>12</sup>Nuaduí mina aneetaig yatsug aidaush, ubag aidaush, wi atumjai pujatsaigkish tuke umigtin agmaujum nunisjumek, yamai wi atushat pujag juwi aan nagkaemasjum umigtuktajum. Makí makichik aidautilum Apajú ajantusa diiyamunum niinig sumimkajum, ashí uwemkau aidau takamaina duke takastasajum kakanmamsatajum. <sup>13</sup>Apajuiya nuuwai atumin pegkeg anentaimit aidaun sujamak, ni wakejamu wakejusa umitnumash yaimpauk.

<sup>14</sup>Ashí atum dutikajum duka chicham patatdaitsuk, jiyanitash jiyantsuk shiig takastajum, <sup>15</sup>atumin makichkikesh pegkegchau takaawai tujaminum. Atumek Apajú uchijí asajum aents pegkegchau katsek aina nuwish, pegkeg iwainmankatajum. Atum nuniakjum aents pegkegchau aina nuwish, yaya etsantak suwen tsaaptin emama numamtin atajum. <sup>16</sup>Chicham dekas pujutan sukagtina nuanuig emetmamatajum. Nuniau asagmin Kristu minakuish, atumiin ememasan anentaimitatjai, tikima wainkanuk imanikan wekaesan, Apajú chichamenak ditanash ujakchawapitja tau asan. <sup>17</sup>Atum Kristui kajintsá anentaimitu asajum umigjum duka, Apajú anentag sumaina numamtinai, mina mantuawagmataish, wi jaamua dushakam, Apajú anentag suwamua nuninuk atatuí. Nunú nunikmatai shiig aneestatjai, nunikmatai atumesh wijai shiig aneestajum. <sup>18</sup>Nuaduí atumshakam wijai shiig aneakjum dakujustajum.

**Pablo Timoteon awetittajime tibau**

<sup>19</sup>Apu Jisus wakegakuig, Timoteon waamak atumiin awemata tajai, atum batsatbaugmin dekaan shiig aneestasan. <sup>20</sup>Timoteowa juuwai dekas wijai betek atumin uyumatjamuk. <sup>21</sup>Wika junak



ashí tikich aidauk Jisukristu wakegamunak egatsuk, dita wakegamunak egaidau asagmatai, tajai. <sup>22</sup>Tujash Timoteo wajuk pujusuita duka atumek shiig wainjume, nigka yamajam chicham etsegbaunmash, uchi apají inam yaiyama imatijusag yaintui. <sup>23</sup>Mina utugtukagtig nuna dekaqmaman niinak awetittajime. <sup>24</sup>Wika imá iina Apujinig kajintsan anentaimjai, nigkiap waamak atumiin awetittawa tusan.

### Epafrodito

<sup>25</sup>Tujash yatsug Epafrodito, atum mina takatan yainkati tusajum awetujiu ainajum nunak, ataktú awagtusnuk awetajime. Nigka yamajam chicham antutan dakituina nui etsegbaunmash shiig senchi yainkae.

<sup>26</sup>Nigka ashí atumin waipakagtatus senchi wakejutpajume. Nuniyatak atum, ni jaawai tabau antugkauwaitjum nuna senchi uyumawai. <sup>27</sup>Dekaskenmag jamayi, jatanak namput wajaschami, tujash Apajuí niina wait anenja nunak, imá niinakek dutikache, minashkam wait anenjuje, wake besemag pujag nuna, nuní nagkaemas wake besemag pujusai tujutu asa. <sup>28</sup>Nuaduí wamkesan awetajime, atumshakam ni wainkajum shiig aneastajum, nuniakjumin wishakam wake besenjajuk pujushtajai. <sup>29</sup>Shiig anentsajum jukitajum, Apajuí dutikatnume tusa wakega dutiksagmek, tuja tikich aents junin wainkugmesh tuke dutiksagmek atajum. <sup>30</sup>Nigka Kristu takajak pujus jamain wajakmayi, ni pujutinak uyumatsuk ishamainnum pujus, atum mina yainmainchauwa nuna ni yainkabi.

### Dekas imana duka Kristu dekaata tabauwa nuuwai

**3** <sup>1</sup>Yatsug aidauh, ubag aidauh, atumek Apu Jisusai ijutkau asajum dakujusjum pujustajum. Wi agatjabiajim

nunak awaksanuk tajim duka minaijg tutitjakesh atsuqtawai, juka dekas atuminish atsumnawai. <sup>2</sup>Aents aidau yawá pegkegchaw tsuumaina numamtin yujas: Uwemjata takugmek pakamakatajum, tu yujaina nujaig kuitamamkatajum. <sup>3</sup>Dekaskenum jutii ainaji Apajuí aentsji aidautik, Wakaní Pegkeji yaimpasmatai, Apajuí emematuinaku Kristu Jisusdau asaja shiig aneanaji, nunin asaja jutiiik yaunchuk dutikajakbauwa duka puyatjuinatsji. <sup>4</sup>Nunú imá jutiiik kakanmamsa uwemainaitkuig, wi dekas imá mina takatjuig uweemain aajakuitjai. Witjai dekas tikich aidau nagkaesan ashí chichamnash umikunuk. <sup>5</sup>Wagki, witjai dekas yama akiinan ocho tsawan wegai pakaji ajapjuamunuk, nuigtushkam Israel wegantuitjai, Benjamigka uchijí aajakua nu wegantum akiinaw asan hebreo aentsuitjai. Tuja judío chicham umiktin aajakua nunú pachisa tabaunmag fariseowaitjai. Nunin asan ashí tikichin nagkaesau chicham umiktin ajakua nunak uwaetsuk betek umikuitjai. <sup>6</sup>Nunin asan chicham umiktinum pegkeg takamainun tawa nuna umiau asan, Jisusa nemajin aidauwash waitkayajai. iMinak makichik aentskesh chicham umiktinuk betek umikchawaitme tujutmain ainatsui! <sup>7</sup>Tujash yaunchkek ashí nunú aidauwash dekas iman dii wajakuitjai. Tujash nunak yamaik, Kristu nemagbauunum wainka diiyajai. <sup>8</sup>Ashí nunú aidauwash idaisauwaitjai, dutikakun pasuamú ukajá ajaptayama nunin anentajai, Kristu Jisus mina Apujua nunú shiig dekaata tabaunum, <sup>9</sup>nunikan niijai ijutkau pujau asantai, Apajuí pegkeg diigsauwai. Nunak chicham umiktina nuna umiakun pegkeg takasbaujui dutijuachui, ayatak Kristui kajintsa anentaibaunum Apajuí pegkeg diigsauwai. <sup>10</sup>Wika Kristun shiig

dekaatasan wakegajai, ni maamash Apajuí senchijinig nantakiuwa, wisha nunú senchinak niina nemagkun jukin, ni waittsauwa nunisnuk waittsan, jaaknushkam Kristu Apajuí wakegamun umiak jakauwa nunisnuk, wishakam Apajuí wakegamun umiakun jakatasan wakegajai, <sup>11</sup>jakau aidau atak nantainakui, wisha nantakmig tau asan.

### Pablo takatji

<sup>12</sup>Wi nuna tajim nunak, wi ashí dutikajai takun tatsujai, nuigtushkam Apajuí mina wajuku atí tujutua duka, minai ashí uminkae tusan tatsujai. Wika Kristu Jisus dekatkawk mina egatkauwa nunú wakejamun umiakun, ayatak emtuktasan wegajai tumamjai. <sup>13</sup>Yatsug aidauh, ubag aidauh, eke wi jegantina nuwi jegatsug nunak, wika shiig dekjajai. Nuniau asan dekas yaunchuk takasbaujua nunak pachitsuk idaikun, yamai wi jegantasan wegag nuna imá senchi anentaimtajai, <sup>14</sup>Kristu Jisus umigbaunum waji shiig pegkejan anentag jukitnume Apajuí tujabiuiwa nuwi jeganta tau asan. Nunú waji shiig pegkeg anenjauch jukitnaitag duka, pujut tuke atina nuuwai.

<sup>15</sup>Ashí jutii imá Jisusaig kajintsá anentaimtanum emetmamjau aidautik, nunisaik anentaimain ainaji. Tuja atum ainajum anuiya yajupias anentaimu ataishkam, Apajuiya duke shiig paan iwaintugmaktinme. <sup>16</sup>Tujash dekas nunimainaitag duka, jutii dekauwaitag dutiksaik umiaku pujumainaitag nuuwai.

### Dekas iina nugkega duka nayaimpinum awai

<sup>17</sup>Yatsug aidauh, ubag aidauh, mina pujutug diisjum atumesh nunisjumek pujustajum, nuigtushkam tikich aents aidau, jutii pujuinag nunisag pujuina nuna pujutí diigsajum nunisjumek pujustajum. <sup>18</sup>Kuashat aents pegkegchaun takaina nunú, Kristu iina

tudaujin juki numinum jakauwai tusa jutii etsejuinag nuna shiwagmainawai. Nuna pachisnuk kuashtá tajime, yamaishkam awentsanuk negá negajai tajime. <sup>19</sup>Tujash nunú aents aidauk Apajuijai tuke kanaak kanakagtin ainawai. Wagki, ditak ayatak yuwamunmag, umamunmag iwaaku pujuinawai, nuninak dita takaamujiya nu datsantan iwaintumaina nunak takainak shiig aneenawai, nuigtush ju nugka juwiya pegkegchau aina nunak imá anentaimtuinawai. <sup>20</sup>Tujash jutii aidautik nunin ainatsji, jutii dekas nayaimpinmaya waji aina nunú wakegainaji. Dekas iina nugkega duka nayaimpinum awai, nunin asamtai, nuwiya uwemtikagtin taati tusa dakainaji, ii Apuji Jisukristua nunú. <sup>21</sup>Ni jutii iyashí wainkauchia nuna yapagtugma, niina iyashiya imanuk etamkatnai. Nunak nigka tikima senchigtina iman asa, nayaimpinum nugkaash ayaa nunak imá nigki diyawai.

**4** <sup>1</sup>Nuaduí mina aneetaig yatsug aidauh, ubag aidauwah, wika atumnak senchi aneajime. Wi atumiin shiig aneamu ajuta duka, waji shiig pegkejan jumainaitag imanai. Nunin asamtai, atum Apu Jisusjai emetmamjum pujajum nunisjumek pujustajum.

<sup>2</sup>Evodia, Sintiquejai Apu Jisusa nemajuidau asag jiyansitsuk batsamsatnume. <sup>3</sup>Dutiksanuk ame mina kumpag takatash betek umin asamin segajame, aanú ubag aina nunú yaihtá jiyansitsuk batsamsatnume, ditak wijai betek yamajam chicham etsegbaunum senchi takasagmayi. Clemente, nuigtú tikich mina yaintin aidaujai aents pujutan jukitin agattaiya nui ditá daajig papiinum agatkamu ainawai.

### Imá Apu Jisusaig tuke dakujustajum

<sup>4</sup>Imá Apu Jisusaig tuke dakujustajum. Awaksanuk tajime: iDakujustajum!  
<sup>5</sup>Atum tikichjaish shiig pujamugmin

ashí aents aidaush waipaktinme. Apu Jisus taatnuk namput wajaschae.

<sup>6</sup>Makichkish uyumá pujuigpajum, nu uyumá pujutsuk Apajuí aukujum segatajum, nuniakjum see titajum. <sup>7</sup>Atum aaja nunitaik, Apajuí ashí agkan etamtatjume atum uyumajum nunak, nunak aents Apajuí nemagchau aidauk dekamain ainatsui. Nunú agkanmaeta nunak, Apajuí atumin anentaiminish, anentaimtagminish ajutjamtinme tusa amasagatui, Kristu Jisusjai ijutkau pujau asagmin.

<sup>8</sup>Yatsug aidauwah, ubag aidauh, junak inagnamun tajime. Atumek ashí pegkeg aina nuwig anentaimin atajum, tikich wájí pegkejan takainakui pegkegnap takainawa tusa anentaimtin, Apajuí wájí pegkeg diiyamu aina nunash pegkegnum anentaimtin, aents pegkeg takainamun shiig anentus diin atajum.

<sup>9</sup>Wi atumin jintintuawaitjim duka ashí dutiksagmek umiktajum, wi chichaamu antukuitjum nunú, nuigtú wi wajak pujamu waitkauwaitjume dushakam imatiksagmek umiktajum. Atum aajajum nunitai, Apajuí shiig agkan anentaimsa pujutan sukagtina dushakam atumjai atatuí.

**Filiposnumia aidau kuichik anentag  
ijumja Pablo awetimu**

<sup>10</sup>Shiig senchi shiig anejai, dukap tsawan asajum, Kristu nemajin aidautjijum, ataktú mina yainkujum kuichik awetujium nuaduí. Wika kajimatjukuiwap ainawa tatsujime, ayatak yupichu dutikmainjimpap atsugsaje tajime. <sup>11</sup>Wika junak atumjan pujau asankesh tatsujime. Wika ajuta nujaig shiig aneasa pujutan unuimajuitjai. <sup>12</sup>Wika ujunauch pujutnash dekajai, antsanuk kuashat ajutkui pujutnashkam dekajai. Nunin asan wajukunmag pujuinja nunak ashí nunimainitjai, shiig yuwan pujaknush, yumain atsugtakuí yapajaknush, shiig kuashat

ajutkuish, tuja shiig atsugtakuish. <sup>13</sup>Ashí nunak nunimainitjai, Kristu ni senchijin sujau asamtai. <sup>14</sup>Tujash atumek shiig pegkegnum minak yainkaugme, mina utugchatjua nuanuí.

<sup>15</sup>Wi Macedonia pujaun yamajam chicham uwentikagtina nuna etsegkatasan jiinkibiag nuwig, atum Jisusa nemajin Filiposnumia aidautijum imá atumek yainkau ainagme. <sup>16</sup>Nuniau asajum wi Tesalónica pujaish awetugbaijume, tuja awentsagmeshkam awetugbaijume mina atsumamug dekagtau asajum. <sup>17</sup>Juna tajim nunak wika sujú pujutajum tusanuk tatsujime, wi wakegag nunak atum takasbauwa nuaduí aan nagkaemas Apajuí amastinme tusan tajime. <sup>18</sup>Atum Epafroditowai awetugbaijum nunak ashí imatiksananuk jukibiajai, yamaik wi atsumamun nagkagas ajutui. Atum mina yainkabiujum duka, Apajuí anentag anagkuamu kugkuin incenso apeamu Apajuin shiig awagmajakua imanuyi. <sup>19</sup>Nuaduí mina Apajuijua nu, ashí atumin atsugtanjum nunak, niina wiyakchaji dekas imana nuna imatiksag Kristu Jisusai amaamu jukitnaitjume. <sup>20</sup>Apajuí iina Apajiya nu imá nigki tuke ememattai atí. Aatus atí.

**Inagnaku akatmabau**

<sup>21</sup>Ashí yatsug aidau, ubag Jisukristu nemajin aidau anuí batsata nunú kumpamjutuata. Tuja yatsug wijai batsataina jushakam aikasag atumnash kumpamjamainawai. <sup>22</sup>Dutiksag yatsug Jisukristun nemajin aidau juwi batsata dushakam kumpamjamainawai, imá senchi Roma apujiya nuna jeen takau Kristu nemajin aina nunú.

<sup>23</sup>Iina Apuji Jisukristu atumnash wait anenjamag niina anenkajiya nunash amastinme.

Aatus atí.

# PABLO PAPÍ AGAJA

## COLOSASNUMIA AIDAU AWETIMU

---

### Pablo Colosasnumia aidau kumpabau

**1** <sup>1</sup>Witjai Pabloitjai, Jisukristu chichame etsegtukti tusa Apajuí wakegau asa awetiuwai. Yatsug Timoteojai pujusan, <sup>2</sup>atum Kristu nemagkautijum, nigki umigkujum imagnisjum yaakat Colosas batsatjum nuna kumpamjime. Atumnash iina Apají Apajuiya nu, ii Apuji Jisukristua nujai wait anenjamjag shiig agkan anentaiksa pujutan amastinme.

### Pablo Jisusan nemagkau aidau Apajuí aujtusbau

<sup>3</sup>Atum pachisa Apajuí aujtakuik tuke see tusaikí aji, iina Apuji Jisukristu Apajuiya nunú, <sup>4</sup>atum Kristu Jisusai kajintsá anentaikmaidau asajum, ashí tikich yatsut aidaush aneajum nuna antugkau asan. <sup>5</sup>Duka atumek yamajam chicham dekaskea nu etsegbau antukuitem duwi nagkamsajum, atum jukitnun Apajuí umigtamkamu nayaimpinum ajutjamaina nu dakaidau asajum nuniagme. <sup>6</sup>Atuminish nunú chichamak tajutjamawajui, duka ashí tikich nugka aina nuwish etsegnajui. Nunitai nuna antuidaush dekaskeapi tuinawai, atum Apajuí wait anenjabau chicham antukjum, niina dekaskejiya dushakam wainkauwaitjum nunisag. <sup>7</sup>Epafras iina aneetaiji jutiijai takauwa nu, Kristu

aneau asa imatikas umigna dushakam junak jintinjamawajui. <sup>8</sup>Nigki jutiinashkam, atumin Wakaní Pegkejiya nu egkemjutpawagmatai aneeniajum nunash ujakmayi.

<sup>9</sup>Nunú yama nagkamchaku antukmayag duwi nagkamsaik, atumnak idaitsuk Apajuí tuke aujtajime. Nuniakun aujtajime: Apajuí wakejamu takatan dekamtijamatnume, nuigtush Wakaní Pegkeji jintinjabauwa nunash shiig dekainak, <sup>10</sup>Jisukristu nemagkau aidaush wajuk pujumaina ainawa nunisag pujuinak, ashí Kristu wakegamu aina nuna takainak shiig aneemtiksatnume, nuninak Apajuinashkam shiig dekaatnume tusan. <sup>11</sup>Nuniagmin niina senchijí imana duwi senchimtijamawag ichichtamjatnume, dutikamu asajum kuashat utugchat ajutjamkuish katsunajum, emamkesjum shiig aneasjum pujustajum tusanush segatjime. <sup>12</sup>Wika Apajuinak segajai, atumesh shiig aneasjum iina Apají see titajum tusan, ni nayaimpinum inama nui, niina umijuidau aidau umigkamua nuanuí, jutiinashkam pujustinme tusa umigtamkau asantai.

### Jisukristui dekas wagaakuk

<sup>13</sup>Iik iwanchi inatai batsatjin, Apajuí agkanmitkagma, niina Uchijí aneetaijiya nuna inamtaijin pujustinme tusa jujamkiajui. <sup>14</sup>Kristu jutiiní mantamna

ni numpen ukajua duwi agkanmit-kagma, iina tudaujinash tsagkugtamjauwai.

<sup>15</sup>Kristuke Apajuí wainmainchauwa nuna iwaidauk, nigka uchi iwaiya numamtin asa, ashí najankamu aina duka atsaig Apají inamtaijin tuke pujujakuí. <sup>16</sup>Nunin asa nigki najankauwai nayaimpinum, nugkanum ayaa nu wainainag nunash, tuja wainmainchauwaina nunashkam. Ashí wakan senchigtin inamaina dusha Jisukristu najankamu asa niinuk ainawai. <sup>17</sup>Kristuk nigka yaunchuk nagkamnas ju waji aidaush atsuinamunum pujujakuí, nunin asa ashí waji aina junak nigki shiig nunisag atinme tusa diiyakuí. <sup>18</sup>Nuigtushkam nigki, niina nemajuina nuna Apujishkam, nigki jakau nantashainmaya nagkamas nantakuuwa dushakam, nunin asa nigki wagaaku juwakui. <sup>19</sup>Apajuik niina Uchijí Aentsmaga Akiinauwa nunak, ni senchigatina ibak atí tusa wakekauwai. <sup>20</sup>Apajuí Kristunak awetugmauwai jutiin uwemtijamjati tusa. Dutikamu asag ashí nugkanum, nayaimpinmash batsata dushakam ataktú wijai shiig anendaisag pujustinme tusa dutikauwai. Junak niina Uchijí awemam numinum achinag jaak numpen ukajua duwi dutikauwai, dutikamu asag yamaik Apajuiyaig ashí agkan amain ainawai.

**Duwikik Apajuí shiwaji aajakuitku yamaik niina aentsji waigji**

<sup>21</sup>Duwikik atumshakam Apajuí adijkachu aajakuitjume, ni anentaimtusuk pegkegchau takatak batsamtuidau asajum, Apajuí shiwaji aajakuitjume. <sup>22</sup>Tujash yamaik Apajuiyaig shiig chichamak iwajamui. Nunak Apajuik niina Uchijí Aentsmaga Akiina iini mantamdauwa nuaduí, niina aentsji aidauk niina emtinish bakumamainchau

atinme tusa dutikauwai. <sup>23</sup>Tujash nunak imá Jisusaig kajinas anentaimainak, nuigtú yamajam chicham Jisusai uwemna nunú pachisa etsegbaun antukajua nunak dakak pujuina nu, iman amain ainawai. Nunú chicham ashí tikich nugkanmash etsegnakua nunak wishakam etseggai.

**Pablo Jisusa nemajin aidau yaigtá tusa awemamuitjai tibau**

<sup>24</sup>Kristuk waittsauwai ashí niini minidaun uwemtijata tau asa, niini jegaidauk niina iyashijai betekak weedau asamtai. Wishakam duwi shiig aneasan pujajai atumiin waitiaknush, Kristu waittsamua nuna umiakun. <sup>25</sup>Apajuik minak niina aentsji aidau yaigtá tusa awetiuiwai, atumiin mina chichamjun ashí wekagas etsegtugkati tujutu asa. <sup>26</sup>Apajuik yaunchuk anentaimas dutikatjai tibauji dekaachbau aajakua nunak, yamai niina aentsji aina nuna dekamtikawai shiig dekaatnume tau asa. <sup>27</sup>Nunú pegkeg dekas iman Apajuí anentaimtusbau aajakua nuna, ashí aents aidau dekaati tusa wakekauwa duka: Kristu atumin pujau asamtai, nijai pujustin asajum dekas iman dakajum nuuwai.

<sup>28</sup>Jutiik Kristu pachisa etsegtakuish, ashí aents aidauk shiig pujustajum tusa chichagji, jintinkagtakuish ashí pegkeg aina duke jintinkagtuinaji, Kristu emtinish shiig pegkeg iwainakta tuidau asaja. <sup>29</sup>Nuaduí wika niina senchijí sujusbauwa duwi shiig senchi takaajai.

**2** <sup>1</sup>Wika atumesh, Laodicea batsamin aidanash, nuigtú ashí tikich mina waitchauwaina nunashkam yaigtá tabaunum, ashí wi uyumasan dutikag nunú dekaatajum tusan wakegajai. <sup>2</sup>Wika nunak atumin anentaiminish ichichmamajum tikich aidaujaish pempentunishjumek aneeni pujakjum,

Apajuí yaunchuk Kristun pachis tiuwa nunú dekaachbau aajakua nunash shiig dekaatnume tusan wakegau asan imaniajai. <sup>3</sup>Imá Kristuig ashí pegkeg, yachamet, shiig dekat aina duka awai.

<sup>4</sup>Junak wika, chicham pegkeja imanun ujpainak tsanugmag, anentaimin yapagtugmawainum tusan tajime. <sup>5</sup>Wi anuí atumjai ijunja pujachkunush, mina wakanjuig atumjaig ijutkau asan shiig aneajai, atum Kristui kajintsá anentaimkujum niinig emetmamajum, ashí betek makichkinmag anentaimkujum, imagnisjum shiig batsatu asagmin.

#### Yamajam pujut

<sup>6</sup>Atum Apu Jisukristui sujumankau aidautigmek pegkeg takamain ainagme, Apajuí aentsji aidaush wajuk pujumainaita nunisjumek pujakjum. <sup>7</sup>Nuniakjum numí kagkapé initak akaejau asa, kakajus katumainchau wajas aama imanikjum, atum Jisukristui kajintsá anentaimjum nuanuish atajum. Tikich aidau Kristu pachisaj jintinjamawagmat, Apajuí atumiin pegkejan dutikauwa duwi see titajum.

<sup>8</sup>Aneaku atajum, makichik aentskesh dita unuimagbaujin dekaskea imanun jintinjamainak tsanugmajainum, ditak Kristui kajinas anentaimainak uwemjatnume tusag jintiinatsui, ditak yaunchuk ditá muunji takaajakbauwa nunak jintiinawai.

<sup>9</sup>Kristuk Apajuiya nujaig shiig betekai, niishkam Apajuik asa. <sup>10</sup>Atumnak ashí ajutjamjume Kristujai ijutkau pujau asagmin. Apajuí Kristunak, nayaimpinmaya senchigtin aina nuna nagkaesau, iwanchi senchijinash, nugkaya apu dekas senchigtin aina nunash, ashí najankamu aina nuna nagkaesau senchimtikauwai. <sup>11</sup>Mina pataag judío aidau pakamajakú aina numamtuk, atumesh Jisukristui kajintsá anentaim-

kujum, Apajuí aentsji waigkugme. Nuniku asagmin Apajuí, atum pegkegchau takastasajum anentaimtukaitjum nunak utsanjamkauwai. <sup>12</sup>Atum yamimakjum yuminum yaunchmajum duka, Kristu ukuntsauwa numamtuk wajagme, jinkugmesh Kristu nantakiuwa numamtuk wajagme, Apajuí ni senchijin Jisusan inankiuwa nuanuig kajintsá anentaimu asajum. <sup>13</sup>Atumek yaunchkek Kristui kajintsá anentaimainachu asajum, Apajuí pujutan sukagtina nujaig tupagkiu aajakuitjume, pegkegchau takat aina nu ukuinachu asajum. Tujash yamaik Apajuí pujutan amasajui atum Kristujai ijutkau pujau asagmin, dutijama ashí iina tudaujinak tsagkugtamjauwai. <sup>14</sup>Yaunchuk chicham umiktin aajakua nu, jutii umiashbaunum bakumamain aajakuitag nunak Apajuí juki, Jisukristu numinum achinjauwa nui esakajui. <sup>15</sup>Dutikak ashí wakan pegkegchau senchigtin aina nunash depetek senchigtuchu emak, ashí wainainamunum iwainakui.

#### Tikichkesh juu umiktajum tujamain ainatsui tibau

<sup>16</sup>Makichik aentskesh: “Juka yuwawaipa, jusha uwajaipa, judío jistamtaiji jistamatajum, nantu taa taakui jistamtajum, tsawan ayamtai tawaakui ayamtajum, tudau weejum”, tujamainakuish antugkaipajum. <sup>17</sup>Ashí ju jista aina junak Kristu taachu asamtai aikajakú ainawai, jujú jutikamunum dekaajakú ainawai, atak tikich minitna nuna.

<sup>18</sup>Makichik aentskesh: “Atumek nayaimpinmaya aents segachkugmek uweemaitsumge”, tujamkuish antugkaigpa, nunak wainkachu ainayatak wainak ememak, ememachuchia imanisan tu wekaewai.

<sup>19</sup>Tujash Kristuk niini kajinas anentaimain nuna Apujiyai, nunin asa makí

makichik yayawai ni wakega nunisag pujustinme tusa. Nuaduí niina dekaskeapi tuina duka Kristu iyashiya nuninai, tuja Kristuwai ditá buukega numamtinuk.

<sup>20</sup>Kristu jutiini mantamdauwa nunisjumek, atumesh niijai betek jakau ainagme, nuaduí atumek aents Jisusai kajinas anentaimchau aidau takaina nunú umiktasagmek wakejumain ainatsjume, <sup>21</sup>nunin asajum: “Juka yuwawaigpa, apasmesh dekapaisaigpa, antitash antigkaipa”, tujamainakuish antugkaipajum. <sup>22</sup>Nunú umiktajum tibauwa duka aents jintiaku tibau asag, megkaejatin ainawai. <sup>23</sup>Nu aents jintiamu aina duka, dekas dutsukaitai yaijatmainuk tusa umimain ainawai. Wagki jintiinak: “Wainkauchia nunin anenmamsata takuik, iyash senchi waitkamainai”, tuina duka dekaskechui. Tujash nunú aents aidau jintiina duka, dita anentaimsajag pegkeja nunin, dekaskea nunin diinawai: “Juna aaja umiaknuap aents pegkejam, tudaugtuchu, kakagchau amainaitja”, tuidau asag. Tujash wainak iyashinak waitkainawai. Nunin asa nu jintiamu aina duka iina iyashí pegkegchau wakegamu idaitanmag yaijattsui.

**3** <sup>1</sup>Atumesh yamaik Kristujai nantaku asajum, nayaimpinum Kristu Apajuí untsujin inamjatatus eketa nuwiya waji anentaimtustajum. <sup>2</sup>Nayaimpinmaya waji imá senchi anentaimtitajum, nugkanmaya waji aina duka anentaimtú pujuigpajum. <sup>3</sup>Atumek Kristujai jakau asajum, Kristujai pujau asagmin yamajam pujut ajutjamjum nunak, aentsuk wainmain ainatsui. <sup>4</sup>Kristuwa duke iina pujutan sujamsajua duka, nunin asa ataktú juwi minak wantinkatna duwi, iishkam niya imanuk betek wajasagtinaitji.

**Yaunchuk pujujakbaush Kristu nemagkuish wajuk pujumainaita**

<sup>5</sup>Ju nugka juwiya wakejut atumiin awa duka maa emegkaumaina numam-

tuk awajkatajum: Tsanijinawaigpajum, pegkegchau aidaush takasaigpa, atum pegkegchau katsunjashmin wakegamush takasaigpa, pegkegchau aidaush wakekaigpa, imá midauk atí tusagmesh wakeyigpa, nuniakjumek nunú apajimá pujumain asamtai. <sup>6</sup>Jujú aidaun takainak, Apajuí chichamenash intimju-kiag yujaina nunak, Apajuí senchi suwimkan susatnai. <sup>7</sup>Atumesh yaunchek ju aina juka takaajakú ainagme. <sup>8</sup>Tujash yamaik ju ashí waji aina duka idaisatajum: Kajegdaika nemasdaika pujut, waamak kajet, pegkegchau takat aidau, pegkegchau chichagkagtut aidau, chicham pegkegchau chichat aina dushakam. <sup>9</sup>Yaunchuk junin pegkegchau takat aidau ukukiu ainayatkujum, pempeentunikjum tsanunijaigpajum. <sup>10</sup>Yamaik yaunchuk pujujakbau betek pujatsjume, dekaskenmag atumek yamajam aents ainagme, nunin asajum Apajuí atumin najapauwa imanuk wegagme, nuniakjum niishkam aan kuashat shiig dekagme. <sup>11</sup>Nuaduí judío, judiuchu akush, pakamaku, nuna dutikachu akushkam yamaik wainkayai, nuigtushkam unuimaju, tuja unuimagchau akush, inatai aidau, inashtai agkan ainakush wainkayai. Kristuk ashí nigki najankau asa, ashí niini kajinas anentaimaina nuwig awai.

<sup>12</sup>Mina aentsug pegkejam atinme tusa Apajuí anempas etegtamjau asamtai, dekaskenum wait anenkagtin, shiig anentaimkau, kakagchauch, ememachu, utugchat akuish katsunjajum pujakjum, <sup>13</sup>pempeentunisjumek tsagkugdajatajum. Tikich aidaujai wake besegdai-kamu ajutjamkuish, iina Kristu tsagkug-tamjauwa dutiksagmek atumshakam tsagkugdajatajum. <sup>14</sup>Dekatkau dutikmainaitjum duka anenimainaitjum nuuwai, nunuwai dekas shiig ijuntsa pujutan sukagta duka. <sup>15</sup>Kristu shiig

agkan anentaimesa pujutan amaamu atumnash ajutjamtinme, Apajuik nuna aatus dutijamata tau asa, makichik iyashik etamkauwai, nuaduí atumek see titajum.

<sup>16</sup>Kristu chichame pegkeg shiig kuashat jintintuamuitjum duka, imatiksagmek aneaku atajum, nuniakjum Apajuí wait anenjamjau asamtai see titajum. Pempentunisumek jintindayakjum, chichagdaikugmesh shiig anentaimesajum dutikatajum. Apajuí chichame agagbau aina nuwiya kantamkujum, ni emematku kantamtai aina nuwiyashkam kantamkujum, Wakaní Pegkeji wakeetan amaa nujaiashkam kantamatajum. <sup>17</sup>Ashí atum takaamu chichaamu aina dushakam Apu Jisus wakega dutiksagmek dutikatajum. Nuniakjum Apajuí iina Apajiya nunú see titajum, Jisukristu jutiiní dutikauwa nunú pachisjum.

#### **Jisukristu nemajin aidau nunimainji**

<sup>18</sup>Nuwa aishintin aidautigmek imá aishumek umigkatajum, Apu Jisusa nemajin aidau wajukmaina ainawa nunisjumek. <sup>19</sup>Aishmag nuwentin aidautigmeshkam nuwem aneetajum, nuniakjum nuwem kajemainuk chichajigpa.

<sup>20</sup>Uchi aidautigmeshkam, atumin apa dukujai inapainakuish betek umigkatajum, aatus wakegawai Apu Jisusak.

<sup>21</sup>Atum uchigtin aidautigmeshkam uchijum takaamujinkish, jintinkumkesh kajemainuk chichagkaigpa, junik anentaímá pujuinum.

<sup>22</sup>Inak aidauh, atumin apujum inapakuig shiig umigkatajum, tujash imá apujum wajas diigmakui shiig anenjusti tusa takatsuk. Dekaskenum duka tuke shiig takau atajum. <sup>23</sup>Ashí atum takaamua duka, aentsdau

takamainaitjum nunitsuk, Apu Jisusdau anentsajum shiig wakejusjum takastajum. <sup>24</sup>Wagki atumek dekagme Apajuí ni anagtamamujinak amastina duka, Apu Kristua nudau takagsau asagmin. <sup>25</sup>Ni pegkegchau takasuk nu pegkegchauwa nuwiyanak jukitnai. Wagki Apajuik betek susatnai dita takasbaujini dutiksag.

**4** <sup>1</sup>Atum inamin aidautigmesh atumi inakem shiig awagmakjum, inamin pegkeg atajum. Wagki nayaimpinum Inamin puja nunú atumnash shiig waipaina nu dekau asajum.

<sup>2</sup>Apajuí mijattsuk aukjum aneaku batsamsajum, see tusagmeké atajum.

<sup>3</sup>Nuniakjum juti pachijattsagmeshkam Apajuí aukagtustajum, Apu Jisusa chichame shiig agkan etsegtuta nuanuí jutiinash yaimpakti. Dutijamamtai shiig dekamtikawagmi, Kristu pachisa yaunchuk dekaachbau yamai etsejuinag dushakam, nuna etseju asan juwi achinkan pujajai, <sup>4</sup>nunak wisha shiig etsegun paan antumainun dekamtikagtuatjai tusan tajime.

<sup>5</sup>Apajuí nemagchau aina nujai wekaekugmesh, wainka tsawan megkaetsuk, shiig anentaimesajum ausatajum.

<sup>6</sup>Nunika aukugmesh chicham wakejusa antumain ausatajum, tuja dita inimpainamush wajuk aimainaita dushakam shiig dekau atajum.

#### **Inagnaku kumpamkagtam**

<sup>7</sup>Ashí midaun pachisag iina aneetaiji yatsug Tíquico, dekas imatikas niishkam wijai Jisusa takatjin takagna nu upajattajume. <sup>8</sup>Duwi niina atumiin awemajai, juti wajuk pujuinaji nuna upajainak, anentaimesajum ichichtamjatnime tusan. <sup>9</sup>Juti aneetaiji iina yachi Onésimo betek umina nunú niijai minawai, niishkam atumjai betek Jisusan nemagna nu. Dita anuí taawag ii wajukenaji nuna ashí upajakagtatui.



<sup>10</sup>Aristarco, wijai achikam puja dushakam kumpamjamainawai, Bernabé iká yachi Marcosa dushakam aikasag kumpamjamainawai, wi niina pachisan tibaijim dutiksagmek atumiin minakuish jukitajum. <sup>11</sup>Nuigtú Josué Justo tuuta awagmataiya dushakam kumpamjamainawai. Imá juke ainawai mina pataag judío aina nuwiya wi Apajuí inama nunú pachisa etsegbau-num yaintuina duka, ditak mina anentaignash shiig ichichtujagmayi. <sup>12</sup>Dutiksag Epafras Kristu Jisusan inakega nu, atumjai ijunajakua dushakam kumpamjamainawai, nuniak Apajuin shiig senchi aujtugmainawai, shiig imagnis emetmamag pujuinak, ashí Apajuí wakegamua nunak takagsat- nume tujamaidau asag. <sup>13</sup>Wi niinak atumin puyatjutpaina nuna wainu asan tajai, aantsag Laodicea batsata nunash-

kam, tuja Hierápolis pujuina nunash uyumawai. <sup>14</sup>Aantsag aneetaig Lucas ampijatna dushakam, Demasjai kumpamjamainawai.

<sup>15</sup>Tuja yatsug aidau, ubag aidau Laodicea batsata nunú, nuigtú Ninfas niina jeen Apajuin emematuinak ijunaina dushakam, Pablo kumpamjam- jume tusajum ujatjuktajum. <sup>16</sup>Ju papiin awemag ju ausagmek, Jisusa nemajin Laodicea batsata dushakam awetitajum ditash ausatnume, tuja dita awetimun atumin awetugmainakuish aikasjumek ausatajum. <sup>17</sup>Arquiposhkam ujaktajum, niish betek umiktí Apu Kristu takat susamua nuna tujamui tusam.

<sup>18</sup>Ju kumpamkagtamua junak wi mina uwejuí agatjime, Apajuí aujkugmesh wi achinkan pujag ju anenjatajum, Apajuí atumnash wait anenjamjatnume.

Aatus atí.

# PABLO NAGKAMCHAKU PAPI' AGAJA TESALONICANMAYA AIDAU AWETIMU

## Pablo Tesalonicanmaya aidau kumpabau

**1** <sup>1</sup>Witjai Pabloitjai, Silvano, Timoteo aajan ju papiinak agatjime atum Jisus nemagkau aidautijum yaakat Tesalónica batsamin aidautigmin. Ii Apají Apajuiya nunú Apu Jisukristujai wait anenjamag, shiig agkan anentaiksa pujutan amastinme.

## Tesalonicanmaya aidau Apajuí dekaskeapi tabauji iwainmamkagbau

<sup>2</sup>Apajuí iina Apajuiya nu aujkuish atum pachisa see tusaikí ainaji, <sup>3</sup>nuniaku ashí atumek tuke mijattsuk pachisaikí ainaji. Wagki, atum ii Apuji Jisukristuig kajintsá anentaimaidau asajum pegkeja duke takaajum nuaduí, Jisukristu aneamunum tikich aidau yayakjum, waitiakjumesh katsunjajum ichichmamja pujusjum, ni minakuish wainkatasajum dakaidau asagmin. <sup>4</sup>Yatsug aidauh, ubag aidauh, Apajuí atumnak anempajume, nunin asa atumnash ni etegtamjawa duka dekaji. <sup>5</sup>Ii Kristu uwentikagtawai tusa chichagkagtukbauk, ayatak chichamaik chichagkagtukchamui. Wakaní Pegkejiya nuna senchijin, chichamak dekaske tusa etsegkamui. Jutii atum aneau asaja, atumjaish wajuk batsamsamiaji duka shiig dekagme.

<sup>6</sup>Atumek jutii wajuk pujaku iwaintu-  
kuitjime, nuigtú Jisusa pujutí diigsag-  
meshkam nunisjumek pujuinagme.  
Chicham etsegbaush, tikima senchi  
waitiamunum pujakjumesh uyumatsuk  
antukuitjume, Wakaní Pegkeji dakuju-  
tan amainau asamtai. <sup>7</sup>Nu atum nuniak-  
jum ashí Apajuí nemajin Macedonia  
nugkanum, Acaya nugkanum batsataina  
dushakam iwaintukugme. <sup>8</sup>Apajuí  
chichame etsegbauk atumiin nagkamna,  
Macedonianmash, Acayanmashkam,  
nuigtú ashí tikich nugkanmash  
pampagké. Atum Apajuiyai kajintsá  
anentaimjum nunak, ashí yantamnum  
augmatuidau asagmatai, jutii anuí  
chichagkagtumainaitag duka atsumna-  
tsui. <sup>9</sup>Jutii atumiin taamtai, atum wajuk  
jukagtukiuwaitjume, nuigtú dakum-  
kamu apajimá batsatutijum idaikujum,  
Apajuí iwaaku dekas tuke pujuwa nunú  
umigkujum, <sup>10</sup>Jisus Apajuí Uchiji,  
Apajuí inankim nayaimpinum weuwa  
nunú taatnuji dakainajum nunash  
ujaninawai. Jisusai, suwimak ishamain  
atina nui ayamjutpakua duka.

## Pablo Tesalónica pujusá takasbau

**2** <sup>1</sup>Yatsug aidauh, ubag aidauh  
atumek dekagme, iik atuminig  
tikima wainkaik ijaschabaiji. <sup>2</sup>Yaakat  
Filiposnum pujusá Jisus pachisa etsegjin  
kajegtamaidau asag, aentschau chichag-  
tamainakui senchi waittsauwaitag

dushakam atumek dekagme. Tujash Apajuí yaimpasmatai ishankagtutsuk, Jisukristui uwemtikagtauks tusaish, tikich antutan dakituinaigkish atuminchakam chichagkagtukbaiji. <sup>3</sup>Li anuí chichagkagtukmayag duka dewakbaukesh atsawai, nuniachkuish pegkegchau anentaiyaikish, tsanumkuikish tichamui. <sup>4</sup>Apajuí jutii anentainash ashí diigtamas, ni takatjinak Kristu pachis etsegtukti tusa sujamsauwa nu etsegtuinaji. Duka aents shiig awajkatasaikish takaatsji, Apajuí wakegamu takainaji, nigki jutii anentaibaujinash shiig dekawai. <sup>5</sup>Jutiik pegkejan chichai shiig anenjustinme tusa chichachuitag duka atumek dekagme. Jutiik atum tsanujá kuichik jujuktasaikish chichachuitji. Junak Apajuishkam shiig dekawai. <sup>6</sup>Atumkesh, nuniachkush tikich aidaukesh eme anenjitnume tusaikish wakegatsji. <sup>7</sup>Jutii dekas Jisus chicham etsegtugkatajum tusa awemamu asaja, atum yaijatkatajum tumainaitku duka tutsuk, nuwa uchijin kuitamama numamtuk, atumnak shiig anentsan puyatjusan kuitamkabiajime. <sup>8</sup>Imatika aneedau asaja, yamajam chichama duke ujaktasa wakeetsuk, atum aneamunum bakumatasaisish wakegainaji.

<sup>9</sup>Yatsug aidauh, ubag aidauwah atumek aneakjume, atum waitkat dakitau asaja wajuk takaayaji duka. Jutiik tsawai kashishkam takai takainakua yawejaish, Apajuí chichameg etsejiaji.

<sup>10</sup>Atumetjume jutiiinu dekautigmek, Apajuishkam aikasag dekagtamji, atum Apajuí nemagkau aidautigmijai jutii pujubiag duwik, pegkegchau aidauk takaachu asaja, makichik aentskesh tujamainchau shiig imagnisa pujusbaiji. <sup>11</sup>Jushakam dekagme, uchigtin uchijin utuja numamtuk chichagkun, makí makichkitigmin anentaimnash ichichtu-

yajime. <sup>12</sup>Dutikakun, Apajuí nemajin aidaush wajuk pujumainaita, nunisjumek shiig pujustajum, niina inamtaiji dekas pegkeja nuí pujustinme tusa untsukbau asajum, tuyajime.

<sup>13</sup>Nuaduí jutiiishkam Apajuik mijattsuk see taji, atum ii chichagkag-tamu aentsdauchuapi Apajuí chichamempapi tusajum, shiig antuku chichamempapi tusajum, shiig antuku chichamegai. Nu chicham atumesh dekaskeapi tau asagmin, pujutjumnash kuashat yapagtugmawajui. <sup>14</sup>Yatsug aidauh, ubag aidauwah, atumshakam jutii waittsauwaitag nunisjumek waitiajume. Judeanmaya aents aidau Jisusa nemajuk Apajuin umijiagtai, ditanbau-nak pempeentukiag waitkajakua numamtuk, atumnash atumin pataimik waitkagmainakui waitiagme. <sup>15</sup>Nunú mina pataag judío aina duke Apu Jisusnash maawajui. Yaunchuk Apajuí etsegtin aajakajua nunashkam ditak maawajui, nunisag jutiiinashkam jiigmakiag ajapjamawagmayi. Nunidau asag Apajuinak shiig awagmainatsui, ashí aents aidauk shiwagmainawai. <sup>16</sup>Judiuchu aidaush uwemjatnume tusa, Kristu pachisa ujakta tajinish dakituinawai, nunidau asag nuní nagkaemas tudaunak ikauntumainawai, nunidau asagmatai Apajuí shiig senchi suwimkan susatnai.

**Pablo ataktú Tesalónica  
wetasa wakekamau**

<sup>17</sup>Yatsug aidauh, ubag aidauh, jutiiik ujumak tsawantai atumjai wainitsuk pujakuish, tuke pachisaikí pujau asá, atum wainkatasa senchi wakeeyaji.

<sup>18</sup>Nuniau asan wika atumin ijagsatasan dekaskenmag kuashtá wakekabiajai, tujash iwanch utugtamtamtaí minich-baijai. <sup>19</sup>Apu Jisus ataktú juwi minakui, wi niina igkuaknush datsamamuk

atsugtitnai, ayatak shiig aneakun emematnaitjai, atum imá Kristuig kajintsá anentaimaidau asagmin.

<sup>20</sup>Atumiin jutiik eme anenmamku shiig aneastinaitji.

**3** <sup>1</sup>Nuaduí atumin kajimatmainchau dekapeau asan Atenas wiki juwakun, <sup>2</sup>iina yachi Timoteon awemabijai, Apajú takagku Kristu pachisa etsegbaunum yaimna nuna, atum Kristui kajintsá anentaimjum nunash, ni chichagtamak nuní nagkaemas ichichtamjatnume, <sup>3</sup>makichkitigmekesh waitiakjum Kristu nemajut idaisaijum tau asan. Atumshakam dekagme jutiik aaja waitmainaitag duka. <sup>4</sup>Nuigtushkam wi atumjai pujusan emtiksan ujayajime, jutiik waitiamu igkugtin ainaji tusan, duka nunisag nagkaetamjume yamai wainjum nunú. <sup>5</sup>Nuaduí atumin kajimatmainchau dekapeau asan, ii takasbau wainak megkaekai tusan, Timoteon awetibijajime. Nunak atumin kuashat puyatjakun, Jisukristui kajintsá anentaimtan, iwanch pegkegchau takamtikainam idaisainum tusan dutikabijai.

<sup>6</sup>Tujash Timoteo atumiin pujau jutiiní taa ujakaji chicham shiig pegkejan, atum Kristui kajintsá anentaimkujum aneniamugmin. Nuigtushkam ujakamae, atumesh jutii shiig anenkag-tusjum waijatkatasaalum wakegainamunash, jutii atum wainkatasa wakegag nunisjumek, atumesh jutiijai ijunjatasaalum anentaimjum nunashkam. <sup>7</sup>Yatsug aidauh, ubag aidauh, nuna antukan kuashat utugchatnum waitiaku pujamun ichichmamjamjai, atum Kristui kajintsá anentaibauk nunisjumek batsatjum nuaduí. <sup>8</sup>Atum Kristu nemagkujum shiig emetmamjamjum batsatbaun antukan ichichmamjamjai. <sup>9</sup>Nunikan shiig senchi shiig aneamug ajutui Apajú emtinish, nuniakun Apajuinashkam imatiksanuk

see tajai, atumin pachisan. <sup>10</sup>Tsawai kashijai Apajuin tuke augjai, atumiin taan wainkata tabajun pachisan, nunikan atum imanisa kajintsá anentaimchou dekapeamu ajutjamkujai shiig jintintuatasau.

<sup>11</sup>Ii Apají Apajuiya nu, Apu Jisukristu-jai jutiinash yaimpakagti atumiin minimaina nunash. <sup>12</sup>Ii Apujiiya nunú sujamsatnume, ashí tikich aidaujaish pempeentuniki anenita nuna, jutii atum anejim aikasag. <sup>13</sup>Apajuiya duke atumi anentaimnash ichichtugmagtinme, aan nagkaemasa kajintsá anentaimkujum, Apu Jisus niina aentsji pegkejam aidaujai minakuish, iina Apají Apajuiya nuna emtinish bakumamainchou wantinkamnujum tusan.

#### Shiig pujaku Apajú shiig awagmamu

**4** <sup>1</sup>Nuigtushkam yatsug aidauh, ubag aidauh, Apu Jisus wakega dutiksasuk segajime: Wi jintintuabijaim nunisjumek, aan nagkaemasjum Apajú wakega duke takaakjum shiig anentiksatajum.

<sup>2</sup>Atumek Apu Jisus tibauwa nuna jintintuabijaim duka dekagme. <sup>3</sup>Atumnak Apajuik imá midau pegkeg aina nunak takainak, tsanijintsuk pujustinme tusa wakejutpagme. <sup>4</sup>Maki makichik nuwentin aidauk niina nuwenak eme anentus diiyak, pegkegchau takagtsuk pujumainai, <sup>5</sup>aents Apajuin anentaimtuchu aidau ditá iyashí pegkegchaun takastatus wakega nuna takainak nuwen waitkaina nunitsuk. <sup>6</sup>Tuja makichkitigmekesh tikich Kristu nemajuina nuna nuwejaig pegkegchau takasaigpa, nuigtush yatsum tsanujam pegkegchau takagsaipa, atum nunitaik Apu Kristu suwimkan senchi amastatjume, nunak duwikishkam tibajime. <sup>7</sup>Apajuik iinak

ashí pegkegchau aina nunak takatsuk, pegkee pujustinme tusa etegtamjauwai. <sup>8</sup>Tuja ju jintinkagtamun dakitauk aentsnakesh dakitak nuniatsui, Apajuin dakitak nuniawai, ni Wakaní Pegkejin sujamsauwa nuna.

<sup>9</sup>Tujash Kristu nemagkau yatsut aidauti pempeentuniki aneenita nunak agatjashtatjime. Wagki pempeentuniki aneenitnak Apajuí jintinjamawaju asagmatai. <sup>10</sup>Duka nunisjumek anenijume, ashí aents Kristu nemagkau Macedonia batsata nujaishkam. Tujashkam yatsug aidauh, ubag aidauh tajime: Atum aneeniajum nuní nagkaemasjum aneenitajum. <sup>11</sup>Atumek itugsanuk tikichin waitkatsuk pujusag tusajum kakanmamkujum, makí makichik atumin takatjum takastajum, jutii nuní takastajum tibaijim dutiksagmek. <sup>12</sup>Aatsa takau asajum atsumkas pujutai, tikich aents aidauh eme anenjammas diigmastinme.

#### **Apu Jisus wakitki taatnuji**

<sup>13</sup>Yatsug aidauh, ubag aidauh, Jisusa nemajin jakaush wajukatnuita nunú atumesh dekaatajum tusan wakegajai, aents Apajuí nemagchau aidau, jakau aidauh wajukatnaita nuna dekachu asag, wake besemag anentaimá pujuina nunikaijum tusan. <sup>14</sup>Jisus jaka nantakiuwa nuanuig kajintsá anentaimainaji, Jisusan nemagkau jinawajua nunashkam, Jisus ataktú juwi minitai-yap Apajuí inanjatnaita tusaja.

<sup>15</sup>Nuaduí Apu Jisus tiuwa dutiksaiik taji: Jutii iwaaku batsatutik Jisus minitta nuaduik, jakau aidau ukuakuik emjastinaitji. <sup>16</sup>Apu Jisus nayaimpinmaya minitai, senchi untsuubau atinai jakau aidau nantagtinme tusa, tuja nayaimpinmaya aents aidau apujiya dushakam senchi untsumkatnai, nunitai tikich nayaimpinmaya aents trompeta-

jin senchi umpuagtinai, nunikmatai Kristu nemajin jidau aina nunú nantajagtinai. <sup>17</sup>Nunikmatai iwaaku aidauti ditajai ijunja yakí takuntinaitji, agkajunum Apu Jisus yujagminum igkugtasa, nunika ii Apujijai atakea duwish tuke pujutnaitji. <sup>18</sup>Nuniktin asamtai jujú chichama jujai tikich aidaujaish anentai ichichtunigtajum.

**5** <sup>1</sup>Tuja tsawantash wajuakeaig, jutiish wajuakeajinig taati nuna pachisnuk agatmaitsujime. <sup>2</sup>Wagki, atumek shiig dekgame Apu Jisus minamu tsawagtina duka, kasa kashi pachiachmau waiya numamtuk wajaktinai. <sup>3</sup>Wajutiya aents aidau: Yamaik shiig agkan anentaimsa, nuigtush kajintsá batsatainaji, tiagtin ainawa nuniamunum pachiachmau dita waittsatnujig minittinai. Nuwa ejamtin uchigmatji jegamtai najaimamun ishamak, emegkakta takush emegkau-maitsu numamtuk, aents duwik uminkachu aidau, nunú waitiamun emegkakta takush emegkakchagtinai.

<sup>4</sup>Tujash yatsug aidauh, ubag aidauh atumnak uwaktamkashtatjume, kasa wajuakea numamtuk minakush, wagki atumek tikich dekainatsu nuninchau asagmin. <sup>5</sup>Wi juna tajim junak, atumek Jisukristu aentsji asajum pegkeg takaakjum, tsaaptinnum pujumaina numamtuk wajaidau asagmin tajime. Jutii Jisukristui kajintsá anentaimaidautik, iwanchdau aidau suwenum yujaina nuninuk ainatsji. <sup>6</sup>Aents Apajuin nemajuinatsu duka, kashi kanaku wajukmaina numamtuk wajainawai. Tujash jutiiik shiig umintsá aneaku batsamsagmi. <sup>7</sup>Wagki, aents kanuina duka dekainatsui waji nagkaemaktatua nunak, nampena dushakam wajuakeawa nunak dekatsui. <sup>8</sup>Tujash jutiiik tsawai batsaamaina numamtuk batsatu asaja aneaku batsamsagmi. Suntag aidau maanitnum weenak jiju najanamun

detsepen ejaktatus nugkú ainawai, numamtuk jutii Jisukristui kajintsá anentaimaidautik, ni aneamua duwi pempentunisaik aneeninaku, nuigtú jutii uwemjau asaja dakainag nu atsejutai suntajan buuken ejata numamtina nujai ejamakagmi iwanch pegkegchaun takamtijamsainum. <sup>9</sup>Apajuik iinak suwimkan jukitin atinme tujamchauwai. Ayatak Apu Jisukristui uwemtan jukitneme tujabijui. <sup>10</sup>Jisukristuk jutiiñi jakauwai, iwaaku batsatkush, jakau akushkam imá wijaig ijunas pujustinme tujamu asa. <sup>11</sup>Nuaduí pempeentunikjum wakegat egketdayakjum ichichdaitajum, atum takaajum dutiksagmek.

**Pablo Kristu nemajin aidau  
chichagbau**

<sup>12</sup>Yatsug aidauh, ubag aidauh junashkam segajime: Atumin jintinjainainak Apu Jisus nemagtanum chichagtamaina duka eme anentsá diitajum. <sup>13</sup>Dutikakjum shiig anentsajum aneetajum, dita takaamujin eme anentsajum diyakjum, ditajai ijuntsajum shiig agkan anentaimsajum batsamsatajum.

<sup>14</sup>Yatsug aidauh, junashkam tajime: Aents takatan dakitauk jiyaktajum, junik dekapedaush wakemitkaktajum, yainkatneme tusa atsumaidaush yaigtajum, nuniakjum tikich aidaujaish kajegdaisuk pujustajum.

<sup>15</sup>Pegkegchaun takagtamainakuish, pegkegchaunmak ikmakaig tusajum kuitamamkatajum. Dekas pegkeja duke ikdaikajum takastasajum kakanmamtajum, imá atumek dutikdaisuk ashí tikich aidaujaish dutikatajum.

<sup>16</sup>Tuke shiig aneasjum pujustajum.

<sup>17</sup>Nuniakjum Apajuishkam tuke aujsagmeké atajum. <sup>18</sup>Ashí pachisjum see titajum, jujuwai Apajuí jutii Kristu Jisus nemajin aidautin nuniktinme tusa wakejutpa duka.

<sup>19</sup>Wakaní Pegkeji anentaimin aujtabau antuugsuk idaisaipajum. <sup>20</sup>Apajuin etsegtuidaush, wainkaya nuninuk diisaigpajum. <sup>21</sup>Ayatak ashí ni chichaamujish shiig kuitamsajum antugkatajum, Wakaní Pegkeji tamash tawa tusajum, nunikjum pegkejan takuig antugkatajum. <sup>22</sup>Idaisatajum ashí pegkegchau takatak.

<sup>23</sup>Atumnash Apajuí shiig agkan anentaimesa pujutan sukagtina nunú pegkeemtijamiagti. Nigki kuitamjutpagme atumi wakanminash, atum anentaibaunash, atumi iyashminashkam, Apu Jisukristu tataish bakumamainchau atinme tujamaidau asa. <sup>24</sup>Apajuí dekas betek umina nunú atumnak etegtamjauwai, dutijabau asa nigki nunak dutikattawai.

**Inagnaku kumpamkagtamau**

<sup>25</sup>Yatsug aidauh, ubag aidauh, jutii pachijattsagmeshkam Apajuí aujkagtus-tajum.

<sup>26</sup>Yatsug aidauh, ashí Kristu nemajin aidautigmek aneenisjum kumpamdayakjum pagkuniktajum.

<sup>27</sup>Ju papí awetajim juka Apu Kristu wakega dutiksagmek ausatajum, ashí yatsug aidauh antuktinme.

<sup>28</sup>Í Apuji Jisukristu atumnash wait anenjamjatneme.

Aatus atí.

## PABLO AWENTSAIK PAPI AGAJA TESALONICANMAYA AIDAU AWETIMU

---

### Pablo Tesalonicanmaya aidau kumpabau

**1** <sup>1</sup>Witjai Pabloitjai, Silvano, Timoteo aajan pujusan jujú papiin agatjime. Dutikakun atum iina Apají Apajuiya nunú, Apu Jisusa nemajin aidautijum, yaakat Tesalónica batsatjum nuna kumpamjime. <sup>2</sup>Apajú iina Apajuijiya nunú, Apu Jisukristujai wait anenjamu asa, atumnash shiig agkan anentaimsa pujutan amastinme.

### Pablo Tesalonicanmaya aidau Apajú ajujtusbau

<sup>3</sup>Yatsug aidaauh, iik Apajú aujuinakuik atum pachisa see tusaikí ainaji. Jutii pegkeg dutikmaina duka juuwai, wagki atumek aan nagkaemasjum Kristui kajintsá anentaimkujum, pempentunisjumek aan nagkaemasjum anenidau asagmin.

<sup>4</sup>Tikich nugkanmaya Jisusa nemajin aidaunum chichaakuish, atumin eme anentsan etsegtajime, ditak utugchatnum pujuinak waituinakush, imá Kristuig kajinas anentaimas pujuinak, shiig nemajuinawai tusa. <sup>5</sup>Atum Kristui kajintsá anentaimu asajum ashí waitiajum duka, Apajú dekaskenum pegkejan takaa nuna iwainawai. Nunú aaja Kristui waittsau asagmin niina inamtaijin awaintamawagti-nai.

<sup>6</sup>Apajuik pegkeja nunak takauwai, nuniau asa yamai atumin waitkagmaina

nunak suwimkan susatnai. <sup>7</sup>Tuja atum waitkam batsatjum nunak, jutiijai betek agkanmitkagmatnai. Nunak Apu Jisus, nayaimpinmaya ni aentsji senchigtin aina nujai, jii kegamunum egketkau minitna duwi dutikatnai. <sup>8</sup>Nuniak, Apajú pachisa dekatnash dakituinak, Apu Jisusa chichame yamajam etsegbaunash antugkachaju aidaun suwimkan susatnai. <sup>9</sup>Ditak suwimkan juwinak Apajuijaig tuke kanaak kanakiag pujusagtinai, nuninak Apu Jisusa imanjiya nunash, senchijinash waitnsuk batsamtinai. <sup>10</sup>Apu Jisus ni aentsji aidaun emematam atina nunú tsawantinig, atumshakam ditajai ijunjatnaitjume, wagki atumesh jutii chicham etsegbau dekaskeapi tiu asajum.

<sup>11</sup>Nuaduí atum pachisa Apajú tuke aujtuinajime, Apajú atumnash, wajak pujustinme tusaya etegtamjauwa ainawa nunisjumek pujustajum tusaja. Nunin asamtai Apajú atumnash, atum ashí pegkeg aidau dutikatasajum wakegajum nunash niina senchijin amastinme, iina Apuji Jisukristui kajintsá anentaimaidau asagmin.

<sup>12</sup>Atum nuniemunum, tikich aents aidaush Apu Jisukristunash eme anentus diistinme, nuniagtai atumnash nigki wait anenjamjau asa, iina Apajuiji, Apu Jisukristujai eme anenjammas diigmas-tinme.

### Jisukristu taatnuji

**2**<sup>1</sup>Yatsug aidauh, ubag aidauh, yamai iina Apuji Jisukristu ataktú juwi minakuí niijai ijunjatnaitag nuna tajime: <sup>2</sup>Ishamkaigpajum makichik aentskesh chichagtamainak, “Apu Jisusak tae” tujamainai, tikich chichau “wakan tujutne” tai, jutii pachijattsagkesh ni tujamaji, papí agag awetugmamaji tujamainakuish, kakajus anentaimik yapajiawaigpajum. <sup>3</sup>Makichkish tsanuamak aigpajum, Kristuk eke taatsui. Kristu taattak wajataik, kuashat aents Apajuin nemagtanak idaisagtinai, nuninai makichik aents dekas pegkegchau wantinkatnai. Nu aentsuk jii ajumaish kajinchaunum pujus waittsatna nunú atinai. <sup>4</sup>Nunú aentsua duka Apajuí shiwaji asa, Apajuí nemajin aidanash shiwajiyai, aantsag wainak apajimin aidanash shiwajiyai. Nuniau asa jega Apajuí ememattainum wayaa ekeemas: “Witjai Apajuinuk”, titinai.

<sup>5</sup>Wi atumjai pujubiag duwi juna pachisan ujabaijim nunú kajimatkgipa. <sup>6</sup>Nunú aents pegkegchau tsawan eke jegatsaig, yamaya juwik wantikai tusa makichik emeteau awa duka dekagme. <sup>7</sup>Tujash yamaikishkam inamui pegkegchau takatnak, nuniyatak eke iwainakag takaatsui, nuna emetea nu agkasti tabaunum. <sup>8</sup>Nunikmatai dekas aents pegkegchauwa nu wantinkatnai, nunitaman Apu Jisukristu, nu aentsua nunak “jakati” titinai, tama jakatnai. Dutika Jisukristu ashí niina senchijijai inamjatna nuniak, nunú aents pegkegchauwa nuna senchijinak emegkaktinai. <sup>9</sup>Jisukristu eke nuna dutikatsaig, aents pegkegchaun takau wantinkatna duka, iwanchi senchijijai takau asa, aents dutikmainchau aidan kuashat iwainak takaak aentsun tsanutnai. <sup>10</sup>Nuniak ashí pegkegchau aina nuna takatnai, aents suwimkan jukiagtina nuna tsanugtatus, wagki ditak Jisukristu chichame dekaskea

nunú, aents aidan pujut tuke atinun suuwa nuna dakitjaju asagmatai. <sup>11</sup>Nuaduí Apajuik, nunú tsanumna nuna dekaskeapi titinme tusa idaisatnai. <sup>12</sup>Nunak ashí aents aidan, ni chichame dekaskea nunú etsegbaunash dekaskeapi tutan dakituinak, ayatak pegkegchaunak wakejus takasú aidan, Apajuí suwimkan susata tau asa dutikatnai.

### Uwemjatnume tusa etegjamu aidau nunimainji

<sup>13</sup>Tujash yatsug aidauh, ubag aidauh, atum Kristu aneetai aidautgimin pachisan Apajuí see tajai. Ni duwik yama nagkamchatinig etegtamjauwai uwemjau atinme tusa. Duwi Wakaní Pegkejiya nu, Apajuí wakeja nunak takastinme tusa yaimpakajui, wagki atumek chicham dekaskea nunú, nuigtú Jisukristui kajintsá anentaimu asagmin. <sup>14</sup>Apajuik jutii ni chichame etsegkauwaitag duwi atumnash untugmakajui, atumesh Apu Jisukristu eme anentam awa nunisjumek eme anentam aminjum tujamu asa.

<sup>15</sup>Nuaduí yatsug aidauh, ubag aidauh imá niinig shiig emetmamja pujakjum, ii atumin jintintuamu unuimajuitjum nu, tuja papí agaja awetimajim dushakam aneaku atajum. <sup>16</sup>Iina Apuji Jisukristua duke, iina Apají Apajuiya nujai anempaidau asag, wait anenjamag ichichmamtan ajumaish nagkankashtinun, pegkeg dakainag nuna amasajua nujai <sup>17</sup>anentaiminish ichichtamjatnume, shiig anentaimtijamak ashí pegkegnak chichainak, takatnash pegkegnak takastinme tujamu asa.

### Jutii pachijattsajum Apajuí segatkagtajum

**3**<sup>1</sup>Yatsug aidauh, ubag aidauh, junak inagnakun tajime: Jutii pachijattsajum Apajuí segatkagtajum, jutiiish Apajuí chichame ashí yantannum etsegkagmi, dutikamunum shiig aneas antuktinme



atumiin wajukabia nunisag. <sup>2</sup>Dutiksagmek Apajuí segatkagtijatum: Aents pegkegchau aidau, Kristui kajinas anentaimainatsu nunú jutiin waitkagmamain aina nunash agkamitkagmati tusajum. <sup>3</sup>Tujash ii Apuji ni tibaujina betek umina nunú, nigki ashí pegkegchau aidanmash ayamjutpak kuitamjamkatnume. <sup>4</sup>Apu Jisukristuig kajinmamsa anentaimji, ii dutikatajum tibau takaajum nunak, dutiksagkeap takasagatua tusan. <sup>5</sup>Ii Apuji Jisus yaimpakti Apajuí anejata antsaik anejattanum, nuigtushkam waitiakuish Kristuig ichichmamta nunashkam.

**Kristu nemagkau aidau  
takasá pujumain**

<sup>6</sup>Yatsug aidauh, ii Apuji Jisukristu wakega dutiskanuk tajime: Ashí Apajuí nemajin aidau takasá pujutan dakitak, ii jintintuabijim nunash betek umiinachuk tupanjatajum. <sup>7</sup>Atumek, ii atumiin wajuk pujusbaiji nunisjumek atumshakam pujumainaitjum duka dekagme: Jutii atumiin pujubiag duwik takatskek pujuchbaiji, <sup>8</sup>yuwakuish akikmatskek yuchabaiji. Tsawai kashijai takaaku yawebaiji atum waitkat dakitau asaja. <sup>9</sup>Atum jutii yaijatkatajum tumainaitku, ii takaamun wainainak ditashkam takastinme tusa nunibiaji. <sup>10</sup>Tuja wi atumjai pujubiag duwik juna tibajime: Ni takatan dakitauk yutanash

yuwashti, tusan. <sup>11</sup>Tujash antukmaji atum ainajum anuiya, ditanunak uyumas takatsuk, tikich takaidaun waitká yujaidau tabaun.

<sup>12</sup>Nunú aents nunin aidanuk Apu Jisukristu dutikatnume tawa nuna tajime: Dita yuwatnujin takainak takamtak batsamsatnume.

<sup>13</sup>Yatsug aidauh, ubag aidauh, pegkeg takat aina duka yawetjaigpa. <sup>14</sup>Makichik aentskesh wi ju papí agagbauwa juna antutan dakitau wainkugmek tsanigkaigpa, ijuntakesh ijunjaigpa, nigki pujak datsaamas dekapsati.

<sup>15</sup>Tujash shiwagmá pujusaigpajum, ayatak shiig ujaktajum yatsum anentsajum.

**Inagnaku kumpamkagtam**

<sup>16</sup>Ii Apuji shiig agkan anentaimsa pujutan sukagtina duke, atumnash ashí tsawantai shiig agkan anentaimsa pujutnum yaimpaktinme ashí tikich aina nuwishkam. Apajuiya duke ashí atum ainajum nuwish atí.

<sup>17</sup>Atumi kumpamkun agatjim nunak, wi mina uwejuí achikan agatjime, ashí wi papiin agajan awemaknuk tuke jutiksanké ajai.

<sup>18</sup>Ii Apuji Jisukristu ashí atumnash wait anenjamjatnume.

Aatus atí.

# PABLO NAGKAMCHAKU PAPI' AGAJA TIMOTEO AWETIMU

---

## Pablo Timoteo kumpabau

**1** <sup>1</sup>Witjai Pabloitjai, Kristu Jisus chicham etsegtugkata tusa etegkamuitjai, Apu Kristu Jisus pegkejan sujabau jukitasa dakainaku niini kajintsá anentaimainag nunú. Apajuí ii uwemtijamna nunú Kristu Jisusjai minak awetiuwai. <sup>2</sup>Timoteoh, juna papiin agatjame, wi chicham etsegbau antukam, Apu Kristu Jisusai kajintsá anentaimat jukiú asam, amek dekas mina uchijua imanaitme. Wakegajai Apajuí iina Apajiya nu, Jisukristu iina Apujiya nujai, wait anenjamag aminash shiig agkan anentaimsa pujutnash amastí tusan.

## Waitá jintinkagtin aina nujai kuitamamkatajum tibau

<sup>3</sup>Wi Macedonia nugkanum wegakun, amek Efeso juwakam, makichik aentskesh waitan jintinkagtuawainum diiyaku atá tibaijam dutiksanuk yamaish tajame. Anuí aents waitá jintinkagtuina duka: Jintinkagtuawaipajum, tita. <sup>4</sup>Dutikakum ujkátá, wainka augmattsamu aidaun, nuigtú ditá muunji aajakú ejechamnun augmatú yujainak tsawantan megkagá batsata nuna idaisatnime tusam. Nuna dekaatatus wakejuidak wainak jiyanitú yujau ainawai, tujash duka makichkish Apajuiyai kajintsá anentaimtanmag yaijattsui.

<sup>5</sup>Wi juna taja nunak, Kristu nemajin aidauk pempentunisag aneenitnime

tusan tajime. Nuna aatus aneeninak iwainainawai dekaskenum Kristui kajinas anentaimainamun, dekaskes Kristui kajinas anentaimainatai tumain wajatsuk. <sup>6</sup>Tujash wajumak aents nuna idayinak, kanakag wainak chichaa yujainawai. <sup>7</sup>Apajuí chicham umiktá tibuwa nuna jintiin atatus wakegainawai, ditakesh dita chichainamuji, tuja dita jintinkagtuinamujinakesh shiig dekainachiatak.

<sup>8</sup>Chicham umiktinun Apajuí tibaun Moisés agajua nunú, imatiksaik umiamuk pegkeja duka dekainaji.

<sup>9</sup>Chicham umiktina duka aents pegkejan takau aina nunú umiktinme tichamui. Ju chichama juka aents intimkiu aidau, chichaman umichu, tudau takau, Apajuinash ajantus diichu, chichame-nash dakitin, pegkegchaunak takau, patayinak pempeentuki main, apajinash dukujinash main aidau, ashí aents magkagtin, <sup>10</sup>tsanijimtan wekaetin, mai aishmagkuk pempeentuniki dutikdayin, aentsun kasamak sujin, waitjin, tikichin tsanuak Apajuí daajin adayin, nuigtushkam chicham pegkeg Apajuí pachisa jintiamua dutiksag takatan dakitin aina nudauwai. <sup>11</sup>Pegkeg chicham jintinkagtamua duka, Kristu pachisa jintinkagtamua nuuwai. Apajuí shiig eme anentsá emematam pujuwa nunú, minak: Uwemat awai tusam etsegtukata tusa awetiuwai.

### Pablo Jisukristu see tibau

<sup>12</sup>Iina Apuji Kristu Jisusan see tajai, mina betek umimainun waitu asa, takagtusti tusa niina senchijin sujusua duwi. <sup>13</sup>Duwikik wika Jisusan pegkegchaun chichagkun, niina nemajuidau-nash aikasnuk pegkegchaun chichagkun waitkau ayajai. Tujash nunak Jisusak Apajuí Uchijimpapita tusan dekachukun nuniyajai, nuní pujai Apajuí minak wait anenjujui. <sup>14</sup>Dutijuau asa shiig kuashat wait anenjug tsagkugtug, Kristu Jisusai kajintsá anentaimtan sujusuí, nuniak pempeentuniki anenitnash, Apajuí aneetnashkam sujusuí.

<sup>15</sup>Juka shiig dekaske, ashí dekaskeapi tumain ainawai: Kristu Jisus ju nugka juwi tauwa nunak, aents tudau aidaun uwemtijatatus tauwai. Nu tudau aina nuwiyag dekas imá senchi tudaunuk witjai, tikich aidaun nagkaesaunuk. <sup>16</sup>Tuja wi iman aigkish, Jisukristu wait anenjug tsagkugtujui, ni waamak kajeachbaun tikichin iwaintukta tau asa. Juna wainak tikich aidaush: Jisukristu minash wait anenjawapita, tusag niini kajinas anentaimainak pujut nagkan-chaun jukitnume tusa. <sup>17</sup>Nuaduí Apu tuke pujuwa nu, ajumaish jakashtin, waintash wainmainchauwa nunú, Apajuí makichkiuch ashí dekauwa duke eme anentsá tuke ememattai atí. Aatus atí.

### Pablo Timoteo chichagbau

<sup>18</sup>Uchuchi Timoteoh, jujú umiktá tajame: Apajuí etsegtin aidaun amina pachipas, Apajuí chichamen etsejin atinai tujabiuwa nunismek, shiig anentaimsam pujusam imá Kristuig kajintsam anentaimkum senchi takastá, waitan jintinkagtuina nunú depetkata tabaunum. <sup>19</sup>Ame Jisukristui kajintsam

anentaimam duka dutiksamek shiig anentaimsam pujustá, tikich aidaun pegkegchaun takainak Kristu kajintsá anentaibaujin megkaekaja nunikaim. <sup>20</sup>Nunak Himeneo, Alejandrojai nunikaje. Nunikmatai iwanchin idaitusmajai, ni waittan susati, dutikam Apajuí pegkegchau chichagchau atinme tusan.

### Apajuí aujut pachisa tibau

**2** <sup>1</sup>Dekatkauk jujú dutikatajum tajime: Apajuí aujukgmek, ashí tikich pachisjumesegattajum ni wait anentug yaigtí tusajum, nuniakjum see titajum ashí ni yaibau pachisjumeseg. <sup>2</sup>Ashí apu aidaun pachisjumeseg Apajuí aujustajum, shiig agkan pujuinaku, tutitag atsamunum Apajuí wakegamuk umigku batsamsami tusajum. <sup>3</sup>Ju aaja augbau Apajuí iina uwemtikagtina nunak shiig awagmawai. <sup>4</sup>Nigka ashí aents uwemjatnume, nunikag dekaatnume dekaskea nuna, tusa wakegawai. <sup>5</sup>Apajuik makichki, nunisag aents aidautin Apajuujui epegtugmaushkam makichki: Duka Kristu Jisusai. <sup>6</sup>Nigka ashí aentsun uwemtijata tau asa mantamdauwai. Tsawan ni tibuji umintai Apajuí iwaintugmakui ashí aentsun uwemtijatatus wakejukua nuna. <sup>7</sup>Nuaduí wika chicham etsegkata tusa etegka awemamuitjai, nuigtushkam Jisukristun kajinas anentaimtustinne judiuchu aidaush jintintuata tibuwaitjai. Wi juna taja juka dekaske, waitjatsjai.

### Aishmag aidaun tuja nuwa aidaun nunimainji

<sup>8</sup>Nuaduí ashí yantamnum Apajuí ausami tusag ijunjamunum, aishmag aidaun Apajuin aujuinakug, tikichjaish shiig anendaisag kajetsuk batsamas, Kristu shiig nemajuinak batsamsatnume

tusan wakegajai. <sup>9</sup>Tuja aantsag nuwa Kristu nemajin aidaushkam Apajuí ememattasa ijunbaunmag, nuwa shiig anentaimkau iwagmamaina nunisag iwagmamjatnume tusan wakegajai. Nunisag intashinash shiig iwajug tikich aents aidau anentaimtuja diimain wajas yujatsuk, patakumtai oronash, peetai akik aidaun peeká, jaanch pegkeg akik aina imanun puyatjus iwagmamjatatus wakegá yujainmegka tusan. <sup>10</sup>Ayatak pegkejan takainak aents aidaush pegkegnum chichajam atinme, nuwa Apajuí wakegamun umin wajuk pujumainaita nunisag pujuinak. <sup>11</sup>Nuwak tuwakbaunum aishmag jintinkagtutaik takamtak pujus shiig antumain ainawai, <sup>12</sup>nuwa aidaunak ijunjamunum wajakí jintinkagtuati tatsujai, nuwak aishmagkun wagagkig dutikata tumaitsui, takamtak jintiamunak antumainai. <sup>13</sup>Apajuik dekatkauk Adagkan najana, duwi Evan najanauwai. <sup>14</sup>Adagkak iwanch tsanuamak asachui, Eva tsanuam asauwai, dutikamu asa Evak tudaun takasui. <sup>15</sup>Tujash nuwa aidaush uwemjatnai, Jisukristu nuwanum akiinau asamtai. Tuja dita: Jisukristuapi uwemtijumainuk, tusag niina aneenak, tudaujin idayas pujuinakug uwemjagtinai.

**Jisusa nemajuidaun diin aidaush wajuku amainaita**

**3** <sup>1</sup>Jisusa nemajuidaun diin atatus wakejuina duka, dekas pegkeg takata nuna wakegainak tuinawai. <sup>2</sup>Tujash aents nunú takatan wakejauk pegkegchauji diigsaisa jiyashtai amainai: Makichik nuwentin imá nuwejaig pujustatus wakeyin, emetug shiig esegag anentaimkau, eme anentsá diitai, jeen minitaish shiig aneas jukagtin, Apajuí chichame jintinkagtut-nash dekau, <sup>3</sup>nampechu, maanitnash

wakeechau, kuichkinash imá nigki kuashat ajuttí tusa wakeechau, wait anenkagtin, kakagchau. <sup>4</sup>Nuigtushkam niina jeenish shiig chichas pujú amainai. Uchiji aidaush apajinash umijin, eme anenkagtus diijatin amainai. <sup>5</sup>Tuja ni jeenigkish shiig chichas pujachush, ¿itugsaya Jisusa nemajin aidaunash kuitamainaita? <sup>6</sup>Tujash Jisusa nemajuina nuna diinuk yamá sujumankau amaitsui, ememak iwanch wajukauwa numamtuk wajak suwimkan jumain asamtai. <sup>7</sup>Nuigtushkam Apajuí nemagchau aidaush eme anentsá diitai amainai, pegkegchau chichajinum tau asa. Nunishtaik iwanch pegkegchau takamtiksamtai, Apajuí chichameshkam eme anentsá diiyam amainchau asamtai.

**Jisusa nemajuidau atsumamujin diin aidau**

<sup>8</sup>Nunisag Jisusa nemajuidau atsumamujin diin aidaushkam ajantusa diimain amainai, ni chichakbaujinash imatiksag umin, nampechu, takat pegkegchau aina nujai kuichkijinatatus wakegá wekaechau. <sup>9</sup>Nuigtushkam chichaman Apajuí iwaintugmakua nunash utujimtsuk dekaskeapi tinu amainai, nuniak dita dekaina nunisag pujumain ainawai. <sup>10</sup>Jisusa nemajuidau atsumamujin diin agtina duka, eke adaitsuk wajak pujawa nu diigmain ainagme, dutikam utugchatkesh atsgukui duwi adaimain ainagme. <sup>11</sup>Nuna nuweshkam aantsag ajantusa diitai amainai, chíchama wekaetuchu, emetug shiig anentaimkau, ashí betek umin. <sup>12</sup>Nunisag Jisusa nemajuidau atsumamujin diin aidaushkam makichik nuwentin, niina uchijinash shiig jintintin amainai. <sup>13</sup>Jisusa nemajuidau atsumamujin diin aidau takatan shiig takainakug pegkegnum augmatam amain ainawai,

dutikam niishkam kajinmamas, Kristu Jisusai kajintsá anentaimta nunashkam etsegrmainai.

**Apajuí wait anenjamjamu  
pachisa tibau**

<sup>14</sup>Amina wainkatasan minita tayatkun juna papiin agajan awetajame, <sup>15</sup>wi yajá aneasan megkaekuish Jisusa nemajin aidau ijunjamunmash, wajuk pujumainaita nunú dekaata tusan. Jutii Jisus nemajin aidautik, niina uchijí waigkú asaja, Apajuí tuke pujuwa nuna aentsji ainaji. Nunin asaja jutii ainaji dekaskea nunú etsejin aidautik. <sup>16</sup>Dekas Apajuí iwaintugmakmawa nunuwai dekas ashí wagaakuk:

Kristu aentsmaga wantinkauwai,  
Wakaní Pegkejiishkam pegkeg-  
chaujish atsujui tiuwai,  
nayaimpinmaya aents aidauish  
wainkamu aajakuí,  
ashí nugkanum chichamesh  
etsegnakmatai,  
dita dekaskeapi tuidauk dekaskeapi  
tiaju ainawai,  
nunikmatai ataktú nayaimpinum  
jukimu aajakuí.

**Jisukristu nemagkaju waitan  
antujuinak tupaajagtinaí tibau**

**4** <sup>1</sup>Wakaní Pegkeji shiig paan antumainun tawai: Tsawan nagkan-kattak wajataik, kuashat aents Kristu Jisusai kajinas anentaimtanak idayinak, wakan pegkegchau dekamtikam waitan jintinkagtuina nunú etsegbaun antujui-nak. <sup>2</sup>Aents wainak tsanumaidaun antugkagtin ainawai, tujash duka datsantainkachu asag pegkegchau takainakush, pegkegchaunap takaja tusag dekapmamchagtinaí. <sup>3</sup>Nuninak: Nuwenmaitisui, yutai yuwakuish ashí tinamjaik yutai aina duka yumaitisui, tiagtinaí. Tujash jutii Jisus dekaskeapi

tuidau asaja dekaskea dusha dekau aidautik, Apajuí ashí najankamua duka see tusa yumainaitji. <sup>4</sup>Ashí Apajuí ni najankamujinak pegkejai tiu asamtai, ashí yutaig dakittsuk see tusa yumainai. <sup>5</sup>Duwi Apajuí see tusa ashí ii yuwamuk iinishkam pegkejai, ni pegkejai tiu asamtai.

**Shiig takaaku Jisukristu takajin  
pegkeg amain**

<sup>6</sup>Jujú aajam yatsut Jisusa nemajuidau jintinkumek, Kristu Jisusan dekas shiig takajin atatme. Nuniakum Apajuí chichamega nu, nuigtú Jisukristui kajintsá anentaibau jintiam dushakam aan kuashat unuimagtatme.

<sup>7</sup>Tuja wainak ju nugkanmaya imanchau augmattsamun augmatuina duka antujú wekayipa, amek Apajuí wakegamua duke puyatjusam umigkata-sam kakanmamsata. <sup>8</sup>Iyash jamamtuchu atí tusa takantikamua duka iyashnu-mag yaijatui, untsu Apajuí wakegamu puyatjusa umiktasa kakanmabauwa nu imá pegkejai, ju nugka juwi pujamun-mash, atak nayaimpinum pujustinaitag duwish yaijatu asa. <sup>9</sup>Juka shiig dekaske. Nuniau asamtai ashí aentsuk dekaskeapi tumain ainawai. <sup>10</sup>Nuaduí waitiakuish senchi takaaji, Apajuí iwaaku pujuwa nunú dakau asaja. Niiyai ashí aents aidautin uwemtikagtumainuk, tujash imá Apajuiyaig kajinas anentaimaina nunak.

<sup>11</sup>Juna taja ju, umiktajum tusam shiig jintinkagtuata. <sup>12</sup>Ame datsauch asamin imanchau chichagtaminum, dekas Jisusa nemajuina nuanuish iwainmam-kata pegkeja duke chichaakum, shiig pujakum, anejatkum, Jisukristui kajintsá anentaimu asam pegkegchaush takatsuk pujakum. <sup>13</sup>Wi amina ijagsata-san eke anuí minatsaig, ijunjamunum Apajuí chichame aujkum, yatsug aidau,

ubag aidau jintinkum anentai ichichtugta. <sup>14</sup>Jisusa nemajuidaun diin aidau, Wakaní Pegkeji dekamtikam, ame yupichu dutikatnun Apajuí anenjauch amasbaun etsegkamtai, ashí wainbaunum buukmin achigmakag Apajuin aujtugmainak, juuwai ame takatjumik tujabijua nunú idaisaipa.

<sup>15</sup>Ju aina juka shiig kuitamsam takastá, nuniamin ashí aents aidaush ame ju takatnum shiig eebaun waipakagtatui. <sup>16</sup>Kuitamamkam pujakum tikichish jintintuata, Jisus dekaskeapi tiuwaitam nunismek pujusam. Aajam takaakum ame suwimak jumainaitam duka uwemjattame, tuja tikich ame jintinbaushkam uwemjagtatui.

**Jisusa nemajuidaujaish  
itugdaimainaita nu pachisa tibau**

**5** <sup>1</sup>Muun aidau pegkegchau takainakuish jiyakaipa, ayatak amina apa anentsam chichagkata. Datsauch aidaushkam amina yatsum anentsam chichagkata. <sup>2</sup>Nuwa muunchakam duku anentsam chichagkata, tuja nuwa muntsujut aidaush ame umaim anentsam pegkegchau anentaimtutsuk shiig awajkata.

**Nuwa waje yaigtin pachisa tibau**

<sup>3</sup>Nuwa waje aidau yaimainji atsujuina nu yaigtá. <sup>4</sup>Tujash nuwa waje uchijí ajuinamuk, nuniachkush tijajigkesh ajuinamuk, nunú uchi ditanak ashí atsumamujinash yaimainai, uchuch asamtai ditan kuitamkamú asa. Nunuwai Apajuí emtinish pegkeja duka, nigka nuna dutikatnume tusa wakegawai. <sup>5</sup>Tujash nuwa waje yaimainjish shiig atsubgau, imá Apajuinak dakak pujus tsawai kashishkam Apajuinak aujak puja nu yaigtajum. <sup>6</sup>Tujash waje ni iyashí pegkegchau wakegamun taká

pujauk, tuke jakauwa nuninai iwaaku pujakush, nunin aidauk yaimaitsui. <sup>7</sup>Wi tajam nuna ditash betek dutikatnume tusa ujektá, pegkegchauji diigsaikish tumainchau atinme. <sup>8</sup>Aents Jisusa nemajin niina patayí yaitan uyumatsuk, niina jeenianakesh uyumatsu duka, Kristui kajinas anentaimchau wajukmaina nuniawai. Nuniakug aents makichkish Jisusan anentaimtuchu aina nuna nagkagas pegkegchau wegawai.

<sup>9</sup>Tuja nuwa wajemeaun Jisusa nemajin aidau yaigmí tusa papiinum agatuinakug, sesenta mijan ajamua nui nagkamas agatmain ainawai, makichkia aishintin aajakajua nuna, <sup>10</sup>nuigtushkam ni pegkeg takaamujish waitujakbau, uchijinash pegkeja jintintua tsakapaku, ijagnash shiig aneas ni jeenish ju wajakú, Kristu nemajin aidaunash nigki anenmamtsuk kuitamajakun.

<sup>11</sup>Tuja nu yaigtin agatbauwa nuwig nuwa uchi wajemeauk agatjaigpa, dita wakegamun takainak Kristun tupantug aishinatatus wakegainawai, <sup>12</sup>nuninak dita wajemeawag, wika aishintsuk pujusan Kristu nemajuidaun yaigtajai tumabaujin umiachu asa, ditak suwimak jumainnum jegantainum. <sup>13</sup>Nuigtushkam ditak dakí unuimajag ijagka yujajainawai. Tikich chichamunum ditash chichaman patakí wajainak, chicham chichamainchau aidaun chichá yujainawai asamtai. <sup>14</sup>Duwi nuwa uchi wajemeau aidaunak, aishinawag uchijinatnume tajai. Nunik shiig pujusag uchijin kuitabiagtai, Jisusan dekaskeapi tuinachu kajegkagtuina nunú pegkegchaunum chichagtamkachagtinme tau asan. <sup>15</sup>Tikich waje aidauk Kristui kajintsá anentaimtanak idaisaje, nunikag iwanchin umijuinawai.

<sup>16</sup>Nuwa Jisusa nemagna nuna patayí wajemeau pujutaik ni yaimainai, nunitai Jisusa nemagkau aina duka,

nuwa wajemeau aidau yaimainji shiig  
atsugbau aina nuna yaimainai.

**Jisusa nemajuidaun diin aidau  
pachisa tibau**

<sup>17</sup>Jisukristu nemajuidaun diin aidauk  
eme anentsá diyaku, nuigtush yaigbau  
amainai, tujash Apajuí chichamen  
etsejuinak jintinkagtuina nunú aidau,  
<sup>18</sup>wagki agagbaunum chichaak: “Toro  
trigon dajag akaak wekaetauk, trigon  
yuwawai tusagmek nu jig jìgkatuawaipa,  
nigka taká duwi yuwawai.” Nuigtush-  
kam: “Aents taká duka akiam auwai”,  
tau asamtai.

<sup>19</sup>Tuja Jisukristu nemagnu diinun  
pachis jimag, nuniachkush kmpatum  
aentskesh, pegkegchau takaawai  
tuinachkuig antugkaigpa.

<sup>20</sup>Tuja pegkegchauwa nunak takaa  
weenakuig, Jisukristun nemajin  
ijunjamunum awayajum pegkegchauji  
iwainakjum etsegtuktajum, tikich  
aidaush nuna wainak pegkegchau  
takatan ajantuktinme.

<sup>21</sup>Junash tajame: Uchuchih, aents  
ajantusa diyamu aina nunú pegkegchau  
takaakui pachitsuk idaikum, aents  
imanchau diiyamua nuna pegkegchauji  
etsegtin aipa, ashí betek iwaintukta.  
Apajuí, iina Apuji Jisukristu, ditá aentsji  
nayaimpinum batsamna nunuiya  
etegjamu aidaush, ashí wainu asamtai  
betek umiktá.

<sup>22</sup>Apajuí takatjin takastin adaikumek,  
waugtukumek uwegmin achikam Apajuí  
ajutusaipa, nu aents tudaun takaakui  
ameshkam bakumaim. Tupanjata ashí  
pegkegchau aidauk.

<sup>23</sup>Aents tudau takaidau dekajuami  
tumainchaush awai, pegkegchau  
takaamujig paan waindu asamtai, tuja

nuniai tikich uumak taká pujú imapam  
wantinkui dekgamaush awai.<sup>a</sup>

<sup>24</sup>Nunisag aents pegkeg takaamuji  
paan wainmainush awai, nuniai pegkeg  
takaamuji paan wainmainchaush awai.  
Tujash duka tsawan jegatai paan  
wantinkatnai. <sup>25</sup>Amek wakemin  
beseakum waa waamak jaum nunin  
asam, yumik umutsuk machik vino  
uwagta.

**6**<sup>1</sup>Jisukristu nemajin inak aidautig-  
mesh, atumi apujum eme anentsá  
diyaakjum ashí ni tabaujig umigkata-  
jum, aents aidau Apajuin pachis, nuigtú  
ni chichame jintiamua nunash pegkeg-  
chau chichajinum. <sup>2</sup>Tuja inak Jisukristu  
nemaja nunú, niina apujishkam  
Jisukristu nemaju asa, Kristui kajintsá  
anentaibaunmag ni yachi asamtai  
imanchauk diisaigka. Dutiktuk nuní  
nagkaemas shiig takagsatnume, dekas  
yatsut Jisusan dekaskeapi tuina nunú  
imatika aneasa takajam amain asamtai.

**Waitá jintinkagtin aidau**

Jisukristun nemajin aidau, nuigtú diin  
aidaushkam wi tajam juna umimain  
ainawai. <sup>3</sup>Tujash tikich aents dekaskea  
juna jintinkagtutan dakituidaush  
ainawai. Jutii iina Apuji Jisukristu  
pachisa dekas pegkeg jintinkagtag  
nunashkam dakituinawai. <sup>4</sup>Nunú aents  
nunin aidauk dekachiatak wainak  
ememainak tu yujainawai. Duka dita  
anentaimesa chichamujin pachisag  
jiyanitkatatus wakeyin ainawai. Nu  
jiyanitbaunmag kajegdayamu, shiwag-  
magamu, pegkegchau chichagdayamu,  
kajintsá anentaimtuniashbau, <sup>5</sup>nuigtush-  
kam inagnamainchaun jiyanitú yujaina-  
wai, aents pegkegchaunak anentaimtín  
dekaskea nuna dekachu asag, Apajuí

**a 5.23** Jujú versículo chichamega juka versículo 25num inagkeaji, apach chichamnum  
diyamak makichik wajiin augmatiatatak tsujig emau asamtai inagnamunum ukuaji.

pachisa chichamunum wiyakchameautia nuninun anentaimainawai. Nunú nunin aidauk tupanjata. <sup>6</sup>Dekaskenmag Apajuí umigbauwa nuuwai, aents wiyakuch ashí wajiiji ajamu asa, shiig aneas pujuwa imanisa pujumaina duka. Tujash ni ajamua nujaig shiig aneas pujá nunú nunimainai. <sup>7</sup>Iik akiinkuuish wajiigtin akiinachuitji. Nunisaik jaakuish wajiik jukiik wechatnaitji. <sup>8</sup>Duwi jutiik, yumain, nugkumain ajutjamkuig nujai shiig aneasa pujumainaitji. <sup>9</sup>Untsu wiyakuch wetatus wakejuidauk waamak tudau weenawai, waji imanchau pegkegchau ekagta nuna imá senchi wakejuidau asag. Nuniau asa, duka waittanum, megkaeta nuwi weenawai. <sup>10</sup>Kuichik itugsag kuashat ajutia tusa imá senchi wakejuta nuuwai dekas pegkegchau takatnum ekagta duka; nuniau asamtai kuichkin imá senchi wakejuidauk, nuna takainak Jisukristui kajintsá anentaimatanak idaisaje. Nunikag kuashat utugchatnum yujainak senchi waituinawai.

**Kristui kajintsá anentaimam nujai  
senchi wajaestá tibau**

<sup>11</sup>Timoteoh amek, Apajuí takajin asam jujú pegkegchau aidaun taja juka ashí tupanjata. Nuniakum pegkeja duke takastá, ame Kristui kajintsam anentaimam dusha mijattsuk ashí tikich aidaush aneeta. Utugchatnum jegakmesh katsunjam pujakum emematsuk pujustá. <sup>12</sup>Amek Jisukristui kajintsá anentaimam nujai utugchat aidaush depetkata, nuniakum pujut nagkanchau jukita; Apajuí nuna jukiti tusa etegtamjau asamtai. Tuja, ame Jisukristuap uwemtijumainaita tabauk aents ijunjamunum iwainakam etsegtumakuitme. <sup>13</sup>Ashí wainainag nuna Apajuí pujutan suuwa nunú waipau asamtai, nuigtú Jisukristu ni inamtaijin pachis

Poncio Pilatun ujakua dusha waipa duwi, <sup>14</sup>wi tajam ju betek umiktá. Pegkegchau takatsuk pujustá, tikich aidaush pegkegchau takaawai tujaminum, nuniakum ii Apuji Jisukristu minitta dusha dakasta. <sup>15</sup>Apajuí ni tsawan dakamuji uminkam-tai ataktú Jisukristun ju nugka juwi awematnai. Tuja imá nigki Apuk, ashí apu aina nuna Apujishkam, imá nigki eme anentá ememattaiya duka. <sup>16</sup>Imá nigkiuchi ajumaish jakashtina duka, nigka tsaaptin makichkish adijmainchaunum pujuwai. Makichik aentskesh wainkauk atsawai, waintakesh wainmainchau asamtai. Niina senchijish, ni inabaujish tuke atina nunú tuke ememattai atí. Aatus atí.

<sup>17</sup>Wiyakuch aidaush ememachu atajum tita, ditá wajiijinig kajinmas anentaimá pujuinum, ju nugka juwi wiyakchameamuk ashí megkaejatnai. Dekas Apajuiyai kajinas anentaimain ainawai, niyai ashí ii atsumamunash shiig aneas pujustinme tusa sukagtina duka. <sup>18</sup>Nuigtushkam wiyakuch asag kuashat waji ajuina nujai, kuashat aents atsumaidaun yayaak Apajuiyai wiyakchamemain ainawai. <sup>19</sup>Juna aatus takaidaunak Apajuishkam dita atak jukiagtinun nayaimpinum ukujui, nuigtú pujut nagkanchaunashkam jukiagtinai.

**Pablo inagnaku akatmamjamu**

<sup>20</sup>Timoteoh, Apajuí chichamen etsegkata timajam duka dutiksamek aents aidau ujaktá. Tikich chicham dekaskechun jintinkagtuidaujai jiyanitkaipa. Ditak dekaji tuinawai, tujash dekaskea nunak dekainatsui. <sup>21</sup>Nunú wait aina nuna etsejuinak, wajumak aents aidau Kristui kajintsá anentaimtan idaisaje.

Apu Jisukristu atumnash wait anenjamjatneme.



## PABLO AWENTSAIK PAPI AGAJA TIMOTEO AWETIMU

---

### Pablo Timoteo kumpabau

**1** <sup>1</sup>Witjai Pabloitjai, Kristu Jisus chicham etsegtugkata tusa awemamuitjai, Apajuí wakejutu asa, Jisukristu nemajuidauk pujutan jukitnai tusa anagkagtuauwa nuna etsekgati tusa awetiuwai. <sup>2</sup>Uchijuh Timoteoh mina aneetaiju, juna papiin agajan awetajame, Apajuí iina Apajiya nu, Kristu Jisus ii Apujiya nujai, wait anenjamag shiig agkan anentaimsa pujutan amastinme.

### Pablo Apajuí aujku see tabau

<sup>3</sup>Apajuin kashi tsawai aujkunuk tuke see tusanké ajai amina pachisan, mina muuntug aidau emematujakua nunak, wishakam mina anentaijuish shiig dekau asan niinak umigkun pujajai. <sup>4</sup>Timoteoh, ii kanaamunum ame buutium nuna tuke anentaimtajai, nuniakun amina wainkan shiig aneastasan wakegajai. <sup>5</sup>Ame dekaskenum Jisukristu kajintsam anentaimtjuitam nunashkam aneakjai. Dekatkauk amina dukuchjum Loida, duku Eunicejai Apajuiyai kajinas anentaimajakajua duke aminashkam ajutjamui.

### Datsamait sui Jisukristu pachisa chichatnumag

<sup>6</sup>Nuaduí anemtikjame: Wi amina buukmin achikan Apajuí segai, Apajuí

ame yupichu dutikmainun amasbau ajutjama nunú shiig takamtiksa tusan. <sup>7</sup>Wagki, Apajuik wakan sapija sukagtina nunak sujamsachui, nigka Wakaní Pegkeji senchimetan, anenitan, pegkeg aina duke anentaimtutnum yaijatna nuna sujamsauwai. <sup>8</sup>Nunin asamtai, iina Apuji Jisukristu pachisa etsegtanmag datsamipa, tuja mina pachittsameshkam datsanjujaipa. Wika Kristu chichamen etseju asan achinkan pujajai, nuaduí ameshkam waittsata pegkeg chicham etseju asam, ame waittaish Apajuí senchintijamattame. <sup>9</sup>Apajuí uwemti-jamjauwai dutijama mina aentsug agtinme tusa etegtamjauwai, niina aentsji aidaush wajuk pujumaina ainawa nunisag pujustinme tusa. Nunak ii takasbaunum dutijamachui, ayatak nigka anejatna ibau asa, yaunchuk nagkamas Kristu Jisusan awematjai, dutikam ditan uwemtikjatin atí tiu asa dutikauwai. <sup>10</sup>Apajuik ni anejatbaunak yamai iwaintugmakui, ii Uwemtijamin Kristu Jisusan awetugmak. Kristu jatanak depetkauwai, dutika yamajam chichama nui dekamti jamji pujut tuke atina nunashkam.

<sup>11</sup>Apajuí minak, ame chicham etsegtkata ashí aents tikich nugkanum batsata nuwish tusa etegtua awetiuwai. <sup>12</sup>Duwi wika ashí ju aidaunak waitiajai, nuniaknushkam datsamatsjai. Wagki, wi yaayai kajinmasa anentaimja nuna

dekau asan, Kristuap senchigtina ibau asa eke ni minitnuji tsawan jegatsaig, ashí aents aidaun niina chichame pegkeja nuna ujaktí tusa kuitamjuktatua tau asan.

<sup>13</sup>Timoteoh, chicham dekaskea nuna wi amina jintintuabijam nunú aents aidau jintintuata tajame. Kristu Jisusjai ijutkau asam, niini kajintsá anentaibau, nuigtú anentak ajutjama nujai tikich aidaujaish aneenita. <sup>14</sup>Wakaní Pegkeji iini puja nunú yaimpasmatai, dutikata tiuwaitjam duka betek umiktá.

<sup>15</sup>Juka amek dekame, ashí Asianmaya aidauk minak tupanjukaje; nuwiyag Figelo, Hermógenes ainawai. <sup>16</sup>Tujash Onesíforo patayí aidaunak Apu Jisus wait anenjati, nigka wi achinkan egketaishkam datsamsuk kuashtá ichichtugmayi. <sup>17</sup>Nuna nuniktatus Roma taa, ayamtsuk shiig senchi egá egatkawa waitkabi. <sup>18</sup>Apu Jisus waketsag taatta duwish, Apajuí niinash wait anenjati. Amek shiig dekame, ii Efeso pujajin wajupa yaimpakchabi duka.

#### Waitiakmesh katsunjata

**2** <sup>1</sup>Uchijuh Timoteoh, Apajuí takatji wakejusam takagsata, amek Kristu Jisusjai ijutkau pujau asamin, Apajuí wait anenjamag yaimpau asamtai.

<sup>2</sup>Kuashtat aents antuinamunum wi jintintuauwaitjam nunú, aents kajittsá diitai, nuigtú shiig jintinkagtumaina nunú jintintuata, ditash tikich aidaun jintintuatnume.

<sup>3</sup>Sntag pegkeg apujin umiju asa waitmaina numamtuk, ameshkam Kristu Jisus umigkum senchi waitiakmesh katsunjata. <sup>4</sup>Sntagmagak pujuina duka, sntagchau wajukena nunimait sui, sntag aidauk dita wakegamunak takamain ainatsui, apuji shiig awajkata tabaunum. <sup>5</sup>Nunisag wasugkamin aidauhkam, dutik wasugkamata

tibauwa dutiksag wasugkamchakug wají pegkegnak jumait sui. <sup>6</sup>Ajanum senchi takaushkam, ajak uminkamtaig niijá ju ainawai, ni ajakbau asa. Nunismek ameshkam emamkesam senchi takastá, Apajuí akigmamu jukimnum. <sup>7</sup>Wi taja jujú shiig anentaimtusta, iina Apuji Jisukristua nu ashí junak dekamtijamat-tawai.

<sup>8</sup>Adeagta, Jisukristu Apu David wegantu aajakua nu, jaka ataktú nantakiuwa nuna pachisan yamajam chichaman etsegnuweg nunú. <sup>9</sup>Nunú yamajam chicham etsegbaunum achigkagmatai pujusan senchi waitiaknush atsaneajai, magkagtin utugmaina dutijuawag jiijuí jigkatjagmatai pujusan. Tujash mina dutiujinakuish Apajuí chichamen tuke etsejag nunak kuashtat aents aidauk antuinawai. <sup>10</sup>Nuaduí ashí katsuntajai Apajuí etejamu aidauh, pujut nagkanchau uwemat Kristu Jisusai awa nuna jukitnume tusan.

<sup>11</sup>Juka dekaske:

“Ii ni wakegamu takaaku pujauti jaakuik niijaig pujutnaitji.

<sup>12</sup>Juwi ni umigku pujusá waittsaish, niijai inamjatnaitji.

Ii ni dakitjautinak, niishkam dakitjamjatnai.

<sup>13</sup>Tujash jutii ni tabaush betek umichu ainajinish, nigka betek uminai, ni tibaujinak umitskek idaichauwai.”

#### Timoteoh shiig pujusam tikichish jintintuata tibau

<sup>14</sup>Tikich aidauh anemtikata Apajuí tabaujiya jujú, jiyani yujata nunak idaisatnume, duka makichkish yaijattsui, ayatak tikich nuna antuidauk chicham yamajam etsegbau antutnak dakitmitkau asamtai. <sup>15</sup>Shiig kuitamsam takastasam kakanmamsata, Apajuí

emtinish pegkejan takau wantinkamnum, takatan shiig takasú datsamsuk iwainmama numamtuk, Apajuí chichame dekaskea nu shiig jintinkagtakum. <sup>16</sup>Idaisata ju nugka juwiya imanchau chichatai aidauk, nuninun chichaidauk nuní nagkaemas pegkegchaunum weedau asamtai. <sup>17</sup>Tuja dita jintinkagtamushkam kuchap ayatak wegkag wegama numamtuk awajainawai, nunak Himeneo, Filetojai dutikainawai. <sup>18</sup>Ditak chicham dekaskea nuna idaisag chichainak, jakau nantagtina duka nagkaemakne tuinamun antukag, wajumak Jisukristu nemagkaju aidau, tukita dekaskesh tusag dekamainchau dekapenawai. <sup>19</sup>Tujash Apajuí tuke atinun tiuwa duka juwi agagbauwai: “Apu Apajuik yaita niinu aidaush nunak shiig wainui”, nunin asamtai: “Ashí aents aidau Jisukristu nemagjai tuidauk pegkegchau aidaunak idaimain ainawai.”

<sup>20</sup>Jega muunnumag aiyame kuashat takatai: Oro najanamuke, jiju plata tutaiyai najanamu, numi najanamuke, duwe najanamu aidaushkam. Tujash nunú pegkeg aina duka ijag aidau ajamtai ainawai. Nuniai tikich aina duka yutai inagku takatai ainawai. <sup>21</sup>Jumamtuk aents Jisukristu atsumtai ata takug, pegkegchau takatsuk shiig kuitamamak pujumainai. Takatai aidau pegkeg aina ibau amainai, nunitai Jisukristushkam oro najanamun apu dekas pegkegnum takauwa numamtuk, niinashkam takat pegkegnum apusatnai.

<sup>22</sup>Datsa asam iyashim pegkegchau wakegamu takastasam anentaimtujakuitam duka idaisata. Nuniakum pegkeg aina nunú, kajintsá anentaimta dushakam, aneenit, nuigtú shiig agkan pujamua duke egaktá, tikich Jisukristu emematin aidau pegkegchau takatan idaisau aina nujai ijunja pujakum.

<sup>23</sup>Chicham imanchau amina yaimpamainchau aina duka pampantú pujuipa. Amek shiig dekame, nunú tudaibauk jiyanitnum ejekagtina duka. <sup>24</sup>Apu Jisusa inake aidauk jiyانيتan yujagmaisui. Dekas ashí tikich aidaujaish pegkegnum iwainmamainak, shiig jintinkagtuinak, waamak kajecheu amainai. <sup>25</sup>Chicham pegkeja nuna antutan dakituidaush kakagchauch anentaiyai jintinmainaitji, Apajuí anentai yapagtuam dekaskea nuna dekaatnume tau asá. <sup>26</sup>Nuninak ditashkam iwanch ni wakegamu takamtikku achiká emetkam batsata nunash dekawag iwanchnak ukuktinme tusa.

#### Tsawan nagkanbaunum atin etsekkamu

**3** <sup>1</sup>Timoteo jushakam dekamainaitme: Tsawan nagkankattak wajataik kuashat utugchat atinai. <sup>2</sup>Aents aidauk imá niinunak anentaimtin, kuichkinak anentaimtin, emebau, imá nigki eme anentaimtubau, Apajuinash pegkegchaun chichajin, uchi aidaush apají chichamenash antugchau, see tukagtu-chu, Apajuinash anentaimtuchu agtinai. <sup>3</sup>Anejattsash diijatchau, wait anenkagtu-chu, chichaman tsanumin, pegkegchau wakegamujinak wekaetin, yajau, ashí pegkeg aidaun shiwagbau; <sup>4</sup>ni patayinak unupiag sujin, pegkegchau takatnum setakchau wajakin, nigki eme anenmamin, Apajuin egatsuk ditá wakegamun yujajiagtinai. <sup>5</sup>Apajuí umigna iman iwainmabiagtinai, tujash dita takaamujig dekas Apajuí nemagnush wajuku amainaita nujai betekak achagtinai.

Aents nunin aidaujaig ijunjaipa. <sup>6</sup>Wagki, nunú aents nunin aidauk jeganum wayawag, nuwa shiig anentaimkachu tudau takau aidau, niina

iyashí wakegamunash kakajus depetmainchau aina nuna tsanú yujajin ainawai. <sup>7</sup>Nunú nuwa aidauk tuke wakegainawai yamagman unuimagtatus, tujash tuke jegainatsui dekaskea nu dekata nuwig. <sup>8</sup>Iwishin Janes Jambres-jai tsanumainak Moisesan utugchatan aputusu aina nunisag, nunú aents aidaush dekaskea nuna dakituinak, utugchatan apujtuinawai tsanumainak. Dítak imá pegkegchauwa nunak anentaimtuidau asag, Jisukristui kajinas anentaimainachu asagmatai, Apajuí ditanak idaisajui. <sup>9</sup>Tujash nunak emachagtinai, wagki ashí aents aidauk dita anentainkachu yujas nuní yujainamunak dekajuamu asag, jimag iwishin dita tsanumsá takaamujin emachajua nujai betek juwakagtinai.

#### Pablo Timoteon inagnaku ujakbau

<sup>10</sup>Amek shiig dekame mina jintinkag-tutaijua nu, mina pujutjushkam, wi takastasan anentaimtutaijua nu, utugchat aidau katsunjá nagkaetaijua nunú aidaush, nuigtú Jisukristui kajintsá anentaibaujush, mina anejattaijua dushakam. Nuniau asam amesh nunismek pujame. <sup>11</sup>Nuigtushkam amek dekame, mina waitkajuinakui wajupa waittsajia yaakat Antioquia, Iconio, Listra aina nui pujusan; tujash ashí nunú aidaunmag Apu Jisus ayamjtkauwai. <sup>12</sup>Juka shiig dekainaji, ashí aents Kristu Jisusan nemagkag, imá niinak umiujinak pujustatus wakejuidak, waitkam agtinai. <sup>13</sup>Tujash aents pegkegchau, nuigtú tsanumin aina duka, dita pegkegchau takaamujinakinuní nagkaemas pegkegchaun takaagtinai, tsanubiagtinai ditashkam tsanuam yujasag.

<sup>14</sup>Timoteoh, ashí ame unuimagbauwa duka, dekaskea nu asantai dutiksamemata. Amek dekame yadauwa unuima-

juitme duka. <sup>15</sup>Amek uchuch asamek Apajuí chichamega duka dekauwaitme, nunuwai amina pegkegnum jintinjamak Kristu Jisusai kajintsá anentaimin uwemtanum etamainuk. <sup>16</sup>Apajuí chichamega duka, ashí Apajuí tabau agagbau asa atsumtaiyai, pegkeg aina nu jintinkagtuata takuish, esekagtuata tabaunmash, pegkegchau takatsuk wajuk Apajuí wakegamua nunash takamainaita nunú dekamtikata tabaunmashkam. <sup>17</sup>Nunin asantai Apajuí aentsji aidauk, Apajuí chichamega nujai unuinagbau asag, ashí pegkeg Apajuí wakegamu aina nunú takatan shiig dekau amain ainawai.

**4** <sup>1</sup>Apu Kristu Jisus ju nugka juwi inamjatatus taatna duwi, ashí aents iwaaku aidaun, tuja jakau aidaunash dita iwaaku pujusá takasbaujin diijus titinai. Nuaduí Jisukristu emtin tuja Apajuí emtinish juna tajame: <sup>2</sup>Apajuí chichamega duka mijattsuk etsegkata, ju chichaman antutan wakegainakuish, tuja dakituinakuishkam chichagkagtu-mainuk tuke umintsau atá. Aents pegkegchau takaidaush najam chichagakam esegata, dutikakum emamkesam jintinkum wakemitkakta. <sup>3</sup>Wagki tsawan jegatnai, pegkeg jintinkagtamua ju antutan dakitjagtina nu. Nuninakin egakagtinai kuashat jintinkagtin aidaun, jutii pegkegchau wakegainag nuna jintinjamati tusag. <sup>4</sup>Nunidau asag dekaskea nu antutnak pachitsuk idayinakin, duikmuun augmatbau aina nuna imá antiagtinai. <sup>5</sup>Tujash Timoteoh, amek shiig emetmamsam anentaimu asam, waitiakmesh katsunjá pujusam yamajam chichama nu etsegkata, nuniakum amina takatjumik shiig umiktá.

<sup>6</sup>Wi jakatnuk tsawantak ashí jegae; wi jakattag nuuwai Apajuí anentag anagkuamu sutayama numamtuk

wajaktinuk. <sup>7</sup>Wika mina takatjunak, aents dekapdayamunum ni depetmaktatus senchi tupikauwama numamtuk, takat takagtusta tibauwa nunak imatiksasuk umikjai, nunikan inagnak-tinum jeganjai. <sup>8</sup>Wi jujú aaja takasbau-num Apu Jisus dekas Apu pegkeja nu, tsawan jegatna duwi minak dekas waji shiig pegkeja nuna sujstatui. Tujash imá minakek sujuschattawai, ashí aents niina aneas dakaina nunashkam susatnai.

#### Chicham ujaamu

<sup>9</sup>Waamak taa waitkata. <sup>10</sup>Minak, Demas Tesalónica wegak ukugkine, ju nugkanmaya wajiin senchi wakegau asa. Crescentek Galacia nugkanum wemae, tuja Tituk Dalmacianum we. <sup>11</sup>Wijaig imá Lucasak pujawai. Minakum Marcos ayaktá, takatnum yainkati tusan atumajai. <sup>12</sup>Tiquiconak yaakat Efesonum awemajai. <sup>13</sup>Ame minakum mina jaanchjun Carpo jeen Troasnum ukukmayag nu, nuigtú papí aidaushkam imá senchi mina agataig pergaminu aina nu takugtuka.

<sup>14</sup>Alejandro jijú takauwe nu kuashat pegkegchau awajtuke; tujash mina utugtuka dutiksag Apu Jisus suwimkan susatnai. <sup>15</sup>Ameshkam aujaig kuitamamkata, nigka jutii

chichagkagtamunak senchi dakitau asamtai.

<sup>16</sup>Wi ayamjumaktasan yama nagkam-chakun apu chichaman epegkin aidaunum wegaish, makichkish yainkachagmayi, ashí ukugkiagmayi. Nunikagmataish Apajú suwimkan susati tusanuk wakegatsjai. <sup>17</sup>Tujash Apu Jisus yaintu asa senchintijumtai chicham uwemtan sukagta nuna pachisan chichagkagtimjai, ashí aents judiuchu aidaush antukagti tusan. Dutikai Apu Jisus ayamjutkame león yuwawai tusa ayamjumaina numamtuk. <sup>18</sup>Dutiksag nigki ashí pegkegchau aidaunmash ayamjutuk uwemtijugtatui, dutijua ni inantaiji nayaimpia nui jujuktatui. Nigki tuke ememattai atin atí. Aatus atí.

#### Inagnaku kumpamkagtuamu

<sup>19</sup>Prisca,<sup>a</sup> Áquila, nuigtú Onesíforo ni patayí aidaujui kumpamjutuata.

<sup>20</sup>Erastok Corinto juwakmae, untsu Trófimo jau asamtai Mileto ukukmajai.

<sup>21</sup>Yumi tepeatsaig minisam dekapstata. Eubulo, Pudente, Lino, Claudia, nuigtú ashí yatsut aidaushkam kumpamjamai-nawai.

<sup>22</sup>Apu Jisukristu aminash uyuntam-sati, Apajú wait anenkagtamujiya nu ashí atuminish ajutjamti.

---

a 4.19 “Prisca” tawa nunak tayatak tikich papinmag “Priscila” tawai.

## PABLO PAPI AGAJA TITO AWETIMU

---

### Pablo Tito kumpabau

**1** <sup>1</sup>Witjai Pabloitjai, Apajuí inakegaitjai, Jisukristu chicham etsegtugkata tusa etegka awemamuitjai. Apajuí etegjamu aina nuna ujaktí, ditash imá niinig kajinas anentaimainak dekaskea nu jintinkagtamua nunash dekaatnume, <sup>2</sup>nuninak pujut tuke atin jukitnun Apajuí waitjuchua nunú yaunchuk nagkamas anagtamauwa nunash dakastinme, <sup>3</sup>ni dutikatnuji tsawan jegau asamtai, Apajuí iina uwemti-jamna nunú yamai, ame etsegkata tusa mina awetiuwai. <sup>4</sup>Nuadú Titoh, amek wijai betek Apajuiyaig kajintsá anentaimu asam tuke mina uchijuitme, aminash iina Apají Apajuiya nunú, Apu Jisukristu uwemtikagtina nujai wait anenjamag shiig agkan anentaimsa pujutan amastí.

### Jisusa nemajuidaun diin aidaush wajuku amainaita

<sup>5</sup>Wi amina Creta ajuntaijin ukukbajam nunak, utugchat iwagmain juwakmaya nu iwajam, Jisusa nemajin aidaun diin atinush, makí makichik yaaktauch aidaunmashkam wi tibaijam dutiksamek adaijam umiktá tibaijame. <sup>6</sup>Jisusa nemajuidaun diin aidauk, nuna nunikchama tusaish augmatchatai amainai, makichik nuwentin, uchijí aidaushkam Apajuí nemajin, chichaman intimkichaju, pegkegchaunum augmat-

chatai amain ainawai. <sup>7</sup>Wagki Jisusa nemajuidaun diin aidauk, Apajuinun kuitamjin asag pegkegchauji diigsá jiyashtai amainai, ememachu, kajemtin wajaknuchu, nampetan wekaetuchu, maanitnash wakeechau, takat pegkegchau aina nujai kuichkijinatatus wakejuchu, <sup>8</sup>niina jeenish shiig aneas jukagtin, pegkeg aidau takatnak wakeyin, pegkejan anentaimkau, aents pegkeg, pegkejam, shiig kuitamamak pujú, <sup>9</sup>chicham dekaskea nunú jintintuamua nuna shiig dekau asa, tikich aidau chichaman dekaskechua nunin chichajuidaunash, dekas pegkeja nuna shiig jintinmainai.

### Waitá jintiin aidau

<sup>10</sup>Mina pataag judío aina nuwiyag kuashat antumtikmainchau ainawai, nunin asag wait chichaman chichainak aentsun tsanú yujainawai. <sup>11</sup>Nunú aents aidauk dekas itatmitkaktajum, ditak kuichkin akigkatnume tabaunum, makichik jeganum batsatunak jintiimainchau aidaun jintintak, Kristui kajintsá anentaimtuinamujin datupainawai.

<sup>12</sup>Ajuntai Cretanmayaya nuwiya makichik Apajuí etsegtin aajakua nu tiuwai: Cretanmaya aidauk tuke waitjin ainawai, kuntin ikamiajai betek, ayatak yu batsamin, daki ainawai, tusa. <sup>13</sup>Nunak dekas tiuwai. Nuadú nunú aidauk amek najam chichagkata,

ditashkam duikmuun augmattan idayinak, dekas Jisukristunak kajinas anentaimtustinme. <sup>14</sup>Mina pataag judfo aidau chicham dekaskea nu dekatan dakituinak, ditak anentaimas augmatuinak, ju umimainai tuina duka antugkaigpa.

<sup>15</sup>Aents anentaimtaji pegkeg aina duka, ashí ni takaamujishkam pegkejak ainawai. Untsu aents pegkegchau Apajuiyaish kajinas anentaimchau aina duka, pegkeg anentaimtak atsujuinawai. Nunin asag anentaimtajinish pegkegchau ainawai. <sup>16</sup>Nu chichainak Apajuinak nemagjai tuinawai, tujash dita takaamujin wainak tuina duka wainnawai. Ditak kajegkagtin, chichaman intimkiu yujasag, pegkeg aina nunash takamainchau ainayatak tu yujainawai.

#### Dekas pegkeg aina nunú pachisa jintinkagtamu

**2** <sup>1</sup>Amek dekas chicham pegkeg unuimagbaugmia duke jintinkagtuata. <sup>2</sup>Aishmag muun aidauk, wake besemtin, ajantusa diitai, shiig anentaimkau, dekas Jisusaig kajinas anentaimkau, anejatbaujinish imanuk, ashí utugchatnumash Jisusaig kajinas anentaimin amainai. <sup>3</sup>Aantsag nuwa muun aidaushkam, Apajuí aneen, chichama wekaetuchu, nampechu, pegkeg takaamujinak iwainau amainai. <sup>4</sup>Nuninak jintintuatnume nuwa muntsujut yama nemaku aidau aishi aneetan, uchijí aidau aneetan, <sup>5</sup>shiig anentaimkau atan, shiig kuitamamka pujutan, jeenia kuitamka pujutnash, nuwa pegkeg atan, aishinig sumitkau atan, Apajuí chichamen pegkegchau chichagkainum tau asá.

<sup>6</sup>Aikasmek datsauch aidaushkam, shiig anentaimkau atajum tusam chichagkata, pegkegchau wakegamua

nuna depetuk idaisatnume. <sup>7</sup>Tuja dekas ameshkam ame shiig pujamujum iwaintukta, amina waipainak ditashkam unuimajagtinme. Jintinkagtakmesh pegkeja duke puyatjusam jintinkagtuata. <sup>8</sup>Chichaakmesh pegkeg aina duke ame bakumamainchau chichatá, nuniamin kajegkagtuidaush datsajag jutiinash pegkegchaunak tujamchagatui.

<sup>9</sup>Dutiksamek inak aidaushkam: Atumí apujum inapamu ashí umigkatajum, wainka ai aimtau aigpajum, tusam chichagkata, <sup>10</sup>kasamtsuk ashí wají aidaun ajantus diistinme. Nuniagtai tikich aidaushkam Apajuí ii uwemti-jamna nuna chichamen wakejus diistinme.

#### Apajuí wait anenkagtamuji iwainakbau

<sup>11</sup>Apajuí ni jutii wait anenkagtamuji-nak iwaintugmakui. Nunú ashí aents aina nunak uwemtikatatus wakejawai. <sup>12</sup>Apajuí wait anenjamak sujamsamua nunú, pegkegchau aidauk idaisatajum, ashí pegkegchau ju nugkanmaya anentaimtutai aina duka; nuniakum dekas ju nugka juwish shiig imagnisam pegkegnum pujakum, Apajuiya duke ememattajum tusa tujamji. <sup>13</sup>Nunika pujuidau asaja, iina Apuji Jisukristu jutiin uwemtijamin, iina Apajuiji dakaku pujuinag nu wantintugmakui shiig aneastinaitji. <sup>14</sup>Nigka nigki mantamnatatus tsagakamankauwai, ashí pegkegchau aina nuanuí agkanmitkagmatatus. Dutika pegkemtijami niina aentsji etamak, ashí pegkeg aina nuwig takamtijamsata tau asa.

<sup>15</sup>Jujú jintinkagtakum tikichish wakemitkakta, pegkegchau takainakuish najam chichagkam idaimitkata, makichik aentskesh imanchau diigmasainum.

**Jisusa nemajin aidau nunimainji**

**3**<sup>1</sup>Aneemtikjata Jisusa nemajin aidauk apu inamin aina nui sumimkau atinme, nuninak dita tabaunash umigkatnume, nuigtú ashí takat pegkeg aina nunak dutikatatus wakeetinme.

<sup>2</sup>Makichik aentsnakesh pegkegchau chichagtsuk, maanitsuk batsamas dekas anejatin atinme, ashí tikich aidaujaish ditá kakagchajin iwainaktinme.

<sup>3</sup>Yaunchkek jutiishkam anentainkachu intimkiu asaja, megkaeja batsamsá, ayatak pegkegchau anentaimta nuna waitkatai, nuigtú ashí ii wakegamuk takainaku, pegkegchauk batsamtaku tikichdau pegkeg diigsá kajejuinaku, wainka kajegdayinaku pempé pempen-tunisaik kajegdayá batsamin aajakuitji.

<sup>4</sup>Tujash Apajuí iina uwemtijamna nu ashí aents aneamujin iwaintugmak

<sup>5</sup>uwemtijamjauwai, jutii pegkeg takagsashbauwaitak nigki wait anenjamu asa. Dutijama ni chichame tawa dutiksag tudaun tsagkugtamag pegkeg etamak Wakaní Pegkejin sujamsauwai. Dutikamu asaja yamajam pujut jukiú ainaji. <sup>6</sup>Jisukristu jutiiin uwemtijamak mantamdau asamtai, Wakaní Pegkejinashkam sujamsauwai, <sup>7</sup>ni wait anenjamag bakumamainchau etamkamunum, ditash pujut tuke atinun dakaina nuna jukitnume tujamu asa.

<sup>8</sup>Juka dekaske, nuniau asamtai jujú pachisam ujakta Apajuiyai kajinas anentaimaina duka pegkegnak takastinme. Jujú jintinkagtamua juka

pegkeg asa ashí aentsnak yaimainai.

<sup>9</sup>Tujash chicham imanchau aidaun, akiinka minimun pachisag kajegdayak jiyainiak, nuigtú chicham umiktajum tibaun jiyaituina duka amek jiyaitú wekayipa. Nunú aidauk wainak asag makichkish yaimpamaisui.

<sup>10</sup>Makichik aentskesh nuninun augmatuinak, makichik anentaiyaik ijunja takamainchau wajakuig chichagkata, tuja ataktú tamash antugtamchakuig jiiiktajum. <sup>11</sup>Dutikakjume dekaatajum jujú aentsuk tunamajeapita nunin asamtaimpap niina tudaujiya duke suwimak jumainnum ejentattawa tusajum.

<sup>12</sup>Artemasan, Tiquiconakesh awetittajame, dutikamtaig waamak Nicópolis taam waitkata, yumi tepeatta nunak nagkaemakti tusan nui pujuttajai.

<sup>13</sup>Ayamkagtin Zenas Apolosjai, anuí taa nagkaemainakuig, ashí dita atsumainamuk susajum awematajum waittsainum.

<sup>14</sup>Atum dutikamun tikich Apajuí nemajin aina dushakam wainkag, pegkeg aidaunak takainak tikich atsumamu yaitan unuimagtinme, nuninak tuke atsumtai atinme.

**Inagnaku kumpamkagtamua**

<sup>15</sup>Ashí wijai batsata dushakam kumpamjamainawai. Apajuiyaig kajintsá anentaibaunum yatsut anejatuidau anuí batsata dushakam kumpamjuntuatajum. Atumnash Apajuí yaimpaktinme.

Aatus atí.



# PABLO PAPÍ AGAJA FILEMÓN AWETIMU

---

## **Pablo Filemón kumpabau**

<sup>1</sup>Witjai Pabloitjai, Kristu Jisusa takaju asan achinkan pujajai. Anetaiju Filemogkah, ameshkam wi Apajuin takajag junismek takau asamin, yatsug Timoteojai pujusan kumpamjame. <sup>2</sup>Aikasruk iina umayí Apian, nuiqtú Arquipo Jisukristun takajak jutijai betek waitna nunashkam kumpamkun, amina jeemin Jisusa nemajin aidau ijunin agma nunashkam kumpamainajai. <sup>3</sup>Iina Apají Apajuiya nu, Apu Jisukristujai wait anenjamu asag, atumnash shiig agkan anentaimsa pujutan amastinme.

## **Pablo see tabau**

<sup>4</sup>Mina Apajuijun aukkunuk amina pachisan tuke see tusanké ajai. <sup>5</sup>Wagki antugkamjame, amek Apu Jisus aneakum niinig kajintsam anentaimkun, ashí Jisusa nemajuidaushkam aneam nuna. <sup>6</sup>Duwi Apajuinak aujtajame, amesh jutijai betekak Jisusai kajintsá anentaimu asamin, ashí pegkeg aidau ame dutikmainaitam nunak Kristu ame aneam duwi ni dekamti-jamati tusan. <sup>7</sup>Shiig aneakun ichichmamjai ame anejatbaun antakun. Yatsujuh, Jisusa nemajin aina dushakam aminig anentain ichichmamkaje.

## **Onésimo amina jeemin ataktú jukita tibau**

<sup>8</sup>Filemogka, wika Kristu awemamu asan, ju aaja dutikata tumainaitjame.

<sup>9</sup>Tujash amina aneau asan ayatak segajame. Wika muun wajasuitkun Kristu chichamen etseju asan achigkag-matai egkemsan, <sup>10</sup>Onésimo mina uchijua imana nuna pachisan, wait aneam ju jutikata tusan segajame. Achigkagmatai pujusan Kristu pachisan etsejai antuk niishkam sujumankabi.

<sup>11</sup>Onesimok tikich tsawan aajakua duwik ame inagtasai atsumainchau aajakuí. Tujash yamaik ameshkam, wishakam atsumtai wajasú samtai, <sup>12</sup>ataktú awagtukin awetajame mina aneetaijua nuna. Nunin samtai mina itugtumainaitam dutiksamek jeeminish jukita. <sup>13</sup>Wika junak wijai pujustí tusan emetmainaitjai. Ame mina yamajam chicham etsegbaunum yainmainaitam dutiksag yainkati tusan. <sup>14</sup>Tujash wika ame dutika yaimpakti tusam tujuttsu-minkik dutikmaitsujai, ame waketagminig dutikmainaitam nuna, wi segam dutikamua nunin ai tau asan.

<sup>15</sup>Onesimok wajumak tsawantai kanakin pujusan, ataktú wakitkin tuke niinig pujustajai tiutskaitai. <sup>16</sup>Tujash inaku waitkataig achattawai, dekas inataiya nuna nagkaesau iina yachi aneemaina iman ajutjamtatui. Nunin samtai amek Apu Jisus nemagbaunum yatsut anentsam aan nagkaemasam wakejusam diitá, wainak aents aina nunin diitsuk.

<sup>17</sup>Dutikam ameshkam wi Jisusaig kajintsan anentaimag junismek anentaimu

asam, mina itugtumainaitam dutiksamek jukita. <sup>18</sup>Amina pegkegchau takagtamsau akuish, nuniachkush diwimjamkuish mina idaitugsata. <sup>19</sup>Witjai Pabloitjai, junak wi mina uwejuí agatkun tajame: Wi akikmaktat-jai, ameshkam wi chichagkagtamunum pujut jukiu asam minashkam diwimjam nuniaminig. <sup>20</sup>Yatsujuh, amesh ii Apuji aneau asamin segajame, ju jutikakum minash Kristu nemagbaunum yatsum anentaimjuttsum anentaijuish ichichtugta.

<sup>21</sup>Junak kajintsan agatjame amek umin asamin, nuigtushkam dekjai wi segajam nu inagkeasmesh dutikattam nunak. <sup>22</sup>Wait aneamam wi kanumainchakam umigtukta.

Wi anuí minitnunak atum Apajuí aujtugjum duwi, ni awetakui minittajai atumin wainkatasan.

#### **Inagnaku kumpamkagtamui**

<sup>23</sup>Kumpamjamui Epafra niishkam Kristu Jisus nemagbaunum wijai betek achinak egketa nunú. <sup>24</sup>Dutiksag kumpamjamainawai Marcos, Aristarco, Demas, Lucas aatus mina yaintin aina nunú.

<sup>25</sup>Ii Apuji Jisukristu wait anenkagta-mujiya nunú atumí wakanminish uyuntamsagtinme.

Aatus atí.

## HEBREO AENTS AIDAU PAPI AGAJA AWETIMU

---

### Apajuí niina Uchijin awemauwai

**1** <sup>1</sup>Iina muunji yaunchuk batsamajakajua nunak, Apajuik niina etsegtin aina nui kuashta imania ujakajui. <sup>2</sup>Tujash yamaik, ju tsawan jutii batsatag ju tsawantaik niina Uchijin awetugma duwi aujtamui, ashí wájí aidauk ni najankamu asamtai ashí niinuk atí tusa idaitusua nuna. <sup>3</sup>Niyai Apajuí imanjiya nuna iwaina duka. Nigka Apajuí wajukuita niishkam imanke. Ni chichame senchigtina duwi ashí wájí aidaunak emetuk awai. Nuigtú iina tudaujinash tsagkugtamag nayaimpinum Apajuí inamtajji untsujin ekeemsauwai. <sup>4</sup>Niyai nayaimpinmaya aents aina nuna wagagkauk, nigki dekas Apu wagaaku ashí nayaimpinmaya aents aina nuna nagkaesau eme anentsá adaitaiya dushakam.

### Apajuí Uchijiya nuuwai nayaimpinmaya aents aidaun nagkaesauk

<sup>5</sup>Apajuik makichkish nayaimpinmaya aents aina nunakesh:

“Amek mina Uchijuitme, wi yamai aentsnum akiinati tima akiinaw asam”, tichauwai.

Nuigtush nayaimpinmaya aents aidaunak:

“Wi niina apají atajai, ni mina uchig atí”, tichauwai.

<sup>6</sup>Tikichnumshakam jutiksag, niina Uchijí makichkiuchia nuna pachis nugkanum awemak:

“Apajuí aentsji nayaimpinmaya aina duka ashí niinak ememattinme, tiuwai” tawai.

<sup>7</sup>Nayaimpinmaya aents aidaun pachisag:

“Apajuik niina aentsji nayaimpinmaya aidaunak tuke dasejai betekmamtin ainawai tawai, tuja mina takagtuinak tuke jii kegamujai betekmamtin weu ainawai”, tawai.

<sup>8</sup>Tujash Apajuik niina Uchijin pachisag:

“Apajuiyah, amek ajumaish pegkeg aina duke takaakum tuke inamtnaitme.

<sup>9</sup>Amek pegkeg aina nu aneakum, pegkegchau aina duka dakitjaume. Nuaduí Apajuí, amina Apajuigmea nu shiig aneemtjimsae kumpajum aina nuna nagkaesau”, tiuwai.

<sup>10</sup>Junashkam Uchijin tiuwai:

“Apuh, amek yama nagkamtinish nugka najankum nayaimpishkam najankauwaitme.

<sup>11</sup>Nunú najankamujum aina duka megkaejatnai jaanch mamujá megkagama numamtuk, tujash amek tuke pujutnaitme.

<sup>12</sup>Jaanch ninutia numamtuk awajkat-tame.

Yapajiakmeshkam jaanch yapagmamtayama numamtuk yapajiattame.

Tujash amek imanismek atinaitme, amina pujutjumshakam nagkan-kashtinai.”

<sup>13</sup>Apajuik makichkish nayaimpinmaya aents aina nunak:

“Ekeemsata mina untsujuí, nunikamin wi amina shiwajum aidaunak ashí depetuktajame, dutikan ikaunmamtai duwi ame diisminum”, tichauwai.

<sup>14</sup>Wagki, ashí nayaimpinmaya aents aina duka wakan Apajuin takajin ainawai, aents uwemjatin aina nuna yaigtí tusa ishimtai ditak ainawai.

#### Uwemat pachisa etsegkamu

**2** <sup>1</sup>Nuaduí Kristu chichame antukbauwa duka, puyatjusa shiig aneaku amainaitji, Kristu nemajut tupanjaig tuidau asaja. <sup>2</sup>Yaunchuk iina muunji aajakajua nuna, Apajuí niina aentsji nayaimpinmaya aina nui chicham umiktinun awetim susauwa duka senchigtin aajakuí. Nunin asamtai nuna umitsuk tudaun takaidauk dutiksaik suwimak suujakbauwai. <sup>3</sup>Nunin aish jutiish ¿wajuk Apajuí suwimkajish uwemtumainaita, uwemat dekas imana nu pachitsuk idaikuish? Nu uwemtan pachis dekatkawk Apu Jisus etsegkauwai. Jisus etsegbaun antukaju aina nunú jutiinashkam dekaske tusag ujakajui. <sup>4</sup>Apajuí nuna shiig dekamti-jamata tau asa, niina chichamen etsejuidaunash yaigkúí. Dutikam aents dutikmainchau aidaun iwainag takaajakajui. Dutiksag Wakaní Pegkejiya nunashkam, ni wakejamua dutiksag makí makichik jutiinak amasajui.

#### Kristu ashí apu aina nuna Apuji atinai

<sup>5</sup>Nugka yamajam atak atin pachisa chichainag nunak, Apajuik nayaimpinmaya aents aina nunú diistí tusag

idaituschauwai. <sup>6</sup>Jushakam aatus agagbauwai:

“¿Ju Aentsmaga Akiinawua jusha ya asamtaiya imatikamesh emesh anentame?”

Apajuiah ¿ya asamtaiya amesh jusha imá kuitamkatasamesh wakejame?”

<sup>7</sup>Ujumak tsawantaik nayaimpinmaya aents aina nuní imanchauch emaume, tujash ataktú imanuk emam eme anentsá diitai awajsaume.

Dutikam ame najankamu aina duka ashí nigki idaitusume.”

<sup>8</sup>Nunú ashí idaitusbau asa makichkish Kristu diyachbauk atsawai, tujash eke ashí ni diyakbau amaina nuninuk waitnsuji.

<sup>9</sup>Tujash Jisus ujumak tsawantai nayaimpinmaya aents aina nuní imanchauch emamuitak, ni waittsa jakamunum eme anentsá diitai wajasua duka wainji. Nunak Apajuí jutiin wait anenjamu asa, ashí aents aidaunum waitus jakatí tima nunikui.

<sup>10</sup>Ashí wájí ni najankamu ayaa duka niinuk ainawai. Nigka wakegawai ashí niina uchijí aidauk nayaimpinum pujustinme tusa. Nuna dutikata tau asa Apajuí Jisukristunak waittsati tiuwai, ni nunikbaunum ashí niina uchijí aidaunak pegkeg emak uwemtikata tau asa.

<sup>11</sup>Wagki ashí aents pegkeemtikamu aidauk, nuigtú pegkeemtikagtina dushakam ashí Apajuinuk ainawai. Nuaduí Jisus Apajuí Uchijiya duka, datsamatsui jutiin aidautin pachipas, “mina yatsug ainawai” tujamtanmag.

<sup>12</sup>Nuna pachis agagbaunum chichaak:

“Apawah, amina pachisan yatsug aidaun ujaktajai, dutikakun ditajai ijuntsan kantamkun ememattajame”, tawai.

<sup>13</sup>Junashkam:

“Wika imá Apajuinak anentaimtittajai”,

ataktushkam:

“Wika juwig Apajuí uchijí aidaun  
sujusua nujai pujajai”, tiuwai.

<sup>14</sup>Jutii aents ainag nuninuk Jisuscha-  
kam wajasá akiina, jutiiní mantamdau-  
wai iwanch dekas senchigtin iina  
mantamatatus wakejutpauwa nuna  
depetkatatus. <sup>15</sup>Ni jakamunum  
agkanmitkakkbauwai ashí aents iwanchin  
inake waig batsamas, jaamun ishamá  
batsatushkam. <sup>16</sup>Duka dekaske, nigka  
nayaimpinmaya aents aidaun ayamjuk-  
tatus minichui. Nigka Abraham  
Apajuiyaig kajinas anentaimajakua  
nunin aidaun ayamjuktatus miniuwai.  
<sup>17</sup>Jutii niina yachi aidautin yaimpakta  
tau asa jutiijai betek wajasuí. Nunik ni  
dekas Sumo Sacerdote wajasú asa  
Apajuin betek umijak, jutiinash wait  
anenjamas Apajuinash segatjamui, jutii  
waitmaina nuna ni waitus mantam-  
dauwa duwi, Apajuí aentsú tudaujinash  
tsagkujati tujamu asa. <sup>18</sup>Niishkam  
iwanch pegkegchau takamtiksatasa  
dekaepam asau asa, iwanch dekaepam  
waituidaunak senchigtina ibau asa  
yaigtatui.

#### Kristui Moisesan nagkaesauk

**3** <sup>1</sup>Nuaduí yatsug aidauh, ubag  
aidauwah, atum Apajuí mina  
aentsug atinme tusa etejamu aidautig-  
mek, Kristu Jisus Apajuí awemamu,  
nuigtú nigki Sumo sacerdoteya duke  
puyatjusjum anentaimtitajum. See tajai  
jutiishkam niinig kajintsá anentaimu  
asaja ni pachisa etsegtuinag duwi.  
<sup>2</sup>Nigka jutiin yaimpakta tau asa, Apajuí  
takastá tibaunak imatiksag betek  
umikuí, Moisés aents aidaun yaigtatus  
Apajuí tibaunak betek takagsauwa  
dutiksag. <sup>3</sup>Nuaduí Moisesa nagkaesau  
eme anentsá diimaina duka Jisusai, jega  
jegamkamuk eme anentsá diitsuk, aents  
jegan jegamkauwa nu eme anentaiya

nunisaik. <sup>4</sup>Ashí jega jegamkamui aina  
nunak aents jegamainawai, aantsag ashí  
wají aina dushakam Apajuí najankamu  
ainawai. <sup>5</sup>Moisesak dekaskenmag  
Apajuí aentsjin kuitamak, Apajuí jeen  
takamaina numamtuk shiig takagsau-  
wai, Apajuí inake asa. Tuja ni takasua  
duka, Apajuí atak dutikatnujin iwainta-  
mua nunin aajakuí. <sup>6</sup>Tujash Kristuk  
Apajuí Uchijiyai, nigka betek umina  
ibau asa, jutii Apajuí aentsji aidautik  
niina jeega numamtin ainag nui pujus  
yaimpaji. Jutii niiní dekaskeapi  
tiuwaitag duwi, uwemjatnapitja tusa  
wakeesa dakainag nuwi emetmamja  
pujau ainakuik, niina aentsjig ainaji.

#### Apajuí chichamen antugkachaju aina nu pachisa tibau

<sup>7</sup>Nuaduí puyatjusjum Apajuí tibauwa  
nu antugkatajum, Wakaní Pegkeji tibau  
Apajuí chichamen agagbaunum tawa ju:

“Yamai Apajuí tabau antakjumek,  
<sup>8</sup> intimjukigpajum.

Aents intimkiu aidau: ‘Wajupa  
pegkegchau takaajinig Apajuish  
kajeawa’ tusag uwegshunum  
dekapjusaju aina nunisjumek.

<sup>9</sup> Atumi muunjum aajakajua nunú  
pegkegchaunum dekapjusajui, wi  
ditan cuarenta mijadai yaigkan  
iniibaun wainainayatak.

<sup>10</sup> Nuninakui kajegkan: ‘Ditak wainak  
anentaimainawai, nunidau asag  
wi taja nu dekatnash dakituina-  
wai.’

<sup>11</sup> Nunidau asagmatai ditan senchi  
kajegkan chicham yapajimain-  
chauwai:

‘Ditak wi nugkan anagkuauwaitag  
nuwi ayamsatajum tiuwaitag  
nuwig wayaachagtatui’, tijai.”

<sup>12</sup>Yatsug aidauh, ubag aidauh  
kuitamamkatajum, atum ainajum  
anuiyatijum pegkegchau anentaimat,

Apajuyai dekaskeapi tuchata nu ajutjamsamtaí, Apajuí tuke pujuwa nunú tupanjaijum. <sup>13</sup>Duka nunitsuk kashí kashinig makí makichik pempeen-tunikjum anentai ichichtunigtajum, “Yamai”, tibauwa nu tsawan eke au asamtaí. Atum ainajum anuiya: Jutiik Apajuí intimjuinakuish shiig batsamtaí tusa anentaimaídash ainawai. Tujash duka dekaskechui. Nu aaja nuninakuik Apajuí tupanku nunimainai. <sup>14</sup>Jutiishkam Kristujai ijunsa takainautik, yama nagkamchaku niini kajiñtsá anentaimajakuitag nunisaik jaakuish jamainaitji.

<sup>15</sup>Duwik agagbauwa nui chichaak: “Yamai Apajuí tabau antakjumek, intimjukigpajum duwik wajukawajua nunisjumek”, tawai.

<sup>16</sup>¿Ya Apajuí chichaamun antukajua ainayatkush intimjukiajua ainawa? Duka ashí aents Egipto batsatun Moisés jiijá agkanmitkakua nunú nunikajui. <sup>17</sup>¿Ya aidauna Apajuish cuarenta mijadaish kajegkash pujusuita? Nunak aents tudau takasaju uwegshunum jinawajua nuna dutikawajui. <sup>18</sup>¿Ya aidauna Apajuish chicham yapajimainchauwaish, wi ayamsatajum taja nuwig wayashtatjume tiuwaita? Nunak aents chichaman intimkiajua nuna tiuwai. <sup>19</sup>Yamaik shiig dekainaji, ditak Apajuin dekaskeapi tuinachu asag, Apajuí ditan nugká anagkuaúwa nuwig wayachajui.

**4** <sup>1</sup>Nuaduí, Apajuí ayamsatnume tusa anagtamamu eke ajutjama duwi, jutiik shiig kuitamamain ainaji, atum ainajum anuiyatigmekesh waimainchaurum juwakaig tabaunum. <sup>2</sup>Jutii aidautish yamajam chicham etsegbau antukuitji, dita antukajua nunisaik. Tujash ditak antuinakush wainkaya nunin diisajui, wagki Apajuyai kajinas anentaimaidau chichaman umikajua nunikchaju asag. <sup>3</sup>Tujash jutii Apajuyai kajintsá anentaimaídautik, Apajuí

ayamsatajum tibauwa nui wayawagti-naitji. Nuna pachis Apajuí chichaak:

“Nunidau asamtaí ditan kajegkan chicham yapajimainchauwai, ditak wi ayamsatajum tiuwaitag nuwig wayaachagtatui tijai”, tiuwai.

Tujash Apajuik nugkan najanauwa duwik ni takatjinak ashimkauwai.

<sup>4</sup>Apajuí chichame agagbauwa nui, siete tsawanta nuna pachis: “Apajuik ashí ni takamainjinak ashimak siete tsawanta juwi ayamjauwai”, tawai.

<sup>5</sup>Tuja agagbaunum awaksag chichaak: “Ditak wi ayamsatajum tiuwaitag nuwig wayaachagtatui tijai”, tawai. <sup>6</sup>Tujash nunú ayamnagtina nui eke wayachush ainawai, yama nagkamchak chicham uwemta nu etsegbau antuku aidauk, intimaidau asag wayachajui. <sup>7</sup>Nunikagmatai, Apajuí ataktú makichik tsawantan mamikiae, yamagman “Yamai” tsawanta juna, yaunchuk David papiinum agak tibauwa nunak awaksag chichaak:

“Yamai Apajuí tabau antakjumek, intimjukigpajum”, tawa nuna.

<sup>8</sup>Wagki Josué Israel aents aidaun, Apajuí ayamsatnume tiuwa nui utsau ataik, Apajuik tikich tsawannak mamikiachu amainai. <sup>9</sup>Nunin asamtaí Apajuí aentsji aidautin, Apajuí ashí ni takamainjin ashimak siete tsawanta juwi ayamjauwa nunisjumek, atumesh ayamjatnaitjume tujabiúwa nunú eke dakaku pujuinaji. <sup>10</sup>Nuaduí jutii Apajuyai ayamjatasa waidautik, ii takatjinish ayamjatnaitji, Apajuí ni takas ayamjauwa nunisajaik. <sup>11</sup>Duwi kakanmamainaitji dekas ayamtainum wayatasaja. Duwik iina muunji aidau dita chicham umishtajin, Apajuí ditan nugkan anagkuaúwa nui wayachajua nunikaig tuidau asaja.

<sup>12</sup>Apajuí chichamega duka senchigtina imau asa pujut tuke atina nuna sukagta-wai, nuigtush espada mai yantamejai etsakamua nuna nagkaesauwai. Espada iyashnum shiig wayaa tikima initak tsupiyama imatiksag, Apajuí chichamega duka wakannumash, tuja iina anentaimtajin pegkeg aunash, pegkegchau aunashkam dekamtijamji. <sup>13</sup>Apajuí najanamua aina nuwiyag niina uumjumainuk makichkish atsawai. Apajuí emtinig ashí wájí aina duka shiig paan ainawai, nunin asamtai Apajuik ii takasbaujin diisá tujamtinai.

#### Jisusai Sumo Sacerdote

<sup>14</sup>Jisus Apajuí Uchijiyi nuuwai, jutii Sumo sacerdoteji dekas iman nayaimpinum wayauwa duka. Nuaduí niinií kajintsá anentaimaidautik emetmamjaja nunisaik pujumainaitji. <sup>15</sup>Wagki jutii Sumo sacerdotejiya nu, ii kakakchau wegajinish wait anenjamainai. Nigka jutiijai betek pegkegchau takamtiksata dekapeam asauwai, tujash nigka makichkish tudaunak takaschauwai. <sup>16</sup>Nuaduí Apajuí anempa duka ajantutsuk adjika ausagmi. Ni jutiinak wait anenjamag ashí ii atsumamunmash yaimpaktatui.

**5** <sup>1</sup>Ashí sumo sacerdote aidauk, aents aidau ditá tudaujin tsagkugnagtatus, kuntinun anentag itaagtai maa apeak Apajuin segattí tusa, aents aina nuwiya etegja adaikamu aajakú ainawai. <sup>2</sup>Tujash sumo sacerdotek nigkishkam pegkegchaun takamain asa, aents Apajuí umigtan shiig dekachu asag, wainak pegkegchaunum yujaidau-nash wait anentus yaigtí, <sup>3</sup>dutikakush niina tudaujiná tsagkugnagtatus kuntinun maa apeati, dutika duwi aents aidau tudaujin tsagkugnagti tusa kuntinun maa apeati tibau aajakú. <sup>4</sup>Jujú takat ajantusa diimaina junak

makichik aentskesh nigki nagkamig wi sumo sacerdote atajai tumamig takamait sui. Junak Apajuí Aarogkan etegkauwa dutiksag etegkamua aina nu takamain ainawai.

<sup>5</sup>Nunisag Kristushkam nigki wi sumo sacerdote atajai tusag naamkachui. Apajuí nu takata nunak dutikati tiu asa:

“Amek mina Uchijuitme, wi yamai Aentsmaga Akiinati tima akiinau asam”, tiuwai.

<sup>6</sup>Nuigtushkam tikich agagbaunmashkam tawai:

“Ametme sacerdote dekas tuke atinmek, Melquisedec aajakua nujai betek”

<sup>7</sup>Kristu ju nugka juwi pujusua nuaduik, shiig senchi unsumak buutak negá negajai Apajuin segauwai. Ni jamaina nunak Apajuí senchigtina ibau asa agkanmitkajuati tusa. Nunitai Apajuik ni umigbau asa ayatak antugkauwai. <sup>8</sup>Kristuk Apajuí Uchijiyaitak, waitiamunum Apajuí wakegamu umigtanak unuimajui. <sup>9</sup>Ni juna imajtikas umikú asa, ashí aents Apajuin umijuina nuna uwemtikin wajasuí, nuniku asa pujut tuke atina nuna suwawai. <sup>10</sup>Tuja Apajuí niinak sumo sacerdote atí tusa adaikauwai, Melquisedec aajakua nujai betek.

#### Kristu nemajut idaisaijum tusa ujaniamu

<sup>11</sup>Jujú pachisa tumainuk kuashat ajutjamji, tujash juní tawai tusaik shiig tumaitsui, atumek waamak antumainchau asagmin. <sup>12</sup>Atumek Kristu nemagkajum dukap tsawan pujau asajum, jintinkagtin amainaitkujum, ataktú awagkijum Apajuinun shiig jintias dekas yupichuchin jintinjamatnume tusa atsumagme. Nuniau asajum uchi yamá akiintsau yutai katsugman yumainchau asa, muntsunak muntsu-

wama nunin ainajum duwi, pegkeg nuigtú pegkegchauwa dushakam akanjá dekamainchau dekapeagme. <sup>13</sup>Ashí uchi muntsun muntsuaku aina duka, chicham pegkeg aidaunak jintiag chichaakuk amaitsui, wagki uchi asa. <sup>14</sup>Tujash pegkeg takaamua nuna, pegkegchau takaamua nujai akanag dekatan unuimatjau aina nuuwai, muun yutai katsugman yuwina numamtin aidauk.

**6** <sup>1</sup>Nuaduí nagkamchaku Kristu pachisa jintiamu aajakua duka ukuaku, nuní nagkaemasa dekamain ainaji. Nunidau asaja pujut yapajita nu pachisa, tudau takaamu Apajuijai tuke kanatnum ejekagta nu idayat, Apajuiyai kajinmamsa anentaimta nu ataktú awagki dekaatasaik batsamtumaitsui. <sup>2</sup>Yamimat pachisa jintinkagtam, Jisusa nemajuidau buuknum achiká Apajuí segatut, jakau aidau nantajagtin, nuigtú Apajuí ii takasbaujin diisá tujamtina nu pachisa dekaatasaishkam batsamtumait-sui. <sup>3</sup>Ju pachisaishkam jintintuattajime Apajuish dutikati tujamkuig.

<sup>4</sup>Wagki aents aidau Apajuí ni chichamen dekaskea nuna anenjauch sukagtusbauwa nuna, nuigtú Wakaní Pegkejinash tikich aidaujai betek jukiú aidau, <sup>5</sup>nuigtushkam Apajuí chichame shiig pegkeja nunash wakejus antuku, tuja Apajuí niina senchijiin ju nugka juwi inamjatna nunash shiig dekauwaitak, <sup>6</sup>Apajuí dekaskeapi tutan idayas, ataktú ni pegkegchau takaajakbaujinak waketjuki takaak, Kristu shiwagmaina duka, kakajus ataktú pujutinak yapajimait-sui. Wagki dita nuna nuninak, dita dekas Apajuí Uchijin achijagmatai, tikich aidau Kristun dushikis chichagmaina numamtuk wajaidau asagmatai. <sup>7</sup>Aents ajak ajakmamujiya nuna yumi yutak nugkan uchupjamtai ajak tsapai pegkejan

nejekmatai, nuna ajakú juwaama numamtuk, aents chichaman antukua nu dutiksag pegkejan takagtaik Apajuishkam yaimainai. <sup>8</sup>Untsu aents aidau Kristu nemagtan idaisag jagki tsapaina numamtuk wajaidauunak, jagki jiiinum apetiama numamtuk Apajuí suwimkan susatnai.

<sup>9</sup>Tujash aneetaig yatsug aidauh, ubag aidauwah, atumek aents megkaemainai taji nuninuk ainatsjume. Wika atumnak shiig dekagjime, dekas pegkeg atum uwemjamujum ajutjamaina nunak.

<sup>10</sup>Apajuik pegkeja nunak takauwa ibau asa, atum ni aneau asajum tikich yaigkuitjum nunak, nuigtú yamaikish yaimainajum nunak kajimatkishtinai.

<sup>11</sup>Nuaduí atum wakesajum takaajum nunak, dutiksag ematnume tusa wakegaji. Nuniku asajum atum dakainajum duka imatiksagmek jukitin ainagme. <sup>12</sup>Duwi daki batsamtutsuk, Kristui kajinas anentaimaidau emamkemas pujuinak, Apajuí anagkaguamua nuna jukitin aina nunisjumek pujustajum.

#### Apajuik ni anagkaguamujinak yapajichui

<sup>13</sup>Apajuí Abrugkan anagkuauwa nunak, niina nagkaesau adaisa tumain atsau asantai, Apajuí nigki adaimamas, chichajak: <sup>14</sup>“Dekaskenum kuashat yaigtatjame, dutikakun ame wegantu aidaunak shiig kuashat uyujkatnaitjai”, tiuwai. <sup>15</sup>Tima Abrugkak emamkemas dakasu asa, Apajuí niina anagkuauwa nunak imatiksag jukiuwai. <sup>16</sup>Aents ni dutikatnuijin anagdayinakug, ditá nagkaesauwa nuna adaisag anagdayin ainawai. Nunú iman antamunum tiu asag dekaskenmap dutikattawa tusag ukú ainawai. <sup>17</sup>Nuaduí Apajuí anagkaguamujin jukitin aina nuna shiig iwaintuktatus wakekauwai, ni anagkag-



tamua nunak makichkish yapajitsuk imatiksag umiktin asa, nigki adaimamas dekas umiktatjai tiuwa nuna. <sup>18</sup>Ni anagkagtak nigki adaimamas tiuwa nujaiyai jimag chicham yapajimainchauwai tiuwa nu. Nuaduí Apajuik waitjuchua ibau asamtai dekas dutikat-tawapi tau asaja, shiig senchi ichichmainajai Apajuí ayamjutpasmatai kajinmasa ni anagkagtuamua nu jukittajapi tusa dakaidau asaja. <sup>19</sup>Nunú dakamua nuuwai ii Apajuiyai kajinmasa anentaibaunum iina wakanin ichichtamuk, jiju ancla tutai lanchan buchitmainchau ema ebetama numamtuk. Nu kajinmasa anentaibauwa nunak Jisukristu sujamui, nigki Apajuí pujamunum wayauwa dushakam. <sup>20</sup>Jisus eemak wayauwa nunak, jutii wayatnun jintan ujatjamtatus nunikui. Nuniau asa niiyai sumo sacerdote take atin Melquisedecjai betekak.

**Jisusak sacerdote  
Melquisedecjai betekai**

**7** <sup>1</sup>Melquisedecak yaakat Salemmunia apu, Apajuí nayaimpinmayaya nuna sacerdotaji aajakuí. Nuniau asa Abraham apu aidaujai maania depetmak wakettatman, Melquisedec jiintuki igkug pegkegnum yumigsauwai. <sup>2</sup>Dutikam Abragshakam maania depetmak waketak, ashí ni waji yajuakbaujinian diezmon susauwai. Melquisedec tawa nunak: “Apu pegkejan takau” taku tawai, nuigtú yaakat Salema Apuji aajakuí tawa nunashkam: “Shiig agkan anentaimsa pujatna apuji” taku tawai. <sup>3</sup>Melquisedeca apajig, dukujish, ni wegambaujish, akiinamujish, jakamujishkam dekajuachbauwai, duka Apajuí Uchijí take sacerdotek pujutna numamtinuk aajakuí.

<sup>4</sup>Anentaimusjum diistajum, Melquisedecak Abragkan nagkaesau aajakuí. Iman asamtai Abragkak apu aidaujai

maania depetmaka, waji yajuakbaujin diezmo susauwai. <sup>5</sup>Moisés chicham umiktajum tibauwa nuwig, sacerdote Leví wegantu aidaunak ditá patayí aina nunú diezmo susati tibau aajakuí, ditashkam Abraham wegantu ainayatak. <sup>6</sup>Tujash Melquisedecak Leví wegantuchuitak, Abraham Apajuí anagkuamun jukiuwa nunú, diezmo suwamash jukiuwai. Dutikam Melquisedecshakam pegkegnum yumigsauwai. <sup>7</sup>Juka ashí dekanaji, pegkegnum yumigkagtina duka, pegkegnum yumigsamua nuna nagkaesauwai. <sup>8</sup>Yamai jutii diezmo suwinag duka aents jinin aina nu suwinaji. Tujash Apajuí chichamen agagbauwa nuwig, Melquisedec eke iwaaku pujauwa nuninun etsegtawai. <sup>9</sup>Nunin asamtai Abraham Melquisedecan diezmon susauwa duwi, sacerdote, Leví wegantu aidaushkam diezmon ditashkam susajua nuninai. <sup>10</sup>Melquisedec Abragkan igkugtatus jiintukiwa nuaduik Leví wegantu eke akiinachu ainayatkush, Abragkai akiinkagtin asag, ditashkam nuwig batsatua nunin aajakajui.

**Aarón wegantu takasbauwa duka  
pegkejak etamchauwai**

<sup>11</sup>Moisés Israel aents aidau chicham umiktinun agatjauwai dutika susauwai Leví wegantu sacerdote aina nuna, aents aidau chicham umitnum yaigtinme tusa. Tuja nunú sacerdote aidauk Apajuí emtin aents aidauk pegkeja imanuk iwainamainchau aajakajui. Nuaduí atumnajui tikich sacerdote Melquisedec aajakua ibauk, Aarón wegantua nuwiychu. <sup>12</sup>Wagki sacerdote takataijiya duka yapajiamu asamtai, chicham umiktinnum sacerdote aidauk nuní takastinme tibauwa dushakam yapajinauwai. <sup>13</sup>Tuja agagbaunum iina Apuji Jisukristun pachis tawa duka, tikich Israela uchijí

aajakajua nuwiya aajakuí. Tuja nuwiya sacerdote atí tusaik makichkish tichamui. <sup>14</sup>Shiig dekanui, iina Apuji Jisusak Judá wegantunmaya aajakuí, Moisesak sacerdote aidau takastinjín tiuwa nunak Judá wegantunmaya takamainnak makichkish tichauwai.

<sup>15</sup>Ju dekas imá paan dekamainai, yamajam sacerdote Melquisedecjai betek wantinkau asantai. <sup>16</sup>Chicham umiktinum Leví wegantu aina duke takastin atinme tibauwa nuwiyachui, nigka Sacerdote senchigtin pujut tuke aunum pujuwa nuwiyayai. <sup>17</sup>Niina pachis Apajuí:

“Ametme Sacerdote tuke pujutnemek, sacerdote Melquisedecjai betek”, tiuwai.

<sup>18</sup>Nuaduí yaunchuk chicham umiktin aajakua duka nagkankauwai, aents aidaunak yaimainchau asa. <sup>19</sup>Moisés chicham umiktajum tibauwa duka makichik aentsnakesh pegkejak emachui, nunin asantai Apajuí dekas tikich imá pegkejan amastí tusa dakaidau asaja Apajuiyaig jegainaji.

**Kristu dutikamua nuwai tikich  
sacerdote takasajua nuna  
nagkaesauk**

<sup>20</sup>Apajuik ni dutikatjai tibauwa nunak chicham yapajimainchauwai tiuwai. Tikich sacerdote aidauk imatika chichagkaik adaikashbau ainawai. <sup>21</sup>Tujash Kristuk chicham yapajimainchauwai chichagká tibauwa nunú agagbaunum tawai:

“Apu Apajuí nigki adaimas, mina chichamjunak yapajiashtatjai, ametme Sacerdote tuke atinmek”, tiuwai.

<sup>22</sup>Dutikamu asa Jisus dekas imá pegkeg dutikamua duka yaunchuk chicham apakbau aajakua nuna nagkaesauwai. <sup>23</sup>Sacerdote aidauk kuashat

aajakajui tuke pujuchu asag. <sup>24</sup>Tujash Jisusak tuke jakashtin asa, tikichnakesh ni takaa nunak inagkeatkishtinai.

<sup>25</sup>Nuaduí niyai tuke atinun uwemtikag-tumainuk, jutii niini yunumka Apajuiyaish jegajinig. Nigka tuke pujuwa ibau asa Apajuin segatjamui.

<sup>26</sup>Nunin asa dekas Sumo Sacerdote ii atsumajakuitag duka Jisusai. Nigka pegkegmai, pegkegchaunash antiakchau, tudaugtin aidajuaish ijutkachui, iman asantai Apajuí niinak dekas nayaimpia nuna yakiin iwakuí.

<sup>27</sup>Nigka tikich sacerdote aidau kashí kashinig kuntinun maa apeak, dekatkauk niina tudaujiná tsagkugnag, duwi tikich aents aidau tsagkugnagtinjin apejakua nuninchauwai. Jisusak makichkia mantamdauwai ajumaish tuke jakashtinun, nigki tsagkamankauwai. <sup>28</sup>Moisés chicham umiktinun agajua nuwiyán diisag sumo sacerdote atinun adayajakajua duka, aents pegkegmachu aajakajui. Chicham umiktina nu nagkaemakiu ai, Apajuí chicham yapajimainchauwai, niina Uchijin Sumo Sacerdote atí, tusa adaikamua nuwai dekas tuke pegkejak atinuk.

**Iina Sacerdoteji Kristu  
nayaimpinum pujawai**

**8** <sup>1</sup>Wi dekas imanun titasan tajim duka juuwai: Jutii Sumo sacerdotejig, Jisus nayaimpinun Apajuí inamtajin untsujin eketa nuwai. <sup>2</sup>Awi nigka pujus sacerdotejai betek takaawai.

Tujash nigka aents jegamkamunum wayaag takaatsui, Apajuiya nu umikbaunum wayaa takaawai. <sup>3</sup>Ashí sumo sacerdote aajakajua duka, Apajuinu anentag itaamun maa apeati tusa adaikamu ainawai. Nunisag Jisuschakam jutiiin tudaujin mantamnak niina iyashinak Apajuin anentag

susauwai. <sup>4</sup>Nigka ju nugka juwi pujakush sacerdotek amaitsui, juwig kuashat sacerdote ayau asantai. Nunin asag Moisés Apajuí anentag susatajum tibauiwa dutiksag takaidau asagmatai. <sup>5</sup>Tujash juwiya sacerdote aina duka, nayaimpinmaya waji aina nunú ayatak dakumká najanamunum wayaawag takainawai. Dakumkamu ainawai taji, wagki Apajuí Moisesan chichajak: “Ame mujanam pujamin jega Apajuí ememattain iwaintukbaijam nuna niimejai betekuch najanata”, tiuwai duwi. <sup>6</sup>Untsú jutii Sumo sacerdoteyi duka, juwiya sacerdote aidaun nagkaesau dekas pegkejan takasuí. Nunin asa ni chichaman apakua duwi, Apajuí jutii jukitnunak dekas pegkeja nuna anagtamui.

<sup>7</sup>Nagkamchaku chicham apakbauwa nu pegkeg aajakú ataik, ataktú chicham apakmí tabauk atsusú amainai.

<sup>8</sup>Tujash Apajuik nunú aents aidaunak pegkejak diischauwai, nuniku asa chichajak: “Apu tawai: Tsawan jegatnai, Judea nugkanum, nuigtú Israel nugkanum batsataina nujai ataktú chichaman apaktinaitag nunú.

<sup>9</sup>Duka wi ditá muunji aidaun Egipto batsatun jiijan, ditajai chichaman apakuitag nuna umikchagmatai idaisauwaitag nuninuk achattawai”, tawai Apu Apajuí.

<sup>10</sup>“Nunú nunikaju asantai, yamaik juuwai yamajam chicham wi Israel aents aidaun taja nunú: Wi atumin chicham umiktajum tiuwaitjim nuna shiig dekamtikatnaitjim nunú tsawan jegatnai. Wi mina chichamjunak shiig machikish kajimatkishtinun aneemtijatjime.

Atum imá minak shiig anentaimtujuinakjuminig, wishakam atumnak shiig kuitamkattajime.

<sup>11</sup>Dutikamu asajum atum ijutkamukesh, yatsumkesh Apajuí dekaati tusagmek jintintuashtin ainagme.

Wagki ashí piipich, ashí muun aidaun nagkamas shiig dekajua-wagtin ainawai.

<sup>12</sup>Wika ditá pegkegchajunik tsagkujan, tudauji aidaunash ajumaissh adeagchatnun kajimatkitnaitjai”, tawai.

<sup>13</sup>Apajuí yamajam chicham apakbau pachis tawa nunak, nagkamku chicham apakbauwa duka muuntuch wajasú asantai tawai, muuntuch wajasú asantai atumnatsu duka megkaekatin asa nuniawai.

**Jega Apajuí ememattai  
nugkanmaya nayaimpinmayajai  
pachisa tibau**

**9** <sup>1</sup>Yamai dekaami, nagkamku chicham apakbau aajakua nuwig, ju nugka jui jega Apajuí ememattai jegamkamua nuwish, Apajuish wajuk emematmainaita nu pachisa tibau aajakuí. <sup>2</sup>Nunú jegak juní umikbau aajakuí: Dekatkau tesamua nunak “Pegkejam” tujakajui, nuanuig candelero<sup>a</sup> jii ekemaja pekatai aajakuí, nuigtú pag Apajuí anagkuamu mesanum patagbau aajakuí. <sup>3</sup>Jaanch ejaamua nuna ukujin tesamu aajakua nunak, “Shiig Pegkejam” tujakajui. <sup>4</sup>Nuanuig altar ayatak orok najanamu kugkuin incienso patai apetai aajakuí, nuigtú kajun arca tutai ayatak orok epekbau aajakuí. Nunú arcaya nuna inikten egkemajakuí Aarogka ushujutaiji jeekú aajakua nu, chicham umiktin kayanum agagbauwa dushakam, nuigtú makichik

**a 9.2** “Candelero” tachakuish “Candelabro” tumainai. Nunak jii ekemaja pekatain tawai.

ichinka nunin ayatak orok najanamunum maná chimpiamu aajakua dushakam. <sup>5</sup>Nunú kajuna nuna awanken jimag aents nayaimpinmaya nanapting dakumkamu, Apajuí nui pujamujiya nuna iwainajakajui. Nunú aidauk ditá nanapen kajun arca tutaiya nuna dukukag aajakajui. Tujash juna pachisnuk imatikanuk shiijak tichattajai.

<sup>6</sup>Ashí ju imatika umikbaunum sacerdoté aidauk, kashí kashinig deatkau tesamu Pegkejam tutainum wajajakajui, dita takastí tibuwa nuna umiktatus. <sup>7</sup>Tujash nuna ukujin tesamu Shiig Pegkejam tutaiya nuwig, imá sumo sacerdotek makichik mijantin makichkia wajakuí, kuntinun numpen takus. Nunik nunú numpa nuna Apajuin anagkuak, deatkauk niina tudaujin tsagkugnagtatus segatmami, duwi tikich aentsú tudaujinash segatujakuí. <sup>8</sup>Nuna Wakaní Pegkeji shiig dekamtijamui. Deatkau tesamunum sacerdoté takainagkish, tikich ukunum tesamu Shiig Pegkejam tujakbauwa nuwig, tikich aents wayati tusaik tichamu aajakuí. <sup>9</sup>Ashí nuna dutikajakajua nunak, yamai tsawanta juwi nuniktinun iwainak dutikawajui. Nuniau asag nunú jeganum batsamsag, kuntin Apajuí anentag anagkuamun maa apeenak Apajuin emematuinakush, dita bakumamainjinig tuke agkanmagak agkanmagauwa nuninuk anentaimajakhajui. <sup>10</sup>Nu jeganum batsamas chicham umiktajum tibaun umiinak, ayatak yutai aidau, umutai aina nuna, Apajuí ememattasag yumin ikigmajakajua nejai takasajui. Ashí nunú aidauk Apajuí eke yapajiachu asantai dutikajakajui.

**Jisukristu waitus mantamnamua  
nuuwai jutiin bakumamainchau  
etamuk**

<sup>11</sup>Tujash Kristu juwi tauwa nuuwai yamaik Sumo Sacerdoté, pegke aidau

tuke atinun sukagtinuk. Ni sacerdotėjai betekak jega Pegkegmanum wayaa takaa nuuwai dekas imá pegkejak. Duka aents aidau jegamkachbauwai, nunin asa ju nugka juwiyachui. <sup>12</sup>Kristuk jega tesamu Shiig Pegkejam nayaimpia nui wayauwai. Nigka chivo aidau, toro tsakat aina nuna numpen jukig wayaachui. Nigka aentsú tudauji tsagkugnagti tabaunum mantamdauwa duwi, niina numpen juki, Apajuí pujamunum makichkia wayauwai tuke atinun, nuniak jutiinash tudaunum bakumamaina nuna agkanmitkagbauwai. <sup>13</sup>Duwikik toro aidau, chivo aidau numpen jukiag, nuigtú baka tsakat apeamu yukujinashkam jukiag, aents pegkegchau waigkú aidau yukujakú ainawai, Apajuí ememattasa uminbaunmag pegkeg atinme tusag. <sup>14</sup>Tujash Kristu achinag mantamdauwa duwi, jutiinak Apajuí eminish bakumamainchau etabiuwai. Nigka makichkish pegkegchaujig atsugmaitak, Wakaní Pegkeji tuke pujuwa nunú yayasam, nigki tsagakamankauwai mantamnatatus, ni jaak numpeen ukajua duwi aents aidau tudaujish tsagkugnagtinme, dutikamu asag Apajuí tuke pujuwa nuna ememattinme tusa.

**Kristu yamajam chichaman apakuí**

<sup>15</sup>Nunin asa niyai yamajam chichaman apakuk, ni mantamnak aents yaunchuk chicham apakbaunum batsamas tunamaku aidau nash agkanmitkak, Apajuí tuke atinun anagkagtauwa nunash jukitneme tujabiuwai. <sup>16</sup>Aents jaakug niina wajiinjak, nu aents jukiti tusa papiinun agag shiig umiká ukú ainawai. Tujash aents nuna agajua nu eke iwaaku pujaigkik juchau ainawai. <sup>17</sup>Aaja chicham umikbau aig, nuna umikú iwaaku pujaigkik nu chichama duka

wainkayai. Untsu papiinum agag umikua nu jakamtai, nu aents jukitin atí tibaujiya duka uminnai. <sup>18</sup>Nunisag Apajú yamá nagkamchak chichaman Moisesjai apakua dusha, numpajaichuk dutikachbau aajakuí. <sup>19</sup>Dutika chicham umiktina nuna ashí aents aidaun Moisés ujaká, nuaduí toro tsakat maamu aidau numpeen, chivo numpe aidaun yumijai pachimag, uwijá uje kapantu emamun jukiag numi hisopo tutai kanawen jigkawag, nump anum uchupig, chicham umiktin agagbaun pegashmatug uchupik, aents aidaunashkam dutiksag dutikauwai. <sup>20</sup>Dutika chichajak: “Jujuwai numpa atumjai chicham apamunum jutikag nu”, tiuwai. <sup>21</sup>Nuigtushkam Apajú ememattai duwap apajá jegamajakbaunum, dekatkau tesaamu Pegkejam tutaiya nui takatai aidaunash numpan pegashmatujakuí. <sup>22</sup>Chicham umikbauwa nuwig: Numpajai dutika pegashmatjamu aina nuuwai Apajuinu atí tusa dutikamu aidauk tawai. Numpajaichuk tudau tsagkugnamainuk atsawai tibau aajakuí.

**Kristu mantamnamua duwi  
tsagkugnamuk awai**

<sup>23</sup>Nayaimpinmaya wájí aidau diisá dutiksaik dakumká<sup>b</sup> najanamu aajakua duka, Apajuinu atí tusa dutikamui. Untsu nayaimpinmaya wájí aina duka, kuntu numpen dutikajakbauwa nuna nagkaesau dekas pegkejan atsumawai. <sup>24</sup>Krustuk juga tesaamu Shiig Pegkejam tabaun aents umikajua nuwig wayachui, duka nayaim awa nu dakumká najanamu aajakuí. Nigka dekas nayaimpinum wayauwai. Yamaik awi Apajuijai pujus, jutiin Apajuin aultugmají yaimpakti tusa. <sup>25</sup>Mija mijantin sumo sacerdotek juga tesamu Shiig Pegkejam

tutainum wayakug, kuntu numpen ditá numpechun takusag wajíakú ainawai. Tujash Kristuk kuashta imaniag mantamnachui, aents aidau tudauji Apajú emtin tsagkujamu agtinme tusag. <sup>26</sup>Nunin achataik niishkam yama nagkamchaku nugka najandauwa duwi nagkamnas, yamaishkam tuke mantamná pujumainai, tujash yamaik tsawan nagkanbau jegau asamtai Jisusak tauwai. Nunik tudaun depetkatatus ajumaish jakashtinun makichkia mantamdauwai. <sup>27</sup>Tuja nunisag aents aidaushkam makichkia jakatin ainawai, nunikmatai Apajú ii takasbaujin diisá tujamtina nu atinai. <sup>28</sup>Nunisag Kristushkam kuasht aents aidau tudaujin utsankatatus makichkia jakauwai, tuja ataktú minitta duwik tudaunak pachikchattawai, niina dakak batsatun uwentikatatus minau asa.

**Yaunchuk chicham umiktin  
aajakua duka aentsnak  
yaigchawai**

**10** <sup>1</sup>Moisés chicham umiktinun agajua nunak dekas nayaimpinum atina nuna iwainak dutikauwai. Nuaduí chicham umiktina nuna umiinak, mija mijantin kuntuinun maawag apejakú aina duka, makichkish aentsnak pegkejak emachui. <sup>2</sup>Chicham umiktina nu umiamunum, tudau tsagkugnajag Apajú emtin bakumainchau dekapenakug, kuntu mautnak idaisau amain aajakajui. <sup>3</sup>Tujash nunú kuntuin maamua duka ayatak, ashí mijantin ditá tudaujinak anemtikajakuí. <sup>4</sup>Wagki toro numpe, chivo numpe aina nujaig aentsuk tudaujinig tsagkugnamainchau asamtai. <sup>5</sup>Nuaduí Kristu nugká tatsuk Apajuin tiuwai:

“Kuntin maa apeamu, tuja anentag itamush dakitame.

Nuniau asam minak aentsú iyashijai betek etiume, aents aidau tudaujin mantamnak agkanmitkati tusam.

<sup>6</sup> Kuntin maa apeamu, nuigtú tudau tsagkugnagtasa anentag itaamu aidaushkam dakitame.

<sup>7</sup> Nuniau asamin wi amina chichagkun:

‘Apajuiyah, mina pachitus papiinum agajajua nuna, ame wakegam dutiksanuk umiktasan juwi pujajai’, tibajame.”

<sup>8</sup> Nuna nagkamas takug: “Apajuik kuntin maamu, anentag itaamu, tudau tsagkugnagtasa kuntin maa apeamu aina nunak dakitawai, shiig awagmatsui tawai. Chicham umiktina nui dutikatajum tibauwa nunin aigkish.” <sup>9</sup> Ataktú takushkam: “Wi ame wakegam nuna umiktasan minajai” tiuwai. Nunak yaunchuk kuntin maajakbauwa duka emegkakum, yamagmauchia nu apusata taku tiuwai. <sup>10</sup> Jisukristuk Apajuí wakegamunak imatiksag umiju asa, jutii tudaujin makichkia mantamdauwai ajumaish jakashtinun.

<sup>11</sup> Ashí sacerdote aidauk kuntin maa apeamua nunak kashí kashinig takajakú ainawai, tudaunash makichkish utsanjamainchau aig. <sup>12</sup> Tujash Jisukristuk ataktú mantamnashtinun makichkia mantamdauwai tudau aidauunum, nunik Apajuí inamtaijin utsujin ekeemsauwai. <sup>13</sup> Nui yamaik pujawai, “ni shiwaji aidaunak ashí Apajuí depekuk ikaunmakti” tusa dakak. <sup>14</sup> Nuna niina iyashin anentag Apajuin susauwa duwi, tuke atinun pegkemtijabiuiwai, Apajuinu atinme tusa.

<sup>15</sup> Dutiksag Wakani Pegkejiya dushakam shiig dekamtijamji:

<sup>16</sup> “Apu Apajuí yamagman anagkagtak: Wi atumin chicham umiktajum

tiuwaitjim nuna shiig dekamtikatnaitjim nunú tsawan jegatnai.

Wi mina chichamjunak shiig machikish kajimatkishtinun aneemtijat-tajime.

<sup>17</sup> Ditá tudauji aidaunash ajumaish adeagchatnun kajimatkitnaitjai, tawai.”

<sup>18</sup> Aatus asamtai tudau tsagkujamu aidautik, Apajuí tsagkugtugi tusa kuntin mautak atsumnatsui.

### Apajuiyai jegamainaitji

<sup>19</sup> Nunin asamtai mina yatsug aidauh, ubag aidauh, Jisukristu mantamna numpeen ukajua duwi, jega tesamu Shiig Pegkejam tutainum sacerdote wajakajua nunisaik, Apajuí pujamunum waimainuk shiig agkan ajutjamsae.

<sup>20</sup> Yatsug aidauh, jutii Apajuiyai agkan chichamain atsugtamajakua nunak, Kristu jaak numpeen ukajua duwi, Apajuí pujamunum shiig agkan waimainuk ajutjamsauwai. <sup>21</sup> Jisusai jutii Sacerdoteji dekas senchigtin Apajuí jeen puja duka. <sup>22</sup> Nuaduí Apajuik dekaske-num kajintsá anentaimtusa jegaantagmi. Wagki jutii: Mina tudaujuimpap suwimkan jukitnaitja, tusa anentaimaina nunak agkanmitkagma, iina iyashinash yumi dekas pegkejai dijagbau amaina iman etugtabiu asamtai. <sup>23</sup> Nunin asamtai ni anagkagtuamua nu dakaku pujuidautik emetmamja batsamsagmi, dekaskeap uminkattawa tusaja, wagki Apajuí nunak imatiksag betek umiktin asamtai. <sup>24</sup> Pempeentunisaikish wajak yainimainaita nu egakagmi. Pegkegnun yaininaku nuní nagkaemasa aneenimaina nu. <sup>25</sup> Apajuí nemajin aidau kantamatasag ijunainamunmag, wajumak Apajuí nemajin aidau kaunchaush ainawai. Nuna nuní unuimatjau aidaush yaigtajum dekas

Kristui kajintsá anentaimtanum, wagki Kristu minitnujiya duka tikiju wajasú asamtai.

<sup>26</sup>Aents Apajuí chichame uwemtikag-tina nunú jintinkagtamun shiig dekau ainayatak, tuke aneas wakegak pegkeg-chauwa nunak takaak Kristu shiwag-mauk, nuigtú nuna tudaujin tsagkug-mainuk atsawai, wagki imá Kristua duke niina tudaujin mantamdauwa nuna dakitau asa. <sup>27</sup>Nunú aentsuk jii shiig ishamainnum Apajuí niina shiwaji aidaun suwimkan susatna nuna dakainawai. <sup>28</sup>Duwik makichik aentskesh Moisés chicham umiktajum tibaun umikchamtaig, jimag aentskesh, nuniachkush kampatumkesh apu aidaun jegajiang, nunú aents chichaman umitsuk wainak takaawai tusag etsegtukagmataig, wait anentug tsagkugsuk maajakú ainawai. <sup>29</sup>Tujash nuna nagkaesau, aents Kristun dakituidau imá senchi suwimak ishamainun jukiagtinaí. Apajuí Uchijí jutiiní mantamnak numpeen ukajua duwí, chicham apakbaunum uwemtijamag Apajuinu atinme tujabiwa nuna dakituidauk, Wakaní Pegkeji jutiin wait anenjama nunash, pegkegchaun chichagmaina numamtuk awagmainawai. <sup>30</sup>Apajuí chichaak: “Witjai suwimkan sukagtinnuk, nunin asan wi pegkegchau aidaunak suwimkan susattajai”, tawa duka dekaji. Tikich agagbaunmashkam: “Apajuí niina aentsji aidaunak pegkeg ainawai titinaí”, tawai. <sup>31</sup>!Tikima ishamainai, Apajuí tuke pujuwa nunú suwimak sukagtamuk!

<sup>32</sup>Tujash adeagtajum, yama nagkam-chakjum Kristui sujumankajum, ashí utugchat waitiamu akuish, katsunjá ichichmamjajum depetkauwaitjum nunú. <sup>33</sup>Wagki atum ainajum anuiyatijum, tuwakbaunum pegkegchau chichagku waitkasbautigmesh ainagme,

nuniagmin tikich aidauk aents dutika waitkamu aina, nujai ijuntsan waittsatjai tusa anentaimsaush ainawai.

<sup>34</sup>Atumek Kristu nemajuidau achikam chimpijush wait anenjauwaitjume. Tuja atumi shiwajum wajiigmin yajutjamkagmataish, atumek shiig anejasjum pujagme, atum jukitnuk nayaimpinum dekas shiig pegkeg tuke atin ajutjamaina nu dekau asajum. <sup>35</sup>Kristui kajintsá anentaimjum nunú megkaekai gpa, wagki atum jukitna duka shiig pegkeg ajutjamu asamtai. <sup>36</sup>Atumek atsumagme waitiakjumesh ichichmamja pujusjum, Apajuí wakegamua nu takaakjum, ni anagtamamua nu jukitasajum. <sup>37</sup>Agagbaunum chichaak:

“Minitna duka, megkaetsuk waamak minittawai.

<sup>38</sup>Aents pegkejan taká duka, imá kajintsá anentaibauwa duwik ajumaish tuke pujustinaí.

Untsu mina nemagtukuitak idaitaunak shiig anentsashtainaitjai”, tawai.

<sup>39</sup>Jutiik aents suwimka jukiagtin aidau Kristu nemagtan idayina nuninuk ainatsji, ayatak kajinas anentaibaunum uwemtan jukiaju aina nuninuk jutiishkam ainaji.

#### Apajuiyai kajintsá anentaimauwai dutikmain

**11** <sup>1</sup>Apajuiyai kajintsá anentaimauwai duka, dekaskenmap jukittaja tusa kajintsá dakamua nuuwai. Pegkeg aina nuna pachis chichainakuish wainkachu ayatku dekas nuninapi tusa anentaimtuta nuuwai. <sup>2</sup>Jutií muunji aajakajua duka, Apajuiyai kajinas anentaimaidau asag, Apajuí shiig anentam asajui.

<sup>3</sup>Apajuiyai kajintsá anentaimaidau asaja, nugkanum, nuigtú agkajunum ayaa duka Apajuí chichamenkiap

najaneakuita tusa dekainaji. Paan wainmain aina duka waji atsaunmaya najankamu ainawai.

<sup>4</sup>Apajuiyai kajintsá anentaibauwai Abelak Apajuí wakegamua dutiksag takaak, kuntin dekas pegkejan maa apeak anentag Apajuin susauwai Caigdau nagkaesau. Dutikau asamtai Apajuik Abelnak ni dutikamujiya nujái pegkeg diisuí. Nunin asamtai Abel jakau aigkish, ni Apajuiyai kajintsá anentamajakua nunisaik jutiishkam nunimaina nuna iwaintugmawai.

<sup>5</sup>Enocshakam Apajuiyai kajinas anentaimu asamtai, Apajuí iwaakunak nayaimpinum jukiuwai, dutikamtai aents aidauk nuigtuk wainkachajui. Chicham agagbauwa nui: Enoc eke juwacham nugká pujusag Apajuinak shiig awajkauwai, tawai. <sup>6</sup>Wagki Apajuí kajintsá anentaimtutskek Apajuik shiig aneemtikmaitsui. Nuaduí Apajuijai ijutkau atatus wakegauk, dekas Apajuí niina shiig dekaatatus wakegaidaun anentag sukagtina duka pujawapita, tumain ainawai.

<sup>7</sup>Apajuiyai kajintsá anentaibauwai Noeshkam, Apajuí chichajak: Dekas ishamain atatu tusa ujakam, nigka wainchayatak Apajuí chichamen umijak arcan najanauwai ni patayí aidaujai uwemjatnun. Nunú Apajuiyai kajintsá anentaibauwa duwi uwemai, ashí aents Apajuiyai kajinas anentaimainachuk bakumajui. Tujash nigka bakumachui.

<sup>8</sup>Apajuiyai kajintsá anentaibauwai Abragkak, Apajuí nugkan amastajame tima, tuwí jegattawa nunak dekatsuk, Apajuin umijak tikich nugkanum weuwai. <sup>9</sup>Apajuiyai kajintsá anentaibauwai Abraham, Apajuí nugka anagkuamua nuwi, tuke ikayajai betek duwapen aakmak pujusuí. Nunisag nunikajui Isaac, tuja Jacobshakam, ditan Apajuí anagkuauwa nuwi batsamsag. <sup>10</sup>Nunak

nayaimpinmaya yaakat Apajuí umikbau dekas tuke atina nuwi pujustinjin dakainak nunikajui.

<sup>11</sup>Apajuiyai kajintsá anentaibauwai Abragkak muuntuch wajasú akush, nuwe Sarashkam kaga aig, Apajuí anagtuama nunak betekap umiktatua tabaunum nuwe uchigmakui. <sup>12</sup>Abragkak jamainjin jegas pujai, ni nuwe Sara makichkiuch uchigmakui, nuwiya wegantu aidau nuna dekapamainchauwa iman, nayantsa kaamatkaji dekapamainchauwa nujai betek emakui.

<sup>13</sup>Nunú aidauk Apajuí anagkuamua nunak jutsuk jinawajui. Tujash ditak Apajuiyai kajinas anentaimaidau asag: Duka jutii jaká ajinish uminkatnapi, tusag shiig aneejakajui, ditak ju nugka juwig tuke ijagka nuninap ainaji tusa dekaamaidau asag. <sup>14</sup>Nuna aatus anentaimajakajua duwi yamaik shiig dekaji, dekas ii pujumainuk nayaimpinum atina dukeap dakainaji tusa. <sup>15</sup>Tuja ditá nugke ukukbaujin anentaimtú batsatkuge waketmain aajakajui.

<sup>16</sup>Tujash ditak nayaimpinmaya dekas pegkeja nuna wakejuidau asag nunikchajui. Nuaduí Apajuí dita pujusagtinnak yaakat nayaimpinum awa nuna umigkauwai, dutikau asa Apajuik: Juka midau ainawai, tutanmak datsamatsui.

<sup>17</sup>Apajuiyai kajintsá anentaibauwai Abragkak, Apajuí chichajak: “Uchi ajutjamtatui” tusa anagkuauwaitak, dekasenmash minaish kajinas anentaima tusa dekapeak: “Uchijum makichkiuchia nu maam emematjita” tamash dutikatatus wakekauwai. Apajuí Abragkan anagkuak: <sup>18</sup>“Ame wegantu aidauk, Isaac akiiamua nuwiya agtinai”, tibau ayatak. <sup>19</sup>Abragkak: Apajuik aents jakaunash inanmainapita, iman asampap Isaac jakamtaish nigki inanmainaita tiuwai. Abragkak uchiji



mauwaitak, Apajuí ataktú inantukim jukiüwa numamtainai, nigka dekas maunak maachuitak maatatus umiintusu asa.

<sup>20</sup>Apajuiyai kajintsá anentaibauwai Isaakshakam, Esaú jukitin atí tibuajinak Jacopan anagkuauwai.

<sup>21</sup>Apajuiyai kajintsá anentaibauwai Jacob jakattak tepes, José uchijí aidaun makí makichik ditanu atinun anagkuauwai, nunik ushujutaijin ichichmamas wajas Apajuin emematiuwai.

<sup>22</sup>Apajuiyai kajintsá anentaibauwai Joseshkam jaak: Israel aents aidau Egipto batsata juka jiiinjatnai tiuwai; nuniak: Mina ukunchjuk jujukitin atajum tiuwai.

<sup>23</sup>Apajuiyai kajintsá anentaibaunum Moisés akiinamtai, apají dukujijai kauptum nantu uukajui uchi pegkejuch asamtai, nuninak apu uchi kajegtajum tibaunash ishambachaju ainawai. <sup>24</sup>Apajuiyai kajintsá anentaibauwai Moisés muun wajasash: Faraogka nawanjin uchijiyaitjai, tumamtanak dakitujakuf. <sup>25</sup>Nigka Apajuí aentsji waitkam batsataidaujai waittsatatus wakegau asa, Egiptunmaya pegkegchaun takainayatak shiig anee batsatujui ijuntanak dakitjauwai. <sup>26</sup>Nigka Egiptunmaya aidau nunitaijin takaak shiig aneestatus wakeetsuk, Kristu atak taa waittsatnugin betek waittsatatus wakekauwai, Apajuiyap dekas pegkejan sujustatua tusa dekau asa.

<sup>27</sup>Apajuiyai kajintsá anentaibauwai, Moisesak Israel aents aidaun yaigtatus imá senchi anentaimu asa, Egiptunmaya apu kajektinjinash ishamsuk jiiinkiuwai, Apajuí wainmainchauwa nunú niijai abaunash dekaeau asa. <sup>28</sup>Moisés Apajuiyai kajintsá anentaibaunum Apajuí nagkamak: Uwig maam yuwakjum Pascua jistamata tima

jistamauwai. Dutikak uwijá numpeen ditá waitijin numpeajajui. Dutikamu asamtai nayaimpinmaya aents magkag-taushkam, makichkish Israela uchijí iwai aidaunak mauntsuk ukukiuwai.

<sup>29</sup>Apajuiyai kajintsá anentaibauwai Israel aents aidaush, nayants kapantu tutainum bukunum katimaina nunikag katiyajajui. Tuja Egiptunmaya aidaush ditash nunisag katiagtakamag jakekajui.

<sup>30</sup>Apajuiyai kajintsá anentaibauwai Israel aents aidau, yaakat Jericon siete tsawantai tentea apainak, yaakat peegmagbaujin yumpuntua akaketkajui. <sup>31</sup>Apajuiyai kajintsá anentaibauwai nuwa Rahab daagtin, akiká takatai aajakua duka, tikich aents intimkiu aina nu jinutash nigka jakachui, Israel aents dekamatus yujaunash shiig anentus yajuak kuitamkau asa.

<sup>32</sup>¿Nuigtush wajinak titaja? Gedeogkan, Barakan, Sansogkan, Jefté, David, Samuel, nuigtú tikich Apajuí etsegitin aina nuna pachisa tita takunuk, tsawantan atsumainaitjai. <sup>33</sup>Apajuiyai kajintsá anentaibauwai shiwajin depetkag ditá shiwaji nugken batsamawajui, Apajuí nugkan anagkuawajua nui, nunikag nui apu wajasajag pegkegnum inamjajui. Nuniagtai Apajuishkam ni anagkuauwa dutiksag yaigkajui. Dutiksag león batsatbaunum egkeawagmataish, leogkan yukagtumainchau emak kuitamajakajui. <sup>34</sup>Jii senchi kegamunum egkeamush ainawai, tujash esachajui. Espadayai maata tamash pisajakajui. Kakakchau aidaunashkam senchi emakajui, dutikamu asag ditá shiwajijai maaniakush depetmajakajui. <sup>35</sup>Nuwa patayí jajukbau ataktú inaantuki suujakbaush ainawai.

Tujash tikitchakam senchi waitus jakaush ainawai, ditak Apajuiyap wi jakamtaish inantuki dekas pegkeg pujutan sujumainaita tusa anentaimu

asag. <sup>36</sup>Nuigtushkam tikich aidauk, pegkegchau chichajam, asutiam, jiju cadenajai jigkajam, achiká egkeam waittsajui. <sup>37</sup>Tuja tikich aidauk kayai tukua tukuakua maamush ainai, serruchui tsupika maamu, espadayai kajegbaush ainawai. Ditak jeenchau yujasag, uwijan duwapen, cabra duwapejai nugkujakajui. Nuigtushkam ujunauch, senchi waitkainam wake besemag batsamajakajui. <sup>38</sup>Nunú aents aidauk shiig pegkeg, aents pegkegchau aidaujai ijunag batsaamainchau aajakajui. Nunin asag senchi waitkainam, jiinag uwegshunum shiyak, mujanum wajag yujas, kayanum waa ayaunum utsanawag kanuu, nuigtú nugka waanum kanuu wajajakú ainawai.

<sup>39</sup>Tujash Apajuiyai kajinas anentaimainayatak, Apajuí anagkuawajua nunak juinatsui. <sup>40</sup>Apajuik jutiinun dekas pegkejan umigtamkau asa, ditanak eke susachajui, jutiijai ijuntsa jukitin asamtai.

**Jisus waittsamu diisá  
ichichmamain**

**12** <sup>1</sup>Yaunchuk Apajuiyai kajinas anentaimajakú kuashat aajakajua duka, Apajuiyai emetmamja pujamujiya nuna iwainmamkajui. Nu nunikta takuik atumnawai ashí iina tudauji tutitag awajtamak pegkegchau etama nu idaisatasa. Nuniaku ii jegatasa wakegamunum tupikautiama numamut wajamainaitji. <sup>2</sup>Jisus diisagmi. Niiniya Apajuiyai kajintsá anentaibauk minawai. Nigki Apajuiyai kajintsá anentaimtan sukagtus Apajuiyai ejetamuk. Jisusak tikima datsamainnum numinum achijá maam waitiakush uyumatsuk atsanjauwai; nigka: Imanika waittsanush dekas shiig aneasnuap Apajuí inamtaijin untsujin ekeemsattaja tusa dekas asa.

<sup>3</sup>Nuaduí Jisus aents tudaugtin aidau waitkam jutiiní imanik waittsauwa nunú anentaimtustajum, nuniakjum pimpiakjumesh mijamtsuk nemagkatajum. <sup>4</sup>Atumek aents tudaugtin aidau mantamatasag waitkagmamainnumak eke jegatsjume. <sup>5</sup>Atumek jutii Apajuí uchijí asajin agagbaunum:

“Mina uchijuh, wi pegkegchauwai tusa tajam duka antugtukta, tuja wi amina Apujum asan jiyajam duwishkam wake besemag anentaimipa,

<sup>6</sup>wagki Apua duka jiyaawai yana ni aneawa nuna pegkejan takastí tusa, suwimkanash suwawai ni uchijí emamujinak” tawa juka kajimat-kiumek.

<sup>7</sup>Nuaduí atumek Apajuí jintinjamu asamtai waitiajume, wagki Apajuik aents uchigtin uchijin itugmaina numamtuk awajtamui. ¿Ya aentsua uchijin pegkejan takastí tusash jiyatskesh idainaita? <sup>8</sup>Tujash ashí aents ni uchijin jintinta dutika, atumnash Apajuí jintinjamchakuig, dekas niina uchijí ainatsjume. <sup>9</sup>Nuigtushkam jutii uchuch aajakuitag duwik, iina apají jintinjamu asamtai ajantusa diijakuitji. Nuní nagkaemasa dekas iina Apají nayaimpinmayaya nunú shiig umigmainaitji, pujut tuke atina nunú jukita tau asá. <sup>10</sup>Jutii apajig wajumak tsawantai batsamtainaitak, jutiin pegkegnus yaimpamaina nuna anentaimtusag jintinjamajakajui. Tujash Apajuik iina dekas pegkeg etamaina nuna jintinjamji, ni pegkegma ibauk atinme tujamu asa. <sup>11</sup>Dekaskenmag suwimkak makichkish shiig awajkagtuchui najabau asa. Tujash Apajuí jintinjamak dutijama nu nagkaemakmatai, shiig agkan anentaimsa pujuta nunú, nuigtú pegkeja duke takatchakam unuimagtatji.

**Apajuí wait anenkagtugbaun  
dakitin aidau**

<sup>12</sup>Nunin asamtai, atum dekas junta pegkegma nu nemagtanum pimpikiujum nunú, nuigtú pujutjuminish kakakchau dekapeajum dushakam, kakanmamsajum ichichmamjatajum. <sup>13</sup>Nuniakjum Kristuig kajintsá anentaimesa pujakjum, pegkeja duke takastajum. Ashí pegkeg dutikmain aig, dutikatsjum nu takaakjum pegkeg wajasminjum.

<sup>14</sup>Ashí tikich aidaujaish agkan pujakjum Kristunuk takaakjum pujustajum, wagki Kristu wakega nuna takainachuk niinak wainkashtin ainawai.

<sup>15</sup>Nunin asamtai shiig kuitamdaikatajum, Kristu nemajin aina nuwiya makichkish Apajuí wait anenkagtamujiya nuna megkaekainum. Nuigtushkam atum ijunjum anuiya utugchatan apujak waitkagmasainum diiyaku atajum, aents nunina duka makichik ajak jatai asa, kuashat aentsun pegkegchau emamaina numamtinai. <sup>16</sup>Makichkitigmekesh nuwak tsanijimawaigpajum. Apajuinu pegkeg aina dushakam dakitjaigpa. Esaú ni iwai asa apají jakamtai, wají jumainjinak yapajak yachin susauwai yutain yuwak, numamtuk wajakaijum.

<sup>17</sup>Atumek duka shiig dekagme, Esaú dutika sujukuitak Apajin jegaantun, niina pujutjin pachis pegkegnum chichagtukat tukamá dakitam asauwai, dutikam senchi buutkush, nuigtú dutikmainuk atsugsauwai.

**Yamajam anagkagtuamu  
nayaimpinum jukitnaitag  
nunú imá pegkejai**

<sup>18</sup>Israel aents aidauk muja Sinainum jii kegaun, suwe wajasú, ikiyamjau, senchi dasentun adijkaju ainawai.

<sup>19</sup>Nuigtushkam trompeta shinamun antuinak, Apajuí chichaamunash

antukajui, nuninak Moisesan chichajui-nak: “Apajuik ataktú awenag chichakaigka”, tusag segajui. <sup>20</sup>Wagki ditak Apajuí ju dutikatajum tabaun dakituidau asag tiajui, Apajuí ditan chichajak: “Ju muja juna kuntinkesh najakuig kayai tukujum, nuniachkugmesh nagkikish maatajum”, tau asamtai. <sup>21</sup>Nunú mujanmag tikima ishamaiania asamtai, Moisés chichaak: “Senchi ishamakun kujajai”, tiuwai.

<sup>22</sup>Tujash atumek muja Sión Apajuí tuke pujuwa nuna yaaktaji nayaimpinmaya Jerusalegka nu adijkaugme, nuwig nayaimpinmaya aents aidau shiig kuashat Apajuin emematuinak ijunag ainawai. <sup>23</sup>Nuigtushkam Jisusan nagkamas nemagkaju aidau ditá daajig papiinum agatkamu nayaimpinum ajuina dushakam, Apajuí aents takasbaujin diisá titina nunak ijuntug batsatui. Nunisag Apajuí nemajin initaik jinawajua nuna wakaní aidaushkam pegkeemtikawajam awig batsatui.

<sup>24</sup>Ditak Jisusai jegantaje. Apajuí yamajam chichaman atumjai apakua nunak, Kristu mantamnak numpeen ukajua duwi, Apajuí jutii tudaujinak tsagkugtamjauwa nu adeagtajum. Jisusan numpega duka Abela numpega nuninchauwai. Wagki Abel numpan ukajua nunak ni yachi Caín maam nuniku asamtai, Apajuí Caignak suwimkan susauwai. Untsu Jisus mantamnak numpan ukajua duka, jutii tudauji tsagkugnagtinun nunikui.

<sup>25</sup>Nuaduí kuitamamkatajum, Apajuí aujtabauwa nu dakitjaijum. Apajuí jujú nugka juwi chicham umiktajum tibaun antugkachaju aidauk, suwimkanak uwemtutskek nagkankachajui. Nuní nagkaemasa jutii Apajuí nayaimpinum pujus, chicham umiktajum tujamawa nunú umiashkuik suwimkak pegké uwentumaitsuji. <sup>26</sup>Apajuí Moisesan

chicham umiktinun suwak chichaamujig nugkan pegakuí, tujash yamai tujamji: “Ataktuk imá nugkanak pegatsuk, ashí nayaimpinashkam pegaktatjai”, tiuwai. <sup>27</sup>Ju chicham “ataktú” tibauwa duwi, ashí tuke achatin najankamu aina juka, tuke atina nujaimpap yapajiam atinaita tusa dekanaji. <sup>28</sup>Tuja Apajuí pujusá inamjatnujiya duka makichkish umuchiam achatin asamtai, see tiagmi Apajuí ju pachisa. Nuniaku shiig puyatjusa, aneasa emematiagmi, niinak ju shiig awagbau asamtai. <sup>29</sup>Kajimat-kigpa, jutii Apajuijiya duka jiijai betek asa, jii tsajaun apek emegkauwama numamtuk awagbauwai ashí pegkegchau aidau.

**Apajuin shiig awagma  
nunú takaamu**

**13** <sup>1</sup>Yatsut anendaisa pempeentuniki aneenita duka idaisaigpajum. <sup>2</sup>Aents atumi jeemin minidaush shiig anentsá awaita nunú kajimat-kigpajum. Aatus nunidauk dekausuk nayaimpinmaya aentsun shiig anentus jukiajush ainawai.

<sup>3</sup>Aents achikam egketaidaush, atumin achigmakagmatai egkeemainaitam nu anentaismam yaigtajum. Aents waitkam batsatidaushkam, atumshakam dutiksaik waitkam amainaitjum nu anentaismajum yaigtajum.

<sup>4</sup>Atum nuwenamua duka eme anentsajum diistajum, nuniakjum pegkegchau takagdaituk pujustajum; wagki pegkegchau takaidaun, nuigtú ekagmidaunak Apajuí suwimkan susatnai.

<sup>5</sup>Kuashat kuichkigtin atasagmek puyatjú pujuigpa, atumin ajutjamaina nujaig shiig aneasjum pujustajum. Wagki Apajuí chichagtamak: “Makichkish idaisashtinaitjame”, tujabiu asamtai. <sup>6</sup>Nuaduí jutiik shiig kajintsá:

“Apajuiyai mina yaintuk, duwi puyatatsjai.

Aents aidau mina dutijumaina nunak ishamatsjai” tumainaitji.

<sup>7</sup>Anentaismas diistajum, atumin Apajuí chichamen jintinjamajakú aidau wajuk pujusajua ainawa nunú. Nuniakjum dita Apajuiyai kajintsá anentaibauwai, Jisusan nemajujakajua nunisjumek nemagkatajum. <sup>8</sup>Jisukristuk yauwa duwish, yamaya juwish, atakea duwishkam tuke nuninuk atinai. <sup>9</sup>Tikichin yapajia jintinjamaidauk antugkaipajum. Apajuí jutiin anempau asa, wakeetan sujamas yaimpa nuuwai, yutai pachisa tibauwa nuna nagkaesauk. Nunú tibauwaina duka makichkish yaimpakchawai.

<sup>10</sup>Jutiitú tudaujin tsagkugtamjatatus Kristu mantamdauwa nuuwai, Moisés pujusmatai tudau tsagkugnagta tabaunum kuntinun maujakajua numamtinuk. Nuna nejeenak sacerdote aidau Apajuí ememattainum takaidauk yujakchaju ainawai. <sup>11</sup>Wagki kuntin maamua nuna numpeenak sumo sacerdote juki, Apajuin anentag suwinak jega Apajuí ememattainum wajakuí tudaujin tsagkugtuftusag, tuja nejenak jukiag yaakta ukukí apejakajui. <sup>12</sup>Nunisag Jisuschakam yaakta ukukí waitus jakauwai, niina numpe ukaejamunum aents aidau niinu emakta tau asa. <sup>13</sup>Nuaduí jutiik imá Jisusak nemagkagmi. Nuniaku Jisus aents aidau dakitjam waittsauwa nunisaik iishkam waittsagmi.

<sup>14</sup>Jutiinak ju nugka juwig makichik yaakat ii dekas tuke pujustinuk atsugtamui. Ayatak dakainaji nayaimpinum Apajuí puja nui yaakat umikmawa nui wakgtasa. <sup>15</sup>Nuaduí Jisukristu yaijattsamtai Apajuiya duka tuke emematmainaitji. Apajuí iina wenin emematkuik, iina Apajuiji wají anentag sumaina numamtuk awagmajui.

<sup>16</sup>Kajimatgipajum, pegkeg takaaku tikich aidaujaish pempeentunikiaja yainita duka. Jutii pegkeg takaamua dushakam Apajuí anenjauch suwamua imanuk atinme. Nuniau asajin Apajuish-kaim jutiiinash shiig anenjamsagtinme.

<sup>17</sup>Kristu nemajin aidaun diin aina nu umigkatajum. Nuniakjum sumimkatajum, atum Apajuí dekaskeapi tusajum umijuinajum nuutigmin kuitamjamaidau asagmatai. Dita atumiin wajuk takasaje nunash Apajuí emtin etsegtugmaktin asamtai. Atum umigmak, ditashkam shiig aneas takasagtatui, tuja atum umigchamak wake besemag dekapiagtatui, nuniau asag shiig yaimpamait sui.

<sup>18</sup>Jutii pachitkagtusjumes Apajuí aujkgagtustajum. Shiig anentaimsa pujúsá ashí pegkeg aina duke takastasa wakegainaji. <sup>19</sup>Apajuí imá senchi aujtugsatajum mina pachittsajum, wishakam ataktú atumiin taan wainkatjime. <sup>20</sup>Apajuí shiig agkan anentaimsa pujutan sukagtina nu, iina Apuji Jisusan maawagmataish inankiuwai, aents

uwijá kuitamin uwigjin kuitama nuna nagkaesau, ni aentsjinak shiig kuitamna nuna. Niina numpe ukagbauwa duwi ajumaish tuke atinun chichaman apakua nu, <sup>21</sup>atumnash pegkeg etamtinme ni wakega duke takasminjum. Nigki ashí jutiiinash ni wakega duke takamain etamti. iJisukristua duke ememattai atí! Aatus atí.

### Inagnamu

<sup>22</sup>Yatsug aidauh, ubag aidauh, wait aneasjum wi wajumak chichamai atumin ichichjatasan ju papiinum agatjajim jujú emamkesjum antuktajum tusan segajime. <sup>23</sup>Atumesh dekaatajum: Yatsug Timoteo achikam egkemaya duka yamaik jiinkine, waamak taamtaig wi atumin wainkatasan minakun ayaktatjai. <sup>24</sup>Ashí Jisusa nemajin aidau diin, nuigtú ashí Apajuí nemajin aidauhkam kumpamjutuatajum. Yatsug Italianmaya aidau atumnash kumpamjainawai. <sup>25</sup>Apajuí atumnash ashí wait anenjamjatnume.

## SANTIAGO PAPÍ AGAGBAU

---

### Santiago kumpamkagtamu

**1** <sup>1</sup>Witjai Santiagoitjai, Apajuí nuigtú Apu Jisukristunashkam inakegaitjai. Israela uchijí doce aajakua nunú wegantutijum pampagjum, ashí tikich nugkanmash batsatutigmin agatkun kumpamjime.

### Utugchat emamkesa depeteamu

<sup>2</sup>Mina yatsug aidauh, ubag aidauh, kuashat utugchatnum waitiakjumes shiig aneasjum pujustajum. <sup>3</sup>Nuniakjum atum Apajuiyai kajintsá anentaimjum nunú, dekaskeashit tusa dekapjabaunum waitiakjumes atsanjagmek, waitiakuish atsanja emamkesa nagkaeta nunú unuimagtatjume. <sup>4</sup>Aaja nuniakjum Apajuí wakeja duke takat unuimagtatjume.

<sup>5</sup>Atum ainajum anuiyatijum, Apajuí nuní pujustinme tusa wakejutpa nu, dekaachmin utugchat dekapeakjumek Apajuí segatajum, dutikam ni ashí shiig dekamtijamattawai kajegtamsuk. <sup>6</sup>Tujash dekaskeap jukittaja tabauwai utujimtsuk segatajum. Wagki aents utujima duka, nayants tsukatbauji dase umpuam tsukatuk weu, mai waket wajama numamtuk wajawai. <sup>7</sup>Nuna nuniauk, Apu Jisus sujamun jukittajapita tumain ainatsui. <sup>8</sup>Wagki ni anentaimtamujiya nunak anentaimtutsuk, yamai tikichin anentaimtug, kashinia duwi tikichin anentaimtu wajau asag.

<sup>9</sup>Yatsut ujunauchia duka shiig aneas pujumainai, Apajuí eme anentsá diyaam atin asa. <sup>10</sup>Nunisag wiyakuch aidauk wajiijin megkayinakush, shiig aneas pujumainai. Apajuik ditá wajiijin diigsag eme anentatsui. Wagki wiyakchameamua duka, dupá yagkují wajukeyama numamtuk wajakagtin asagmatai. <sup>11</sup>Etsa jiinku senchi sukuam, dupa kagagmataig yagkujig kakegame, nunik niimé pegkejuch aajakuk megkagama numamtuk, wiyakchak ashí ni takasbaujinak megkaekatnai. <sup>12</sup>Aents Apajuiyai kajinas anentaimu utugchat ajamash, nunisag emetmamag pujus utugchatan depeteauk shiig aneasagtinai. Nuna ashí depetkauk, Apajuí niina aneedaun pujut tuke atinun susatatus anagkuauwa nuna jukiagtinai.

<sup>13</sup>Makichkitigmekesh utugchatnum jeganjum pegkegchau takastasa wakegamu ajutjamkujaig, Apajuiyap pegkegchau takatan wakemitkajua tiigpajum. Apajuik wají pegkegchau takastasa anentaibaujig atsugnai, nunin asa nigka pegkegchaun takamtiksatatasag aentsnak anentaimtikchauwai. <sup>14</sup>Makí makichkiti pegkegchau takastasa wakegamu ajutjamaina duka, imá duke anentaimtaku senchi wakegamunum pegkegchau takau ainaji. <sup>15</sup>Nunú pegkegchau takastasa anentaibauwa nu takasbaunum tudauk nagkamnawai, tudauwa duke taká pujamuk Apajuijai tuke kanaaku kanamainnum ejekagtawai.

<sup>16</sup>Nunin asamtai mina aneetaig yatsug aidauh, ubag aidauh atumkek tsanuma-jaigpajum. <sup>17</sup>Ashí pegkeg aina duka Apajuinumia minawai, nigki nayaimpinmaya etsantin aina nunash najankauwai. Nigka yapajinbaujig atsuuwai, tuke imanisag auwai. <sup>18</sup>Niina waketajinig niina chichame dekaskea duwi pujut tuke atina nunak sujamsauwai. Ni najankamu kuashta nuwiyanak, jutiin dekas eme anenjammas midau atinme tujabaijui.

#### Jisukristu nemajin aidau dutikmain

<sup>19</sup>Nuaduí mina aneetaig yatsug aidauh, ubag aidauh, ashí aents chichainamuk shiig antugkatajum, nuniakjum waugká aimtsuk, nuigtú kajeká aimkatasagmesh wakeyigpa. <sup>20</sup>Aents imanik kajeauk, Apajuí emtinish pegkejan takaak nuniatsui. <sup>21</sup>Nuniau asamtai pegkegchau takat ju nugka juwi kuashat ayaa duka idaisatajum. Nuniakjum yamajam chicham jintinkagtuamu atumin uwemtijamaina nu unuimatjatasajum takaajum duka, emematsuk dutikatajum.

<sup>22</sup>Tujash chichaman ayatak antinuk amaitsugme, chicham antajum dutiksagmek takastajum, nuniachkugmek atumek tsanuumamain asajum.

<sup>23</sup>Chichaman ayatak antin umichu aina duka, aents ispijunum niimama nujai betekai, <sup>24</sup>yamaikik niina niimen diisá, pempeenak kajimatama numamtuk wajainau asag. <sup>25</sup>Tujash pegkegchau takatsuk pujutan, Apajuí chichame jintinjama nuna antuk, kajimattsuk dutiksag umiauk, ni pegkeg takaamujin shiig aneas pujumainai.

<sup>26</sup>Atum ainajum anuiya makichik aentskesh: Apajuin umignaitjai, tumamiatak wainak chichaaku akug nigki tsanuumawai, nunin asa ni Apajuin umignaitjai tumama duka

wainkayai. <sup>27</sup>Dekas Apajuí umigku, pegkegchau aidauh takatsuk pujusá, Apajuí iina Apajiya nuna emtinish dutikmaina duka: Bitaik aidau, waje aidau waituinakuí yayamu, nuigtú ju nugkanmaya pegkegchau aina dushakam takatsuk pujamu aina nuuwai.

#### Wiyakchash ujunauchish betek diistajum

**2** <sup>1</sup>Mina yatsug aidauh, ubag aidauh, atum Jisukristu iina Apuji dekas imana nui kajintsá anentaimaidautigmek, tikich imá eme anentakjum tikichik junik diimaitugme. <sup>2</sup>Ju anentaimesa diismí: Atum ijunja batsatbaunum, aents tsajam uwejen patakumtai oro najanamun patakumau, jaanch dekas pegkejan nugkuaju wayawaintai, nuniai aents ujunauch jaanch mamusuchin nugkuaju wayamtaig, <sup>3</sup>jaanch dekas pegkejan nugkuaja nu eme anentsajum: “Amek dekas pegkeja juwi ekeemsata”, takujum ujunauchik: “Amek anuigkish wajastá, nuniachkumesh wi eketag juwigkish nugká pujustá”, tumainaitjume. <sup>4</sup>Nunú wiyakuch eme anentsam juwakum, ujunauch wainkauch diiyakjumek, aents aidau etegkeakjum dutikmainaitjume. Atum aaja nuniakjumek pegkegchau takaajume, ashí aents betek eme anentachu asajum.

<sup>5</sup>Mina aneetaig yatsug aidauh, ubag aidauh antuktajum: Apajuik ju nugkanmaya aents ujunauch aidau nak etegkauwai, mina nemagtuinak, minaig kajinas anentaimainak, mina anentuina duka, nayaimpinmayan wi ditan anagkuauwaitag nuna jukitin atinme tusa.

<sup>6</sup>Tujash atumek ujunauch aidauk inatsainagme. Wiyakuch aina nuuwai atumin pegkegchau awajtamainak, achigmak jujamkiag apu basatbaunum

ejetamaina nunú. <sup>7</sup>Wiyakuch aina duke Apu Jisus eme anentsá chichagtaiya nunash pegkegchaun chichajuina duka.

<sup>8</sup>Atum dekas chicham puyatjusa umimain Apajuinu agagbauwa nu dekaskenum umiakjumepeg pegkeg dutikagme, duka ju agagbauwai: “Amijai ijutkau aidaush amek anenmamsam aneeta”, tawai. <sup>9</sup>Tujash atum tikich eme anentakjum, tikichia duka junik diiyakjumepeg tudau takaakjum nuniagme. Nuniau asajum Apajuí chichame umiktajum tibauwa nu umiachbaunum bakumattagme. <sup>10</sup>Atum chicham umiktajum tibauwa nuwiya umiyatkujum, makichik umiachkugmek ashí umikchauwa nunin wegagme. <sup>11</sup>Wagki Apajuí chichaak: “Tsanijina-waipa”, tiuwai. Tuja: “Magkagtua-waipa” tawa nunash nigki tiuwai. Nuaduí tsanijintsuk pujayatkum magkagtakmek, Apajuí chicham umiktá tibauwa duka umiatsme. <sup>12</sup>Apajuí tsawan jegatai aents takasbaujin diisá titina duwik, chicham umiktin tudaunum agkanmitkagma nujai dutikatnai. Nuaduí shiig kuitamamsa pujaku, chichaakuish shiig kuitamsa chichamainaitji. <sup>13</sup>Apajuik tikichin wait anenjachu aidaunak, wait anenjashtinai. Untsu tikichin wait anenjau aidaunak, Apajuí tsawan jegatai, aents takasbaujin diisá titina duwi pegkeg diisbau agtinai.

**Apajuyiai kajintsá anentaibauk ii takaamunum iwainamainai**

<sup>14</sup>Mina yatsug aidaush, ubag aidaush ¿wajinma pegkeg amainaita makichik aents: Minak Apajuyiai kajintsá anentaibauwa nu ajutui, tayatak pegkeg takata nuna iwainachush? Nunú Apajuyiai kajintsá anentaimejai tawa duke uwemtikmaitsui. <sup>15</sup>Makichik yatsutkesh, nuniachkush makichik umaakesh nugkumainji atsuju, tuja yuwá

pujumainjish atsujaig, <sup>16</sup>atum ainajum anuiyatijum suwachiatkujum, ayatak chichamaik: “Shiig aneasam jegaam, jaanch nugkujam, yujumak yuwata”, tumainaitjum dusha ¿wajinma pegkejaita? <sup>17</sup>Numamtuk Apajuyiai kajintsá anentaimejai tuinayatak pegkeja nuna takainachkug, Apajuyiai kajintsá anentaimejai tuinamujiya duka wainkayai.

<sup>18</sup>Tujash makichik aentskesh tikichin chichajak, amek: “Apajuyiai kajintsá anentaibau ajutui, tame duka wainkam tu wekaeme, tikich yaigtasam makichik pegkeg dutikachiatkum tau asam. Untsu wi tikich aidaun yaigtasan pegkeg aidaun dutikag duwi, wi dekaskenum Apajuyiai kajintsan anentaimejai nuna iwaintuktajame”, tumainai. <sup>19</sup>Ame: Imá Apajuikeapi najankagtinuk, tusam dekaskapi tame, nuniag wakan pegkegchau aidaushkam dekaskapi tuinak kujainawai. <sup>20</sup>Anentaimekchuh, makichik aents Apajuyiai kajintsá anentaimejai tawa nu pegkejan takaachkug, ni Apajuyiai kajintsá anentaimejai tawa duka wainkayai.

<sup>21</sup>Apajuik Abragnak bakumamainchau diisuí, Apajuí dutikata tibaun betek umikú asantai. Nuniau asa Abragkak uchijí Isaakan maa Apajuí anagtanak namput awajsachui, Apajuí tibauwa nuna umikta tau asa. <sup>22</sup>Yamai wainmainaitjume, Abragkak ayatak Apajuyiaig kajintsá anentaimejai tujakchauwai, nigka dekas umigkauwai. Nigka Apajuí dutikata tibauwa nunú betek umiamunum, ni dekaskenum Apajuyiai kajintsá anentaimejai duka pegkeg diijam asauwai. <sup>23</sup>Ni aatus nuniak, agagbaunum tawa nunak umikú: “Abragkak Apajuinak dekaskapi tiuwai. Nunikbaunum pegkeg aentsua iman diyaam asauwai, nuigtush Apajuí kumpají” tutai aajakuí.



<sup>24</sup>Juajuú atumek dekagme, Apajuú aentsun pegkeja iman diyaa nunak, ayatak niini kajas anentaima duwikik dutiktsuk pegkeg takasbaujinish dutikawai. <sup>25</sup>Nunisag nuwa akiká takatai Rahab daagtin aajakua dushakam, aents dekamatus yujaidaun ni jeen yajuak ikanag, tikich jintanum ishiakua duwi Apajuú pegkeja iman diyaa asauwai. <sup>26</sup>Iyash wakan atsugbauk, jakau asa nuniawai. Nunisag Apajuiyai kajintsá anentaimjai tuina nunú pegkejan takamtikainachkug, aents jakau takatan takamaitsu numamtinai.

#### Chicham pegkegchau ekagta nu

**3** <sup>1</sup>Yatsug aidauh, ashí aents wajuk takasaje nunak Apajuú diijus titinai. Dutikak aents ni chichamen jintinkagtuinayatak, betek umikchajun imá senchi suwimkan susatnai jintintuamu aina nuna nagkaesau. Dutikatin asamtai, atumek jintinkagtin atasagmek imanikjumek wakeemaitusugme. <sup>2</sup>Ashí aentstik kuashat pegkegchau takau ainaji. Tuja makichik aentskesh ayatak pegkegnak chichau akug, nunú dekas aents pegkeg amainai, nunin asa ashí pegkegchau wakegamujinash depetmainai. <sup>3</sup>Aents caballonum entsamak wegauk umigtukti tusa wakegakug, caballo wenin makichik jipun apujtin ainawai itajiaktinun. Dutikau asa ashí niina iyashinak depeetuk ni wakegamujin emauwai. <sup>4</sup>Jushakam anentaimtusum diistajum, lancha shiig muun jaanch detua wekaetaín, dase umpug yajá pempegki emata tutaishkam, ni anunna nu lancha tawagtai piipich aig, duwik tawajus ni dekas wakeesa wegamunum emauwai. <sup>5</sup>Numamtuk wajawai iina wenishkam. Iina iyashin wenu awa duka piipich aig, chichaakuik kuashat wají dutikmain chichanui. Jíí kaiji piipichitak aja muun

ajabaun apegama numamtuk wajawai. <sup>6</sup>Nunisag iina iyashiin wenu ajutjama duwi, pegkegchau chichaaku, tikich pegkegchau awagmaji. Nunidau asajin iina iyashinak pegkegchau etugtamui. Maanit aina duka chichabai nagkamnawai, iwanchia nunú tikichjai maaninume tusa pegkegchaun chichamtijamu asamtai.

<sup>7</sup>Ashí aents aidautik kuntin kajen aidau, nanamtin aidau, dapi aidauh, namak nayantsanum batsamin aidauhkam, ashí unuidau ainaji. <sup>8</sup>Iman ainayatkuish iina wenig unuinamait sui. Iina wenig tikima pegkegchauwai, dapi nain tsegasji pimitkamusa, aentsun esai maina iman jutiinashkam ajutjamu asamtai, tikich aidauhkam iina chichamenig pegkegchau ebau ainaji. <sup>9</sup>Ju wenua juwik Apu iina Apajuiya dushakam emematin ainaji. Nu wenua duwik Apajuú aentsun niya numamtinun najanauwa dusha pegkegchau chichajin ainaji. <sup>10</sup>Yatsug aidauh, ubag aidauh, juka aajag amait sui. Wenuik Apajuú emematku, nu wenuik tikich pegkegchau chichajuk wajamait sui. <sup>11</sup>Yatsug aidauh, jushakam anentaimsatajum: Yumi pukuni jiiinbaunmag yumi yumiiimitu, yumi yapaujaig jiiinmait sui. <sup>12</sup>Tikitchakam anentaimtustajum. Bataega duka kamanchá nejeenak nejemait sui. Nuigtushkam wee pajanbaunmag, yumi umumainuk jiiinmait sui. Nunisag aents pegkegchau aidau chichaina duka, chicham pegkegchaun chichayatku pegkegjaig chichamait sui.

#### Dekas yachameta nu

<sup>13</sup>Atum ainajum anuiyash, ¿yaita dekas pegkejan pegkegchauwa nujai akanag shiig dekaush? Nunin akug emematsuk pujak, shiig kuitamamas pujamujin ni dekamujinak iwainamai-

nai. <sup>14</sup>Atumek tikich nagkaesau atasa wakegamunum kajeagme. Nuniau asajum pegkeja imanuk anenmamait-sugme, dekaskea duka shiig dekachu asajum. <sup>15</sup>Apajuí dekamtikbau aidauk tikichin kajejin, nuigtú emebauk amaitsui. Nuna nunia duka Apajuinunmian dekak nuniatsui, duka aentsnumia, nuigtú iwanchnumia minawai. <sup>16</sup>Nuniau asamtai aents tikichin nagkaesau atatus wakegaídauk, shiig antugdaikag batsamsuk, utugchatan aputunisag maaninak, ashí pegkegchau aidauunash takau ainawai. <sup>17</sup>Aents Apajuinunmian dekatan jukiú aidauk, pujutji pegkeg, tsuwat chichaman dakitin, kakagchauch, wait anenkagtin, pegkejan takau, ashí aentsun betek eme anentus diin, waitjuchu, ni anentaibaujiya nunash dutiksag dekaskenum chichau amainai. <sup>18</sup>Nuniak pegkeja nuna takainak, tikich aidaujaish shiig agkan anentaimsag pujuinak, maanitnak dakitin amainai.

**Ju nugkanmaya pegkegchau aina  
duka tujanatajum**

**4** <sup>1</sup>¿Wagka atumesh ayatak jiyanitak batsamtakjumesh tutit chichamash batsamtajume? Duka pegkegchau anentaimat ajutjamu asamtai nuniagme. <sup>2</sup>Atumek atum wakegamu jukitakamajum jumainchau dekapeakjum magkagtagme, tuja tikichin wajiji wakejakjum jujuktakamajum jiyaniakjum, maaniakjum chicham aepeajume, nuniakjumesh atum wakegamuk juwatsjume. Tujash atum juwatsjum duka, Apajuinunmia segachu asajum aniagme. <sup>3</sup>Segakjumesh juwatsjum duka, Apajuí wakejamu takatsuk, atum wakejamu takaakjum, shiig aneasta tau asajum suwam ainatsjume. <sup>4</sup>iAents Apajuí chichamen umigchau aidauh! ¿Atumek dekatsjumek, ju nugka juwiya wajiin imá senchi

wakejauk Apajuin shiwaji wega duka?

<sup>5</sup>¿Atumek Apajuí chichame agagbaunum: “Apajuí chichaak: Wi susauwaitjai mina wakanjun ditai pujustí tusan, dutikau asan ditan aneakun akasmatsan kuitamjai”, tusa tu agagbauwa duka puyatjusjumek antugtsugmek? <sup>6</sup>Dekaskenmag agagbaunum tawa nunisag, Apajuik shiig senchi anempaji: “Apajuik aents imanchauch anentaimitumin aina nuna shiig anentus yayaak, aents emebau aidauunak shiwagmá yaitsuk idaiwai.”

<sup>7</sup>Apajuiyaig sumitkau atajum. Iwanch tsanugmainakuish antugkaipajum, nuniagminig wegak ukugmaktatjume. <sup>8</sup>Apajuijai ijutkau atajum, nuniagmin niishkam atumjai ijutkau atatu. Atum tudaugtin aidautigmeshkam tudaujum idaisatajum, atum Apajuí umigkatasa wakegayatkujum, ju nugka juwiya waji wejuidautigmek, duka idaikujum imá Apajuik nemagkatajum. <sup>9</sup>Shiig aneasjum dushit batsamtutsuk, atumi tudaujum pachisjum, Apajuí tsagkugtugti tusa segakjum, wake besemag batsamsajum senchi buuttajum. <sup>10</sup>Ame, amek anentaimitumasam: Wika dekas tudau asanuap Apajuí diismak tikima wainkayaitja, tutaik dekas aents iman etamtatu.

<sup>11</sup>Yatsug aidauh, ubag aidauh, tikich Jisukristu nemajin aidauk pegkegchaunmag chichagkaigpajum. Nuna nuniauk Apajuí chicham umiktajum tibauwa nunash pegkegchau chichajak nuniawai. Tuja chicham umiktajum tibauwa nu pegkegchauwai tusam umiachkumek, apu chichama epegna nunin wegame. <sup>12</sup>Imá Apajuiya duke aentsun: Juuwai pegkejak, juuwai pegkegchauk tusa etegmainuk. Nigki chicham umiktinashkam sujamsauwai, uwemtijamtanash nigki uwemtijamainuk. Tuja suwimkanashkam nigki sujamainuk.

Aajaya nunin aish, ¿wagka amesh niiya ibaunigkish aents aidaush: Auk pegkeg-chauwai, juuwai dekas pegkejak tusamesh etegkeame?

#### Wají sujin aidau chichagbau

<sup>13</sup>Tujash yamai atum wají sujin aidautigmin titajime. Atum chichaakjumek: “Yamai, nuniachkunush kashinkesh tikich yaaktanum wetatjai, nui makichik mijan pujusan wajjin sujukan kuashat kuichkin ikaugkata-san”, tajume. <sup>14</sup>Tujash atumek aajagmek chichamaitugme, wagki kashinish wajukattagmeki duka dekachu asajum. Iina pujutjiya duka, kashikmas yujagkim utsaana, machik asa megkagama numamtin asamtai. <sup>15</sup>Dekas atumek nu tutak idaikujum: “Apajuí wakegakuig, iwaaku pujakuik nu dutikami”, tumain ainagme. <sup>16</sup>Tujash atumek ememasa chichaakjum: “Nuna dutikatjai, nunash dutikatjai”, tajume. Tusá ememasa aanin chichamuk pegkegchau ainawai. <sup>17</sup>Atum pegkeg takata nu dekau ainayatkujum betek umiachkugmek, duka tudau wegagme.

#### Wiyakuch aidau chichagbau

**5** <sup>1</sup>Wiyakuch aidauh antuktajum, buuttajum nuniakjum senchi chajattajum, wajijum megkaejamtai kuashat waittsagtin asajum. <sup>2</sup>Atumin wajigmik mamukagtinai, nunikmatai atumin kutujum dekas pegkeg aidaush-kam kabau tsupiam agtinai. <sup>3</sup>Atumi orogmek, ashí atumi kuichkigmek pushugkaje. Nunú iwainaktinai atum tikich yaitsuk imá atumdauk anentaim-tusjum ijumajakuitjum nuna. Nuniau asa atumi wajigmea duke pempeentug-maki, jiiyai apemaina numamtuk awajtamkatnai tsawan jegatai, Apajuí aents takasbaujin diijus titina duwi. <sup>4</sup>Aents takau aidau atum shiig

akikchamu asag, kuashat pampaina nuna Apajuí ashí senchigtin nayaimpi-num puja nunú antawai. <sup>5</sup>Atumek ju nugka juwi pujusjumek, kuashat shiig pegkegnum pujusjum dakujuinagme. Atumek aents bakagtin bakajin maa sujuktatus udegama numamtin awajkamu asajum, Apajuí suwimkajig jukitnaitjume. <sup>6</sup>Atumek aents pegkeg aidauk ayamjumamainchau emajum, maatnume tusajum inamin ainagme.

#### Waugtukaigpajum

<sup>7</sup>Tujash atumek mina yatsug aidauh, ubag aidauh, Jisukristu minitnujiya duka waugtutsuk dakastajum. Ju shiig anentaimtusjum diistajum: Aents ajakan ajakbauk waugtutsuk dakauwai, yumi yutug nugkan iminkati tusa. Nunikmatai ajakan ajaká, shiig tsapai nejekmatai juukta tau asa. <sup>8</sup>Jumamtuk atumshakam Apu Jisukristu taatnujig waugtutsuk dakastajum. Niini dekaskeapi tiuwaitjum duka nunisjumek pujustajum, ni minitnujig namputchí wajaschae.

<sup>9</sup>Yatsug aidauh, ubag aidauh, tikichnash-kam titajime. Tikich aidaujaish kajegdayakjum augmatjunigpajum, Apajuí suwimkan sujamsainum. Wagki Apajuí aents takasbaujin diijus titina duka namputchí wajaschau asamtai. <sup>10</sup>Mina yatsug aidauh, ju anentaimsa diistajum. Duwik Apajuí etsegtujakajua duka kuashat waituinakush, waugtutsuk pujusag, Apajuí chichamenak etsejukajui. <sup>11</sup>Dekainaji nu Apajuin waugtutsuk takajujakajuk, yamai shiig aneasag batsatina nu. Job pachisjumshakam atumek antin ainagme, nigka kuashat waitiakushkam Apajuiyaig anentaimajakuí. Nuniku asamtai, Apajuí ataktú ni duwik ajujakbaun nagkaesau susauwai. Juwi dekainaji, Apajuik jutiinash anempau asampap wait anenjamawa tusaja.

**Suwimak jukiijum dekaskea duke  
chichaktajum**

<sup>12</sup>Yatsug aidauih, ubag aidauih, amina nagkaetamsau adaisam: Wi dekas dutikattajai taja nunak, ni diigkau atí tajume. Nu iman adaisa tachakjumesch nayaimpinmayagkesh, nugá pujuidaukesh, ashí tikich aidaukesh pachisjumek tiigpajum. Dekas imá pegkejak chichaakjumesch waitjutsuk, ehé takugmek ehé titajum, atsá takugmeshkam nunisjumek atsá titajum Apajuí suwimkan sujamsainum.

**Apajuijai chichaamu**

<sup>13</sup>Aents utugchat ajamuk Apajuin augmainai, untsu ni shiig aneas pujauk, kantamak Apajuinak emematmainai. <sup>14</sup>Atum jaakjumek Jisusa nemajuidaun diin aina nu untsuktajum, dita tajutjamawag aceitiyai buukmin aputugmak Apajuin aujtugmastinme. <sup>15</sup>Dita Apajuiyai kajinas dekas etsagagtatuapi tusa aujtugmainamunum, Apajuí etsaentamjattagme. Tuja tudau takasbau ajutjamtaish, Apajuí tsagkugtamtatagme. <sup>16</sup>Nuaduí atumek pempeentunik-

jum pegkegchau awagdaikau akugmesh, tsagkugdajami tusajum seganiakjum, pempentunisjumek Apajuí aujtunista-jum. Aents pegkeja nunú Apajuí augbaujiya nunak dutiksag Apajuishkam antujui. <sup>17</sup>Ju anentaime tusagmi, Apajuí etsegtin Elías aajakua duka, jutiya juninuk aajakuí. Nunú Apajuin aujsauwai kampatum mijan, nuigtú seis nantu yututsuk asati tusa. Nu segamujig imanisag yututsuk asauwai. <sup>18</sup>Imaan mijadai yututsuk aun, Elías ataktú Apajuin aujsauwai yumin yutumtijati tusa. Tima Apajuí yutumtijamtai ajak aidaushkam nagkamdauwai nejetan.

<sup>19</sup>Yatsug aidauih, ubag aidauih, makichik aentskesh shiig pegkegnumak pujuwaitak, nu pujutan idayak Jisukristun tupankuig, atum aidautijum yaimainaitjume, nuna nunitsuk shiig pujustú tusajum. <sup>20</sup>Jushakam dekamainaitjume, makichik aentskesh tikich aents pegkegchaunak wekaetaun yaigká, ataktú pujut pegkegnum awaitaik, Apajuí nu aentsun tudaujinak ashí tsagkujung, ni wakanin megkaemainnashkam uwemtijatnai. Juka kajimat-kigpajum.

# PEDRO NAGKAMCHAKU PAPI AGAGBAU

---

## Pedro kumpamkagtau

**1** <sup>1</sup>Witjai Pedroitjai, Jisukristu chicham etsegtugkata tusa awemamuitjai. Junak atum mina pataag judfo aidautijum nugkem ukuakjum pampagjum nugka Ponto, Galacia, Capadocia, Asia, Bitinia aina nui batsatutigmin agatjime. <sup>2</sup>Apajuí iina Apajiya nu, duwik nagkamas dutikatasa anentaimtusbaujiya dutiksag etegtamajai. Dutijama Jisukristui dekaskeapi tabaunum Wakaní Pegkejin sujamsauwai. Jisukristu mantamnak numpen ukajua duwi, iina tudaujinig Apajuí emtinish bakumamainchau pegkeg etamkauwai, imá minak umigtuktinme tujamu asa. Atumnash Apajuí shiig senchi anempa ibau asa, shiig agkan anentaimsa pujutan amastinme.

## Pedro Apajuí see tibau

<sup>3</sup>Emematiagmi Apajuí, iina Apuji Jisukristua nuna Apají, iina senchi wait anenjama nuaduí. Ni yamajam pujutan sujamsauwai, iina Apuji Jisukristu maamuitak ataktú anean nantakui asamtai. Nuaduí pujut tuke atina nu juwaku ashí Apajuí nayaimpinum umigtamkamua dushakam jukitasa dakamu ajutjamui. <sup>4</sup>Nu ii jukitna duka tsaitash tsaimaitsui, mamutnash mamumaitsui, tsuwatash wechatnai, yagkug kagaama nunikchatnai. Ashí pegkejak agtinai nayaimpinum pujutak.

<sup>5</sup>Nuigtushkam Jisukristui kajintsá anentaimaidau asajin, Apajuí niina senchijin kuitamjamui, tsawan nagkantina duwi Kristu wantintai, uwemat tuke atina nuna jukitin atinme tujamu asa.

<sup>6</sup>Nuniktin asamtai atumshakam ju nugka juwi wajumak tsawan pujuttajum duwi, kuashat waitiamu ajutjamainakuish shiig aneasjum pujustajum. <sup>7</sup>Atum aaja waitiamunum Apajuiyai kajintsá anentaimainajum nu dekapsamu asamtai, Jisukristu taatna duwi dekas eme anentsá diyaaku, nuigtú ememattsá diyaam atinaitjume. Oronum pegkegchau peetkau ajapna ayatak orok juwakti tusa, jiiyai apeamu shiig pegkejama nuna nagkaesau wegawai, atum Apajuiyai kajintsajum anentaimjum duka.

<sup>8</sup>Atumek Jisukristuk wainkachu ainayatkujum aneajume. Yamaikish wainchayatkujum dekaskeapi tabaunum shiig aneasjum dakunkut pujagme, nunú dakujamu iman ajutjamaina duka, nuní dakunkut dekapeamu ajutui tusaish chichamaik shiig tumaitsui. <sup>9</sup>Atum dakunkut pujuinajum duka, Apajuí uwemtijamjatna nunú dekau asajum nuniagme. Nuniau asajum niiní kajintsá anentaimjume.

<sup>10</sup>Duwik Apajuin etsegtujakajua duka: Apajuish aents tudau aidaunash wajuk uwemtijatnukita tusag, dekaatatus anentaimtujakajui. Ditak Apajuí atumin

wait anenjamag uwemtijamjatna nunak dekaidau asag: Dusha uwemtash wajuk atinkita, tusag shiig dekaatatus wakegainak kuashat anentaimesau ainawai. <sup>11</sup>Wakaní Pegkejiya nu ditai pujau asa ichachinam, Jisukristu waitus jaka nantaktinashkam pachis agajajui, ditak: Nunú aents waittsatnush yaki atinaita, dusha wajutik nunikti, tusag dekaatatus senchi wakegajakajui. <sup>12</sup>Nudiagtai Apajuí dekamtikauwai, atum juwi pujagminig nunikchatnai, duka atak tikich batsamtina nuaduí nuniktinai tusa. Nuna yamai Apajuí chichamen etsejin aina nu atumnak, Wakaní Pegkeji senchijin ujpainawai, Jisukristu nayaimpinmaya awemamua nunú uwemtijamainai tusag. Juka senchi wakejumainai, nayaimpinmaya aentskesh shiig dekainachu asag dekaatatus wakejuinawai.

**Jisukristu nemajin  
aidau batsaamain**

<sup>13</sup>Ju dekaidau asajum, shiig umintsajum aneaku imagnisjum pujusjum Apajuí dakastajum, nigki wait anenjamu asa, Jisukristu minitai ashí sujamsatin asamtai. <sup>14</sup>Apajuí uchijí asajum umigkatajum, atum duwik Apajuí dekachu asajum pegkegchau takajakuitjum duke batsamtutsuk. <sup>15</sup>Duka nunitsuk, Apajuí atumin etegtamjawa duka pegkejam asamtai, atumshakam pegkejam amainaitjume, ashí atum wajuk pujagme nuwishkam. <sup>16</sup>Apajuí chichame agagbauwa nui: “Wi pegkejam asamtai, atumshakam pegkejam atajum”, tawa duwi.

<sup>17</sup>Atumek Apajuiya nu: “Apawah”, tajume. Nuniau asajum, ju nugka juwi pujusjumshakam, nigka ajantusjum diimainaitjume. Apajuik aents aidau takasbaujinak betek dita wajuk takasuk ainawa dutiksag suuwai, makichik

aentsun imá senchi wait anentsuk. Nuaduí shiig pujumain ainagme.

<sup>18</sup>Atumek atumi muunjum wainak batsamajakua nuninuk batsatutijum uwemtijamu ainagme. Atumek, waji besen oro, kuichik aina nujaigkish akikmatka uwemtijashbauwaitjum duka shiig dekagme. <sup>19</sup>Kristu achinag jaak, uwig makichkish pegkegchauji atsujun maajakú aina numamtuk, niina numpe pegkegman ukajua duwi, akikmatka uwemtijamu ainaji. <sup>20</sup>Nunak Apajuí nugkash najannatsaig, Jisukristu nunikti tusa tiuwai. Duwik tibaun imapam yamaya juwi nunak umiké jutiin anempau asa. <sup>21</sup>Atumek Kristui kajintsá anentaibaunum Apajuiyaig dekaskeapi tajume. Nigka jakau aig Apajuí inanki, niina inamtaijiya nui Apu ema apusauwai. Dutikau asamtai niiní kajintsá anentaimekum dakaidautigmek, Apajuí anagtabauwa nunak dekas imatiksagkeap amastatua tumainaitjume.

<sup>22</sup>Yamaik atumek chicham dekaskea nu umiau asajum, tudaush idaisau ainajum duwi, atumi yatsum aidaujaish dekaskenum aneeniamunum, pempentunisjumek aneeniajum duka nunisjumek aneenitajum. <sup>23</sup>Apajuinu chicham pegkeja duka tuke atinai. Atum dekaskeapi tiuwaitjum duwi, pujut tuke atina nu ajutjamjume. Nunú pujut Apajuinumia jukimua duka nagkankash-tin tuke atinai, iina apají akimpauwa nu sujamsamua nuninchau asa. <sup>24</sup>Apajuí chichame agagbau:

“Ashí aents aidauk tuke dupa ainawai,  
aantsag aentsú imanjishkam yagkugjai betekai,  
dupa kagatai yagkujishkam kagajá kakegama anmamtainai aentsú pujutji aidauk.

<sup>25</sup>Tujash Apajuí chichamega duka nuninchauwai,

tuke atakea duwish atinai”, tawai. Apajú chichamega duka, Jisukristui uwemtijamainuk tusa etsegkamua nuuwai.

**Kristuwai kaya tuke  
pujuwa imanuk**

**2**<sup>1</sup>Nuaduí idaisatajum ashí pegkegchau aidau: Waitjut, tikichdau diigsá wakejaku kajejut, wainka tsanumku pegkeja iman iwainmamat, tikich pegkegchau pachittsa augmatut aina dushakam. <sup>2</sup>Nuniakum uchi yamá akiintsau muntsun muntsuatatus senchi wakejuwama numamtuk, Apajú chichame shiig pegkeja nu wakejitajum. Nujai wakanmin tsakaakjum uwemat jukimnujum. <sup>3</sup>Atumek Apu Apajú pegkeg asa yaijatna duka, dekapsau asajum shiig dekagme.

<sup>4</sup>Kristu “Kaya tuke pujuwa imana” nujai ijutkau atajum, nunú kaya numamtina nuna Apajú tikichin nagkaesau emauwai, tujash aents aidauk dakitug idaisajui.

<sup>5</sup>Atumshakam Jisukristu aentsji wajasugme, Wakaní Pegkeji jukiú asajum. Nuaduí Wakaní Pegkeji wakega duke takaakjum, ashí Kristu nemajin aidaujai ijuntsajum Apajuiyai sumitkau atajum, Apajú ememattai jega<sup>a</sup> jegamkamua numamtin atasajum. Nunú aaja nuniakjum Apajuik shiig awagmamainaitjume.

<sup>6</sup>Apajú chichame duwik agagbauwa nuwishkam:

“Shiig puyatjusjum antuktajum, wi Siognum<sup>b</sup> apusattajai makichik aentsun,  
kaya dekas shiig pegkeg etegka,  
jega jegamku aputuataasa atsum-  
tayama iman atinun.

Nuanuí kajinas ekeemsaju aidauk, dita kajintsá anentaimtusbaujinak makichkish wainkag juwakchatnai”, tawai.

<sup>7</sup>Atum niini kajintsá anentaimdautigminig, Jisukristui dekas ashí aents aidau nagkaesauwa duka. Tujash niini kajinas anentaimainatsu nunú aidauomag, agagbaunum ditan pachis tawa nunisagke:

“Aents jegá jegamin aidau kayá ajapawajua nunú,  
kaya dekas jegá ichichkatin apujtutia iman wajasé.

Nunú dutika dakitjamua nu atatui ashí tikich aents aidau nagkaesauk.”

<sup>8</sup>Tikich chicham agagbaunmash juna pachis chichaak:

“Nunú kaya nunak kuashat aents tukumak iyajagtinai” tawai.

Nunak dita Apajú umiujinachu asag, suwimkan jukiagtin asag nunikagtinai.

<sup>9</sup>Tujash atumek Apajú mina uchig atinme tusa etegjamu ainagme. Atumnak ni etegtamjau asa sacerdote etamkajui Apú takajin atinme tusa. Jutii pegkegchaunum batsatjin Apajú jigmajui. Dutijamau asamtai, Apajuinu dekas chicham pegkeg shiig anentaimtujúish tumainchauwa nuna etsejuinak pujustinme tibau ainaji.

<sup>10</sup>Atumek duwikik Apajú aentsji aajakchawaitjume, tujash yamaik Apajú aentsji waigkugme. Tuja duwikik Apajú wait anenjachbau aajakuitjume, tujash yamaik atumnash Apajú wait anenjamjaje.

**Apajú nemajin asá pegkegnum  
iwainmamain**

<sup>11</sup>Aneetaig yatsug aidauh, ubag aidauh, jutiik ju nugka juwiyachu ainaji.

---

**a 2.5** Jega Apajú ememattain jegamainakug tikich aidauk kayan ekenag jegamin ainawai, numamtinun jutii Apajú nemajin aidautin tujamui. Tujash jutiiik kayajai jegamchau asá, kaya pachisaik tatsuji. Juka shiig anentaimsajum ausatajum. **b 2.6:** “*Sión*” tawa duka diistá Romanos 9.33.

Nunin ainag duwi tajime: Wait aneasjum iina iyashí pegkegchau wakegamua duka takaa batsamtigpajum. Iyash pegkegchaun wakega nunak, iina wakanig dakitawai. <sup>12</sup>Aents Apajuí nemajuinatsu nujaig shiig kuitamamsajum pujustajum. Atumnak yamaik aents pegkegchauwa iman chichagtamainawai, tujash tsawan jegatna nunú tsawantin atum pegkeg takasuitjum nuna diisag Apajuinak emematiagtinaí.

<sup>13</sup>Apajuí nemaju asajum nugkanmaya apu aina nuna apujin sumimkatajum, Apajuin pegkegchaun chichagkainum.

<sup>14</sup>Aikasjumek apú atuwe aina dushakam antugkatajum. Wagki ditak aents pegkegchaun takaina nuna suwimkan suwak, pegkejan ayamjukti tusa adaikamu ainawai. <sup>15</sup>Apajuik wakegawai pegkejan takastinme tusa, nuna wainainak aents anentainkachu aidaush atumin pegkegchau chichagtamaina dusha itatkatnume tau asa.

<sup>16</sup>Aents chicham umiktá tibauwa nui agkanmitkamush wajuku amainaita nunisjumek pujustajum. Nunú chicham umiktá tibauwa nuwig agkantaitjai tusam pegkegchau takastasa wakeetsuk. Dekaskenmash Apajuí nemagnush wajuku amainaita nunisjumek shiig pujustajum. <sup>17</sup>Ashí aents aidauk ajantusjum diyakjum, Jisukristun nemagkaju yatsut aina dushakam aneetajum, Apajuishkam ajantusa diyakjum, ju nugkanmaya apu aina nuna apujishkam ajantusa diistajum.

**Kristu waittsauwa  
nunisaik waitmain**

<sup>18</sup>Inak aidautigmesh atumi apujum shiig ajantusjum diyakjum umigkatajum. Apu pegkeg aina imá duke umigkatasa wakeetsuk, tikich apu pegkegchau aidaushkam umigkatajum. <sup>19</sup>Atum pegkegchau takasbauk atsugta-

maig waitkagmainakuish, Apajuí nemajin asajum katsunjatajum. Duka Apajuinak shiig awagmawai. <sup>20</sup>¿Wají pegkejaita ii pegkegchau takasbaunum suwimak juwayatku katsuntajai tabaush? Pegkeg amainai, ii pegkegchau takaschamunmag suwimak juwaku, kajetsuk emamkesa katsuntamua duka Apajuin shiig awagbau asamtai.

<sup>21</sup>Kristuk jutii waittsatnun iwaintugmak waittsauwai. Nuniku asamtai Apajuí jutiinak etegtamjauwai, ditash Kristu waittsauwa nunisag waittsatnume tusa.

<sup>22</sup>Kristuk makichkish tudaunak takaschauwai, waitjutnakesh waitjuachui. <sup>23</sup>Pegkegchau chichagmashkam nigka dutiksag iikag tichauwai.

Waitkamshakam iikmakchauwai, Apajuin idaitusui ni dekas dutikati tusa.

<sup>24</sup>Kristu numinum achinag jakauwa duwi jutii tudaujinak akikmatjamkauwai. Nuniku asa nigka wakegawai, tudau takatnak idayinak shiig batsamsag pegkeja nunak takastinme tusa. Niina iyashí asutiam tsupinjauwa duwi pegkeja duke takamainaitji, pegkeg pujustasa. <sup>25</sup>Atumek duwikik uwig kuitamkachbau wainak yujama numamtuk yujakuitjume. Tujash yamaik Jisukristua nuuwai atumin kuitamjamak ayamjutpa duka.

**Nuwentin aidau  
nuwejai umigdaimain**

**3** <sup>1</sup>Atum nuwatkam aidautigmek atumí aishuminig sumimkatajum, Apajuí chichame etsegbaun aishum dekaskeapi tuinachushkam, atum shiig pujamun waipainak, nuniktajum tachamaitak dekaskeapi titinme, <sup>2</sup>dekaskenum Apajuí umigkujum imagnisa pujau asagmin. <sup>3</sup>Atumek jaanch pegkeg iwajamu aina ibau nugkugjum iwagmamjatasagmek wakemaitsume. Intashmesh tikich



pegkeg diigsatnume tusagmek iwagmai-  
tsugme, nuigtú oro aina imanjai  
iwagmamjatasagmesh wakemait-  
sugme. <sup>4</sup>Dekas iwagmamta duka pujut pegkeja  
nuuwai, nunin asantai atumek nuwa  
kakagchauch tutitjachu amainaitjume,  
nuna Apajuik wakegas diiyawai. <sup>5</sup>Nuwa  
pegkeg duwik batsamajakajua  
dushakam, Apajuiyaig kajinas anentai-  
maidau asag, imá aishinig sumimajakú  
ainawai. <sup>6</sup>Sarashkam nunisag Abragnak  
umijak mina apug tujakú, emematus  
anentau asa. Atumshakam pegkeg  
takaakjumek, Sara nawanjiya numamtin  
ainagme, nunin asajum makichkish  
puyatkas pujumainaitjume.

<sup>7</sup>Aishmag aidautigmeshkam nuwem-  
jaig shiig antugdaikajum pujustajum,  
nuwak kakaakchau asantai. Apajuish-  
kam nuwanash wait anentau asa pujut  
nagkanchaun susauwai. Atum nuwemjai  
shiig pujushtak, Apajuishkam ni  
augmash antugtambachagatui.

#### **Kristu nemajuidau nunimain aidau**

<sup>8</sup>Aatsa nuniakjum ashí betek nuninuk  
anentaimkau, puyatjus anentaimtunin,  
yatsut anendayas aneenin, wait  
anenakgtin, nuigtush ememachu  
atajum.

<sup>9</sup>Pegkegchau awajtamainakuish  
dutiksagmek iikaigpajum, pegkeg-  
chau chichagtamainakuish dutiksagmek  
chichagtsuk pegkegnum ausatajum.  
Jutiinak Apajuí pegkegnum yaimpakta-  
tus etegtamjau asantai, tikich aidaush  
pegkegnumag yaimainaitji.

<sup>10</sup>“Ni shiig aneas dakujus pujustatus  
wakegauk, pegkegchau chichat-  
nak,  
waitjtnashkam idaimainai.

<sup>11</sup>Pegkegchau takat aina duka  
idaisatajum,  
nuniakjum pegkeg aina duke  
takastajum.

Nuniakjum shiig agkan anentaimsa  
pujustasajum wakeetajum.

<sup>12</sup>Apu Apajuik pegkejan takaina nuna  
kuitamak  
dita augmash antujui,  
untsu aents pegkegchaun takaina  
nunak dakitawai.”

<sup>13</sup>Atum imá pegkeja duke takaagmi-  
nig, makichkish pegkegchau etamainuk  
atsawai. <sup>14</sup>Tujash atum pegkeg  
takaakjum waitiakjumek shiig aneasta-  
jum. Tuja pegkegchau awajtamaina-  
kuish ishambkaigpa. <sup>15</sup>Apu Kristuwa nu  
puyatjusjum ememattajum, nuniakjum  
tikich aents: ¿Wagka Kristush  
nemagjume? tujamkuish atum Kristui  
kajintsá anentaimkujum dakainajum nu  
ujamainush shiig umintsau atajum.

<sup>16</sup>Tujash niishkam ajantusjum diyakjum,  
kagkagchauch shiig chichatajum.  
Atumek pegkeg takat dekajum duke  
takau atajum, nuniagmin tikich Kristu  
nemajuinachu pegkegchaun chichagta-  
maina nu datsajagtatui. <sup>17</sup>Dekas  
pegkejai, Apajuí atumin pegkejan  
takainak waittsati, pegkegchau takaaku  
waitmaina nuna tusa wakejtpakuig  
waitmainaitjum duka.

#### **Jisukristu iina iwaintugmak waittsamu**

<sup>18</sup>Kristushkam makichkia jakauwai  
ajumaish jakashtinun iina tudaujin  
tsagkugtamjatatus. Nigka machikish  
pegkegchau ni waitmainjig atsugmaitak,  
Apajuijai igkumtijamkata tau asa  
pegkegchau aidanum waittsauwai.  
Iyashinig dekas jakauwai, tujash niina  
wakaninig jakachui. <sup>19</sup>Nunik jakashkam  
aents jinaw wakaní tuke achikbaujai  
betek batsatbaunum weuwai,  
chichaman etsegkatatus. <sup>20</sup>Apajuí Noen  
tiuwei: Arca najanata. Tusa tima arcan  
najana ayatak ocho aents uwemkajui.  
Nunikmatai tikich aents chichaman

umikchaju aidauk ashí jakekajui. Jujú jakekú aajakaju aina nuna wakanin Jisusak wejiuwai ujaktatus. <sup>21</sup>Nunú yumia duka Noejai batsatunak ajekjachajui, numamtuk Jisukristu aneantua nujai ijutkau pujamunum uwemjau ainaji. Jutii yamiimainag duwi Jisukristujai ijutkau pujamua nu iwainmamainaji. Yamimamua duka iyash pegkeg emá uwemjatasaik yamimantsui. Jutiik Jisukristu mantam-dauwa nui dekaskeapi tabaunum uwemkau asaja, Apajuí emtinig bakumamainchau ainaji. <sup>22</sup>Yamaik nigka nayaimpinum waka, ashí nayaim-pinmaya aents aidaun Apuji wajas, nuigtú wakan senchigtin nayaimpin-maya aina nunash Apuji wajasá, Apajuí inamtaijin untsujin eketui.

**Jisukristu pujusua  
nunisaik pujumain**

**4** <sup>1</sup>Kristu juwi pujusá niina iyashin waittsauwa nunisjumek atumshakam waitmainaitjume. Wagki iyashnum waitiamua duka, tudau taká takaakua wetanmag dakitmitkagbau asamtai. <sup>2</sup>Wajupa tsawanta ju nugka juwi pujuttaji duwik, pegkegchau takatak anentaimtú batsamtsuk, Apajuí wakegamua duke takamainaitji. <sup>3</sup>Maake yamaik, yaunchuk Apajuí nemagchau asagmek, atum pegkegchau wakegamu wakejusjum takaakjum, tsanijimta duke tunamatjajum batsamtakjum, umutchkam imanik nampektasajum umakjum, nampekjumesh jiyá jiyaniitjai yu wajakuitjume, nuniakjum Apajuí dakitamua nunú apajimat batsamtuja-kuitjum duka idaisatajum. <sup>4</sup>Nunú nuniajumina aents atumjai pegkegchaun takajakú aidauk, atum ditajai ijunja pegkegchau takat dakitamun waipainak: ¿Wagkag yamaish jutiijaish ijuntsua? tusag pegkegchau chichagtamainawai.

<sup>5</sup>Tujash Jisukristu, aents jakau aidau, iwaaku aidaujai dekabau atina duwi, dita takasbaujinak diisá titinai. <sup>6</sup>Nuaduí Apajuí chichameg aents jakaja dushakam ujakbau ainawai. Aents iwaaku pujusá dekaskeapi tiu jakau aina duka, wakaninig Apajuí tuke pujuwa nunisag pujustin ainawai.

<sup>7</sup>Tsawantak jegawai ashí wájí aina nunú nagkankatnuk. Nuaduí atumek emetmamjajum aneaku pujusjum, Apajuí aujú batsamtajum. <sup>8</sup>Tuja juna nagkaesauwa nuuwai puyatjunisa pempeentuniki aneenita duka, aneenita nujaiyai kuashat pegkegchau aidaush pempeentuniki tsagkugdaimaina dushakam. <sup>9</sup>Atumi jeemin ayamsatatus minakuishkam, shiig anentsajum awayatajum pegkegchau chichagdaitsuk. <sup>10</sup>Makí makichik ii yupichu dutikatnun Apajuí anenjauch amasajua nujai, tikich aidaush yaigtajum. Atumnak Apajuí wait anenjamu asa, ashí ni amasbauwa nunú shiig kuitamsajum takamain ainagme. <sup>11</sup>Apajuí chichame etsegkugmesh, niina chichame tawa dutiksagmek etsegkatajum. Tikich yayakjumesh, Apajuí atum yupichu dutikatnun amaa nujai yaigtajum. Nunú aajajum dutikakjum Jisukristu yaimpasmatai, Apajuí ajumaish tuke imanuk senchigtin, imá nigki atina nunú ememattajum. Aatus atí.

**Kristu nemajin asá waitmain**

<sup>12</sup>Mina aneetaig yatsug aidauh, ubag aidauh, atum Apajuiyai kajintsá anentaimjum nuna, dekaskeash nuninait tusa dekapjabaunum waitiamu ajutjamainakuish, tikima wájí nagkaechataiya imanuk anentaimtú pujuigpajum. <sup>13</sup>Ayatak shiig aneestajum Kristu waittsamua nunisjumek waituidau asajum, ni imanijiai wantinkatna duwi

imá shiig aneasjum dakunkut pujustin asajum. <sup>14</sup>Atum Kristu nemajin asagmin, pegkegchau chichagtamainakuish, shiig aneasjum pujustajum. Wakaní Pegkeji dekas imana nunú atuminig pujau asamtaí.

<sup>15</sup>Nunin asamtaí makichkitigmekesh magkagtin, kasa, pegkegchau takau, tikichin pegkegchaujin yujajuinak waitú yujau aina nunin aigpajum. <sup>16</sup>Atumek Jisukristu nemajuidau asajum waitiakjumes datsaamtsuk, Apajuishkam shiig aneasjum emematmainaitjume nu waitiamua duwi.

<sup>17</sup>Apajuí aentsji aidauti waittsatnuk yamaik nagkamnae, aatus nu jutiiní waitiamu nagkamna aniaish, Apajuí chichamen uminatsu dusha, ¿wajuk nagkankatnukita? Ditak shiig senchi waittsatin ainawai. <sup>18</sup>Jisusa nemajuinak uwemkau pegkejan takaidaukesh waituina nuniaish, iaents Apajuin dakitin pegkegchau takau aidaush wajukatnus aina! <sup>19</sup>Nunin asamtaí, atum Apajuí waittsati tusa wakejutpa-munum waitiakjumes, ayatak pegkeja duke takatajum. Nuniakjum Apajuí iina najapauwa nu, ni tibaujinak imatiksag umina nu, atumi wakanmishkam idaitustajum.

**Jisusa nemajuidau diin aidau,  
datsauch aidaujai chichagbau**

**5** <sup>1</sup>Yamai atum Kristu nemajuidau diin aidautigmin, wishakam Kristu nemajuidau diin asan tajime. Kristu waitkasa maamunash wi dekas mina jiijuí shiig wainkauwaitjai, nuniku asan dakajai, ni juwi taakui dekas pujut pegkeg iman atina nu jukitnaitag nuna. <sup>2</sup>Jisukristu nemajin aidau shiig kuitam-katajum, uwijá kuitamin aidau uwigjin kuitamin aina imatiksajum. Tikich inapakui kuichik jukitasa takamainaitam nunitsuk, shiig wakejusjum Apajuí

wakega dutiksagmek takastajum. <sup>3</sup>Atum wagagsajum chichagkatasagmek wakeyigpa, nunitsuk atumin pujutjum pegkeg iwaintuktajum. <sup>4</sup>Atum nu betek dutiksagmek umiakjume, Kristu dekaskenum uwijá kuitamna nunú minakui, wájí shiig pegkeg tuke atina nu jukitnaitjume.

<sup>5</sup>Antsagmek datsauch aidautigmeshkam, Jisusa nemajuidau diin aina nui sumitkau atajum. Ashí atum aidautigmek emematsuk, tikich aidaujaish pempentunisjumek sumimdaimain ainagme, wagki:

“Apajuik aents ememachu aidau wait anentug yayaak, emebau aidauak yaitsuk idayu asamtaí.”

<sup>6</sup>Apajuí dekas senchigtina nuna emtinig imanchauch anenmamtajum, ni tsawan jegatai iman etamtin asamtaí. <sup>7</sup>Ashí atum uyumamugmik Apajuí idaitustajum, ni atumnak kuitamjamu asamtaí.

<sup>8</sup>Aneaku niimkau atajum, atumi shiwajum iwanchia duka pegkegchaun takamtijamsatus, ikamyawa kajeak shinuwama imatak teentugmawai. <sup>9</sup>Nuniakuishkam atum Apajuíyí kajintsá anentaibaunum iwanch waitkagmainakuish katsunjatajum. Nuniakjum adeagtajum, ashí tikich nugkanmaya atumi yatsum aidaush, wijai betekap waituinawa tusajum. <sup>10</sup>Tujash atum ju nugka juwi pujusjum wajumak tsawantai waittsagminchakam, Apajuí shiig pegkeg etabiagtatui, waittsamujin diisag junik dekapjainum tusa. Dutijama nigka wait anenkagtina ibau asa, Jisukristujai pujustinme tusa niina senchijin amas, kakajus niiní tsujamainchau etami ajumaish wajukashstina nui awaintamawagtinai. <sup>11</sup>Niiyai Apuk, iman asa tuke Apuk atinai. Aatus atí.

**Inagnaku kumpamkagtamu**

<sup>12</sup>Jujú papiinak Silvano yaintsamtaí agajan ni minakui awemajai. Nigka

yatsut dekas shiig Kristu umignai. Tuja wi papiin agatjim junak, atum Kristui kajintsá anentaimjum duka, nuni nagkaemasjum anentaimtakjum, Apajuí dekaasenum atumnak anempaina dusha dekaatajum tusan agatjime. Ashí wi tajim nuwig emetmamjajum pujustajum.

<sup>13</sup>Jisukristu nemagkaju Babilonia pujuina nunashkam Apajuik etegjauwai, ni atumin etegtamjauwa dutiksag. Nunú aidaushkam atumnak

kumpamjamainawai, Marcos mina uchijua imana dushakam aikasag kumpamjamainawai. <sup>14</sup>Makí makichik atum aidautigmeshkam aneenisjum ashí tikich aidaujaishkam kumpamdayatajum, dutikdayakjum atum ditajai aneeniamushkam iwaintuniktajum.

Ashí atum Kristunu aidautigminak shiig agkan anentaimsa pujutan amastinme.

Aatus atí.

## PEDRO AWENTSAIK PAPI AGAGBAU

---

### Pedro kumpamkagtamu

**1** <sup>1</sup>Witjai Simón Pedroitjai, Jisukristu inake asan chicham etsegkata tusa awemamuitjai. Jutii Apajuiyai kajintsá anentaimainag nuninuk atumesh asajum, iina Apajuiji, uwemtijamin Jisukristu dekas pegkejan takauwa nui kajintsá anentaimaidau asagmin agatjime. <sup>2</sup>Iina Apají Apajuí, iina Apuji Jisusjai wait anenjamag shiig agkan anentaimsa pujutan amastinme. Atumek ni pachisjumek shiig dekau asagmin.

### Jisusan nemagkaju aidau pujumain

<sup>3</sup>Ashí iina pujutjin atsumamu, Apajuí umigku pujumaina nunash, Apajuí niina senchijinig sujamsauwai. Jisukristu etegtamag, niina imanjinak, ashí ni takatji pegkeg aina nujai dekamtijamauwai. <sup>4</sup>Nunú senchik ni ashí pegkeg tikichin nagkaesau aidaun anagtamauwa nuna sujamsauwai. Nuigtushkam: Ashí pegkegchau katsek ju nugka juwi pegkegchau anentaimat aina nuwiyen wi agkanmitkatjame, dutikakun witag imajuk ematjame, tusa anagtamauwai. <sup>5</sup>Nuaduú atumshakam Apajuiyai kajintsá anentaibau aan kuashat ajutjiti tusa kakanmamkujum shiig pujustajum, shiig pujakjum Apajuish dekaskenmash yaita, tuja wajina dutikauwaita, wajina dutikati tusaya wakejupawa dushakam shiig dekaatajum. <sup>6</sup>Nunú shiig dekau asajum

kuitamamka pujakjum, atum pegkegchau wakegamuk depetkajum idaisatajum, aaja kuitamamka pujakjum, ashí Apajuin shiig awagma duke emamkesa takastasajum kakanmamsatajum, nuniakjum pujutjum Apajuiyai idaisatajum. <sup>7</sup>Aaja pujakjum Jisukristu nemagkau aidaujaish yatsut anendaisajum aneeniakjum, ashí tikich aidaujaish dutiksagmek aneenitajum.

<sup>8</sup>Ju aina ju imatiksagmek shiig takaakjumek, atumi pujutjuminish, ii Apuji Jisukristu pachisa dekatnumash wainkagmek juwakchattagme. <sup>9</sup>Juna betek umiinachuk aents wainmachujai betekai, nuniachkush atushat wainmachua nuninai, ashí niina tudaujin Apajuí tsagkujamua nuna kajimatu asa. <sup>10</sup>Yatsug aidauh, ubag aidauh, aan nagkaemasa nunimainaitjum duka, atum Apajuí etegjamu asajum wajuk pujumainaitjume nunisjumek pujustasajum kakanmamainaitjume. Aaja nuniakjumek kakajus pegkegchauk takaschattagme. <sup>11</sup>Nuniagmin Apajuí shiig anenjamag, iina Apuji uwemtikagtin Jisukristuwa nuna inamtaiji tuke atina nui awaintamatnai.

<sup>12</sup>Nuaduú wika junak ashí dekagmin-kish tuke aneemtiksanké atajtjime yamaya juwikish, dekaskea nuna jintinjamawajua nuwig emetmamajum batsatu asagmin. <sup>13</sup>Wi iwaaku pujag duwik, tuke aneemtiksanké amainaitjim duka pegkejai. <sup>14</sup>Wika junak tajime, wi dukap pujutsuk jakatnun iina Apuji Jisukristu dekamtijauu asamtai.

<sup>15</sup>Tujash ashí wi dutikmainnak dutiksan dekapsatjai, wi jakamtaish, wi jintinkag-tuamuk adeagminjum, tau asan.

#### Jisukristu imanjin wainkaju aidau

<sup>16</sup>Jisukristu ju nugka juwi pujusá, ni senchijiin aents dutikmainchaun dutikauwa nuna pachisan atumin jintinkun, nuigtushkam Jisukristu ataktú tatnujijai pachisan jintintuabijime. Nunak wainka nagkami augmattsamun tichabijime, shiig dekaskea nuna tibaijime. Jutii iina dekas jiin wainkabijai, ii Apuji Jisukristu yapajina niina tsaaptinjin egkemak tsawan wajas waju. <sup>17</sup>Apajuí Jisusa Apajiyá nu niina imanjin tsaaptin awajus eme anentus chichajak: “Ametme mina uchig aneetaigmek, duwi aminí shiig aneajai”, tusa <sup>18</sup>tabau antukbajii Jisusjai mujanum pujusaja, nui Apajuí pujau asa pegkeg awajsamunum.

<sup>19</sup>Nuaduí wika Apajuí etsegtin aidau Apajuí chichame uminkatnun agajajua nunak dekaske tajai. Nunú chichama duka, lámpara ekemakam suwen tsaaptin emama numamtinai. Atumesh dita agagbauwa duka shiig emamkesjum dekamain ainagme, nu shiig dekamtijamatagme atum wajuk pujumainaitjume nunak. Jisukristu ataktú juwi minakug, yaya tsawak tsaaptin wajas aama numamtuk anentaimin yapagtugmawagtinai. <sup>20</sup>Chicham uminkatin nuniktinai tusa agagbauwa nunú, dekatkawk shiig dekaatajum aents nagkami tichamuapita tusajum. <sup>21</sup>Nu uminkatin tibauwa duka, makichkish aents wakegak tibau ainatsui, duka aents pegkejam Apajuinu aajakú aina nuna, Wakaní Pegkejyia nu ujaam tiaju ainawai.

#### Waitá jintinkagtin aidau

**2** <sup>1</sup>Tujash yaunchkesh Israel aents aina nuwish Apajuí tujutne tusag wainak etsejukú ainawai, yamaya juwish atuminish waitá jintinkagtinush

agtina nunisag, dekaskeskaitai tumainun dita dewakbauji pegkegchauwa nuna jintiawagtinai, nuninak Apu Jisukristu iina uwentijamjauwa nunash wainkayai tiagtinai, tu yujaidau asag anenjas batsatai dita suwimak jukitnuji ishamain jegajiagtinai. <sup>2</sup>Nunú aents aidau pegkegchau unumatjamujai takaamujyia nuna kuashat aents aintus wejuinak, Jisukristu chichame dekaskea nuna pegkegchau chichajiagtinai. <sup>3</sup>Ditak kuichkin senchi wakejuidau asag waitan jintinkagtiagtinai, tujash nunú aidaunak Apajuí duwik nagkamas suwimkan jukiagtin atinme, tiuwa nunak uwemtugchagtin ainawai.

<sup>4</sup>Nagkamtinish Apajuik nayaimpinmaya aents tunamakaju aidaunash tsagkugsuk, dita pujusá waittsatnunum ajapawajui, dutikak suwenum batsasuí jiju ikagmawai jigkajá batsamaina numamtuk, tsawan jegatai suwimkan susamig tau asa.

<sup>5</sup>Nuigtush Apajuik aents yaunchuk batsamajakajua nunakesh tsagkujachui, dutikak yumin yutumtikjauwai, dutikamu asa abaujak ashí nugkan amuak ijinauwai, tujash Noé pegkejan chichagkagtujakua nunak, nuigtú siete aents aidaujai uwemti-jauwai. <sup>6</sup>Dutiksag yaakat Sodomanash, Gomorranashkam apek yuku awajsauwai, ashí aents pegkegchau aidau atak batsamtin aina dushakam juna dekainak ishamkatnume, pegkegchau aidau suwimak suwamun tusa. <sup>7</sup>Dutikakush Lotnak apeachui nigka aents pegkeg asamtai, tikich aidau tikima tsumainun takaagtai, anentaimak waitú pujú asamtai. <sup>8</sup>Lotak nu aents aina nujai ijunag pujau asa, kashí kashinig waitú pujau pegkegchau takaagtai, shiig pujumainchau dekaapeau asa.

<sup>9</sup>Aatus Apajuik niina aentsji aidaunak ishamainnum jegataish nigki yayawai, dutikak aents pegkegchau takaidaunak ayatak diiyawai tsawan jegatai

suwimkan susamig tusa. <sup>10</sup>Ditak pegkegchau takastasa wakegainamujin taká batsatu asag, Apajuí tabau umitnash dakituidau asagmatai, Apajuí ditanak suwimkan susagtinai. Nunú waitan jintinkagtin aina duka emebau, kakajus antumtikmainchau asag, Apajuí aentsji nayaimpinmaya senchigtin aina nu pegkegchau chichagtanash ishamainatsui. <sup>11</sup>Tujash Apajuí aentsji nayaimpinmaya senchigtin aina dukesh, ditá pachisajag Apajuí emtinig pegkegchau-nak chichajuinatsui.

<sup>12</sup>Ditak shiig dekainachiatok pegkegchaun chichainawai, kuntin achiká maam atinjin dekatsuk akiina numamtuk akiinau asag, ditashkam ditá pegkegchaujin nunisag suwimkan jukiagtinai. <sup>13</sup>Tikichin waitkasu aina nunisag ditash waittsagtin ainawai. Ditak pegkegchaun wakejus ashí wainainamunum takainakush, shiig aneasa pujustina iman dekapmamainawai. Ditak atum shiig aneasjum ijunja yuwinamunum wayawag, atumin idastamainun pegkegchaun takainakush, pegkegchaunap aniaja tusagkesh anentaimainatsui.

<sup>14</sup>Nunú aents aidauk nuwanak iyashnum tsanigtasa anentaimtutskek diimain dekapenatsui, imanidau asag tudau takatnash yawetuinatsui, nuigtush tsanuinawai Jisukristun imagnis anentaimtuinatsu nunak, nunin ak yatak wiyakchameata tabaunak anentaimtus yujau ainawai, nunin asag tikima aents pegkegchau ainawai. <sup>15</sup>Ditak Apajuinu pegkeg takatan idaisag, Balaam Beor aajakua nuna uchijí pegkegchau takaamujin kuichkin jukitatus wakekauwa numamtuk wájá yujainawai. <sup>16</sup>Tujash Apajuí etsegtin Balaam aajakua nu pegkegchau dutikatasa wejamujinak, burro ni entsamsá wegamujiya duke aentstí

chichamen chichachuitak, aentstí tumaina imatika jiyakuí. Dutikam ni anentaimtusa wejamunak idaisauwai.

<sup>17</sup>Nu jintinkagtin aidauk, yumigmat taimunum yumi pimutsuk buku wajas aama numamtin ainawai, nuigtushkam yujagmin dase umpuí juwama numamtin ainawai, tikichnak pegkegnum yayachu asag. Apajuí nunú aidaunak shiig suwenum batsamsatin atinme tusa idaisamu ainawai. <sup>18</sup>Wagki ditak chicham dekaskechu aig pegkeja imanun chichainak, aents duwik pegkegchaujin idaisau aidaunash tsanujag, pegkegchau takatnum wakemitkakag awagkiag pegkegchaun takamtikaidau asagmatai.

<sup>19</sup>Ditak, atum wakegamu takamainnumak agkantaitjume tuinawai, ditakesh pegkegchau takatnumak agkan ainachiatok. Nuniau asag tudau takatan idayinatsu duwi tuke achikbaujai betek pujuinawai.

<sup>20</sup>Apu Jisukristu uwentikagtina nuna nemajuinak ashí pegkegchau ju nugkanmaya takatan idaisauwaitak, nunú aidau tsanujam ataktú pegkegchau takaakug, yaunchuk aajakbaun nagkaesau pegkegchau wegawai.

<sup>21</sup>Ditak dekas Apajuí wajak pujustinme tusaya wakegawa nunak dekamainchau dekapin ainawai, nuna shiig dekaawaju ainayatak chicham pegkeg Apajuinu umiktina nuna idayinak ataktú pegkegchau waketjuidau asag. <sup>22</sup>Awai chicham yaunchuk tibau: “Yawá ni iyakbaujinak pempeentuki yuuwame, nunisag kuchishkam yamá imai akupkam pempeenkuchan tadaetuwame”, tawa numamtuk wajawai aents pegkegchau takaajakbaujin waketjuki takaakug.

### Jisukristu minitnuji

**3** <sup>1</sup>Aneetaig yatsug aidauh, ubag aidauh, junak ataktú patasnak agajan awetajime. Nagkamchakun

papiin agajan awetimjim duwish nuní pujustajum timajim dutiksanuk, yamaish nunak awentsanuk takun, itugsag pegkeg aina nunak anentaimtusanum tusan wakejajime. <sup>2</sup>Yaunchuk Apajuí etsegtin pegkejam aidau chicham tibauiwa nunú aneaku atajum. Nuigtú Apu Jisukristu iina uwemtijamin chicham umiktajum tibaun, Jisus chicham etsegtugkatajum tusa ishiakbau aidau jintinjamawajua dushakam aneaku atajum.

<sup>3</sup>Dekas dekatkauk ju dekamain ainagme. Tsawan nagkantina duwik, aents dita pegkegchau takastasa wakegamujinak batsamtuidau asag, chicham pegkeg jintinkagtamun pachisag dushikis chichajuidaush agtinai. <sup>4</sup>Nunidau asag: “¿Kristu ataktú taatnaitjai tiuwa dusha wajukaeki? iina muunji aidau jinawagmataish, nagkamsa najankamua duka yamaikish nunisag ainajama”, tiagtin ainawai.

<sup>5</sup>Ditak yaunchuk nagkamas, Apajuí nayaimpin najana niina chichamenig nugkan yuminmayan akankauwa nu dekatnak dakituinawai. <sup>6</sup>Yaunchuk Apajuí niina chichamen yumin yutumtikag ashí nugkan amugmatai, aents nui batsamajakua duka jinawajui. <sup>7</sup>Nayaim, nugka yamai awa jushakam niina chichamenig esaktinai. Duka Apajuí aents pegkegchau takaidaun suwimkan susatna duwi nuniktinai.

<sup>8</sup>Aneetaig yatsug aidauh, ubag aidauh, jusha dekachu wajukmaina nunikaijpajum, Apajuí diismak makichik tsawanta duka mil mijana nujai betekai, tuja mil mijana dushakam makichik tsawanta nuninai. <sup>9</sup>Apajuik ni tibauijiya nunak umitskek idaisashtatui. Tujash atumek, Apajuí ni tibaunak umikchatna nuninun tikich anentaimainu nuninuk anentaimaitsugme. Junak ashí Jisukristu dekawag, pujutjin

yapajiwag, waittanum wetsuk, uwemjatnume tusa dakagmak aniwai.

#### **Yamajam nayaim, yamajam nugka**

<sup>10</sup>Tujash Apu minamuk kasa pachiachmau kashi miniyama numamtuk atinai. Nu nuniemunum nayaimpinum ayaa duka shiig ishamain wajakag megkaejatnai, aantsag nugkashkam, tuja ashí nugkanum ayaa nujai esakag megkaejatin ainawai.

<sup>11</sup>Atumek ju imanik esaká utsankatin asamtai, pegkeg aina duke takaakjum, imá Apajuik umigkujum pujumainaitjume. <sup>12</sup>Nuniakjum ashí aents takasbaujin diijus Apajuí titina nu, itugsag tsawan waamak jegaa tusajum wakejusun dakastajum, nunú tsawantinig nayaimpinum ayaa duka esaká, ashí nugkanum ayaa nujai yumimeak megkaejatnai. <sup>13</sup>Tujash jutiik ni anagtamamu, yamajam nayaim, yamajam nugka atina nu dakainaji, nuanuig ayatak pegkejak agtinai.

#### **Anemtikdaibau**

<sup>14</sup>Aneetaig aidauh, nunú aatus nagkaemaktin asamtai, ni dakainakjum pujakjum shiig kuitamamsa pujuta nui kakanmamsatajum, ni taakushkam pegkegchau takaamugmish, atsgutamu shiig agkan pujamugmin waipaktinme. <sup>15</sup>Jushakam dekaatajum, iina Apuji waamak minatsu nunak, jutií aidautin uwemjatnume tujamu asa dakamak aniwai. Juna pachis iina aneetaiji yatsug Pabloskam, Apajuí dekat susamu asa niishkam agajui. <sup>16</sup>Pablo ashí papiin agajua nuwig nuna pachis agajui, nunú aina nuwiya shiig antumainchaush ainawai. Nuaduí aents dekachu aidauk, nuigtú Jisusai imatikas kajinas anentaimainatsu duka, antumainchau dekapenak yajupiwag wainak etsejuinawai. Dutiksag Apajuí



chichamen tikich agajajua nunash,  
yajupia etsejuidau asag dita suwimak  
jukitnunak umigmamainawai.

<sup>17</sup>Nuaduí aneetaig yatsug aidauh,  
atumek nunú waji nuniktin emtika  
dekau asajum kuitamamkatajum, aents  
pegkegchau tsanugmajagmatai atum  
dekaskeapi tajum nu sakapajajum.

<sup>18</sup>Duka nunitsuk dekas iina Apuji  
Jisukristu Uwentikagtina nuna shiig  
awagma nunisjumek pujakjum, ni wait  
anenjabaunum aan senchi yaimpain-  
kui, niishkam nuní senchi shiig dekaata-  
jum. Nigki yamaish, atakea duwishkam,  
tuke ememattai atin atí.

Aatus atí.

# JUAN NAGKAMCHAKU PAPI AGAGBAU

---

## Chicham pujutan sukagtina duka Kristui

**1** <sup>1</sup>Kristu duwik nagkamas nugkash najannatsaig pujujakua nunú chichaamu antuku asá, ni iwainaja takaamushkam puyatjusa iina jiin wainkaju asá, ii uwejinish achiká dekapsauwaitji, chicham pujuta sukagtin Kristuwa nunú. <sup>2</sup>Nunú pujut tuke atinun sukagtina nu Aentsmaga waintintugmakui. Nunú wainkau asaja pujut tuke atinun sukagtina nu pachisa etsegtaji, nigka yaunchkek ni Apajijai pujuwaitak wantintugmakui. <sup>3</sup>Nunin asamtai jutiik ii wainkamu aida, ii antukbau aina nu etsejuinaji, jutií Apajuijai ijutkau ni Uchijí Jisukristujaish ijutkau pujuinag nunisjumek, atumshakam jutiijai ijutkau atajum tusa. <sup>4</sup>Ju dekaajum atumesh shiig aneakjumin, jutiishkam shiig aneasagmi tusan agatjime.

## Apajuik makichkish pegkegchaunak takachui

<sup>5</sup>Jisukristu jintinjamkui antukuitag nuna ujjajime, Apajuik makichkish pegkegchaunak takachui, iman asamtai niinig makichkish pegkegchawk shiig atsuuwai. <sup>6</sup>Jutií Jisukristujai ijutkau pujajai tayatku, pegkegchau takata duke wekaetakui, waitjaku tu wekaemainai, dekaskea duke takaachiatku tau asá. <sup>7</sup>Tujash Apajuí makichkish pegkeg-

chaun takatsuk pujuwa nunisaik, jutiishkam pegkegchau takatsuk pujaku, tikich aidauijaish ijutkau pujajinig, Apajuí niina Uchijí Jisukristu jutií tudaujin mantamdauwa nuna numpeen, ashí iina tudaujinash nijatjamag esakatjamui.

<sup>8</sup>Tujash minak tudauk atsgutawai tumamkuik, iik pempeentumaki tsanuumaku tu wekaemainaitji, dekaskea nu tachau asá. <sup>9</sup>Dekas tu wekaetsuk, wika tudauwaitjai tusa Apajuí ujjajinig, tsagkugtamag bakumamainchau etamtatji, nigka pegkeja ibau asa, ni tibaujinash betek umina duwi. <sup>10</sup>Tuja wika tudaunak takachujai tumamkuik, Apajuí waita nunin emaku taji, niina chichamega nu aatus tujamtsaig tau asá.

## Kristui iina ayamjupauk

**2** <sup>1</sup>Mina uchuchig aidauwah, jujú aidaunak tudaun takasainum tusan agatjime. Tujash makichkitigmekesh yajá aneasjum tudau takaakjumesh dekaatajum, Apajuí emtin iina ayamjupauk Jisukristu pegkegma nu pujugtamui. <sup>2</sup>Niyyai iina tudaujin tsagkugtamjatatus jakauwa duka, tujash imá jutií tudaujinkik nunikchauwai, ashí nugkanum aents batsata nuna tudauji tsagkujata tabaunum jakauwai.

## Chicham umiamua duka pempentunisaik aneeniamua nuuwai

<sup>3</sup>Nuaduí niina chichame betek umiakui, Apajuish yaita dusha shiig

dekamainaitji. <sup>4</sup>Tuja aents: “Apajuik mina kumpajui” tayatak, chichaman umigchauk waitjak tu wekaewai, wagki dekaskenum tachau asa. <sup>5</sup>Tujash aents Apajuí chichame umiak puja nu dekaskenmag iwainawai Apajuí aneamujiya nunak. Nuniau asagmatai dekamainaitji Apajuijaimpap ijutkau ainawa tusa. <sup>6</sup>Aents Apajuijai ijutkau pujajai tauk, Jisukristu pujujakua nunisag pujumainai. <sup>7</sup>Yatsug aidauh, ubag aidauh, junak yamajam chicham umiktinag agattsujime. Kristu chichag-tamak: Pempentunisjume aneenitajum, tujabiwu nuna agatjime. Tujash nunú chichamak yaunchuk nagkamsajum antujakuitjume. <sup>8</sup>Ju chichamak duwik tibuwa nuninaitak, yamagma nunin wega nuna pachis, Jisukristu umiktajum tujabiwu nuna agatjime. Nuna umiinak dekas pegkeja nuna takainak, yaunchuk pegkegchau takaajakbauwa nunak idaisatnume tusan.

<sup>9</sup>Aents Apajuí umigjai tayatak yachin kajejakug, pegkegchaun takaak nuniawai. <sup>10</sup>Tuja ni yachin anea duka pegkejan takaawai. Nuniau asa pegkegchaunak takagmaitisui. <sup>11</sup>Untsu yachin kajeja duka pegkegchaun takaak nuniawai. Pegkegchaunak takau asa, aents wainmachu wajukmaina numam-tuk wajainawai.

#### **Pegkegchau takat aidau tupanbau**

<sup>12</sup>Uchuchig aidauh, atumnak Jisukristu mantamnamunum Apajuí tudaugminak tsagkugtamjaju asagmatai agatjime. <sup>13</sup>Uchigtin aidautigminash agatjime, yaunchuk nagkamas nugkash najannatsaig tuke pujujakua nunú shiig dekau asagmin. Datsauch aidauh, atumnashkam agatjime, iwanch depetkau asagmin. Uchuchig aidauh, atumek iina Apají Apajuiya nu dekau asagmin agatjime.

<sup>14</sup>Uchigtin aidautigminak agatjime, yaunchuk nagkamas nugkash najanna-tsaig tuke pujujakua nu dekau asagmin. Atum datsauch aidautigminashkam agatjime, atumek senchi asajum, Apajuí chichamega nu umiakjum, iwanch depetkau asagmin.

<sup>15</sup>Pegkegchau takat ju nugkanmaya aidaun, Apajuí nemagchau takaina duka takasaigpa. Aents ju nugka juwiya pegkegchau takat aina nuna imá wakegak, juwiya takatnak takaa pujuidauk Apajuinak aneatsui. <sup>16</sup>Ashí nugkanum ayaa duka wainku wakejunui, tuja kuashat wajigtin asá, iik eme anentaimtumamua dushakam Apajuinumiachu ainawai. Nunak aents Apajuí nemajuinachu ju nugka juwi batsamas nuninawai. <sup>17</sup>Ju nugka juka, ashí wakejumain ayaa nujai megkaejattawai, tujash Apajuí wakegamun takaina nu tuke pujutin ainawai.

#### **Waitá etsejin aidaujai kuitamamkatajum tibau**

<sup>18</sup>Uchuchig aidauh, yamaik tsawan nagkanbaunum batsatji, atum antukuitjume makichik aents Kristun shiwagbau atinai tabau. Yamaik kuashat aents nunin aidau wantinainawai. Nunidau asagmatai dekainaji tsawan nagkanbaunmap jeganji tusaja. <sup>19</sup>Duka jutii ainag juwiyag jijnjaje, tujash dekaskenmag jutiinumiachu asag aaninawai, jutii ainag juninuk ainakug, jutiijaig ijutkau batsaamain ainawai.

<sup>20</sup>Tujash atumnak Jisukristu Wakaní Pegkejiya nuna sujamas, aents Apajuí nemagchau aina nujaig akantamkaju asamtai, dekaskea duka dekagme.

<sup>21</sup>Junak atumnak dekaskea nu dekachu asagmin agattsujime, atumek juka shiig dekagme, makichkish waita nuwiyag dekaskek jijnmainchauwa duka.

<sup>22</sup>¿Yaita waitash? ¿Jisusnak Apajuik

Apu atí tusag etejachui tuina duchau-kaih? Dekas nu ainawai Apajuin Uchijijai shiwagmagaina duka. Tuja Apajuinashkam niina Uchijin shiwagma dutiksag dakitainawai. <sup>23</sup>Ashí aents Jisusan pachis Apajuí Uchijichui tuina duka, Apajuijaig ijutkau ainatsui. Untsu Jisusak Apajuí Uchijiyai tusag dekaskenum etsegtuina nuuwai Apajuijai ijutkau aidauk.

<sup>24</sup>Yama nagkamchakjum antukuitjum nujaig pujakjumek, nu antukuitjum nunú imanisag ajutjamkuig, atumshakam nunisjumek Apajuijaish, niina Uchijiya nujaish ijutkau atatjume.

<sup>25</sup>Duka Jisus pujut tuke atinun anagtamauwa nuuwai.

<sup>26</sup>Junak agatjime tsanugmagta tuidau aidau asagmatai. <sup>27</sup>Tujash atumek Wakaní Pegkeji Kristu sujamsamua nu ajutjamu asamtai: Yaki Apajuin pachis jintinjuawa, tusagmek atsumaitsugme. Wakaní Pegkeji waitan jintinkagtutsuk, dekaskea nunak jintinjamaína nunisjumek pujakjum, Jisukristujaig ijutkau pujustajum.

#### Apajuí uchijí aidau

<sup>28</sup>Yamai uchuchig aidauh tajime: Imá Kristujaig ijuntsajum batsamsatajum, ni minakuish kajintsá datsamsuk puyatkas igkugkagmi. <sup>29</sup>Atumek Kristu pegkeja duka dekagme, nunin asajum ashí aents Apajuí pegkeg wakegamua nuna takau wainkugmek, dekas Apajuí uchijimpap ainawa tusajum dekaatajum.

**3** <sup>1</sup>Anentaimsa diistajum wajupa iina Apajuí anempatsua, imatijamu asa mina uchig atajum tujamatai, yamaik niina uchijí waigji. Nuaduí aents Apajuin nemajuinatsu duka, Apajuish yaita nunak dekaachaju asag, jutiinashkam nunisag Apajuí uchijimpap ainawa tusajag dekagmainatsui. <sup>2</sup>Aneetaig aidauh, yamaik Apajuí uchijí ainaji, ii

wajuku atinaitji duka yamaikik waintsuji, tujash dekainaji Jisukristu wantintugmaktina duwi, iishkam niya imanuk agtinaitji, nunikaja wainkatnaitji shiig ni wajukuita imatiksaik.

<sup>3</sup>Nuaduí aents niina dakaidauk, pegkegchaun takatsuk batsamas dakamainai, Kristu makichkish pegkegchaun takaschauwa nunisag.

<sup>4</sup>Untsu aents pegkegchaun takaina duka, Apajuí takasaigpajum tibauwa nuna umiinachu asag nuninawai. Pegkegchau takata duka chicham umiachbaunum nuninui. <sup>5</sup>Atumek shiig dekagme, Jisukristu machikish pegkegchaunak takachu asa, jutii pegkegchajin bakumamaina nuna agkanmitkagmatus ju nugka juwi tajutjabauwa duka.

<sup>6</sup>Nuaduí ashí aents Jisukristujai ijutkau pujuidauk, tudau takaajakbaujiya nunisagkek takaak pujumaitsui. Untsu aents tudaun takaina duka, Kristujaig ijutkau ainatsui, nuigtushkam yaita Kristush nunash shiig dekainachu asag nuninawai. <sup>7</sup>Uchuchig aidauh, kuitamamkatajum makichik aentskesh tsanugmajainum. Aents pegkeg aina nuna takauk, pegkeg asa nuniawai. Nunú aents aidauk Apajuí emtinish pegkeg ainawai, Jisukristu pegkeja ibauk. <sup>8</sup>Tujash pegkegchaunak takaa wekaga duka, iwanchdau asa nuniawai, iwanch nugka yama najanetnum nagkamas pegkegchau takasua nujai betek takaidau asag. Nuaduí Apajuí Uchijiya nu, iwanchi takatjin emegkagatus tauwai.

<sup>9</sup>Apajuí uchijí aidauk pegkegchau takatnakek wejumain ainatsui, Apajuí pujutjiya nunú ajamu asag, tudaunak takaak pujumaitsui, Apajuí uchijí asag.

<sup>10</sup>Duwi shiig dekanui ya ainawa Apajuí uchijí aidauh, tuja ya ainawa iwanchi uchijí aidauh. Iwanchi uchijí aina duka, pegkeg takatnak dakitin ainawai,

nuigtushkam tikich aidaunash aneasash diichu ainawai.

#### Tikich aidaujaish iikdaisa aneenit

<sup>11</sup>Atum yama nagkamsajum chicham etsegbau antuku ainajum duka, tikich aidaujaish iikdaisa aneediagmi tawa juuwai. <sup>12</sup>Jutiik Caín iwanch wakejamun umiau asa, yachin mauwa nuninuk amaitsuji. ¿Wagka mauwaita? Caín ni takaamua duka pegkegchau asamtai, ni yachi imá pegkejan takatai kajejak mauwai.

<sup>13</sup>Mina yatsug aidauh, ubag aidauh, aents Apajuí nemagchau aidau kajegta-mainakuish, kajegtuinawapi tusagmek anentaimtú batsamigpajum. <sup>14</sup>Jutiishkam eke Apajuijai ijutkachu aajakuitag duwik, Apajuiyai kanakú asá megkaekaujai betek aajakuitji. Tujash yamaik iina yachi aneau asaja, Apajuiyai ijutkau ainag duwi, tuke niijaig pujutnaitag nu dekainaji. Aents tikichin aneenatsu duka, eke Apajuijai kanakú ainawai. <sup>15</sup>Ashí aents yachin kajejuina duka aents magkagtinjai betekai. Atumek shiig degagme, magkagtin aidauk atakesh pujut tuke atina nunak jukishtin ainawai. <sup>16</sup>Jutiik Jisukristu iiní mantamdauwa duwi anenkak dekawaitji. Ni jutiiní mantamnak waittsau asamtai, jutiishkam nunisaik nunimainaitji tikich Jisukristun nemajuina nui. <sup>17</sup>Aents Apajuí nemajin kuashat wájí ajamaitak, tikich yachi atugbau asa waitiaun wainiatak yayaatsu duka, Apajuí jutiin anempa nunú anenkak atugbau asa nuniawai.

<sup>18</sup>Mina uchuchig aidauh, jutiik imá chichamaikik anejatnuk amaitsuji, dekaskenum aneeniamua duka, ii yainiamunum iwainmamainaitji.

<sup>19</sup>Dekaskenum pempeentuniki aneeniamua duwi, Apajuinup ainaji tusaik dekainaji. Nunin asaja Apajuí aujkuish-

kam, juti bakumamainuk atugtamjiapi tuinaji. <sup>20</sup>Juti pegkegchau takasbauji anentaimtuja dekaku, wake besemag dekaepeajinchakam, Apajuí juti anentaimtajin nagkaesaun shiig dekauwa iman asa, ni imá shiig dekagtamji. <sup>21</sup>Mina aneetaig aidauwah, ii nu aaja anentaimchamu atsakuig, juti bakumamainuk Apajuí emtinig atugtamjiapi tumainaitji. <sup>22</sup>Nuniaku ii atumamuji aina nu segamak amastatji, niina chichamesh umigku, ashí wájí niina shiig awagma duke takau asajin. <sup>23</sup>Ni chicham umiktajum tujabauwa duka: Niina Uchijí Jisukristui dekaskeapi takujum, ni tibauwa dutiksaik tikichjaish aneenitajum tawa nuuwai. <sup>24</sup>Aents Apajuí chichamen antujuk betek umijuk niijai ijutkawai. Nuniau asamtai Apajuishkam ditajai pujawai. Jutiik ni Wakaní Pegkejin sujamsauwa nu dekamtijamu asamtai, ni iiní pujamushkam shiig dekainaji.

#### Wakaní Pegkeji ajamu tuja wakan Kristu shiwagmau ajamu dekamain

**4** <sup>1</sup>Aneetaig aidauh: Apajuí dekamti-juae, tusa etsejuinakuish dekaskeapi tiigpajum. Dekas Wakaní Pegkeji ichachiamash tawa, atsa wainak tu wekaetsuash tusajum dekatkauk antugtá antugkatajum. Wagki kuashat waitan jintiidau ju nugka juwi yujaidau asagmatai. <sup>2</sup>Dutik dekamainaitjume aents dekas Wakaní Pegkeji chichamtikam chichaidauk. Ashí aents: Jisukristuk dekas Aentsmaga Akiinawai, tuina nuuwai Wakaní Pegkeji ajamu aidauk. <sup>3</sup>Ashí aents: Jisukristuk aentsmaga akiinachui, tuina duka Wakaní Pegkejiya duka atsujui. Duka wakan Kristun shiwagbauwa nu ajamu asa tuinawai, atum yaunchuk nunin wantintinai tibau antukuitjum duka yamaik ju nugka juwig wantinui.

<sup>4</sup>Uchuchig aidauh, atumek Apajuinu asajum, nu waitan etsejuina duka depetkaugme, Wakaní Pegkejiya nu pujugmau asajum. Dekas atumiin pujugtamjum nuuwai imá senchigtinuk, iwanch aents Apajuin shiwagbau aidanum inama nuna nagkaesau. <sup>5</sup>Ditak ju nugkanmaya asag juwiya wajinak chichaagtai, tikich aents Apajuin dekanatsu duke antujuinawai. <sup>6</sup>Tajash jutiik Apajuinu ainaji. Nunin asajin, Apajuin shiig dekaina duke jutiinak antugtamainai. Untsu Apajuinuchu aidauk antugtamtsuji. Nuninaku dekanaji yaita Wakaní Pegkeji dekaskea nu dekamtikamu aidauh, tuja yaita dekaskechua nuna chichaina dushakam.

#### Apajuik anenkai

<sup>7</sup>Aneetaig aidauh, Apajuí aneenitan sujabauwa duwi, pempeentuniki aneediagmi. Ashí aents dekaskenum anejatuina duka Apajuí uchijí ainawai, numidau asag shiig niinash dekainawai. <sup>8</sup>Untsu anejatuinatsu duka Apajuinak shiig dekainatsui. Apajuí ashí dutika nunak anejatbaujin aikawai. <sup>9</sup>Nuniau asa Apajuik, niina Uchijí makichkiuchia nuna awetugmauwa duwi dekamtijamauwai, ni jutii anempamujinak: Mina Uchig ditan uwentikak pujut tuke atina nunashkam susatnume, tujamu asa. <sup>10</sup>Jutiichuitji dekatkau Apajuí aneejakutik, niiyai jutii aidautin anempajua duka. Nuniau asa jutii suwimak jumaina nunak, niina Uchijin jutii tudaujin mantamnati tusa akuptugmakui. <sup>11</sup>Aneetaig yatsug, ubag aidauh, Apajuí jutiiin aatus anempaju asamtai, jutiishkam tikich aidaujaish pempeentuniki aneenimainaitji. <sup>12</sup>Makichik aentskesh Apajuinak wainchau ainawai. Nunin aigkish jutii tikichjai aneenina-kuik nijai ijutkau ainaji. Nuniau asajin

ni anejattaijiya nunú jutiinashkam pegkegnum aputamji. <sup>13</sup>Jutii Apajuijai ijutkau asajin, Apajuishkam jutiijai ijutka duka, Apajuí Wakaní Pegkejin sujamsauwa duwi dekanaji. <sup>14</sup>Dekas jutii Jisusjai ijunsa yujasú aidauti shiig wainkaju asaja, Apajuik niina Uchijin ju nugka juwiya aents aidautin uwemti-jamjatnun awetugmauwai tusa etsejuinaji. <sup>15</sup>Ashí aents Jisusak Apajuí Uchijiyai tuina nujai Apajuik ijutkawai. Aantsag nu tuina dushakam Apajuijai ijutkau ainawai.

<sup>16</sup>Aaja dekanaku dekaskeap Apajuik anejatua tuinaji. Apajuik anenkai. Aents tikichin anea nunuwai Apajuijai ijutkau aidauk, tuja Apajuishkam nu aentsjai ijutkawai. <sup>17</sup>Apajuik yaimpaji ni wakega dutiksaik tikich aents aidau aneetnum. Tuja Apajuí ashí aents takasbaujin diijus titina nunú tsawan jegatna duka ishamatsji, wagki ju nugka juwi pujakuish, Kristu Apajuijaig ijutkau pujujakua nunisaik pujuidau asaja. <sup>18</sup>Anejatut abaunmag ishamamuk atsuuwai. Anejatbauwa nu ishamamunak emegkainai. Apajuí anejata nuna dekaidauk Apajuinak ishamainatsui. Apajuí ni wakega dutiksag tikich aidanash aneetnume tusa yaimpaina duwi, jutii Apajuí ishamainuk makichkish atsugtamji. Aents Apajuin ishamaina duka, Apajuí wakega dutiksaik tikich aneashbaunmap, suwimkanak sujustatua tusa ishamainawai.

<sup>19</sup>Jutiik ni Apajuí nagkamchak anempaju asamtai, iishkam aneaji. <sup>20</sup>Makichik aentskesh: “Wika Apajuin aneajai”, tayatak yachin kajejakug, waitjak tawai. Yachin ni wainbaunakesh aneatsua aniaush, ¿tugtsaya Apajuí waintsu nuniaush aneemainaita? <sup>21</sup>Jutiinak ju chicham umiktajum tujabiuwai. Apajuin anea duka

yachinash dutiksag aneeti tibuwa nunuwai.

**Apajuiyai kajintsá  
anentaibaunum depetmat**

**5** <sup>1</sup>Ashí aents Jisusan pachisag, Apajuí Jisusnak Apu atí tusa etegkauwai tuina duka Apajuí uchijí ainawai. Apajuí aneakuik ni uchijí aidaushkam aneaku dutiknawai. <sup>2</sup>Apajuí aneaku niina chichamesh betek umiakuik dekanui, tikich Apajuin nemajuina nunash aneajapita tusaja. <sup>3</sup>Apajuí aneamuk ni chicham umiktajum timawa nu imatiksaik umiamua nuuwai. Ni chicham umiktajum tujamawa duka kakajus umikchamna nuninchauwai. <sup>4</sup>Wagki Apajuí uchijí aina nuuwai pegkegchau aidaumash depetmawk, nunú depetmamua duka jutii Apajuiyai kajintsá anentaimainag duwi depetmainaji. <sup>5</sup>Kristuk Apajuin Uchijiyai tusa dekaskeapi tuina nuuwai pegkegchaunmash depetmaina duka, nunú aidauk Apajuí nemagchaw wajukena nuninatsui.

<sup>6</sup>Jisukristu Apajuí Uchijiyai duka, Juan yamijua duwi Apajuí chichaak: “Ametme mina uchig aneetaigmek” tiuwa duwi dekanauwai. Nuigtushkam ni jaak numpen ukajua duwi kuashat waji nagkaemajua duwishkam dekanauwai. Nunisag Wakaní Pegkeji dekasken chichauwa dushakam: “Jisukristuk Apajuí Uchijiyai” tusa etsegtawai. <sup>7</sup>Jujú kempatuma juuwai dekaske tusa etsegtuina duka: <sup>8</sup>Wakaní Pegkejish: “Juka Apajuí Uchijiyai” tawai, aikasag Apajuishkam Jisus yamimagmatai chichaak: “Mina Uchijui” tiuwai, Jisus ni mantamnak numpeen ukajua duwishkam iwainmamkauwai Apajuí Uchijiyai nuna. Ju kempatuma juka ashí Jisusnak “Apajuí Uchijiyai” tuinawai. <sup>9</sup>Aents aidau etsejuinakuishkam antuinaji,

tujash Apajuí: “Mina Uchijui” tiuwa nu imá shiig antugmainaitji. <sup>10</sup>Apajuí Uchijiyai nui kajintsá anentaimaidautik, Apajuiyai dekaskeapi tuinaji. Untsu Apajuin dekaskeapi tachauk, Apajuin waita nunin emak nuniawai. Ni Kristun pachis: “Mina Uchijui” tiuwa nuna dekaskeapi tuinachu asag. <sup>11</sup>Apajuí chichagtamak: “Wi pujut tuke atinun amastinaitjime”, tiuwai. Nunú pujuta nunak niina Uchijí Jisukristua nu sukagtawai. <sup>12</sup>Apajuí Uchijiyai ijutkau pujuidautik, pujut tuke atina nu ajutjamainaji. Untsu Apajuí Uchijiyai ijutkau pujuinachuk, nunú pujut tuke atina duka atsujuinawai.

**Apajuí segaku  
kajinmamsa pujamua nu**

<sup>13</sup>Jujú aina junak Apajuí Uchijiyai nu dekaskeapi tuidau asajum, pujut nagkanchau jukiuiwaitjum nunú aidautigmin dekaatnume tusan agatjime.

<sup>14</sup>Jutiik Apajuí wakegamua dutiksaik segamak antugkagtinapita tuidau asá, shiig kajintsá anentaimainaji. <sup>15</sup>Ii segamunash antugtawapi tusa dekainag nunisaik, ii sumamushkam dekas jukittajapi tumainaitji.

<sup>16</sup>Aents Jisukristun nemajiatatak tudau tsagkugnashaya nuna takaachu wainkugmek Apajuí segatmainaitjume, dutikam ni pujutan sumainai. Awai tudau tsagkugnashaya nu, wika nuna takaidau Apajuí segattajum tusanuk tatsujime. <sup>17</sup>Ashí pegkegchaw takaamu aina duka tudau ainawai, tujash tudau Apajuiyai tuke datumtamainush awai.

<sup>18</sup>Ashí aents Apajuí uchijí wajasú aidauk, duwik tudau takaajakbaujiya nunakek takaa pujumainchau aina duka dekainaji. Ditanak Apajuí Uchijí kuitamu asamtai, iwanchik pegkegchaw nuna nunak takastí tusag inamai-

tsui. <sup>19</sup>Jutiik Apajuinu ainag duka dekainaji, untsu ashí aents Apajuí nemagchau aina duka iwanchi inatai ainawai. <sup>20</sup>Dekainaji Apajuí uchijí ju nugka juwi tajutjama, Apajuí dekas tuke pujuwa nunash shiig dekantijabauwa nu. Jutiik Jisukristujai ijuntsa

pujuinaji, niiyai dekaskenmag Apajuik, nigki pujut tuke atinun sukagtina dushakam. <sup>21</sup>Uchuchig aidauh, wainka apajimtai aina duka ememattsuk, dekas Apajuiya nu ememattajum.

Aatus atí.



# JUAN AWENTSAIK PAPÍ AGAGBAU

---

## Juan kumpamkagtamú

<sup>1</sup>Wi Jisukristu nemagkau aidaun diin asan, juna papiin ashí atum Apajuí etegjamu ainajum nuutigmin agatjime. Wika atumnak dekas aneajime, tuja imá wikik aneatsjime, Apajuí chichame dekaskea nuna tikich dekaawaju aina dushakam anempainawai.

<sup>2</sup>Aaja pempeentunikiaja aneeninaji, chicham dekaskenum jintinkagtuamua duka, iina anentain tuke juwatjamkau asamtai. <sup>3</sup>Apajuí iina Apajiya nu, Apu Jisukristu Apajuí Uchijiyá nujai jutijai ijutkau asa wait anenjamag, ni chichame dekaskea nu umitnum yaimpamunum pempeentunikiaja aneeniamunum, shiig agkan anentaimsa pujutan amastinne.

## Pempeentunikjum aneenitajum tibau.

<sup>4</sup>Kuashat shiig aneasmajai atum Apajuí nemajin ainajum nuwiya, Apajuí chicham umiktajum tujabiuwa nuna imatiksag umiinak, Apajuijaish shiig imagnis yujainamun wainkan. <sup>5</sup>Aneetaig yatsug aidauh, ubag aidauh yamai segajime, pempeentunisaik aneeniagmi tusan. Junak yamajam chicham umiktinnak agattsujime. Kristu chichagtamak: “Pempeentunisjumek aneenitajum”, tujabiuwa nuna agatjime. <sup>6</sup>Dekaskenum anejatbauwa duka, Apajuí chicham umiktajum tibau betek umiamua nuuwai. Chicham umiktina duka yama nagkamchaku aneenisjum pujustajum tabau antukuitag nuuwai.

<sup>7</sup>Kuashat tsanumin aidau ashí nugkanum yujas: Jisukristuk aentsmagag akiinachui, tuinawai. Nuna aatus tuina nuuwai tsanumin aidauk, nuigtush Jisukristun shiwagbau aina nunú. <sup>8</sup>Nuaduí atumek kuitamamkatajum, atum Apajuí takagjum nunú megkaetsuk ni akigmamuk ashí imatiksagmek jukimnujum.

<sup>9</sup>Makichik aentskesh Kristu jintinkagtuamua nunak jintinkagtutsuk ewagak jintinkagtutaik, Apajuik nu aentsjaig ijutkau atsui. Untsu Kristu jintinkagtuamua dutiksag jintinkagtuina nujai Apajuik, niina Uchijjai ijutkau awai. <sup>10</sup>Makichik aentskesh: Atumin ijagsatasan minajai, tusa tajutjama jintinjamatus wakegaya-tak, Kristu jintinkagtuauwa dutiksag tachakuig, atum ijunbaunmag awayawaig-pajum, kumpamash kumpamawaigpajum. <sup>11</sup>Nunú aentsua nuna shiig anentus juwauk, ni pegkegchau jintinkagta nuninuk wegau asamtai.

## Akatmabau

<sup>12</sup>Kuashat pachisa atum agatmainuk ajutui, tujash papinumag agatjashtajime. Dekas atumiin anuí taan, atumjai igkunisan chichastasan wakegajai, nuniemunum betek shiig aneamu ajutjamti tusan.

<sup>13</sup>Wi yamai Apajuí nemajin aidaujai ijunja pujag juka, anuiyatijum Apajuí nemagkujum ijunjum nujai betekai, wi pujag juwiya Apajuí nemajin aidau kumpamjamainawai.

# JUAN KAMPATUMÁ PAPÍ AGAGBAU

---

## Juan kumpamkagtau

<sup>1</sup>Aneetaiju Gayoh, wi Jisukristu nemajin aidaun diinun, dekaskenum aminak aneau asan kumpamjame.

<sup>2</sup>Aneetaiju Apajuin segatjame, ame wakanmin shiig pujam aantsag ashí takaamugminish pegkeg ajutjamti, nuniakum jamamtuchu pujustá tusan.

<sup>3</sup>Kuashat shiig aneasmajai, ame pujam nuwiya yatsut aidau kaunawag, ame Apajuí chichame dekauwaitam nunismek dekas shiig pujamugmin ujatuinakui. <sup>4</sup>Wi chicham etseggakamunum dekaskeapi tiu aidau, mina uchijua iman aina nunú shiig pujuidaun antaknuk shiig aneasan pujajai.

## Kristun shiig nemajin nuigtú Kristun shiig nemagchau

<sup>5</sup>Aneetaiju yatsujuh, amek Kristu chicham umiktá tibauwa duka betek umikam wegame, nuniau asam Kristu nemajuidau atsumaidaush yayame, imá senchi amina wainchataijum aidau Kristun pachis chichagkagtak yujaidau amina jeemin kaunaina nunú. <sup>6</sup>Nunú aidau ashí Jisusa nemajin aidau ijunjamunum etsejuinawai, ame anejattsam yaimam nuna pachipas. Apajuin shiig awagma dutiksamek tuke yaita aents jintá wegak atsumainjinish. <sup>7</sup>Ditak Jisukristu aneamunum niina pachis etseggagtatus jiiinjaje, nunú aidauk Apajuí nemagchau aina nunú

yaigbau atasag dakituinawai. <sup>8</sup>Nuaduí jutii yaimainaitji chicham dekaskea nuna tikich aidaunash ujaktí tusaik.

## Diótfefes nuigtú Demetrio pachisa tibau

<sup>9</sup>Wi Jisusa nemajin aidautigmin papiin agatjabiajim nuna Diótfefes dakitau tabaun antajai, nigka imá mina chichamjunak antugtuktinme tusa wakegau asa. <sup>10</sup>Nuniau asamtai wi anuú taan ijunjamunum niina titatjai, jutiin adaitamas pegkegchaun, wait ainawai tusa chichagtama nuna pachisan. Nuniau asa nigka yatsut aidaun ni jeen awaitanash dakitawai. Tuja nunú yatsut aidaun ni jeen jukita taunash, aikawaipa tawai. Nuniak nu yatstutjai ijunjajunak: Amek juwig ijunbaunmag wayawaipa, tusa jiiikí idaiwai.

<sup>11</sup>Aneetaijuh, aents pegkegchaun takaa duka dakumkaipa, dekas pegkeja nunú takastá. Aents pegkejan takaa nuuwai Apajuinuk, tujash aents pegkegchaun takaa duka Apajuinak wainchau asa nuniawai.

<sup>12</sup>Ashí Demetron pujutjin pachisajag pegkejan etsejuinawai, Apajuin chichame tawa imatiksag umiau asamtai. Jutiishkam duka dekaainaji, tuja atumek jutii dekaskea duke etsejuinag duka dekaagme.

## Inagnaku akatmabau

<sup>13</sup>Kuashat chicham pachisa ame agatmainuk ajutui, tujash nunak juwi

agakun tutanak dakitajai. <sup>14</sup>Wi amina waamak wainkattajam nuanuí igkunisa chichasmí. <sup>15</sup>Shiig agkan anentaimsam pujustá. Kumpag juwi batsataina jujú

kumpamjamainawai. Ameshkam jutii kumpají anuí batsataina nu makí makichik kumpamjutuata. Aatus atí.

## JUDAS PAPI AGAGBAU

---

### Judas kumpamkagtau

<sup>1</sup>Witjai Judasaitjai Jisukristu inake Santiago yachiyaitjai, atum Apajuí iina Apají anejatna nu etegkamutijum, Jisukristu kuitamsam batsatutigmin kumpamjime. <sup>2</sup>Atumnash Apajuí wait anenkagtauuji, shiig agkan anentaimesa pujuta nunú, aneenita dushakam ajutjamtinme.

### Waitan jintinkagtin aidau

<sup>3</sup>Aneetaig yatsug aidauh, ubag aidauh, shiig senchi wakemajai jutii uwemat jukimua nuna pachisan agatjatasan. Tujash yamai dekas atsumamua nuna pachisan tajime: Kristu nemajin aidau imá niinig kajinas anentaimeina duka, Apajuí etejamu asag niina aentsji aina nunú shiig kuitamkatajum. <sup>4</sup>Tujash yamaik waitá jintinkagtin pegkegchau aina nu atum ijunbaunum wayawaje tsanugmajagtatus. Nunú aidau jintinkagtuinak: Pegkegchau aina dusha takainai, Apajuik pegkegma ibau asa, ii nuniajinish tsagkugkagtumainai, tuinawai. Nuninak Apajuí makichkia nuna, iina Apuji Jisukristua nunash dakituinawai. Nunin asamtai dita suwimak jukitnun pachis, yaunchuk nagkamas Apajuí chichamen agaju ainawai.

### Apajuí suwimak sukagtustinji pachisa etsegkamu

<sup>5</sup>Juka atumek dekagminig aneemtikjime, Apu Apajuí Israel aents aidau

Egipto nugkanum batsatun jiijuí, dutikauwaitak ni chichamen umiinachunak suwimkan suwak ijinawai. <sup>6</sup>Tuja nayaimpinmaya aents aidau ditá imanjin kuitamtsuk, ditá batsamtaijnash ukukiaju aidau, Apajuí suwenum batsasuí, atak Jisukristu tsawan jegatai aents takasbaujin diijus titina duwi suwimkan susatatus. <sup>7</sup>Dita wajukawajua numamtuk yaakat Sodomanmaya, Gomorranmayajai, nuigtú tikich yaakat nui tikiju aidau mayash betekmas shiig pegkegchau aina nuna takainak, mai aishmagkuk pempeentunikiag dutiknayá batsamiagtai, Apajuí jii ajumaish kajinkashtina nunú jiiyai apek utsagkui. Nunú yaakat apekbauwa duwi dekamainai, aents tudaun takaidau suwimkan juwak tuke waitú pujutnujig awapita tusa.

<sup>8</sup>Tujash jujú nunikaju aigkishkam nunú aents tsanumin aidauk, dita kajamjamujiya nuna aintus wejuinak, dita pegkegchau wakegamujiya nuna takainak, ditá iyashinak pegkegchau emainawai. Nuninak Apajuí tabaunash dakituinak, nayaimpinmaya dekas senchigtin aina nunash pegkegchau chichajuinawai. <sup>9</sup>Tuja nayaimpinmaya aents aidau apuji Miguel, Moisesa iyashin jukitatus takamá iwanchjai igkunik jiyanutuinakush pegkegchaunak chichagtsuk ayatak: “Apu Apajuí suwimkan amastí”, tiuwai. <sup>10</sup>Tujash nunú aents aidauk, dita wainchamuji-

nak pegkegchaun chichajuinawai. Ditak kuntin anentaimainachu asag dita wakegamunum pujuina numamtuk, dita pegkegchau wakegamujiya nunak wejuinak, iyashin pegkegchau weenawai.

<sup>11</sup>iWait anentuinajai ditanak! Caín wajukauwa nunina duwi, tuja Balaam wajukauwa nunisag kuichik jukita tabauwai pegkegchau takaina duwishkam, aantsag Coré ni chicham intimtinig jakauwa nuniktin asagmatai. <sup>12</sup>Atum tikichjai aneniamu iwaintunik-tasajum jistamjumin, waitá jintinkagtin aidau wayawag, yuwinak umutnash umuinak, tikichnash ajantus diitsuk datsanmain wajainawai. Ditak imá ditananak uyumainawai, nunidau asag yumi yutugchatnaitak yujagkim bukusea wajasun dase umpui yajá ajapama numamtuk wajainawai. Nuigtush yujag nejet aig, ajak nejetsuk wajama nunin ainawai, nunin aidauk tegai ajapam ajumaish tsapaishtinun megkaemaina nuniktin ainawai. <sup>13</sup>Ditak nayants senchi tsukatak ayatak saunak jiiyama numamtuk wajainawai, dita wají datsanmain takainamunum. Ditak yaya keeká wegau megkagama numamtuk wajakagtinai, suwenum batsamas ayamjashstinun tuke waitú batsamtina nuwi.

<sup>14</sup>Adán uchi akiiamu aina nuna uchijí aidau, akii akiimainakua sieteya imania yujaká wegamunum, Enoc pujujukua nu juna pachis chichaak: “Apu, niina aentsji nayaimpinmaya aidaujai dekapamainchau wajas minau wainjai, <sup>15</sup>ashí aents takasbaujin diijus titatus. Nuniak pegkegchau takasú aidaun, tuja Apajuinash pegkegchau chichagkau aidaunash suwimkan susatatus”, tiuwai. <sup>16</sup>Ditak chichaman yujajin, tsanumin aidau, dita wakejuinamunak takasag shiig aneastatus wakejin, niunak

pachimasag: Jutiiyaitji dekas iman aidautik, tumamin aidau. Tikich aentsnash igkuawag, imanchau aigkish, nunú aentsnumian jujukiaagtatus: Amek dekas pegkejaitme, tusag wainak tu yujajin ainawai.

#### **Emetmamjajum pujustajum tusa chichagkagtamú**

<sup>17</sup>Tujash atumek aneetaig aidauwah, iina Apuji Jisukristu chicham etsegtug-katajum tusa ishiakbau aidau, <sup>18</sup>yaunchuk chichainak: “Tsawan nagkankattak wajataik, aents aidauk, ashí pegkeg aina nuna dushikis chichajuinak shiig aneediagtinai, nuninak dita pegkegchau wakegamujinak taká batsabiagtinai”, tiajua nu adeagtajum. <sup>19</sup>Nunú aidau atum Jisukristu nemagkau aidautigmin, dita jintinjamainak datumtamak akaantamjatin ainawai. Nunú aents aidauk dita wakegamujinak takainawai. Nunin asagmatai Wakaní Pegkejishkam ditajaig ijutkatsui.

#### **Akatmabau**

<sup>20</sup>Tujash atumek aneetaig aidauwah, Jisukristuig kajintsá anentaimjum nuwig emetmamjajum pujakjum, Wakaní Pegkeji yaimpasmatai Apajuish aukjum pujustajum. <sup>21</sup>Nuniakjum Apajuí atumin anempaina duke anentaimtakjum, ii Apuji Jisukristu ni wait anenjabaujiya nuna iwaintugmak-tatus wantinkatna nu dakastajum. Nuwi nagkamsaik ajumaish niijai kanakchatin tuke pujutnaitji. <sup>22</sup>Tuja makichik aentskesh: “Wisha uwemjatnashitag” tinujai, tusa utujimas anentaimaidau ainakuish, anenkai shiig ujaktajum. <sup>23</sup>Tuja pegkegchaun takau akuish, jiiinum esawai tusa japikí emenaumaina numamtuk, yaigtajum uwemjatnume. Tuja tikich pegkegchaun takasushkam ainawai, dushakam wait anenjajum

yaigtajum. Tujash senchi kuitamamkajum, atumshakam dita pegkegchau takasbau utsumkajum, nunú pegkegchau takasaijum.

<sup>24</sup>Apajuí senchigtina nuuwai atumnak pegkegchau takasainum tusa kuitamjamainuk. Niina emtin ni ijupagtina nunú tsawantinig, atumek

shiig aneastinaitjume, atumin bakugmamainuk makichkish atsutin asamtai. <sup>25</sup>Tuja Apajuik Jisukristu mantamdauwa duwi jutiinak uwemti-jamjauwai. Niiyai dekas wagaakuk, iman asa ni senchigtina nunak tuke atinai, imanisag atinai.

Aatus atí.

## IWAINAKBAU

---

**1** <sup>1</sup>Junak Apajuí Jisukristun iwaintu-  
kui, wají waamak uminjatta nuna  
Jisukristu ni inake aidaun ujaktí tusa.  
Dutikam Jisukristushkam ni aentsji  
nayaimpinmayan awemam mina  
iwaintugkauwai. <sup>2</sup>Dutijuau asamtai, wi  
Jisukristunun wainkag nuna, tuja wi  
antukbaujua nunashkam, Jisukristu  
Apajuí chichamen pachis tujutbauwa  
nuna ashí ujaktatjime. <sup>3</sup>Shiig aneasagti-  
nai ju agagbaun ausag, atak uminjatin  
tibaauwa juna shiig dekaawag betek  
umiidauk. Wagki ju uminkatnuk  
tsawantak ashí jegau asamtai.

<sup>4</sup>Witjai Juagkaitjai, atum Jisusa  
nemajin aidautijum siete yaakat Asia  
nugkanum awa nui batsatutigmin  
kumpamjime. Apajuí tuke pujuwa nu,  
ajumaish tuke pujutin, juwi taatna  
nunú, nuigtú Apajuí ekeemtaiji emtin  
Wakaní Pegkeji sieteya imajin niimtinai  
senchijin iwainauwa nujai, wait  
anenjamjag shiig agkan anentaimsa  
pujutan amastinme. <sup>5</sup>Nunisag Jisukristu  
dekaskea nuna betek etsegna nudaush-  
kam ajutjamtinme. Nigka aents jaká  
nantashain nagkamak ni nantakíu asa,  
ashí ju nugka juwiya apu aidaun  
nagkaesau senchigtinai. Kristuk jutii  
anempau asa ni numpe ukajauwa  
nuaduú ii tudaujin suwimak jumaina  
nuna agkanmitkagmauwai. <sup>6</sup>Dutijabau  
asa jutiinash apu etamak, Apajuí niina  
Apajiya nuna takajin atinme tusa  
sacerdote etamkajui. Nuaduú imá nigki

senchigtin asamtai, ajumaish nigki  
ememattai atí. Aatus atí. <sup>7</sup>iKristuk  
yujagminum minitnai! Nunitai ashí  
aents aidaun, nuigtú Jisusan mau  
aidaushkam wainkagtinai. Dutika  
wainainak ashí aents nugkanmaya  
aidauk buutiagtinai. Duka dekaske,  
aatus atí. <sup>8</sup>Apajuí tuke puju, ajumaish  
tuke pujutin, juwi taatin ashí senchig-  
tina nu chichaak: “Witjai nagkamsan  
ashí wají aidaun najankaunuk, tuja  
wikitjai nu wají aidauk nagkanjati  
titinaitag nunashkam”, tawai.

### **Juan ajuntai Patmos tutainum pujusá Aentsmaga Akiinauwa nu wainkamu**

<sup>9</sup>Witjai Juagkaitjai, atumi yatsumitjai.  
Jisusan nemaju asan waitiaknush emamke-  
san katsunjau asan, atumjai betek Apajuí  
inamtaijin pujustinaitjai. Wika Apajuí  
chichamen Jisukristun pachis tawa nuna  
etsejai, ajuntai Patmos tutainum  
ajapjuawagmatai pujubiajai. <sup>10</sup>Nunikan  
tumig tsawagmatai pujai, Wakaní  
Pegkejiya nunú mina tajutiú asa, mina  
ukujui trompeta umpuam shinuwama  
imatun antumtujukmayi. <sup>11</sup>Nu chichaamun  
antai: “Witjai nagkamsan ashí wají aidaun  
najankaunuk, tuja wiktjai nu wají aidauk  
nagkanjati titinaitag nunashkam. Ame  
wainam nu, Jisusa nemajin aidau siete  
yaakat Asia nugkanum: Efeso, Esmirna,  
Pérgamo, Tiatira, Sardis, Filadelfia,  
Laodicea aina nu papiinum agajam

ishitkata”, tujutmayi. <sup>12</sup>Tujutkui: Yaki aujtawa tusan ayampan diikman, siete candelero ayatak orok aidaun wainkabiajai. <sup>13</sup>Nuna ejapeen Apajuí Uchijiyaitak Aentsmaga Akiinau aajakua numamtin, esagman nugkuaju dawea aatus nuntumag, akachumtai oro najanamun detsepega aatus akachumau wajattaman wainkabiajai. <sup>14</sup>Intashishkam shiig puju, uwig pujun ujegama imanuyi, niewe tutaya iman. Jiishkam jii kegak wajukea imanibi. <sup>15</sup>Tuja naweg jiju jinum jiyamu dewa wegama imanun etsanmayi, chichameshkam tuna dujaji uutama imatmayi. <sup>16</sup>Niina uweje úntsujin siete yayan takakuyi, weninia makichik espada mai yantamejai etsakamua iman jiinmayi. Yapig etsa shiig senchi etsantak etsantama imanik etsanmayi. <sup>17</sup>Imanun wainkan, ni wajamunum ayaumsan tuke jakaujai betek iyaagbajjai, nuniai ni uweje úntsujin antintak: “Sapigmakaipa. Witjai tuke pujunuk, wikitjai ashí wajiin najankaunuk, nunin asan wikitjai nagkanjati titinnuk. <sup>18</sup>Wika tuke pujuwaitjai, nunin asan mantuawagmataish ataktú nantakin yamaikish tuke pujajai, aatus atí. Wikitjai aents jinou aidaunash: Nantagtajum tumainnuk. <sup>19</sup>Agagta ame waji wainkaum nunú, yamai awa nu, jujú nagkaemagmatai atak atina dushakam. <sup>20</sup>Mina uwejuí untsuja nui siete yaya wainkaum nu, tuja siete candelero ayatak orok wainkaum duka juuwai: Siete yaya duka, siete aents Jisukristu nemajuidaun diin aidau siete yaaktanun batsata nuna iwainawai. Tuja siete candelero wainkaum dushakam, siete yaaktanun mina nemagtuídau batsata nuna iwainawai.

#### Efesonmaya chicham agatjamu

**2** <sup>1</sup>“Agatjata Efesonum Jisusa nemajuidaun diin puja nunú, dutikakum: Uweje úntsujin siete yayan takaku, candelero ayatak orok najana-

munum ejapena wekaga nunú chichaak aatus tawai: <sup>2</sup>Wika atum takaajum nunak wainjai, atumek senchi takaakjum utugchat igkuakjumesh emamkesjum inagkeagme. Atumek pegkegchau aina duka dakitajume, nuigtush dekagjime ‘Jisukristu awemamuitjai’ tuidaush dekapsajum waitjamu dekagjum nunashkam. <sup>3</sup>Mina anentu asajum waitiakjumesh, kuashat utugchat igkuakjumesh, emamkesjum mijamtsuk takasugme.

<sup>4</sup>Tujash makichik waji idaisajum duwi junik diyajime, atum yama nagkamchakjum anentujakbaujum imanishjumek anentsujum duwi. <sup>5</sup>Adeagta dusha wajuakeakmea nunikume nunú, nunikam pujutjum yapajiam ataktú nagkamata, nagkamchakjum anentiujum nunishjumek. Nuniachkugminig wamkesan tajuan, wi candelero amasuítjim nuna jujuktatjime, yapajintsuk nunishjumek pujakjuminig. <sup>6</sup>Tujash ju pegkeg ajutjamui, wi Nicolaíta aidau takatjin dakitag nunishjumek atumshakam dakitajum nunú.

<sup>7</sup>Ni antutajji ajamuk, Wakaní Pegkeji mina nemagtin aidaun: Apajuiyai kajintsá nentaibaunum pegkegchaun depetkau aidaunak, yujag pujutan sukagtin nayaimpinum Apajuí pujutain ejapeen waja nuna ayujatnaitjai tawa nuna antukti.

#### Esmirnanmaya chicham agatjamu

<sup>8</sup>“Agatjata Esmirnanum Jisusa nemajuidaun diin puja nunú, dutikakum:

Tuke puju ashí wajiin najankauwa nu, nigki nagkanjati titina nunú, nuigtú maamash ataktú nantakí puja nu chichaak aatus tawai: <sup>9</sup>Wika atum takaajum nunak wainjai, tuja atum



ujunauch asajum waitiajum nunash wainjime, tujash atumek dekas shiig pegkeja nu jukitnaitjume. Tuja: Jutiik judfo asaja Apajuí aentsji ainaji, tumamaidau pegkegchau chichagta-maina nunashkam wainjai, nunú aina duka iwanchdau ainawai. <sup>10</sup>Atumek waittsattajume, tujash ishamkaigpajum. Atumnak iwanch wakejamun takau aidau achigmakag egkepattajume. Dutik iwanchik waitkagmastajume dekaskenmash Kristuig kajinas anentaimaina tusa dekapjamak. Dutijamawagmatai wajumak tsawantai waittsattagme. Mantamainakuish minai kajintsá anentaimtak mijakaigpa. Jakagminchakam wi pujut tuke atina nuna amastinaitjime.

<sup>11</sup>Dita antutaiji ajamuk, Wakaní Pegkeji Jisusa nemajin aidaun chichajak: Apajuiyai kajintsá anentaibau-num pegkegchaun depetkau aidauk, jinum pujusajag waittsashtin ainawai tawa nuna antuktinme.

#### Pergamonmaya chicham agatjamu

<sup>12</sup>“Agatjata Pergamonum Jisusa nemajuidaun diin puja nunú, dutikakum:

Espadaji mai yantamejai etsakamu ajá nu chichaak aatus tawai: <sup>13</sup>Wika atum takaajum nunak wainjai, iwanch inama nui pujam nunash wainjime, tujash minak nemagtui-nagme. Antipas mina chichamjun etsegtujin asamtai, anuí iwanch inama anuig maawagmataish, minai kajintsá anentaimtak idaisachugme.

<sup>14</sup>Tujash pegkegchau takaajum nu tumain ajutui: Balaam Balakan chichajak: Israel aents aidauk tunamain ainawai, apajimtai anagkuamu aina nuna yuwinak, nuwanash tsanijimainak tusa tiuwa nuna, atum ainajum anuiya wajumak nuna

idayinachush ainawai. <sup>15</sup>Nuigtú wi Nicolaíta aidaun dakitag nu jintinkagtuamun idayinachush ainawai.

<sup>16</sup>Nuaduí pujutjum yapajiatajum, nu nuniachkugminig, wi mina wenujuiya espada mai yantamejai etsakamu jiina duwi ditajai maaniattajai.

<sup>17</sup>Ni antutaiji ajamuk, Wakaní Pegkeji Jisusa nemajin aidaun chichajak: Apajuiyai kajintsá anentaibau-num pegkegchaun depetkau aidaunak, yutai maná tutai nayaimpinum uukbau awa nuna ayujatnaitjai, dutikakun kayauch pujunum yamajam dita daaji agagbaun susatnaitjai. Nunak makichkish dekamainchau ainawai, imá nuna juwa duke dekaatnai, tawa nuna antuktinme.

#### Tiatiranmaya chicham agatjamu

<sup>18</sup>“Agatjata Tiatiranum Jisusa nemajuidaun diin puja nunú, dutikakum:

Apajuí uchijí, jii kegak wajukeya imanun jiiimkauwa nu, nawesh jijju jinum jiyamu dewa wegama imanun nawemkawa nunú chichaak aatus tawai: <sup>19</sup>Wika atum takaajum nunak wainjai: Mina anenjum nuna, kajintsá anentaimjutjum nunash, yaimainajum nunashkam, emamkesjum pujamugminash. Atum takaajum duka nagkamchaku takajakuitjum nu inagkeasjum yamaik takaagme.

<sup>20</sup>Tujash pegkegchau takaajum nu tumain ajutui: Atumiin nuwa Jezabel daagtin puja nu, Apajuí etsegtinaitjai tusa, mina inakeg aidaun tsanuak, apajimtai yutai anagkuamush yumainai, tuja nuwash tsanijimainai tusa jintinkagtuamun idaijume.

<sup>21</sup>Nuniakuish tsawantan susajai pujutjin yapajiatit tusan. Tujash tsanijimat idaitanak dakitawai.

<sup>22</sup>Nuniau asamtai niina pegajinig

jatan susan aepsattajai, dutikakun niina tsanijimau aidaunash dita shiig senchi waittsagtinun awetittajai.

<sup>23</sup>Dutikakun ditá pujutjin yapajitsuk nunisag batsatkuig, nu nuwa jintinkagtamujiya nuna wejuidaunak ijinattajai. Nuna dutikai ashí mina nemagtin aidauk dekawagtatui, wi aentsú anentain, nuigtú anentaimejtajinash shiig dekauwaitag nuna. Nunin asan makí makichkitigmin atum takasbau diisan amastatjime. <sup>24</sup>Tuja atum Tiatira batsatutijum, nu nuwa jintinkagtamu umigtsuk, iwanchdau duwikish dekaachbau jintinkagtuinaji tuina dusha dekachutigminak, tikich atum umimainnak tichattajime.

<sup>25</sup>Tujash dekaskea nu dekauwaitjum duke kuitamkatajum, nuniagmin taatjai.

<sup>26</sup>Apajuiyai kajintsá anentaibaunum pegkegchaun depetkau aidaunak, nuigtú wi wakegamua nunak takai takainakua nagkanbaunum jegaidau-nak, wi ashí aentsú apuji emaktatjai, <sup>27</sup>mina Apag Apu etiuwa dutiksanuk. Dutikamu asag, ichinak duwe najanamu jiju jukí awatam tsainak utsanmaina numamtuk, aents pegkeg-chau aidaunak awajkagtinai. <sup>28</sup>Dutikakun yaya tuke tsawampauwa nuna susatnaitjai. <sup>29</sup>Ni antutaiji ajamuk, Wakaní Pegkeji Jisusa nemajin aidaun tawa nuna antukti.

#### Sardisnumia chicham agatjamu

**3** <sup>1</sup>“Agatjata Sardisnum Jisusa nemajuidaun diin puja nunú, dutikakum:

Wakaní Pegkeji sieteya imajin niimtinai senchijin iwainauwa nu ajamua nu, siete yayan takaka nunú aatus tawai: Wika atum takaajum nunak wainjai. Atumek: Apajuí takajin ainawai, tama naatjume,

tujash atumek Wakaní Pegkejiya nu takamtijamainakui nuniatsjume.

<sup>2</sup>Atum takaajum duka Apajuinak shiig awagmatsui. Kanajujai betek ainagme. shintaagtajum, nunikjum kakanmamsatajum pegkeg takastasajum. Wakaní Pegkeji takaamua nu tikima emegkau-tsuk. <sup>3</sup>Adeagtajum pegkeg jintinkagtamu antukuitjum nunú. Duke umiakjum pujutjum yapajiatajum. Nuniachkugminig wi kasajai betek minittatjime, nu tsawantiniap taattawa tusa anentaimejtashbaunum.

<sup>4</sup>Tujash Sardisnum pujautijum tikich pegkegchau takainakuish, atum pegkegchau takaschau aidautigme, aents jaanchjin tsuwapachujai betekak ainagme. Nu aidauk jaanch pujun nugkujag wijai yujasagtinai, Apajuí wakegamun takasaju asag. <sup>5</sup>Apajuiyai kajintsá anentaibaunum pegkegchaun depetkau aidauk, jaanch puju anugkuam agtinai. Pujatan jukiaju aidau daaji agatkamua nui, ditá daaji agagbauwa nunash tuke esakagchatnaitjai, ayatak mina Apajun ashí ni aentsji nayaimpinum batsata nuna emtin: ‘Juka midau ainawai’, titinaitjai. <sup>6</sup>Ni antutaiji ajamuk, Wakaní Pegkeji Jisusa nemajuidaun chichaja nuna antuktinme.”

#### Filadelfianmaya chicham agatjamu

<sup>7</sup>“Agatjata Filadelfianum Jisusa nemajuidaun diin puja nunú, dutikakum:

‘Pegkejam’ ‘Dekaskenak chichauwa’ nunú, David inamajakua imana nunú, ni ajumaish tuke inamtina nui pujusagtinun, ya aidauna wayaati titatua, nunak makichkish yajuptumainchau aina nu, tuja ya aidauna wayaashti titatua, nunashkam makichkish yajuptumainchau aina nunú chichaak aatus tawai:

<sup>8</sup>Atumek machikiuch ainayatkugmesh mina chichamjuk intimjutsuk betek umikú asagmin, atum mina pachittsajum tikich aents aidau ujattajum nuna, jintan epetjamainuk makichkish atsawai. <sup>9</sup>Anuí Filadelfianum judío ijuntajin: Wishakam judío aentsuitjai, tusag ijunaina duka iwanchdau ainawai, duka midau ainatsui. Nunú aina nuna atumi emtimin tikishmitkaktajai, wi atumin aneajim nuna iwaintukan ditan idatsaktasan. <sup>10</sup>Ashí aents eke nugká batsabiagtata duwik utugchat ajiagtinaí, nunisag waitiamushkam ajiagtinaí. Nunú nuniamunum dekaattajai, ya aidauwa minaish kajintsash anentaimainawa, tuja ya nuninatsua nuna. Tujash aminak kuitamkattajame, wagki amek, wi minaig kajintsá anentaimta tiuwaitjam duka imatiksamek umigtuku asamin.

<sup>11</sup>Wika waamak minittajai, nuniktin asamtai atum minai kajintsá anentaimainajum nunisjumek anentaimsatajum, nuniagminig Apajuí amasagtina nunak, tikichik makichkish atanjamainchau ainawai. <sup>12</sup>Apajuiyai kajintsá anentaibaunum pegkegchaun depetkau aidau, juga mina daag ememattai dekas eme anentsá diitaiya nui apusattajai, dutikamu asag nuwig tuke batsamsagtin ainawai. Ditak Apajuí aentsji wajasú asag, mina Apajuiju yaaktaji yamajam Jerusalén nayaimpinmaya akaikitna nui batsamsagtinai, nuniakui wi mina daag yamagman ditan dekamtikattajai. <sup>13</sup>Ni antutajai ajamuk, Wakani Pegkeji Jisusa nemajin aidau chichaja nuna antuktinme.

#### Laodiceanmaya chicham agatjamu

<sup>14</sup>“Agatjata Laodiceanum Jisusa nemajuidaun diin puja nunú, dutikakum:

Apajuí anagkagtuamua nuna betek umina nu, Apajuí dekas tabaujin imatiksag etsegna nu, tuja Apajuiyai ashí najankauwa nunú chichaak aatus tawai: <sup>15</sup>Wika atum takaajum nunak wainjai: Atumek minak betek umigtutsuk machik umigtajume. Dekaskenmag betek umigtumainaitjume, nuniachkugmesh makichkish umigtumaitsumge. <sup>16</sup>Tujash machikiuch umigtau asamin, dakitjan idaisattajame. <sup>17</sup>Amek wiyakchaitjai tumame, tau asam, makichkish atsumamuk atsugtawai tame. Tujash amek, Apajuí diismak wainak wekayin, shiig aneas pujuchu, ujunauch, wainmachu, wisú pujam duka dekaamatsme. <sup>18</sup>Nunin asamin tajame: Dekas wiyakuch atasam, oro jiyai apea ayatak orok jukimu sumamainaitam numamtinuk, minai kajintsá anentaibaunum ashí ame atsumamuk ajutjamtata nuuwai. Tuja wisú wegakun datsan wantinkaig tusam, jaanch puju tsuwatchau nugkumaina numamtinuk, pegkejan takamtijusti tusam minai idaimamsattam nuuwai. Tuja aents wainmachu niimti tusa ampi jukí tsuwamaina numamtinuk, mina dekamtijuati tusam segattatam nuuwai.

<sup>19</sup>Wika, wi aneamug aidau senchi jiyajai, dutikachkunush suwimkan suwajai. Nuaduí pegkegchaunum aidauk Apajuí idaitakjum pujutjum yapajiatajum. <sup>20</sup>Antuktajum, wi amina jeemin taa wajasan: Pujamek, tusan unsumainaitjam numamtuk wajajai. Tuja ame wayaata tusa ipatkuminig wayattajai, nunikan amijai chichaakun, amijai jimagkan yujumkan yuwattajai.

<sup>21</sup>Apajuiyai kajintsá anentaibauwai pegkegchaun depetkau aidauk, wijai betek inamjagtinaí. Wi

depetmaku asan mina Apagjai inamag nunisajag. <sup>22</sup>Ni antutaiji ajamuk, Wakaní Pegkeji Jisusa nemajin aidaun chichaja nuna antuktinme.”

#### Nayaimpinmaya aents Apajuí emematbau

**4** <sup>1</sup>Juna ashí wainkan niimkaman, nayaimpinmaya makichik waiti ujani atatman wainkabiajai. Nuanuiya, yama nagkamchaku chicham trompeta umpuamu shinuwama imatu antukbauwa nu chichagtak: “Juwi wakata, nunikamin ju nagkaemagmatai atak uminkatna nuna iwaintuktajame”, tujutmayi.

<sup>2</sup>Nuna taig, Wakaní Pegkeji mina egkemtjuamtaí diikman, wainkabiajai nayaimpinum Apú ekeemtaiji umikbau-num makichik ekeematman. <sup>3</sup>Nunú eketa nuna niimeg, kaya dekas pegkeg akik diamante tutai, tikich kaya cornalina tutai aina imanuyi. Nunú eketa nuanuí, pagki wajae tutayama nunin kaya esmeralda tutai pegkeja iman etsantug tentea amayi. <sup>4</sup>Nunú ekeemtaiya nunak, veinticuatro ekeemtai aidaun tentea amayi, nuanuí veinticuatro apu aidaun jaanch dekas pujun nugkuinaju, atsejutai aidaunash ayatak oronak atsejaku pekabiagmayi. <sup>5</sup>Nuniamunum ekeemtai ejapeen puja nuwiya jiiniagmayi peem aidaun, chaajip aidaun, chichaamu aidaushkam. Nunú ekeemtai emtin siete jii ekemagbau amayi, duka Wakaní Pegkeji sieteya imajin niimtinai senchijin iwainauwa nuuwai. <sup>6</sup>Nuigtushkam ekeemtai emtin nayantsa numamtin vidrio<sup>a</sup> saawiya iman wajas amayi.

Nuigtú ekeemtai ejapeen awa nunak cuatro iwaaku aidaun, ukuujin tuja emtinish kuashat jii ajamu aidaun, nuna

tenteawag agmayi. <sup>7</sup>Makichkia duka león niimtin ai, tikichik toro niimtinuyi. Nuniai tikichik aents niimtin ai, tikichia duka ukukuí nanamujai betekayi.

<sup>8</sup>Nunú cuatro iwaaku aina duka, makí makichik seis nanape ajiagmayi. Jiishakam ashí iyashin ajiagmayi. Nunú iman aidaun tuke itattsuk tsawaish, kashishkam:

“iApajuí ashí senchigtina duka, pegkegmai, pegkegmai, pegkegmai, Apajuí tuke pujú, ajumaish tuke pujutin minitna nunú!”, awajiagmayi.

<sup>9</sup>Nunú aidaun Apajuí tuke pujuwa nu ekeemtainum eketun emematainak, eme anentus see tuinak imatjiagtai, <sup>10</sup>veinticuatro apu aidaun pekajaidaushkam tikishmajag, ekeemtainum eketu tuke pujuwa nuna emematuinak, dita atsejuinakbaun kuwakí jukiag niina emtin aputuinak:

<sup>11</sup>“Apuh, ameketme eme anentsá emematam amainmek, senchigtinaitam ibau asam. Wagki ame ashí wají aidaun najankauwaitme, amek wakejusam najankau asamin, ame wakegamunmag ainawai”, awajiagmayi.

#### Uwig

**5** <sup>1</sup>Wainkabiajai ekeemtai ejapena pujaunum eketa nunú, uweje untsujin makichik papí mai yantamejai agagbau, sieteya imania achiamun takus ekeematman. <sup>2</sup>Nuniai wainkabiajai makichik nayaimpinmaya aents senchigtin senchi untsamak: “¿Yaita dekas imanush, juna kuwajug papiin atimainush?” tusa iniimtatman. <sup>3</sup>Tujash nayaimpinmayagkesh, nugkayagkesh, nugká initkeniagkesh nu papiin ujaká

a 4.6 “Vidrio” tawa duka botella saawiyama nuninai.

diimainuk atsusmayi. <sup>4</sup>Nunú papiin ujaká diis augmainuk atsau asamtai, wika senchi buutbajjai. <sup>5</sup>Nunia ai apu aidau pekaja nuwiya makichik chichagtak: “Buutipa, David apu we inamajakua imana nu, Judanmaya León tutaya nunú depetmake. Nuniku asa niiyai ju papí sieteya imania achigbauwa juna ukuitug ujmainuk”, tujutmayi.

<sup>6</sup>Takui diikman wainkabaijai, makichik uwig maamu aajakua numamtin, ekeemtai ejapeen cuatro iwaaku aidau, nuigtú apu aidau pekaja nu ejapeam wajattaman. Duka siete kachují, nuigtú siete jii ajibi. Nu jii aina duka iwainawai, Wakaní Pegkeji sieteya imajin niimtinai senchijin iwinauwa nu, ashí nugkanum ishiakbauwa nuna. <sup>7</sup>Nu uwija nunú, ekeemtainum papiin uweje untsujin takus eketa nuna jegantun jujukmayi. <sup>8</sup>Nuna papiin jukimtai, cuatro iwaaku aina nunú, veinticuatro apu aina nujai Uwijá emtin tikishmajagmayi. Nunú aidauk awattai arpan, copa ayatak orok najanamunum incienso aimjamun ashí takuinaku agmayi. Nu inciensowa duka, Jisusa nemajuidau Apajuí augbauwa nuna iwainabi. <sup>9</sup>Nuninak yamajam kantamain kantamainak:

“Ameketme aanú papí jukim, achigbau aina nu ukuitmainmek. Wagki amek maamu aajakú asam, amina numpem ukajuitam duwi, ashí aents nugkanmaya shuwin, puju, yagkú, jegkemtin aidauti, tikich chicham chichaaku aidauti ayamkagtukuitme Apajuinu atinme tusam,

<sup>10</sup>Nu nuigtushkam apu ekagtim, Apajuin takagsatnume tusam sacerdote ekagtuku asamin, nugkanum inamjattaji”, wajagmayi.

<sup>11</sup>Nuna takui diikman, nayaimpinmaya aents dekapatash dekapamain-

chau, ekeemtai ejapeen awa nuna cuatro iwaaku aidau, apu aidaujai ashí tenteawag pampainak, <sup>12</sup>senchi jikag kantamainak:

“iUwig maamu aajakua, nuuwai dekawagaaku senchigtinuk, wiyakuch, yacha, eme anentsá diitai, ememattai, tuke kantamjutai atinuk!” wajagmayi.

<sup>13</sup>Nuigtú ashí najankamu nayaimpinmaya, nugkanmaya, nugká initkenia, nayantsanmaya, nuigtú ashí wájí nui ayaa dushakam kantamainak:

“iEkeemtainum eketa nu, Uwigjai senchigtina ibau asamtai, eme anentsá kantamjuinaku, tuke ajumaish ememattai atin atí!” awajuidau antukbajjai.

<sup>14</sup>Aatus imatjiagtai cuatro iwaaku niimtin aina nu aainak: “Aatus atí”, tiagmayi. Tiagtai veinticuatro apu aina nu tikishmag batsamsag, emematiagmayi ajumaish tuke pujutna nuna.

#### Uwig sieteya imania papí achigbaun ukuitug ujakbau

**6** <sup>1</sup>Nunia papí achigbauwa nuwiyan makichik Uwig ukuinkabi, dutiktai cuatro iwaaku aina nuwiya makichik ipamat wajuakeama imatuk: “iTantá diistá!”, tujutmayi. <sup>2</sup>Takui diikman makichik caballo puju, tuja aents nui entsatkauk makichik nagkin takus ekeemtatman wainkabaijai. Duka makichik atsejutai susamuyi, dutikamu asa ni depetmakuyi, nuigtushkam nigki depetmaktinuyi.

<sup>3</sup>Nu nunikmatai jimaja ju achiamun Uwig ukuinkabi. Dutiktai cuatro iwaaku aina nuwiya jimaja nu chichagtak: “iTantá diistá!”, tujutmayi. <sup>4</sup>Tujutkui jegantan diikman caballo kapantun wainkabaijai. Nui entsatka nuna espada esagman susabi, ashí aents aidaun maanimitkati, dutikainam pempé

perpeentunikiag maanidau asagmatai nugkanum agkan batsatbauk atsutí tau asa.

<sup>5</sup>Nuigtushkam kempatuma nu achiamun Uwig ukuinkabi. Dutiktai cuatro iwaaku aina nuwiya kempatuma ju untsujuk: “iJuwi tantá diistá!”, tujutmayi. Tujutkui jegantan diikman caballo bukusean wainkabiajai. Nui entsatkauk kijin dekapatain takakuyi. <sup>6</sup>Nuniamunum nu cuatro iwaaku aidau ijuna nuna ejapenia chichaak: “Makichik tsawan takasbauwai makichik kilo trigon jukiagtinai, tuja makichik tsawan takasbauwai kempatum kilo cebada suwam agtinai. Nu dutikakmesh aceite, umutai vino aina duka emeskaipa”, timayi.

<sup>7</sup>Nuna timatai cuatro achiamua nuna Uwig ukuinkabi. Dutiktai cuatro iwaaku aina nuwiya cuatrowa nu untsujuk: “iJuwi tantá diistá!”, tujutmayi. <sup>8</sup>Nuna tujutkui jegantan diikman caballo yampia wajas wajaun wainkamiajai. Nui entsatkauk Jatai daagtinuyi. Nuna pataetakuyi jakau wakaní batsamtaiya nu. Caballonum entsatka nunak, ashí aents nugkanmaya aina nuna jimaitukjiya nuna jimaitukjin maanimitikak, nujantai ijinak, jatá susa ijinak, kuntin kajein nugká batsata nuna ayujak ijinati tibauyi.

<sup>9</sup>Juna dutika idayak, cinco achiamua nuna ukuinkabi. Dutikakui diikman wainkabiajai, altar tutaya nuna nugkaan, Apajuí chichamen etsegtin maamu aidau wakaní ijunas, <sup>10</sup>senchi untsukag: “Apuh pegkegmah, dekaske-num chichauwah, ¿wajupa asamea iina mantamawajua dusha suwimkash susattame?” awajiagmayi. <sup>11</sup>Nuna imatuidaun jaanch puju aidaun tinamak chichajak: “Ayamkujum machik tsawan dakastajum, tikich aidaunash atumin mantamawajua dutiksag mai mainakua, ashí maawagtina duka jegatsui”, timayi.

<sup>12</sup>Nuna tusa idayak, seis achiamua nuna Uwig ukuinkabi. Dutikakui diikman senchi uujun wainkabiajai. Imaniamunum etsag shiig bukusea kayushkijai betek wajasmayi, nantushkam kapantu numpajai betek wajasmayi. <sup>13</sup>Yaya punkau aidaushkam nugkanum kakeyagmayi, yujagké nejeen dase senchi dasentak pegam kakegama numamtuk. <sup>14</sup>Nayaimpishkam megkaekabi, papí ninuja jutayama numamtuk. Ashí muja aidauk, ajuntai aidaujai pachimdagak patamsabi. <sup>15</sup>Imanitai nugkanmaya apu aidauk waanum waigkag, nuigtú mujanum kaya muun ayaunum uumkag, aents eme anentsá diitai aidau, wiyakuch aidau, suntajan apuji aidau, kuashat aentsnum inamin aidau, inaku waitkatai aidau, agkan batsamin aina nujai ijunjag batsamsag <sup>16</sup>mujan, kaya aidaun chichajuinak: “Waamak yutujatuam uujuatkakia, Apajuí nayaimpinum eketa au waipakai, Uwig suwimkan sujamsai, <sup>17</sup>yamaik ni kajeká suwimkan sukagstutina duka tsawantak jegae, makichkish yamaik suwimkanak uwemtumain ainatsui”, wajagmayi.

#### Israel aents aidau uchijí wegantu aidaunmaya nijayin agatkam

**7** <sup>1</sup>Nuigtú cuatro nayaimpinmaya aents aidau, makí makichik kanajag nugka najatamu aina nui ijuntatman wainkabiajai, dase nugkan, nayantsan, makichik numinakesh umpugkái tusag kuitamainak. <sup>2</sup>Nuigtushkam wainkabiajai tikich nayaimpinmaya aents etsá jiintainia minak, sello Apajuí tuke pujuwa nudaun takusá minis, cuatro nayaimpinmaya aents aidau nugka, nayantsajai emeskata tusa senchi susamu ijuna nuna, senchi untsuká: <sup>3</sup>“Yamaikik nugkak, nayantsak, numi aina dushakam emeskaigpajum. Iina

Apajuiji inake aina nuna nijayin eke sellowai ijuasjinkik”, timayi.

<sup>4</sup>Tusa tabaunum: “Ashí Israela uchijí wegantu aidau dekapamak, ciento cuarenta y cuatro mil aidau nijayin selló awakamu ainawai”, tabaun antukbaijai.

<sup>5</sup>Dutikamu aidauk:

Judá wegantunmaya doce mil,  
Rubén wegantunmaya doce mil,  
Gad wegantunmaya doce mil,

<sup>6</sup>Aser wegantunmaya doce mil,  
Neftalí wegantunmaya doce mil,  
Manasés wegantunmaya doce mil,

<sup>7</sup>Simeón wegantunmaya doce mil,  
Leví wegantunmaya doce mil,  
Isacar wegantunmaya doce mil,

<sup>8</sup>Zabulón wegantunmaya doce mil,  
José wegantunmaya doce mil,  
Benjamín wegantunmaya doce mil  
aina nunú agmayi.

**Pujun nugkuinaju aidau kuashat  
tuwakagbau**

<sup>9</sup>Juna ashí wainkan niimkaman, Apajuí ekeemtai pujamunum Uwigshakam nui ayaumas waja nuna emtin, kuashat aents dekapatash dekapamainchau, ashí nugkanmaya aents aidau, ditash chichaaku aidau jegkemtin, shuwin, puju, yagkú aidau jaanch pujun nugkuaju aidau dukan takuinasa ijunaidaun wainkabiajai. <sup>10</sup>Nunidaun, ashí pampaajag senchi unsumkag:

“iJutii Apajuiji ni ekeemtaijin eketa au, Uwigjai jutiinak uwemtijamjaje!”, wajagmayi.

<sup>11</sup>Nuniai nayaimpinmaya aents aidau ekeemtaiya nuna tentea wajaídaushkam, apu aidaush, cuatro iwaaku aina nujai, ekeemtai emtin ashí tikishmajag tsunsumawag, nijayin nugkan antig pujusag Apajuin emematuinak:

<sup>12</sup>“iDekaske aatus atí!

Iina Apajuijiya duka tuke pegkegunum chichagtai,

ememattai, yacha, see tutai, eme anentsá diitai, senchigtin, senchia ibauk atin atí. iAatus atí!”, wajagmayi.

<sup>13</sup>Nuna tiagmatai, apu pekaja nuwiya makichik chichagtak: “Pujun nugkuaju aina aush ýa ainawa, tuwiya kaunkaje?” tusa inintsabi. <sup>14</sup>Tujutkui: “Apuh, ame dekam jama” tibaijai. Tai ni chichagtak: “Juka shiig senchi waitkasbau aina nunú, Uwijá nunpeen jaanchjin nijakag ibau puju emakaje.

<sup>15</sup>Nuniku asag Apajuí ekeemtaijiya nuna emtin ijunas, jega Apajuí ememattaiya nui kashi tsawaijai takajuinawai. Nuniau asagmatai, ekeemas inama nu ditanak kuitamkattawai.

<sup>16</sup>Dutikamu asag nujantaish, kitakaish, etsa sukuinam seemakugkesh waittsashtin ainawai.

<sup>17</sup>Apajuí ekeemtaiji ejapeen puja nui, Uwig waja nunú, aents uwijá kuitamin uwigjin kuitamama numamtuk, yumi pujutan sukagtina nuna amitnai. Tuja Apajuí ditá negaikijinak ujugtuktinai”, tujutmayi.

**Siete achiamua nuna Uwig  
ukuikamu**

**8** <sup>1</sup>Nu nunikmatai, siete achiamua nuna Uwig ukuinkabi, dutikamtai nayaimpinmag bitat wajas asabi jimaituk hora tumain. <sup>2</sup>Nuniamunum wainkabiajai siete nayaimpinmaya aents aidau, Apajuí eketbaunum ayaumas wajaídaun, nuna siete trompetan tinamkagmayi. <sup>3</sup>Nuniai tikich nayaimpinmaya aents, yukunta nunin ayatak orok najanamun takus, altar ayatak orok najanamunum jegan wajasmay. Nunikmatai kuashat incienson nui chimpijuabi, nunú incienson Apajuí

aentsji aidau Apajuí augbaujiya nujai pachimag apeati tusa. <sup>4</sup>Dutikamtai nayaimpinmaya aents takakbauwa nui, incienso, nuigtú Apajuí aentsji aidau Apajuí augbaujai auk, ijumnag bukuiti Apajuí eketbaunum wamayi. <sup>5</sup>Nuniamunum nayaimpinmaya aents, nunú apeamu keettaman incienso jutainum aimak juki, nagkimá nugká ajapabi. Dutikamu nugkanum iyautai ipamat, chaagpijai tuutainai nugkashkam ugmayi. <sup>6</sup>Imatiagtai siete nayaimpinmaya aents aidau, siete trompetan takus ijunushkam uminiagmayi umpuajagtas.

<sup>7</sup>Nagkamchak makichik trompetan umpuagmayi, dutikamtai bichan, jii numpajai pachimjamun nugká nagkimá ajuabi. Dutikamtai nugkanak jimaituk amaisattak ashí numi aidaun, dupa samekbau aidaujai apekmayi.

<sup>8</sup>Nunikmatai jimaja ju trompetan umpuagmayi, dutikamtai makichik muja muunta iman kegaun nayantsanum nagkimá ajugmayi. Dutikamtai nayantsan jimaitukjin amaisattak numpa wajasmayi. <sup>9</sup>Nuniku asamtai namak nayants batsamin aidauk jinawagmayi, lancha nui ayauk ashí esakagmayi.

<sup>10</sup>Kompatuma nu trompetan umputai, nayaimpinmaya makichik yaya muun keeká japiinak, namak aidau, yumi pukuni jiinin aina nuna jimaituken amaisattak iyagmayi. <sup>11</sup>Nunú yayak Yapau daagtinuyi, nunin asa yumi aina nuna jimaitukjin amaisattak yapau awajsabi. Nuniku asamtai kuashat aents nuna uwajajak jinawagmayi.

<sup>12</sup>Nunikmatai cuatrowa nu trompetan umpuagmayi, nunikmatai etsa, nantu, yaya aina duka jimaitukjin amaisagtak besekagmayi, besekaja nunisag suwe

wajasagmayi. Nunik kompatum hora kashi tsawaishkam etsanchagmayi.

<sup>13</sup>Nu nuniku ai wainkabiajai nuniakun antukbaijai, makichik ukukú<sup>b</sup> nayaimpi ejapeen nanaak minis, senchi untsumak: “Ae, ae, ae, shiig ishamain atatui nugká batsataina nudauk, kompatum eke trompetajin umpuinatsu nunú umputai” wajattaman.

### Cinco ju trompeta umpuagbau

**9** <sup>1</sup>Cinco nu trompetajin umpuagmayi, nayaimpinmaya makichik yaya nugká iyaittaman wainkabiajai. Nuna susabi yawin, waa muun ishamain akagu epenbaun ujaiti tusa. <sup>2</sup>Dutikam waa muun ishamain akagu epenbaun ujaimtai, aja tsajutkau apeam bukuituwama imanik bukuiti jiiinmayi, imaniak etsanak suwe awajsabi, daseshkam nunú bukuita ibauk wajasmayi. <sup>3</sup>Nunú bukuita nuwiya manchi jiiniagmayi, duka titig ijuatbau najamama iman senchimitikamu agmayi. <sup>4</sup>Tujash nugkanum numi, dupa samekbau aidau ayaa duka ijinawaigpajum, ayatak aents Apajuinuchu aidau nijayin selló awajakashbau aina nu ijutajum. <sup>5</sup>Aents ijuakmesh mautak maawaigpa, ayatak ijuta, dutikam cinco nantui najaimá pujuagtinme, timayi. Tibau asag aentsun ijubi, dutikawajam titig ijuatbau najaimatia imanik najaimagmayi.

<sup>6</sup>Imanik waituinak dita jamainun egainakush igkugchagtinuyi.

<sup>7</sup>Nunú manchi aidauk caballo maanitnum wegagtatak uminas ijunama imanik amayi, ditá buuken atsejutai oroa iman ajiagmayi. Yapig aentsú yapijai betekmamtinuyi. <sup>8</sup>Intashishkam nuwan intashijai betekmamtinuyi, untsumai leogka naiya iman agmayi. <sup>9</sup>Iyashig



jijua iman anugjamuyi. Nanamkushkam kuashat carro caballo tupikaku japitai maaniamunum shimak tutugtuwama imatmayi. <sup>10</sup>Ujukeg, ijujattajishkam titigdaujai betekmamtinuyi, duwi aentsun iju cinco nantui waitkasti tusa senchimitkamuyi. <sup>11</sup>Ditá apujig nayaimpinmaya aents waa muun ishamain akagaunum puja nuuyi. Nuna daajig hebreo chichamnumag “Abadón” tutai, utsu griego chichamnum “Apolión” tutaiyai.

<sup>12</sup>Aatus nagkaemakmayi ukukuí nagkamak “ae” tibauwa duka. Tujash eke juwakmayi ukukuí jimaja juna ishamain nagkaemaktatui tusa “ae” tibauwa nu uminkatin.

#### Seisa ju trompeta umpuagbau

<sup>13</sup>Seisa nu trompetajin umpuagmayi, nuniamunum Apajuí emtin altar ayatak orok najanam, cuatro uwaetukbauji aja nuwiya chicham jiiun antukbaijai.

<sup>14</sup>Nuniak nayaimpinmaya aents trompetan umpuaja nuna chichajak: “Namak Eufrates tutainum nayaimpinmaya aents cuatro jigkajam ijuna au atiata”, timayi. <sup>15</sup>Nuna tutai cuatro jigkajam ijuntatman atiabi, ditanu hora, tsawan, nantu, mijan umintai nunikti tibau jegau asantai, duka jimaituk ejesattak aents nugká batsata nuna ijinati tibauwayi.

<sup>16</sup>Maaniatatus suntag caballonum shimauk doscientos millones awai tabaun antukbaijai.

<sup>17</sup>Juna tikima paan wainkabiajai, caballonum entsatkau aidauk, maaniaku nugkutai detsepeen jiya iman kapaaku, zafrowa nunin wigka, tuja azufreya nunin yagkú ajiagmayi. Caballo buuké aidauk ikamyawa buukega nunin agmayi, tuja weninia jiniagmayi jii, bukuitamu, azufre aatus. <sup>18</sup>Jujú jii, bukuitamu, azufre nuna weniinia jinaina duwi, aents aidauk jimaitukea

nuna amaisattak jinawagmayi. <sup>19</sup>Caballo aidau senchijig wenin, ujukenish ajiagmayi. Ujukeg dapí buukega nunin asagmatai duwi aentsnak kajeebi.

<sup>20</sup>Tujash tikich aents nu caballo weniinia jiina duwi jinachu aidauk, ditá pujutji pegkegchaunak yapajitsuk, wakan pegkegchau aidau ememattanash idaitsuk, dita dakumká najanam oro, jiju plata, bronce, kaya, numi aina nuna emematiagmayi. Tujash duka wainmatnakesh wainmachu, antutnash antuchu, wekaetanash wekaemainchau aina nunin aig. <sup>21</sup>Nunidau asag magkagtutnash, wawejattanash, tsanijimtanash, kasamtanash idaichagmayi.

#### Nayaimpinmaya aents papí piipich ujaká takakbau

**10** <sup>1</sup>Tikich nayaimpinmaya aents senchigtin yujagkim ijiam, buukenig pagki wajae tutayama iman tenteamu, yapishkam etsajai betek etsantu, kagkajig jii kegak tuputuwama imanik akaetatman wainkabiajai.

<sup>2</sup>Takakuyi papí piipichin ujaká, nawe untsujiya nunak nayantsanum najama, menajiya nunak nugká najama wajabi. <sup>3</sup>Nunik senchi untsamak chichaamujig, león shinak wajukeya imatmayi. Nu untsamak nagkanaig sieteya imania ipamat wajukeya imatuk nunú untsumkamunak imatiksag betek dakumkagmayi. <sup>4</sup>Nunú siete ipamat nuna dakumkag itatkagmatai, agagtasan uminai, nayaimpinmaya chichagtak: “Siete ipamat tiaja duka agatsuk imá amek aneaku atá”, tujutmayi.

<sup>5</sup>Tuja nayaimpinmaya aents nayantsanum najami, nugkanmash najama wajaun wainkag nu, uweje untsujiya nuna nayaimpinmanini takuibi. <sup>6</sup>Nunik, Apajuí tuke puju nayaimpin, nugkan, nayantsan, ashí nui ayaa nunash najankauwa nuna adayas: “Yamaik

tsawantak jegau asamtai, ni Apajuí dutikatjai tibauwa nu jegatí, tusa dakamuk atsuttawai, <sup>7</sup>sieteya nu trompetan umputai, Apajuí ni dutikat-nujin ii dekaachbaun, niina etsegtin aidaunum tiuwa duka uminkattawai.”

<sup>8</sup>Nayaimpinmaya chichaamun antukag duke ataktú awentsag aujtak: “Nayaimpinmaya aents nayantsanum najama, nugká najama papí piipich ujakbaun takus waja nu jegantam papí jujuktá”, tujutmayi. <sup>9</sup>Tujutkui jegantan: “Papí sujustá”, tusan segai ni chichag-tak: “Jukita, nunikam yuwata. Wenimi-nig dapá yumiji yumintsak wajapakna iman dekapjattame, tujash wakeminig yapau egkeattame”, tujutmayi.

<sup>10</sup>Tujutkui, nayaimpinmaya aents papí piipich takakbaun jukin yukaman, dapá yumiji yumintsak wajaknama imanun yuwabijai, tujash yuwá ai wakejuí yapau awajtusmayi. <sup>11</sup>Nuniai ni chichagtak: “Ataktú awentsamek etsegekata, Apajuí ashí nugkanmaya aents ditash chichaaku aidaun, jegkem-tin, shuwin, puju, yagkú aidaun, nuigtú ashí apu aidaunash tawa nu”, tujutmayi.

**Mil doscientos sesenta tsawantai,  
Apajuí chichamen jimag aents  
etsekgagtinaí tibau**

**11** <sup>1</sup>Nuna tujuti, makichik tagkan dekapatia nuninun sujusá: “Wetá, nunikam jega Apajuí emematku ijuntaiya nu, altar puja nujai dekapata. Dutikakum dekapagta wajupa aentsua nú utsanawajash Apajuínash emematui-nawa nu. <sup>2</sup>Tujash jega Apajuí ememat-taiya nuna agaajig dekapatsuk idaisata, duka judiuchu aents aina nu idaitusbau-wai. Dutikamu asamtai yaakat pegkegma nunak cuarenta y dos nantui batsamtusag, najakag tsafí batsamtiagta-tui. <sup>3</sup>Nuniakui wi jimag aentsun

awemattajai, jaanch wake besemag pujaku nugkutain nugkug yujasag, mil doscientos sesenta tsawantai mina pachitus etsekgatnume tusan.”

<sup>4</sup>Nunú jimag mina etsegtujiagtata duka, jimag numi olivo tutai, nuigtú jimag candelero tutai nugká Apujiya nuna emtin ijuna nuuwai. <sup>5</sup>Duka makichik aentskesh emesjata tamak, ditá weninia, jii jiiinak ashí shiwaji aidaunak apeká ijinmayi. Nunisag jinawagtatui tikich nuna emesjatatus wakegaushkam. <sup>6</sup>Ditak senchijí ajiagmayi nayaim epenmainnum, Apajuí chichame chichagkagtuinak yujasag yumi yutujai tusag kumpatum mijan jimaituk epenmainnumash, yumi numpa emamainnumshakam, nuigtú aents aidaun wajupa imania jatan susa waitkastasaya wakegawa, nu dutikmain-numash senchijig ajiagmayi.

<sup>7</sup>Nunik dita chichagkagtamujin ashimkagmatai, waa muun ishamain akagaunmaya kuntin muun jiina nunú ditajai maaniatnuyi, nunik ditanak depetuk mai maawagtinuyi. <sup>8</sup>Nuna iyashí aidauk yaakat dekas eme anentsá diitaiya nuna ejapeen tepeagtinuyi, iina Apuji Jisukristun achijag maawajua nui. Nunú yaaktak “Sodoma”, nuigtú “Egipto” tutayai ditá pegkegchauji pachisa. <sup>9</sup>Ashí nugkanmaya aents ditash chichaaku, jegkemtin, shuwin, puju, yagkú aidau kaunkag, iyashinak ukutsuk, kumpatum tsawan jimaituk dii batsamtiagtinuyi. <sup>10</sup>Nuninak ashí nugkanmaya aents aidauk shiig aneas dakujuinak, pempeentunikiag anenjauch wajichin sudayagtinuyi. Wagki nu jimag Apajuí etsegtin aina nunú chichagkagtiagtai, tutitag dekape-jakú asag.

<sup>11</sup>Tujash kumpatum tsawan nuigtú jimaituk nagkaemai, Apajuí mayai susam ataktú nantakiagmayi, nunikag-

matai nuna wainkaju aidauk shiig senchi ishamiagmayi. <sup>12</sup>Imaninai nayaimpinmaya senchi untsuká: “Juwi wakatajum”, timayi. Tima mai yujagminum pachiinak ashí ditá shiwajish wainainaig wakagmayi. <sup>13</sup>Nunik dita yakí wegagtai nugka senchi ugkabi, imaniak kuashat jegan yumpuagmayi, imatikau asamtai siete mil aents jinawagmayi. Tikich aents eke jakachaju aidauk senchi ishankag, Apajuí nayaimpinum pujuwa nuna emematiagmayi.

<sup>14</sup>Ukukuí jimaja juna ishain nagkaemaktin asamtai “ae” timawa duka aatus nagkaemakmayi. Nuniai kampakuma nu ishain nagkaemaktin asamtai ukukuí “ae” timawa nu waamak jegantinuyi.

#### Sieteya nu trompetajin umpuagbau

<sup>15</sup>Sieteya nu trompetajin umpuagmatai, nayaimpinmaya senchi pampajag: “Ashí nugkanmaya inamaina duka yamaik iina Apajuijinu, niina uchiji Kristua nudau wajasé. Nuniku asamtai nigki tuke inamtinai ajumaiya duwish”, wajagmayi.

<sup>16</sup>Imatiagtai veinticuatro apu aidau Apajuí emtin pekajuidaushkam, tikishmajag tsuntsumawag nijayin nugkan antig pujusag Apajuin emematuinak:

<sup>17</sup>“Apu Apajuí ashí senchigtinuh, ametme tuke pujumek, yamaishkam pujau, atakea duwishkam tuke pujutnumek, duwi see tuinaji. Wagki ame dekas senchigtinaitam duka iwainmamkam, yamaik amek inamjatasam nagkamaume.

<sup>18</sup>Nuniau asamin ashí nugkanmaya aidauk kajejaje, tujash ame jakau aidau inanjang dita nugká pujusag magkagtuinak,

nuigtú pegkegchau takasbauji aidau diigsam kajekam suwimak susatnaitam duka, yamaik tsawantak jegae.

Nuigtú amina inakem chichamjumin etsejajakú aidau, ashí amina nemagtamin aidau, aminash ajantus diigbau aidau, eme anenchatai, tuja eme anentai aidaush akiktinaitam dushakam jegae”, wajagmayi.

<sup>19</sup>Tuja jega Apajuí ememattai nayaimpinum awa nunú ujanmayi. Nunikmatai kajun arca tutai chicham apakbau aajakua nu, jega Apajuí ememattain auk paan wainnabi. Nuniamunum amayi peem aidau, chaajip, ipamat aidau, ugbau, senchi bicha kakegainamujai.

#### Kuntin muun kajen nuwan wantintukbau

**12** <sup>1</sup>Nayaimpinmaya wainchatai wantintatman wainkabiajai: Makichik nuwa, etsa etsantama imanun nugkuaju, doce yaya batsakbaun atsejaku, nantunum najama wajattaman. <sup>2</sup>Ejamtin asa, uchigmaktakamá najaimak senchi buutmayi.

#### Kuntin muun kajen kapantu

<sup>3</sup>Nuniai tikitchakam nayaimpinum wainchatai wantinkabi: Kuntin muun kajen kapantu wajakin, dapi niimtin, siete buuktin, diez kachují ajamu, makí makichik buuké aina nuwig atsejutaiji ajiagmayi, <sup>4</sup>ujuken nayaimpinmaya yaya aidaun jimaitukjin amaisattak amainun tajak juki nugká akakekmayi. Nunik nuwa uchigmaktatus puja nuna emtin wajanmayi, uchi yamá akiinunak yuwatatus. <sup>5</sup>Nuniai nuwak aishmagkun uchigmakmayi, ashí nugkanum niina senchijijai inamtina nuna. Tujash uchijinak jukiag Apajuí eketbaunum

iwakgmayi. <sup>6</sup>Dutijum nuwak, Apajuí mil doscientos sesenta tsawantai pujusá yumainun uwegshunum umigkauwa nui tupikakmayi.

<sup>7</sup>Nu nuniku ai nayaimpinum Apajuí pujutain, nayaimpinmaya aentsú apuji aina nuwiya Miguel daagtin ashí niina suntajijai maaniabi, kuntin kajen ashí ni suntaji aina nujai. <sup>8</sup>Nunika maaniamunum Miguel ni suntajijai kuntin kajen ashí ni suntaji aina nunak depetuk, nayaimpinum pujusai tusag jiijá utsagmayi. <sup>9</sup>Dutikak nunú kuntin kajen yaunchuk dapi tujakbauwa nu, iwanch tuuta awagmatai, ashí nugkanum tsanumá wekaena nunak, ashí niina suntajijai nugká ajapawagmayi.

<sup>10</sup>Nuna dutikantai nayaimpinmaya senchi untsamak:

“Yamaik tsawan uminkae,  
ni Apajuí niina senchijinig inamak  
aentsnak uwemtikatna nu,  
Kristu inamjatna dushakam.

Wagki ii yachi aidaunak tsawaish  
kashishkam jutii Apajuiji emtin  
tsanumjú wekaenuwe duka jiičí  
ajapamu asamtai.

<sup>11</sup> Dítak uwig mantamnak numpeen  
ukajua duwi, dita tudaujin  
bakumamainnak agkanmagawaju  
asag,

tuja uwig takasbauwa nuna  
etsegtuinak depetmamkaje.  
Dítak sapigmakchaje chicham  
etsegku mantamnatnash,  
maamash jakagtatus uminas  
yujaidau asag.

<sup>12</sup> iNuaduí ashí nayaimpinum batsatu-  
tigmek shiig aneatajum!  
Tujash iWait aentajime nugkanum,  
nayantsanum batsatainajum nunak!  
Wagki iwanch tsawanji wajumak  
juwatka nuna dekau asa,  
senchi kajeká atum pujamunum  
akaetugmakiu asamtai”, timayi.

### Kuntin muun kajen nuwa ainjamu

<sup>13</sup>Kuntin muun kajen nugkanum  
ajapamu asa, nuwa uchin uchigmakua  
nuna ainmayi. <sup>14</sup>Dutiktai Apajuí nuna  
nuwan, jimag ukukuí nanape dekas  
muunta imanun susabi, dutikam nanaak  
uwegshunum wegak kuntin muun  
kajena nuna ukuktí tusa, nui kampatum  
mijan nuigtú jimaituk pujusmatai  
kuitamnaktinjin. <sup>15</sup>Nunikmatai kuntin  
muun kajena nu nuwan amaimainchau  
dekapeak, weninian yumin jiičí namak  
muuntan najanabi, nuwan tajak jukiti  
tusa. <sup>16</sup>Tujash nuwanak nugka ayamjuk-  
mayi, nugka ujani kuntin muun kajen  
yumi awemamunak uwag emegkak-  
mayi. <sup>17</sup>Nuna dutikantai kuntin  
kajenuk nuwan senchi kajejuk, nuwá  
patayí wegantu aidau Apajuí chicham  
umiktajum tibaun umiinak, Jisukristu  
pachis etsegtuina nujai maaniatatus  
wejibi. <sup>18</sup>Nunik kuntin muun kajena  
duka nayants uwetus wajanmayi.

### Kuntin nayantsanmaya jiinkimu

**13** <sup>1</sup>Wainkabiajai kuntin muun  
siete buuktin, diez kachují  
ajamu nayantsanmaya jiiintatman. Makí  
makichik kachujinig atsejutai ajiagmayi.  
Untsu ashí buukenig Apajuí pegkegchau  
chichagbau agatkamuyi. <sup>2</sup>Nu kuntin wi  
wainkag duka, ikamyawajai betekmam-  
tinuyi, naweg chayú nawega nuninuyi,  
untsu wenig leogka weniya imanuyi. Nu  
imana nuna tikich kuntin muun kajena  
nu, niina senchijini, ni inamtajijai  
susabi apumea takastí tusa. <sup>3</sup>Dutikamua  
nuna makichik buuké jakati tusa  
awatbauwa nuninun wainkabiajai.  
Tujash nigki esama tsagagmatai, ashí  
aents nugkanmaya aidauk puyatjukag  
niina nemajiagmayi. <sup>4</sup>Nuninak, kuntin  
muun kajena nunú tikich kuntinun  
senchimitikau asamtai emematuinak, nu

kuntinnashkam emematuinak: “Juna depetmainuk makichkish atsawai”, awajiagmayi. <sup>5</sup>Nu kuntinnak Apajuí idaisabi cuarenta y dos nantuí inamak, ememas chicham shiig pegkegchau aidaunash chichaak, Apajuinash pegkegchaun chichagtí tusa.

<sup>6</sup>Tibau asa, Apajuin pegkegchau chichajak, Apajuí pujutaijin, ashí nayaimpinum batsamin aina nuna pachisash pegkegchau chichagmayi.

<sup>7</sup>Aantsag Apajuí nemajuidaujaish maaniati nuniak depetkati tibaui. Nuniak ashí aents nugkanmaya ditash chichaaku, jegkemtín, shuwin, puju, yagkú aina nuwish inamjati tusa idaitusbauyi. <sup>8</sup>Dutikamu asamtai ashí nugkanum batsataidauk nuna emematiagtinuyi. Uwig maamu aajakua nuna papiijin, pujutan jukitnume tusa, nugka yama najanamua duwi nagkamas daaji agatkashbau aina nunú aidau.

<sup>9</sup>Ni antutaiji ajamuk antuktinme:

<sup>10</sup>“Dita achiká juwam amainuk, achiká jukimu agtatui.

Tuja dita espadayai maam amainuk, espadayai maam agtatui.”

Jujú nuniemunum Apajuí aentsji aidauk, waitiamu katsuntan unuimain ainawai, nuninak emamkemas pujuinak, Apajuíyai kajinas anentaimain ainawai.

#### Kuntin nugkanmaya jiinkimu

<sup>11</sup>Nu nuniku ai, tikich kuntin muun nugkanmaya jiinun wainkabiajai. Duka jimag kachují uwigdaujai betekak ajibi, tujash chichaakug kuntin muun kajena nujai betek chichabi. <sup>12</sup>Duka tikich nayantsanmaya kuntin buuken awatbau tsagajua nuna senchijí susamuyi, dutikamu asa nugkanum aents batsamin aidaunak: “Nayantsanmaya kuntin jiinkiuwa nu ememattajum”, timayi.

<sup>13</sup>Tusa kuashat wainchatain iwainabi,

dutikak ashí aents wainainamunum nayaimpinmayan jiin nugká ajuibi.

<sup>14</sup>Nuna dutika tikich kuntina nuna emtin iwainag takau asa, nugká batsamin aidaunak tsanubi. Nuniau asa kuntin espadayai tsupikbau aajakú iwaaka nu dakumkajum najanatajum, tusa nugkanmaya aents aidaun inagmayi. <sup>15</sup>Tiajam nuna dakumak najanawagmatai, tikich kuntin nugkanmaya jiinkiuwa nunú, niina senchijin susa mayain egketuk chichamtikabi.

Dutikam nu chichaak: “Ashí aents mina emematjuinachuk kajeam agtatui, <sup>16</sup>nuigtushkam ashí aents eme anentsá diishtai, eme anentai aidau, wiyakuch aidau, ujunauch aidau, inaku waitkash-tai, inatai aidaushkam nijayin, nuniachkush uwejé untsujin agatkamu agtinme, <sup>17</sup>tuja agatjashbau aidauk, nuniachkush kuntinu daajiya nunakesh takakchawk, tuja kuntinu daajiya nunú numerowai agagbaukesh atsubgawk, sujutnash sujumainchau, tuja sumatnash sumamainchau agtinme”, timayi.

<sup>18</sup>Juwig kuashat unuimat atsumnawai. Ni dekat ajamuk dekapagti kuntinu numerojiya nuna. Duka makichik aentsua nuna numerojiyai. Nunú numerok seiscientos sesenta y seis tawa juuwai.

#### Ciento cuarenta y cuatro mil aents aidau kantamawagbau

**14** <sup>1</sup>Nunikmatai ciento cuarenta y cuatro mil aents, nijainum Uwijan daaji, tuja Uwijá Apajiya nuna daaji agatkamu, Uwigjai muja Sión tutainum ijunag wajattaman wainkabiajai. <sup>2</sup>Nuniemunum nayaimpinmayan antukbaijai, tuna dujaji utama imatak, senchi chaajip patak wajukeya imatuinak, awattai arpa awatin aidau ijunag awatbau wajukeya imatun.

<sup>3</sup>Imatuinak apu aidau, cuatro iwaaku

aina nujai tenteam, Apajuí ejapeen eketa nuna emtin wajantag, yamajam kantamtain kantabiagmayi. Nunú kantamtai yamagma nunak makichkish tikichik unuimamaichagmayi, imá ciento cuarenta y cuatro mil aents nugkanmaya uwemtikamua duke dekagmayi. <sup>4</sup>Nunú aidauk makichkish Apajuijaig kanachagmayi, imá Apajuinak eme anentus diinak, tuwí Uwig wegawa nunitaish niijaig wekayagmayi. Ditak ashí aents nugkanmaya aina nuwiya nagkamku uwemtikjamu ainawai, Apajuijai tuja Uwigjaishkam ijutkau pujustinme tusa. <sup>5</sup>Nuigtushkam ditak pegkegchaujish atsugbau, waitjuamujish atsugbau asag, Apajuí emtin ijudiagmayi.

**Kompatum nayaimpinmaya aents  
aidau etsejuinamu**

<sup>6</sup>Wainkabiajai tikich nayaimpinmaya aents, nayaimpi ejapeen nanamun, nunú ashí nugkanmaya ditash chichaaku aidau, jegkemtín, shuwin, puju, yagkú aina nuna ujaktinuyi, yamajam chicham tuke atina nuna. <sup>7</sup>Nunik senchi untsamak: “Apajuí ishamsajum emematatum, ni aents pegkegchau aidaun suwimkan susatna duka hora jegau asamtai. Ememattatum Apajuí nayaimpin, nugkan, nayantsan, yumi pukuni jiinaidaunash ashí najankauwa nunú”, timayi.

<sup>8</sup>Tai nuna ukujin patatkau tikich nanaak minis: “iYaakat Babilonia muunta nunak tsaikaje, tsaikaje! iAshí nugkanmaya aidaunak ni pegkegchau takaamujiya nuna takamtikak, apajimtai aina nu umigkatajum tusashkam jintinkagtuau asamtai!” wajabi.

<sup>9</sup>Nuniai kompatuma dushakam nanaak minis senchi untsamak: “Kuntin muunta nuna emematuk, nuniachkush dakumkamua nunakesh emematak

nijayinkish, uwejinkesh agatkamu aina nunak, <sup>10</sup>Apajuí senchi kajeká suwimkan suwak, niina aentsji nayaimpinmaya aidaush ijunas dii ijunaig, Uwijash wajaig jii azufrejai pachimjamua nui utsaatnai. <sup>11</sup>Dita nui waitiaku batsatbauk, jii senchi kegaku bukuitamuk tuke kajinkashtinai. Imannum batsamsagtinaí kuntin muunta nuna emematiaju aidau, nuniachkush kuntinun daajiya nuna nijayin, uwejinkish agatmamkau aidauk, kashi tsawaish makichkish ayamtsuk tuke waitú batsamtinaí.” <sup>12</sup>iApajuí aentsji aidauk, ichichmamag pujusag utugchat waitiamu ataish katsuntan unuimamain ainawai! iNuninak Apajuí chicham umiktatum tibauwa nunash imatikag umiinak, Jisusaish kajinas anentaimain ainawai!

<sup>13</sup>Antukbaijai nayaimpinmaya untsujuk: “Agagta: Shiig aneasagtatui Apu Jisusan umijus jakau aidauk, tuja yamaya juwi nagkamas jakau aidaushkam.” Nuna tutai, Wakaní Pegkeji chichaak:

“Dekaske, dita takaak waituina nunak ayamsagtatui, nuninak shiig aneasagtatui dita takasbaujin akiinam.”

**Nugkanmaya juwaamu**

<sup>14</sup>Niimkaman wainkabiajai yujagkim pujunum, Apajuí Uchijiyaitak Aentsmaga Akiinau aajakua numamtin, atsejutai oro najanamun atsejaku, ajak juutai hoz tutain shiig etsa etsaké awajsamun takus keemtatman.

<sup>15</sup>Nuniai jega Apajuí ememattainmaya makichik nayaimpinmaya aents jiinki, nunú yujagminum eketa nuna senchi untsuká: “Pai, yamaik tsawantak jegae, nugkanmaya ajak aidau uminag tsamakaja au juuktá”, timayi. <sup>16</sup>Tama yujagminum eketa nunú nugkanum jegaa, hozjijai tsupig ajaknak juukmayi.

<sup>17</sup>Dutikamtai jega Apajuí ememattai nayaimpinum awa nuwiya, tikich nayaimpinmaya aents dushakam hoz shiig etsa etsaké awajsamun takus jiinkibi. <sup>18</sup>Nuniai tikich nayaimpinmaya aents, jii ekemamainnum senchijí ajamu altarnumia jiinkibi. Nunik hoz etsakamun takaka nuna senchi untsuká: “iHoz etsakamu takakam duwi uva tsamakaja aanú tsupijam juuktá!”, timayi. <sup>19</sup>Tima nayaimpinmaya aents hozan takusá wajaushkam, nungká uva tsamakun tsupig yajuak, uva dajaja ijutainum chimpiabi ijunjati tusa, duka Apajuí suwimkaji ishamaina nuna iwainabi. <sup>20</sup>Uvanak yaaktan ukumtikiag ijujagmayi, tuja uva ijutainmaya numpa betsak caballo weniya aatus amugmayi. Nuniak trescientos kilómetros tumain nugkan ukatkabi.

**Sieteya imajin suwimak  
sukagtustin aidau**

**15** <sup>1</sup>Wainkabiajai nayaimpinum tikich wainchatai anentai jegagchamnun: Siete nayaimpinmaya aents aidau, Apajuí suwimak ishamain sukagtustin aimjamun makí makichik takuinakun. Nunú suwimak aina nujai, Apajuik ni kajekbaujinak inagnaktinuyi. <sup>2</sup>Wainkabiajai, vidrio saawi nayantsa imannum jii keegama numamtin atatman. Nui ijudiagmayi Apajuí arpa susamun takuinaku, kuntin muun dakumkam emematchaju aidau, kuntuu daaji numerowai agatjata tamash dakitjaju aina nunú. <sup>3</sup>Nunú aidau kantabiagmayi Moisés Apajuí inake aajakú kantamamua nuna, nuigtú Uwijá kantamtaijiya nujai, nuninak: “Apu Apajuí ashí senchigtinuh, ashí ame takasbau aina duka shiig muuntai, anentai jegagmaitisui. Ame dutikam duka pegkejai, dekaskenum aikame.

Ame ashí nugkanmaya aina nuna Apujiyaitme.

<sup>4</sup>Apuh, ashí aents aidauk aminak eme anenjammas emematjupainawai, wagki imá amek pegkejam asamin. Iman asamin ashí nugkanmaya aidauk kautjamak emematjabiagtatui, wagki ame dekas pegkeg dutikam nunak ashí dekagmaidau asag”, wajaagmayi.

<sup>5</sup>Juna tusa inagnakagmatai niimkaman, nayaimpinum jega Apajuí ememattainum tesamu shiig pegkejam tutaiya nu ujankui, chicham umiktin kayanum agagbau aun wainkabiajai. <sup>6</sup>Nunik ujanmatai siete nayaimpinmaya aents, suwimak sukagtustinun makí makichik takuinaku aidau jiiinjagmayi, duka jaanch puju dekas pegkeg tsuwatshau winchamtin wajaknun nugkuaju aidau, akachumtai oro najanamun detsepega aatus akachumau agmayi. <sup>7</sup>Iman aina nuna, cuaturo iwaaku aina nuwiya makichkia nu, siete aents nayaimpinmaya aina nuna, makí makichik copa ayatak orok najanamun, Apajuí tuke pujuwa nu suwimak ishamain sukagtustinji aimjamun tinamkabi. <sup>8</sup>Jega Apajuí ememattaiya nunak, bukuiti akijuabi. Nu bukuitamua duka Apajuí imanjiya nuna, nuigtú Apajuí senchijiyi nuna iwainabi. Imaaniku asamtai siete nayaimpinmaya aents aidau, makí makichik suwimak sukagtustin aimjamun takuinaka nuna ashimtsaigkik, makichkish waimainchau agmayi.

**Suwimak sukagtustin copanum  
aimjamua nu ukagtajum tibau**

**16** <sup>1</sup>Antukbaijai jega Apajuí ememattainmaya senchi untsu- mak, siete nayaimpinmaya aents aina

nuna chichajak: “Wetajum nunikjum siete copanum Apajuí suwimak sukagtustinji aimjamua nu nugká ukagtajum”, tabaun.

<sup>2</sup>Timatai deatkauwa nu we, copanum aimkamua nuna nugká ukagmayi. Dutikamtai ashí aents kuntuu daajiya nu agatjamu aidaun, nuigtú kuntuu dakumká najanamun emematiaju aina duka, kuchapjukag najaimainak senchi waitiagmayi.

<sup>3</sup>Tuja nayaimpinmaya aents jimaja ju copanum aimkamua nuna, nayantsanum ukagmayi. Dutikamtai nayantsak numpa wajasmay, aents maamu numpega iman. Imanikmatai ashí nayantsanum batsamin aidaun jinawagmayi.

<sup>4</sup>Nuniaí nayaimpinmaya aents kampa-tuma ju copanum aimkamua nuna, namak aidaunum, yumí pukuni jiantaiji aidaunum ukagmayi, dutikam numpa wajasmay. <sup>5</sup>Nu yumin ukatjauwa nu chichaamun antukbaijai:

“Apuh, amek pegkeg takauwaitme, iman asam juka jutikaume.

Apajuiyah pegkegmah, amek tuke pujuwaitme,

<sup>6</sup>wagki ditak amina aentsjum aidaun, nuigtú chichamjumin etsejin aidaunash mainak numpen ukajaju asagmatai, ameshkam dutiksamek numpa amame. iDekaskenum ditak aikam amain ainawai!”

<sup>7</sup>Nuigtush altar puja nuwiya: “Apu Apajuí ashí senchigtinu, ame jutikam juka pegkejai, dekas jutikame”, tabaun antukbaijai.

<sup>8</sup>Nu dutikamtai cuatro nayaimpinmaya aentsua nu, copanum aimkamua nuna etsan ukatjabi. Dutikam senchi etsantak, jii kegama imaniak aents

aidaun apeati tusa. <sup>9</sup>Dutikamtai aents aidaun shiig ishainun esagmayi. Imaninakush pegkegchaujin idaisag Apajuin ememattsuk, Apajuí senchigtin asa nuna imatikaunash ayatak pegkegchaunak chichajiagmayi.

<sup>10</sup>Nuniaí cinco nayaimpinmaya aentsua nu, copanum aimkamua nuna kuntuu ekeemsa inamtaijin ukagmayi. Dutikamtai niina inamtaijig suwe wajasmay. Aents aidaun iyashin najaimainak inayin esagmayi, <sup>11</sup>imainakush pegkegchau takainamujin idayas pujutjin yapajitsuk, ayatak pegkegchaunak Apajuinak chichajiagmayi, kuchapjin najaimainak, nuigtú etsa apeam esamujinash senchi najaimaidau asag.

<sup>12</sup>Nuigtú seis nayaimpinmaya aentsua nu, copanum aimkamua nuna namak Eufrates muunta nui ukagmayi. Dutikamtai namakak kuyua buku wajasmay, apu etsá minitainia aidaun niina suntajijai katiagtinme tusa.

<sup>13</sup>Nu nunikbaunum wainkabiagai kuntuu muun kajena nuna weninia, nuigtú tikich kuntuu nuna weninia, waitá etsegna nuna weniniashkam, kampaum wakan pegkegchau kuwauwa nuní niimtin aidaun jinaidaun. <sup>14</sup>Duka wakan iwanchdau wainchatain iwainag takainak, Apajuí ashí senchigtina nu, pegkegchau aidaun suwimkan susatna nu tsawan jegatai maaniamujin, ashí nugkanmaya apun ijumjatatus wekaetinna nu agmayi.

<sup>15-16</sup>Dutika apu aidaunak ijumjabi hebreo chichamnum nugka Armagedón<sup>c</sup> tutaya nui. “Adeagtajum Jisus chichaak: Wika kasajai betekmamtuk pachiamau minittajai. Shiig aneasagtinai aents mina dakajuinak pegkegchaun takatsuk batsatana nunú aidaun. Ditak wi

**c 16.16** “*Armagedogkak*” Palestina nugkanum awai, nuanuí Apajuí ashí senchigtina nunú inagamunum iwanch suntajin ijumjamtai maaniamtai, tawai Apajuí chichame.



minitaish datsanjugchagtin ainawai”, tiuwa nu.

<sup>17</sup>Siete nayaimpinmaya aentsua nu copanum aimkamua nuna dasenum ukagmayi. Dutikamtai jega Apajuí ememattai nayaim awa nuwiya, Apajuí ekeemtajinia senchi untsamak: Yamaik suwimkak junik ashimnake, timayi.

<sup>18</sup>Nuna timatai ipamat, chaajip, peem aidaujai senchi pampaidiagmayi. Imatbaunum nugkak yama nagkamak aents batsamsauwa duwi nagkamsash imanika ugchatain senchi ugmayi.

<sup>19</sup>Imaniau asamtai Babilonia yaakat dekas muunta duka, kempatuma imajin puunag kanagmayi. Nunisag ashí yaakat nugkanmaya aidauk yumpunawagmayi.

Apajuí yaakat Babilonia pegkegchaujinak kajimatjukchau asa, suwimkan suwak kajejuk imatikabi. <sup>20</sup>Ashí ajuntaik muja aidaujai megkaejagmayi.

<sup>21</sup>Nuigtushkam bicha muun cuarenta kilo tumainun nagkaesau aentsnak kaketiagmayi. Nu suwimak imá ishamain asamtai, Apajuin pegkegchaun chichajiagmayi.

#### Muun yaakat Babilonia suwimak jukitnuji pachisa etsekgamu

**17** <sup>1</sup>Siete nayaimpinmaya aents siete suwimak aimjamun ukajú aina nuwiya, makichik mina tajuntujun chichagtak: “Wegajai, nuwa dekas iman akiká takatai kuashat namak aidaunum eketa nu suwimak susatnun iwaintuktajame. <sup>2</sup>Nunú nuwa nujai nugkanmaya apuk ijunjaje, apajimtai aina nuna emematiagtatus, aantsag ashí nugkanmaya aidaushkam nujai pegkegchaun takainak nampejaje”, tujutmayi.

<sup>3</sup>Nuna Wakaní Pegkeji iwaintugkamtai, nayaimpinmaya aents uwegshunum jujukmayi. Nui wainkabiajai kuntin muun kapantu, siete buuktin, diez kachují ajamu, ashí iyashin Apajuí

pegkegchau chichagbau agatkamunum makichik nuwa ekeemtatman. <sup>4</sup>Nunú nuwak jaanch yamakaitkau kapantujai pachimjugbaun pegauwayi. Tuja nigka ayatak oroik, kaya pegkejuch akik aina duwi, kayauch perla tutai aina nujai iwagmamjaui. Takakuyi makichik copa ayatak orok najanamun, nuanuig piyakuyi ashí pegkegchau dakitmain aidau, wainka apajimtai ememattai aina nujai. <sup>5</sup>Tuja nijayinig chicham dekamainchau: “Yaakat muun Babilonia yaka, nuwa akiká takatai aina nuna dukují, nuigtú ashí pegkegchau dakitmain nugkanmaya aina nunash dukujiyai”, tusa agatjamuyi. <sup>6</sup>Nu dutikamuitkui diikman, nu nuwak, aents Apajuinu aina nuna numpen, duwik Jisukristu chichamen pachis etsejuidau asagmatai maawagmawa nuna numpenash uwag nampeká ekeemayi.

Nuna wainkan puyatkabiajai. <sup>7</sup>Nunia nayaimpinmaya aents chichagtak: “¿Wagka imanikmesh puyatame?” tujutmayi. “Ju nuwash wajukatnuna aniawa, nunak wi shiig ujaktajame, kuntin siete buuktin, siete kachují ajamunum nuwa entsatka nuna pachisan. <sup>8</sup>Kuntin muun kapantu wainkaum duka duwik pujujakuí, tujash jakau asa yamaik atsawai. Nuninaitak ataktú nantaki jiinkittawai, waa muun ishamain akaga nuwiya, nunik ni suwimak jukitnujin jegatatus. Ashí nugkanum batsata nu, yama nugka najannaig pujutan jukitin atí tusa daaji agatkashbau aidauk, nuna wainkag senchi puyatkagtin ainawai.

<sup>9</sup>“Juajuí dekanattawai yaki yachaita, yaki shiijash antawa nunú: Siete buukega duka, siete mujanum nuwa eketa nuna iwainawai, duka siete apu ainawai. <sup>10</sup>Cinco apua duka megkaejaje. Nunikmatai makichik apuk inamui tuja

makichik eke inamtsui, tujash nu inamkug dukap pujus inamjashtatui.

<sup>11</sup>Nunú kuntin muun kapantu duwik pujujakú jakau asa atsa nunuke, ataktú apu we inamak ocho apu atatuí, duka siete apu aajakua nuwiyagke, nigka suwimak tuke atina nui wetata nunú.

<sup>12</sup>“Diez kachují aidau wainkaum duka, diez apu eke dita inabaujin nagkamainatsu nuna iwainawai. Tujash nunú aidauk kuntin muun kapantua nujai ijunag makichik horayaik inamjagtinai. <sup>13</sup>Ditak makichkia nunak dutikawagtatus anentaimtuidau asag, ashí ditá inamtaijiya nunak, nunú kuntin muun kapantua nu inamjati tusag idaitusagtinuyi. <sup>14</sup>Dutikawag Uwigjai maadiawagtatui. Tujash Uwig ditanak depetkagtatui, Apajuí untsuká etegjamu imá ni tabaunak betek umijin aidau Uwigjai ijuna nujai; wagki nigka apu aidau Apuji, nuigtú ashí apu nugkanum inamin aina nuna Apujiya ibau asa.”

<sup>15</sup>Junashkam nayaimpinmaya aentsua duke: “Ame namak aidauun nuwa akiká takatai eketu wainkamum duka, ashí aents ashí nugkanmaya, ditash chichaaku aidau, nugka muunnumia aidau, ashí yaaktanmaya aina nuna iwainawai. <sup>16</sup>Nunú diez kachují ajamu wainkaum duka, diez apu aina nuuwai. Nunú apu aidau kuntin muun kapantua nujai, aents nu yaaktanum batsatanak kajekag, yaaktan tsainak ashí wajiijinak jajutkag wainak ukukiagtinai. Nunú yaaktanmaya aidau, apajimtai aina nu ememattajum tusa jintinkagtujakajui. <sup>17</sup>Nu nunikaja nunak, Apajuí dita anentaimtuina nunak umiktinme tusa anentaimtanak susajui. Dutikamu asag ditá inamtaijiya nunak, kuntin muun kapantua nuna idaitusag pujuinai, Apajuí tibaujiya nunú uminkati tusa. <sup>18</sup>Ame nuwa wainkaum duka yaakat

muunta nuuwai, ashí apu aidau in nunú”, tujutmayi.

### Yaakat Babilonia tsaikbau

**18** <sup>1</sup>Juna wainkan, tikich nayaimpinmaya aents dekas senchigtin, niina tsaapinjiginig nugkanak tsawan awajus akagun wainkabajai. <sup>2</sup>Nuniak shiig senchi untsumak:

“iYaakat Babilonia muunta nunak tsaikaje, tsaikaje!

iYamaik ashí wakan pegkegchau aina nuna batsamtai, nuigtú chigki tsumain dakittsá diitai aidau batsamtai wajasé!

<sup>3</sup>Nunú nuwa pegkegchau takaamua dutiksag,

ashí nugkanmaya aidau nujai pegkegchaun takainak, ditá apajimtaiji aidau emematuinak nampejaje.

Nunisag nugkanmaya apu aidauishkam nijai pegkegchaun takasaje. Wají sujin aidauishkam nunú nuwa suwinak wiyakchameawaje”, timayi.

<sup>4</sup>Tikich nayaimpinmaya chichaak:

“Mina aentsug aidautigmek, aanú yaaktanum pujutsuk jijnjatajum, anú pujusjum anuiya pegkegchau takaakjum,

dita suwimak juwamush jukijum, <sup>5</sup>aanú yaaktanmaya aidau tudaujig nayaimpinak antiastatak wajasú asamtai,

Apajuí ditanak suwinkan susagtatui, <sup>6</sup>aanú nuwa tikichin pegkegchau awajkauwa dutiksagmek, niishkam pegkegchau awajkatajum. Ni tikichin waitkasua nuna nagkaesau nigka waitkastajum.

Ni pegkegchau awajkagtak waitkagmajakua nuna nagkaesau pegkegchau awajkujum waitkastajum.

<sup>7</sup> Dutikakjum ni ememas shiig aneas  
pujusua dutiksagmek,  
ni senchi waitiak buuttinjiya  
dushakam susatajum, ni  
anentaimsag:

Wika juwig apujai betek wajasan  
eketjai,  
wajenash wajechnikai, nunin asan  
tuke waittsashtinaitjai tumamá  
wajakua duwi,

<sup>8</sup> makichik tsawanta duwik ashí ni  
waitiamujig ajittawai:  
Jaamuji, buutbauji, yapajamuji,  
inagnamunum jinum apeam atata  
nunú.

Apu Apajuí ashí senchigtina nu  
ni suwimak jukitnujin dutikatta-  
wai.”

<sup>9</sup> Nugkanmaya apu aidau nunú  
nuwajai wakeesag pegkegchaun takasú  
aidauk, nuwa kegak bukuitamun  
wainkag buutiagtinaí, <sup>10</sup>nu imanik  
suwimkan juwak waittai, wainkag ikaag  
ijunas:

“iWait anentajame ame dekas  
Babilonia yaakat muun senchigtin  
aajakuitkum,  
pachiachmau suwimak juwakum  
waitiam duwi!”, awajiagmayi.

<sup>11</sup> Wají sujin aidaushkam buutiagtinaí  
nu yaaktan anentaimtusag, nuigtuk ditá  
wajijin sumagmainuk atsustin asamtai.  
<sup>12</sup> Ditá wajijí oro, jiju plata tutai, kaya  
pegkeg akik aidau, perla aidau, jaanch  
puju dekas pegkeg, jaanch yamakaitkau,  
seda, ashí numi kugkuin aidau, ashí  
wají elefante najjai najanamun, ashí  
wají numi pegkeg aidaujai najankamu,  
cobre, jiju katsujam, kaya mármol tutai,  
<sup>13</sup> nuigtú canela, kugkuin aidau,  
inciense, mirra, puwag aidau, vino,  
aceite, harina dekas pegkeg aidau, trigo,  
kuntin takamtiktai aidau, uwig aidau,  
carro tutai caballo japitai aidau, aents  
inak agtin aidaunashkam ashí sumaja-

kuí. <sup>14</sup> Nunin asamtai yaaktan chichajui-  
nak:

“iAme wají dekas pegkeg aidau imá  
wakejuyum duka,  
yamaik atsuqtamsae!  
Ashí amina wajijum shiig pegkeg  
aidau ajutjama duka  
tuke igkugchatnaitme”, awajiag-  
mayi.

<sup>15</sup> Nunú wajiin sujin aidauk, nuna  
suwinak wiyakuch waigkú aina nunú,  
yaakat suwimak suwamu ishamain  
wajatai, ikaa wajantag anentain idajuk  
buutuínak:

<sup>16</sup> “iWait anentajai yaakat muunta  
nuna!  
jaanch dekas pegkeg najanamun,  
jaanch yamakaitkau kapantujai  
pachimjugbaun nugkug,

oro, perla, kaya pegkeg aidaujai  
nuwa iwagmamaina ibauwe  
nunak,

<sup>17</sup> ipachiachmau imanika wiyakcha-  
meamujiya duka esagkae!”  
tiagtinaí.

Nuigtushkam ashí lanchá anuntin  
aidau, nui chimpimag yujau aidau, nui  
takau aidaush, ashí aents nayantsanum  
takau aina nujai ikaag ijunas, <sup>18</sup> yaakat  
esaak bukuitamujin diisag: “Tikich  
yaakat jujú yaakat muunta ibagjai  
betekmamtin tumainuk atsawapita”,  
wajagtinaí. <sup>19</sup> Tusag wake besemag  
dekapenak nugka yukuukuntun jukiag,  
buuken yukuajag senchi unsumak  
buutuínak:

“iWait anentajai, wait anentajai  
yaakat muunta nuna!  
Ashí lanchagtin aidautinak nigki  
wiyakuch etabiajuetak pachiach-  
mau imanik esaké”, wajagmayi.

<sup>20</sup> “Nayaim batsatutijum pegkejam  
aidautijum,  
Jisus chicham etsegtugkatajum tusa  
ishiakbau aidautigmesh,

Apajuí etsegtin aidautigmeshkam ju imania jujú diisjum dakujustajum.

Wagki Apajuí atumin iikmatjamak niinak imatikau asamtai”, timayi.

<sup>21</sup>Nuna timatai, nayaimpinmaya aents dekas senchigtin, kaya muuntan juki nayantsanum ajapeak:

“Jujai betekak yaakat Babilonia muunta aushkam ajapeam atalui, nunikmataig ajumaish wainkashtin ainawai.

<sup>22</sup>Dutikamu asamtai nuwi arpa awatbau, pigkuí umpuamu, trompeta umpuamu, aents nui pujus takau, yutain dekedaukesh tuke antuekash-tinai.

<sup>23</sup>Nuigtú jii ekemamukesh, nuwediagtai jistamainak pampainamukesh tuke antuekash-tinai. Amina wajiigmin sujutjamajakajua duka,

nugkanmag dita imá senchigtin aajakú asamtai, ame tunchigminig ashí nugkanmaya aents aidauk tsanujú asam.

<sup>24</sup>Wagki jujú yaaktanun maawaju ainawai

Apajuí etsegtin aidau, aents pegkejam aidanash, nuigtú ashí aents Apajuí umijin aidanashkam”, timayi.

**19** <sup>1</sup>Nunú nagkaemakmatai aents kuashat ijunag senchi untsumkag: “iYajautsui!

Apajuí jutiin uwemtijamja duka, nigka ashí senchigtina ibau asamtai emematiagmi,

<sup>2</sup>wagki Apajuik, dekaskenum pegkeja nunak dutikin asa, nuwa akiká takataiya nunú ashí aents aidau,

apajimtai ememattajum tusa jintintuau asamtai suwimkan susae.

Nigka Apajuí inake aidau kajegkú asamtai, Apajuí iikmak niinak suwimkan suwak aikae”, wajaidaun antuk-baijai.

<sup>3</sup>Nunikag ataktushkam awentsag: “iYajautsui!

Nuwa akika takaaku tuwagtai esaak bukuita duka ajumaish tuke megkaekash-tinai.”

<sup>4</sup>Timatai veinticuatro apu aidau cuatro iwaaku aidaujai, Apajuí niina ekeemtaijin eketun tikishmatjag tsunsumawag nijayin nugkan antig pujusag emematuinak: “iYajautsui! Aatus atí”, tiagmayi.

<sup>5</sup>Nuna tiagtai nunú ekeemtaiya nuwiya chichaak:

“iAshí niina inake aidautigmesh, eme anentsá diitai, eme anentsá diishtai aidautigmesh, iina Apajuijiya duke ememattajum!” tabaun antukbaijai.

#### Uwig nuwenak jistamatnuji

<sup>6</sup>Nuigtushkam antukbaijai kuashat aents ijunag chichainak wajukmaina imatak, tuna dujaji utama imatak, ipamat pampamu wajukeya imatuinak: “iYajautsui!

Iina Apuji Apajuí ashí senchigtina nu inabaun nagkamu asamtai,

<sup>7</sup>shiiig aneasaja dakujuinaku nigki emematiagmi, wagki Uwig nuwenbau tsawan jegau asamtai,

niina nuweg yamaik uminkae,

<sup>8</sup>nuniku asamtai jaanch dekas pegkeg najanamu tsuwatchau winchamtinun apegae, duka Apajuinu pegkedijau aidau pegkeg takasbauji aina nuna iwainawai”, wajaidaun.

<sup>9</sup>Tutai nayaimpinmaya aents chichag-tak: “Agagta: Shiiig aneasagtatui Uwig nuwenku yuwamunum ipaamu aidauk.”

Nuigtushkam chichagtak: “Juka chichamak Apajuinu dekaskea nuuwai”, tujutmayi.

<sup>10</sup>Tujutkui ni wajamunum tikishmag-bajjai niina ememattasan, nuniai: “Ankaipa wika Apajuí inakegaitjai. Ame, amina yatsum aidaulai Jisus chichakbau betek umijin ainajum wisha annuketjai. Dekas Apajuí emematta.”

Jisus chicham jintinkagtuamua nunuwai aents aidaun, ditash dutiksag etsegkatnume tusa wakemitka duka tujutmayi.

#### **Caballo pujunum aents entsatkau wainkamu**

<sup>11</sup>Nunikan wainkabiajai nayaim ujanmatai, caballo pujunum “Betek Umin” “Dekaskenak Chichau” daagtin entsatkau ekeematman. Nigka suwimkan jukitnume takush dekas dutikmaina nuna dutiknuyi, tuja shiwajijai maaniakush dekas nunimai-nun maaninuyi. <sup>12</sup>Nuna jii aidauk, jii kegak wajuakeama imanibi. Untsu ni buuken kuashat atsejutajji ajibi. Tikich daaji agatjamush ajibi, tujash nunak imá nigki dekabi. <sup>13</sup>Tuja jaanch nugkuagbaujig numpai numpeagbauyi, duka: “Apajuí Chichame” daagtinuyi. <sup>14</sup>Nayaimpinmaya suntag aidauk jaanch dekas pegkeg puju tswatchau aidaun nugkuinasua, caballo puju aidaunum entsatkau midiagmayi. <sup>15</sup>Tuja Apajuí Chichame daagtina nuna weninia espada empek wajakin jiiinmayi. Nunú espadaya duwi ashí nugkanmaya aents aidaunak depetuk, niina senchijijai inamjatnuyi. Apajuí ashí senchigtina nu, ni suwimkaji ishamaina nuna aents aidaun suwakug, uva yumiji jukitasa neje najatia numamtuk awajkatnuyi. <sup>16</sup>Ni jaanch nugkuagbaujin, niina bakuin: “Apu nugkanum inamin aina nuna apuji”, tabau agatkamuyi.

#### **Kuntin muun depetkamu**

<sup>17</sup>Nuigtú wainkabiajai makichik nayaimpinmaya aents etsanum wajas, ashí chigki agkajunum nanaak yujau aidaun senchi untsuak: “Minitajum, nunikjum juwi ijunajum, Apajuí yutain kuashat umiká ju yuwatajum, <sup>18</sup>nugkanmaya apu aidaun neje, suntajá apuji neje, aents kagaman neje, caballo neje, nui entsamin aidaun neje, ashí aents inascham agkan batsamin, inaku waitkatai, eme anenchatai, eme anentai aina juna neje aidaun amuktajum”, timayi.

<sup>19</sup>Juna timatai niimkaman wainkabiajai kuntin muun, nugkanmaya apu aina nuna suntaji aidaulai tuwakag ijuntatman. Nunik caballo pujunum entsatkau ashí ni suntaji aina nujai maaniatatus. <sup>20</sup>Nunittaman kuntin muunta nunak achikmayi. Dutikak tikich waitá etsegna nunashkam achikmayi. Duka kuntin muunta nuna emtin wainchatain iwainak, aents kuntin muunta nuna daajin nijayin agatmamkag nu dakumkamunashkam emematuidaun tsanujua nuna. Nunak kuntin muunta nujai apatuk iwaakun kucha jii azufrejai pachimjamu kee abaunum ajuabi. <sup>21</sup>Tuja nuna suntaji aidaunak, caballo pujunum entsatka nuna weninia espada jiina duwi ijinabi. Dutikamtai ashí nanamtin aidaun nunú nejen yuwawag ejemakgmayi.

#### **Mil mijan**

**20** <sup>1</sup>Wainkabiajai nayaimpinmaya aents waa muun ishamaina nuna yawijin takus, cadena muunjai takaku nayaimpinmaya akaetatman. <sup>2</sup>Nunik akaiki kuntin muun kajen yaunchuk “dapi” tujakbauwa nu, iwanch tuuta awagmataiya nuna achiká jigkagmayi mil mijadai pujustí tusa.

<sup>3</sup>Dutika waa muun ishamain akaga duwi egkea shiig epeni ukumyai, juwig pujus mil mijanan ejeti, jiinki ashí aents aina nuna tsanujai tusa. Nuna mil mijanan ejematai wajumchik tsawan-chik atia akupkatnuyi.

<sup>4</sup>Nuigtú wainkabiajai ekeemtai aidaun, nui pekabiagmayi inamjatnume tusa senchi susamu aidaun. Nuigtushkam wainkabiajai Jisusan pachis, nuigtú Apajuú chichamen etsejiagtai buuké tsupigka maamu aidaun wakanin. Ditak kuntin muunta nunak, nu dakumkamunakesh emematchaju, kuntinu daajigkesh nijayin uwejinkesh agatkashbau aajakú aidaun, ataktú nantajag Kristujai mil mijan inamjagtatus nuniagmayi. <sup>5</sup>Nunuwai dekatkau nantamu atina nunú, tujash tikich aidauk mil mijan jegamtai nantajagtinuyi. <sup>6</sup>Shiig aneasagtin ainawai Apajuú aentsji aidaun dekatkau nantajagtin aina duwi nantakiu aidauk. Nunú aidauk Apajuijag tuke kanakchagtinai, ayatak Apajuú Jisukristu sacerdotaji waigkag, Kristujai mil mijadai inamjagtin ainawai.

#### Iwanch depetkamu atina nu

<sup>7</sup>Nunú mil mijan jegamtai, iwanch achikam pujaushkam akupnaktinai. <sup>8</sup>Dutikam jiinki ashí nugkanmaya Gog Magog aina nuwiyen tsanugtina, nuniak ashí ni suntaji aidaujai nayantsa kaamatkaji dekapamainchauwa iman wajas ijunjagtinai maaniaawagtatus. <sup>9</sup>Nunikag ashí nugkan jamajag mininak, yaakat Jerusalén Apajuú aneetaiija nuwi pegkejam aidaun batsataidaun tenteawag apakagmayi. Nuniagtatman Apajuú nayaimpinmaya jiin ajuntug ashí apekmayi. <sup>10</sup>Tuja iwanch ditan tsanujakua nunak kucha jii azufrejai pachimjamua nuí ajuabi, kuntin muun tikich kuntin waitá etsegna nujai egketaina-

munum. Ditak kashi tsawaijai tuke waitú chimpibiagtina.

#### Ekeemtai muun puju aunum Apajuú ekeemas aents etegjatnuji

<sup>11</sup>Wainkabiajai ekeemtai muun pujunum Apajuú ekeematman. Nugkak, nayaimpijai Apajuú nui ekeemsamtai shiig atsusagmayi. Nuniku asamtai awenaik wainnakchabi. <sup>12</sup>Wainkabiajai aents jakau aidaun, eme anentsá diitai, eme anentsá diishtai aidaujai Apajuú emtin ijuntatman. Nunikmatai Apajuú: “Papí ujaktajum aents iwaaku pujusá takasbauji agatkamua nunú, tuja tikich papí tuke batsamsatin aidaun daaji agatkamua dushakam ujaktajum” tusa, Apajuik, nunú papinumian diis dita takasbaujin waituk, duti dutiksag suwimkanak suwagmayi. <sup>13</sup>Nayantsanum jakekú aidaush, nugkanum jakau aidaujai ashí nantajagmayi. Dita nugká iwaaku pujusá takasbaujiya nuna Apajuú tujutti tus. Nunikagmatai, makí makichik ditá takatjin diijus, akanmayi. <sup>14</sup>Dutika jata nunak, jakau wakaní batsamtaijiya nujai kucha jii kegak wajuakea imania nui ajugmayi. Nuuwai Apajuijai tuke kanaaku kanaamu atina nu. <sup>15</sup>Aents pujutan jukitin agattaiya nui papiinum daaji agatjashbau aidaunak nui utsaawagmayi.

#### Yamajam Jerusalén

**21** <sup>1</sup>Wainkabiajai nayaim yamagman, nugka yamagmajai. Tuja nayaim, nugka, nayants aina juka megkaejagmayi. <sup>2</sup>Wi dekas wainkabiajai yaakat pegkejam yamajam Jerusalegka nu Apajuú eketbaunmaya akaetatman. Yaakat yamagma duka nuwa aishinu shiig iwagmamjauwama imanuyi. <sup>3</sup>Nuniamunum nayaimpinmaya senchi untsamak: “Yamaik Apajuú aents aidaujai ijunag pujustatu. Ditak niina

aentsji atinai, tuja ni ditá Apajuiji atinai. <sup>4</sup>Nuniau asa ashí ditá negaikinak emegkatjatnai. Atsutnai jaamu, buutbau, waitiaku unsubstau, najaimamu aidaushkam. Wagki duwik aajakua duka ashimnaku asamtai”, timayi.

<sup>5</sup>Apajúí niina ekeemtaijin eketu chichaak: “Witjai ashí wájí aidaun yamaajam emaanuk”, timayi. Nuna ti: “Agagta, ju chicham aina juka, dekaskea duke asa betek uminkatin ainawai”, tujutmayi. <sup>6</sup>Nuigtú chichaak: “Yamaik ashimnake. Witjai nagkamsan ashí wájí aidaun najankaunuk, tuja wikitjai nu wájí aidauk nagkanjati titinaitag nunashkam, aents kitabaunak yumi pujutá sukagtin pukuni jiina nuwiyan wainkauch agtatjai. <sup>7</sup>Depetmakaju aidaunak ashí wajiin susatnaitjai. Wi ditá Apajuiji atatjai, tuja dita mina uchig agtatui. <sup>8</sup>Tujash sapig aidau, dekaskeapi tuchau, jajegkagtin, magkagtin, tsanijimtanak yujajin, wawejatin, apajimtain emematin, ashí wait aidaujai kucha jii azufrejai pachim-jamu kee awa nui chimpimawagtinai. Nuuwai Apajuijai tuke kanaaku kanaamu atina nu”, timayi.

<sup>9</sup>Juna tujutmatai, siete nayaimpinmaya aents suwimak aimjamun ukajajua nuwiya inagnak ukajua nu tajuntujun: “Wegajai, wi Uwig nuwatkatna nuna iwaintuktajame”, tujutmayi. <sup>10</sup>Nuna tusa Wakaní Pegkeji iwaintugkamtai, nayaimpinmaya aents muja muun yakí jiiitkaunum jujukí iwagkabi. Dutika nayaimpinmaya yaakat Jerusalén pegkejam dekas Apajúí eketbaunmaya akagun iwaintugkabi. <sup>11</sup>Yaaktak Apajúí etsantajinin

etsanmayi, nunú etsanbaujiya duka kaya dekas pegkeg jaspe, diamante, vidrio saawiya imanuyi. <sup>12</sup>Yaakat peegmagbauk muun yakí jiiikbauyi, nuanuí doce waiti ajibi. Nunú waiti aina nuwig makí makichik nayaimpinmaya aents wajagmayi. Nu waiti aina nuwig Israelan uchijí doce aajakajua nuna daaji agatkamuyi. <sup>13</sup>Makí makichik yaakta yantame aina nuwig, kampá kampatum waiti ajiagmayi. <sup>14</sup>Yaaktak doce kaya batsatua nui ekeni peegjamuyi, nunú kaya aina nuwig Uwig chicham etsegtugkata tusa ishiakbau doce aajakajua nuna daaji agatkamuyi.

<sup>15</sup>Nunú mina aujta duka dekaapatai tagkana nuninun ayatak orok najanamun takakuyi, yaakat peegmagbaujiya nuna ashí waitiji aina nujai dekaapatnun. <sup>16</sup>Yaakta duka ashí yantameg nuní nuninuk agmayi, esantig wegkantijai betekayi. Nuna nayaimpinmaya aents ni tagkan takakbauwa duwi dekaapabi, dutikam dosmil doscientos kilómetros<sup>d</sup> ajibi. Esantí, yakintí, wegkantí aina duka ashí nuní nuninuk agmayi. <sup>17</sup>Nuigtú yaakat peegjamua nuna dupantinak sesenta y cinco metros dekaapabi, aentstí dekaapau ainag dutiksag.

<sup>18</sup>Nunú peegkak kaya jaspe tutaya duwi peegmagbauyi. Untsu yaaktak ayatak orok najanamuyi, iman asa vidrio saawi tsuwatchauwa imanuyi. <sup>19</sup>Yaakat peegmaku doce kaya batsatua-mua duka, makí makichik kaya dekas pegkeg aina duwi iwajamuyi: Nagkamchak kaya nu diamante tutayai iwajamuyi, jimaja ju zafirowai, kampa-tuma ju kaya ágata tutaiyai, cuatroa ju

---

**d 21.16** “*Dos mil doscientos kilómetros*” tawa duka, versión Lenguaje actual tawa nuwiya jukimui, paan antumain atí tusa. Tuja versión Reina-Valera, tikich versión popular aina duka “doce mil estadios” tuinawai.

esmeraldayai, <sup>20</sup>cincoa ju kaya óniceyai, seisa ju cornalinayai, sieteya ju crisolitowai, ochoa ju kaya berilowai, nueveya ju topaciowai, dieza ju crisoprasuwai, onceya ju kaya jacintowai, doceya ju amatistayai, ju aina jujai iwagkamu agmayi. <sup>21</sup>Doce waiti aina duka kaya perla tutaiya nu agmayi, nunin asa makí makichik waiti aina duka kaya perla tutaiya duke najanamuyi. Untsu yaakta jintiya duka ayatak orokeyi, iman asa vidrio saawiya imanuyi.

<sup>22</sup>Nunú yaakta nuwig jega Apajuí ememattainak wainkachbaijai, wagki Apu Apajuí ashí senchigtina nuna Uwigjai emematuidau asagmatai.

<sup>23</sup>Nuanuig etsaakesh, nantukesh etsantak yaaktan tsaptin emati tusaik atsumnachmayi. Apajuí etsanbauwa nu Uwig etsanbauwa nujai yaaktanak tsaptin ebau asamtai. <sup>24</sup>Ashí aents uwemkajuk nunú tsaptina nui yujasagtin ainawai. Tuja ju nugka juwiya apu aidaukitan wájí shiig pegkejuch aidaun jukiag, niina eme anentsag itajigtinai. <sup>25</sup>Yaakta waitiji aidaushkam tsawai tuke epentsacham atinai, kiyamush atsau asamtai. <sup>26</sup>Ashí nugkanmaya aidaushkam ditanu dekas wájí pegkeg aidaun etegkawag suwagtinai. <sup>27</sup>Nunú yaaktanmag aents pegkegchau dakitmain aina nuna takau aidauk, waiti aina dushakam wayachagtinai. Imá Uwijá papijin pujutan jukitin aidau daaji agatkamu aina duke wayawagtinai.

**22** <sup>1</sup>Nuna wainka ai, nayaimpinmaya aents iwaintugkabi makichik namak tsuwachau pujutan sukagtin, vidrio saawiya iman, Apajuí Uwigjai eketbaunmaya jiantatman.

<sup>2</sup>Jintak yaakta ejapeen nagkaemakuyi, tuja namaká yantamen makichik ajak pujutan sukagtin waijai, atú amainish

makichik wajabi. Nunú ajak aidauk makichik mijantin doceya imania nejebi, nantú nantutin nejeau asa; tuja nu ajaka dukega duka aents aidau etsagaktasa takataiyayi. <sup>3</sup>Awig Apajuí dakitmainuk makichikish atsutnai. Apajuí ekeemtaijig Uwigdauwa nujai nui au asamtai, niina inake aidauk niinak emematiagtinai. <sup>4</sup>Nunidau asag ni yapiinash wainiagtinai, tuja ditá nijayinig Apajuí daaji agatkamu agtinai. <sup>5</sup>Nunú yaaktanmag kashik atsutnai. Atsumchagtinai ekemataijinak, aantsag etsashkam atsumnashtinai, Apu Apajuiya nu tsaptin emamunum batsamas tuke inamá batsamtinai.

#### Kristu taatnuk namput wajaschae

<sup>6</sup>Nayaimpinmaya aents chichagtak: “Jujú chichama juka dekas asamtai dekaskeapi tumain ainagme. Apu Apajuí niina etsegtin aidaun, Wakaní Pegkeji awetim dekamtikajakua nunú, niina aentsji nayaimpinmayan awemae, wájí aidau waamak uminkagtina nuna ni inake aidaun iwaintukta tau asa”, tujutmayi.

<sup>7</sup>Jisus chichaak: “iWaamak minittajai! Shiig aneasagtinai jujú papiinum chicham uminkatin agagbauwa juna umiidauk”, tawai.

<sup>8</sup>Witjai Juagkaitjai, jujú wájí aina nuna wainkaunuk antutnash antukunuk. Juna antukan tuja wainká wajakan, nunú nayaimpinmaya aents mina juna iwaintugkaun tikishmatjabiajai emematan. <sup>9</sup>Nuniai ni chichagtak: “Minak aikajuawaipa, wishakam Apajuí inake asan, ame amina yatsum Apajuí etsegtin aidau, nuigtú ashí tikich Apajuí chichame agagbauwa nuna umiina nujai betekaitjai. Dekas Apajuí emematta”, tujutmayi. <sup>10</sup>Nuigtú chichagtak: “Chicham uminkatin jujú papiinum agagbauwa juka uukmek idaisaipa. Ju



uminkatnuk tsawantak ashí jegau asamtai.

<sup>11</sup>“Dita pegkegchaun takaidauk nunisag pegkegchaunak takaagtinai. Pujutjin pegkegchau emaidauk nunak wejiagtinai. Tuja pegkejan takaidauk, pegkegnak takaagtinai. Apajuí umijuidaushkam, nunisag Apajuinak umijiagtinai.”

<sup>12</sup>Jisus chichaak: “Dekas waamak minittajai, nuniakun makí makichik aents takasbaun diigsan akiktinnashkam takuktatjai. <sup>13</sup>Witjai tuke pujunuk, ajumaish tuke pujutnununuk”, timayi.

<sup>14</sup>Shiig aneasagtatui ashí aents jaanchjin dijajag puju awasaja duka. Nunú ainawai Kristu jaak numpen ukajua nui kajinas anentaumaidau asag, ditá tudaujinish tsagkugnaju aina nu. Nuniku asag yujag pujutan sukagtina nunash yuwawagtatui, nuninak yaakta waitijinish wayawagtatui. <sup>15</sup>Tujash aents besekú aidau, wawejatin, tsanijimta yujajin, magkagtin, apajimtain emematin aidau, ashí wait aina duka waitsuk agaa batsamtinai.

<sup>16</sup>Jisus ataktú chichaak: “Wika Jisusaitjai, wi mina aentsug nayaimpinmayan atum mina nemagtin aidautigmin ujapakti tusan awetimjime. Wika,

David wegantunum akiinauwaitjai, nuigtushkam yaya tsawak etsantama numamtinaitjai”, timayi.

<sup>17</sup>Jisus juna timatai, Wakaní Pegkeji, Uwijá nuwega nujai: “Minitá”, tiagmayi. Ju papiinum agagbauwa juna antaushkam jutiksag: “Minitá”, titinme. Kitamauk, tantatnume. Ni wakegauk yumi pujutan sukagtina nuna anenjauch uwagtinme.

<sup>18</sup>Ashí aents chicham uminkatin aidau jujú papiinum agagbaun antuina nuna tajai: Makichik aentskesh, jujú papiinum wají pachisa agagbau aina nu ai, tikichin ekek agaunak, Apajuishkam suwimak ju papiinum pachisa agagbauwa dutiksag susatnai. <sup>19</sup>Nuigtú makichik aentskesh jujú papiinum wají nagkaemagtin agagbauwa juwiyan emegkatunak, Apajuishkam yujag pujutan sukagtina nuna ayujashtinai. Tuja yaakat yamajam jujú papiinum pachisa agagbauwa nuwishkam awayashtinai. <sup>20</sup>Ju dekas uminkatnun tawa nu chichaak: “Wika dekas waamak minittajai”, tawai. Aatus atí. Takui wishakam: “Apu Jisusah, dekas waamak minitá”, tibaijai. <sup>21</sup>Iina Apuji Jisukristu ashí atumnash wait anenjamjatnume.

Aatus atí.